OʻZBEKISTON RESPUBLIKASI ICHKI ISHLAR VAZIRLIGI A K A D E M I YA

Sh. R. QOBILOV

IQTISODIYOT NAZARIYASI

Oʻzbekiston Respublikasi IIV tizimidagi oliy ta'lim muassasalari uchun darslik sifatida tavsiya etilgan

Taqrizchilar:

iqtisod fanlari doktorlari, professorlar H. Abulqosimov, T. T. Joʻrayev, S. M. Zaynutdinov

Q-55 Qobilov Sh. R.

Iqtisodiyot nazariyasi: Darslik. – T.: Oʻzbekiston Respublikasi IIV Akademiyasi, 2013. – 711 b.

Ushbu darslikda iqtisodiyot nazariyasidagi yangi qarashlar, qonun-qoidalar, XXI asrda yangilanayotgan iqtisodiyot va undagi hodisalar mustaqillik yillarida ushbu fanni oʻqitish borasida toʻplangan tajribaga tayanib, yangicha talqin etilgan.

Mavzularda nazariya amaliyot bilan uygʻunlikda, makroiqtisodiy koʻrsatkichlar tahlillari asosida bayon etilib, Oʻzbekistonning jahon iqtisodiyotida munosib oʻrin egallayotgani, iqtisodiy taraqqiyotning umumiy asoslari, bozor iqtisodiyoti qonunqoidalari, mikro va makroiqtisodiyot, globallashuv va jahon iqtisodiyotiga oid bilimlar, mustaqilligimizning iqtisodiy asoslarini izchil mustahkamlayotgan «Oʻzbek modeli»ning mohiyati yoritilgan. Darslik tinglovchi va kursantlarda Oʻzbekistonning iqtisodiy taraqqiyot yoʻliga ishonchini mustahkamlab, jamiyatning iqtisodiy negizlarini koʻz qorachigʻiday asrash tuygʻusini shakllantirishga koʻmaklashadi.

Oʻzbekiston Respublikasi IIV tizimidagi oliy ta'lim muassasalarining tinglovchi va kursantlariga moʻljallangan.

BBK 65ya73

SO'ZBOSHI

Mamlakatimiz bundan yigirma bir yil oldin oʻz mustaqilligini e'lon qilib, tarixiy taraqqiyotining yangi bosqichiga qadam qoʻydi. Bu yillar davomida bosib oʻtgan murakkab, shu bilan birga, sharafli yoʻlimizga nazar tashlar ekanmiz, Oʻzbekistonning oʻtgan davr mobaynida iqtisodiy va ijtimoiy rivojlanish borasida erishgan marra va natijalarini xolisona baholash zarurati mavjud ekanini har bir sogʻlom fikrlaydigan inson chuqur anglaydi.

Mustaqillikning dastlabki yillaridayoq Prezident Islom Karimov koʻrsatib bergan jamiyatda aniq siyosiy va xoʻjalik strategiyasi, islohotlarning ishlay oladigan yaxlit dasturi zarur ekanligidan kelib chiqib, aynan shunday davlat dasturi ishlab chiqildi. Bu dastur taraqqiyotning «Oʻzbek modeli» boʻlib, ushbu modelning asosini mashhur beshta asosiy prinsip tashkil etdi: iqtisodning siyosatdan ustunligi; davlat bosh islohotchi ekanligi; qonun ustuvorligi; kuchli ijtimoiy siyosat; islohotlarning bosqichma-bosqich amalga oshirilishi. Ushbu asos boʻluvchi prinsiplar, Prezidentning gʻoyalari va qoidalari Oʻzbekiston taraqqiyoti va milliy mafkurasining tamal toshi ekanligini ayni zamonda ijtimoiy hayotning oʻzi isbotladi.

Darhaqiqat, samarali iqtisodiyot bizning nafaqat bugungi, balki ertangi hayotimiz, hozirgi va kelajakdagi farovonligimizdir.

Bozor iqtisodiyotiga oʻtishning *besh qoidasi* markazdan turib rejalashtirishga asoslangan, ma'muriy-buyruqbozlik usulidagi taqsimlash tizimidan, totalitarizmdan, ya'ni bizga moʻrt, zaif, biryoqlama rivojlangan paxta yakkahokimligi va boy mineral xom ashyo resurslaridan nazoratsiz foydalanish asosiga qurilgan siyqa iqtisodiyotdan mustaqillikka, harakatchan bozor iqtisodiyotiga oʻtishga, yangi milliy sivilizatsiyani shakllantirishga yoʻl ochdi. Prezident Islom Karimov rahbarligida mamlakatimiz oʻzining eski munosabatlaridan bosqichma-bosqich qutula boshladi.

Ijtimoiy taraqqiyot shakli sifatida liberallashtirish oʻzining bir qator muhim tarkibiy qismlari boʻlishini talab etadi. Liberallashtirish mamlakat taraqqiyotining sifat jihatdan yangi bosqichidir. Mamlakatimizning muayyan sharoitlaridan kelib chiqib, bunday tarkibiy qismlar sirasiga siyosiy, iqtisodiy hamda davlat va jamiyat qurilishi sohalarini

erkinlashtirish kiritilgan. Bunda jamiyatni erkinlashtirishning faqat strategik ustuvor yoʻnalishlari nazariy jihatdan belgilanib qolmasdan, balki uning xususiy mulkni rivojlantirish va shu asosda mulkdorlar sinfini, real raqobatchilik muhitini shakllantirish kabi asosiy tarkibiy qismlari ham belgilab berilgan. Ayni paytda bozor infratuzilmasini bank tizimining faoliyat rivoilantirish, moliya va ko'rsatishini takomillashtirish, butun tashqi iqtisodiy faoliyatni tashkil qilish tizimini tubdan qayta koʻrib chiqish, valuta bozorini erkinlashtirish, xorijiy investitsiyalarni jalb qilish bo'yicha rag'batlantirishlarni mustahkamlash, kafolatlar va imtiyozlar doirasini kengaytirish, faol investitsiya faoliyati uchun qulay muhitni shakllantirish, har xil tekshiruvchi va nazorat qiluvchi organlarning korxonalarning xoʻjalik faoliyatlariga asossiz aralashuvlarini cheklash, bankrotlik institutining rolini oshirish, xoʻjalik sudlari faoliyatini faollashtirish ham nazarda tutilgan edi. Iqtisodiy islohotlarning voqeliklari va liberallashtirishning yangi vazifalaridan kelib chiqib, eksport salohiyatini rivojlantirish va mustahkamlash, milliy iqtisodiyotning jahon xoʻjalik tizimiga faol kirishini ta'minlash bilan bogʻliq vazifalar aynan Prezident Islom Karimov tomonidan ilgari surilgan bo'lib, bugungi murakkab davrda, garchand hozir ham jahon moliyaviy iqtisodiy inqirozi davom etayotganiga qaramay, Oʻzbekistonda uning yengil kechishi uchun asosiy omil bo'lib xizmat qilmoqda.

Mustaqillikka qadar, ya'ni 1989–1991-yillardayoq davlatimiz rahbari koʻp narsa kichik biznesni rivojlantirish ustuvorligi bilan bogʻliq ekanligiga e'tibor qaratgani, bu faqat yalpi ichki mahsulotni shakllantirishning asosiy boʻgʻini boʻlibgina qolmay, balki bandlik va aholi daromadlari manbai, xalq farovonligini ta'minlashning muhim omili ham boʻlishi kerakligi va ushbu ustuvor yoʻnalishlar ichida oʻzak vazifa etib belgilanganligini eslash oʻrinlidir.

Prezident Islom Karimovning nazariy qarashlari tizimida oʻziga xos makroiqtisodiy va jipslashtiruvchi xususiyatga ega funksiyalarni bergan holda, davlatni asta-sekin bozor munosabatlarining liberal subyektiga aylantirish bilan bogʻliq muammo muhim oʻrin tutadi. Bunda jipslashtirishning asosiy yoʻnalishi umummilliy manfaatlar va nodavlat sektordagi tadbirkorlik manfaatlarining organik integratsiyasi jarayonidir. Jipslashtirishning bu funksiyasi, ayniqsa, jahon iqtisodiyotining globallashuvi sharoitida juda muhimligini davlatimiz rahbari oʻzining tarixiy ahamiyatga ega «Oʻzbekiston XXI asrga intilmoqda» nomli asarida bayon etib bergan.

Rivojlangan bozor iqtisodiyotiga ega demokratik dunyoviy davlat qurish, kuchli fuqarolik jamiyatini shakllantirish boʻyicha Oʻzbekiston Respublikasi oldida turgan maqsadlardan kelib chiqib, Prezident Islom Karimov mamlakatning jahon hamjamiyatiga integratsiyalashuvi qonuniyatini avvaldanoq yaqqol tasavvur qilgan davlat rahbaridir. Bu esa oʻzbek modelining globallashuv jarayonlariga samarali moslashishi va oʻz taraqqiyotida yangi turtki olishga imkon yaratdi. Chunki iqtisodiyotdagi tub islohotlar Oʻzbekistonda jahon moliyaviy inqirozining salbiy ta'sirini bartaraf etish asosini tashkil etadi.

Davlatimiz rahbari Islom Karimovning mustaqillikning 20 yilligi arafasida chop etilgan «Oʻzbekiston mustaqillikka erishish ostonasida» kitobida yuqorida qayd etilgan masalalar batafsil yoritilib, unda: «Markazlashtirilgan rejalashtirish va taqsimlash mexanizmi asosida faoliyat koʻrsatgan butun sovet tizimiga xos boʻlgan illatlar bilan bir qatorda, respublikamiz iqtisodiyotining bir yoqlama rivojlanib, faqat xom ashyo yetkazib berishga yoʻnaltirilgani, iqtisodiyot, ekologiya va aholi genofondiga halokatli ta'sir ko'rsatgan to'la va mutlaq paxta yakkahokimligi yurtimizdagi vaziyatni jar yoqasiga olib kelib qoʻygan edi. Buning oqibatida ulkan tabiiy, mineral xom ashyo, mehnat va inson salohiyatiga ega bo'lishiga qaramasdan, respublikamiz sobiq SSSRda aholi turmush darajasi, ijtimoiy va gumanitar sohalar rivoji boʻyicha oxirgi oʻrinlardan birida turar edi. SSSR parchalanib ketganidan keyin vujudga kelgan sharoitda iqtisodiyotning fojiali ravishda inqirozga yuz tutishi, inflyasiyaning o'ta keskin o'sishini jilovlash, ilgari qaror topgan xoʻjalik, ishlab chiqarish va moliyaviy aloqalarning butunlay izdan chiqib ketishi oqibatlariga barham berish, ishsizlikning yanada avj olishiga yoʻl qoʻymaslik favqulodda muhim ahamiyat kasb etganligi» ma'lumotlar olish mumkin.

Oʻzbekiston xalqi oʻz rahbari Islom Karimov rahnamoligida mustaqillikning ilk kunlaridan boshlab oʻz umrini oʻtab boʻlgan eski mustabid sovet tizimidan voz kechib, jahon tajribasini har tomonlama puxta oʻrganish, umuminsoniy qadriyatlarni chuqur anglash, milliy urfodat va an'analarimizni asrab-avaylash va yanada mustahkamlash asosida ijtimoiy yoʻnaltirilgan bozor iqtisodiyotiga asoslangan ochiq demokratik davlat barpo etishga azmu qaror qildik. Yuqoridagi omillar mamlakatimiz iqtisodiy, ijtimoiy, moliyaviy xavfsizlikni ta'minlash poydevori vazifasini bajarmoqda.

Ushbu darslikda iqtisodiyotga oid nazariy xulosalarni ijtimoiy hayot bilan bogʻlashga harakat qilindi. Prezident Islom Karimov asarlarida

bayon etilgan ilmiy qoidalarni mamlakatimizda amalga oshirilayotgan iqtisodiy islohotlar amaliyoti bilan bogʻlashga katta ahamiyat berildi. Unda XXI asr iqtisodiyotidagi jiddiy oʻzgarishlar inobatga olindi. Oliy ta'lim muassasalarida ta'lim olayotgan yoshlarimiz jadal yangilanayotgan iqtisodiyot sharoitida yashashi va ishlashi uchun, Prezident ta'biri aytganda, «bugungi tez oʻzgarayotgan hayot voqeligiga ongli qarab, mustaqil fikrlashi va diyorimizdagi barcha oʻzgarishlarga daxldorlik tuygʻusi bilan yashash zarurligi», ularga moslasha borishlari kerak bo'ladi. Buning uchun «Iqtisodiyot nazariyasi» beradigan fundamental bilimlarni egallab olishga toʻgʻri keladiki, bu haqda davlatimiz rahbari Islom Karimov mustaqillikning ilk yillarida «Prezidentdan to oddiy fuqarogacha, yoshi va vazifasidan qat'i nazar – hammani bugungi zamon talablariga, bozor iqtisodiyoti qonun-qoidalariga oʻrgatish» muhim vazifa ekanligini alohida ta'kidlagan. Shu bois «Iqtisodiyot nazariyasi» fani tinglovchilarning iqtisodiyotning rivojlanishi va mazmuni, jamiyatda ro'y berayotgan iqtisodiy jarayonlar mohiyatini tushunib yetishi, iqtisodiyotning sir-asrorlarini idrok etishi, Oʻzbekiston mamlakatlari iqtisodiy taraqqiyotining oʻziga xos jihatlari, mohiyati, rivojlanish bosqichlari haqidagi bilimlarini shakllantirishda yaqindan yordam beradi.

Mazkur darslikka asos qilib olingan yana bir prinsip – nazariy tushunarli uslubda yetkazish, ya'ni mavzuga oid ayrim bilimlarni xulosalar, iqtisodiyot nazariyasi fanining asosiy tushunchalari, tafsilotini yoritishdan iborat bo'ladi. Shu bois unda ilmiy qoida va xulosalarning bayoniga asosiy e'tibor qaratildi, keltirilgan raqamlarda O'zbekistonning o'z taraqqiyot yo'liga bo'lgan ishonchi, fuqarolarimiz tashabbuskorligi, bunyodkorlik, yaratuvchanlik g'oyasi bilan yashayotganligi va albatta, oʻz kelajagini yanada farovon etishga intilishi ifodalangan. Bu raqamlar, eng avvalo, odamlarimiz ongidagi oʻzgarishlar mahsuli sifatida mamlakatimizda ro'y berayotgan izchil iqtisodiy o'sishni aks ettirib, fuqarolarimizning mehnatga, jamiyatning iqtisodiy negizi bo'lgan mulkka bo'lgan munosabatining mahsuli ekanligini, joylarda, nihoyat, taraqqiyotni belgilovchi kuch – tadbirkor va fermerlarga mustaqillikning dastlabki yillaridagidek «oʻgay koʻz» bilan emas, balki xususiy mulkka iqtisodiyotning hal etuvchi tayanchi sifatida munosabatda boʻlinayotgani mahsuli ekanligi dalolatidir.

Hozirgi vaqtda jamiyatimizda iqtisodiyot olamini bilishga intilish kuchaydi, ammo uni faqat iqtisodiy qiyinchilik bilan izohlash notoʻgʻri boʻladi. Gap shundaki, bugungi kunga kelib, mamlakatimizda kichik biznes va xususiy tadbirkorlik faoliyatini yanada qoʻllab-quvvatlash va rivojlantirish chora-tadbirlari hamda unga e'tibor yanada ortib bormoqda. Tadbirkor boʻlib yaxshi daromad topish uchun ishning koʻzini, iqtisodiy faoliyatning barcha sir-asrorlarini va nozik tomonlarini chuqur bilishga intilish kuchaydi. Shuningdek, iqtisodiyot nazariyasini bilish nafaqat amaliy faoliyat uchun, balki iqtisodiy ish bilan shugʻullanmaydigan kishilar uchun ham kerakligini hozirgi kunda dunyoda davom etayotgan jahon moliyaviy-iqtisodiy inqirozi kun tartibiga olib chiqdi, chunki ular hech boʻlmaganda iste'molchi (xaridor) boʻlib maydonga chiqadilar, pul topadilar, uni sarflaydilar, oila budjetini yuritadilar. Umuman olganda, iqtisodiy munosabatlarga kirishmay yashaydigan inson boʻlmaydi.

Mazkur darslik iqtisodiyot nazariyasini mustaqil oʻrganish talablaridan kelib chiqqan holda, oʻquvchilarda yangicha iqtisodiy fikrlash koʻnikmasini shakllantirish zaruratini ham hisobga oladi. Unda tinglovchilarning mustaqil bilim olishlari, yozma ishlar tayyorlashlari inobatga olinib, bir qator ma'lumotlar kengroq yoritildi.

Ma'lumki, Davlat ta'lim standartlari doirasida bir qancha darslik, o'quv qo'llanmalari va ma'ruzalar kurslari amal qilishi mumkin. Shu bois, biz ushbu darslikni muqobil darslik sifatida tayyorlashni lozim topdik. Mazkur darslikni tayyorlashda yetakchi olimlar tomonidan yaratilgan darsliklar, mustaqillik yillarida aynigsa, 2006-yilda hammualliflikda chop etilgan «Iqtisodiyot nazariyasi» darsligidan foydalanildi. Muallif uni tayyorlashda koʻrsatgan begʻaraz yordamlari uchun professorlar A. O'lmasov va A. V. Vahobovga samimiy minnatdorchiligini bildiradi.

Darslikning «Iqtisodiyotni tartibga solishda davlatning roli» nomli 18-mavzusi iqtisod fanlari nomzodi S. Ye. Yernazarov bilan hammualliflikda yozildi.

Darslik oʻquv dasturi (2011-y.) asosida tayyorlangan. Muallif darslik toʻgʻrisida bildirilgan barcha fikr-mulohazalarni mamnuniyat bilan qabul qiladi va keyingi ishlarida ularni inobatga oladi.

1-BO'LIM. JAMIYAT IQTISODIY TARAQQIYOTINING UMUMIY ASOSLARI

1-MAVZU. IQTISODIYOT NAZARIYASI FANINING PREDMETI VA VAZIFALARI

1. Iqtisodiyot nazariyasi fanining predmeti va metodi

Iqtisodiyot nazariyasi – umumiqtisodiy fan, uning predmeti kishilar iqtisodiy xatti-harakatining shart-sharoiti va qonun-qoidalaridir. Mazkur fanning metodologik tamoyillari iqtisodiyotni tizim sifatida oʻrganish, unga noiqtisodiy omillar va tabiiy shart-sharoit, texnologik oʻzgarishlar ta'sirini nazarda tutish, iqtisodiyotni statistikada emas, balki dinamikada oʻrganishdir.

Ushbu fanda iqtisodiy hodisalarni kuzatish, abstraksiyalash orqali nazariy xulosa chiqarish, nazariy modellar yaratish, pozitiv va normativ usullarni qoʻllash, miqdoriy va sifatli tahlilni birlashtirish, oddiy hodisalardan murakkab hodisalarni oʻrganishga oʻtish, iqtisodiyotni uning turli darajalarida oʻrganish kabi usullar qoʻllaniladi. Bu fan oʻz predmetini oʻrganishda shunday qonun va kategoriyalarni qoʻllaydiki, ular umumiqtisodiy va ayrim tizimlarga xos boʻladi. Fanning funksiyalari iqtisodiy hodisalarni idrok etish, kishilarga iqtisodiy bilim berish, boshqa iqtisodiy fanlarga nazariy asos boʻlish, shuningdek, iqtisodiy siyosatga oid amaliy tavsiyalar berishdan iborat.

Iqtisodiyot nazariyasi fani predmetiga oid qarashlar (ta'riflar) quyidagicha:

□ iqtisodiyot nazariyasi − boylik toʻgʻrisidagi fan;
□ iqtisodiyot nazariyasi − jamiyatda yuz beradigan iqtisodiy hodisalar, jarayonlar va ularning qonun-qoidalarini oʻrgatuvchi fan;
□ iqtisodiyot nazariyasi − kishilar tomonidan har-xil tovarlarni (bugʻdoy, mol goʻshti, palto va h.k.) ishlab chiqarish maqsadida noyob va cheklangan unumli resurslardan (yer, ishlab chiqarishga moʻljallangan tovarlar, mehnat, mashinalar) foydalanish toʻgʻrisidagi fan;
□ iqtisodiyot nazariyasi − ayirboshlash, pulli bitimlar bilan bogʻliq iqtisodiy faoliyat turlari haqidagi fan;

□ iqtisodiyot nazariyasi – ishlab chiqarish insonning iste'mol
borasida o'z vazifalarini qanday bajarayotganligi to'g'risidagi fan;
□ iqtisodiyot nazariyasi – kishilarning kundalik ishbilarmonlik
faoliyati, tirikchilik manbai, oʻz mablagʻidan foydalanishi toʻgʻrisidagi
fan va h.k.
Iqtisodiyot nazariyasi fanining vazifalari quyidagicha:
□ iqtisodning sir-asrorlarini oʻrganish, ularni ommaga yetkazib,
iqtisodiy bilim saviyasini oshirish;
□ boshqa iqtisodiy fanlarga ilmiy-uslubiy asos boʻlib xizmat qilish.
Boshqa fanlar iqtisodiy nazariya asoslab bergan kategoriya va qonunlarga
tayangan holda oʻz predmetini oʻrganadi. Ayni vaqtda nazariya boshqa
fanlar xulosalariga asoslanib iqtisodiy hodisalarni umumlashtiradi;
amaliy tavsiyalar berish. Bu tavsiyalar umumiqtisodiy siyosatga
tegishli boʻladi. Ular iqtisodiy oʻsishni va uning samaradorligini oshirish,
aholini toʻla ish bilan ta'minlash va uning farovonligini oshirish,
iqtisodiyotni barqarorlashtirish va inflatsiyani bartaraf etish, iqtisodiy
integratsiyalash va tashqi aloqalarni kengaytirish kabi umumiy ahamiyatga ega tavsiyalardir.
Iqtisodiyot nazariyasi fanining uslublari:
□ umumiylik va xususiylikning birligi;
☐ ilmiy abstraksiya;
□ tarixiylik va mantiqiylikning birligi;
□ nazariyani ijtimoiy amaliyot bilan bogʻlash;
□ induksiya va deduksiya;
□ analiz va sintez;
☐ miqdor va sifat tahlilining yaxlitligi.
Iqtisodiyotning doimiy va bosh masalasi – jamiyat ehtiyojlarining
cheksizligi va iqtisodiy resurslarning cheklanganligidir.
Iqtisodiyot – turli-tuman iqtisodiy faoliyatlarni, ishlab chiqarishning
muayyan usulini hamda infratuzilmayiy muassasalarini yaxlit qilib

muayyan usulini hamda infratuzilmaviy muassasalarini yaxlit qilib birlashtiruvchi iqtisodiy tizim. **Iqtisodiy faoliyat** – insonlarning moddiy va ma'naviy ne'matlar

Iqtisodiy faoliyat – insonlarning moddiy va ma'naviy ne'matlar ishlab chiqarish, iste'molchiga yetkazib berish hamda xizmatlar ko'rsatishga qaratilgan, bir-biriga bog'liqlikda amalga oshiriladigan faoliyatlari.

Iqtisodiyotning asosiy muammosi – bu iqtisodiy resurslar cheklangan sharoitda jamiyatning cheksiz ehtiyojlarini qanday qilib toʻlaroq qondirib borish mumkinligi toʻgʻrisidagi masaladir.

Iqtisodiyotning asosiy muammosini hal qilish yo'llari:

- iqtisodiy resurslar miqdorini koʻpaytirish;
- resurslar unumdorligini oshirish;
- resurslardan foydalanishning turli muqobil variantlaridan eng samaralisini tanlash;
 - resurslarni samarali uygʻunlashtirish;
 - > jamiyat ehtiyojlarini cheklash.

2. Iqtisodiyot nazariyasi fanining metodologiyasi

Metodologiyaning falsafiy lugʻatlardagi birinchi talqiniga koʻra, u biron-bir fanda qoʻllaniladigan tadqiqot metod (usul)larining majmui, ikkinchi ma'nosi esa, ilmiy bilish va dunyoni oʻzgartirish metodi haqidagi ta'limotdir.

Bunday fikr boshqa koʻplab adabiyotlarda ham uchraydi, ammo metodologiyani metodlarning oddiy yigʻindisi, deb talqin etish uning tub anglash imkonini bermaydi. Shuningdek, mohiyatini metodologiyasini umumfalsafiy (universal), umumiy va xususiy ilmiy metodlarning yigʻindisi, deb hisoblash ham masalaga yuzaki yondashuvni anglatadi. Ayni vaqtda, fan metodologiyasi bilan fanning metodologik funksiyasi oʻrtasida farq borligini ham yodda tutish lozim. Ba'zi olimlar «metodologiya» tushunchasida voqelikni oʻrganishning xususiy yoʻllari va metodlarini birlashtirishga urinadilar. Yana boshqa guruh olimlar metodologiya deganda, voqea va hodisalarni bilishning falsafiy anglaydilar. Uchinchi guruh mualliflar metodologiyani iihatlarini bilan aynan bir, deydilar. To'rtinchi toifa tadqiqotdialektika chilar metodologiyani falsafaga daxli boʻlmagan alohida fan yoʻnalishi, beshinchi guruh mutaxassislar esa, metodologiya metod emas, balki u haqidagi ta'limot, nazariya, fan, deb ta'kidlaydilar. Metodologiyaning alohida fan deb tan olinishiga ba'zi olimlar qarshi chiqadilar¹. Fikrimizcha, metodologiya fan emas, fanning nazariy asosi, ilmiy bilishning poydevoridir.

«Falsafiy ensiklopedik lugʻat»da ta'kidlanishicha, metodologiya – nazariy va amaliy faoliyatni tashkil etish, qurish prinsiplari, usullari tizimi, shuningdek, bu tizim haqidagi ta'limotdir. Professor N.Shermuhammedova ham shu yondashuvga asoslanib, «metodologiya – bilish faoliyati yoʻllari haqidagi ta'limot», – deb yozadi.

 $^{^{1}}$ Қаранг: *Керимов Д. А.* Философские основания политико-прововых исследований. – М., 1986. – С. 29.

Metodologiya — bu fan predmetini oʻrganishga qanday ilmiy tamoyillar asosida yondashishni bildiradi. Iqtisodiyot nazariyasida kishilarning xoʻjalik faoliyati tizimiy yondashuv asosida oʻrganiladi. Bunda yaxlit iqtisodiyot turli bloklarga — qismlarga ajratilib, har biri alohida oʻrganiladi, ulardan har biriga xos boʻlgan xususiyatlar aniqlanadi. Masalan, yaxlit bozor resurslar bozori, iste'mol tovarlari bozori va moliya bozorlariga ajratilib oʻrganiladi. Ajratilgan bloklar tahlil etilgach, ular faoliyatining shart-sharoiti va belgilari, ular qanday funksiyani bajarishi aniqlanadi. Iqtisodiyotning turli jihatlari tahlilidan soʻng ular birgalikda qaraladi, turli bloklar majmuidan iborat iqtisodiyot yaxlitlikda nima ekanligi, u qanday rivojlanishi koʻrsatiladi. Yana bozor misoliga qaytsak, uning har bir blokining funksiyalari oʻrganilgach, ular birgalikda yagona bozor sifatida qaraladi va bozorning umumiy funksiyalari ta'riflanadi.

Iqtisodiyot nazariyasida qoʻllanadigan yana bir metodologik yondashuv bu iqtisodiyotni sof emas, boshqa, ya'ni gʻayriiqtisodiy omillar ta'sirini hisobga olgan holda oʻrganishdir. Iqtisodiyot birlamchi boʻlgani holda siyosiy, ijtimoiy, milliy demografik va hatto ruhiy-axloqiy omillar ta'siriga beriladi. Boshqa sohalardagi oʻzgarishlar iqtisodiyotda ham oʻz aksini topadi. Jamiyatda tartibsizlik, siyosiy beqarorlik yuzaga kelsa, bu iqtisodiyotning rivojiga putur yetkazadi, chunki kishilar vahimaga tushib ishdan soviy boshlaydilar. Milliy nizolar ham shunday salbiy oqibatga olib keladi. Kishilarda ruhiy koʻtarinkilik boʻlsa, ular iqtisodiy faol boʻladilar. Aksincha, ruhiy tushkunlik ularda befarqlikni hosil etib, faollikni soʻndiradi.

Iqtisodiyot va tabiat oʻrtasidagi oʻzaro bogʻlanishni hisobga olishdir. Iqtisodiyot tabiatdan tashqarida boʻlishi mutlaqo mumkin emas, chunki bu uning moddiy tayanchidir. Tabiatdan olingan resurslardan foydalanmay turib, ishlab chiqarishning boʻlishi mumkin emas. Tabiiy sharoit ishlab chiqarishning qanday boʻlishini belgilab beradi. Qazilma boylik qayerda koʻp boʻlsa, shu yerda undirma sanoat, yer yaxshi joyda dehqonchilik, yaylovlar koʻp joyda chorvachilik, oʻrmonzor koʻp yerda yogʻochni ishlash sanoati, suvga yaqin joyda kemasozlikning rivojlanishi bunga misol.

Iqtisodiyot nazariyasida iqtisodiyotning tabiatga qayta ta'siri ham hisobga olinadi. Tartibsiz iqtisodiy faoliyat tabiatga putur yetkazadi, undagi ekologik muvozanatni buzadi, ekologik xatarni yuzaga keltirishi mumkin, bu bilan iqtisodiyotning tabiiy tayanchi darz ketadi. Mana shu muammo ham nazariyada uning predmeti nuqtai nazaridan tahlil etiladi.

Iqtisodiyotni statikada (turib qolgan holatda) emas, balki dinamikaga (rivojlanishga) asoslanib oʻrganishdir. Bu bilan iqtisodiy hodisalarning kelib chiqish sabablari, undagi oʻzgarishlar qanday borishi bilib olinadi. Iqtisodiyotning rivojlanishiga xos boʻlgan tendensiyalar (moyillik) aniqlanadi. Bular nimaga olib kelishi va shunga koʻra xoʻjalik faoliyatini kelajakda qanday tashkil etish kerakligi aniqlanadi.

Mazkur fan iqtisodiyotga xos qonun-qoidalarning obyektiv boʻlishidan, kishilar ularni oʻz bilganicha bekor qila olmasligidan, lekin ularni anglab yetgan holda ular talabiga moslashib faoliyat koʻrsata olishlaridan kelib chiqadi.

Nazariyadagi boshqa bir metodologik tamoyil bu iqtisodiyotni texnologik oʻzgarishlarni hisobga olib oʻrganishdir. Texnologiyaning oʻzi iqtisodiyot nazariyasining predmeti emas, shu bois uni texnikaviy fanlar oʻrganadi. Ammo texnologiya iqtisodiyotning moddiy asosi boʻlganidan, undagi jiddiy oʻzgarishlar iqtisodiy faoliyatni tubdan yangilab yuboradi. Mana shu narsani nazariya e'tibordan qochirmaydi. Masalan, nazariyada «Katta sikllar – katta toʻlqinlar» degan tushunchalar borki, bular texnologiyadagi katta burilishning iqtisodiyotga ta'sirini nazarda tutadi. Mutlaqo yangi texnologiya paydo boʻlishi bilan iqtisodiyot rivojida yangi davr – katta sikl boshlanadi, bu odatda 50–60 yil davom etadi. Mana shularni nazariya tahlil etadi.

Tahlil uslublari. Iqtisodiyot nazariyasi predmetini oʻrganishda idrok etishning ikki bosqichi qoʻllaniladi.

Birinchi bosqich kuzatish bosqichi hisoblanadi. Bu bosqichda iqtisodiyotga oid ma'lumotlar toʻplanadi, ular boshqa noiqtisodiy ma'lumotlardan ajratib olinadi. Ularga dastlabki tarzda umumiy baho beriladi va hali sinab koʻrilmagan xulosa — gipoteza olgʻa suriladi.

Ikkinchi bosqichda gipotezalar boshqa ma'lumotlarni oʻrgangan holda sinab koʻriladi, ular tasdiqlansa, qabul qilinadi, ular asosida nazariy qonun-qoidalar ta'riflanadi,

Nazariy xulosa amaliyot bilan solishtirib koʻriladi. Agar real iqtisodiy hayot nazariy qoidani doimo tasdiqlab tursa, demak, u toʻgʻri boʻlib chiqadi. Agar aytilgan hodisa qisman tasdiqlansa yoki tasdiqlanmasa, ta'riflangan qoidani qaytadan koʻrish, zarur boʻlsa, toʻldirish yoxud undan tamomila voz kechish kerak boʻladi.

Iqtisodiyot nazariyasi tabiiy fanlardan farqliroq oʻz xulosalarini laboratoriyadagi tajriba yoki tabiatdagi sinovlar yordamida tekshirib koʻra olmaydi. Agar nazariyada iqtisodiy beqarorlik boʻladi, uning belgilari ishlab chiqarishning pasayishi, ishsizlik va inflatsiya deb qaralsa, uni tasdiqlash uchun tajriba yoki sinov oʻtkazib boʻlmaydi. Bularni faqat kuzatish, ular haqida ma'lumot toʻplash va bu ma'lumotni nazariy umumlashtirish mumkin, xolos.

Nazariyada, tasodifiy yoki juz'iy emas, balki doimo takrorlanib turadigan iqtisodiy hodisalarni anglash uchun abstraksiyalash usuli qo'llaniladi. Bu usul nazariya uchun asosiy hisoblanadi. Bu usul yordamida iqtisodiy hodisalar ularga ta'sir etuvchi o'tkinchi va ikkinchi darajali omillardan xoli etib olinadi, ularga nazariy baho beriladi. Abstraksiyalashda taxmin usuli qo'llanadi, ya'ni ma'lum shart-sharoit bo'lganda nima yuz berishi taxmin etiladi. Masalan, narxning talabga ta'sirini bilish uchun talabga ta'sir etuvchi boshqa omillar o'zgarmay turibdi deb taxmin qilinadi. Shunday sharoitda narx va talabning oʻzgarishi qanday boʻlishi aniqlanadi. Boshqa bir misol: texnologiyaning mehnat unumdorligiga ta'siri aniqlanganda narx-navo ishchilarning malakasi, ishlab chiqarishning tabiiy sharoiti, tovarlarning sotilib turishi oʻzgarmaydi deb taxmin qilinadi. Ammo bunday taxmin qilish amalda bor narsalarni vaqtincha nazardan kechirib turishni bildiradi. Hayotda uchramaydigan fantastik hodisalarni, masalan, boshqa planetalardan odamsimon jonzotlar keldi yoki kelmadi, deb hech qachon taxmin qilinmaydi.

Abstraksiyalash asosida mantiqiy usul yotadi, bunda mantiq yordamida iqtisodiy hodisalarning oʻzaro bogʻlanishi, ularning umumiyligi va farqlari, kelib chiqish sabablari va oqibatlari aniqlanib olinadi.

Abstraksiyalash – bu iqtisodiyotning nazariy modelini yaratishdir. Lekin model real iqtisodiy voqelikni aks ettirgandagina ilmiy boʻladi. *Model aslida iqtisodiy voqelikning nazariy ifodasidir*.

Murakkab iqtisodiy hodisalarni dastlab tahlil etish va soʻngra tushuntirib berish uchun sodda yoki murakkab iqtisodiy modellar qoʻllaniladi. Sodda modelga misol tariqasida iqtisodiy sirkulatsiya (oborot) modelini olish mumkin. Bu modelda iqtisodiyot ishtirokchilari faqat firmalar va xonadonlardan iborat, ular boshqalar bilan aloqa qilmaydi, ular bor tovarini va pulini bozorga tashlaydi, deb taxmin qilinadi. Shu modelga binoan iqtisodiyotning asosiy ishtirokchilari oʻrtasidagi aloqalar tahlil qilinadi, bu aloqalar bir-biriga tovar va

xizmatlar yetkazib berishdan iborat va shunga mos ravishda ular oʻrtasida pulning oldi-berdisi yuz berishi haqida xulosa chiqariladi. Murakkab modellar tuzilganda koʻpchilik subyektlar oʻrtasidagi va koʻp turdagi iqtisodiy aloqalar olinib, ular matematik hisob-kitoblar asosida koʻrib chiqiladi, bunda aloqalarning miqdoriy tahlili oʻtkaziladi.

Iqtisodiyot nazariyasi oʻz predmetini tahlil etganda pozitiv va normativ usullarni qoʻllaydi. **Pozitiv usul** — bu iqtisodiy voqelikni nazariy jihatdan qandayligini tushuntirib berish, ya'ni uni ilmiy talqin etish. **Normativ usul** — bu iqtisodiy voqelikning amalda qanday boʻlishi kerakligini va buning uchun nima qilish zarurligi xususida tavsiya berishdir. Masalan, pozitiv usulda stipendiya mohiyatan nimaligi tushuntiriladi, ya'ni uni yoshlarga ular oʻqigan paytida beriladigan yordam deb talqin etilsa, normativ usulda uni qachon va qanchaga oshirish zarurligi asoslanadi. Pozitiv usul nazariy talqinni bildirsa, normativ usul amaliyotda nima boʻlishini bildiradi.

Nazariyada tahlilning induktiv va deduktiv usullari ham ishlatiladi. Induktiv usul qoʻllanilganda hodisalarni kuzatishdan ularni umumlashtirishga oʻtilib, umumiy xulosalar chiqariladi. Deduktiv usul qoʻllanilganda esa shakllangan nazariy xulosalar asosida iqtisodiyotdagi ayrim hodisalar tahlil etiladi. Bu bilan aytilgan qoidalar naqadar haqqoniy ekanligi sinab koʻriladi.

Nazariyada oddiy hodisalar tahlilidan murakkab hodisalar tahliliga oʻtish ham qoʻllaniladi. Masalan, dastlab individual talab, soʻngra ayri bozor talabi va nihoyat jamiyatdagi yalpi talab tahlili oʻtkaziladi. Yana bir usul – bu hodisalarni turli darajada olib oʻrganishdir.

Nazariyada iqtisodiyotning qonun-qoidalari uch xil darajada oʻrganiladi:

mikrodarajada – bunda xonadonlar va firmalarning iqtisodiy xattiharakati, ayrim bozordagi oʻzgarishlar oʻrganiladi;

makrodarajada – bunda butun iqtisodiyotdagi, aniqrogʻi milliy iqtisodiyot darajasidagi, milliy bozordagi hodisalar va jarayonlar oʻrganiladi;

metadarajada – xalqaro global miqyosdagi, jahon xoʻjaligidagi yuz beradigan jarayonlar, ularga xos boʻlgan qoidalar oʻrganiladi.

Har uchala daraja oʻzaro bogʻliqlikda koʻrib chiqiladi, chunki mikrodarajadagi iqtisodiy faoliyat yaxlitlikda makrodarajani, turli mamlakatlardagi makrodarajadagi iqtisodiyot metadarajani, jahon iqtisodiyotini yuzaga keltiradi. Turli darajadagi iqtisodiyot oʻrganilganda, ularning har biriga xos qonun-qoidalar alohida koʻrib chiqiladi.

Nazariyada miqdoriy tahlil ham qo'llaniladi, ammo bu yo'l bilan olingan ma'lumotlar nazariy xulosa chiqarishga xizmat qiladi. Masalan, miqdoriy tahlil ishsizlar sonining kamayishini ko'rsatsa, iqtisodiyotda bandlik oshayapti degan, bordi-yu bu tahlil inflatsiya pasayishini koʻrsatsa, pul muomalasi barqarorlashib borayapti degan xulosalarga kelamiz. Miqdoriy tahlil o'tkazilganda turli formulalar qo'llaniladi, ular vositasida igtisodiyotga oid hisob-kitob ishlari olib boriladi. Bular iqtisodiy qonun-qoidalarning naqadar amal iqtisodiyotda xos bo'lgan tendensiyalar bilib olinadi. Miqdoriy tahlil natijalari turli illustratsiyalar – chizmalar, rasmlar, egri chiziqlar Iqtisodiyotdagi oʻzgarishlarni yordamida tasvirlanadi. ifodalovchi miqdoriy koʻrsatkichlar oʻzgaruvchan qiymatlardan iborat boʻlib, bunda bir qiymat ikkinchisiga, ikkinchisi uchinchisiga va hokazo bogʻliq bo'ladi. Masalan, resurslar narxining o'zgarishi xarajatlar o'zgarishini, o'z navbatida bu narxning, binobarin chiqarilgan tovarga talabning oʻzgarishini yuzaga keltiradi. Bunday oʻzaro bogʻliqlik chizmalarda aks ettiriladi. Bular yordamida nazariy g'oya atroflicha, ya'ni tasvir vositasida ham ifoda etiladi va shuningdek, oʻzgaruvchan qiymatlar oʻrtasidagi bogʻliqlikni aniqlashga xizmat qiladi. Chizmalar doirasimon boʻlganda, u bo'laklarga ajratiladi, ya'ni hissa – ulush tasvirlanadi. Masalan, davlatning daromadlardagi ulushi 25 foiz bo'lsa, bu doiraning 1/4 qismi shaklida boʻladi.

Chizmalar miqdoriy oʻzgarishlarni, masalan, narxni yoki mahsulot miqdoridagi oʻzgarishlarni bildiradi. Ikki oʻzgaruvchan qiymatning oʻzaro ta'sirini anglash uchun koordinatlarga asoslangan chizma hosil etiladi. Bunda abssissa oʻqiga bir koʻrsatkich qoʻyilsa, ordinata oʻqiga boshqasi qoʻyiladi. Bir qiymat miqdorining oʻzgarishi boshqasining qanchaga oʻzgartirishiga qarab vertikal va gorizontal chiziqlar hosil etiladi, ular kesishgan nuqtalar egri chiziq bilan birlashtirilganda iqtisodiy oʻzgarishlar qandayligi aniqlanadi.

Nazariyada sifatli tahlil usuli birlamchi, u mantiqqa asoslangan asbtraksiyalash usulidan iborat boʻlib, nazariy xulosalar chiqarishga va qonun-qoidalarni ilmiy ta'riflashga xizmat qiladi. Ammo bu miqdoriy tahlilga tayanadi, chunki mazkur usul kuzatish ma'lumotlarini jamlash, ularni umumlashtirishga imkon beradi. Bundan tashqari miqdoriy tahlil yordamida nazariy qonun-qoidalar iqtisodiyotda naqadar amal qilayotganligi bilib olinadi. Masalan, inflatsiya darajasini miqdordan aniqlash orqali pul muomalasi qonunining amal qilishi koʻrsatiladi. Nazariy tahlilda qoʻllanadigan turli-tuman usullar bir-biridan ajratib olib

alohida ishlatilmaydi, ular birgalikda, lekin turli kombinatsiyada (nisbatda) ishlatiladi. Bu tahlil darajasi va miqyosiga bogʻliq boʻladi.

Funksiyalar. Iqtisodiyot nazariyasi fan sifatida turli funksiyalarni bajaradi. Bulardan birinchisi — bilish funksiyasidir. Bunda nazariyani oʻrganish orqali iqtisodiy hodisalar nima ekanligi, ularni nima yuzaga chiqarishi, ular nimaga olib kelishi anglab olinadi. Nazariya iqtisodiyotning sir-asrorlarini oʻrgatib, kishilarni ulardan xabardor qiladi, ularning bilim darajasini oshiradi. Boshqa iqtisodiy fanlar qatori u ham kishilarga iqtisodiy bilimlarni yetkazib beradi, ularni iqtisodiyotda ma'lum qonun-qoidalar borligidan ogoh etadi, ularga rioya etish zarurligini tushuntirib beradi.

Mazkur fanning ikkinchi funksiyasi — bu boshqa iqtisodiy fanlar uchun nazariy asos boʻlib xizmat qilishidir. Bu fan umumnazariy, ya'ni iqtisodiyotga xos boʻlgan umumiy qonun-qoidalarni oʻrganadi. Shu jihatdan u boshqa xususiy funksional nazariyalardan, masalan, moliya nazariyasi, pul nazariyasi, statistik nazariya, buxgalteriya nazariyasi kabi fanlardan farqlanadi. Iqtisodiyot nazariyasi umumiy fan boʻlganidan, u asoslangan nazariy qonun-qoidalarga boshqa iqtisodiy fanlar tayanadi.

Masalan, nazariyada asoslab berilgan talab kategoriyasining talqiniga mikroiqtisod, makroiqtisod, marketing, firma iqtisodi, menejment kabi fanlar tayanadi. Ammo boshqa falar nazariyadan faqat oziqa olish bilan cheklanadi deb boʻlmaydi. Bu fan boshqa iqtisodiy fanlar uchun nazariy tayanch boʻlsa-da, ularning yutuqlarini umumlashtirish hisobidan ulardan ham oziqa oladi. Boshqa fanlar erishgan natijalar va xulosalarga tayanib iqtisodiyot nazariyasi oʻz kategoriyalari va qonunlariga yangilik kiritadi, yangi ilmiy xulosalar chiqaradi. Xullas, boshqa iqtisodiy fanlar yutugʻi nazariyaning ham fan sifatida rivojlanishiga xizmat qiladi.

Mazkur fanning uchinchi funksiyasi — bu uning amaliyot uchun ilmiy baza boʻlib xizmat qilishi, unga umumiy tarzdagi tavsiyalar berishidir. Bu fan muayyan firma ishi yoki xonadon xoʻjaligini qanday tashkil etish toʻgʻrisida tavsiyalar bermaydi. Uning tavsiyalari umumiqtisodiy tavsifga ega qonun-qoidalarga qanday amal qilishga taalluqli boʻladi. Bu tavsiyalar iqtisodiy siyosatni takomillashtirishga qaratiladi. Bular davlatning, firmalarning, xonadonlarning, xalqaro iqtisodiy uyushmalar va tashkilotlarning siyosatiga tegishli boʻladi. Demak, nazariya amaliyot bilan iqtisodiy siyosat orqali bogʻlanadi. Iqtisodiy siyosatda u yoki bu nazariy gʻoyaga tayaniladi, u taqozo etadigan yoʻl-yoʻriqlar asos qilib olinadi. Buni tarixiy dalillar tasdiqlaydi. 1929–1933-yillari AQSh dahshatli iqtisodiy inqirozga yoʻliqib,

iqtisodiyot falaj boʻlib qolgan, undan chiqish uchun oʻsha paytdagi prezident F. Ruzveltning «Yangi kurs» deb nomlangan siyosati amalga oshirilgan. Bu siyosat tanglikdan chiqish uchun davlat iqtisodiyotga faol aralashuvi zarur degan gʻoyaga tayangan. Uning natijasida AQSh iqtisodiyoti oʻnglanib ketgan. XX asr 70-yillarining ikkinchi yarmidagi tanglikdan chiqish uchun AQSh hukumati prezident (R. Reygan) nomi bilan aytilgan «Reygonomika» siyosatiga amal qildi. Bu iqtisodiyot barqaror oʻsib borishini bozor kuchlari, bozor mexanizmining oʻzi ta'minlay oladi, shu bois davlat iqtisodiyotni erkin qoʻyib, oʻz iqtisodiy faoliyatini cheklashi kerak, degan nazariy xulosaga tayangan «Reygonomika» siyosati tufayli AQSh iqtisodiyoti tanglikdan chiqib, iqtisodiy oʻsishni ta'minlagan.

Iqtisodiyot nazariyasi tavsiyalari mikrodarajadagi siyosatga ham qoʻl keladi, bu firmalarga toʻgʻri strategik (kelajakni koʻzlagan) yoʻlni tanlash imkonini beradi. Masalan, nazariyadagi diversifikatsiya gʻoyasi kapitalni bir vaqtning oʻzida turli sohalarga joylashtirish zarurligini bildiradi. Kapitali katta firmalar shunga amal qilganlarida bir sohadan koʻrilgan zarar, boshqa sohaga qoʻyilgan kapital keltirgan foyda hisobidan qoplanib turadi.

Nazariyaning yana bir amaliy ahamiyati shundaki, bu fan iqtisodiyotning sir-asrorlarini ochib berar ekan, undan xabardor har bir kishi iqtisodiyot qoidalariga amal qilsa, bundan faqat foyda koʻradi.

3. Iqtisodiyot nazariyasidagi asosiy oqimlar

Iqtisodiyot nazariyasi quruq yerda paydo boʻlmagan. Shu bois iqtisodiy bilimlarning paydo boʻlishiga oid ma'lumotlarni keltirishni joiz deb topdik, sababi turli tarixiy davrlardagi ilmiy qarashlar muayyan ma'noda taraqqiyotga hissa qoʻshgan.

Qadimgi Misr, Hindiston, Xitoy, Yunoniston, Rim va Sharq mutafak-kirlari (Xammurapi, Manu, Konfutsiy, Ksenofont, Platon, Aristotel, Varran, M.Katon, Kollumela va boshqalar)ning iqtisodiy qarashlariga e'tibor bersak, ular mehnat taqsimoti, yaratilgan mahsulot taqsimlanishi, boylikning vujudga kelishi, xoʻjalik yuritish qoidalari, mehnatni tashkil qilish, yerga mulkchilik masalalariga oid oʻz yondashuvlarini bayon qiladilar.

Miloddan keyingi dastlabki ming yillikdagi iqtisodiy qarashlarda iqtisodiy bilimlarning rivojlanishida muqaddas manbalar («Qur'on», «Hadis») hamda Oʻrta Osiyo va Sharqning buyuk allomalari qarashlari alohida oʻrin tutganligini koʻramiz.

Islom dinining muqaddas kitobi – Qur'oni karimda (arabcha – qiroat, ya'ni o'qish) iqtisodiy fikr va ko'rsatmalar muayyan darajada o'z aksini topgan. Islom dinida Qur'oni karim Alloh tomonidan payg'ambar Muhammad (s.a.v.)ga 23 yil davomida vahiy qilingan deyiladi. Payg'ambar Muhammad alayhissalom 570-yili Makkada qabilasiga mansub bo'lgan Hoshimiylar xonadonida tug'ilib, 632-yilning iyun oyida Madinada vafot etgan. Qur'oni karimdagi asosiy g'oyalardan biri musulmonlarning qardoshligi boʻlib, arab qabilalari shu bayroq atrofida birlashdilar. Unda dehqon va hunarmandlar mehnati, umuman halol mehnat ulugʻlanadi, barcha boylik shu asosda paydo boʻlishi uqtiriladi. Iqtisodiy taraqqiyotning turli bosqichlari va usullarini tahlil qilish shuni koʻrsatadiki, moddiy ne'matlarni ishlab chiqarish va ularning iste'molida diniy tushunchalar, odamlarning iymon-e'tiqodi katta ta'sir kuchiga ega. Islomning asosiy manbai Qur'oni karimning oyatlari bandlarning har jihatdan poklikka, iymon va salomatlikka chorlaydi. Bu muqaddas kitobning 293 ta oyati bevosita iqtisodiy tafakkurga bag'ishlangan. Boshqa ko'plab oyatlarda ham qisman iqtisodiyotga tegishli fikrlar uchraydi. Bu muqaddas kitobda savdoga katta ahamiyat beriladi, sudxoʻrlik (sudxoʻrlik foizi) qoralanadi, mulkning muqaddasligi, birovning mulkiga xiyonat va hatto hasad qilish katta gunoh, deb koʻrsatiladi. Islomda jamiyatning tengsizligi taqdiri azaldan deb tan olinadi, ammo halollik va toʻgʻrilikka buyuriladi, yolgʻon ishlatish, oʻgʻrilik va mehnatsiz daromad topish man qilinadi. Qur'oni karimda qarz olish va berish, merosni taqsimlash, yetim-yesirlarga muruvvat, xayrehson qilish, o'zaro yordam berish haqidagi g'oyalar, soliq turlari va miqdori toʻgʻrisidagi tushunchalar katta ahamiyat kasb etadi. Oyati shariflarda turli kasblarni egallash, va hadisi dehqonchilik, qo'ychilik bilan shug'ullanish, mehnat qilish zarurligi marhamat qilingan. Islom aqidasida isrofgarchilikka qarshi kurash Qur'oni karimdagi «Yenglar, ichinglar, hadya qilinglar, ammo isrof qilmanglar», degan oyat asosida olib boriladi (bu hozirgi davrda eng asosiy muammolardan biri hisoblanadi). «Daryo boʻyida tahorat qilsangiz ham, suvni isrof qilmanglar» kabi qoida aynan hozirgi zamon iqtisodiyoti va ekologiyasi uchun nihoyatda ahamiyatlidir.

Shuningdek, «Avesto» shakllanishi davrida kishilik jamiyati ilgarilab, rivojlana bordi. Koʻchmanchilikka asoslangan Markaziy Osiyoda eski turmush tarzi oʻrnini oʻtroq yashash egallay boshladi, sugʻoriladigan dehqonchilik, chorvachilik, hunarmandchilik borgan sari taraqqiy etdi. Yangi-yangi shaharlar, obod qishloqlarning paydo boʻlishi

oʻtroq yashash turmush tarzining afzalliklarini koʻrsata bordi. Ana shu oʻtroqlik turmush tarzining odamlarga benihoya kulfatlar keltirayotgan koʻchmanchilikka asoslangan turmush tarziga nisbatan afzalliklarini koʻrsatib berishda «Avesto»ning ahamiyati kattadir.

«Avesto»da «yerga yaxshi, sogʻlom urugʻlar sepishdan ortiq savob ish yoʻq» deb, xalq xoʻjaligi sohasida dehqonchilikning muhim ahamiyat kasb etishi ta'kidlangan. «Olam goʻzalligi dehqondan, dehqonchilikdan, kimki yerga urugʻ qadabdi, u odamiylikka iymon keltiradi, yagona shu yoʻlgina haqiqat boʻlib, qolgani sarobdir», deyiladi unda. Qoʻriq va boʻz yerlarni oʻzlashtirish, uni jamoa oʻrtasida adolatli taqsimlash eng savobli ishlardan hisoblangan. Asarda oziq-ovqat tayyorlash, uy hayvonlarini va chorva mollarini koʻpaytirishga ham alohida e'tibor berilgan.

«Avesto»da yer, suv, havoni bulgʻash, ifloslash ogʻir gunoh ekanligi ta'kidlanadi. Bunday ibratli tasdiqlash bugungi avlodlarni ham tabiatga, atrof-muhitga vahshiyona munosabatda boʻlmaslikka undaydi. Kitobda ijtimoiy-iqtisodiy muammolarni hal etish toʻgʻrisida shunday deyiladi: «Yomon ovqatlangan xalq na yaxshi, kuchli ishlovchilarga va na sogʻlom, baquvvat bolalarga ega boʻladi. ... yomon ovqatlanishdan odob-axloq ham aynib ketadi. Agar non moʻl-koʻl boʻlsa, muqaddas soʻzlar ham yaxshi qabul qilinadi».

Bu yerda biz sogʻlom avlod tarbiyasi, iqtisodiy va madaniy, ma'naviy yuksalish oʻrtasida oʻzaro bogʻliqlik mavjudligi toʻgʻrisida fikr yuritilganligini koʻramiz. Oʻsha davrda aytilgan bunday fikrlar ajdodlarimiz qadimgi dunyo madaniyatida yuqori yutuqlarga erishganidan dalolat beradi.

Ushbu noyob kitobda patriarxal urugʻ jamoasi, uning tugatilishi davrida iqtisodiy tengsizlik, sinfiy tabaqalanish haqida qimmatli ma'lumotlar beriladi.

Buyuk mutafakkirlarimiz hazrati inson ehtiyojlari (Forobiy), daromadlar va xarajatlar muvozanati (Ibn Sino), pulning kelib chiqish sabablari (Abu Rayhon Beruniy), jamiyatda mehnatning roli, moddiy ne'matlarning xususiyatlari, pul va uning vazifalari (Yusuf Xos Hojib) jamiyatning ijtimoiy-iqtisodiy tuzilishi, davlat moliyasi, soliqlarni belgilash tartibi (A.Navoiy), insonlarning ishlab chiqarish faoliyati, tovar qiymati va iste'mol qiymati, ayirboshlash jarayoni, tarixiy-ijtimoiy taraqqiyot prinsiplari (Ibn Xoldun) kabi masalalarga oʻz munosabatlarini bildirganlarini koʻramiz.

Iqtisodiyot nazariyasi koʻpgina mamlakatlarda milliy bozorlarning qaror topishi va jahon bozorining vujudga kelishi sharoitida (XVI–XVII

asrlar) iqtisodiy bilim va qarashlarning yaxlit tizimi sifatida «siyosiy iqtisod» nomi bilan mustaqil fan sifatida shakllana boshladi.

«Siyosiy iqtisod» yunoncha soʻzdan olingan boʻlib, «politikos» — ijtimoiy, «oykos» — uy, uy xoʻjaligi, «nomos» — qonun degan ma'nolarni anglatadi. Fransuz iqtisodchisi Antuan Monkretyen (1575–1621-y.) birinchi marta «Siyosiy iqtisod trakti» (1615-y.) asarida bu fanni ilmiy jihatdan asosladi va u 300 yildan ortiq vaqt davomida shu nom bilan rivojlandi.

«Iqtisodiyot nazariyasi» fan sifatida shakllanish jarayonida vujudga kelgan asosiy gʻoyaviy oqimlar quyidagilardan iborat:

➤ merkantalizm – jamiyatning boyligi puldan, oltindan iborat boʻlib, u savdoda, «asosan tashqi savdoda paydo boʻladi va koʻpayadi», deb tushuntiradi. Merkantalizm – italyancha «myersantye» soʻzidan olingan boʻlib, «savdogar» ma'nosini anglatadi.

XVI asrning boshlariga qadar natural xoʻjalik va iste'mol ustun boʻlgan davrda birorta nazariya yaratilmagan boʻlsa-da, mahsulot ishlab chiqarish, tovar-pul munosabatlari rivojlanishi bilan, Yevropada Uygʻonish davri, buyuk geografik kashfiyotlar, mustamlakachilik bilan hamohang ravishda dastlabki merkantalizm ta'limoti yaratildi.

Ma'lumki, har qanday iqtisodiy dunyoqarashda boylik manbai masalasi muhim sanaladi. Chunonchi, iqtisodiyotda ikki soha mavjud: ishlab chiqarish (hunarmandchilik, sanoat, qishloq xoʻjaligi) hamda muomala (pul, savdo-sotiq, hozirgi davrda xizmatlar).

Bu oqimning namoyandalari Vil Stafford, Tomas Men, Antuan Monkretyen, Jon Lou, Gaspar Skaruffi va boshqalar.

Fiziokratlar – jamiyatning boyligi qishloq xoʻjaligida vujudga keladi, degan gʻoyani ilgari suradilar. Bu ta'limotning asoschisi Fransua Kene (1694–1774-y.) hisoblanadi.

Klassik siyosiy iqtisod – boylik faqat qishloq xoʻjaligida emas, balki sanoat, transport, qurilish va boshqa sohalarda ham yaratilishini isbotlab berdi. Bozor munosabatlari afzalligi isbotlab berildi, ayniqsa, toʻla iqtisodiy erkinlik siyosati ilgari surildi, xususiy mulk qoʻllab-quvvatlanib shu gʻoyalarga asoslangan holda xoʻjalik yuritish eng mukammal ekanligi isbotlandi.

U. Petti (1623–1686-y.) boylikning manbai yer va mehnat ekanligini e'tirof etgan. «Mehnat boylikning otasi, yer uning onasi», degan ibora unga tegishlidir. Uilyam Petti isbotlab berdiki, agar merkantalistlar hisobi boʻyicha ish yuritilsa, XVII asrda Angliya boyligining bor-yoʻgʻi 3 foizini javohirlar va pullar tashkil etgan boʻlardi.

Vaholanki, oʻsha davrda 5,5 million aholining 4,1 millioni qishloqlarda yashagan va dehqonchilik qilib, boylik yaratgan. Savdo-sotiqda 246 ming, sanoatda esa 240 ming kishi band boʻlgan. Bu davrda merkantalizm gʻoyalari cheklangan edi.

- A. Smit «Odamlar boyligining tabiati va sabablari toʻgʻrisida tadqiqot» (1776-y.) asarida talab va taklif asosida shakllanadigan erkin narxlar asosida bozor oʻz-oʻzini tartibga solishi («koʻrinmas qoʻl») gʻoyasini ilgari suradi. Insonni faollashtiradigan asosiy ragʻbat shaxsiy manfaatdir, deb koʻrsatadi.
- D. Rikardo mehnat qiymatning, turli sinflar daromadlari va foydaning yagona manbai ekanligini ta'kidlagan.

Sismondi (Jon Sharl Leonard Simon de Sismondi) kapitalistik iqtisodiy mexanizmni tanqid qilib, siyosiy iqtisod inson baxti yoʻlida ijtimoiy mexanizmni takomillashtirishga qaratilgan fan boʻlmogʻi lozim, deb uqtiradi.

Sotsial-utopistlar (A.Sen-Simon, Sharl Furye, Robert Ouen) kapitalizmni tanqid qilib, xususiy mulkchilikni yoʻq qilish, ishlab chiqarish, taqsimot va iste'molni qayta tashkil etish va adolatli tuzum (industrial jamiyat, garmonik jamiyat, kommunizm) oʻrnatish talabi bilan chiqadilar.

Marksizm jamiyat taraqqiyotiga tabiiy tarixiy jarayon deb qarab, ijtimoiy-iqtisodiy formatsiyalar, ularning vujudga kelishi, rivojlanishi va boshqasi bilan almashinishi sabablari toʻgʻrisidagi ta'limotni hamda qoʻshimcha qiymat nazariyasini ilgari suradi.

Endi iqtisodiyot nazariyasidagi yangi oqimlar (XIX asrning oxiri va XX asrning boshlari)ga toʻxtalsak:

➤ marjinalizm vakillari (marginal – keyingi, qoʻshilgan) – keyingi tovar nafliligi, qoʻshilgan mehnat yoki resurs unumdorligining pasayib borishi nazariyalarini ishlab chiqqanlar. Keyingi tovar nafliligining kamayib borish qonuni bu oqimning asosiy prinsipi hisoblanadi. Shunga koʻra, narx xarajatga bogʻliq boʻlmay, keyingi naflilik asosida belgilanadi. Marjinalizm vakillari iqtisodiyotda ishlab chiqarish emas, iste'mol hal qiluvchi, degan gʻoyani ilgari surganlar. Mehnat natijasi muhim sanalgan. Foyda, naflik ijobiy faoliyat sifatida qaralgan. Marjinalizm asoschilari Karl Menger, Fridrix fon Vizer, Eygen fon Bem-Baverk, Uilyam Stenli Jevons hisoblanadi;

> neoklassik maktab (asoschisi Alfred Marshall) bozor iqtisodiyoti sharoitida davlatning aralashuvini cheklash gʻoyasini ilgari surgan. Bozor

mexanizmining buzilishi monopoliyalar vujudga kelganda ham yuz berishini ta'kidlagan. U funksional bogʻlanish gʻoyasini asoslaydi, bozor bahosini belgilovchi omillar talab va taklifdan iborat deb hisoblaydi. Bu ta'limot tadbirkorlar iqtisodiyotni, sarmoyani, ish kuchini va yerni davlatga nisbatan samaraliroq ishga solishi va boshqarishini koʻrsatib bergan. Markscha davlat mulkining afzalligi toʻgʻrisidagi gʻoya inkor etilgan.

Bu maktab vakillaridan L. Valras umumiy iqtisodiy muvozanatlik modelini ishlab chiqishga, I. Shumpetter esa iqtisodiy tizimlar oʻzgarishining ichki kuchlarini koʻrsatib berishga harakat qilgan hamda iqtisodiyotni harakatga keltiruvchi asosiy kuch tadbirkorlik, degan xulosaga kelgan;

➤ keynschilik — rivojlangan bozor iqtisodiyotini davlat tomonidan tartibga solib turish zarurligini asoslashga qaratgan. Jon Meynard Keyns «Bandlik, foiz va pulning umumiy nazariyasi» (1936-y.) nomli kitobida bunday tartibga solish yalpi talabga hamda shu orqali inflatsiya va bandlikka ta'sir koʻrsatishini asoslaydi.

Neoklassik yoʻnalishda yangidan vujudga kelgan oqimlar (XX asrning 50–60-yillaridan boshlab):

- ➤ neoliberalizm (F. Xayek, I. Shumpetter, L.Erkard) asosiy e'tiborni davlatning iqtisodiyotga aralashuvini eng kam darajaga keltirishga, xususiy tadbirkorlikni rivojlantirishga qaratish lozimligini uqtiradi;
- ➤ monetarizm (M. Fridman) iqtisodiyotni boshqarishni pul muomalasini tartibga solish orqali amalga oshirish mumkinligini asoslab beradi;
- ➤ institutsionalizm tarafdorlari (T. Veblen, J. Gelbreyt) fikriga koʻra, xoʻjalik yurituvchilar oʻrtasidagi munosabatlar nafaqat iqtisodiy, balki noiqtisodiy omillar ta'sirida vujudga keladi. Shu sababli iqtisodiyotga muassasaviy oʻzgarishlar orqali ham ta'sir koʻrsatishi mumkin. Institutsionalizm tarafdorlari taraqqiyotning iqtisodiy omillari bilan birga odamlarning aqliy, ruhiy, ma'naviy, ayniqsa, huquqiy va boshqa omillariga alohida urgʻu berishadi. «Insoniy omil», millat ruhi asosiy deb qaraladi. Institutlar bu davlat, oila, kasaba uyushmalari, din, huquq idoralari va boshqalar boʻlib, davlat yuqori oʻringa qoʻyiladi. Bu yoʻnalishlar (neoklassika, institutsionalizm va keynschilik)ning asosiy tamoyillari bir xil bozor munosabatlari hal qiluvchi hisoblanadi. Ammo eng muhim farqi davlatning iqtisodiyotga aralashuvi masalasidir.

Dunyoviy taraqqiyot yoʻlida bir-biriga zid iqtisodiy nazariyalar:

Kapitalistik nazariya – klassik siyosiy iqtisodni, xususiy mulkchilikni oʻta mutlaqlashtirish, iloji boricha koʻproq foyda olish maqsadida iqtisodiyotning oʻzini oʻzi tartibga solishi gʻoyalariga asoslangan nazariya.

Sotsialistik nazariya – marksizm gʻoyalarini targʻib qilib, mulkni yoppasiga davlat ixtiyoriga olish, resurslarni markazlashtirilgan tarzda ma'muriy-buyruqbozlik, rejalashtirish asosida boshqarish va taqsimlash yoʻli bilan ijtimoiy adolatni qaror toptirish va xalq farovonligini oshirish muammolarini hal qilishga urinib kelgan nazariya.

Atoqli vatandoshimiz, ma'rifatparvar Abdulla Avloniyning yozishicha: «Iqtisod deb, pul va mol kabi ne'matlarning qadrini bilmoqqa aytilur. Mol qadrini biluvchi kishilar oʻrinsiz yerga bir tiyin sarf qilmas, oʻrni kelganda, soʻmni ayamas»¹.

Iqtisodiyot nazariyasi predmetini oʻrganishdagi eng muhim bosqich – nazariyani iqtisodiy siyosat bilan bogʻlashdir.

Nazariya iqtisodiyotga qanday tendensiyalar xos boʻlishini, uning qanday omillar ta'sirida rivojlanishini, unda qanday oʻzgarishlar boʻlishini bashorat eta oladi. Shu sababli nazariyani iqtisodiy siyosatning ilmiy asosi, deb aytish mumkin.

Siyosat deganda nafaqat davlatning umummilliy, umumjamiyat miqyosidagi siyosatini, balki ayrim korxona, firmaning amaliyoti dasturini, uning qanday xatti-harakatga qoʻl urishini ham tushunmoq zarur. Davlatimiz rahbari Islom Karimovning: «Siyosat — iqtisodiyotning mujassam ifodasi ekanligi haqidagi qoida hozir har qachongidan ham dolzarb boʻlib qoldi», — degan fikri bu boradagi masalani yanada oydinlashtiradi.

Iqtisodiyot ijtimoiy hayotning bir qismi boʻlib, uning bevosita ta'siri ostida boʻladi. Mamlakatimizda bozor iqtisodiyotiga oʻtish davri qiyinchiliklarini bartaraf etish konsepsiyasining poydevorini «Iqtisodiyot siyosatdan ustun boʻlishi kerak» degan mashhur qoida tashkil etadi.

Nazariya iqtisodni sof holda emas, balki siyosiy, psixologik, axloqiy, milliy-demografik omillarning ta'sirini inobatga olgan holda oʻrganadi.

Iqtisod har doim siyosatga nisbatan birlamchi boʻladi. Davlatimiz rahbari Islom Karimovning tashabbusi bilan toʻgʻri tanlangan siyosat iqtisodga ijobiy ta'sir oʻtkazdi. Vaholanki, notoʻgʻri yuritilgan siyosat esa unga salbiy ta'sir oʻtkazishi mumkin (Bu 2008-yilda boshlangan jahon moliyaviy-iqtisodiy inqirozida namoyon boʻldi).

 $^{^1}$ *Авлоний А.* Туркий гулистон ёхуд ахлоқ. – Т., 1992. – Б. 33.

Iqtisodiy nazariya iqtisodiyotning rivojlanish qonun-qoidalarini oʻrgatar ekan, ularga tayanib taraqqiyotning asosiy yoʻnalishlarini yoritib beradi, shu ma'noda u siyosatning ilmiy asosi bo'ladi. Iqtisodiyotni mafkuradan xoli etish yoʻllari: □ jamiyatning barcha boʻgʻinlarida (oddiy ishchi, mehnatkashdan vazirgacha, ishbilarmondan tortib olimgacha) yangi tipdagi iqtisodiy tafakkurni shakllantirish; ☐ ishlab chiqarishning bozor mexanizmini yaratish, boshqarishning eski tizimini tugatib, zamonaviy boshqarish tizimini tashkil etish; □ mulkchilikning turli shakllarini tashkil etish; □ ochiq raqobatga chidamli, jahon iqtisodiyotiga kira oladigan iqtisodiyotni yaratish; □ vangi zamonaviy iqtisodchilar, ishbilarmonlar, tadbirkorlar guruhini vujudga keltirish, ularga barcha imkoniyatlar yaratib berish; □ iqtisodiy fanlarni mafkuraviy qoidalar, aqidalar, subyektivizm va volyutarizmdan xalos etish. Rivojlanayotgan davlatlar «muqobil rivojlanish» nazariyalarining turli konsepsiyalari: □ «Asosiy ehtiyojlar» konsepsiyasi – aholining eng kam tirikchilik ehtiyojini kafolatli ta'minlash va ish bilan band qilish muammolarini hal qilishga qaratilgan; □ «Maqbul voki tegishli texnologiya» konsepsiyasi – aholi bandligini ta'minlaydigan va mahalliy xom ashyoni, avvalo qishloq xoʻjalik xom ashyosini qayta ishlashga qaratilgan sermehnat texnologiyani rivojlantirish zarurligiga qaratilgan; □ «O'z kuchiga jamoa bo'lib tayanish» konsepsiyasi – mavjud zaxiralardan toʻliqroq foydalanishga va ularning rivojlanishiga hamda rivojlanayotgan mamlakatning taraqqiy etgan mamlakatlarga qaramligini kamaytirish maqsadida ular oʻrtasidagi hamkorlikni mustahkamlashga qaratilgan; □ «Yangi xalqaro iqtisodiy tartib» konsepsiyasi – xalqaro munosabatlarda tenglik va adolat qoidalariga asoslangan hamda barcha

4. Iqtisodiy kategoriyalar va qonunlar

Iqtisodiy kategoriyalar iqtisodni oʻrganishda qoʻllanadigan nazariy tushunchalar boʻlib, real iqtisodiy voqelikning ilmiy in'ikosi, ifoda etilishidir.

mamlakatlarning manfaatlarini nazarda tutuvchi aloqalar yangi iqtisodiy

tartibning mazmunini tashkil etadi.

Iqtisodiy kategoriyalar quyidagi turlarga boʻlinadi: □ **umumiqtisodiy kategoriyalar** – iqtisodiy taraqqiyotning hamma bosqichlariga xos boʻlgan, lekin ijtimoiy-iqtisodiy tizimga aloqasi bo'lmagan umuminsoniy kategoriyalarni ifodalovchi kategoriyalardir: ishlab chiqarish omili, mulk, mehnat jarayoni, mahsulot, ish vaqti, mehnat taqsimoti, ehtiyoj, ishlab chiqarish, ayirboshlash, iste'mol, iqtisodiy manfaat, mehnat unumdorligi, samaradorlik kategoriyalari; □ **formatsion maxsus kategoriyalar** – iqtisodiy taraqqiyotning tarixiy muayyan bosqichiga xos boʻlgan, ijtimoiy-iqtisodiy tizimning o'tkinchi munosabatlarni ifodalovchi alogador kategoriyalardir. Bular: ekspluatatsiya, renta, ekspansiya, ortiqcha aholi, qashshoqlanish, monopoliya, monopsoniya, oligopoliya kategoriyalari; □ davriy oraliq kategoriyalar – umuminsoniy xarakterdagi bir necha igtisodiy tizimlar sharoitida amal giluvchi, uzog tarixiy davrda saqlanuvchi, ammo o'tkinchi mazmundagi iqtisodiy munosabatlarni ifodalovchi kategoriyalardir. Masalan, tovar, pul, talab, taklif, narx-navo, inflatsiya, marketing, menejerlik va boshqa kategoriyalar. Iqtisodiy qonunlar iqtisodiy jarayonlarning turli muhim tomonlari oʻrtasida yuzaga kelib va muqim takrorlanib turadigan, uzviy iqtisodiy zaruratni taqozo etuvchi aloqalardir. Iqtisodiy qonunlar quyidagi turlarga boʻlinadi: □ umumiqtisodiy qonunlar – jamiyat taraqqiyotining hamma bosqichlarida, iqtisodiyotning aniq ijtimoiy shaklidan qat'i nazar, amal giluvchi qonunlardir. Masalan, mehnat taqsimoti, jamg'arish, mehnat unumdorligining o'sib borishi, ehtiyojlarning yuksalishi, mehnat turlarining almashuvi, farovonlik qonunlari; □ **formatsion** – **maxsus qonunlar.** Bular faqat ijtimoiy-iqtisodiy tizim doirasida amal qiluvchi, shu tizimning maxsus xususiyatlarini ifoda etuvchi qonunlardir: feodalizm, kapitalizm, imperializm, sotsializm qonunlari; □ davriy oraliq qonunlar – ma'lum davrda turli ijtimoiy-iqtisodiy tizimda amal qiluvchi qonunlarning maxsus tuzumga aloqasi boʻlmagan holda ularni birlashtirib turuvchi munosabatlar – bozor iqtisodiyoti qonunlari.

5. Iqtisodiyot nazariyasi va davlatning iqtisodiy siyosati

Iqtisodiyotning qonun-qoidalariga amal qilish iqtisodiy siyosat orqali yuz beradi, chunki bularni anglagan holda iqtisodiyot rivojiga oid choratadbirlar ishlab chiqiladi va bular iqtisodiyotga ta'sir etmay qolmaydi. Iqtisodiy siyosat oʻzi nima?

Iqtisodiy siyosat – bu iqtisodiyot subyektlarining oʻz faoliyatiga oid yoʻl-yoʻriqlari va sa'y-harakatlarining majmuidir.

Har bir iqtisodiyot ishtirokchisining, bu xonadonmi, firma yoki davlatmi, buning farqi yoʻq, oʻz manfaatlari bor. Bu manfaatlar amaliyotda aniq maqsad shakliga kiradi, iqtisodiy siyosat esa uni amalga qaratiladi. Xonadonning maqsadi o'z maksimumlashtirish va kelajakni ta'minlash uchun jamg'arma hosil etishdir. Firmaning maqsadi esa foydani maksimumlashtirish va iqtisodiy jihatdan barqarorligini ta'minlashdir. Davlatning maqsadi esa, milliy iqtisodiyotning barqaror o'sishini va shu asosda xalq farovonligini ta'minlashdan iborat. Maqsadlar kabi ularni amalga oshirish vositalari ham farqlanadi va bu iqtisodiy siyosatda hisobga olinadi. Hatto bir toifadagi subyektlarning ham maqsadi bir xil emas, chunki ularning iqtisodiy maqomi farqlanadi. Masalan, boy, o'rtahol va kambag'al xonadonlar, kichik, oʻrta va yirik firmalarning muayyan davrdagi aniq maqsadlari bir xil emas, bular individuallashgan, chunki ularning oʻzi mustaqil va gʻoyat koʻpchilik.

Iqtisodiy siyosat uch darajada boʻladi, bular mikro, makro va meta (xalqaro) siyosatdir. **Mikrosiyosat** xonadon va firmalar hisoblanadi. Bu g'oyat individuallashgan bo'ladi, bunga yaxlitlik xos emas. Xonadon siyosati iste'molga va jamg'arishga oid bo'ladi. Bu siyosat tanlov tamoyiliga asoslanadi. Xonadon oʻzining individual yoʻlini tutadi, lekin uning siyosati obyektiv sharoitga moslashishi zarur, chunki ayrim xonadon obyektiv iqtisodiy muhitni oʻzgartirishga qodir emas, uni hisobga olishdan boshqa iloji yoʻq. Ayni paytda uning siyosatida subyektiv jihat ham bor, chunki har bir xonadon oʻzi bilgan yoʻldan qolmaydi. Xonadon siyosatining maqsadi yaxshi yashash bo'lganidan u bunga erishishning eng ma'qul yo'lini belgilab oladi. Bu yo'ldagi birinchi ish – bu koʻp pul topish boʻlsa, ikkinchisi pulni oqilona sarflash boʻladi. Oddiy mehnatkash xonadonining asosiy resursi ish kuchi bo'lganidan uni yaxshiroq pulga sotish, ya'ni yaxshi ish haqi beradigan joyga o'rnashib olish uning siyosatining asosiy yo'nalishi hisoblanadi, chunki pul topishning birlamchi sharti bandlikdir. Xonadon siyosatining boshqa bir yoʻnalishi oʻz daromadini toʻgʻri sarflash siyosati, ya'ni xarajatlar siyosatidir. Bu siyosat eng avval daromadning qanday qismi joriy iste'molga yuborilishini belgilaydi, so'ngra esa xarid uchun ajratilgan pulga tovarlarning eng ma'qul to'plamini tanlab olishni mo'ljallaydi,

tanlov esa tovarlarning narxi va nafliligidan kelib chiqqan holda ularni shunday kombinatsiyada (nisbatda) olishga qaratiladiki, bu uning xarid qobiliyati doirasida ehtiyojlarini maksimal qondirishi kerak boʻladi.

Xonadonning jamgʻarish siyosati uning daromad topish imkoniyati, daromadning bir qismini jamlab, puldan pul chiqarish imkoniyatidan kelib chiqadi, jamgʻarishning muqobil usullarini tanlashni koʻzlaydi. Jamgʻariladigan pul moliyaviy yoki moddiy aktivlarga aylantiriladi. Xonadon siyosatida pulga aksiya, obligatsiya sotib olish, uni bankka qoʻyish, qarzga berish yoki toʻgʻridan-toʻgʻri biznesga joylashtirish oldindan belgilab olinadi. U pulini investitsiyalaganda, birinchidan, pulni inflatsiyadan asrab, jamgʻarma qadr-qiymatini saqlab qolishni, ikkinchidan, uning koʻpayib, qoʻshimcha daromad keltirishini koʻzlaydi.

Oddiy xonadondan farqliroq boy-badavlat xonadon siyosati yollanib ishlashdan emas, balki biznesdan pul topishni koʻzlaydi, chunki uning ish kuchidan boshqa individual kapitali ham bor. Bunga biznes turini erkin tanlash orqali erishiladi.

Firmalar siyosati oʻz maqsadini aniq belgilash va unga erishish yoʻllari va vositalarini tanlashdan iboratdir. Bu siyosatning maqsadi foydani maksimumlashtirishni, bunga erishib boʻlmaganda, firma barqarorligini ta'minlab, uni saqlab qolish va bir maromda rivojlantirishni moʻljallaydi.

Firma siyosati faoliyatning turli sohalariga taalluqli boʻladi.

Firmaning ishlab chiqarish siyosati nimani qancha va qanday davrda ishlab chiqarishni belgilaydi. Firmaning oʻz maqsadiga yetishi ishlab chiqarish hajmiga bogʻliq, chunki har qanday koʻlamda ishlab chiqarish foydali boʻlavermaydi. Shu sababli firma ishlab chiqarishning shunday hajmini tanlab oladiki, bunda oʻrtacha xarajatlar bilan bozor narxi orasidagi farq eng katta boʻlib, foyda maksimumlashishi kerak boʻladi. Buning uchun firma ishlab chiqarishni modernizatsiyalab, bozorga yangi tovarlar va xizmatlarni taklif etish yoʻlidan boradi.

Firmaning tijorat siyosati tovarlarning qanday miqdorda va qaysi bozorlarda sotilishini, ularning kreditga berilishini, eksport miqdori va tarkibini belgilaydi, savdo-sotiqda raqobatchilar va sheriklar bilan qanday munosabatda boʻlish yoʻlini aniqlaydi.

Firmaning narx siyosati bozorga qanday narx bilan chiqishni, narxning bozor sharoitiga qarab qanday oʻzgartirilishini, narxlardan siylov berish tartibi kabilarni moʻljallaydi.

Firmaning moliya siyosati soliqlarni toʻlash tartibini, soliqlardan imtiyoz va davlatdan subsidiya olish yoʻllarini, kredit olish, uni qaytarish,

foiz toʻlashga oid ishlarni, foydani taqsimlab, uni samarali ishlatish choralarini, aksiya chiqarib sotish, oʻzga firmalar aksiyasini, davlat obligatsiyalarini sotib olishga oid yoʻl-yoʻriqlaridan iborat boʻladi.

Firmaning raqobat siyosati raqobatda ishtirok etish yoki etmaslik, raqobat yuz berganda, uning usullaridan qaysi birini qoʻllash, qanday vositalarni ishga solishga qaratiladi.

Vaziyatga qarab siyosatning u yoki bu yoʻnalishiga ustuvorlik beriladi. **Firma siyosati** qisqa va uzoq davrga moʻljallanadi, chunki shu davrlarda turli maqsadlar olgʻa surilib, ularga erishishning muqobil vositalari tanlab olinadi. Firma siyosati, *birinchidan*, bozordagi vaziyatga, *ikkinchidan*, davlatning siyosatiga moslashib borishni bildiradi. Firma siyosati ham individuallashgan, biroq siyosatning umumiy tamoyillari borki, ularga firmalar oʻz maqsadidan kelib chiqqan holda va bilganicha rioya etishadi.

Firma oʻz siyosatini belgilashda obyektiv axborotga tayanadiki, bu ichki va tashqi axborotlardan iboratdir. Ichki axborot firmaning oʻzidagi holatni, tashqi axborot esa tashqi muhitdagi holatni tavsiflaydi. Firmalar siyosatini agar ular korporatsiyalar (aksioner jamiyatlar) boʻlsa, oliy boshqaruv organlari (direktorlar kengashi, aksionerlar majlisi) ishlab chiqadi, uni amalga oshirish ishini menejerlar bajaradi. Firma oddiy korxona boʻlsa, uning siyosatini egasining oʻzi yoki uning nomidan menejerlar amalga oshiradi. Firmaning siyosatiga qarab uning ishi rejalashtiriladi. Shu maqsadda firma strategiyasi ishlab chiqilib, unda firma siyosati aniq chora-tadbirlar shakliga ega boʻladi. Firma siyosatining naqadar oʻrinli ekanligi uning monitoringi (baho berish) orqali aniqlanadi.

Davlat iqtisodiy siyosatining maqsadi va vositalari. Davlat iqtisodiyotga oʻz siyosati bilan ta'sir etadi.

Davlatning siyosati – bu makroiqtisodiy siyosat boʻlib, uning muayyan mamlakatning milliy iqtisodiga taalluqli yoʻl-yoʻriqlari va ulardan kelib chiqadigan sa'y-harakatlaridan iboratdir. Davlatning siyosati har doim milliy boʻladi, mamlakat rivojining ichki va tashqi sharoitini hisobga oladi. Siyosatda eng avval mamlakat iqtisodiyotining holati, xalqaro iqtisodiy konyunkturaning milliy iqtisodiyotga nechogʻlik ta'sir etishi, unda kutilayotgan oʻzgarishlar mamlakat zimmasiga olgan xalqaro majburiyatning qandayligi, mamlakat iqtisodiyotining resurslar bilan ta'minlanish darajasidan kelib chiqadi, ilgari amalga oshirilgan chora-tadbirlar bergan natija ham hisobga olinadi. Davlat siyosati davlat

rahbarlarining erk-irodasi va qat'iyatligiga va yetilgan iqtisodiy muammolarni naqadar idrok etishlariga ham bogʻliq boʻladi.

Davlatning siyosati milliy manfaatlardan kelib chiqqan holda ma'lum maqsadlarni koʻzlaydi. Bulardan asosiylari quyidagilar:

- barqaror iqtisodiy oʻsishni ta'minlash. Bu yalpi ichki mahsulotning bir maromda va yetarli sur'atlar bilan oʻsishiga sharoit hozirlashni bildiradi, chunki YAIM qanchalik tez oʻssa, mamlakat iqtisodiy qudrati shunchalik oshadi.

Milliy iqtisodiyotning mustaqilligini ta'minlash – uning chet elga qaram boʻlishiga yoʻl qoʻymaslik. Iqtisodiyot qanchalik mustaqil boʻlsa, milliy manfaatlarga shunchalik koʻproq xizmat qiladi;

 iqtisodiy xavfsizlikni ta'minlash. Bu iqtisodiy aylanmaning uzluksizligini, ya'ni takror ishlab chiqarishning to'xtovsiz davom etishini, iqtisodiy falajlikka yo'l qo'yilmaslikni bildiradi.

Milliy pul qadr-qiymatining barqarorligini ta'minlash. Mamlakatdagi pul muomalasining me'yorida borishiga erishish, pulni iqtisodiy aloqalarning muntazam ishlab turuvchi vositasiga aylantirish.

Aholi turmush farovonligini muttasil oshirib, iqtisodiyotning ijtimoiyligini toʻlaroq yuzaga chiqarishga koʻmaklashish.

Milliy iqtisodiyotning xalqaro integratsion jarayonlar va globallashuvda faol ishtirok etib, xalqaro iqtisodiyotda oʻz oʻrnini topishi, baynalminal iqtisodiy munosabatlarning teng huquqli ishtirokchisiga aylanishiga erishish.

Milliy iqtisodiyotning istiqbolini ta'minlash, ya'ni uni uzoq kelajakda oʻsib borishiga sharoit hozirlash.

Bular iqtisodiy siyosatning strategik, ya'ni uzoq davrga mo'ljallangan maqsadi hisoblanadi. Biroq uning qisqa vaqtdagi taktik, ya'ni juz'iy maqsadlari ham bor. Bular jumlasiga iqtisodiy tanglikdan chiqib ketish, narxlarning barqarorligini ta'minlash, investitsion faollikni rag'batlantirish, eksport salohiyatini oshirish, innovatsiyalarni ta'minlash, yangi tashqi bozorlarga kirib borish kabilar kiradi. Juz'iy maqsadlar strategik maqsadlardan kelib chiqadi va ularga xizmat qiladi.

Davlat siyosati belgilagan maqsadlarga quyidagi vositalar orqali erishiladi. *Birinchisi*, iqtisodiy vositalar boʻlib, bular jumlasiga soliqlar, subsidiyalar, litsenziyalar, eksport kvotalari, uchot stavkalari, davlat buyurtmalari, davlat investitsiyalari, transfertlar, turli iqtisodiy sanksiyalar (jazolash vositalari) kabilar kiradi. *Ikkinchisi*, yuridik vositalar. Bu iqtisodiy faoliyat tartibi va qoidalarini, uning davlat tomonidan ragʻbatlantirilishini belgilab beruvchi qonunlarni, ularga mos

ravishdagi qonunosti hujjatlarini ishlab chiqish, ularni qabul qilish va joriy etishdan iboratdir.

Qonunchilik iqtisodiyotning huquqiy asoslarini belgilab beradi, bular esa bozor iqtisodiyotining obyektiv iqtisodiy qonunlari talabidan kelib chiqishi zarur. Iqtisodiyotga oid yuridik qonunlarni parlament qabul qiladi. Hukumat esa ularning amalga oshirilishini ta'minlaydigan qarorlar va farmoyishlarni ishlab chiqadi. Tegishli davlat idoralari qonunlarning amalga oshirilishini nazoratga oladi. *Uchinchisi*, siyosiy-ma'muriy vositalar. Davlat hokimiyat sohibi boʻlganidan oʻz siyosatiga rioya etilishini oʻz organlari kuchi bilan ta'minlaydi. Davlat oliy siyosiy institut hisoblanar ekan, uning qarorlari buyruqlariga hamma itoat etishi kerak boʻladi. Ma'muriy usul yordamchi usul hisoblanadi, u bozor tizimida yaxshi natija bermaganidan cheklangan holda qoʻllaniladi.

Davlat iqtisodiy siyosatining asosiy yoʻnalishlari. Iqtisodiyot yaxlit boʻlar ekan, iqtisodiy siyosat ham yagonadir. Lekin davlat siyosatining aniq yoʻnalishlari bor.

Monetar siyosat — bu davlatning pul-kredit siyosati boʻlib, pul muomalasini tartiblash, tovar va pul massasi oʻrtasidagi muvozanatni ta'minlash, iqtisodiyotdagi pul oqimlarini boshqarib turish siyosati hisoblanadi. Uning maqsadi narxlarni va shunga koʻra milliy pul birligi xarid qurbini, uning valuta kursini barqarorlashtirish, oxir-oqibatda pulga talab bilan uning taklifini muvozanatlashtirishdan iborat boʻladi.

Monetar siyosatning uchta asosiy jihati bor: 1. Qayta moliyalashtirish yoki uchot siyosati. Bunda davlat nomidan markaziy banklar uchot stavkasini oʻzgartiradi. Stavka oshganda pul qimmatlashib, unga talab qisqaradi. U pasaytirilganda pul arzonlashib, unga talab oshadi.

Bu ayni paytda kreditning arzon yoki qimmat boʻlishini bildiradi. Bu esa iqtisodiyotga kredit hisobidan yuboriladigan investitsiyalarni oʻzgartirib, uning oʻsishiga ta'sir etadi. Masalan, Yevropa mamlakatlarida qayta moliyalashtirish stavkasi XXI asrning birinchi oʻn yilligida 0,9 foizga tushdi. Bu bilan kredit arzonlashtirildi, chunki tijorat banklari shunga qarab kredit uchun undiriladigan foiz stavkalarini belgiladilar.

2. Ochiq bozorda operatsiyalar oʻtkazish siyosati. Bu davlat obligatsiyalarini chiqarib firmalar, banklar va aholiga sotish va vaqti kelganda, ularni qaytadan sotib olishni bildiradi. Bu obligatsiyalarni olish qulay boʻladi, chunki ularga qat'iy belgilangan foizni davlat toʻlaydi, bu bilan ularning daromadliligi kafolatlanadi. Davlat obligatsiyalari sotilganda, pul ularga bogʻlanib qoladi, natijada uning muomaladagi

miqdori qisqaradi. Aksincha, ular qaytadan sotib olinganda, pul ulardan boʻshab muomalaga keladi, u yerdagi pul miqdori koʻpayadi. Demak, bu usul bilan ham pul miqdori tartiblanadi.

3. Majburiy rezerv siyosati. Bu siyosatga binoan markaziy banklar boshqa banklar uchun kredit resursining majburiy rezervini kiritadi. Bu tartibga koʻra banklar kreditga beriladigan pulning bir qismini markaziy banklar ixtiyoriga beradi. Bu rezerv oshsa, kredit puli qisqaradi, agar u kamaysa, bu pul koʻpayadi. Masalan, mamlakatda jami kredit resurslari 80 mlrd. dollar. Shundan 10 foiz zaxiraga oʻtkazilsa, 72 mlrd. dollar kredit uchun pul qoladi. Bordi-yu bu zaxira 15 foizga chiqarilsa, kreditga 68 mlrd. dollar qoladi. Bu bilan kreditga moʻljallangan pulning taklifi oshadi yoki qisqaradi. Shunga qarab kredit olish goh oshib, goh qisqarib turadi. Monetar siyosatning aytilgan yoʻnalishlari shuni koʻrsatadiki, unda turli iqtisodiy vositalar qoʻllanadi.

Monetar siyosat ikki xil boʻladi. *Qattiq siyosat*. Bunda pul massasi qisqartiriladi, uning emissiya (pul chiqarish) hisobidan oʻsishi qat'iy chegaralanadi. Natijada pul massasi qisqarib, tovar massasiga tenglashadi. Pulning qisqarishi talabni kamaytiradi, narxlar esa oʻsmaydi, pul birligining xarid qurbi barqarorlashadi. Pul topishga intilish iqtisodiyotning jonlanishiga olib keladi. Bunday siyosat biz ilgari koʻrganimizdek odatda iqtisodiyotni tanglikdan chiqarish yoki inflatsiyani jadal bostirish uchun qoʻllaniladi.

Yumshoq monetar siyosat. Bunda davlat pul massasining ortishiga toʻsqinlik qilmaydi, pul emissiyasi hadeb cheklanavermaydi, natijada pul koʻpayib, uning arzonlashuvi yuz beradi. Yumshoq siyosat iqtisodiyot oʻsish pallasida boʻlganda koʻproq qoʻllaniladi, pul massasining oʻsishiga qarab tovarlar massasi ham oʻsadi. Bunda tovar-pul muvozanati pulni qisqartirish hisobidan emas, balki tovarlarning koʻpayishi tufayli ta'minlanib turadi.

Fiskal siyosat. Bu davlatning soliq-budjet siyosatidir, unga binoan soliqlar belgilanadi, budjet mablagʻlari aniq maqsadlar yoʻlida ishlatiladi.

Soliq siyosati soliqlar vositasida budjetga pul toʻplashga qaratiladi. Unga binoan soliq turlari aniqlanadi, soliq stavkalari, soliq solinadigan obyektlar, soliq imtiyozlari, soliq undirish tartibi belgilanadi.

Soliqlar davlatning iqtisodiyotga ta'sir etishida qoʻllaniladigan asosiy vositadir. «Soliq tizimi nafaqat soliqlarni undirish, balki birinchi galda, ragʻbatlantirish xususiyatiga ega boʻlishi lozim».

Iqtisodiyotni ragʻbatlantirish zarur boʻlganda soliqlardan imtiyozlar beriladi. Bunda soliq kamaytiriladi, soliqni undirish muhlati choʻziladi yoki umuman soliq undirilmaydi. Natijada firmalarga tegadigan foyda koʻpayadi, ular foydani reinvestitsiya qiladi, ya'ni qaytadan ishlab chiqarishni oʻstirishga yuboradi. Ishlab chiqarishni ragʻbatlantirish maqsadida Oʻzbekistonda foydadan toʻlanadigan soliq stavkasi yildanyilga pasaytirilmoqda. Bu usul iqtisodiy subyektlar kapitalning ishlab chiqarishni kengaytirish, modernizatsiya qilishga turtki vazifasini oʻtaydi. Fiskal siyosatda iqtisodiyotni barqarorlashtirish va oʻstirish uchun ikki xil yoʻldan boriladi:

- 1. Ilgari kiritilgan va hozir amalda boʻlgan iqtisodiy stabilizatorlarni vositalarni qoʻllashni davom ettirish. Davlat qonun yoʻli bilan shunday tartibni oʻrnatadiki, unga binoan moliya normativlari (me'yorlari) joriy etiladi. Bular sharoit oʻzgarishiga qarab avtomatik ravishda amal qilaveradi. Bular jumlasiga soliq stavkalarini, ishsizlik nafaqasi miqdori, daromadlarning inflatsiyaga qarab indeksatsiya qilinishi, ijtimoiy yordam koʻrsatish normativlarini kiritish mumkin. Masalan, daromad soligʻi daromad miqdoriga nisbatan 15 foiz qilib belgilansa, daromad koʻpayishi bilan uning miqdori ham avtomatik ravishda oshadi. Daromadlarni 80 foiz indeksatsiyalash tartibi oʻrnatilgan boʻlsa, narx oshgan taqdirda, shu 80 foiz darajada daromad ham koʻpaytiriladi.
- 2. Sharoitga qarab yangi normativlarni kiritish yoʻlidan borish, bu diskretsion fiskal siyosat deb yuritiladi. Bu siyosat doirasida yangi soliq stavkalari joriy etiladi, yangi soliqlar kiritiladi, budjet mablagʻlarini sarflash normativlari oʻzgartiriladi. Diskretsion siyosat oʻzgargan sharoitga moslashish siyosatidir. Iqtisodiyot bir maromda oʻsib borayotganda birinchi yoʻl, u tanglikka yoʻliqib, undan chiqish kerak boʻlganda, ikkinchi, ya'ni diskretsion yoʻl ustuvor boʻladi.

Fiskal siyosat budjet orqali ham iqtisodiyotga ta'sir etadi. Budjet hisobidan davlat ishlab chiqarish infratuzilmasiga katta investitsiyalarni yuboradi, milliy iqtisodiyot uchun ahamiyatli ish (masalan, yangi texnologiyani yaratish) bilan shugʻullanuvchi korxonalarga subsidiya beriladi. Subsidiya moliyaviy yordam sifatida qaytarib olinmaydi, uning hisobidan xarajatlar qoplanib foyda koʻpayadi, bu bilan korxonalar ragʻbatlantiriladi.

Budjet siyosati ijtimoiy ne'matlarning yaratilishini kanda qilmay va kerakli miqdorda pul bilan ta'minlab turishga qaratiladi. Davlat budjeti balanslashgan bo'lishi, ya'ni daromadlarga qarab xarajatlar qilinishi zarur bo'ladi. Budjet siyosati shundan kelib chiqqan holda budjet defitsitiga yo'l bermaslikni, defitsit yuz bergan taqdirda ham, bu me'yorida

boʻlishiga qaratiladi. Budjet siyosati ichki va tashqi qarzning ham me'yorida boʻlishini ta'minlashi zarur.

Fiskal siyosat ikki xil boʻladi. Faol fiskal siyosat. Bu qoʻllanilganda diskretsion vositalar ishga solinadi, masalan, soliqlar kamaytiriladi, ulardan saylangan tarzda boʻlsa-da siylovlar beriladi, budjetdan transfertlar berish koʻpaytiriladi, firmalar subsidiyalar oladi. Bularning hammasi iqtisodiy faollikka olib keladi. Firmalar xarajati qisqarib foydasi ortadi, aholining transfertlar hisobidan xarid qobiliyati oshadi. Xullas, bu siyosat firmalar va xonadonlar talabini oshiradi. Mana shunday yoʻl koʻp hollarda iqtisodiyot qiyinchilikdan chiqib oʻzini oʻnglab olishi uchun qoʻllaniladi.

Nofaol fiskal siyosat. Bu siyosat moliyaviy stabilizatorlarni oʻzgartirmay, ularning erkin ishlashiga yoʻl berishga qaratiladi, chunki bozor mexanizmi yaxshi ishlab turgan boʻladi. Iqtisodiyotning uzilishlarsiz yuksalib borishi tufayli moliya vositalarini oʻzgartirishga hojat qolmaydi. Demak, bu siyosat iqtisodiy oʻsish toʻxtovsiz borayotgan kezlarda ish beradi.

Investitsiya siyosati. Bu investitsiya resurslarini shakllantirish va ularning kerakli sohalarga yuborilishini ta'minlashga qaratilgan siyosatidir. Bu siyosat investitsion faollikni oshirishga yoki kamaytirishga qaratiladi. Bu davlatning struktura (ishlab chiqarish tarkibini oʻzgartirish) siyosati bilan bogʻliq, bu esa ishlab chiqarishning eski sohalarini cheklab, yangi, masalan, eksportga moʻljallangan sohalarini oʻstirishni bildiradi.

Investitsiya siyosatiga koʻra yangi istiqbolli sohalarga investitsiya qilingan foydadan umuman soliq olinmaydi yoki qisqartirilgan miqdorda olinadi. Yangi sohalardagi mol-mulkdan soliq olinmagan holda eski sohalardagi mol-mulkdan soliq koʻproq olinadi. Bu bilan yangi sohalarning jadal oʻsishi ragʻbatlantiradi, eski sohalar esa ragʻbatlantirilmaydi.

Investitsiya siyosati texnika taraqqiyotini ham jadallashtiradi. Yangi texnologiyalarga pulni investitsiyalayotgan firmalarga subsidiyalar ajratiladi, soliqdan yengilliklar beriladi. Bu siyosat firmalarga tushadigan investitsiya yukini kamaytirishni ham koʻzlaydi. Shu maqsadda bir qator serkapital, binobarin, katta investitsiyalarni talab qiluvchi va investitsiyalar oʻzini tezda oqlamaydigan sohalarni moliyalashtirishni davlat oʻz zimmasiga oladi. Bu bilan firmalar investitsiyasining serfoyda ishlarga yuborilishiga koʻmak beriladi.

Bozor qoidalariga binoan investitsiyalarni serfoyda sohalarga yuborilishi davom etadi. Biroq davlat xususiy investitsiyalarni

umumiqtisodiy ahamiyatga molik sohalarga yuborilishini oʻz qoʻlidagi moliya-kredit vositalari bilan ragʻbatlantiradi.

Agrar siyosat. Bu davlatning qishloq xoʻjaligini qoʻllab-quvvatlashga qaratilgan siyosatidir. Mazkur siyosat qishloq xoʻjaligining barqaror oʻsishini, oziq-ovqat mustaqilligi va xavfsizligini ta'minlashni koʻzlaydi. Uning doirasida davlat qishloqdagi ishlab chiqarish infratuzilmasining (suv xoʻjaligi, yoʻl qurilishi, gaz va elektr energiyasi ta'minotining) xarajatlarini qisman o'z zimmasiga oladi, davlat yerni ijaraga olib ishlatilishini, yerni garovga qoʻyib kredit olishni huquqiy jihatdan ta'minlaydi. Agrar siyosatda (yer davlatniki bo'lgan joyda) davlatning xarid narxlari, davlat subsidiyalari kabi vositalar qoʻllaniladi. Dehqonlarni qo'llab turish uchun yer solig'i yengil qilib belgilanadi. Qishloq xoʻjaligida rentabellik past boʻlganidan kapitalni u yerdan chiqib ketishiga yoʻl qoʻymaslik uchun davlat fermerlarga subsidiya berib turadi, uning hisobidan xarajatlar qisman qoplanib fermerlar me'yordagi daromadga ega bo'lishadi va qishloq xo'jaligini tark etmaydilar. Fermerlarni rag'batlantirish uchun davlat qishloq xo'jaligi mahsulotini ulardan kelishilgan narxlarda sotib oladi. Davlat narxlari bozor narxlariga yaqin turadi, ularga binoan mahsulotni davlatga sotish fermerlar uchun qulay bo'ladi, chunki davlat xaridi mahsulotlarning sotilishini va kanda qilmay daromad olinishini kafolatlaydi.

Tashqi iqtisodiy siyosat. Bu davlatning oʻzaro foydali tashqi aloqalarini rivojlantirish, mamlakat iqtisodiyotini jahon xoʻjaligi bilan integratsiyalashuvini ta'minlashga qaratilgan siyosatidir. Bu siyosatning asosiy maqsadi milliy iqtisodiyotning jahon xoʻjaligidagi mavqeini mustahkamlashdir. Unga binoan eksport va import, chetga kapital chiqarish va chetdan kapital kiritish, ish kuchi migratsiyasiga doir tadbirlar amalga oshiriladi. Bu siyosatda bojxona toʻlovlari, eksportimport litsenziyalari va kvotalari kabi vositalar qoʻllaniladi. Aytilgan vositalar iqtisodiy chegara hosil etib, milliy iqtisodiyotni himoya qiladi. Eksportni koʻpaytirish zarur boʻlsa, unga litsenziyalar (ruxsatnoma) beriladi, eksport kvotasi oshiriladi. Bordi-yu importni qisqartirish ma'qul boʻlsa, uning kvotasi kamaytiriladi, import uchun boj toʻlovi oshiriladi, importga litsenziya berish chegaralanadi.

Davlat siyosati kapital chiqarish va kiritish tartibini ham belgilaydi. Kapital kiritish zarur boʻlsa, bu ish ragʻbatlantiriladi. Kapital chiqishi ma'qul boʻlsa, davlat bunga sharoit yaratib beradi. Chet elga ish kuchini chiqarish uchun ham yordam beriladi. Bordi-yu mamlakatga arzon ish kuchi kerak boʻlsa, uning chetdan oqib kelishi uchun migratsiya qoidalari

(chegaradan oʻtish, yashash va ishlash uchun ruxsat olish va h.k.) yengillashtiriladi. Davlat siyosati xalqaro iqtisodiy tashkilotlar bilan hamkorlik qilishni ham moʻljallaydi.

Davlat iqtisodiy siyosatining samaradorligi uning monitoringi orqali aniqlanadi. Bunda iqtisodiy oʻsish sur'atlari, inflatsiya darajasi, eksport va import holati, tashqi qarz miqdori, budjet defitsiti kabi koʻrsatkichlarga qarab iqtisodiy siyosat natijasi baholanadi.

Iqtisodiy siyosat doirasida davlatning turli dasturlari ishlab chiqiladi va amalga oshiriladi. Dasturlarda koʻzlangan maqsad, amalga oshiriladigan chora-tadbirlar, ulardan kutiladigan natijalar, ularni moliyalashtirish manbalari aniqlanadi. Dasturlar milliy iqtisodiyot uchun ustuvor boʻlgan muammolarni hal etishga qaratiladi. Bular jumlasiga tanglikdan chiqish, oziq-ovqat, energiya ta'minoti, texnologiyalarni yangilash, infratuzilmalarni rivojlantirish, eksport salohiyatini oshirish, qoloq hududlarni rivojlantirish kabi dasturlar kiradi. Dasturlarda belgilangan muammolarning hal etilishi iqtisodiy-ijtimoiy rivojlanishga turtki beradi.

Tayanch tushunchalar:

Iqtisodiyot, iqtisodiy faoliyat, iqtisodiy kategoriyalar, iqtisodiy qonunlar, fanning predmeti, fanning vazifalari, fanning maqsadi, tahlil uslublari, tadqiqot metodologiyasi, iqtisodiy siyosat, iqtisodiy ustuvorlik gʻoyasi.

Savol va topshiriqlar:

- 1. Keynschilar nazariyasida ishsizlik va inflatsiyaning oshishi qanday talqin qilingan?
- 2. Keynschilar nazariyasidagi multiplikator va akselerator gʻoyalarining mohiyatini tushuntiring.
- 3. Nima uchun keynschilar davlatning iqtisodiyotga aralashuviga alohida e'tibor berishadi?
 - 4. Monetarizm nazariyasida pulga qanday ahamiyat beriladi?
- 5. Ijtimoiy bozor xoʻjaligi nazariyasida iqtisodiyotning ijtimoiyligi qanday izohlanadi?
- 6. Nima uchun jamiyatning iqtisodiy faoliyati iqtisodiy insonlar faoliyatining majmui deyiladi?
 - 7. Iqtisodiyot kishilik hayotining birlamchi asosi ekanligini izohlang.
 - 8. Iqtisodiy qonunlarni bilish mumkinmi?
 - 9. Iqtisodiyot va huquqning aloqadorligini tushuntirib bering.
 - 10. Iqtisodiyotni mafkuradan xoli etish yoʻllari qanday?

Mavzuni chuqur o'rganish instrumentariysi

Iqtisodiyotning doimiy va bosh masalasi jamiyat ehtiyojlarining cheksizligi va iqtisodiy resurslarning cheklanganligidir.

Iqtisodiyot — turli-tuman iqtisodiy faoliyatlarni, ishlab chiqarishning muayyan usulini hamda infratuzilmaviy muassasalarini yaxlit qilib birlashtiruvchi iqtisodiy tizim.

Iqtisodiy faoliyat – insonlarning moddiy va ma'naviy ne'matlarini ishlab chiqarish, iste'molchiga yetkazib berish hamda xizmatlar ko'rsatishga qaratilgan, bir-biriga bog'liqlikda amalga oshiriladigan faoliyatlar.

Iqtisodiy dastaklar – jamiyatning xoʻjalik yuritish mexanizmida amal qiluvchi iqtisodiy vositalar, xoʻjalik amaliyotidagi iqtisodiy koʻrinishlar. Bozor iqtisodiyotida ular jumlasiga narx, tannarx, foyda, daromad, sof daromad, zarar, dotatsiya, kompensatsiya, soliq, boj puli, qarz, foiz, ish haqi va boshqalar kiradi.

Institutsional iqtisodiy nazariya (institutsionalizm) – iqtisodiy faoliyat jarayonida insonning takror ishlab chiqarish munosabatlari tizimini tartibga soluvchi institutlarning shakllanish va rivojlanish qonuniyatlari toʻgʻrisidagi fan; rasmiy va norasmiy institutlar oʻrtasidagi ziddiyat ushbu nazariya doirasida asosiy hisoblanadi.

Fan – insonning obyektiv voqelik rivojlanishining qonuniyatlari va yoʻllari toʻgʻrisidagi bilimlari tizimi yoxud bunday bilimlarning alohida tarmogʻi; unga yangi bilimlar ishlab chiqarish borasidagi faoliyat ham, ushbu faoliyatning natijasi, ya'ni dunyoning ilmiy manzarasi ifodalovchi axborotning muayyan hajmi va bilimlar majmui ham kiradi.

Noiqtisodiy nazariya – intellektual ne'matlarni takror ishlab chiqarish sohasida xo'jalik agentlari o'rtasida yuzaga keladigan iqtisodiy munosabatlar ijtimoiy shakllarining rivojlanish qonunlarini o'rganuvchi fan.

Iqtisodiy fan obyekti – insonga zarur bo'lgan ne'matlarni yaratish va ulardan foydalanish borasidagi inson faoliyatining butun sohasi.

Iqtisodiy nazariyaning obyekti – turli iqtisodiy jarayonlarga xos boʻlgan eng muhim, qonuniy aloqalar.

Funksional va ijtimoiy-iqtisodiy tizimlar oʻrtasidagi asosiy ziddiyat — yaratuvchi kuchlar bilan takror ishlab chiqarish munosabatlari oʻrtasidagi ziddiyat.

Iqtisodiy nazariya predmetining asosiy ziddiyati — ijtimoiy-iqtisodiy munosabatlarning muayyan ijtimoiy shakli bilan ijtimoiy yaratuvchi kuchlar rivojlanishining mavjud talablari oʻrtasidagi ziddiyat.

Inson taraqqiyotning asosiy iqtisodiy qonuni — iqtisodiy munosabatlar ijtimoiy shakllarining yaratuvchi kapital va insonning yaratuvchi kuchlarining rivojlanish ehtiyojlariga muvofiqligi qonuni.

Iqtisodiy fan mavzui (predmeti) – oqilona iqtisodiy tanlov sharoitida amalga oshiriladigan hamda iste'mol bilan ishlab chiqarish oʻrtasidagi ziddiyatni aks ettiradigan yuqori samarali xoʻjalik yuritish.

Iqtisodiy nazariyaning predmet sohasi – amalga oshirilish jarayonida iqtisodiy qonunlar namoyon boʻladigan inson faoliyati.

Ijtimoiy-iqtisodiy nazariya (siyosiy iqtisod) – iqtisodiy ne'matlarning harakatlanishi jarayonida xo'jalik yurituvchi agentlar o'rtasida yuzaga keladigan ishlab chiqarish munosabatlari to'g'risidagi fan; ishlab chiqarish kuchlari va ishlab chiqarish munosabatlari o'rtasidagi ziddiyat ushbu nazariyaning predmeti doirasida asosiy ziddiyat hisoblanadi.

Iqtisodiy nazariya predmetining mohiyati takror ishlab chiqarish munosabatlarining ijtimoiy shakli bilan mazkur munosabatlar ifoda etadigan yaratuvchilik faoliyatining mazmuni oʻrtasidagi uzviy birlikdan iborat.

Nazariya – dunyoning ilmiy manzarasini bilishning oliy shakli, voqelikning qonuniyatlari va muhim aloqalari haqida yaxlit tasavvur hosil qiluvchi bilishning u yoki bu tarmogʻidagi eng umumiy asosiy gʻoyalar tizimi.

Funksional iqtisodiy nazariya («asosiy oqim», Economics) – insonning cheklangan ne'matlar olamidagi xatti-harakatining qonuniyatlari toʻgʻrisidagi fan; oʻsib boruvchi ehtiyojlar bilan cheklangan ne'matlar oʻrtasidagi ziddiyat ushbu nazariya predmeti doirasida asosiy hisoblanadi.

Iqtisodiy nazariya – hayotiy ne'matlarni takror ishlab chiqarish jarayonida iqtisodiy agentlar oʻrtasida yuzaga keladigan ijtimoiy munosabatlarning rivojlanish qonuniyatlarini oʻrganadigan asosiy (fundamental) fan.

Mavhumlashtirish – tadqiqot tafakkurini koʻrib chiqilayotgan predmetning nomuhim, ikkinchi darajali deb hisoblanuvchi tomonlaridan ajratish orqali iqtisodiy hodisalarni atayin soddalashtirish.

Iqtisodiy nazariyadagi tahlil – koʻrib chiqilayotgan iqtisodiy hodisani yoxud uning alohida boʻgʻinlarini fikran tarkibiy qismlarga ajratish va alohida alohida tadqiq etish.

Analogiya – xossalarni ma'lum noiqtisodiy hodisadan tadqiq etilayotgan iqtisodiy hodisaga koʻchirishni nazarda tutuvchi bilish usuli.

Tadqiqotning dialektik usuli – u yoki bu iqtisodiy jarayonning ichki yoki «mohiyatiga oid» ziddiyatlarni aniqlash va tahlil qilishga asoslangan usul.

Qonun – zaruriy, muhim (ichki), barqaror, takrorlanuvchi munosabat, mohiyat, ya'ni u yoki bu hodisaning sifat muayyanligi.

Induksiya – faktlar asosida chiqarilgan, koʻpincha isbotlashni talab qiladigan muayyan gipoteza yoki umumiy fikrga olib boruvchi xulosalash.

Metod – muayyan bilish maqsadiga erishishni ta'minlovchi tadqiqot yoʻli, harakat usuli yoki tarzi.

Deduksiya metodi («keltirib chiqarish» metodi) – umumiy xulosalardan va ilgari isbotlangan gipotezalardan xususiy va yakka hukmlarga oʻtish.

Induksiya metodi («olib borish» metodi) – xoʻjalik voqeligining yakka faktlarini oʻrganishdan umumiy qoidalar va xulosalarga oʻtish.

Ilmiy abstraksiya (mavhumlashtirish) **metodi** – iqtisodiy hodisalarni koʻrib chiqishda mavhumlashtirishga asoslangan tadqiqot usuli.

Chuqur tahlil metodi – xoʻjalik yurituvchi agentlarning iqtisodiy xattiharakati qonuniyatlarini u yoki bu iqtisodiy oʻzgaruvchilar (daromad, xarajat, foydalilik kabilar)ni bir xilda orttirish (qoʻshimchalar kiritish) oqibatlarini tahlil qilish yordamida aniqlash usuli.

Iqtisodiy nazariyaning metodologik funksiyasi – amaliy-iqtisodiy fanlar uchun instrumental asos funksiyasi.

Metodologiya – tadqiqotning eng umumiy qoidalari va qonunlarini qamrab oladigan umumiy metodlar majmui.

Fan metodologiyasi – ilmiy bilish prinsiplarni, shuningdek tadqiqot faoliyatining tizimi va mantiqiy tashkil qilinishini aks ettiruvchi nazariya va ta'limotlar.

Sifat jihatdan tadqiq etish metodlari – iqtisodiy hodisalarning mohiyatiga kirib borish bilan bogʻliq boʻlgan va falsafiy tafakkur yuritish, iqtisodiy voqelikning faktlarini umumlashtira olishni talab etuvchi usullar.

Miqdor jihatdan tadqiq etish metodlari – faktlarga oid materialni iqtisodiy hodisalarni oʻlchash, qiyoslash va solishtirish maqsadida ishlash usullari va vositalarining majmui.

Iqtisodiy nazariya metodlari – iqtisodi voqelikni tadqiq etishning umumiy (metodologiya) va juz'iy usullari tizimi.

Umumiy metodlar – voqelik hodisalarini tadqiq etish borasidagi muayyan prinsiplar va yondashuvlar.

Iqtisodiy qonunlarning ochiq tizimlari — muayyan iqtisodiy tizim ichidagi barqaror va takrorlanuvchi aloqalarni izlash va topish bilan bogʻliq tadqiqot jarayoni.

Tadqiqotning pozitivistik (neopozitivistik, postpozitivistik) metodi – iqtisodiyotning faoliyat koʻrsatishidagi tashqi shart-sharoitlar va omillarni tavsiflovchi xususiyatlar tizimini ifodalovchi usul.

Iqtisodiy nazariyaning bilish funksiyasi – iqtisodiy rivojlanishning obyektiv qonunlarini bilish funksiyasi.

Iqtisodiy nazariyaning oʻzgartirish funksiyasi — xoʻjalik yuritish sohasidagi oʻzaro munosabatlarning butun tizimini tartibga soluvchi va muvofiqlashtiruvchi an'anaviy institutlarni ilmiy asoslangan holda qoʻllash va yangilarini yaratish funksiyasi.

Iqtisodiy nazariyaning bashoratlash funksiyasi – iqtisodiy manfaatlarni maqbullashtirish (optimallashtirish) istiqbollarini ilmiy asoslash.

Iqtisodiy nazariyadagi sintez – tahlil (analiz) natijasida olingan bilimlarni keyingi umumlashtirishlar va xulosalar bilan fikran birlashtirish.

Tizimli tahlil – muayyan obyektning «parchalangan» tuzilishini ham, yaxlit obyektning oʻzini ham bir vaqtda tadqiq etishga imkon beruvchi usul va vositalar majmui.

Tadqiqotning tizimli metodi – iqtisodiy munosabatlar va oʻzaro munosabatlarning ham ichki, ham tashqi ziddiyatlarini aniqlash va tahlil qilishga asoslangan usul; tizimli metodning obyektiv asosini yaxlit iqtisodiy tizim tashkil qiladi.

Statistika — ommaviy hodisalar va jarayonlarning miqdor koʻrsatkichlarini ularning sifat jihatlari bilan chambarchas aloqada toʻplash usullarini oʻrganuvchi fan.

Tadqiqotning strukturalistik metodi – u yoki bu iqtisodiy jarayonning ichki tuzilishini aniqlash va tahlil qilishga asoslangan usul.

Tadqiqotning subyektivistik metodi – vositalari, bir tomondan, firma, davlat kabilarga oʻxshash iqtisodiy subyektning emas, balki aniq shaxsning iqtisodiy xatti-harakati qonuniyatlari bilan bogʻlangan, boshqa tomondan ularni aniqlashga qaratilgan usul.

Iqtisodiy nazariyaning juz'iy metodlari – iqtisodiy hodisalarni tadqiq etishning aniq va lokal vositalari, usul va yoʻllari majmui.

Iqtisodiy modellar – turli iqtisodiy kattaliklarning miqdoriy baho berish mumkin boʻlgan oʻzaro aloqalarini soddalashtirib (chizmalar, grafiklar va shu kabilar orqali) tasvirlash.

Iqtisodiy manfaat – iqtisodiy subyektning muayyan ehtiyojini qondirishning u yoki bu koʻrinishda ifodalangan intilishi.

Iqtisodiyot va iqtisodiy nazariyaning insonparvarlashuvi – iqtisodiyotning obyektiv voqelik sifatida «insoniylashuvi»dan iborat obyektiv jarayon hamda bu jarayonning nazariyada subyektiv aks etishi; insonning takror ishlab chiqarishning kritik omiliga aylanish jarayoni.

Iqtisodiy nazariyaning gumanistik mazmuni — ushbu nazariyada xoʻjalik yuritish umumiy tizimida insonning tutgan oʻrni va roli bilan bogʻliq masalalar va muammolarning aks ettirilishi.

Ideal axborot – toʻplangan va ishlab chiqariladigan yangi insoniy bilimlar shaklida mavjud boʻlgan axborot.

Ishlab chiqarishning kritik omili – ishlab chiqarishning milliy yaratuvchi kapital doirasidagi asosiy, hal qiluvchi omili.

Metodologik individualizm – cheklangan ne'matlarni iste'mol qilishdan olinadigan foydani eng koʻp darajaga yetkazish maqsadida ulardan eng oqilona foydalanishga intiluvchi ijtimoiy neytral «atomistik» individ xattiharakatlarining qonuniyatlarini aniqlaydigan tadqiqot konsepsiyasi.

Buyumlashgan axborot – ashyoviy kapitalda va boshqa moddiy obyektlarda boʻladigan axborot.

Postindustrial iqtisodiyot – bilimlarning tabiiy kapitalning saqlanishini ta'minlovchi darajasiga asoslangan takror ishlab chiqarishning noosfera tipidagi iqtisodiyot.

Insonning rivojlanishi – shaxsning muayyan individual, ijtimoiy-guruhiy va ijtimoiy qadriyatlar doirasidagi faoliyati davomida uning miqdor va sifat oʻzgarishlari bilan kechadigan uzluksiz jarayon.

Iqtisodiy «antropotsentrizm» – insonning butun iqtisodiy faoliyat markaziga chiqishidan iborat obyektiv jarayon boʻlib, bunda ishlab chiqarishni rivojlantirish maqsadi, insoniyatni rivojlantirish maqsadi bilan aynanlashtiriladi: iqtisodiyotning insonparvarlashuvi takror ishlab chiqarish jarayonining ichki xususiyatiga aylanadi.

Mavzu yuzasidan asosiy xulosalar:

- 1. Iqtisodiyotning doimiy va bosh masalasi jamiyat ehtiyojlarining cheksizligi va iqtisodiy resurslarning cheklanganligidir.
- 2. *Iqtisodiyot nazariyasi* iqtisodiy resurslar cheklangan sharoitda jamiyat a'zolarining yuksalib borayotgan ehtiyojlarini qondirish maqsadida moddiy ne'matlarni, xizmatlarni ishlab chiqarish, taqsimlash, ayirboshlash va iste'mol qilish jarayonida vujudga keladigan iqtisodiy munosabatlarni, samarali xo'jalik yuritish qonun-qoidalarini o'rgatadi.
- 3. Iqtisodiyot nazariyasi oʻz predmetini oʻrganishda obyektiv qonun va kategoriyalarni qoʻllaydi. Bular umumiqtisodiy va ayrim tizimlarga xos boʻladi. Iqtisodiyot nazariyasi fani jamiyat ahliga iqtisodiy hodisalarni idrok etish, kishilarga iqtisodiy bilim berish, jamiyat iqtisodiy taraqqiyotining umumiy asoslarini shuningdek iqtisodiy siyosatga oid amaliy tavsiyalar berishdan iborat.
- 4. Ushbu fan bilish, iqtisodiy fanlar uchun nazariy asos hamda amaliyot uchun ilmiy baza boʻlib xizmat qiladi.
- 5. Iqtisodiyot nazariyasi iqtisodiyotning asosiy muammosi boʻlgan iqtisodiy resurslar cheklangan sharoitda jamiyatning yuksalib borayotgan ehtiyojlarini qanday qilib mukammalroq qondirib borish mumkinligi toʻgʻrisidagi masalaning yechimini hal etishning nazariy jihatlarini tadqiq qiladi.

2-MAVZU. IJTIMOIY-IQTISODIY TIZIMLAR VA ULARNING XUSUSIYATLARI

1. Ijtimoiy-iqtisodiy tizimning mohiyati va belgilari

Iqtisodiyot ijtimoiy hayotning birlamchi boʻgʻini hisoblanadi. Kishilarning faoliyati ijtimoiy hayotda kechadi. Jamiyat bir-biriga bogʻliq oʻziga xos ichki tuzilishga ega.

Tizim – bu jamiyatning ijtimoiy-iqtisodiy tuzilishi, uni tashkil etuvchi, bir-birini taqozo etib, oʻzaro ta'sir oʻtkazuvchi unsurlarning majmui boʻlib, bunda unsurlar birgalikda amal qiladi, natijada ayrim unsurlarga xos boʻlmagan umumiy xususiyatlar paydo boʻladi.

Ijtimoiy-iqtisodiy tizim – bu iqtisodiyot taraqqiyotining umumiy shart-sharoitidir.

Iqtisodiyotning ijtimoiy-iqtisodiy tizimi — ijtimoiy-iqtisodiy oʻzaro munosabatlarning barcha shakl va turlari birligi boʻlib, ularning asosiysi mulkchilik tizimidir. Shu bois ham mulk masalasini hal qilishga Prezident Islom Karimov tomonidan mustaqillikka qadar (1989–1991) va mustaqillikning dastlabki yillari muhim ahamiyat berildi. Istiqlol yillarida mulkchilikning tuzilishida tub oʻzgarishlar roʻy berdi, koʻpukladli iqtisodiyot amalda shakllanib, uning tarkibida xususiy mulk ustuvor rivojlandi. Kichik biznes va xususiy tadbirkorlik mamlakatimiz iqtisodiyotida nafaqat hal qiluvchi oʻrin egalladi, ayni vaqtda bozorni zarur tovar va xizmatlar bilan toʻldirish, odamlarning daromadlari va farovonligi oshib borishining asosiy manbaiga, aholi bandligi oʻsishining eng muhim omiliga aylandi.

Ijtimoiy-iqtisodiy tizim – bu iqtisodiyot taraqqiyotining umumiy shart-sharoitidir. Iqtisodiy faoliyat har doim muayyan tizimlar doirasida kechadi. Bulardan har birining oʻz xususiyatlari boʻladi. Bular orasidagi ilk bor shakllangan eng muhim tizim – bu an'anaviy tizimdir.

An'anaviy tizim. Insonning iqtisodiy faoliyati dastlab mana shu tizimda yuz bergan. Uning alomatlari sarqit sifatida uzoq saqlanadi, hatto hozir ham onda-sonda uchrab turadi.

An'anaviy iqtisodiyot – bu o'ta zaif kuch omillariga tayangan, kam unumli natural ishlab chiqarishga, an'analar shakliga kirgan ijtimoiyiqtisodiy munosabatlarga asoslangan iqtisodiyotdir.

An'anaviy tizim dastlab jamiyat mulki, soʻngra esa individual xususiy mulkka tayanadi.

Jamoa mulki – bu qon-qarindoshchilik asosida birlashgan yoki yagona hududda yashovchi kishilarning umumiy mulki hisoblanadi.

An'anaviy tizimga natural kuch xos bo'ladi, bunda mahsulotlar ondasonda sotiladi yoki barter qilinadi (almashtiriladi).

Natural xoʻjalik — bunda mahsulot ishlab chiqaruvchilarning oʻz iste'molini qondirish va ichki xoʻjalik ehtiyojlari uchun ishlab chiqariladi. Bu an'anaviy tizim oʻrniga keluvchi yangi tizimdir. U bir qator belgilari bilan oʻtmishdoshlaridan ajralib turadi.

Bozor iqtisodiyoti – bu mukammal ishlab chiqarish omillariga ega boʻlgan, tovar-pul munosabatlariga asoslangan, aniq ijtimoiy moʻljali bor, bozor signallariga binoan va pul vositasida bajarilib turuvchi iqtisodiyotdir. Bozor tizimi xilma-xil mulkchilikka asoslanadi, ammo xususiy mulkchilik ustuvorlik qiladi. Bundan tashqari jamoa va davlat mulki ham amal qiladi.

Totalitar-rejali tizim. Bu tizim bozor iqtisodiyoti rivojlanishini zudlik bilan, ya'ni revolyutsion tarzda to'xtatib qolish va uni majburan rejalashtirish yo'liga o'tkazish orqali yuzaga keladi.

Totalitar-rejali iqtisodiyot – bu davlatlashtirilgan, ijtimoiy mulkka tayangan, bir markazdan turib, rejalashtirishga va boshqarishning ma'muriy-buyruqbozlik usullariga asoslangan iqtisodiyotdir.

Bu tizimga iqtisodiyotning hamma jabhalarini ham resurslar, ham mahsulot, ham xizmatlarga davlatlashtirish xosdir. Bu yerda barcha moddiy resurslar davlat mulkiga aylantiriladi, hatto unga kirmay qolgan boshqa mulkka oid resurslar ham amalda davlat ixtiyorida boʻladi. Davlat mulki monopoliyasining oʻrnatilishi natijasida iqtisodiyot ham davlatlashtiriladi. Resurslar va tayyor mahsulotlar narxini ham davlat yuqoridan belgilab beradi, narxlar qat'iy boʻlib, uni hech kim oʻzgartira olmaydi.

Oʻzbekiston erishgan yutuq va marralarni xolis va munosib baholash uchun avvalambor barchamiz mustaqillikning dastlabki yillarida qanday murakkab vaziyat boʻlganini esga olishimiz oʻta zarur. Bu holat Islom Karimovning «Oʻzbekiston mustaqillikka erishish ostonasida» kitobida batafsil yoritilib, unda: «Markazlashtirilgan rejalashtirish va taqsimlash mexanizmi asosida faoliyat koʻrsatgan butun sovet tizimiga xos boʻlgan illatlar bilan bir qatorda, respublikamiz iqtisodiyotining bir yoqlama rivojlanib, faqat xom ashyo yetkazib berishga yoʻnaltirilgani, iqtisodiyot, ekologiya va aholi genofondiga halokatli ta'sir koʻrsatgan toʻla va mutlaq paxta yakkaxokimligi yurtimizdagi vaziyatni jar yoqasiga olib kelib qoʻygan edi.

Buning oqibatida, ulkan tabiiy, mineral xom ashyo, mehnat va inson salohiyatiga ega boʻlishiga qaramasdan, respublikamiz sobiq SSSRda aholi turmush darajasi, ijtimoiy va gumanitar sohalar rivoji boʻyicha oxirgi oʻrinlardan birida turar edi. SSSR parchalanib ketganidan keyin vujudga kelgan sharoitda iqtisodiyotning fojiali ravishda inqirozga yuz tutishi, inflatsiyaning oʻta keskin oʻsishini jilovlash, ilgari qaror topgan xoʻjalik, ishlab chiqarish va moliyaviy aloqalarning butunlay izdan chiqib ketishi oqibatlariga barham berish, ishsizlikning yanada avj olishiga yoʻl qoʻymaslik favqulodda muhim ahamiyat kasb etganligi haqida ma'lumotlar olish mumkin», – deya ta'kidlangan.

Oʻzbekiston Islom Karimov rahnamoligida mustaqillikning ilk kunlaridan boshlab umrini oʻtab boʻlgan eski mustabid sovet tizimidan voz kechib, jahon tajribasini har tomonlama puxta oʻrganish, umuminsoniy qadriyatlarni chuqur anglash, milliy urf-odat va an'analarimizni asrab-avaylash va yanada mustahkamlash asosida ijtimoiy yoʻnaltirilgan bozor iqtisodiyotiga asoslangan ochiq demokratik davlat barpo etishga qaror qildi.

Inson taraqqiyoti toʻxtovsiz boʻlganidan tizimlar ham rivojlanadi. Ular kelib-ketib turadi. Tizimlar taraqqiyoti tabiiy tarixiy jarayondir. Tizimlar rivojlanishida ularning oʻrin almashuvi yuz beradi. Bir tizimning rivojlanish imkoniyatlari tugallangach, boshqa tizimga oʻtiladi.

Tizimlarning oʻrin almashuvi iqtisodiy zarurat boʻlganda yuz beradi. Bir tizim salohiyati tugallangach, boshqa salohiyatli iqtisodiy tizimga oʻtiladi.

Tizimlar baholanganda, moddiy, ijtimoiy-iqtisodiy va gʻoyaviy sharoit birgalikda qaraladi. Bunda nimaning qanday usullar bilan ishlab chiqarilishi aniq boʻladi.

Moddiy shart-sharoit belgilari — bu yaratilgan mahsulot va xizmatlarning qanday boʻlishi, ya'ni ularning natural mahsulot yoki tovar mahsuloti boʻlishi, ularning tarkibiy tuzilishining qandayligi, moddiy shakldagi yoki nomoddiy xizmat shaklida boʻlishidan iboratdir. Tizimlar belgilarini aniqlashda ishlab chiqarishning moddiy va shaxsiy insoniy omilining sifatli tavsiflari ham ahamiyatlidir (resurslar, kapital, ish kuchi malakasi va ma'naviyati, kasbiy mahorat, texnologiya, innovatsiya va h.k.). Barcha tizimlar mehnat taqsimotiga asoslanadi. Ijtimoiy-iqtisodiy tizimlar tafsilotida ijtimoiy-iqtisodiy munosabatlarning mazmuni ham muhim mezon rolini oʻtaydi.

Tizimlar iqtisodiyotni boshqarish usullari bilan ham tavsiflanadi. Bir yerda boshqarishning iqtisodiy zoʻrlash mexanizmi boʻlsa, boshqa yerda

guruhiy manfaatga intilish yoki individual manfaatlarni yuzaga chiqarish, ya'ni iqtisodiy rag'batlantirish mexanizmi amal qiladi, yana boshqa yerda mehnatga siyosiy-g'oyaviy undash, moddiy emas, balki ma'naviy-ruhiy rag'batlarga urg'u beriladi.

Tizim deganda uning tarkibida noiqtisodiy munosabatlarni, xususan, ham hisobga olish zarurki, ular siyosiy, mafkuraviy munosabatlarni huquqiy, axloqiy, diniy va boshqa shakllarga ega boʻladi. Ammo ularning har birida iqtisodiyotning muhri bor. Turli tizimning oʻz iqtisodiyotiga mos ravishda o'z dunyoqarashi mavjud bo'ladi. G'oyasiz odam bo'lmaydi, u ma'lum g'oyaga rioya qilib ish tutadi. Demak, mafkurasiz tizim bo'lmaydi. Bir tizimda mustabidlik va zo'rlik g'oyasi bo'lsa, boshqasida erkinlik va demokratiya, yana boshqasida davlatga tobelik va itoatkorlik g'oyasi ustuvor bo'ladi. Mashhur ingliz iqtisodchisi M. Keyns aytganidek, dunyoni iqtisodchilar va siyosatchilar gʻoyasi boshqarib turadi. G'oya e'tiqodning o'zi bilan cheklanmay, ma'lum xattiharakatlarni keltirib chiqaradi. Iqtisodiy siyosat ham tizimga kiradi. Bu iqtisodiy sohadagi yoʻl-yoʻriq va chora-tadbirlar majmuasi boʻlib, ma'lum maqsadni koʻzlaydi. Ular iqtisodiyotga ta'sir etish vositasi hisoblanadi. Iqtisodiy siyosatni davlat yoki ayrim mulk sohiblari yuritadilar. Bundan umumdavlat manfaati, individual yoki guruhiy manfaat ko'zlanadi. Demak, tizimlarning qiyofasini bir qator belgilar shakllantiradiki, bular moddiy-ashyoviy, shaxsiy-insoniy, ijtimoiy-iqtisodiy, siyosiy-g'oyaviy belgilardir. Bulardan eng asosiysi ijtimoiy-iqtisodiy belgilardir. Ammo boshqa belgilarni ham nazardan qochirib bo'lmaydi, chunki ular ham iqtisodiy rivojlanishga ta'sir etadi. Shu sababli tizimlar asosida iqtisodiyot yotsa-da, ularni sof iqtisodiy holda emas, balki boshqa belgilar bilan ham tavsiflash zarur.

2. Iqtisodiy tizimda insonning oʻrni

Insonning roli va mavjudligi uning ishlab chiqaruvchi kuchlar omili hamda ishlab chiqarish va boshqa ijtimoiy munosabatlarning subyekti ekanligi bilan belgilanadi. Bunda shunga e'tibor berish kerakki, ishlab chiqaruvchi kuchlar moddiy buyum va shaxsiy omillarining oʻzaro aloqador dialektik birligini ifodalaydi, bu ziddiyatli birlikdir. Buning ma'nosi shundan iboratki, faqat inson ishlab chiqarish vositalarini yaratadi, uni jonlantiradi va shu bilan ishlab chiqarish vositalarini ishlab chiqaruvchi kuchlarning elementiga aylantiradi. Bundan koʻrinadiki, inson – ishlab chiqaruvchi kuchlarning omili sifatida uning ikkinchi qismi

hisoblangan ishlab chiqarish vositalarini yaratib, ishlab chiqaruvchi kuchlarni toʻliq ma'noda vujudga keltiradi. Shuning uchun ham ish kuchi - jamiyat ishlab chiqaruvchi kuchlarining omiligina emas, balki asosiy ishlab chiqaruvchi kuchdir. Uning rivojlanish darajasiga koʻra inson kerakli ishlab chiqarish vositalarini yaratadi va undan foydalanish yoʻlyoʻriqlarini aniqlab beradi. Bu esa ishlab chiqarish shaxsiy va moddiy omillarining jamiyat ishlab chiqaruvchi kuchlari tizimidagi oʻzaro aloqadorligining umumiy yoʻnalishini ifodalaydi. Shu bilan birga, bir davr uchun ish kuchining xarakteristikasi qo'llaniladigan ishlab chiqarish vositalarining holati va o'zlashtirilgan aniqlanadi. Bu bilan orqali esa ishlab texnologiyalar omillarining muvofiqligi haqidagi umumiy iqtisodiy qonunning mohiyati namoyon bo'ladi.

Ishlab chiqarish omillarining muvofiqligi, oʻz tabiatiga koʻra, miqdoriy emas, balki dinamik xarakterda boʻladi. Bu dinamika hech qachon ishlab chiqarishning bitta omiliga qarab belgilanmaydi. Buni quyidagicha tushunish kerak boʻladi: yangi ishlab chiqarish vositalari va texnologiya oʻz-oʻzidan vujudga kelmaydi. Uni inson yaratadi. Ammo, shu bilan birga, bu yangi ishlab chiqarish vositalari va texnologiya ishlab chiqarishda qoʻllanilishi bilanoq ishlab chiqaruvchi kuchlarning ichki rivojiga ta'sir etuvchi asosiy kuch boʻlib qoladi, chunki u (yangi ishlab chiqarish vositalari va texnologiya), ya'ni ish kuchini yangi talablar darajasiga javob bera oladigan oʻz holatiga mos holda oʻzgarishga undaydi. Shu nuqtai nazardan qaraganda, mehnat vositalari va ayniqsa, mehnat qurollari ishlab chiqaruvchi kuchlarning nisbatan inqilobiy qismi deb aytish mumkin boʻladi.

Inson – ijtimoiy munosabatlarning hammasini: iqtisodiy va siyosiy, oilaviy, g'oyaviy va ruhiy munosabatlarni o'zida milliy mujassamlashtiradi. Bu xilma-xil ijtimoiy munosabatlarsiz insonni tushunish mushkul. Chunki, jamiyatda hamma narsa inson tufayli sodir bo'ladi va unga xizmat qiladi. Agar inson tashqaridan keladigan garorlarning fagat bajaruvchisi boʻlsa, u mehnatga ijodiy yondasha olmaydi. Shuningdek, agar ijtimoiy hayotning boshqa sohalarida undan faol faoliyat talab qilinmasa, u bevosita ishlab chiqarish jarayonida ham faol faoliyat ko'rsata olmaydi. Shuning uchun ham insonning ishlab chiqarishdagi faol rolini pasaytirish, tobora mukammallashayotgan va insonga bogʻliq boʻlmay qolayotgan texnikaga uning boʻysunishi haqidagi texnokratik qarashlarni sindirib, yoʻq qilib tashlash – fan-texnika va umuman ijtimoiy taraqqiyotni tezlashtirishning muhim

hisoblanadi. Hozirgi ishlab chiqarish sharoitida inson oʻz bilimi va kasb malakasini har tomonlama oshirmasdan hamda mustahkamlamasdan turib, samarali tarzda ish yurita olmaydi. Shunday qilib, yuqorida aytilganlardan shu narsa ravshan boʻladiki, mehnat ahlining sifat darajasiga qoʻyiladigan talablarning oʻsishi — uning ijtimoiy koʻlamda takomillashuvi — ijtimoiy ishlab chiqarish rivojlanishining yana bir umumiqtisodiy qonunidir.

Iqtisodiyotning darajalari, shakllari qanday boʻlishidan qat'i nazar, ularning hammasi bir maqsadga boʻysundiriladi, u ham boʻlsa, insoniyatning yashashi, koʻpayishi va kamol topishi uchun shart-sharoit yaratib berish, ehtiyojlarini qondirib berishdan iborat. Shunday ekan, iqtisodiyot inson hayotining asosini, uning poydevorini tashkil etib, uning oʻzi ham insonsiz, uning faoliyatisiz mavjud boʻlmaydi va hech qanday mazmun kasb etmaydi.

Insonning iqtisodiyotdagi juda katta va keng roli quyidagicha ta'riflanadi:

- 1. Inson tabiatning bir boʻlagi, uning ajralmas qismi sifatida harakat qiladi, tabiat ashyolarining shaklini oʻzgartirib iste'molga yaroqli holga keltiradi, boshqacha qilib aytganda, inson iqtisodiyotni harakatga keltiruvchi kuchi, hamma tovar va xizmatlarning iste'molchisi, ularni ishlab chiqaruvchisi va yaratuvchisidir.
- 2. Inson hamma tovar va xizmatlarni ishlab chiqarishda iste'molchilarga yetkazib beruvchi, bozor iqtisodiyoti sharoitida esa sotuvchi rolini bajaradi. Bunda ishlab chiqarish bilan iste'molchi oʻrtasidagi aloqani bajaruvchi sifatida namoyon boʻladi.
- 3. Inson tovar va xizmatlarni sotib oluvchisi va ularning iste'molchisi hamdir.
- 4. Inson iqtisodiyotning hamma davridagi uning tashkilotchisi, boshqaruvchisi boʻlib, uning turli omillari, boʻlaklari, sohalari oʻrtasidagi uygʻunlikni, aloqalarni, bir-biriga moslikni ta'minlab beradi.

Inson ehtiyojlarini rivojlantirish va qondirish tabiiy ravishda ijtimoiy ishlab chiqarishning pirovard vazifasi hisoblanadi. Ijtimoiy ishlab chiqarishning bu vazifasi uning biron-bir shakli tomonidan bekor qilina olmaydi va har qanday sharoitda ham uning pirovard maqsadi boʻlib qolaveradi.

Hozirgi zamon mutaxassislari insonni oʻziga xos fenomen sifatida tavsiflash uchun «individ», «individuallik», «shaxs» tushunchalaridan foydalanmoqda. Mazkur tushunchalar zanjiri inson bilan jamiyat orasidagi oʻzaro aloqalarni har tomonlama tahlil etish imkoniyatini

vujudga keltiradi. Individ – inson jinsiga ato etilgan turli vakolatlarni aniqlaydi. Individ ijtimoiy munosabatlar mahsulidir, biroq bundan inson faoliyati faqat obyektiv shart-sharoitlar ta'siri ostida shakllanadi, degan xulosa kelib chiqmaydi. Insonning jamiyatdagi oʻrnini bilish, inson hayotining mazmuni va ma'nosini bilish nafaqat uning boshqalar bilan munosabatini, balki boshqalardan oʻzini ajratishini ham tahlil qilishni taqozo etadi.

Prezident Islom Karimov ta'kidlaganidek, «Asrlar davomida aqlu zakovat ila bunyod etilgan boy ma'naviyati tufayli xalqimiz magʻrur yashadi, mehnat qildi, doimo hurriyat va erk sari intildi. Ana shu milliy ong, ana shu milliy gʻurur bugungi istiqbolimizning oltin poydevoridir. Bu poydevorga Shiroq va Toʻmaris, Beruniy va Forobiy, Abu Ali ibn Sino va Al Xorazmiy, Amir Temur va Ulugʻbek kabi yuzlab ulugʻ zotlar asos solganlar. Bobokolonlarimiz — Imom al-Buxoriy va Imom at-Termiziyning nomlarini faxr bilan tilga olamiz. Ulugʻ bobolarimiz Xoja Ahmad Yassaviy va Xoja Bahouddin Naqshband ruhi poklariga ehtiromimiz benihoyat baland. Bugun ularning insonni ma'naviy yetuklikka chorlovchi diniy, axloqiy va huquqiy hikmatlari qaytadan jaranglay boshladi».

Mamlakatimiz mustaqillikka erishishi sharofati bilan ijtimoiy hayotimizning hamma jabhalarida xalqimizning oʻtmish madaniyati — ma'naviyati, urf-odatlari hamda qadriyatlarini bilishga qiziqishi kuchaydi. Oʻzbekiston bozor munosabatlariga oʻtayotgan bir vaqtda yangi iqtisodiyot va iqtisodiy munosabatlar barpo etilayotgan bir paytda odamlar ruhiyatida, ularning ma'naviyatlarida oʻzgarish boʻlishi tabiiy va qonuniydir. Chunki insonning ichki dunyosi ijtimoiy-siyosiy shartsharoitlar oʻzgarishi bilan uzviy bogʻliq, bozor munosabatlariga oʻtish albatta oʻziga xos ma'naviy dunyoni shakllantiradi.

Ajdodlarimiz asrlar davomida yaratgan ma'naviy meros shu qadar ulkan, keng qamrovliki, ularning barchasining umumiy xususiyatlarini tahlil qilish, ulardan ibrat olib, bu merosni ma'naviyatimizning kelgusi rivoji uchun asos qilib olishimiz zarur. Oʻrta asrlar musulmon Sharqi madaniy hayoti, shu davrda yashab ijod qilgan mutafakkirlarning qimmatli asarlari, falsafiy va axloqiy ta'limotlari bugungi kunda ham oʻz ahamiyatini yoʻqotmagan. Sharqning mashhur axloqshunosi Husayn voiz Koshifiy insonning goʻzal xulqi va axloqiga quyidagicha baho beradi: «Yaxshi xulq, goʻzal (axloq) muomala shunday bir yoʻldirki, bu yoʻldan yurmay turib izzat va sharaf manzilini egallab boʻlmaydi, hayvonot biyobonidan insoniyat dorilmulkiga yetib boʻlmaydi».

Inson hayotining mohiyati, uning axloqi va ma'naviyati haqidagi fikrlar Ahmad Donish qarashlarida ham o'z aksini topgan. U insonga quyidagicha baho beradi: «Inson yeru koinot orasida o'rin olgan ajoyib mavjudotdir. ... Agar u xayolga cho'msa, yetti qavat osmonni xayol qutichasiga joylaydi. Agar u fikr qilsa, butun borliqni tokchasiga sig'diradi, agar uning mehri tovlansa, bechora chumolini kiprigi ustida saqlaydi, agar uning saxiyligi jilva qilsa, to'nini birovga berib o'zi yalang'och qoladi, agar uning xasisligi ruju qilsa, qumursqa og'zidagi donni talashadi».

Axloqiy fazilatlar, ularni shakllantirishning milliy jihatlari har doim saqlanib qoladi va jamiyat taraqqiyoti uchun muhim ahamiyatga molik boʻladi. Oʻzbeklarning milliy ma'naviyati, oʻziga xosligi, erkak va ayollarning sharqona axloqiy fazilatlari, ota-ona va farzandlar, qoʻni-qoʻshnilar, mahalla-koʻy aloqalari, halollik, iymon va vijdon bilan bogʻliq. Ma'naviyat faqat oʻtmish sadosi emas, balki hozirgi kundagi jamiyat taraqqiyotining muhim omili hamdir.

Shu bois ham taraqqiyotning «Oʻzbek modeli» inson va uning manfaatini birinchi oʻringa qoʻyadi.

Biz bugun taraqqiyotning yangi bosqichiga koʻtarilish yoʻliga chiqib oldik. Endigi vazifa ma'naviyatni tiklash va takomillashtirishdir. Zero, Prezident Islom Karimov ta'kidlaganlaridek, «mamlakatning iqtisodiy qudratini, uning ertangi kunini, boringki, taqdirini ham pirovard natijada aql zakovat, ma'naviyat hal qiladi».

Ijtimoiy-iqtisodiy islohotlardan koʻzda tutilgan asosiy maqsad mamlakat aholisi uchun munosib boʻlgan hayot va faoliyat, xalqimizning unutilayotgan ma'naviy-axloqiy qadriyatlarini tiklash, ijtimoiy-siyosiy barqarorlikni ta'minlash, kelajagi buyuk davlatning iqtisodiy asoslarini yanada mustahkamlash koʻzda tutiladi.

3. Ijtimoiy-iqtisodiy tizimda ishlab chiqarishni insonparvarlashtirish

Ishlab chiqarishni insonparvarlashtirish — insonning ijtimoiy tabiatiga mos keladigan moddiy-buyum va tashkiliy-iqtisodiy shart-sharoitlarni vujudga keltirishdir. Boshqacha aytganda, ishlab chiqarishda insonning mehnat qilishi va kamol topishi uchun zarur boʻlgan normal sharoitni yaratishdir.

Inson salohiyati eng faol, eng bunyodkor omil boʻlib, u mamlakatning islohotlar va tub oʻzgarishlar yoʻlidan tinimsiz ilgarilab borishini ta'minlab beradi. Bu omilning kuchi va ta'siri, eng avvalo, yuksak ma'naviyat bilan, jamiyatning iqtisodiy-ijtimoiy rivojlanish darajasi bilan belgilanadi. U aholining bilimdonlik darajasi, ish bilan bandlikning professional — malaka tuzilmasi va boshqa koʻpgina shart-sharoitlar orqali shakllanadi.

Inson salohiyati va mehnat zaxiralarini shakllantirishda ijtimoiydemografik vaziyat hal qiluvchi rol oʻynaydi.

Oʻzbekistonning muhim xususiyati shundan iboratki, bu yerda aholining oʻsish sur'atlari yuqori.

Oʻzbekistonda doimiy istiqomat qilayotgan aholi soni 2012-yilning boshida 29,6 million kishini tashkil etdi. Oʻzbekiston aholisi 1990–2010-yillar mobaynida 8,2 million kishiga koʻpaydi yoki 1,4 barobar oshdi.

Yurtimizda jismoniy va ma'naviy barkamol avlodni tarbiyalashga qaratilgan puxta oʻylangan demografik siyosat natijasida aholining yillik oʻrtacha oʻsishi keyingi yillarda barqarorlashib, oʻtgan asrning 80-yillaridagi 2 foizdan ziyod koʻrsatkich oʻrniga 1,4 foiz darajasida qayd etilmoqda.

Davlatimiz tomonidan sogʻliqni saqlash, onalik va bolalikni himoya qilish boʻyicha koʻrilayotgan chora-tadbirlar tufayli onalar va bolalar oʻrtasida oʻlim darajasining izchil pasayishiga erishildi: mustaqillik yillarida bolalar oʻlimining umumiy koeffitsiyenti 1990-yildagi 34,6 promilledan 2010-yilda 11,0 promillega, onalar oʻlimi esa 100 ming tirik tugʻilgan chaqaloqqa nisbatan tegishlicha 65,3 dan 21,0 ga tushdi. Natijada aholining oʻrtacha umr koʻrish darajasi 1990-yildagi 67,2 yoshdan 2012-yilda 73,2 yoshga yetdi yoki 9 foizdan koʻproq oʻsdi.

Mamlakatimizda ijobiy demografik jarayonlar aholining yosh tarkibini ham optimallashtirishni taqozo etdi. Bu jarayonda Oʻzbekiston yoshlar mamlakati sifatidagi maqomini saqlab qolmoqda, aholining oʻrtacha yoshi 25,9 yoshni tashkil etmoqda.

Oila institutini mustahkamlash, xususan, kam ta'minlangan va yosh oilalarni aniq yoʻnaltirilgan tarzda ijtimoiy qoʻllab-quvvatlash va uy-joy sharoitini yaxshilash imkoniyatlarini kengaytirishga qaratilgan choratadbirlar barqaror demografik rivojlanishni ta'minlash imkonini berdi. Natijada 1990–2010-yillarda yosh oilalar oʻrtasida ajrashishlar koeffitsiyenti 2 barobardan koʻproq pasaydi, oila qurishning oʻrtacha yoshi oshdi va oilada bolalar soni oʻrtacha boʻlishiga e'tibor qaratadigan oilalar ulushi ortdi. Ayni vaqtda aholining barqaror koʻpayishi ta'minlanmoqda.

Mamlakatimizdagi ijtimoiy-demografik ahvolning yana bir muhim xususiyati — jamiyatning asosi boʻlgan kuchli oila tizimidir.

Oʻzbekistonda nikohdan oʻtish darajasi yuqori va eng muhimi, oilalarning buzilishi dunyo boʻyicha eng past darajada. Oila — bizning xalqimiz uchun millatning koʻp asrlik an'analari va ruhiyatiga mos boʻlgan gʻoyat muhim hayotiy qadriyatlardan biridir. Respublikada oilalar asosan koʻp sonli boʻlib, ularda turli avlod vakillari birga yashaydilar va birga xoʻjalik yuritadilar. Bu esa farzandlarni tarbiyalash, ularni umuminsoniy, ma'naviy qadriyatlardan, an'analardan bahramand qilish, bilim darajasini oshirish uchun qulay sharoitlar yaratadi. Xuddi ana shunday oilalarda odamlar bolalik chogʻlaridanoq mehnatsevarlikni, kattalarga hurmatni, bilim egallashga intilishni oʻrganadilar.

Xalqimizning ma'naviy boyliklarini, jahon sivilizasiyasining eng yaxshi yutuqlarini o'zida mujassamlashtirgan yangi avlodni shakllantirish bugunning eng muhim vazifasidir.

Mustaqillik yillarida haqiqiy iqtisodiy vaziyatni mavjud zaxiralar va imkoniyatlarni hisobga olgan holda aholini ijtimoiy himoya qilishning mohiyatan yangi mexanizmi yaratildi.

Respublikamiz bozor munosabatlariga oʻtishning ilk davridan boshlab butun aholini ijtimoiy himoyalash yoʻlidan bormoqda. Ya'ni aholini aniq ijtimoiy himoyalash mexanizmini ishlab chiqish va amalga oshirish borasida katta ishlar qilindi va qilinmoqda.

Aholini ijtimoiy himoyalash borasida mustaqillik yillarida quyidagi muammolarni bartaraf etish yoʻlidan boriladi. Ishlab chiqarishni barqarorlashtirish, *birinchidan*, muttasil rivojlantirish, pul qadrsizlanishiga qarshi samarali chora-tadbirlarni amalga oshirish, xalq iste'mol mollari ishlab chiqarishni jadal rivojlantirish, milliy valutani va ichki iste'mol bozorini mustahkamlash natijasida islohotlarning dastlabki yillaridayoq turmush darajasini saqlab qolish va uning keskin pasayib ketishiga yoʻl qoʻymaslikdir.

Iqtisodiyotni barqarorlashtirish, investitsiya faoliyatining kichik biznes va xususiy tadbirkorlikning qoʻllab-quvvatlash yoʻli yangi ishchi oʻrinlarni tashkil etish, ish bilan bandlik muammolarni hal qilish, ish haqi saqlanib qolmagan yoki qisman saqlanib qolgan toʻliqsiz ish kunida ishlayotgan va majburan mehnat ta'tilida yurgan shaxslar sonini qisqartirish uchun qulay zamin yaratildi.

Ikkinchidan, bu davlat tomonidan ajratilgan mablagʻlar bilan bir qatorda mehnat jamoalari, jamoat va xayriya tashkilotlari, jamgʻarmalarning mablagʻlarini keng jalb etish ham muhim oʻrin egallamoqda.

Aholiga ijtimoiy yordam koʻrsatishda mahalliy hokimiyat va boshqaruv organlarining ancha qisqartirilishi va ularning mas'uliyatlarini oshirilishi lozim. Mahalliy organlarning asosiy vazifasi — jamiyat a'zolarining farovonliklarini yuksaltirish maqsadida mehnat qilish uchun keng imkoniyatlar yaratib berishdan iboratdir.

Uchinchidan, bu odamlarning kuch va qobiliyatlari toʻla-toʻkis faollashuviga ta'sir etuvchi kuchli mexanizmni vujudga keltirish. Bu mexanizm, birinchi navbatda, har bir kishining iqtisodiy erkinligi, uning oʻzi va oilasining baxt-saodati uchun iqtisodiy javobgarligi bilan uygʻunlashadigan shart-sharoitlarni yaratish hisobiga shakllantirish lozim. Oʻz qobiliyat va mehnatiga tayanib ish tutish — farovonlikning birdan-bir va eng barqaror manbai boʻlib qoladigan munosabatini vujudga keltiradi.

Toʻrtinchidan, oila iqtisodiyoti milliy iqtisodiyotning asosiy boʻgʻinlaridan biri hisoblanadi. Asosiy iste'molchilar ham oila hisoblanadi. Oila iqtisodini tadqiq etganligi uchun Garri Bekker Nobel mukofoti laureati boʻlganligi bejiz emas. Prezident Islom Karimovning «Oʻzbekiston mustaqillikka erishish ostonasida» asarida turgʻunlik va xoʻrlik yillarida oila-turmush munosabatlariga, uning moddiy va ma'naviy asoslariga yetarlicha e'tibor berilmagani, bu sohadagi muammolarni hal etishga qoldiq prinsipi asosida yondashilgani va buning salbiy oqibatlari ochib tashlangan.

Shu bois Prezidentimiz oʻz kitobida oilaning sogʻlomligi va oilaviy muhitning qanday darajada boʻlishi jamiyat rivojiga, undagi mavjud muammolarni hal etishga ijobiy yoki salbiy ta'sir koʻrsatishi mumkinligini qayd etib qolmay, balki oilani mustahkamlash, uni sogʻlomlashtirish muammolariga keng jamoatchilik e'tiborini jalb etadi. Shu oʻrinda mustaqillikkacha boʻlgan davrlarda oʻzbek oilalarining ahvoliga oid ma'lumotlarni quyida keltirishni maqsadga muvofiq deb topdik.

Mustaqillikka qadar (1989–1991) respublikamiz iqtisodiy rivojlanishining past darajasi, aholining moddiy ta'minotidagi yetishmovchilik va taqchilliklar oila-nikoh munosabatlarida keskin muammolarni keltirib chiqargan. Oʻsha davrda Oʻzbekiston aholisining jon boshiga toʻgʻri keladigan oʻrtacha daromadi oilalar boʻyicha olib qaralganda: bir oyda kishi boshiga 75 soʻmgacha daromad oladigan kam ta'minlangan kambagʻal oilalar; 71 soʻmdan 125 soʻmgacha daromadi oʻrtacha

ta'minlanganlar; 125 so'mdan 175 so'mgacha daromad o'rtachadan yuqori; 175 so'mdan 225 so'mgacha daromadi nisbatan yuqori darajada ta'minlangan va 225 so'mdan oshiq daromad oladigan oilalar bo'lgan.

Daromaddagi tengsizlikni oʻsha davrlardagi ishchilar va kolxozchi dehqonlar sinfi misolida ham koʻrish mumkin. Masalan, ishchi va xizmatchilardan farq qilib, kolxozchilar orasida kambagʻallar koʻp (56,6 foiz) boʻlgan. Yuqori darajada ta'minlanganlar esa juda oz boʻlgan. Oʻzbekistonda kolxozchilarning daromadlari oyiga 70,6 soʻm boʻlib, bu koʻrsatkich sobiq SSSRda jon boshiga oyiga 121 soʻmdan toʻgʻri keluvchi daromadning oʻrtacha darajasidan ancha pastdir. Bu Oʻzbekistonda oʻtkir ijtimoiy muammolarning kelib chiqishiga sabab boʻlgan. Ayniqsa, oʻtgan asrning 80-yillarida Oʻzbekistonda jon boshiga daromadning oʻsishi, oʻrtachadan yuqori daromad oluvchi oilalarning soni boʻyicha boshqa respublikalardan borgan sari koʻproq orqada qolgan. Oyiga 50 soʻmgacha daromad oluvchi eng kambagʻal aholining salmogʻi Oʻzbekistonda RSFSRdagidan 32 barobar, 51 soʻmdan 75 soʻmgacha daromad oluvchilar soni 6 barobar koʻp boʻlgan.

Respublikamiz ishchi va xizmatchilarining jon boshiga oʻrtacha oylik daromadi oʻsishi boʻyicha ham boshqa respublikalardan orqada qolgan. 1975–1988-yillarda ushbu koʻrsatkich (soʻm hisobida) RSFSRda – 53,5, Ukrainada – 49,5, Qozogʻistonda – 57, Litvada – 72,2, Oʻzbekistonda – 28,7 soʻmga toʻgʻri kelgan. Kolxozchilarning oilalaridagi daromadning oʻsishidagi ahvol yanada yomonroq boʻlib, koʻrsatilgan davrda SSSRda 46,3 soʻmni tashkil etgan boʻlsa, respublikamizda 12,9 soʻmdan oshmadi. Natijada respublikamiz kolxozchilari turmush darajasi boʻyicha Estoniya kolxozchilaridan uch barobar, Gruziya, Ukraina, RSFSR kolxozchilaridan ikki barobar orqada qolib ketgan.

Respublikamiz tub yerli aholisi katta oilalardan iboratligi, tabiiy oʻsish sur'atining balandligi uning oʻziga xos xususiyatlaridan biridir. Aytish joizki, 1989-yilda oʻtkazilgan Butunittifoq aholi roʻyxatining natijalariga koʻra, sobiq SSSRda 71,1 million oila hisobga olingan va oila tarkibining miqdori mamlakatda keyingi 10 yil davomida asosan bir xil holatda boʻlib, u 3,5 kishiga, shundan shaharda 3,3 kishi, qishloq joylarda esa 3,8 kishiga toʻgʻri kelgan.

1989-yildagi aholi roʻyxati ma'lumotlariga qaraganda, Oʻzbekistonda 3 million 415 ming oila mavjud boʻlgan. Albatta, oʻsha paytdagi paxta yakkahokimligi, mustamlaka tuzumiga xos bir yoqlama rivojlangan iqtisodiyotning halokatli oqibatlari, avvalo, odamlarning turmush tarzida, eng muhimi, ularning jon boshiga toʻgʻri keladigan daromad darajasining o'ta pastligida, tomorqa yerlarining keskin kamayib borishida, millatning salomatligi, uning genofondiga salbiy ta'sirlarning kuchayishida, bolalar va onalar o'limining avj olishida, o'lkamizning ekologik nochor holatida va boshqa koʻplab masalalarda yaqqol namoyon boʻlgan edi. Lekin bu fojialarning barchasini aniq misol va raqamlar asosida, SSSRdagi umumiy koʻrsatkichlarga qiyoslagan holda, mustabid imperiyaning balandparvoz g'oyalar bilan niqoblangan mustamlaka siyosatining ayanchli natijalari sifatida har tomonlama chuqur tahlil etib, butun mohiyatini davlatimiz rahbari Islom Karimov Oʻzbekiston Kompartiyasining XXII syezdida qilgan ma'ruzasida ochib tashladi. Ushbu ijtimoiytarixiy ahamiyatga molik ma'ruzada davlatimiz rahbari tomonidan xotinqizlar masalasi, oilaga bo'lgan munosabatlarni tubdan o'zgartirish, xotinqizlarning ijtimoiy-siyosiy huquqlari, sharafi va qadr-qimmatini himoya qilish ularning ijtimoiy ishlab chiqarishda, davlat va jamiyat qurilishida ishtirok etishi uchun eng qulay sharoitlarni yaratish, onalar va bolalar sogʻligʻini, aholining bilim va madaniyat darajasini uzluksiz har tomonlama oshirib borish ijtimoiy-iqtisodiy va mafkuraviy jihatdan ta'minlanishi kerakligi muhim ijtimoiy vazifa sifatida qo'yildi. Shuningdek, O'zbekiston oilalarining moddiy ahvolini hisobga olgan holda Yurtboshimiz Islom Karimov rahnamoligida umumta'lim maktablarining boshlang'ich sinf o'quvchilarini bepul nonushta bilan ta'minlash, onalarning uch yilgacha ish stajlari saqlangan holda bolalariga qarab turishlari uchun qoʻshimcha ta'til imtiyozlari berish, ayni paytda uning bir yarim yiliga qisman ish haqi toʻlanishini joriy etish, bolalarga beriladigan nafaqalarning miqdorini oshirish kabi vazifalarning amalga oshirilishi onalik va bolalikni muhofaza qilishda muhim qadam boʻlgan edi.

Har bir kishi oʻz mamlakatining fuqarosi ekanligini his qilishi uning oʻziga berib qoʻyilgan huquq va erkinliklariga ongli munosabatda boʻlishi va qadrlashi, mashaqqatli mehnat bilan qoʻlga kiritilgan demokratik qadriyatlarni asrab-avaylash va himoya qilishi gʻoyat muhimdir.

Respublikamiz ijtimoiy ishlab chiqarish jarayonida asosiy va hal qiluvchi oʻrinda inson turadi.

Respublikamizda koʻp bosqichli bozor iqtisodiyoti qurilayotgan ekan,

aholining bu ijtimoiy taraqqiyot bosqichlarida aholining bandligi ham katta e'tiborni jalb qiladi. Nodavlat korxona va tashkilotlarda, nodavlat ijtimoiy-iqtisodiy ukladlarda band aholi salmogʻining oshib borishi — bu korxona va tashkilotlarning davlat tasarrufidan chiqarilib, xususiylashtirilishi va bozor munosabatlari taraqqiy etishining natijasidir.

Respublikamizda aholi farovonligini oshirish hamda joylardagi mavjud ishsizlikni minimal darajaga tushirish maqsadida kichik biznes va xususiy tadbirkorlikning rivojlanishiga katta e'tibor qaratilmoqda.

Bu zaminimizda yashayotgan insonlarning munosib va erkin, farovon hayotini ta'minlash har bir kishi huquq va imkoniyatlaridan to'liq foydalanish uchun zarur sharoitlarni yaratishdir.

Oʻzbekistonda mehnat salohiyatining muhim xususiyati — uning yoshi va kasbiy tarkibidir. Oʻzbekiston aholisining oʻrtacha yoshi 25,9 yoshga teng. Bu XXI asrning ikkinchi oʻn yilligi boshida mehnat zaxiralari yuksak mehnat faolligi va kasb tayyorgarligi bilan ajralib turadigan odamlar koʻpchilikni tashkil etishiga imkon beradi.

Ish bilan band boʻlgan aholini tarkibiy jihatdan qayta taqsimlash hamda mehnat layoqatli yoshlarni faoliyatning yangi ilgʻor tarmoqlariga va sohalariga jalb qilish ham mehnat salohiyatidan samarali foydalanishning qudratli zaxirasidir.

Shuning uchun ham, hozir respublikada hal qilinayotgan eng dolzarb muammolardan biri ishlashni xohlovchilarning hammasini ish bilan ta'minlash hisoblanmaydi. Balki eng maqbul ijtimoiy yoʻnaltirilgan ish bilan bandlikni vujudga keltirishdan iboratdir. Vazifa respublikaning har bir fuqarosiga mehnat faoliyatining turi va shaklini erkin tanlash uchun chinakam imkoniyat yaratishdir.

Prezident Islom Karimov Oʻzbekistondagi mehnat salohiyatining muhim xususiyati — uning ta'lim darajasi yuqoriligiga alohida e'tibor beradi. Respublikada aholining yalpi savodxonligi muammosi toʻla hal qilingandir. Savodxonlik darajasi qariyb 100 foizni tashkil etadi. Bu esa respublikani inson salohiyati yuqori darajada rivojlangan iqtisodiy taraqqiy etgan mamlakatlar bilan bir qatorga olib chiqadi.

Mehnat zaxiralarining umumiy va professional ta'lim darajasi ham yuqoridir. Respublikada majburiy umumiy oʻrta ta'lim qonun yoʻli bilan mustahkamlab qoʻyilgan. Bunday ta'limni umumiy ta'lim maktablari, litseylar, kollejlar va tijorat maktablarining keng tarmogʻi orqali olish mumkin.

Tayanch tushunchalar:

Tizim, iqtisodiy tizim, huquqiy tizim, ishlab chiqaruvchi kuchlar, iqtisodiy munosabatlar, iqtisodiy tizim turlari, iqtisodiy tizim modellari, an'anaviy tizim, totalitar-iqtisodiy tizim, bozor iqtisodiyoti tizimi.

Savol va topshiriqlar:

- 1. Ijtimoiy-iqtisodiy tizimlar nima va ular bir-biridan qanday farqlanadi?
- 2. Umumbashariy tizim hisoblangan bozor iqtisodiyotiga oʻtish jarayonining uch xil yoʻlini tushuntiring.
 - 3. Bozor tizimiga oʻtishning «Oʻzbek modeli»ni izohlang.
 - 4. An'anaviy iqtisodiyot nima?
 - 5. Tizimlarning qiyofasini belgilaydigan belgilarni izohlang.
- 6. Iqtisodiy-ijtimoiy tizimda inson omili: shakllanishi, amal qilishi va faollashuvi haqida fikringiz?

Mavzuni chuqur o'rganish instrumentariysi

Iqtisodiyotning funksional tizimi — hozirgi zamon iqtisodiyotida funksional aloqa va munosabatlarning oʻzaro bogʻliq va rivojlanib borayotgan birligi.

Iqtisodiyot tizimi – uning elementlarining ongli ravishda tartibga solingan oʻzaro bogʻliq birligi.

Ijtimoiy-iqtisodiy tizimlar quyidagicha boʻladi:

An'anaviy iqtisodiyot – bu o'ta zaif ishlab chiqarish omillariga tayangan, kam unumli natural ishlab chiqarishga, an'analar shakliga kirgan ijtimoiyiqtisodiy munosabatlarga asoslangan iqtisodiyotdir.

Bozor iqtisodiyoti – bu mukammal ishlab chiqarish omillariga ega boʻlgan, tovar-pul munosabatlariga asoslangan, aniq ijtimoiy moʻljali bor, bozor signallariga binoan va pul vositasida boshqarilib turuvchi iqtisodiyotdir.

Totalitar-rejali iqtisodiyot – bu davlatlashtirilgan, ijtimoiy mulkka tayangan, bir markazdan turib rejalashtirishga va boshqarishning ma'muriybuyruqbozlik usullariga asoslangan iqtisodiyotdir.

Mavzu yuzasidan asosiy xulosalar:

1. Ijtimoiy-iqtisodiy tizim baholanganda moddiy, ijtimoiy-iqtisodiy va gʻoyaviy-siyosiy belgilar asos qilib olinadi. Bularga resurslar va yaratilgan mahsulotlarning xarakteri, mulkchilik shakllari, iqtisodiy mexanizmning qandayligi, qanday gʻoyalar va siyosatning ustuvorligi kabilar kiradi.

- 2. Jamiyat taraqqiyotida uchta ijtimoiy-iqtisodiy tizim boʻlib, bular an'anaviy tizim, bozor tizimi va rejali tizimdir. Bular oʻzining tub belgilari bilan bir-biridan farqlanadi. Hozirgi dunyoda bozor tizimi umumbashariy tizim hisoblanadi.
- 3. Tizimlar taraqqiyoti ikki xil kechadi. *Birinchidan*, rivojlanish salohiyatini tugallatgan tizim yangi istiqbolli, salohiyati yuksak tizim bilan almashadi. *Ikkinchidan*, mavjud, oʻz salohiyatini saqlagan tizimda yangi iqtisodiyot tomon transformatsiya yuz beradi. Hozir bu bozor iqtisodiyotining rivojlangan mamlakatlarda aralash iqtisodiyot sari transformatsiyasidir.
- 4. Bozor iqtisodiyotining afzalligi tufayli unga oʻtish zaruratga aylanadi. Bunday oʻtish uch yoʻl bilan yuz beradi: a) klassik yoʻl; b) mustamlaka iqtisodiyotidan milliy bozor iqtisodiyotiga oʻtish; c) rejali iqtisodiyotdan bozor iqtisodiyotiga oʻtish. Hozir uchinchi yoʻl amal qiladi, bu eng keyingi yoʻl boʻlib, mohiyatan ilgari rivojlanishi zoʻrlik (revolutsiya) yoʻli bilan toʻxtatib qoʻyilgan bozor iqtisodiyotiga yangidan qaytish yoʻlidir. Bu yoʻldan borilganda davlatning faol ishtirokida oʻtkaziladigan bozor islohotlari tufayli rejali tizim oʻrniga bozor tizimi keladi. Oʻzbekistonning bozor tizimiga oʻtishi uchinchi yoʻl doirasida, lekin «Oʻzbek modeli»ga binoan yuz beradi.
- 5. Rivojlangan mamlakatlarda bozor iqtisodiyotining ichki rivojlanishi yuz berib, u oʻz taraqqiyotining yangi aralash iqtisodiyot bosqichiga chiqishi bilan tavsiflanadi. Aralash iqtisodiyot yangi iqtisodiyot boʻlib, XIX asrdagi klassik bozor iqtisodiyotidan jiddiy farqlanadi.
- 6. Ishlab chiqarish munosabatlari tizimning moddiy tomonini ifodalaydi. Tizim deganda uning tarkibida nomoddiy munosabatlarni, xususan, mafkuraviy munosabatlarni ham koʻrish kerakki, ular siyosiy, huquqiy, axloqiy, diniy va boshqa shakllarga ega boʻladi. Ammo, ularning har birida iqtisodiyotning muhri bor. Turli tizimning oʻz iqtisodiyotiga mos ravishda oʻz dunyoqarashi mavjud boʻladi. Bozor tizimga xos gʻoya bu erkinlik va demokratiya gʻoyasidir. Totalitar iqtisodiyot tizimida tobelik va itoatkorlik gʻoyasi birlamchi boʻlgan.
- 7. Tizimlar baholanganda moddiy, ijtimoiy-iqtisodiy va gʻoyaviy shart-sharoit birgalikda qaralishi inobatga olinishi kerak. Moddiy shart-sharoit belgilari bu yaratilgan mahsulot va xizmatlarning qanday boʻlishi, ya'ni ularning natural mahsulot yoki tovar mahsulot boʻlishi, ularning tarkibiy tuzilishining qandayligi, moddiy shakldagi yoki nomoddiy xizmat shaklida boʻlishidan iboratdir.
- 8. Tizimlar belgilarini aniqlashda ishlab chiqarish shaxsiy insoniy omilining sifatli tavsiflari ham ahamiyatlidir. Tizimlar qanday ish kuchining qoʻllanishi bilan ham ajralib turadi.

- 9. Tizimlar tafsilotida ijtimoiy-iqtisodiy munosabatlarning mazmuni ham muhim mezon rolini oʻtaydi. Buni eng avval mulkchilik belgilab beradi. Shu bois, davlatimiz rahbari Islom Karimov mustaqillikning ilk yillaridanoq mulk masalasini hal etish milliy, iqtisodiy, ijtimoiy xavfsizlikni ta'minlash sharti ekanligini alohida qayd etib keldi.
- 10. Mamlakatimizda koʻp ukladli iqtisodiyot tarkibida davlat, korporativ va xususiy mulkning tengligi, ayni paytda xususiy mulkning ustuvorligi aniq belgilab qoʻyilgan davlatimizning siyosiy va iqtisodiy tizimini, biz barpo etayotgan jamiyatning ma'no-mazmunini aniq va ravshan koʻrsatib beradi.
- 11. Oʻzbekistonning iqtisodiy ustuvorlik gʻoyasida mulk va mulkdorlar masalasini yechishda umume'tirof etilgan tamoyillar bilan birga, oʻzimizga xos milliy xususiyat va hayot tarzi inobatga olingan. Aynan shunday yondashuv va olib borayotgan siyosatimiz bugungi murakkab sharoitlarda mamlakatimizda ijtimoiy-iqtisodiy barqarorlikni saqlashda, iqtisodiyotimizning ishonchli poydevori va tez sur'atlar bilan oʻsishini ta'minlashda mustahkam omil boʻlmoqda.
- 12. Dunyodagi koʻpgina taraqqiy topgan, bugungi kunda barqaror va badavlat yashab kelayotgan davlatlar tajribasi shundan dalolat beradiki, avvalo oʻzining xususiy mulkiga ega boʻlgan shaxs va bunday shaxslardan iborat boʻlgan toifa, bu boylikni yanada koʻpaytirishga, oʻzini va oilasini boqishga, shu bilan birga, davlat va jamiyat zimmasida boʻlgan koʻpgina vazifalarni amalga oshirishda oʻz hissasini qoʻshadi. Va eng muhimi, oʻz yurtida tinchlik va osoyishtalikni saqlash va himoyalashga astoydil jon kuydiradi.
- 13. Koʻpchilikni tashkil etgan va bunday maqsadlarni oʻz oldiga qoʻygan toifa ijtimoiy qatlamlarning oʻrta sinfi deb nom olgani. Oʻzbekiston tanlagan va bugun amalga oshirayotgan taraqqiyot yoʻlida ana shu oʻrta sinf, tobora kuchga kirayotganligini ijtimoiy hayotimiz isbotlamoqda.
- 14. Oʻzbekiston tanlagan model, chuqur oʻylangan va izchil amalga oshirilayotgan siyosiy, iqtisodiy va ijtimoiy oʻzgarishlarning ustuvor yoʻnalishlari yurtimizdagi iqtisodiy, siyosiy tizim, fuqarolik jamiyati, milliy iqtisodiyotimizning barqaror va jadal rivojlanishi, aholining hayot darajasi izchil oshib borishi uchun mustahkam va ishonchli poydevor yaratdi.

3- MAVZU. ISHLAB CHIQARISH MUNOSABATLARI VA ULARGA TA'SIR ETUVCHI OMILLAR

1. Ishlab chiqarish munosabatlarining asosiy sharti

Iqtisodiyot deganda kishilarning doimo yuksalib borayotgan hayotiy ehtiyojlarini qondirishga qaratilgan faoliyati tushuniladi.

Ishlab chiqarish munosabatlari tizimida ishlab chiqarish birlamchi hisoblanadi. Shu bois ham mahsulot va xizmatlarni ishlab chiqarish iqtisodiyotning asosi hisoblanadi. Iqtisodiy faoliyat mana shundan boshlanadi. Jamiyat uchun iste'mol ne'matlarini koʻpaytirish birlamchi ahamiyatga ega. Ehtiyojlar doimo cheksiz ekanligi barchaga ma'lum. Biroq ehtiyojlar anglangan ehtiyoj boʻlishi lozim. Ehtiyojni qondirishning bosh vositasi ishlab chiqarish hisoblanadi.

Ishlab chiqarish munosabatlarining ikkinchi muhim sharti ishlab chiqarilgan mahsulotlarni ayirboshlash hisoblanadi. Tovar ayirboshlash usuli savdo-sotiqni bildiradi. Ayirboshlash orqali jamiyat ahli ehtiyojlari uchun zarur mahsulot va xizmatlarga ega boʻladi.

Ishlab chiqarish munosabatlarining uchinchi muhim sharti taqsimlash munosabatlari hisoblanadi. Taqsimlash ishlab chiqarishning hosilasi hisoblanadi. Shunday boʻlsa-da, u ishlab chiqarishga qaytadan ta'sir eta oladi. Agar kishilar taqsimlash jarayonida ne'matlarga qanchalik koʻp ega boʻlsalar, shunchalik ularda motivatsiya kuchli boʻladi va aksincha.

Taqsimlashda kishilarning iqtisodiy manfaati yuzaga chiqadi, manfaat esa ehtiyojni bildiradi.

Iqtisodiyotda shunday bogʻliqlik bor; ehtiyoj manfaatni, manfaat maqsadni, maqsad motivatsiyani, bu esa oʻz navbatida iqtisodiy stimullarni, ya'ni ragʻbatlantiruvchi kuchlarni yuzaga keltiradi, mana shunday tartibda taqsimlash iqtisodiy faollikni yuzaga keltiradi.

Taqsimotning bosh tamoyili – bu adolatlilik tamoyilidir. Bunga koʻra iqtisodiyotda har bir ishtirokchining yaratilgan mahsulot va xizmatlaridan oladigan ulushi bularni yaratishga qoʻshgan hissasiga toʻgʻri mutanosiblikda boʻlishi talab qilinadi.

Taqsimlash orqali yaratilgan mahsulot va xizmatlarning bir qismi joriy iste'molga yuborilsa, boshqa qismi ishlab chiqarishni kengaytirishga, modernizatsiyalashga hamda diversifikatsiyalashga va shu orqali boʻlgʻusi ehtiyojlarni qondirishga yuboriladi.

Iqtisodiy faoliyatning yakunlovchi bosqichi – iste'mol jarayonidir.

Iste'mol bu yaratilgan mahsulot va xizmatlarning pirovard natijada ehtiyojni qondirish yoʻlida ishlatilishidir.

Iste'mol, *birinchidan*, kishilarning kundalik ehtiyojlarini qondirishni, *ikkinchidan*, ishlab chiqarishni rivojlantirishni ko'zlaydi.

Iste'mol uch xil bo'ladi: a) xususiy iste'mol; b) davlat iste'moli; c) ishlab chiqarish iste'moli.

Xususiy iste'mol yuz berganda, iste'mol buyumlari va xizmatlar kishilarning juz'iy ehtiyojini qondiradi.

Davlat iste'moli bu davlat idora va tashkilotlaridagi iste'mol bo'lib, bu ularning ishlab chiqarishni ta'minlaydi.

Ishlab chiqarish iste'moli esa turli moddiy vositalar, moddiy resurslarning korxona va xoʻjaliklarda ishlatilishini bildiradi. Bular tarkibiga mehnat qurollari, bino-inshootlar, xom ashyolar, yarim fabrika mahsulotlari, butlovchi qismlar va nihoyat, yoqilgʻi va energiyalar kiradi.


Ishlab chiqarishdagi iste'mol oxir-oqibatda shaxsiy iste'molni ta'minlashga, ya'ni iste'mol buyumlari va xizmatlarni yangidan yaratishga xizmat qiladi.

Kishilarning hayoti bir maromda borishi uchun iqtisodiy faoliyat uzluksiz boʻladi, shu bois, iqtisodiyotda ishlab chiqarish birlamchi boʻladi va aholi iste'molini qondirishga qaratiladi.

Mamlakatimiz iqtisodiyotini mutanosib rivojlantirish, uning samarali tarkibiy tuzilmasiga ega boʻlish va shu orqali barqaror iqtisodiy oʻsish sur'atlariga erishish Vatanimiz taraqqiyoti va xalq farovonligini ta'minlashning muhim shartlaridan hisoblanadi. Ushbu maqsadga erishish uchun esa, eng avvalo, iqtisodiyotning real sektorini jadal rivojlantirish zarur boʻladi.

Shunga koʻra, 2008-yilning yarmida boshlangan jahon moliyaviyiqtisodiy inqirozi sharoitida mamlakatimiz iqtisodiyotining real sektori korxonalarini qoʻllab-quvvatlash dolzarb ahamiyat kasb etib, respublikamizda ushbu jarayon bir qator asosiy yoʻnalishlar boʻyicha amalga oshirildi.

Iqtisodiyot real sektori korxonalarini qoʻllab-quvvatlashning asosiy yoʻnalishlari



Ayniqsa, real sektor korxonalarini qoʻllab-quvvatlashda ishlab chiqarishni modernizatsiya qilish, kooperatsiya aloqalarini kengaytirish, mustahkam hamkorlikni yoʻlga qoʻyish, mamlakatimizda ishlab chiqarilgan mahsulotlarga ichki talabni ragʻbatlantirish masalalari alohida oʻrin tutdi.

Iqtisodiyotning real sektori – iqtisodiyotning bevosita moddiy ne'matlar ishlab chiqarish va xizmatlar koʻrsatish bilan bogʻliq sohasi boʻlib, u oʻz ichiga sanoat, qishloq xoʻjaligi, qurilish, transport, aloqa va boshqa xizmat koʻrsatish tarmoqlarini oladi.

Ishlab chiqarishni modernizatsiyalash — ishlab chiqarishni zamonaviy texnologiyalar bilan jihozlash, uni ma'naviy jihatdan yangilash, tarkibiy jihatdan texnik va texnologik qayta tuzish kabi choratadbirlarni oʻz ichiga oluvchi jarayon. Ishlab chiqarishni modernizatsiyalashning asosiy yoʻnalish va vositalari boʻlib quyidagilar hisoblanadi: korxonalardan eskirgan asbob-uskunalarni chiqarish; ishlab chiqarishni zamonaviy texnika va texnologiyalar bilan jihozlash; mahalliy resurslar asosida ishlab chiqarishga innovatsion texnologiyalarni joriy etish; ishlab chiqarilayotgan mahsulot assortimentini kengaytirish; ishlab chiqarish xarajatlarini pasaytirish va resurslarni tejash; sifatni boshqarish va sertifikatlash tizimini joriy etish; chiqitsiz va ekologik toza texnologiyalarni joriy etish va boshqalar.

Kooperatsiya aloqalari – turli soha ishlab chiqarish tarmoqlarida ma'lum mahsulotni tayyorlash bo'yicha uzoq muddatli aloqalarni o'rnatish.


Bugungi kunda respublikamiz iqtisodiyotining deyarli barcha tarmoq va sohalarida ishlab chiqarishni modernizatsiyalash, texnik va texnologik jihatdan qayta jihozlash tadbirlarining keng koʻlamda amalga oshirilishi raqobatdosh mahsulotlar ishlab chiqarish imkoniyatlarini kengaytirmoqda. Biroq, bu boradagi jiddiy muammo — ayrim mahsulotlarimiz tannarxining yuqori darajada qolayotganligi ularning raqobatdoshligiga salbiy ta'sir koʻrsatmoqda.

Shunga koʻra, Oʻzbekiston Respublikasi Prezidentining «Iqtisodiyotning real sektori korxonalarini qoʻllab-quvvatlash, ularni barqaror ishlashini ta'minlash va eksport salohiyatini oshirish chora-tadbirlari dasturi toʻgʻrisida»gi (2008-yil 28-noyabr) 4058-sonli farmonida muhim chora-tadbirlar qatorida mahalliy ishlab chiqaruvchi korxonalarning barcha resurslardan samarali foydalanishi hisobiga mahsulot tannarxini 20 foizdan kam boʻlmagan miqdorda pasaytirish orqali ularning raqobatdoshligini ta'minlash vazifasi ham belgilab berilgan edi. *Kreditor qarzdorlik* – korxona, tashkilot yoki muassasaning tegishli yuridik yoki jismoniy shaxslarga toʻlanishi lozim boʻlgan pul mablagʻlari boʻlib, ular me'yordagi (muddati oʻtmagan) hamda muddati oʻtgan qarzdorliklarga boʻlinishi mumkin.

Mahsulot tannarxi – mahsulot ishlab chiqarish va uni sotish bilan bogʻliq barcha xarajatlar.

Ushbu vazifani amalga oshirish doirasida mamlakatimiz korxonalarida tannarxni pasaytirishning asosiy yoʻnalishlari sifatida quyidagilarga alohida e'tibor qaratildi:

Tannarxni pasaytirishning asosiy yo'nalishlari



Inqirozga qarshi choralar dasturining dastlabki — 2009-yili mobaynida sanoat tarmoqlarida ishlab chiqarilayotgan mahsulot tannarxi 18 foizga, Olmaliq kon-metallurgiya kombinati, «Oʻzmetkombinat» aksiyadorlik ishlab chiqarish birlashmasi, «Oʻzeltexsanoat» uyushmasi, «Oʻzqurilish materiallari» kompaniyasi singari va boshqa korxona va tarmoqlarda 20–25 foizga kamaydi.

Iqtisodiyotning real sektori korxonalarini qo'llab-quvvatlashdagi muhim tadbirlardan yana biri – turli sabablarga koʻra vujudga kelgan hamda korxonaning sogʻlom moliya-xoʻjalik faoliyati yuritishiga jiddiy ta'sir ko'rsatib kelayotgan qarzlarini qayta ko'rib chiqish (restrukturizatsiya qilish) hisoblanadi. Mazkur tadbir orqali korxonalarning mavjud qarzlari vujudga kelishi sabablari va ularni toʻlash imkoniyatlari oʻrganiladi. Har bir korxonaning ahamiyati, yaxlit xoʻjalik tizimida tutgan oʻrni, boshqa korxonalar bilan ishlab chiqarish va xoʻjalik aloqalarini hisobga olgan holda mazkur qarzlarni toʻlash muddatlarini kechiktirish, ular boʻyicha qoʻllanishi mumkin boʻlgan turli sanksiyalarni bekor qilish, zarur hollarda, ushbu qarzlarni umuman ro'yxatdan chiqarish kabi choralar belgilanishi mumkin. Inqirozga qarshi dasturning dastlabki -2009-yili davomida ham davlat tomonidan real sektor korxonalarini qo'llab-quvvatlash maqsadida 50 ta korxonaning budjet va budjetdan tashqari jamg'armalarga to'lovlar bo'yicha muddati o'tgan hamda joriy kreditor qarzdorligi qayta koʻrib chiqildi. Bu mazkur korxonalar tasarrufida 350 milliard so'mdan ortiq mablag'ni qoldirish, ularning ishlab chiqarish faoliyatini rivojlantirish imkonini berdi.

Jahon moliyaviy-iqtisodiy inqirozi sharoitida real sektor korxonalarini qoʻllab-quvvatlash bilan bir qatorda, ularni sogʻlom-lashtirish tadbirlari ham muhim oʻrin tutadi. Zero, uzoq davr mobaynida sifatsiz mahsulotni ishlab chiqarish, eskirgan texnika va texnologiya asosida zarar koʻrib ishlayotgan korxonalarni saqlab qolish iqtisodiyotning sogʻlomligiga jiddiy putur yetkazishi mumkin. Bunday korxonalarni bankrot deb e'lon qilish hamda moliyaviy-xoʻjalik faoliyatini tarkibiy oʻzgartirish orqali qayta tuzish bu boradagi eng toʻgʻri va samarali yechim hisoblanadi.

Shunga koʻra, Oʻzbekiston Respublikasi Prezidentining tarixiy 2008-yil 18-noyabrdagi 4053-sonli «Iqtisodiyot real sektori korxonalarining moliyaviy barqarorligini yanada oshirish chora-tadbirlari toʻgʻrisida»gi farmonida koʻzda tutilgan iqtisodiy nochor korxonalarni moliyaviy sogʻlomlashtirish, modernizatsiyalash, texnik va texnologik jihatdan

yangilash jarayoniga tijorat banklarining mablagʻlarini kengroq jalb qilishni yoʻlga qoʻyish tadbirlari muhim hisoblanadi.

Qarorda respublika komissiyasining qarori asosida bankrot korxonalarni tijorat banklariga sotish yoki toʻgʻridan-toʻgʻri balansiga berishning 3 ta mexanizmi koʻzda tutilgan:

- 1) bankrot korxona kreditorlik qarzi tarkibining 70 foiz va undan ortiq qismini bank kreditlari tashkil etsa, u holda korxonani tijorat banklari balansiga berish;
- 2) bankrot korxonani kimoshdi savdolari orqali eng yuqori narxni taklif qilgan va tegishli majburiyatni oʻz zimmasiga olgan tijorat banklariga sotish;
- 3) bankrot korxonani tanlov savdolari orqali tijorat banklariga «nol» qiymatda investitsion majburiyat sharti bilan sotish.

Ushbu tadbirlar mamlakatimizdagi bankrot korxonalarni tarkibiy qayta tuzish hamda yangi xoʻjalik faoliyatini yoʻlga qoʻyish jarayonlarini sezilarli darajada tezlashtirdi.

Shuningdek, Oʻzbekiston Respublikasi Prezidentining 2008-yil 19-noyabrdagi 4010-sonli «Iqtisodiy nochor korxonalarni tijorat banklariga sotish tartibini tasdiqlash toʻgʻrisida»gi farmoyishi bilan iqtisodiy nochor korxonalarning moliyaviy qobiliyatini tiklash boʻyicha bir qator imtiyozlar (koʻmaklar) berilgan edi. Jumladan, ushbu farmoyishga koʻra:

- tijorat banklariga bankrot korxonalar yoki ular mol-mulkining berilishi, sotilishi, ularning xoʻjalik yurituvchi subyektlar ustav jamgʻarmalariga kiritilishi, shuningdek banklar tomonidan bankrot korxonalar mol-mulki negizida yangidan tashkil etilgan xoʻjalik subyektlarini qayta sotish qoʻshilgan qiymat soligʻidan ozod qilindi;
- bankrot korxonalar negizida yangi tashkil etilgan xoʻjalik yurituvchi subyektlar uch yil davomida foyda soligʻi, yagona soliq toʻlovi, mulk soligʻi va yer soliqlarini toʻlashdan ozod qilindi;
- boshqaruv kompaniyalarga berilganda foyda soligʻi va yagona soliq toʻlovidan ikki yil davomida ozod qilindi. Buning natijasida sobiq bankrot hisoblangan, endilikda tarkibiy qayta tuzish orqali faoliyatini yangilagan korxonalarning faoliyat koʻrsatkichlarida sezilarli oʻzgarishlar roʻy berdi.

Shuningdek, yuqorida qayd etilgan me'yoriy hujjatlar orqali tijorat banklariga ham muayyan imkoniyatlar berilgan edi. Jumladan:

– qarzlarni toʻlash hisobiga undirilgan yoki auksion va tanlov savdolarida sotib olingan mol-mulk negizida tijorat banklarining korxona ustav jamgʻarmasidagi ishtiroki ulushi 100 foizgacha boʻlgan yangi korxonalarni tashkil etish;

- bankrot korxonaning tugatilishi munosabati bilan unga avval berilgan, qoplanmagan kreditini, shu jumladan hukumat kafolati bilan berilgan kredit summasini bank kengashining qarori bilan hisobdan chiqarish;
- bankrot korxona uchun malakali boshqaruv kompaniyasini tuzish va jalb qilish;
- bankrot korxonani tugatish bahosida sotib olib, uning faoliyatini tiklab, qaytadan bozor bahosida sotish va h.k.

Ayni paytda mazkur jarayonning samaradorligini va ta'sirchanligini ta'minlash maqsadida tijorat banklariga bir qator majburiyatlar yuklangan edi. Jumladan:

- tijorat banklari balansiga oʻtkazilgan bankrot korxonalarni tiklash, texnik va texnologik modernizatsiya qilish va ishlab chiqarishni qayta qurollantirish, zarur boʻlganda korxonani toʻliq restrukturizatsiya qilish orqali faoliyat yoʻnalishini oʻzgartirish, strategik hamkorlar va investorlarni jalb qilishni nazarda tutuvchi biznes-rejalarni ishlab chiqish;
- yollangan har bir korxona boshqaruvchisi ishlab chiqarishda kutilgan natijalarga erishishi orqali ishlab chiqarishlarga zamonaviy va yuqori malakali boshqaruvchilarni jalb qilish ishlarini olib borish;
- banklar tasarrufiga berilgan bankrot korxonalari kelgusi faoliyati ustidan iqtisodiy nochor korxonalarni tijorat banklariga sotish boʻyicha Respublika komissiyasida hisobot berishlari yoʻlga qoʻyilgan.

Past rentabelli va iqtisodiy nochor korxonalarni tugatish va bu jarayonga tijorat banklarini jalb qilish borasida belgilangan tadbirlar korxonalarning moliyaviy barqarorligini oshirishda muhim rol oʻynadi. Prezidentimiz ma'ruzasida ta'kidlanishicha, 2009-yilda mamlakatimiz boʻyicha, yirik korxonalarni ham qoʻshganda, jami 240 ta korxona bankrot deb e'lon qilindi. Ayni paytda ularning 154 tasi yangi mulkdorlarga sotildi, 86 tasi esa tijorat banklari balansiga oʻtkazildi.

Bugungi kunda tijorat banklari balansiga oʻtkazilgan 70 ta iqtisodiy nochor korxonada ishlab chiqarish toʻliq qayta tiklanib, istiqbolli sarmoyadorlarga sotildi, qolganlarida moliyaviy sogʻlomlashtirish ishlari olib borilmoqda.

Shuningdek, mahalliylashtirish dasturining amalga oshirilishi quyidagi ijobiy jihatlar bilan tavsiflanadi:

- mavjud ishlab chiqarish quvvatlaridan samarali foydalanish;
- sanoat turli tarmoqlarining qoʻshilgan qiymati yuqori darajada
 boʻlgan mahsulotlar eksportini koʻpaytirish va tegishli ravishda,
 an'anaviy eksport salmogʻini kamaytirish;

- samarali ichki va tarmoqlararo ishlab chiqarish kooperatsiya aloqalarini rivojlantirish;
- iqtisodiyotning real sektorida mamlakatimiz korxonalarining kooperatsiyasi salohiyatidan yuqori darajada foydalanish;
- mahalliy xom ashyoni qayta ishlashni kengaytirish, ishlab turgan korxonalarni zamonaviylashtirish va yangilarini tashkil etish hisobiga iqtisodiyot tarkibini takomillashtirish va h.k.

2011-yilda faoliyat koʻrsatayotgan korxonalarni modernizasiya qilish, texnik va texnologik qayta jihozlash hamda zamonaviy, yuksak texnologiyalarga asoslangan yangi ishlab chiqarishni tashkil yetishni tezlashtirish borasida faol investitsiya siyosati yuritishga alohida e'tibor qaratildi.

2011-yilda moliyalashtirishning barcha manbalari hisobidan qiymati 10 milliard 800 million dollardan ortiq kapital qoʻyilmalar oʻzlashtirildi, bu 2010-yilga nisbatan 11,2 foiz koʻp demakdir. Investitsiyalarning yalpi ichki mahsulotdagi ulushi 23,9 foizni tashkil yetgani mamlakatimizda investitsiya jarayonlarining jadal faollashib borayotganidan dalolat beradi.

Iqtisodiyotimizning real sektoriga qariyb 2 milliard 900 million dollar hajmida xorijiy investitsiyalar jalb qilindi, ularning 78,8 foizi toʻgʻridan-toʻgʻri xorijiy investitsiyalardir.

Kapital qoʻyilmalarni moliyalashtirish manbalari va ulardan foydalanish borasida ijobiy sifat oʻzgarishlari roʻy bermoqda.

Jami investitsiyalarning 73 foizdan ortigʻi mamlakatimizning ichki manbalari hisobidan — korxonalar va aholi mablagʻlari, investitsiya jarayonlarida tobora faol ishtirok etayotgan tijorat banklari kreditlari, shuningdek, davlat budjeti va budjetdan tashqari jamgʻarmalar mablagʻlari hisobidan shakllantirilmoqda.

Jami investitsiyalarning 73,5 foizidan ortigʻi ishlab chiqarish quvvatlarini barpo etishga yoʻnaltirilmoqda. Investitsiyalarning qariyb 45,3 foizi zamonaviy, yuksak samarali asbob-uskunalar xarid qilishga yoʻnaltirilgani, ayniqsa, muhimdir.

Bundan koʻrinadiki, jahon moliyaviy-iqtisodiy inqirozi sharoitida mamlakatimizda iqtisodiyotning real sektori korxonalarini qoʻllab-quvvatlash choralarining izchil amalga oshirilishi barqaror va mutanosib oʻsish sur'atlarini ta'minlash uchun yetarli shart-sharoitlarni yaratdi.

2. Mehnat unumdorligi va unga ta'sir etuvchi omillar

Resurslarning cheklanganligi sharoitida, ularni tobora koʻproq ishlatish orqali ehtiyojlarni toʻla qondirib boʻlmaydi. Shu sababli jamiyat resurslarni tejab, resurs birligidan koʻproq mahsulot oladi, bunda ham moddiy, ham mehnat resurslari tejaladi. Mana shu mehnat unumdorligining oʻsishi boʻladi.

Mehnat unumdorligi mehnat sarfi minimum boʻlgani holda, mahsulotning maksimum boʻlishini bildiradi.

Mehnat unumdorligi turlicha darajada ifodalanadi:

Ish oʻrnidagi mehnat unumdorligi. Bu alohida olingan ishlovchi vaqt birligida oʻz ish joyida qanday miqdorda mahsulot yaratgani yoki qanchalik xizmat koʻrsatganini bildiradi.

Korxona darajasidagi unumdorlik. Bu jamoada ishlovchi bir kishi vaqt birligida oʻrtacha qancha mahsulot yoki xizmat yaratganini bildiradi.

Sektor sohasidagi unumdorlik. Mazkur sektor boʻyicha bitta ishlovchi muayyan vaqtda qancha ishlab chiqarganini bildiradi. Masalan, agrar sektorda 3 mln. kishi band boʻlgani holda 15 mlrd. dollarlik mahsulot yetishtirilsa, bir kishi mehnatining unumdorligi 5 ming dollarni tashkil etadi (15 mlrd. : 3 mln. = 5 ming).

Milliy iqtisodiyot darajasidagi unumdorlik. Bu mamlakat miqyosidagi bir nafar ishlovchi oʻrtacha qancha mahsulot va xizmatlar yaratganini bildiradi. Masalan, mamlakatda jami aholi 40 mln., shundan 20 mln. kishi ishlaydi va 240 mlrd. dollarlik mahsulot va xizmat yaratadi. Bunda bir ishlovchining yillik mehnat unumdorligi jamiyat miqyosida 12 ming dollarga teng boʻladi. Mehnat unumdorligi turli korxonalar, sektorlar va mamlakatlar miqyosida jiddiy farqlanadi va bu mehnat unumdorligiga ta'sir etuvchi omillarga bogʻliq. Bu omillar quyidagicha:

2.1. Mehnat qurollarining naqadar mukammalligi, ya'ni ishlab chiqarishning texnik-texnologik darajasi. Qo'l mehnatiga asoslangan ishlab chiqarishda mehnat unumdorligi past va aksincha, mashinalashgan ishlab chiqarishda u g'oyat yuqori va muttasil ortib boradi. Yangi texnika va texnologiyani qo'llash unumdorlikda burilish yasaydi. Masalan, zamonaviy robotlar texnikasining qo'llanilishi mehnat unumdorligini 8–10 marta oshiradi. Olimlar hisobiga ko'ra, mehnat unumdorligi o'sishining 2/3 qismi fan-texnika taraqqiyoti hisobiga, 1/3 qismi esa boshqa omillar hisobiga yuz beradi. Aytaylik, mehnat unumdorligi yiliga 6 foiz o'sgan bo'lsa, shundan 4 foizi texnika taraqqiyoti hissasiga tushadi.

- 2.2. Ishlovchilarining bilim saviyasi, mehnat malakasi va mahorati, ya'ni ishlab chiqarish shaxsiy inson omilining sifati. Bu omil mashinalashgan ishlab chiqarishda beqiyos ahamiyatga ega. Murakkab texnika-texnologiya yuksak saviya va malakani talab qiladi, aks holda uni samarali ishlatib boʻlmaydi. Gap shundaki, ishlab chiqarishning moddiy va shaxsiy omillari bir-biriga mos boʻlishi kerak. Masalan, yangi texnikani ishlatish chuqur texnikaviy bilim va ish tajribani talab qiladi.
- 2.3. Ishlab chiqarishning tabiiy sharoiti, tabiiy resurslar ishlatilish sharoitining qulay boʻlishi. Bu ayniqsa, undirma sanoat va qishloq xoʻjaligida mehnat unumdorligiga jiddiy ta'sir etadi. Qazilmalar tarkibida foydali moddalar koʻp va ular sayoz joylashgan boʻlsa, shubhasiz ularni undirib olish kam sarf talab qiladi. Quvayt neft konlarida mehnat unumdorligi Rossiyaning shimolidagi konlarga nisbatan ancha yuqori. Buning sababi Quvayt tabiiy sharoitining qulayligidir. Oʻzbekiston janubidagi paxtachilikda uning shimolidagiga nisbatan mehnat unumdorligi yuqori. Buning sababi ham tabiiy sharoitning har xil boʻlishidir. Gap shundaki, tabiiy sharoitga qarab, bir xil mehnat har xil natija beradi.
- **2.4. Mehnat stimullarining kuchli boʻlishi.** Buni motivatsiya, ya'ni ish natijasiga qiziqish, undan manfaatdor bo'lish hosil etadi. Motivatsiya unumli ishlashdan yaxshi daromad topish bilan cheklanmaydi, bu o'z qobiliyatini ishga solish, dovruq qozonish, obroʻ orttirishni ham bildiradi. Ishlovchilar mehnat unumdorligini oshirishga qiziqqan joyda stimullar harakatga keladi, kishilar jonbozlik qilib mahsulot va xizmatlarni yaratishga ketadigan resurslar sarfini tejaydilar, natijada ish unumi ortadi. Mehnatni rag'batlantirish o'rniga mehnatga zo'rlash bo'lgan joyda unumdorlikni oshirishga intilish soʻna boradi, ishlab chiqarish natijasiga befarq qarash paydo bo'ladi. Agar qul holatidagi ishlab chiqaruvchini olsak, u mehnatga zoʻrlanganidan unumdorlikni koʻtarishga oshiqmaydi. Aksincha, mehnatni erkin tanlagan, undan manfaat topgan, ozod ishlab chiqaruvchi mehnat unumdorligini oshirishga intiladi, chunki Abu Rayhon Beruniy aytganidek: «Insonning qadr-qimmati oʻz vazifasini a'lo darajada bajarishdan iborat, shuning uchun insonning eng asosiy vazifasi va o'rni mehnat bilan belgilanadi, inson o'z xohishiga mehnat tufayli erishadi».

Ishlab chiqarishning, umuman iqtisodiyotning naqadar rivojlanganligining asosiy koʻrsatkichi mehnat unumdorligi darajasidir. Iqtisodiyotga baho berishda jamiyat, ya'ni mamlakat iqtisodiyoti miqyosidagi mehnatning unumdorligi asos boʻlib xizmat qiladi. Bu jamiyat miqyosida sarflangan mehnat evaziga nima yaratilganligini bildiradi. Mehnat unumdorligini (U) aniqlash uchun bir yilda yaratilgan mahsulot va xizmatlarning pulga chaqilgan miqdori (Mq)ni ishlovchilar soniga (N) boʻlinadi. Buni formula shakliga keltirsak, u quyidagi koʻrinishga ega boʻladi:

Mq= 3 mlrd. dollar, N=500 ming kishi boʻlsa.

Bu koʻrsatkich mehnat unumdorligi darajasini bildiradi va jamiyatning ishlab chiqara olish qobiliyatini ifodalaydi.

Eng yuksak mehnat unumdorligi XXI asrga kelib rivojlangan mamlakatlarda kuzatildi. Bu yerda 1999-yilda bir ishlovchi yiliga yaratgan tovar va xizmatlar 50 ming dollarni tashkil etdi. Bu koʻrsatkich AQShda 85 ming dollar, Yaponiya korporatsiyalarida 90 ming, qolgan korxonalarda 46 ming dollarni tashkil etdi. Bu unumdorlik darajasidir.

Unumdorlik darajasi bilan uning oʻsish sur'atlarini farqlash kerak, chunki daraja yuqori boʻla turib, sur'atlar past boʻlishi mumkin va aksincha. Unumdorlikning oʻsish sur'ati uning yuksalish tezligi boʻlib, foiz bilan ifodalanadi. Masalan, mehnat unumdorligi 10 yilda 57 foizga oshgan boʻlsa, uning-yillik oʻsish sur'ati 4,6 foiz boʻladi. Ammo bu unumdorlik darajasini bildir-maydi. Iqtisodda shunday qoida borki, unumdorlik darajasi yuqori boʻlsa, uning oʻsish sur'atlari nisbatan past boʻlishi ham mumkin. Shu sababli unumdorlik oʻsish sur'atlari past mamlakatning iqtisodiy qudrati yuqori boʻlishi mumkin. Aksincha ham boʻladi.

2.5. Mehnat unumdorligining ahamiyati. Mehnat unumdorligi qanchalik yuqori boʻlsa, shunchalik vaqtning qadri oshadi, chunki vaqt birligida shunchalik koʻp mahsulot va xizmatlar yaratish va shu tufayli koʻproq pul topish mumkin. «Vaqt – bu pul demakdir» degan iboraning ma'nosi ham shunda. Mehnat unumdorligi va turmush farovonligi toʻgʻri mutanosiblikda boʻladi. Unumdorlikning farovonlikka ta'siri ikki yoqlama boʻladi. Birinchidan, unumdorlikning yuksalishi ehtiyojni qondiradigan mahsulot va xizmatlarni koʻpaytiradi. Qayerda unumdorlik yuqori boʻlsa, shu yerda turmush darajasi ham yuqori boʻladi. Kambagʻallik va muhtojlikning asl sababi esa mehnat unumdorligining past boʻlishidir, chunki oz yaratgan qoʻp iste'mol qilishi mumkin emas, chunki bunda yaratilgan ne'matlar yetmay qoladi.

Ikkinchidan, mehnat unumdorligining ortishi ish vaqtini tejab, kishilarning boʻsh vaqtini koʻpaytirib beradi. Boʻsh vaqt esa jamiyatning

boyligidir. Iqtisodiyotdagi har qanday tejam vaqtning tejalishi demakdir. Agar mahsulot yaratish uchun zarur boʻlgan vaqt muttasil qisqarib borsa, kam vaqt sarflangan holda ehtiyoj toʻlaroq qondiriladi, chunki bu kam sarflab koʻp ishlab chiqarishni bildiradi. Nafaqat ishlab chiqarishda, balki iqtisodiyotning boshqa jabhalarida, xususan, iste'mol borasida ham vaqt tejalishi talab qilinadi. Ehtiyojni qondirishga zarur vaqt qisqarishi bilan boʻsh vaqt ortib boradi, bu esa inson rohat-farogʻatini ta'minlovchi vaqt boʻladi.

«Yaxshi ishlagan – yaxshi yashaydi» degan qoidani farovonlikning bevosita mehnat unumdorligiga bogʻliq boʻlishi yuzaga keltiradi. Bu qoida ayrim ishlovchi, butun bir jamoa va hatto butun bir mamlakat xalqiga ham taalluqli boʻladi. Unumdorlikning ijtimoiy ahamiyatini unga mos ravishda farovonlikning ortib borishi isbotlaydi.

Masalan, 2000-yilda dunyodagi iqtisodiyoti yuksak rivojlangan mamlakatlarda bir ishlovchi yaratgan mahsulot va xizmatlar 51,3 ming dollar, iqtisodiyot zaif mamlakatlarda esa 836 dollar boʻldi (Bu unumdorlikni bildiradi). Shunga mos ravishda birinchi guruh mamlakatlarida jon boshiga aholi iste'moli 14,8 ming dollar, ikkinchi guruh mamlakatlarida 236 dollar boʻldi. Bu farovonlik koʻrsatkichidir.

Mehnat unumdorligi korxonalar, sektorlar va mamlakatlar miqyosida jiddiy farqlanishini inobatga olib, unga ta'sir etuvchi omillar koʻrib chiqiladi. Jumladan, *ichki ishlar idoralari faoliyatidagi mehnat unumdorligi, shuningdek, ixtisoslikka qarab mehnat unumdorligini oshirishda vaqtning qadri, vaqt birligida qanchalik darajada samaraga erishish mumkinligi kabi masalalar bugungi kunda dolzarbdir.*

Yoshlarga insonlarning cheksiz ehtiyojlarini qondirish uchun uzluksiz ravishda ishlab chiqarish boʻlishi kerakligini va ushbu masalaning bevosita inson faoliyatida oʻta muhimligini ta'kidlash joizdir.

Xulosa oʻrnida aytish mumkinki, mehnat unumdorligi oʻsishi:

□ mamlakatda amalga oshirilayotgan islohotlarni obroʻmand qiladi;
□ demokratik oʻzgarishlarni yanada samaraliroq etadi;
□ Vatan taraqqiyoti va xalq farovonligini oshiradi;
□ xalqaro munosabatlarda ishtiroki va obroʻsini oshiradi;
□ aholini ish bilan band etishni ta'minlaydi;
□ aholi daromadlarini va turmush darajasini oshiradi;
□ jinoyatchilikning kamayishiga xizmat qiladi.

3. Takror ishlab chiqarishning mamlakat milliy rivojlanishida oʻrni va ahamiyati

Ehtiyojlarning yuksalib borish qonunining harakati obyektiv ravishda ne'matlarni yaratishning uzluksizligini talab qiladi. Shu bois ham **iqtisodiyot** deganda kishilarning ehtiyojini qondirishga qaratilgan, anglangan faoliyat tushuniladi. Ne'mat deganda insonning u yoki bu ehtiyojlarini qondirish maqsadida ishlab chiqarilgan mahsulot turi tushuniladi.

Iqtisodiy faoliyatning boshlanishi, mahsulot va xizmatlarni ishlab chiqarish iqtisodiyotning asosi, uning bosh boʻgʻini hisoblanadi.

Mahsulot (noz-ne'mat)lar ishlab chiqarish ishlatilishiga qarab ikki qismga bo'linadi:

Moddiy ishlab chiqarish – moddiy shakldagi mahsulotlarni, masalan, oziq-ovqat, kiyim-kechak, turar joy va boshqalarni yaratish hamda ishlab chiqarish uchun zarur boʻlgan xizmatlarni yaratish.

Nomoddiy ishlab chiqarish – moddiy shaklga ega boʻlmagan, lekin aholi uchun zarur xizmatlarni koʻrsatish.

Ishlab chiqarish doimo takrorlanib va yangilanib turadi. Takror ishlab chiqarish oddiy, kengaytirilgan va toraygan bo'ladi. Mustaqilligimiz iqtisodiy asoslariga tahdid sifatida toraytirilgan takror ishlab chiqarish masalasini tushunish mumkin. Chunki toraytirilgan takror ishlab chiqarish yalpi ichki mahsulot ishlab chiqarish hajmining pasayishida koʻrinadi. Bu ichki talabni qondirishga salbiy ta'sir ko'rsatadi. Mahsulotlar taqchilligi yuzaga keladi. Ehtiyojlar toʻliq qondirilmaydi, natijada vahimali talab ommaviy tartibsizliklarni keltirib boʻladi. Bu Toraytirilgan takror ishlab chiqarish Vatan taraqqiyoti va uning obro'siga putur yetkazadi. O'zbekistonda ishlab chiqilgan taraqqiyotning «O'zbek ishlab chiqarish sur'atlarining o'sishini ta'minladiki, bu modeli» xalqimiz turmush darajasini yanada yaxshiladi. Kengaytirilgan takror ishlab chiqarish milliy boylikni ko'paytirish sharti hisoblanadi. Milliy boylik tarkiban moddiy, tabiiy va intellektual boylikdan, bir avlodga va bir necha avlodga xizmat qiluvchi boylikdan iborat. Boylik qanchalik koʻp boʻlsa, shunchalik iqtisodiy salohiyat kuchli boʻladi. Salohiyat ishlab chiqarish imkoniyatlari bo'lib, erishilgan va istiqboldagi salohiyatlardan iboratdir.

Ishlab chiqarishning modernizatsiya etilishi, yangilanishi, uning qaytarilib turishi takror ishlab chiqarish (oddiy, kengaytirilgan, toraygan takror ishlab chiqarish) deyiladi. Kengaytirilgan takror ishlab

chiqarish jarayonida yaratilgan mahsulotlarning bir qismi iste'molga ketadi, boshqa bir qismi jamgʻarilib, milliy boylikka kelib qoʻshiladi. Takror ishlab chiqarishning muayyan davrda (oy, chorak, yil, yillar) mamlakatda toʻplangan moddiy, madaniy-ma'naviy ne'matlar va tabiiy boyliklar yigʻindisi boʻlgan milliy boyligimizga ta'siri katta.

Ishlab chiqarishni modernizatsiyalash – takror ishlab chiqarishning muhim omili hisoblanadi. Ishlab chiqarishni modernizatsiyalash quyidagi vositalar bilan amalga oshiriladi:

ishlab chiqarishni zamonaviy texnika va texnologiyalar bila
jihozlash;
☐ eskirgan asbob-uskunalarni foydalanishdan chiqarish;
☐ ishlab chiqarishni diversifikatsiya qilish;
☐ ishlab chiqarilgan mahsulot turlarini kengaytirish;
☐ ishlab chiqarish xarajatlarini pasaytirish resurslarini tejash;
☐ mahalliy resurslar bazasini, innovatsion texnologiyalarni ishla
chiqarishga joriy etish;
□ chiqitsiz va ekologik sof texnologiyalarni joriy etish.

Eng asosiy jihat bunda toʻplangan bilimlar, kasbiy malaka va tajriba inson kuchini takror ishlab chiqarish boʻlib, buni islohotlar, iqtisodiy oʻsish, farovonlikni ta'minlashdagi rolini muhokama etish orqali yoshlar ongiga singdirishdir.

2011-yilda protokol bilan belgilangan topshiriqqa binoan mamlakatimizning barcha yirik korxonalari va ishlab chiqarish tarmoqlarida oʻtkazilgan texnik audit natijasida 37 mingga yaqin asbob-uskuna va texnologiyalarning jahon miqyosida sinovdan oʻtgan, zamonaviy turlariga almashtirilishi lozimligi aniqlandi.

Vazirlar Mahkamasi ushbu audit natijalari asosida zudlikda moddiy va ma'naviy jihatdan eskirgan asbob-uskunalarni yangilash bo'yicha loyihalarning amalga oshirilishi yuzasidan, ularni moliyalashning aniq manbalariga alohida e'tibor qaratgan holda, tarmoq jadvallarini tasdiqlab tegishli ishlarni amalga oshirmoqda.

Chunki bugungi kunda iqtisodiyotimizning samarasi haqida soʻz borar ekan, shuni tan olishimiz kerakki, bu yoʻnalishda eskidan qolgan va hali-beri roʻy berib kelayotgan oqsoqlik holatlariga barham berib, birinchi navbatda ishlab chiqarilayotgan mahsulotlarning material va energiya sarfini minimal darajaga tushirish chora-tadbirlari koʻrilmoqda.

Ishlab chiqarilayotgan mahsulotlar sifatini boshqarish tizimlarini joriy etish, mahsulotlarning xalqaro standartlarga mosligini ta'minlash masalasiga mamlakatimizda katta e'tibor qaratilmoqda. Yengil sanoat, farmatsevtika va qurilish materiallari sanoati kabi iste'mol tovarlari ishlab chiqariladigan tarmoqlarni rivojlantirishga ustuvorlik berilmoqda.

Mamlakatimizda yaratilgan ishlab chiqarish salohiyatidan foydalanish borasida ishga solinmagan ulkan imkoniyatlardan foydalanish, ishlab chiqarishni yangilash va modernizatsiya qilish uchun sarflanayotgan koʻp miqdordagi xorijiy investitsiyalardan samarali foydalanish maqsadida hamda mahsulotlar tan narxining asossiz ravishda oʻsib ketishiga yoʻl qoʻymaslik uchun davlatimiz tomonidan quyidagi masalalarni 2012-yilda hal etish zarurligi koʻrildi¹:

birinchidan, manfaatdor vazirliklar, idoralar, xoʻjalik birlashmalari, kompaniya va korxonalar ishtirokida sanoatda mahsulot tannarxini 10–15 foizga pasaytirish yuzasidan har bir sanoat korxonasi boʻyicha kompleks chora-tadbirlarni koʻzda tutadigan dastur ishlab chiqish lozim;

ikkinchidan, mamlakatimiz korxonalarida qishloq xoʻjaligi xom ashyosini qayta ishlash darajasini tanqidiy tahlil qilish va uni rivojlantirish boʻyicha mavjud resurs va imkoniyatlarni aniqlash hamda sanoatning qayta ishlash tarmoqlarini jadal rivojlantirish, ishlab chiqarilayotgan iste'mol tovarlari turlarini koʻpaytirish va sifatini yaxshilash, buning uchun qoʻshimcha imtiyozlarni koʻzda tutadigan maxsus qaror qabul qilish kerak.

Bu borada, birinchi navbatda, mahalliy xom ashyo va materiallar asosida sanoat kooperatsiyasi va ishlab chiqarishni mahalliylashtirish tizimini yanada rivojlantirishga oid ishlarni davom ettirishga alohida e'tibor qaratish darkor;

uchinchidan, bugungi keskin raqobat sharoitida mahsulotlarimizning jahon va mintaqaviy bozorlarda xaridorgir boʻlishi va mustahkam oʻrin egallashi uchun bu boradagi ishlarni yana bir bor tanqidiy koʻrib chiqish lozim. Bunda tashqi bozorda xaridorbop, yuqori likvidli mahsulotlar ishlab chiqarishni kengaytirish uchun eksportga mahsulot chiqaradigan korxonalarni ragʻbatlantirishni yanada kuchaytirish, ularga yangi imtiyoz va preferensiyalar berish boʻyicha qoʻshimcha chora-tadbirlar tayyorlash zarur;

toʻrtinchidan, mamlakatimizdagi raqobatdosh mahsulotlar ishlab chiqaradigan sanoat korxonalari va boshqa tarmoqlarning eksport yarmarkalari oʻtkazishni kengaytirish, shuningdek, mahsulot sotishning

 $^{^1}$ *Каримов И. А.* 2012 йил Ватанимиз тараққиётини янги босқичга кўтарадиган йил бўлади. – Т.: «Ўзбекистон», 2012. – Б. 23–25.

zamonaviy usullaridan keng foydalanish, asosiy ishlab chiqaruvchilarning oʻz mahsulotlari taqdimotini oʻtkazishi va yangi eksport shartnomalari tuzishi uchun nufuzli xalqaro yarmarkalarga jalb etish boʻyicha alohida hukumat qarorini qabul qilish lozim.

Tarkibiy yangilanishda alohida e'tiborni talab etadigan navbatdagi muhim masala – bu xizmatlar sohasining jadal rivojlanishini ta'minlashdan iborat.

Xizmatlar va servis sohasining joriy yilda keskin oʻsishi, avvalo qurilish, transport, moliya-bank va axborot-kommunikatsiya sohalarida, aholiga tibbiy va kommunal-maishiy xizmatlar koʻrsatishda, ayniqsa, qishloq joylarda bu sohani yanada kengaytirish uchun hali-beri foydalanilmayotgan katta imkoniyatlar mavjudligini koʻrsatmoqda. Xizmatlar sohasining rivojlanishi, koʻrsatilayotgan xizmatlar hajmi va sifati boʻyicha biz iqtisodiy rivojlangan mamlakatlardan hamon jiddiy orqada qolmoqdamiz.

Eng muhimi, shuni unutmaslik kerakki, katta kapital qoʻyilmalar talab qilmaydigan bu soha iqtisodiyotning yuksalishiga, aholi bandligi va daromadlarining ortishiga sezilarli darajada ijobiy ta'sir koʻrsatadi.

Vazirlar Mahkamasining 2012-yil 19-yanvardagi yigʻilishida xizmat koʻrsatish va servis sohalarini rivojlantirish boʻyicha 2012–2016-yillarga moʻljallangan dastur loyihasini tasdiqlash uchun kiritishi, bunda mamlakatimiz yalpi ichki mahsuloti tarkibida bu sohaning ulushi 54–56 foizga yetkazilishini nazarda tutish darkorligi vazifa etib belgilandi.

Takror ishlab chiqarish iqtisodiy oʻsishning sharti boʻlar ekan, unda ta'lim omilining oʻrni beqiyos. Oʻzbekistonda ta'lim har bir insonning butun umri davomida hayotining tarkibiy qismiga aylanishi imkonini yaratadigan ta'lim tizimi joriy etildi. Shu munosabat bilan «**Bilim** – **butun hayot davomida har bir inson uchun**» konsepsiyasiga asoslangan Kadrlar tayyorlash milliy dasturini joriy etish borasida Oʻzbekiston tajribasini oʻrganish 2012-yil 16–17-fevral kunlari Toshkent shahrida «Yuksak bilimli va intellektual rivojlangan avlodni tarbiyalash – mamlakatni barqaror taraqqiy ettirish va modernizatsiyalashning muhim sharti» mavzuida xalqaro konferensiya ishtirokchilari tomonidan yakuniy hujjat sifatida qabul qilindi. Aynan bilim bugungi kunda iqtisodiy taraqqiyotni belgilovchi kuch sifatida e'tirof etilmoqda.

Yuqoridagilarning barchasi mamlakatimizda mehnat unumdorligining oʻsishiga, iqtisodiy oʻsishni izchil ta'minlashga, Oʻzbekiston taraqqiyotini yangi bosqichga koʻtarishga xizmat qiladi.

Tayanch tushunchalar:

Ishlab chiqarish omillari, moddiy-ashyoviy omil, shaxsiy-insoniy omil, informatsion omil, ishlab chiqarish omillarining birikish usullari, ishlab chiqarish sektorlari, natural va tovar ishlab chiqarish, iste'mol buyumlari va moddiy resurslarni ishlab chiqarish, ishlab chiqarish samaradorligi, mehnat unumdorligi omillari, ishlab chiqarish chegarasi, ishlab chiqarish darajasi, takror ishlab chiqarish, milliy boylik, iqtisodiy salohiyat.

Savol va topshiriqlar:

- 1. Iqtisodiy faoliyat ehtiyojlarni qondirishning vositasi ekanligini tushuntiring.
- 2. Iqtisodiy faoliyatning ichki ishlar idoralari xodimlari faoliyatida aks etishini qanday izohlaysiz?
- 3. Iqtisodiy faoliyatning siyosiy, ijtimoiy, madaniy va ma'naviy faoliyatlardan farqini izohlang.
 - 4. Moddiy va nomoddiy sohalarning mohiyatini tushuntirib bering.
- 5. Ishlab chiqarishni modernizatsiya qilish va samaradorligini oshirishga qanday iqtisodiy va huquqiy omillar ta'sir koʻrsatadi?
- 6. Ichki ishlar idoralarining xodimlari uchun mehnat unumdorligining ahamiyati qanday?
- 7. Mehnat unumdorligi turli darajalarda boʻlishining sabablarini tushuntiring.
 - 8. Ishlab chiqarish hajmi pasayishining oqibatlarini sharhlang.
- 9. Insonlar ehtiyojlarining toʻliq qondirilmasligi bilan jinoyatchilik orasida qanday bogʻliqlik bor?

Mavzuni chuqur o'rganish instrumentariysi

Mehnat unumdorligi vaqt birligida yaratilgan mahsulot va xizmatlar birligini yaratish uchun sarflangan ish vaqti. Mehnat unumdorligi mehnat sarfi minimum boʻlgani holda, mahsulotning maksimum boʻlishini bildiradi.

Inson kapitalining bazisligi – uning boshqa barcha turdagi kapitallar yaratilishi va rivojlanishi uchun manba boʻlish xususiyati.

Inson kapitalining bazaviy subyektiv tuzilishi — individ, uy xoʻjaligi, tashkilot, millat va umuman jahon hamjamiyati a'zosi sifatida shaxsning insoniy kapitali.

Ichki institutsional kapital – inson uchun ichki xususiyatga ega boʻlgan norma va qoidalarda koʻrinadigan qadriyat boʻlib, ularning daromad keltirish

xususiyati ichki transaksion xarajatlar, ya'ni «ichki shaxsiy» o'zaro munosabatlardagi kamchiliklarni kamaytirish bilan bog'liq.

Ichki aqliy kapital – insonning yangi bilimlar, ichki institutlar va shu kabilar shaklida daromadli ichki nomoddiy qadriyatlar yaratish qobiliyatida namoyon boʻladigan qadriyat.

Inson kapitalining ichki tartiblashuvi — uning muayyan yaratuvchilik vazifalarini bajarishda shaxs xislatlari va sifatlarining yaxlit tizimini faollashtirish qobiliyati.

Institutsional kapital – transaksion xarajatlarning kamaytirilishini ta'minlovchi, binobarin yaratuvchilik jarayonini tezlashtirib umumiy daromad keltirish xususiyatining oʻsishini ta'minlovchi norma va qoidalar tizimi.

Inson kapitalining integratsiyalovchi roli — uning ishlab chiqarishning mavjud omillarini texnologik birlashtirish hamda tabiiy va ashyoviy kapitalning jalb etilgan elementlaridan foydalanishning eng yuqori samaradorligini ta'minlovchi qulay ijtimoiy-iqtisodiy va institutsional muhitni shakllantirish xususiyati.

Intellektual qadriyatlar — ishlab chiqarishning takroran ishlab chiqariluvchi omillaridan foydalanish, ya'ni tabiiy kapitalni yoʻq qilmaslik asosida yaratilgan ne'matlar.

Inson kapitalining hosil boʻlgan subyektiv tuzilishi — uy xoʻjaliklari, tashkilotlar (firmalar), jamiyat va jahon hamjamiyatining inson kapitalini oʻz ichiga oladigan muayyan majmui.

Ish kuchi – shaxsning yaratuvchilik faoliyatiga potensial tayyorligi va qodirligini ifodalovchi muayyan insoniy resurs.

Inson kapitalining oʻz-oʻzidan rivojlanuvchi xususiyati — insonning muayyan, ongli ravishda belgilangan yoʻnalishda amalga oshiradigan zarur yaratuvchilik xususiyatlari va koʻrsatkichlarini shakllantirib va takror ishlab chiqarib, oʻzini oʻzi rivojlantirish qobiliyati.

Ijtimoiy kapital – shaxsning ijtimoiy maqomini yaratuvchi, uning ijtimoiy transaksiyalar tizimidagi oʻrnini belgilovchi va shaxsga muayyan daromad olishini ta'minlovchi ijtimoiy oʻzaro aloqalar jarayonida yuzaga keladigan va rivojlanadigan barqaror ijtimoiy aloqa va munosabatlar tizimidan iborat oʻziga xos qadriyat.

Mehnat – shaxs mehnat kapitalining u yoki bu hayotiy ne'matni yaratish borasidagi real maqsadga qaratilgan, ongli faoliyatiga aylanib, yaratuvchilik yoʻlida sarflanishidir.

Mehnat kapitali – insonning hayotiy moddiy ne'matlarni yaratishda foydalanadigan bilimlari, mahorat va uquvlari hamda qobiliyatlarining daromad keltiradigan yigʻindisi (kombinasiyasi)da koʻrinadigan qadriyat.

Inson kapitali (ichki va tashqi insoniy kapitalning birligi) – doimiy rivojlanib boruvchi, yaratuvchilikka qaratilgan va talab etiladigan insoniy xislatlar tizimida

namoyon boʻladigan hamda ongli ravishda va maqsadga yoʻnaltirilgan holda foydalanilishi inson rivojlanishi uchun talab etiladigan hayotiy ne'matlarning kengaytirilgan takror ishlab chiqarilishini ta'minlaydigan oʻziga xos qadriyat.

Shaxsning iqtisodiy madaniyati — uning ichki va tashqi transaksiyalar tizimini tartibga soluvchi va muvofiqlashtiruvchi aniq, «amaliy» qadriyatlar — institutlari.

Inson kapitali faoliyatining eksternal xususiyati — ushbu kapitalning borgan sari kamroq oʻz qadriyatini ekvivalent baholashning hamda bu bilan bogʻliq tegishli xarajatlarning obyekti boʻlish xususiyati; inson kapitalining uning sohibidan ajralmasligi shaxs uchun oʻz insoniy kapitalini tegishli shartnomada tartibga solinganidan ancha ortiq darajada amalga oshirish imkoniyatini shakllantiradi.

Intellekt – insonda uning oʻzi takror ishlab chiqaradigan va axloq, adolat va yuksak madaniyat darajasini yaratuvchi normalar sharoitida shakllanadigan, gumanistik yoʻnalishdagi ma'naviy-axloqiy bilimlar, tafakkur, bilish va ijod qilish qobiliyatlari tizimi.

Intellektual – intellekt sohibi, gumanistik yoʻnalishdagi ma'naviyaxloqiy bilimlar, tafakkur, bilish va ijod qilish qobiliyatlari tizimiga ega boʻlgan inson.

Zamonaviy iqtisodiyotning intellektuallashuvi – xoʻjalik faoliyatining yuksak axloqiy asoslarining shakllanish va rivojlanish jarayoni.

Intellektual ichki ishlab chiqarish – insonning gumanistik (noosferaga oid) yoʻnalishdagi tafakkur, bilish va ijod qilish kuch va qobiliyatlarini rivojlantirish borasidagi ongli va maqsadga qaratilgan faoliyati.

Intellektual ishlab chiqarish – intellektual kapitaldan intellektual ne'matlar yaratish maqsadida ongli ravishda foydalanish jarayoni.

Intellektual ashyoviy qadriyatlar – intellektual ishlab chiqarish jarayonida amalga oshirilgan innovatsion gʻoyalar, nou-xau, ixtirolar, texniktexnologik yangiliklar va kashfiyotlar.

Intellektual ichki mahsulot – quyidagilarni oʻz ichiga oladigan mahsulotlar: a) intellektual insoniy kuchlarni boyituvchi noosferaviy (axloqiyiqtisodiy) yangi endogen bilim va koʻnikmalar; b) inson intellektual ichki ishlab chiqarishni oʻzi tashkil qilishi va amalga oshirishini belgilovchi norma va qoidalardan iborat ichki institutlar.

Intellektual noashyoviy tashqi qadriyatlar — intellektual ishlab chiqarish jarayonida yangi bilimlar, shuningdek institutsional va ijtimoiy kapital shaklida yaratilgan ne'matlar.

Intellektual tashqi (ekzogen) kapital – inson intellektining intellektual tashqi ne'matlar yaratilishini ta'minlovchi faollashgan qismi.

Intellektual ichki (endogen) kapital – inson intellektining intellektual ichki ne'matlar yaratilishini ta'minlovchi muhim qismi.

Intellektual kapital – inson intellektining gumanistik yoʻnalishda foydalanilishi avvalo yaratuvchi bilimlar shaklida samara berishini ta'minlaydigan xususiyat va sifatlari tizimi.

Axloqiy-iqtisodiy xoʻjalik yuritish — yaratuvchilik faoliyatining tabiiy kapital yoʻq qilinishi toʻxtatiladigan va insonning rivojlanishi haqiqatan ham gumanistik yoʻnalishga ega boʻladigan xususiyatini ongli ravishda va maqsadga qaratilgan holda ta'minlash.

Intellektual qadriyatlar tizimi – intellektning, intellektual kapitalning (ichki va tashqi), shuningdek intellektual tashqi mahsulotlarning oʻzaro bogʻliq va rivojlanib boruvchi birligi.

Yaratuvchi bilimlar – tabiat ashyosiga nisbatan qoʻllanishi takroran ishlab chiqariladigan resurslar asosida ijtimoiy yoki umuminsoniy boylikning oʻsishini ta'minlaydigan bilimlar.

Aqliy kapital – unumli foydalanilishi yangi foydali bilimlar yoki dolzarb axborot shaklida samara berishini ta'minlovchi muayyan insoniy bilish, ijodiy xislatlar va sifatlar tizimi.

Mavzu yuzasidan asosiy xulosalar:

- 1. Ishlab chiqarish munosabatlari ishlab chiqarish, taqsimlash, ayirboshlash, iste'mol munosabatlaridan iborat.
- 2. Ishlab chiqarishda tovarlar va xizmatlar yaratiladi. Shu bois u birlamchi hisoblanadi.
- 3. Taqsimlash munosabati yaratilgan tovar (xizmat)lar, tarmoqlar, sohalar hamda resurs egalari oʻrtasida taqsimlanadi, taqsimlashda kishilarning manfaati yuzaga chiqadi, manfaat esa ehtiyojni bildiradi. Shu bois ham taqsimotning bosh tamoyili bu adolatlilik tamoyilidir. Taqsimlash ishlab chiqarishning hosilasi hisoblanadi.
- 4. Ayirboshlash munosabati turli xil bozorlarda tovar (xizmat)lar pul vositasida ayirboshlanib, ishlab chiqaruvchidan iste'molchi qoʻliga oʻtadi. Ayirboshlash usuli savdo-sotiqni bildiradi.
- 5. Iste'mol munosabati ishlab chiqarish munosabatlarining soʻnggi bosqichi boʻlib, ular shaxsiy va unumli iste'mol qilinadi. Iste'mol kishilarning kundalik ehtiyojlarini qondirish hamda ishlab chiqarishni rivojlantirish maqsadini koʻzlaydi. Iqtisodiyot ishlab chiqarishdan boshlanib, iste'mol bilan yakunlanuvchi faoliyat sifatida doimo takrorlanib turishi zarur, boʻlmasa, kishilik jamiyati yashay olmaydi.

4-MAVZU. MULKCHILIK MUNOSABATLARI

1. Mulkchilikning iqtisodiy va huquqiy mazmuni

Har qanday jamiyatning iqtisodiy tizimi mulkchilikdan boshlanadi. Hamisha avlodlar mehnati yaratgan va tabiat in'om etgan boyliklar mulk boʻlib kelgan. Mulk egasi boʻlish yoki boʻlmaslikka qarab, kishilarning jamiyatdagi mavqei, aniqrogʻi, ularning ijtimoiy maqomi yuzaga keladi. Mulkiy munosabatlarga asoslanmagan iqtisodiyot boʻlishi mumkin emas.

Bozor munosabatlarini rivojlantirishga qaratilgan Oʻzbekiston iqtisodiyotining negizini xilma-xil shakllardagi mulk tashkil etadi. Davlat iste'molchilarning huquqi ustunligini hisobga olib, iqtisodiy faoliyat, tadbirkorlik va mehnat qilish erkinligini, barcha mulk shakllarining teng huquqliligini va huquqiy jihatdan bab-baravar muhofaza etilishini kafolatlaydi.

Xususiy mulk boshqa mulk shakllari kabi daxlsiz va davlat himoyasidadir. Mulkdor faqat qonunda nazarda tutilgan hollarda va tartibdagina mulkidan mahrum etilishi mumkin (Oʻzbekiston Respublikasining Konstitutsiyasi, 53-modda).

Mustaqillikning dastlabki yillaridayoq Prezident Islom Karimovning Oʻzbekiston iqtisodiyotining negizini mustahkamlashda «Mulkchilik masalasini hal qilish bozorni vujudga keltirishga qaratilgan butun tadbirlar tizimining tamal toshi boʻlib xizmat qiladi», degan da'vati bugungi kunda oʻz tasdigʻini topdi.

Darhaqiqat, mulk sohibi oʻz mulkiga tayanib, mustaqil ish yuritadi, u qaram emas. Mulksiz, oʻzga mulkini ijaraga olib, faoliyat yurgizishi yoki mulkdorga yollanib yoki nochorlikdan unga qaram holda ishlashi, birovning qoʻliga qarab qolishi mumkin. Har bir kishi oʻz mulki orqasidan kun koʻradi. Yer egasi dehqonchilik qilish yoki yerni ijaraga berishdan, pul egasi uni qarzga berib, foiz olishdan, kapital egasi uni biznesda ishlatishdan, nihoyat, ish kuchi egasi yollanib ishlashdan daromad topadi.

Iqtisodiy islohotlarning bugungi bosqichida (bundan 21 yil oldin davlatimiz rahbari tomonidan aytilgan) eng muhim dolzarb vazifa — mulkiy munosabatlarni tubdan oʻzgartirishdir. Uning tub mohiyati — mulkni haqiqiy egalari qoʻliga berishni tezlashtirish, tadbirkorlik uchun keng yoʻl ochib berish va mulkdorda yangi mulk egasi hissiyotini tarbiyalashdan iborat.

Mulkchilik oʻzlashtirish borasidagi munosabat boʻlar ekan, u egalik qilish, foydalanish va tasarruf etishning yaxlitligini taqozo etadi. Mana shu uch jihat mulkchilikning ajralmas unsurlaridir.

Mulkchilik iqtisodiy hamda yuridik kategoriya sifatida uch ajralmas jihatga ega: egalik qilish, tasarruf etish, foydalanish.

Egalik qilish — mulkdorlik huquqining mulk egasi qoʻlida saqlanib turishidir. Egalik sharoitida mulk boʻlgan boylik qisman oʻzlashtiriladi. Mulkka egalik saqlangan holda, uni amalda ishlatish oʻzga qoʻlida boʻladi. Buning oqibatida mulkdan kelgan naf ikki qismga ajraladi: bir qismini mulkdor, ikkinchisini mulkni amalda ishlatuvchi oʻzlashtiradi. Masalan, bino ijaraga berilganda, egalik qilish mulkdor qoʻlida qoladi va u mulkdan kelgan nafning faqat bir qismini ijara haqi shaklida oʻzlashtiradi. Boshqa qismi esa ijarachi oʻzlashtiradi. Xullas, egalik qilish qisman, cheklangan oʻzlashtirishni bildiradi.

Foydalanish, ishlatish – mulk boʻlgan boylikni iqtisodiy faoliyatda qoʻllab, xoʻjalik jarayoniga kiritib, undan natija olishdir. Foydalanish yuz berganda, boylik daromad topish yoki shaxsiy ehtiyojni qondirish uchun ishlatiladi. Mulkdor oʻz mulkini oʻzi ishlatganda, egalik qilish va foydalanish bir qoʻlda boʻladi. Olingan natijani mulkdor tanho oʻzi, boshqa bilan baham koʻrmagan holda oʻzlashtiradi. Egalik qilish va foydalanish ajralganda, mulk keltirgan naf ham taqsimlangan holda oʻzlashtiriladi.

Tasarruf etish – mulk boʻlgan boylik taqdirini mustaqil hal etish, ya'ni mulkni sotib yuborish, ijaraga berish, merosga qoldirish, asrabavaylab koʻpaytirish yoki uni yoʻqotib yuborishdan iborat xattiharakatlarni amalga oshira bilishdir. Mulkchilik munosabat ekan, albatta, uning obyekti va subyekti boʻlishi shart.

Mulkchilik obyekti – bu mulkka aylangan barcha boylik turlari. Unga yer, suv, konlar, oʻsimlik va hayvonot dunyosi, mashinalar, mashina-uskunalar, bino-inshootlar, mahsulotlar – xizmatlar, tarixiy-madaniy yodgorliklar, ilmiy-texnikaviy gʻoyalar, tovar belgilari, tovarlarning oʻzi, mehnat – aqliy-jismoniy qobiliyatlar va boshqalar kiradi. Mana shu moddiy va nomoddiy ne'matlarni oʻzlashtirish yuzasidan mulkiy aloqa shakllanadi. Ne'matlar mulkka aylangandagina oʻzlashtiriladi.

Mulkchilik subyekti – mulk obyektini oʻzlashtirishda qatnashuvchilar, mulkiy munosabatlarning ishtirokchilari. Bular jumlasiga ayrim kishilar, oilalar, aholining ijtimoiy guruhlari, hududiy birlashmalar, har xil jamoalar, ijtimoiy, diniy tashkilotlar va nihoyat, davlat kiradi. Aytilgan subyektlarga qarab oʻzlashtirish individual, oilaviy, ijtimoiy-sinfiy,

hududiy va umummilliy tus oladi. Ijtimoiy tabaqalashgan jamiyatda oʻzlashtirish oʻzining darajasi va usuliga qarab har xil boʻladi.

Oʻzlashtirish ikki yoʻsinda boradi: 1) ishlab chiqarish resurslari, ya'ni vositalarini oʻzlashtirish. Bunda moddiy va mehnat resurslari ishlab chiqarish sohibining mulkiga aylangandan soʻng oʻzlashtiriladi. Ishlab chiqarishdagi oʻzlashtirish birlamchi. Bu yerda ishlab chiqarishning har ikkala omili (moddiy va inson omillari) birikadi, mahsulot va xizmatlar yaratiladi. Mana shu omillarning oʻzlashtirilishiga qarab, mehnat natijalariga nisbatan mulk shakllanadi;

2) ishlab chiqarish natijalarini oʻzlashtirish — yaratilgan mahsulot (ish) — xizmatlarni, ularni sotishdan kelgan daromadni kimning mulkiga aylanishini bildiradi. Resurslar kimning mulki boʻlsa, natija ham uniki. Ammo bu qoida egalik qilish, foydalanish va tasarruf etish yaxlit holda va bir subyekt ixtiyorida boʻlganda, yuz beradi.

Mulkchilik oʻzlashtirishning iqtisodiy usullarini anglatadi. Ammo, uning gʻayriiqtisodiy usullari ham uchrab turadiki, bu boylikni mulk egasidan zoʻrlik bilan tortib olish yoxud uni oʻz egasi tomonidan ixtiyoriy ravishda umummilliy maqsad yoʻlida, savob-xayriya ishlari uchun boshqa subyektga berilishi, uning mulkiga aylanishidir. Islom mamlakatlarida azaldan din rivoji uchun xayriya berish bor. Bu yerda vaqf mulki, vaqf boshqarmasi va hatto vaqf banklari bor. Vaqf mulki koʻngilli xayriyadan tashkil topadi, uning shakllanishi gʻayri iqtisodiy usulda yuz beradi. Mulk egasi oʻz boyligini diniy tashkilot ixtiyoriga vaqf qilib beradi, ya'ni oʻz mulkidan koʻngilli ravishda voz kechadi va u oʻzga mulkiga aylanadi.

Iqtisod insoniylashib borgan, uning samarasi oshgan sayin boylikning xayriya uchun ajratilgan qismi ortib boradi. Turli-tuman xayriya fondlari – pul mablagʻlari tashkil topadiki, ularni turli mulk egalari ajratadilar. Masalan, Orol fondi, Oltin meros, Ekosan xalqaro jamgʻarmasi, Mahalla jamgʻarmasi va h.k.

Mol-mulkni zoʻrlik bilan tortib olish ekspropriatsiya, ya'ni musodara deyiladi. Agar uning haqini toʻlamasdan sud hukmi yoki ma'muriy yoʻl bilan tortib olinsa, konfiskatsiya deyiladi. Mulk egasi bilan kelishgan holda va haqini toʻlab qonuniy ravishda olinsa, rekvizitsiya yuz beradi.

Davlatning demokratik negizlari barqarorligining *iqtisodiy asosini* – mulk shakllarining xilma-xilligi, birinchi navbatda xususiy mulk tashkil etadi.

Davlatning demokratik negizlari barqarorligining siyosiy asosini – real ishlab chiqarish vositalarining oʻrta mulkdorlaridan iborat kuchli qatlamlarning mavjud boʻlishi tashkil etadi. Aholi orasida haqiqiy mulkdorlar oʻrta qatlamining koʻpchilikni tashkil etishi mamlakatda ijtimoiy-iqtisodiy islohotlarni orqaga qaytarish imkoniyatlarini bartaraf etishning kafolati hisoblanadi.

Odam oʻzini chinakam mulkdor deb his etmas ekan, oʻz huquqlari, pirovard natijalar va ishlab chiqarish samaradorligi uchun mulkdor sifatida kurash-maydi. Jamiyatda barqarorlikni saqlab qolish va himoya qilishga intil-maydi.

Mamlakatimizda roʻy berayotgan barqaror iqtisodiy oʻsish odamlar ongidagi oʻzgarishlar mahsuli sifatida baholanayotgani bejiz emas. Mehnatga, mulkka boʻlgan munosabat oʻzgardi. Joylarda, nihoyat, tadbirkor va fermerlarga mustaqillikning dastlabki yillaridagidek oʻgay koʻz bilan qaralmayotgani xususiy mulkka iqtisodiyotning tayanchi sifatida munosabatda boʻlinayotgani mahsulidir.

Muhim yutugʻimiz sifatida bozor islohotlarini chuqurlashtirish, iqtisodiyotni erkinlashtirish va mulk huquqini himoya qilishni mustah-kamlashga qaratilgan choralarning amalga oshirilishi mamlakatimizda investitsiya muhitini yaxshilash hamda hajmi tobora ortib borayotgan xorijiy sarmoyalarni jalb qilishda ijobiy ta'sir koʻrsatayotganligini ta'kidlash lozim.

Iqtisodiy munosabatlar mazmunini mulkka boʻlgan munosabat belgilaydi. Bu munosabat jamiyatning ijtimoiy tuzilishini, ishlab chiqarishni rivojlantirish yoʻnalishlarini belgilab beradi. Mulkka boʻlgan munosabatni joriy qilish huquqning me'yorlariga bogʻliq boʻlib, mulkka egalik qilish, undan foydalanish, muayyan shaxslarga biriktirish, mulk huquqi orqali amalga oshiriladi.

Mustaqil Oʻzbekistonning bozor iqtisodiyotiga oʻtish bosqichida mulkning barcha shakllari uchun yagona huquqiy tartibotni joriy etish «mulk huquqi» degan yagona tushunchani hamda uning shakllarini sifat jihatidan yangicha chegaralash zaruriyatini keltirib chiqaradi. Davlat mustaqilligi qoʻlga kiritilishi bilan, boshlangan tub oʻzgarishlar xususiy mulkchilikning ham egalik qilish, foydalanish va tasarruf etishning boshqa shakllari bilan bir qatorda respublika iqtisodiy tizimining asosini tashkil etishga olib keladi.

2. Mulkchilik turli shakllarining vujudga kelishi

2.1. Prezident Islom Karimov jamiyatning iqtisodiy negizlarini mustahkamlash toʻgʻrisida

1990-yil 2-iyunda «Sovet Oʻzbekistoni» gazetasi Prezident Islom Karimovning 1990-yil 16-iyun kuni Oʻzbekiston Kompartiyasi Markaziy Komitetida respublikaning iqtisodiy mustaqillikka va bozor iqtisodiyotiga oʻtish masalalari xususidagi nutqini e'lon qildi.

Ushbu nutq bilan atroflicha tanishgan inson mustaqillik arafasidagi katta oʻzgarish — Oʻzbekistonning siyosiy mustaqilligini mustahkamlash va takomillashtirish, iqtisodiy mustaqillikka, oʻzini oʻzi idora etish, moliyaviy ta'minlashga erishish, aholi barcha tabaqalarining farovonligini oshirish, choʻkib borayotgan ijtimoiy sohani jadal rivojlantirish, xalqni ma'naviy yuksaltirish, demokratiyani, huquqqa asoslangan davlat qurilishini rivojlantirish, yurt tinchligi, Vatan ravnaqi yoʻlida barcha sogʻlom kuchlarni birlashtirish kabi ezgu maqsadlarni ilgʻaydi.

Quyida Prezident Islom Karimovning ushbu nutqidan iqtiboslar keltirishni joiz deb bildik: «Bugungi kunda, eng avvalo bir daqiqani ham boy bermasdan iqtisodiy masalalarni hal etish kerak. Biz uchun asosiy yoʻnalish, barcha vazifalarni hal etish kaliti — Oʻzbekistonning real siyosiy suvereniteti va iqtisodiy mustaqilligini ta'minlashdir.

Mustaqillik respublikaga oʻz xalqining farovonligini yaxshilashdek hayotiy muhim masalalarni hal etish, vujudga keltirilgan imkoniyatlar va resurslarni toʻlaligicha mustaqil ravishda rejalashtirish va ulardan foydalanish, oʻz xalqining farovonligi yoʻlida va oʻzaro foydali negizda markaz, boshqa respublika va xorijiy mamlakatlar bilan oʻzaro munosabatlarni mustaqil oʻrnatish imkonini beradi».

«Aniq iqtisodiy hisob-kitoblar siyosiy va iqtisodiy mustaqillikka oʻtish ushbu vazifaning butun murakkabligi va nihoyatda qaltisligini hisobga olganda, ayni vaqtda bozor iqtisodiyoti joriy etilishi bilan oson kechishi mumkin emasligini koʻrsatmoqda. Lekin faqat ana shu mustaqillik bugungi jamiyatimizda yoʻq boʻlgan narsalarni — haqiqiy mehnat qilishga intilishni, samarali ish uchun moddiy omillarni berishga qodir. Bunda — oʻtmishda ham, hozir ham, kelajakda ham — butun muammoning mohiyati yashiringan. Koʻp yillik achchiq tajriba, qanday tayoq ostida ishlamaylik — xoh u plan, xoh davlat buyurtmasi yoki davlat yoʻli bilan mahsulot yetkazib berish boʻlsin — faqat arzimagan samara

keltirishini koʻrsatib turibdi. Chunki bunday tizim insonning ijodiy tashabbusini falaj qiladi, undagi egalik hissini yoʻqotadi. Oʻz ishidan norozilik keltirib chiqaradi».

«Bizga mustaqillik kerak. Binobarin, har doim, hamma davrda va barcha tuzumlarda mulk huquqi ham iqtisodiy, ham siyosiy mustaqillikning hal qiluvchi sharti boʻlgan. Bu nima degani? Agar men nimagadir ega boʻlsam, ana shu mulkdan oʻz manfaatlarim yoʻlida foydalanaman va uni tasarruf etaman, demak, men mulk egasiman. Xuddi shu yerda mening shaxsiy erkinligim, mustaqilligim va ayni vaqtda jamiyatda boshqa odamlar orasidagi oʻzaro aloqalarimning asosi bor. Ayni paytda egalik huquqi faqat moddiy boyliklargagina taalluqli emas. Bu aqliy qobiliyatga ham taalluqlidir. Mustaqil shaxslarning uygʻunligi esa butun jamiyat mustaqilligining asosidir».

«Agar iqtisodiy quvvatimizni tashkil etadigan barcha asosiy fondlar bugungi kunda 100 milliard soʻm hisoblansa, hozir amal qilayotgan tartibga koʻra, qariyb 30 milliard soʻm pul Ittifoq tobeligidadir. Ishlab chiqarishning asosiy fondlarida esa bu mutanosiblik yanada yomon. Bu sohada mablagʻlarning beshdan ikki qismi Ittifoq tobeligida, shu jumladan sanoatda ana shu mablagʻlarning deyarli 70 foizi, transportda hamda moddiy-texnika ta'minotida, ilm-fanda 30 foizga yaqini Ittifoqqa tegishli».

«Eng muhim narsa nima?

Birinchisi, respublika mulki mustaqil va u federasiyadan ajratilgan.

Ikkinchisi, oʻlkamiz zamini, yer osti boyliklari, korxonalari va tashkilotlari Oʻzbekiston SSRning mutlaqo oʻz mulki hisoblanadi. Ana shu boyliklarimiz mustaqilligimizni, respublikamizning madaniy va tarixiy qadriyatlarini ta'minlaydi.

Uchinchisi, Oʻzbekistonda mulkchilikning xilma-xil shakllarini rivojlantirish koʻzda tutilmoqda. Bu shakllar teng huquqli boʻlishi kerak».

sobiq Ittifoqdagi chiqarish Ma'lumki, ishlab munosabatlari mehnatkashlarning ijobiy tashabbusini tang ahvolga solib qoʻygan edi. Mulkchilikning turlari qancha koʻp boʻlsa, uning egalari oʻzgarib tursa, inson omili faollashuviga olib keladi, chunki amalda mehnat jarayoniga va mehnat natijalarini taqsimlash usullariga qiziqish oʻzgarib boradi. Boshqacha mehnatning jadallashuvidan ailib aytganda, rag'batlanish inson omilining rivojlanishida asosiy kuch tarzida namoyon bo'ladi. Davlatimiz rahbari tashabbusi bilan mustaqillikka qadar «Mulk to'g'risida», «Tadbirkorlik to'g'risida», «Yer to'g'risida», «Kooperatsiya to'g'risida» va boshqa shu kabi qonunlarning qabul qilinishi ta'sirida

inson omilining koʻpgina tomonlari erkin faoliyat yoʻliga kirganligini yana alohida qayd etish lozim.

Davlatimiz rahbari yuqoridagi masala yuzasidan quyidagilarni ta'kidlaydi: «Bozor munosabatlariga oʻtish masalasi. Ana shunday maqsad va vazifalardan kelib chiqib, respublikada oʻtish davridagi resurslarimiz va imkoniyatlarimizdan samarali foydalanish, aholining ijtimoiy himoyasi, ayniqsa, kam ta'minlangan aholi ijtimoiy himoyasining ishonchli mexanizmi ishlab chiqilishi lozim.

Bunda eng asosiy masala – mulkchilik muammosidir. Mulkchilik haqidagi tushunchamizni belgilab olmay turib, ishlab chiqarish munosabatlariga yondashuvlarni ishlab chiqish imkoniyati boʻlmaydi, boshqacha qilib aytganda, respublikada mulkchilikning qanday shakllari boʻlishini aniqlab olish darkor.

Biz mulk shakllarining xilma-xilligini boshqariladigan bozorning hal qiluvchi omili, deb bilamiz (*E'tibor qarating: davlatimiz rahbari mustaqillikka qadar boshqariladigan bozor haqidagi ilmiy qoidani ilgari surgan – ta'kid bizniki Sh. Qobilov*). Davlat mulki bilan bir qatorda va u bilan teng huquqlilik asosida kollektiv, aksionerlik, oila, shaxsiy mehnat, shaxsiy mulk ham keng yoyiladi».

Davlatimiz rahbari yuqoridagi talablardan kelib chiqib ijtimoiy vaziyatni moʻtadillashtirish borasida 1990-yilning oktabrida, hali Oʻzbekiston mustaqillikka erishmagan davrda Oʻzbekiston Respublikasida «Mulk haqida»gi qonunning qabul qilinishida tashabbus koʻrsatgan. Bu Prezident Islom Karimovning jamiyatimizning iqtisodiy negizlari va iqtisodiy mustaqilligimizni mustahkamlashdagi dadil amaliy qadami edi. Bu MDH mamlakatlari ichida birinchilardan boʻlib xususiy mulkning huquqiy maqomi, mulk subyektlarining vakolati va burchlarini qonuniy mustahkamladi. Mustaqillik arafasida Islom Karimov tashabbusi bilan yana bir muhim qadam tashlandiki, 1991-yilning fevral oyida Oʻzbekiston Respublikasida «Tadbirkorlik toʻgʻrisida»gi qonun qabul qilindi. Shu bois bugungi kunda mustaqillik arafasida amalga oshirilgan sa'y-harakatlar xalqimizga hayotiy muhim manfaatlarini yuzaga chiqarishda amaliy koʻmak berdi.

Mamlakatimizda amalga oshirilayotgan iqtisodiy islohotlarning asosiy tamoyillaridan biri sifatida Oʻzbekiston Respublikasi Prezidenti Islom Karimov tomonidan chuqur asoslab berilgan kuchli ijtimoiy siyosat aholi yalpi daromadlarining oʻsishi uchun zarur shart-sharoitlar yaratdi.

Mazkur islohotlar natijasida 1990–2010-yillar (1991–2000-yillar bozor iqtisodiyotiga oʻtish davri) davomida Oʻzbekiston aholisining yalpi daromadlari aniq hisob-kitoblarga koʻra 8,6 barobar oshdi.

Yalpi daromadlar tarkibida shu davrda mulk daromadlari, tadbirkorlik faoliyatini amalga oshirishdan olingan daromadlar koʻrinishidagi yangi daromad turlari paydo boʻldi. Tabiiyki, sobiq mustabid tuzum davridagi markazlashtirilgan rejali iqtisodiyot sharoitida aholining bunday daromad manbalari shakllanishiga mutlaqo yoʻl qoʻyilmas edi.

Yangi turdagi bunday daromadlar hissasiga 2012-yilda yalpi daromadlarning 51 foizi toʻgʻri keldi.

Yangi turdagi ushbu daromadlarning afzalligi shundaki, aholining tadbirkorlik sohasidagi faollashuvi oila yalpi daromadlarining jadal ravishda oshib borishi uchun ragʻbatlantiruvchi bozor omillarini yaratadi, markazlashtirilgan iqtisodiyot sharoitida keng tarqalgan boqimandalik va daromadlarning bir xilda boʻlishi darajasini pasaytiradi.

Oʻrtacha oylik ish haqi miqdorining bosqichma-bosqich oshirib borilishi yalpi daromadlar tarkibidagi, oʻtish davrining dastlabki yillarida boʻlgani kabi, ulushi yanada pasayib ketishining oldini oldi. Hozirgi paytda aholining yalpi daromadlarida oylik ish haqining ulushi barqaror holat, ya'ni 30–32,1 foiz darajasida saqlab qolinmoqda.

Oʻzbekistonda aholi daromadlarini oshirishga qaratilgan choratadbirlarning qabul qilinishi, hayotimizda tobora hal qiluvchi kuchga aylanib borayotgan oʻrta sinfni shakllantirish imkonini berdi. Ekspert xulosalariga koʻra, oʻrtacha daromadga ega boʻlganlar, agar 1990-yilda aholining 18 foizini tashkil etgan boʻlsa, 2001-yilda uy xoʻjaliklarini tadqiq etish natijalariga koʻra, bu koʻrsatkich 24 foizga yetgani ayon boʻldi. 2010-yilda esa 60 foiz uy xoʻjaliklari oʻrtacha darajadan kam boʻlmagan barqaror daromadga ega boʻlgan. Oʻtgan 21 yil mobaynida yurtimizda uy-joy hajmining koʻrsatkichi qariyb 2 barobar oshgani, oilalarning 98,5 foizi oʻzining shaxsiy uy-joy yoki kvartirasiga, qishloqda yashayotgan oilalarning 97,5 foizi shaxsiy tomorqasiga ega boʻlganini ayni shu maqsadda amalga oshirgan milliy dasturlarimizning natijasidir.

2012-yilda kichik biznes va xususiy tadbirkorlikning YAIMdagi ulushi 54,5 foizni tashkil etganligining poydevori bundan 22 yil oldin qoʻyilganligini eslash va alohida qayd etib oʻtish joiz.

Mulkiy munosabatlar har doim yuridik qonunlarda qayd etiladi. Busiz mulkchilik amal qilmaydi. Qonunchilik orqali mulkiy aloqa — bogʻlanishlar boshqarib boriladi. Oʻzbekiston Konstitutsiyasida: «Oʻzbekiston iqtisodiyotining negizini xilma-xil shakllardagi mulk tashkil etadi», — deb yozilgan.

2.2. Mulkiy munosabatlarning tiplari, shakllari

Mulk tipi – har xil turdagi ijtimoiy-iqtisodiy tizimlarga xos boʻlgan mulkiy munosabatni, mulk xarakterini bildiradi. Shu jihatdan ekspluatatsiyaga asoslangan va ekspluatatsiyani inkor etuvchi mulkiy tizimlar mavjud. Birinchi tizim azaldan mavjud boʻlgan va ozchilikning mulkdor boʻlishi koʻpchilikning mulksiz qolishi va ekspluatatsiya qilinishi bilan xarakterlanadi. Bunday tipdagi mulkchilik quldorlik, feodalizm, kapitalizm va byurokratik davlat sotsializmiga xos bo'lgan. U ishlab chiqarish moddiy omillarining hukmron sinf va toifalar qoʻlida to'planishi; mehnat omilining esa mazlumlar tomonida bo'lishi bilan ajralib turgan. Shunday sharoitda har xil mulkiy maqomdagi kishilar qoʻlidagi omillar birikib ishlab chiqarish yuz bergan. Mehnat sohiblari ishlab turib, kam daromad olishgan, vositalar egalari ishlamay turib, oʻzgalar mehnati hisobidan boylik orttirishgan. Ekspluatatsiyaga asoslangan mulkiy tizim uzoq vaqt hukm surgan, uning rivojlanish zaminida yangicha tizim paydo boʻlgan. Oʻz mehnati, bilimi va mahoratidan kun koʻrishni taqozo etgan mulkchilik ham koʻhna, lekin u hukmron bo'lmagan. Quldorlik, feodalizm, kapitalizm va davlat sotsializmida ham o'z kuchi bilan yashagan dehqon, kosib, ishchi va xizmatchilar bo'lgan, lekin ular mulki jamiyat iqtisodiy tuzumining hal qiluvchi asosi bo'lmagan. Iqtisodiyot o'sib, oddiy fuqaro qo'lida ham borgach, iamlanib yangi mulkiy tizim paydo Ekspluatatsiyani inkor etuvchi mulkiy tizim aralash iqtisodiyotga xos bo'lib, u yuksak rivojlangan, to'kinchilikni ta'minlay oladigan ishlab chiqarish sharoitida paydo bo'ladi. Bu tizimda ko'pchilik mulk egasi boʻladi. Nafaqat ish kuchi, balki moddiy resurslarni va yaratilgan boyliklarni oʻzlashti-rishda ham aholining tobora keng qatlami ishtirok etadi. Bu yerda iqtisodiy o'sishdan hamma bahramand bo'ladi. Mulk koʻpchilikniki boʻlganidan topilgan daromad ham koʻpchilik manfaati yoʻlida taqsimlanadi. Oʻzbekistonda yaratilayotgan yangi mulkiy tizim yuksak ishlab chiqarish maqsadini koʻzlagan boʻlib farovonlikni ta'minlashga qaratilgan.

Har bir mulk tipiga xos belgilar birdan paydo boʻlib yoki yoʻqolib ketmaydi. Shunisi borki, biz yuqorida koʻrib oʻtgan mulk tizimlarining mavqei har xil boʻlsa-da, ular birgalikda amal qiladi, chunki sof mulkiy tizim hech qayerda, hech qachon boʻlmaydi.

Oʻz mehnati evaziga oʻzlashtirish, birovlar yaratgan boylikni tekinga oʻzlashtirish, yakka va jamoa tarkibida, sherikchilik asosida

oʻzlashtirishlar borki, ular har xil mulkchilikni bildiradi. Tarixan turli ijtimoiy-iqtisodiy tuzumlar boʻlganki, ularga iamoa ekspluatatsiyani bildiruvchi quldorlar mulki, feodal mulki, kapitalistik mulk hukmron bo'lgan. Bir mulkdan ikkinchisi o'sib chiqqan. Mulkiy munosabatlar rivojida ekspluatatsiyani inkor etuvchi mulkdan uni taqozo etuvchi mulklarga va nihoyat ulardan ekspluatatsiyaga yot bo'lgan mulkka o'tish yuz beradi. Sobiq SSSRdagi sotsialistik eksperiment «byurokratik sotsializmi» kazarma natijasida yaratilib, monopollashgan davlat mulki xos bo'lgan. Bu mulk xalqning davlat tomonidan ekspluatatsiya qilinishiga asoslangan.

sovet tizimiga xos boʻlgan markazlashtirilgan Butun rejalashtirish va taqsimlashdek illatlarning ta'siri natijasida Oʻzbekiston iqtisodiyoti asosan xom ashyo tayyorlashga yoʻnaltirilgani, biryoqlama rivojlanish hisobidan mo'rt va nochor holga tushib qolgan bo'lib, igtisodiyotga, genofondiga ekologiya aholi halokatli va oʻtkazadigan paxta yakkahokimligi yurtimizdagi vaziyatni jar yoqasiga olib kelib qoʻyganini eslash zarur. Chunki, buning oqibatida ulkan tabiiy, mineral-xom ashyo, mehnat va inson salohiyatiga ega bo'lishiga qaramay, respublikamiz sobiq SSSRda aholi turmush darajasi, ijtimoiy va gumanitar sohalar rivoji boʻyicha oxirgi oʻrinlardan birida turar edi. Buni ro'yxatga olish bo'yicha 1989-yilda o'tkazilgan ma'lumotlar ham tasdiqlaydi.

Iqtisodiyot va demokratiya oʻzaro uzviy bogʻliqdir. Demokratiyani samarali joriy qilish iqtisodiyotning muayyan darajada rivojlanganligi bilan bogʻlanadi, chunki moddiy taqchillik holatidagi aholining ongiga zoʻrma-zoʻraki demokratik qadriyatlarni singdirib boʻlmaydi. Oʻz navbatida, demokratiyaga asoslanmagan iqtisod rivojlanmaydi. Undan tashqari demokratlashtirish maqsad emas, unga iqtisodiyotni rivojlantirib, aholining munosib turmush darajasini ta'minlashning vositasi sifatida qaralmogʻi lozim.

Mamlakatni rivojlantirishda iqtisodiy islohotlarni amalga oshirish masalasini tahlil qilishdan oldin mustaqil Oʻzbekistonga sobiq Ittifoqdan qanday iqtisodiy meros qolganligini eslatib oʻtish maqsadga muvofiq. Bu savolga Prezident Islom Karimov oʻzining «Oʻzbekiston XXI asrga intilmoqda» asarida aniq javob bergan.

Bular:

 moʻrt, zaif, biryoqlama rivojlangan, paxta yakkahokimligiga asoslangan xoʻjalik;

- xom ashyoni qayta ishlash, texnika va texnologiyani chetdan keltirishga rejalashtirilgan ishlab chiqarish;
- respublika yoqilgʻi, gʻalla, shakar, goʻsht-sut va boshqa oziq- ovqat mahsulotlari boʻyicha boshqa mintaqalarga qaram boʻlib qolgan edi;
 - respublikada ogʻir ekologik vaziyat vujudga kelgan edi;
 - ishlab chiqarishning samarasi past, boqimandalik hukmron edi.

Bu holatning bosh sababi Sobiq Ittifoqda hukmron boʻlgan ma'muriy-buyruqbozlik tizimiga asoslangan iqtisodiy boshqaruvning samarasiz ekanligidir. Uning bosh sababi kommunistik partiyaning xoʻjalikni boshqarishda iqtisodiyotning ichki rivojlantirish qonuniyatlarini inkor etganligi, uning siyosiy maqsadlarga boʻysundirilganida ekanligini isbotlashga hojat yoʻq.

Aksincha, bozor munosabatlariga asoslangan rivojlangan mamlakatlarning iqtisodiyoti nafaqat moddiy boyliklar yaratishi, balki oʻz xalqi turmush darajasini koʻtarish, uning iste'mol ehtiyojlarini toʻlaroq qondirish, huquq va erkinliklarini ta'minlash boʻyicha ham bir qancha muvaffaqiyatlarni qoʻlga kiritdi, jamiyatning barqaror rivojlanishiga erishdi.

Muvaffaqiyatlarning negizida ishlab chiqaruvchilarning erkin raqobatda boʻlishi, iste'molchilarning talablariga doimo moslashib borish, iqtisodiy huquqlarni qonun bilan mustahkamlab qoʻyilishi kabi bir qancha demokratik prinsiplar yotadi. Bunday iqtisodni rivojlantirishga qaratilgan shart-sharoitlar Oʻzbekiston aholisining an'analariga ham mos keladi.

Abu Ali ibn Sino shunday yozgan edi: «Odamlarning mulkiy tengsizligi, vazifasining bir xil emasligi, oʻzaro farqlari, inson ijtimoiy faoliyatining sababidir»¹. Boshqacha aytganda, inson iqtisodiy erkinligi oʻzining moddiy ahvolini yaxshilash uchun intilishiga yoʻl ochib beradi. **Navoiyning** Iatisodni rivojlantirishning yana sharti Alisher bir zamondoshi Voiz Koshifiyning ta'kidlashicha, ishlab chiqaruvchilar hokimiyatga soʻzsiz itoat etishlari emas, balki keyingilari mehnatkash dehqon, kosib-hunarmand, bog'bonning tinch mehnati uchun shartsharoitni yaratib berishlari kerak, boshqacharoq aytganda, ularga xizmat qilishlari lozim². Demak, soʻz jahon tajribasi bilan milliy iqtisodiy qadriyatlarni uygʻunlashtirish ustida bormoqda. Yuqoridagi fikrlarning o'zi bozor munosabatlari jamiyatning barqaror rivojlantirishning eng

² *Махмудов Р.* Дегонимни улуска марғуб эт. – Т., 1992. – Б. 29.

¹ Ўзбекистонда ижтимоий-фалсафий фикрлар тарихи. – Т., 1995. – Б. 68.

muhim omillaridan ekanligini va uni joriy qilish obyektiv zarurat koʻrsatib turibdi.

Lekin bozor munosabatlariga oʻtishning mustaqillikning ilk yillarida Oʻzbekiston uchun ma'qul boʻladigan tayyor andozasi yoʻq edi. Bunda, albatta, har bir mamlakatning oʻziga xos xususiyatlarini hisobga olish ijobiy natijalarga olib kelishi mumkin. Bu masalaga keyingi mavzuda toʻxtalamiz.

Jamiyat taraqqiyoti tarixiy-tabiiy jarayon sifatida, oʻz izidan chetga chiqmay borganda, mulkiy munosabatlar bir xil mulk hukmronligidan turli-tuman mulkning muvozanatiga oʻtish tomoniga qarab rivojlanadi. Turli-tuman mulkchilik hozirgi aralash iqtisodiyot tizimiga xosdir.

Oʻtmishdagi iqtisodiy tuzumlarda ekspluatatsiyani taqozo etmaydigan mulk boʻlgani kabi hozirgi oʻta rivojlangan davlatlarda aralash iqtisodiyot boʻlsa-da, baribir har ikkala mulkiy tizimga xos belgilar mavjud. Agar oʻtmishdagi mulkiy tizim muayyan mulk shaklining hukmronligi bilan ajralib tursa, hozirgi yangi mulkiy tizim turli mulk shakllarining muvozanati va birgalikda rivoji bilan xarakterlanadi.

Mulk shakllari – bu oʻzlashtirishning xarakteridir, ya'ni uning koʻrinishi, qiyofasi, mazmunidir. Oʻz mehnati evaziga oʻzlashtirish, oʻzgalar yaratgan boylikni tekinga oʻzlashtirish, yakka tartibda, jamoa boʻlib, sherikchilik asosida oʻzlashtirish borki, ular mulkchilikning har xil shakllarini bildiradi.

Dastlab, ibtidoiy tuzumda urugʻ-jamoa mulki paydo boʻlgan, soʻngra chiqqan. Xususiy mulk kelib mulk turli koʻrinishda asoslangan ijtimoiy-iqtisodiy tizimlarda hukmron ekspluatatsiyaga bo'lgan. Xususiy mulkdan davlat mulki o'sib chiqqan, monopollashgan davlat mulki yuzaga kelgan. Jamiyat taraqqiyoti monopoliyadan mulkiy demokratiya tomon boradi. Shu sababli bir mulk monopoliyasi oʻrniga turli mulklarning muvozanati vujudga keladi. Bu degani mulkiy monostruktura (tanho mulkchilik) oʻrniga mulkiy polistruktura (har xil mulkchilik) qaror topadi. Mulkiy polistruktura aralash iqtisodiyot tizimiga xosdir. Endi har bir mulk shaklini alohida-alohida koʻrib chiqish maqsadga muvofiqdir.

Xususiy mulk — ayrim kishilarga tegishli va daromad topishga qaratilgan mulk. Uning ikki koʻrinishi bor: individual-xususiy mulk, korporativ-guruhiy mulk. *Individual mulk* bor joyda boylikni oʻzlashtirish alohidalashgan holda, ayrim mulkdor tomonidan amalga oshiriladi. Masalan, korxona individual mulk boʻlsa, kelgan foydani faqat uning

egasi oladi. Korxonani ijaraga berish yoki aksioner jamiyatga aylantirish tanho mulkdor ixtiyorida boʻladi. *Korporativ xususiy mulk* deganda boylikni individual tarzda oʻzlashtirish, lekin mulkdorlar sherikchilik asosida ma'lum guruhlarga birlashgan sharoitda oʻzlashtirish tushuniladi.

Mazkur mulk hissadorlikka tayanadi. Mulkdor o'zining individual hissasini pay (ulush) sifatida umumiy, ya'ni guruhiy ishga sarflaydi. Uning mulki alohida emas, boshqa sheriklar mulki bilan birgalikda ishlatiladi. Topilgan daromad oʻz ulushiga qarab individual tarzda olinadi. Bu yerda oʻzlashtirishning individual guruhiy shakli yuzaga chiqadi. Mazkur mulk shakli aksioner jamiyatlar faoliyatida koʻrinadi. Ammo har qanday aksioner jamiyat emas, balki individual kapitallarni birlashtirishga asoslangan jamiyatlar korporativ xususiy mulk bo'ladi. Gap shundaki, aksioner jamiyatda davlat va jamoa mulki ham bo'lishi mumkin. Bunda korporativ mulk paydo bo'lmaydi. Xususiy korporativ mulkning paydo bo'lishiga sabab shuki, ishlab chiqarish ko'lami ortib borgan sari individual boylik katta ishni boshlashga yetishmay qoladi, ya'ni serkapital sohalarga kapital solish uchun individual mablagʻ miqdori ozlik qiladi. Mablag'larni birlashtirish zarur bo'ladi, zaruriyat korporativ mulkchilikni taqozo etadi. Bundan tashqari, mulkdorlar soni ortib boradi, ayni vaqtda tadbirkorlikda xavf-xatar kuchayadiki, uni kichik mulkdor zimmasiga ololmaydi. Mayda mulklar birlashib, korporativ mas'uliyat paydo bo'ladi. Xatar koʻpchilik zimmasiga tushib, yengil kechadi. Bunday jarayon xususiy mulk rivojining yuqori bosqichlariga xosdir.

Xususiy korporativ mulkning muhim koʻrinishi monopolistik mulkdir. Monopolistik xususiy mulk – guruhga birlashgan yirik mulkdorlarning iqtisodiyotning u yoki bu sohasida tanho hukmronligiga tayangan holda o'ta katta boylikning ozchilik tomonidan o'zlashtirilishini bildiruvchi mulkdir. Uning namunasi boʻlgan monopoliyalar ham korporativ tarkibga ega bo'ladi. Ular amaliyotda korporatsiya deb nom olgan. Monopoliyalar hukmron sharoitda monopollashgan bozor mavjud bo'ladi. Individual xususiy mulk XIX asrda gullab-yashnagan va u yovvoyi kapitalizm, tartiblashmagan bozor iqtisodiga xos bo'lgan XX asrning birinchi yarmida monopolistik xususiy mulk rivoj topgan. XX asrning II yarmidan boshlab nomonopolistik xususiy mulkning korporativ shakli tez rivojlana boshladi. 80-yillardan boshlab mayda aksioner iamiyatlar (bular monopollashmagan korporativ mulk) tez rivojlanib bordiki, bu aralash iqtisodiyotga xosdir.

Oʻzbekistonda ham oʻtmishda xususiy mulkchilik rivojlangan. Oktabr inqilobidan oldin individual xususiy mulk keng koʻlamda mavjud edi.

Turkiston o'lkasida individual mulk sohibi bo'lgan dehqonlar va kosiblar 1 mln. kishini tashkil etgan. XIX asrning oxirlarida korporativ mulk ham paydo bo'lgan. Masalan, «Besh-Bosh» (5 korxona egalarini birlashti-«Андреевское товарищество», ruvchi), «Полеляховское товарищество» nomli jamiyatlar amal qilgan. Totalitar sotsializm davrida xususiy mulk taqiqlangan. Bozor iqtisodiga oʻtish munosabati bilan Oʻzbekistonda mulkiy erkinlik vujudga keldi. Oʻzbekiston Respublika-«Mulkchilik toʻgʻrisida»gi qonun (1990-yil oktabrda qabul qilingan) xususiy mulkka ruxsat berdi. Oʻzbekistonda asosan mayda individual xususiy mulk bo'lib, u yakka tartibda ishlovchilar korxonasi, kichik biznes vakillari, fermer xoʻjaliklari, tomorqa xoʻjaligi, yollanma ish yurituvchi xususiy korxonalardan tayanib O'zbekistonda korporativ xususiy mulkning ilk ko'rinishlari mavjud bo'lib, ularni ayrim fuqarolar mablag'larini birlashtiruvchi jamiyatlar tashkil etadi. Xususiy mulkdan tashqari shaxsiy mulk ham borki, u ham individual o'zlashtirishni bildiradi. Ammo u xususiy mulkdan farqliroq daromad topishga xizmat qilmaydi, balki shaxsiy ehtiyojni qondirishga qaratiladi. Asosan iste'mol buyumlari, ya'ni oziq-ovqat, kiyim-kechak, turar joy, transport vositalari shaxsiy mulk obyekti bo'lib xizmat qiladi. Ular pul topishga emas, shaxsiy hayot kechirishga qaratiladi. Bu mulkning o'sish manbai iste'molga ajratilgan daromad hisoblanadi. Shaxsiy mulkning koʻpligi jamiyat boyligini bildiradi. Xususiy va shaxsiy mulk birgalikda fuqarolar mulki deb yuritiladi. Ular oʻrtasidagi chegara nisbiydir. Muayyan boylik shaxsiy mulkdan xususiyga aylanishi mumkin. Masalan, muayyan bir kishining topgan puli iste'mol tovarlari va xizmatlarni xarid etib, iste'mol qilishga ishlatilsa, u shaxsiy mulkka aylanadi. Agar uni aksiyaga aylantirib, daromad topilsa, xususiy mulk boʻladi.

Jamoa mulki — boylikning muayyan maqsad yoʻlida ayrim jamoalarga birlashgan kishilar tomonidan birgalikda oʻzlashtirilishidir. Bu mulk sharoitida oʻzlashtirish jamoadan tashqarida boʻla olmaydi. Oʻzlashtirishning sharti jamoaga kirishdir. Hamjihat oʻzlashtirish birlamchi, boshqa oʻzlashtirish koʻrinishlari faqat u orqali boʻlishi mumkin. Oʻzlashtirish uchun mulk egasi boʻlish kifoya etmaydi. Buning uchun ish faoliyatida birgalikda qatnashish zarurdir. Jamoa mulki mehnatsiz oʻzlashtirishni inkor etadi va korporativ-xususiy mulkdan farqliroq nafaqat mulkka, balki mehnatga ham hissa qoʻshishni talab qiladi. Shundagina oʻzlashtirish yuz beradi, ishlab chiqarish resurslari birgalikda ishlatiladi, ammo olingan natijaning bir qismi individual

oʻzlashtiriladi, lekin bu ham mulkdagi, ham mehnatdagi hissadorlikka qarab boʻladi. Natijaning qolgan qismi umumiy talab-ehtiyojlarni birgalikda qondirish, mulkni koʻpaytirish maqsadlarida oʻzlashtiriladi. Xususiy mulkdan farqliroq, jamoa mulki ekspluatatsiyani inkor etadi.

Jamoa mulkining afzalligi shuki, bu mulk ishlab chiqaruvchining oʻzini mulkdor qiladi. Bu yerda mulk egalari va ishlovchilar aynan bir kishilardir, shu sababli ishlab chiqarish omillari toʻgʻridan-toʻgʻri birikadi, ya'ni xodimlar oʻz ish kuchi bilan oʻzining mulki boʻlgan vositalarni harakatga soladilar. Mulk xodimlarning oʻziniki boʻlganda moddiy javobgarlik va manfaatdorlik kuchli boʻladi. Mulk avaylab ishlatiladi va yaxshi samara beradi.

Jamoa mulki ham tarixan koʻhna mulk, lekin xususiy mulk hukmron sharoitda yordamchi mulk shakli boʻlib xizmat qiladi. Masalan, Oktabr inqilobidan oldin Oʻzbekistonda ekiladigan yerlar (hayot yeri deb atalgan) xususiy mulk boʻlgan, dehqonchilikka yaroqsiz yerlar qishloq jamoasining umumiy yeri boʻlib (paykal yeri deb atalgan), undan birgalikda foydalanishgan. Mulkiy monopoliya barham topib, mulkiy munosabatlar erkin demokratik tus olgan sharoitda jamoa mulki rivojlana boshladi. Aralash iqtisodiyotda jamoa mulki salmoqli oʻrin tutadi.

Oʻzlashtirish sharti mehnat qilish boʻlganidan ekspluatatsiyaga, ya'ni oʻzga hisobidan boylik orttirishga oʻrin qolmaydi. Shu jihatdan olganda, hozirgi rivojlangan davlatlarda yovvoyi kapitalizmga xos ekspluatatsiya sekin-asta surib chiqarilmoqda. Bundan tashqari, u yerda oʻzga mehnatidan foydalanib, boylik orttirishga davlat nazorati orqali chegara qoʻyiladi. Yollanib ishlash ixtiyoriy boʻlib, mehnat qilishda iqtisodiy majburlashga yoʻl qoʻyilmaydi, har bir kishi mehnat sohasi va turini tanlay oladi, korxona egasi oʻz bilganicha ish haqini pasaytira olmaydi, u ishchi-xizmatchilarga me'yoriy ish sharoiti yaratib berishi, ularni har xil ijtimoiy nafaqalar bilan ta'minlashi shart. Jamoa mulki ichki unsurlari, uning turlaridan iborat.

Kooperativ mulki – jamoa mulkining asosiy turi, har xil kooperativlarga birlashgan kishilarning umumiy mulki, mulkdagi hissadorlikka asoslangan boʻlib, guruhiy mazmunga ega.

Ijaraga olingan korxona jamoasi mulki – ijarachilar jamoasi oʻzi ishlab topgan mulk. Bunday korxonada mulk ikki qismdan iborat: 1) korxona egasiga qarashli mulk; 2) jamoaga qarashli umumiy mulk. Shu ikkinchi mulk obyekti birgalikda ishlab topilgan pul yoki pulga olingan va jamoa tasarrufidagi hamda uning manfaati yoʻlida ishlatiluvchi moddiy

boylikdir. Uning subyekti faqat ijarachilar jamoasi hisoblanadi. Jamoa korxona egasi mulkidan ham foydalanadi, lekin uni tasarruf eta olmaydi.

Korxona jamoasining mulki — ishchi va xizmatchilar jamoasi davlatdan yoki xususiy mulk sohibidan sotib olgan va umumiylashtirib, birgalikda oʻzlashtiriladigan mulk. Bu yerda mulk ikkiga ajralmaydi, hamma mol-mulk va pul mablagʻlari korxona jamoasi ixtiyorida turadi.

Korxona va tashkilotlar uyushmasi (assotsiatsiyasi) mulki — ma'lum maqsad yoʻlida uyushma tashkil etganlarning umumiy mulki. Oʻz faoliyatini uygʻunlashtirish, savdo-sotiq, ishlab chiqarish, boshqarishni tashkil etish uchun har xil yoki bir xil mulkka oid korxonalar va tashkilotlar ajratgan moddiy va pul mablagʻi hisobidan tashkil topgan, lekin ishtirokchilar mulkidan alohidalashgan umumiy mulk paydo boʻladi. Uni har bir ishtirokchi emas, balki uyushma tasarruf eta oladi. Bu mulk umumiy manfaat yoʻlidagina ishlatiladi.

Ijtimoiy tashkilotlar mulki – ijtimoiy tashkilotlar (partiyalar, kasaba tashkilotlari, xalq harakatlari, turli fondlar va boshqalarga a'zo boʻlgan va oʻz ulushini qoʻshgan kishilarning umumiy mulkidir. U badal puli, ajratmalar, xoʻjalik faoliyatidan tushgan daromadlar hisobidan paydo boʻladi, tashkilotlar nizomida koʻrsatilgan faoliyatni amalga oshirishga xizmat qiladi.

Intellektual mulk – iqtisodiy faoliyat mahsulotlarining tijorat maqsadida foydalanishga berilgan yagona huquqdir.

Intellektual mulk ijodiy faoliyat mahsulotlari egalariga ulardan foydalanishdan yakka oʻzi moddiy manfaat koʻrish uchun shart-sharoit ta'minlaydigan maxsus huquqiy himoyaning obyekti hisoblanadi.

Diniy tashkilotlar mulki — dindorlar tashabbusi bilan vujudga kelgan tashkilotlarning mol-mulki. Bu mulk ham birgalikda tasarruf etiladi va u oʻtmishdan meros qolgan diniy tashkilotlarga qarashli bino-inshootlar bilan cheklanmay, dindorlardan tushgan mablagʻlar, korxona va tashkilotlarning xayriya yordami, diniy marosimlardan tushgan daromad hisobidan shakllanadi. Mazkur mulk obyekti — masjidlar, madrasalar, cherkovlar, kostyollar, sinagoglar va u yerlardagi asbob-anjomlar, kitoblar, marosim uchun zarur buyumlar, tashkilotlar ixtiyoridagi pul mablagʻi va boshqalardir. Uning subyekti dindor kishilar. Ular nomidan mulkni diniy tashkilotlar tasarruf etadi. Mazkur mulk faqat din yoʻlida ishlatiladi.

Oʻzbekiston Respublikasining «Oilaviy tadbirkorlik toʻgʻrisida»gi qonunining 2012-yilda kuchga kirishi iqtisodiyotning turli yoʻnalishlarida oilaviy biznesni rivojlantirish orqali aholini foydali mehnatga jalb qilish

imkoniyatlarini kengaytirishga xizmat qiladi. Oilaviy korxona va xoʻjaliklar borki, u yerdagi mol-mulk daromad topishni koʻzlaydi, birgalikda oʻzlashtiriladi. Bir necha qondosh oilalar uyushmasi jamoa bo'lib, uning doirasida mulkiy aloqa paydo bo'ladi. Oila mulki obyekti oilaga qarashli mol-mulk boʻlib, u mehnat vositalari bilan birga iste'mol buyumlaridan ham iborat. Oila mulki zaminida mikroiqtisodiyotning bir turi – oila xoʻjaligi amal qiladi. Mazkur qonunga muvofiq, oilaviy korxonalar oila yashab turgan turar joyda faoliyat yuritishi va oʻzi ishlab chiqargan mahsulotni shu yerda sotishi mumkin. Bundan tashqari oilaviy korxonalar tomonidan ishlab chiqarish faoliyati uchun foydalaniladigan turar joylarni noturar joylarga o'tkazish ham talab qilinmaydi. Oilaviy korxona turar joydan bir vaqtning oʻzida unda istiqomat qilgan holda tovarlar ishlab chiqarsa (ishlab bajarish, xizmatlar koʻrsatish) kommunal infratuzilmalari (elektr energiyasi, kanalizatsiya, suv, ta'minoti) haqini to'lash aholi uchun belgilangan ta'riflar bo'yicha va shartlar asosida amalga oshiriladi.

Mahalla jamoatchilik asosida oʻz-oʻzini boshqarish tizimi boʻlib, u ma'lum hududda yashovchi barcha oilalarni birlashtiradi.

Mahalla mulki – mahalla ahlidan iborat jamoa doirasida unga qarashli boylikning hamjihatlik bilan oʻzlashtirishdir. Mahalla ixtiyoridagi binoinshootlar (kutubxona, idora binosi), marosimlarga xizmat qiluvchi asbobanjomlar mahalla mulkining obyekti boʻlsa, uning subyekti jami mahalla ahli hisoblanadi. Mahalla ahlining pul mablagʻlari, davlat (mahalliy hokimiyat) bergan mablagʻlar, mahallada joylashgan korxona va tashkilotlarning xayriya ajratmalari hisobiga mahalla mulki shakllanadi va oʻsib boradi.

Davlat mulki — boylikni oʻz vazifasini ado etish uchun davlat tomonidan oʻzlashtirilishidir. Bu mulk davlat paydo boʻlishi bilan vujudga keladi, ammo uning maqsadi va miqyosi oʻzgarib turadi. U xususiy va jamoa mulkidan oʻsib chiqadi, ya'ni ularga tegishli moddiy va ma'naviy ne'matlar davlat tasarrufiga oʻtadi.

Davlat mulkining paydo boʻlishi va rivojlanishi quyidagilar hisobidan boʻladi: 1) mulkning natsionalizatsiya etilishi (milliylashtirilishi), ya'ni xususiy mulkning davlat mulkiga aylantirilishi; 2) davlat mablagʻi hisobidan korxonalar qurilishi; 3) jamiyatda yaratilgan, ammo boshqa mulklarga taalluqli daromadlar bir qismining soliq undirish orqali davlat budjetiga olinishi.

Davlatning xarakteriga qarab, unga tegishli mulk ayrim ijtimoiy guruhlarning tor egoistik manfaatlariga yoki umummilliy manfaatga xizmat qiladi. Bu mulkning ahamiyati davlatning iqtisodiyotda tutgan oʻrni bilan bogʻliq. Gap shundaki, iqtisodiyotga ta'sir etish uchun davlat oʻz mulkiga tayanadi. Agar iqtisodiy oʻsish uchun davlat mulki zarur boʻlsa, u kengayadi va aksincha zarurat boʻlmasa, u qisqaradi. Serkapital, tezda yaxshi foyda bermaydigan, sarflar zudlik bilan oqlanmaydigan sohalar borki, u yerga xususiy yoki jamoa mulki sohiblari oshiqmaydi, ammo bu soha ular faoliyati, iqtisodiy oʻsishining umumiy sharti hisoblanadi. Shu sababli ular davlat tasarrufiga oʻtib, davlat hisobidan rivojlanadi. Katta kanallar, suv omborlari, gidrostansiyalar, yer, temir yoʻllar, yirik portlar, atom sanoati, kosmik sanoati va xizmati shular jumlasiga kiradi. Boshqa mulklar qatori davlat mulki obyektida ham turlituman boylik boʻladi. Oliy hokimiyat organlari bu mulk subyekti hisoblanadi. Oʻzbekistonda davlat mulkini tasarruf etishga Oliy Majlis va undan vakolat olgan organlar haqlidir.

Turli mamlakatlarda davlat mulki, obyekti bir-biridan farq qiladi. Koʻpchilik mamlakatlarda yer xususiy mulk obyektiga kiradi, Oʻzbekistonda mulk toʻgʻrisidagi qonunga koʻra yer, suv, qazilmalar, oʻsimlik va hayvonot dunyosi davlat mulki, deb e'lon qilingan.

Davlat mulki ma'lum me'yorda bo'ladi. Ammo totalitar iqtisodiyot tizimida o'ta davlatlashtirish, davlat mulki monopoliyasi vujudga keladi. Davlat mulki tanho kuchga aylanadi, butun iqtisodiyot ustidan nazorat oʻrnatishga xizmat qiladi. Bunday holat iqtisodiy erkinlikka zid boʻlganidan mulkni davlat ixtiyoridan chiqarish zaruriyatga aylanadi. Mulkdan begonalashtirilgan odamlar xarajatlar miqdoriga, ishlab chiqarilgan mahsulot sifati va taqdiriga ham befarq boʻladi. Bu esa turli suiiste'molliklar, talon-torojlar, qo'shib yozishlar, hisobotlar va statistik ma'lumotlarni soxtalashtirishga olib keladi. Demokratik, iqtisodiyot tizimida davlat mulki monopoliyasiga oʻrin qolmaydi, balki iqtisodiy zaruriyat belgilagan me'yorda saqlanadi, ustunlikka ega bo'lmay, boshqa mulk shakllari bilan yonma-yon turadi. Davlatning iqtisodiyotdagi roli davlat mulkini talab qiladi, ammo iqtisodiyot bu o'lchanmaydi. hissasi, salmog'i bilan mulkning Rivojlangan mamlakatlarda davlatning mulkdagi hissasi qanday bo'lishidan qat'i nazar, yaratilgan daromadning deyarli 50 foizi davlat orqali taqsimlanadi. Davlat umummilliy manfaatlarni ifodalovchi kuch sifatida iqtisodiyotda katta oʻrin tutadi. U daromadlarni, moddiy resurslarni, ish kuchini taqsimlashda faol qatnashadi. Xullas, aralash iqtisodiyot davlatning mulkdan chetlashuvi emas, balki davlatning mulkiy munosabatlarda ma'lum me'yorda ishtirok etishidir.

Davlat mulki faqat unga qarashli korxonalar mol-mulki bilan cheklanmaydi, unga davlat tashkilotlari mahkamalaridagi mol-mulk, davlat budjetining pul mablagʻlari, davlatga qarashli aksiyalar ham kiradi. Shuningdek, davlatning xorijda ham mol-mulki boʻladi. Davlat mulki boshqa mulklar bilan ham oʻzaro kirishib ketadi. Masalan, aksioner jamiyat aksiyasining asosiy qismi davlatniki boʻlgani holda, qolgan qismi xususiy va jamoa mulki boʻlishi mumkin.

Totalitar iqtisodiyotdan bozor iqtisodiyotiga oʻtish davrida davlat mulkining mavqei kuchli boʻladi, chunki oʻta davlatlashtirilgan mulkdan xilma-xil mulkchilikka oʻtish darhol yuz bermaydi. Buni Oʻzbekiston tajribasi ham koʻrsatib turibdiki, 1990-yildan boshlab Oʻzbekiston iqtisodiyotida davlat mulki hissasining kamayib borishi kuzatiladi. Davlat mulki kuchli boʻlsa-da, u oʻz ichidan oʻzgarib, bozor sharoitiga moslashadi, davlat korxonalari mustaqilligi, ular ishiga davlatning aralashuvi cheklanadi, korxona oʻz manfaati yoʻlida mustaqil faoliyat yurgizadi. Demak, davlat mulki saqlansa-da, u yangi iqtisodiy aloqalar ishtirokchisiga aylanadi.

Davlat mulkining mavqei turli mamlakatlarning tanlagan yoʻliga bogʻliq. Hozir bozor iqtisodiyoti bosh, umuminsoniy yoʻl, ammo unga oʻtishning milliy xususiyatlari mavjud. Yangi iqtisodiyotga birdan oʻtilsa, davlat mulki shiddat bilan qisqaradi. Agar bu oʻtish sekin-asta borsa, davlat mulkining salmogʻi uzoq saqlanadi. Masalan, Vengriya, Chexoslovakiya va Polshada mulkni davlat tasarrufidan chiqarish tez bordi. Xitoyda esa davlat mulki saqlanmoqda. Oʻzbekistonda mulkni davlat tasarrufidan chiqarish bosqichma-bosqich amalga oshirildi.

Turli shakldagi mulklar bir-biridan tamomila ajralib qolmaydi, ularning oʻzaro aloqasi faqat bozor orqali boʻlmay, ular kirishib ham ketadi, natijada aralash mulk paydo boʻladi. Ammo u mulkiy monopoliya bor joyda shakllanmaydi, chunki buning uchun mulkiy erkinlik va tanglik boʻlishi zarur. Shu sababdan keyingi davrda aralash mulkning paydo boʻlishi tasodif emas. Aralash mulk muayyan bir obyektning turli mulkdorlar ishtirokida oʻzlashtirilishini bildiradi. U hozirgi ochiq tipdagi qorishma aksioner kompaniyalarida aniq ifoda etiladi. Bu yerda xususiy mulk, jamoa mulki va hatto xorijiy mulk hissadorlik asosida birlashadi. Mulk obyekti birlashgan holda ishlatilib, oʻz egalariga daromad keltiradi.

Turli mulk shakllari alohidalashgan boʻlsa-da, ularning yaxlitligi bor, chunki iqtisodiyot yagona faoliyat boʻlib, mulkdorlar xatti-harakatining bir-biriga bogʻlanishini bildiradi. Shu boisdan barcha mulk shakllarining majmui mamlakatning milliy mulki boʻladi. Milliy mulk tanho bir millat

yoki elat mulkini bildirmaydi. U muayyan jamiyatdagi har xil ijtimoiy qatlamga mansub kishilar mulki va umummilliy manfaatlarni ifodalovchi davlat mulkining birligidir. Milliy mulk boylikning muayyan mamlakatga tegishli ekanligini bildiradi va shu bilan oʻzga davlatlar, ular firmalari va fuqarolariga qarashli mulk boʻlgan xorijiy mulkdan farq qiladi.

3. Mulkni davlat tasarrufidan chiqarish va xususiylashtirishning maqsadi va usullari

Mulkiy munosabatlar taraqqiyotida xususiylashtirish ham zaruratga aylanadi. Mulkiy monopoliyadan mulkiy erkinlikka oʻtish muqarrarligidan xususiylashtirish zarurati kelib chiqadi. Ammo xususiylashtirish iqtisodiy jihatdan mulkni davlatlashtirishdan chekinishni, davlat mulkining boshqa mulklarga aylanishini bildiradi. U davlat mulki hisobidan nodavlat mulk shakllarini rivojlantirishdir. Yuqorida aytganimizdek, mulkiy munosabatlarga xos narsa erkin mulkdan monopol mulkka (bunga davlat mulki ham kiradi) va qaytadan monopol mulkdan erkin mulkka oʻtishdir. Shu sababli xususiylashtirish faqat hozir biz yashab turgan davrda yuz bermoqda desak, noto'g'ri bo'ladi. O'tmishda yer, suv, o'rmon boyliklari, bino, inshoot va boshqalar davlat mulkidan chiqarilib, ayrim shaxslarga – ularning davlat oldidagi alohida xizmatlari uchun, xususiy mulk sifatida berish mavjud bo'lgan. Ammo u paytlarda xususiylashtirish davlat mulkining faqat xususiy mulkka aylanishidan iborat bo'lgan va ayrim mamlakatlarda yuz bergan. Hozirgi xususiylashtirish umuminsoniy, umumdunyo hodisasi boʻlib, monopollashgan bozor iqtisodiyotidan erkin bozor iqtisodiga oʻtish bilan bogʻliq. Bu hodisaning oʻz moddiy asosi bor. Ilgari ishlab chiqarish faqat katta miqyosda toʻplangan holda rivojlana olgan, chunki texnika-texnologiya shuni talab qilgan. Endilikda ishlab chiqarishning katta qismi ozchilik qo'lida to'planishi shart emas. Aksincha, mayda firmalar doirasida ham samarali ishlab chiqarishni yurgizish mumkin, chunki katta xususiy mablag' bo'lmasa-da, uni qarz olib, hatto asbob-uskunani ijaraga olib tadbirkorlik qilish mumkin. Mayda tarqoq ishlab chiqarish raqobatga sharoit hozirlab, iqtisodiy o'sishni ragʻbatlantiradi. Mulkning davlat ixtiyorida boʻlish zarurati kamaydi. Shu boisdan xususiylashtirish ommaviy tus olib, hamma davlatlarda yuz bermoqda, bozor iqtisodiyotiga oʻtib boʻlgan mamlakatlarda ham amalga oshmoqda.

Xususiylashtirish mulkni demokratlashtirish sifatida davlat mulkini koʻpchilik oʻrtasida tarqatib, mulkdorlarni koʻpaytirishni bildiradi. Uni amalga oshirishning bir necha yoʻllari mavjud:

- 1) davlat korxonalarini aksionerlar jamiyatiga aylantirib, uning molu mulki hisobidan chiqargan aksiyalarni xalqqa sotish. Aksiyani sotib olgan kishi mulkdorga aylanadi;
- 2) ijaraga olingan davlat korxonasini ijarachilar jamoasi tomonidan oʻzi ishlab topgan pulga yoki qarzga sotib olib, uni jamoa mulkiga aylantirish. Bunda yangi mulkdorlar xalq emas, faqat korxona jamoasi boʻladi;
- 3) davlat mulkini qiymatiga qarab chiqarilgan sertifikatlar yoki vaucherlarga binoan fuqarolarga bepul berish. Bunda mulk xalq oʻrtasida tarqatiladi, chunki vaucher va sertifikat korxona aksiyasini olish huquqini beradi;
- 4) davlat mulkini faqat tanilgan, ishning koʻzini biladigan, mas'uliyatni zimmasiga ola biladigan tadbirkorlarga, boshqaruvchilarga (menejerlarga) sotish. Bunda ham ma'lum qatlamgina mulk sohibiga aylanadi;
- 5) davlat mulkini xorijiy qarzni uzish evaziga chet el firmalari va fuqarolariga berish. Bunda milliy mulk hisobidan xorijiy mulk oʻsadi;
- 6) davlat mol-mulkini auksionlarda kimoshdi savdosi orqali sotish. Bunda ham faqat ma'lum toifadagi kishilargina yangi mulk sohibiga aylanadilar.

Xususiylashtirish usullarini tanlash undan kutilgan maqsadga bogʻliq. Agar ishbilarmonlikni ragʻbatlantirib, mulkiy mas'uliyatni kuchaytirish nazarda tutilsa, xususiylashtirish saralangan ozchilik oʻrtasida oʻtkaziladi. Mulkchilikda ijtimoiy adolatni ta'minlab, hamma uchun teng imkoniyat yaratish shart boʻlsa, xususiylashtirish butun xalq ishtirokida oʻtkaziladi. Bunga Rossiyadagi vaucherizatsiya misol boʻla oladi. Rossiyada 1992-yili har bir fuqaroga 10 000 rubllik vaucher tarqatildi, bu bilan har bir kishi davlat mulkida shu summaga teng hissaga ega boʻldi. Oʻzbekistonda xususiylashtirish korxona jamoasi uchun ustuvorlik berish yoʻsinida boshlandi. Bunda korxona mol-mulki uning jamoasiga beriladi. Bundan maqsad xususiylashtirish jarayonida koʻproq jamoa mulkini oʻstirish boʻldi, ammo iqtisodni liberalizatsiyalash uchun xalq xususiylashtirishiga ham yoʻl berildi.

Agar xususiylashtirish chet el kapitalining kirib kelishiga yoʻl ochishi zarur boʻlsa, davlat mulki xorijiylarga berish shaklida amalga oshirildi. Xususiylashtirish usullaridan ayrimlarining ustuvorligi boshqa usullarni ham qoʻllashni bildiradi. Masalan, Oʻzbekistonda xususiylashtirish

korxona jamoasiga ustunlik beradi, lekin aksionerlash ham mavjud, unda chet el kapitali ham ishtirok etib, mulkni sotib olishi mumkin. Xususiylashtirish sharoitga qarab pulli, bepul yoki imtiyozli tarzda oʻtkaziladi. Oʻz shakli va usulidan qat'i nazar, bu tadbir xilma-xil mulkchilikni ta'minlaydi, chunki davlat mulki hisobidan nodavlat mulkining hamma shakllari va turlari rivojlanadi. Xususiylashtirish davlat mulki monopoliyasini tugatishga qaratilgan, ya'ni u antimonopol xarakterga ega mulk sohiblarini, binobarin, mustaqil tovar ishlab chiqaruvchilarni koʻpaytirib, sogʻlom raqobatga yoʻl ochadi. Xususiylashtirishning pirovard maqsadi mulkiy mas'uliyatni ishga solish orqali iqtisodiy samaradorlikni ta'minlash, xalq farovonligini oshirishdir.

Davlat mulkining xususiylashtirilishi va kichik biznes rivojining ragʻbatlantirilishi natijasida Oʻzbekistonda yangi ijtimoiy qatlam — mulkdorlar sinfi paydo boʻldi. Bu qatlamning umumiy soni qariyb 6,5 million kishini, jumladan, aksiyadorlar 1,4 million, xususiy fermer xoʻjaliklari egalari 80,6 ming, shuningdek, dehqon xoʻjaliklari va daromad keltiradigan boshqa mulk shakllari egalari (mas'uliyati cheklangan jamiyatlarning nizom jamgʻarmasida oʻz ulushiga ega boʻlgan shaxsiy korxonalar va boshqalar) 4,8 million nafarni tashkil etadi.

Xususiylashtirish tufayli qimmatli qogʻozlar va mulk bozori kabi yangi bozorlar paydo boʻlib, koʻp tarmoqli iqtisodiyotning shakllanishi va bozor munosabatlarini yanada rivojlantirishga asos boʻldi.

1-jadval

Xususiylashtirish jarayonida nodavlat mulkchilik obyektlari va yangi
korxonalar tashkil etish dinamikasi

Yillar	Xususiylashtirilgan	Jumladan		
	barcha korxona va	Aksiyadorlik jamiyat-	Xususiy mulk	
	obyektlar, dona	lariga aylantirilgan,	qilib sotilgan,	
	hisobida	foiz hisobida	foiz hisobida	
1994	9744	29,7	70,3	
1995	8537	12,0	88,0	
1996	1915	65,6	34,4	
1997	899	50,7	49,3	
1998	266	41,4	58,6	
1999	373	37,8	62,2	
2000	372	40,8	59,2	
2001	1238	18,3	81,7	
2002	1800	12,4	87,6	
2003	1452	5,2	94,8	

2004	1228	2,3	97,7
2005	980	0,3	99,7
2006	673	2,8	97,2
2007	631	0	100
2008	392	0	100
2009	135	0	100
2010	96	0	100
Jami	30731	21,5	78,5

Manba: Oʻzbekiston Respublikasi Davlat mulki qoʻmitasi.

Iqtisodiyotning nodavlat sektorini rivojlantirish va xususiylashtirish borasida mustaqillik yillarida davlat tomonidan sezilarli ishlar amalga oshirildi.

Mustaqillik yillarida yalpi ichki mahsulot ishlab chiqarish tarkibida mulkchilik shakllari boʻyicha tub oʻzgarishlar roʻy berdi. Mahsulot ishlab chiqarish, ishlar va xizmatlar tarkibida nodavlat sektor asosiy oʻrinni egalladi. Nodavlat sektorning ulushi 1995-yildagi 58,4 foizdan 2010-yilda 81,7 foizga yetdi, jumladan, xoʻjalik birlashmalari ulushi 27,4 foiz, qoʻshma korxonalar hissasi 14,2 foiz, xususiy fermer xoʻjaliklari ulushi 6,5 foiz va aholining xususiy mulki 30,4 foizni tashkil etdi.

2-jadval
Mulkchilik shakli boʻyicha YAIM ishlab chiqarish
tarkibi (foiz)

	1995-yil	2000-yil	2010-yil
Yalpi ichki mahsulot	100	100	100
Jumladan			
Nodavlat mulkchilik	58,4	72,6	81,7
Shundan			
Fermer xoʻjaliklari	X	1,9	6,5
Xoʻjalik birlashmalari	X	17,4	27,4
Qoʻshma korxonalar	X	5,2	14,2
Davlat mulkchiligi	41,6	27,4	18,3

Bozor islohotlarini amalga oshirish yillarida qariyb 31 mingta davlat korxonasi va obyekti xususiylashtirildi hamda mamlakatimiz iqtisodiyotida tutgan oʻrni va ahamiyatiga qarab, ular aksiyadorlik

jamiyatlari (21,5 foiz) va mulkchilikning boshqa nodavlat korxonalari shakli (78,5 foiz) sifatida qayta tashkil etildi.

2010-yilda iqtisodiyotning nodavlat sektorining ulushi quyidagicha boʻldi: mamlakatimiz yalpi ichki mahsulotini ishlab chiqarishda 81,7 foiz, sanoat mahsulotlari ishlab chiqarishda 91,0 foiz, qishloq xoʻjaligida 99,9 foiz, qurilish-pudrat ishlarining umumiy hajmida 89,6 foiz, transportda 56 foiz, savdo va umumiy ovqatlanishda 99,9 foiz.

Vazirlar Mahkamasi majlisida (2007-yil 12-fevral) Prezident Islom Karimov «Yangilanish va barqaror taraqqiyot yoʻlida yanada izchil harakat qilish, xalqimiz uchun farovon turmush sharoiti yaratish — asosiy vazifamizdir» nomli ma'ruzasida xususiylashtirish masalasiga doir oʻz fikrini quyidagicha bayon etgan edi: «Biz xususiylashtirish ishlariga nisbatan munosabatimiz va yondashuvlarimizni ham tubdan oʻzgartirishimiz, iqtisodiyotning kimyo, elektrotexnika sanoati, qishloq xoʻjaligi mashinasozligi, qurilish materiallari sanoati va boshqa yetakchi tarmoqlariga qarashli korxonalarning aksiyalarini kimoshdi savdosiga qoʻyish boʻyicha qat'iy choralar koʻrishimiz zarur».

Prezident Islom Karimov ilgari ham aytgan fikrini yana bir bor ta'kidlab, quyidagi ilmiy g'oyani ilgari surdi: «Biz xususiylashtirishdan keladigan mablag'lar hisobidan budjetga tushumlarni ko'paytirishni o'z oldimizga maqsad qilib qo'yganimiz yo'q. Bu boradagi asosiy masala – xususiylashtiriladigan obyektlarga egalik qilishga da'vogarlarning avvalo obyektlarni modernizatsiya qilish, texnik va texnologik jihatdan qayta jihozlash va jahon bozorida raqobatga bardoshli mahsulot ishlab chiqarish bo'yicha o'z zimmasiga oladigan majburiyatlaridir. Davlat mulki qo'mitasi, Iqtisodiyot va Moliya vazirliklari g'oyat qisqa muddatda amaldagi xususiylashtirish dasturlarini qayta ko'rib chiqishi va bunda aksiyalar paketlari, jumladan, davlatga tegishli nazorat aksiya paketlari bo'lgan, investorlarga taklif etiladigan strategik muhim obyektlar ro'yxatini tubdan kengaytirishni nazarda tutishi kerak».

Oʻz vaqtida belgilangan vazifalar ijro etilishining ta'minlangani Oʻzbekistonda jahon moliyaviy-iqtisodiy inqirozi yengil kechishiga zamin yaratdi.

Bu masala boʻyicha budjetga tushumlarni koʻpaytirishni oʻylayot-ganimiz yoʻqligini, gap bu yerda odamlarning sarmoyasi, mablagʻini mana shu sohaga jalb etish haqida borayotganligi, chunki odamlarda mablagʻ bor, lekin, ayni paytda, ularda agar pulimni sarflaydigan boʻlsam, ertaga ortimdan tushadi, tekshir-tekshir boshlanadi, degan hadik va qoʻrquv ham yoʻq emasligi, tan olish kerakki, bunday qoʻrquv bejiz

emasligi, bizda kim koʻp – tekshiruvchi koʻpligi haqidagi muammolar davlatimiz rahbari tomonidan qayd etilganligini eslash joiz.

Prezident Islom Karimov: «Albatta, jamiyatimizda *oʻta boylar* ham, *oʻta kambagʻallar* ham boʻlmasligi kerak. Lekin, shu bilan birga, kichik biznes va xususiy tadbirkorlik egalariga, ularning oʻz halol mehnati, peshona teri bilan topadigan daromadi va boyligiga yondashishda eski zamondan qolgan illat va asoratlardan butunlay voz kechishimiz zarur. Loʻnda qilib aytganda, **ularga hasad** bilan emas, **havas bilan qarash** jamiyatimizda tobora chuqur qaror topishini xohlardim. Va bunday holatni bugun hayotimizda sodir boʻlayotgan oʻzgarishlarning tabiiy va mantiqiy natijasi tariqasida koʻrishimiz ma'qul deb hisoblayman», – deb ta'kidladi.

Prezident tashabbuskori boʻlgan yana bir hujjat – bu yuqori palataning oxirgi yalpi majlisida ma'qullangan va 2010-yil 23-dekabrda matbuotda e'lon qilingan «Rieltorlik faoliyati toʻgʻrisida»gi qonundir. Ushbu qonun rasmiy e'lon qilingan kundan e'tiboran olti oy oʻtgach kuchga kiradi. «Rieltorlik faoliyati» tushunchasi Oʻzbekiston Respublikasi qonunchiligida yangilik hisoblanadi. Hozirgi vaqtga qadar koʻchmas mulk bozorida vositachilik (rieltorlik) faoliyati masalalari qonuniy tartibga solinmagan edi. Buning oqibatida, har qanday yuridik va jismoniy shaxs professional tayyorgarlikka ega boʻlmasdan va biror-bir ruxsat (litsenziya) olmasdan koʻchmas mulkning oldi-sotdisi va ijarasida vositachilik xizmatlari koʻrsatar edi. Rieltorlarga nisbatan qonuniy talablarning hamda davlat organlari tomonidan ularning faoliyati ustidan nazoratning mavjud emasligi, koʻchmas mulk bilan bogʻliq bitimlar tuzishda, ayniqsa, xufiyona vositachilikda katta tavakkalchilikni keltirib chiqarar, bu esa, koʻpincha turar joy egalarining aldanib qolishiga, firibgarlik va mazkur sohadagi boshqa hiyla-nayranglarga olib kelardi.

Bundan tashqari, fuqarolar vositachilik faoliyati bilan shugʻullanar ekan, soliq toʻlashdan boʻyin tovlagan holda nazorat qilinmaydigan foyda olardilar.

Shu munosabat bilan qabul qilingan qonun Oʻzbekistonda qonuniy rieltorlik faoliyatiga asos soladi, uning rivojlanishini, koʻchmas mulk bozori ishtirokchilari va davlat manfaatlari hisobga olinishini ta'minlaydi, professional rieltorlik faoliyati bilan shugʻullanish uchun kulay sharoit yaratadi.

Qonunga muvofiq, rieltorlik faoliyati yuridik (rieltorlik tashkilotlari) va jismoniy (yakka tartibdagi tadbirkorlar) shaxslarning koʻchmas mulk obyektlariga va ularga boʻlgan huquqlarga doir bitimlar tuzish bilan bogʻliq xizmatlarni shartnoma asosida koʻrsatish boʻyicha tadbirkorlik faoliyati sifatida belgilangan. Ushbu faoliyat bilan shugʻullanish uchun litsenziya

olinishi zarur, rieltor esa vakolatli organ tomonidan beriladigan malaka sertifikatiga ega boʻlishi lozim.

Qonun rieltorlar va rieltorlik tashkilotlari zimmasiga malaka talablarini hamda oʻz fuqarolik javobgarligini sugʻurta qilishni yuklaydi. Shuningdek, amalga oshiriladigan xizmatlarning sifatini ta'minlash mexanizmlari, ishonchli ma'lumotlar olish kafolatlari va ularning mijozlari tomonidan taraflarning huquq va majburiyatlarini, rieltorlik xizmatlari koʻrsatish muddatlarini, koʻrsatilgan xizmatlar uchun haq toʻlash, shartnoma boʻyicha majburiyatlar bajarilmaganda yoki lozim darajada bajarilmaganda mablagʻlarni qaytarish tartibini oʻz ichiga olgan shartnoma tuzish majburiyatlari mustahkamlangan. Bu hujjat koʻchmas mulk bozorining noinsof vositachilariga toʻsiq oʻrnatadi, rieltorlik faoliyatini toʻgʻri tashkil etish, sohada zamonaviy raqobatni rivojlantirish va oxir-oqibatda, fuqarolar, jamiyat, davlatning huquq va qonuniy manfaatlarini toʻliq himoyalashga yordam beradi.

Shu oʻrinda Oʻzbekistonning asl fuqarosiman, degan har qaysi inson kichik biznes, xususiy tadbirkorlik, fermerlik harakatlari jamiyatimizning iqtisodiy barqarorligini ta'minlash hamda yurt tinchligi, Vatan ravnaqi, xalq farovonligi, komil inson kabi milliy mafkuramizning asosiy gʻoyalarini roʻyobga chiqarishda muhim iqtisodiy tayanchga aylanib ulgurgan oʻrta sinf vakillari (xususiy biznes egalari)ning biz intilayotgan fuqarolik jamiyati qurishdagi oʻrni beqiyos ekanligiga toʻxtalish muhimdir.

4. Oʻzbekistonda mulkdorlar sinfining shakllanishi va uning ahamiyati

Prezident Islom Karimovning «Oʻzbekiston XXI asr boʻsagʻasida: xavfsizlikka tahdid, barqarorlik shartlari va taraqqiyot kafolatlari» (1997-yil) asarida mamlakatimizda mulkdorlar sinfining shakllanishi uchun belgilangan vazifalar bugunga kelib Oʻzbekistonda jahon moliyaviyiqtisodiy inqirozining yengil kechishida muhim omil boʻlib xizmat qilmoqda. Oʻz vaqtida qilingan xulosalar quyidagi mazmunda edi. Bular:

1) mamlakatda chinakam oʻrta mulkdorlar sinfi shakllangan taqdirda, islohotlar sezilarli samara beradi, mulkchilik masalalari hal boʻladi.

Iqtisodiy jihatdan sobitqadam va barqaror jamiyatni shakllantirish masalalarini koʻrib chiqar ekanmiz, eng avvalo, tadbirkorlik va umuman mulkdorlar sinfi davlat va jamoat qurilishida, ijtimoiy-siyosiy barqarorlikni saqlab turish va mustahkamlashda qanday rol oʻynashini nazarda tutish lozim.

Ayni oʻrta mulkdorlar sinfi shakllantirilayotgan fuqarolik jamiyatining tayanchidir.

Bu oʻrinda gap, agar mulk shakllari xilma-xilligi va birinchi navbatda xususiy mulk har qanday davlatning demokratik negizlari barqarorligining iqtisodiy asosi hisoblansa, real ishlab chiqarish vositalarining oʻrta mulkdorlaridan iborat kuchli qatlamning mavjud boʻlishi uning siyosiy asosi ekanligi haqida bormoqda. Aholi orasida haqiqiy mulkdorlar oʻrta qatlamining koʻpchilikni tashkil etishi mamlakatda ijtimoiy-iqtisodiy islohotlarni orqaga qaytarish imkoniyatlarini bartaraf etishning kafolati hisoblanadi.

Shu sababli biz iqtisodiy oʻzgarishlar jarayonini respublikada oʻrta mulkdorlarning chinakam sinfini shakllantirishdek dolzarb vazifani hal qilish bilan bogʻlamoqdamiz. Odam oʻzini chinakamiga mulkdor deb his etmas ekan, oʻz huquqlari, pirovard natijalar va ishlab chiqarish samaradorligi uchun mulkdor sifatida kurashmaydi. Jamiyatda barqarorlikni saqlab qolish va himoya qilishga intilmaydi;

2) chinakam mulkdorlar sinfi ham mulkni davlat tasarrufidan chiqarish va xususiylashtirishni izchil amalga oshirish hisobiga, ham kichik va xususiy tadbirkorlikni rivojlantirishni ragʻbatlantirish, qimmatli qogʻozlar bozorini yaratish hisobiga koʻp ukladli iqtisodiyotni vujudga keltirish yoʻli bilan shakllantiriladi.

Strategik jihatdan olganda, biz koʻp ukladli iqtisodiyotni vujudga keltirish vazifasini qoʻymoqdamiz. Bunda ustuvorlik xususiy mulkka beriladi.

Oʻlkamizning oʻziga xosligi, ishchi kuchining haddan tashqari koʻpligi, rivojlangan qishloq xoʻjalik va xom ashyo bazasi, hatto aytish mumkinki, aholining an'analari, ruhiyati kichik va oilaviy biznesni, xususiy tadbirkorlikni faol rivojlantirishni obyektiv zarurat qilib qoʻymoqda.

Kichik biznes – jamiyatda ham iqtisodiy, ham siyosiy vaziyatni moʻtadillashtirishga yordam beradigan oʻrta tadbirkorlar sinfining paydo boʻlishi demakdir. Bu – respublika bozorini zarur iste'mol tovarlari va xizmatlar bilan boyitishdir. Bu – yangi ish oʻrinlaridir. Shuni hamisha nazarda tutish kerakki, faqat kichik va xususiy tadbirkorlikni keng, hamma joyda rivojlantirish hisobiga gʻoyat keskin muammoni – aholining (ayniqsa, ortiqcha mehnat zaxiralari mavjud boʻlgan qishloq joylar va mintaqalarda) ish bilan bandligini ta'minlash vazifasini hal qilishga qodir boʻlamiz.

Xalqning tarixiy ildizlaridan, ruhiyatidan foydalangan holda ichki bozorni zarur iste'mol tovarlari bilan boyitib qolmay, shu bilan birga, tashqi bozorlarda ham raqobatga bardoshli mahsulot chiqarishga qodir kichik korxonalarning keng tarmogʻini vujudga keltirish mumkin.

Aslida yaqin kelajakda kichik va oʻrta biznes respublikaning ishlab chiqarish va eksport tuzilmasida iqtisodiyotning harakatchan, oson oʻzgartiriladigan sohasi sifatida yetakchi oʻrinni egallashiga erishish lozim.

Biz uchun olamshumul ahamiyatga ega boʻlgan ushbu siyosatni roʻyobga chiqarishda aholining shaxsiy yordamchi xoʻjaliklari samaradorligi va mahsuldorligini yanada oshirish, ularga davlat yordamini koʻrsatish muhimdir.

Bunda biz kichik va oʻrta korxonalar ibtidoiy, eskirgan asosda emas, balki sifatli va zamonaviy texnika negizida barpo etilishi kerakligiga asoslanamiz. Buning uchun ularni rivojlantirishning yangi manbalari ham chet el investitsiyalarini keng jalb qilish hisobiga, ham ichki manbalar, bank kreditlari hisobiga doimo kashf etib borilishi darkor.

Oʻzbekistonda mustaqillikning dastlabki yillarida kichik biznesni rivojlantirishga yordam beradigan huquqiy shart-sharoitlar va institutsional tuzilmalar vujudga keltirildi. Bular — Tovar ishlab chiqaruvchilar va tadbirkorlar palatasi, Biznes-fond, «Madad» sugʻurta agentligidir. Shuningdek, konsalting, injiniring hamda lizing firma va kompaniyalar, biznes-inkubatorlar tarmogʻi shakllandi.

Eng asosiysi, kichik va oʻrta korxonalar hozirniig oʻzidayoq amalda boʻy koʻrsatdi. Muhimi — kichik va oʻrta korxonalar iqtisodiyotning hamma sohalarida tashkil etilmoqda.

3) **bozor** tuzilmasi rivojlangan mamlakatlarning tajribasi haqiqiy oʻrta mulkdorlar qatlamining asosiy qismi aholining pul mablagʻlarini qimmatli qogʻozlar bozoriga, odamlar uchun foydali turli bank depozitlariga va omonatlarga jalb etish vositasida shakllanayotganidan dalolat beradi. Binobarin, qimmatli qogʻozlar bozorining ahvoliga qarab bozor munosabatlarining qaror topish jarayoni qay darajada joʻshqin borayotganligi haqida fikr yuritish mumkin.

Qimmatli qogʻozlar bozorini shakllantirish hisobiga aholining boʻsh turgan mablagʻlari aylanishga jalb etiladi. Bu ayni chogʻda iqtisodiyotni barqarorlashtirish sohasidagi muhim vazifani hal qilishga – pul muomalasini, demakki, milliy valutani mustahkamlashga yordam beradi.

Eng asosiysi – aksiyalashtirish, fond bozorida qatnashish orqali aholida qimmatli qogʻozlarning egasi boʻlishga qiziqish, ular bilan muomala qilish koʻnikmalari va madaniyati paydo boʻladi.

Muhimi, ular shunchaki aksiyalarning egasi boʻlganlik uchun emas, balki mol-mulk bir qismining real mulkdorlari hisoblanganlari hamda mulkdorlar sifatida korxonaning ishlab chiqarish va moliyaviy faoliyatiga ta'sir koʻrsatish huquqiga ega boʻlganliklari uchun ham aksiyadorlar deb atalishi darkor. Odamlar qimmatli qogʻozlarni sotib olishga qodir boʻlganlarida mulkdorlar sinfi amalda vujudga keladi.

Yana bir gap. Respublikada qimmatli qogʻozlar bozorini rivojlantirish boʻyicha qoʻyilgan maqsadlarga qimmatli qogʻozlar ikkilamchi bozorini jadal shakllantirgan, bizning bozorimiz xalqaro fond va valuta bozorlariga chiqqan hamda qoʻshilib ketgan taqdirdagina, chinakamiga erishish mumkin.

Yuqoridagi oʻz vaqtida qilingan xulosalar va belgilangan vazifalar ijrosi bugunga kelib mamlakatimizning iqtisodiy negizini mustah-kamlashda amaliy kasb etdi.

Mamlakatimizda koʻp ukladli iqtisodiyot tarkibida davlat, korporativ va xususiy mulkning tengligi, ayni paytda xususiy mulkning ustuvorligi aniq belgilab qoʻyilgani davlatimizning siyosiy va iqtisodiy tizimini, biz barpo etayotgan jamiyatning ma'no-mazmunini aniq va ravshan koʻrsatib beradi.

Biz mulk va mulkdorlar masalasini yechishda umume'tirof etilgan tamoyillar bilan birga, oʻzimizga xos milliy xususiyat va hayot tarzini inobatga olganmiz. Ayni shunday yondashuv va olib borayotgan siyosatimiz mamlakatimizda ijtimoiy-siyosiy barqarorlikni saqlashda, iqtisodiyotimizning ishonchli poydevori va tez sur'atlar bilan oʻsishini ta'minlashda mustahkam omil boʻlib kelmoqda.

Dunyodagi koʻpgina taraqqiy topgan, bugungi kunda barqaror va badavlat yashab kelayotgan davlatlar tajribasi shundan dalolat beradiki, avvalo oʻzining xususiy mulkiga ega boʻlgan shaxs va bunday shaxslardan iborat boʻlgan toifa, bu boylikni yanada koʻpaytirishga, oʻzini va oilasini boqishga, shu bilan birga, davlat va jamiyat zimmasida boʻlgan koʻpgina vazifalarni amalga oshirishda oʻz hissasini qoʻshadi. Va eng muhimi, oʻz yurtida tinchlik va osoyishtalikni saqlash va himoyalashda astoydil jon kuydiradi.

Koʻpchilikni tashkil etgan va bunday maqsadlarni oʻz oldiga qoʻygan toifa – ijtimoiy qatlamlarning oʻrta sinfi deb nom olgani ham bejiz emas, albatta.

Oʻzbekiston tanlagan va bugun amalga oshirayotgan taraqqiyot yoʻlida tobora kuchga kirayotgan ana shu oʻrta sinf, uning xususiyat va alomatlari haqida gap borar ekan, oʻta muhim, hayotimizda izchillik bilan amalga oshirilayotgan bir tamoyilga alohida toʻxtalib oʻtmoqchiman.

Yurtimizning tarixiy-madaniy oʻziga xosligidan, azaliy qadriyatlarimizdan kelib chiqqan va ijtimoiy adolat prinsiplariga rioya qilgan holda, bizda oʻta boylar ham va oʻta kambagʻallar ham boʻlmasligi talab qilinadi.

5. Mamlakatning iqtisodiy salohiyati va milliy boyligi

5.1. Mamlakatning iqtisodiy salohiyati

Mamlakatning iqtisodiy salohiyatiga oid ta'riflardan quyidagilarni keltiramiz:

- a) salohiyat yashirin holda mavjud va zaruriy imkoniyatlar majmui;
 - b) salohiyat qobiliyatlar majmui;
 - c) salohiyat resurslar majmui.

Mazkur ta'riflardan eng ko'p qo'llanadigani «resurslar»ga oiddir.

Ushbu mavzudagi «salohiyat» tushunchasini ta'riflashda biz ana shu yondashuvga asoslanamiz.

Mamlakatning iqtisodiy salohiyati – mamlakatda mavjud resurslarning, mahsulot va xizmatlar ishlab chiqarishning eng koʻp darajada zarur boʻlgan hajmini ta'minlashga qodirligidir.

Iqtisodiy salohiyat tarkibini ta'riflashda (aniqlashda) ikkita metodologik yondashuv taklif etiladi:

- a) milliy iqtisodiyot ega boʻlgan resurslarni baholash;
- b) xoʻjalik oborotiga jalb etilayotgan barcha resurslarni qoʻllash jarayonida ehtimol tutilgan iqtisodiy natijani aniqlash.

Mamlakat iqtisodiy salohiyatining tarkibi quyidagi jihatlarga koʻra tahlil qilinadi:

uning natural-moddiy tarkibi, ya'ni resurslar to'plami, iqtisodiy
salohiyatni aniqlash va dinamikasi tomonidan;
☐ iqtisodiy salohiyatning real holati hamda rivojlanish va qoʻllanish
istiqbollari nuqtai nazaridan, ya'ni bunda gap iqtisodiy salohiyatning
statik va kinetik xususiyatlari haqida boradi;
☐ iqtisodiy salohiyatni boshqarishning tashkiliy shakllari nuqtai
nazaridan, ya'ni uning sohalari (ishlab chiqarish va noishlab chiqarish),
iqtisodiyot tarmoqlari va mintaqalar tomonidan;
□ ham milliy hududda, ham boshqa mamlakatlar hududida joylash-
tirilgan va amal qilayotgan iqtisodiy salohiyat elementlari tomonidan,
ya'ni bu jihat ishlab chiqarish obyektlari va boshqa obyektlarning asosiy
qismi nafaqat davlat hududida, balki xorijiy davlatlar hududida ham
joylashgan holatni inobatga oladi. Bu vaziyat odatda omilli (faktorli)
daromadlarni aniqlashda hisobga olinadi;

alohida tashkiliy-huquqiy shakllarining mamlakatda xoʻjalik yuritishning yakuniy natijalariga qoʻshadigan hissasi nuqtai nazaridan, ya'ni bunda

mamlakat qonunchiligida nazarda tutilgan xoʻjalik yuritishning

gap mulkning davlat, xususiy, aralash, xorijiy va boshqa shakllarini shakllantirish va foydalanishdagi hissasi haqida boradi. Ushbu mulk shakllariga xoʻjalik yuritishning tashkiliy-huquqiy shakllari (AJ, har xil shirkatlar, uyushmalar, xoldinglar va h.k.) kiradi.

Iqtisodiyotning milliyligi uni boshqalar uchun yopiqligini bildirmaydi, aksincha, u ochiq boʻladi, tashqi dunyo bilan oʻzaro manfaatli aloqaga kirishadi. Biroq milliy iqtisodiyot asosan oʻz resurslariga tayanadi. Milliy iqtisodiyot ochiqligi xavfsizlik choralarini koʻrishni taqozo etadi. Makroiqtisodiyot milliy iqtisodiyot boʻlar ekan, bu iqtisodiyotning yaxlitligini bildiradi.

Iqtisodiy salohiyatning hajmi, tuzilishi va dinamikasiga ta'sir koʻrsatuvchi omillar qatorida quyidagilarni ajratish mumkin:

\square ma	vjud iqtisodi	y resurslar	hajmi ha	mda ulardan	foydalanish
imkoniyati;					
\Box ma	mlakat erishg	an hamda id	qtisodiyot t	texnik bazasiı	ning sifati va
unumdorlig	ini ifodalay	digan fan-t	exnika ta	raqqiyotining	rivojlanish
darajasi;					
\Box ma	mlakat funda	mental va a	maliy tadq	iqotlar sohasi	da toʻplagan
salohiyat, r	namlakat me	hnat resurs	larining si	fatini ifodalo	vchi xodim-

larning kasbiy-malakaviy darajasi.

Mazkur omillarning iqtisodiy salohiyat tarkibidagi kompleks aloqadorligi salohiyatlarning mehnat, tabiiy-resursli, ilmiy-texnikaviy, ishlab chiqarish va boshqalardan iborat butun boshli tizimi shakllanishiga olib keladi. Ulardan har biri rivojlanishning oʻziga xos tamoyil va qonuniyatlariga ega.

Iqtisodiy salohiyatning quyidagi turlari ajratiladi:

1. Tabiiy-resursli salohiyat (tabiiy tizimlarning oʻziga zarar yetkazmagan holda odamlarning ushbu tipdagi xoʻjalik doirasida mahsulotga boʻlgan ehtiyojlari qondirilishini ta'minlash qobiliyati). Tabiiy resurslar milliy boylikning asosiy qismini tashkil qiladi.

Tabiiy resurslarning quyidagi turlari ajratiladi.

ashyo (qurilish toshlari, qum-shagʻal material va boshqalar).

rabity tesursianning quyidagi turtari ajratnadi.
Mineral resurslar:
□ yonilgʻi-energetika resurslari (neft, gaz, koʻmir va boshqalar);
□ metallsimon foydali qazilmalar (temir, mis, qoʻrgʻoshin, aluminiy,
qalay va boshqalar);
□ metall boʻlmagan foydali qazilmalar (tuz, shpat, kaliy tuzlari,
asbest, grafit va boshqalar);
□ tabiiy qurilish materiallari va ishlab chiqarish uchun yaroqli xom

Tuproq resurslari:
□ qishloq xoʻjalik ekinlari (haydaladigan, ozuqa beruvchi ekinlar,
chorva mollari boqiladigan yaylovlar va boshqalar).
Oʻsimlik resurslari:
□ o'rmon o'simlik resurslari (chinor, yong'oq, bodom, terak,
qaragʻay, archa, tol va boshqalar);
□ pichanzorlar va yaylovlardagi oʻsimlik resurslari (yaylovlar,
ekilgan oʻtzorlar, baland togʻ va adir yaylovlari hamda boshqalar);
□ dorivor oʻsimliklar (na'matak, dala qirqboʻgʻini, ittikanak, qumda
o'suvchi bo'znoch, marvaridgul va boshqalar);
□ texnik oʻsimliklar resurslari (yalpiz, shuvoq (ermon), boʻyi-
modaron va boshqalar);
Hayvonot dunyosi resurslari:
□ yovvoyi hayvonlar (ayiq, boʻri, tulki, moʻynali hayvonlar, saygʻoq
va boshqalar);
□ parrandalar (karqur, kaklik, gʻoz, oʻrdak, bedana va boshqalar);
□ ovlanadigan baliq (mintay, treska, sazan, marinka, kilka, ilonbaliq
va boshqalar).
Suv resurslari:
☐ yer yuzidagi suv maydonlari (koʻllar, botqoqliklar, muzliklar);
□ yer osti va sizot suv omborlari.
Resurslarning boshqa turlari:
□ iqlimiy;
□ gidroenergetika zaxiralari.
Destruire and having the Waring 2007 of Consultation

Davlatimiz rahbari Islom Karimovning 2007-yil 6-noyabrda Tadbirkorlar va ishbilarmonlar harakati — Oʻzbekiston Liberal-demokratik partiyasining IV qurultoyidagi ma'ruzasida: «Biz Oʻzbekistonning beqiyos salohiyati, uning yer osti va yer usti boyliklari bilan haqli ravishda faxrlanamiz va ularni yurtimizning taraqqiyoti, xalqimizning farovonligi uchun yanada koʻproq xizmat qildirish harakatidamiz», — degan fikrlarini Vatan taraqqiyoti yoʻlida mavjud resurslardan oqilona foydalanishga da'vat sifatida anglash lozimki, resurslarga xoʻjasizlarcha munosabat jamiyatning iqtisodiy negizlariga putur yetkazadi.

5.2. Ishlab chiqarish salohiyati va asosiy fondlar

Xalq xoʻjaligining ishlab chiqarish salohiyati tabiiy va mehnat resurslari, asosiy kapital va ilmiy-texnikaviy taraqqiyotning oʻzaro ta'siri jarayonida shakllanadi.

Asosiy fondlar – toʻplangan binolar, inshootlar, mashinalar, asbobushunalar, transport vositalari hamda koʻp yil foydalaniladigan boshqa ishlab chiqarish obyektlarining qiymatdagi koʻrsatkichidir. Asosiy fondlarning muayyan vaqtdagi real bahosini olish uchun ular boʻyicha inventarizatsion qayta baholash oʻtkaziladi. Asosiy fondlar milliy boylikning eng oʻzgaruvchan tarkibiy qismi, ishlab chiqarish salohiyatining moddiy-texnikaviy asosi hisoblanadi. Asosiy fondlarga nomoddiy aktivlar (foydali qazilmalarni izlab topish xarajatlari, dasturiy ta'minot, texnologiyalar va boshqalar) ham kiradi.

5.3. Ilmiy-texnikaviy salohiyat

Ilmiy-texnikaviy salohiyat kadrlar, moddiy-texnikaviy, axborot va tashkiliy resurslar majmuidir. Ilmiy yutuqlar — ijtimoiy va iqtisodiy taraqqiyotning hal qiluvchi omili. 1990-yillardan boshlab jahonning yetakchi mamlakatlarida fanning ilmiy tuzilishi qayta tashkil qilina boshlandi: texnikaviy yoʻnalishlar: biologiya, genetika, tibbiyot, biofizi-kaning ulushi koʻpayib bordi. Ilmiy-texnikaviy taraqqiyotning asosiy xususiyatini fan va innovatsion faoliyatning moliyalashtirilishi tashkil etmoqda. Ilmiy texnikaviy salohiyatning eng muhim omilini fan kadrlari, xususan tadqiqotchilar tashkil qiladi. Fanning moddiy-texnikaviy bazasi (binolar, inshootlar, tajriba-eksperiment uskunalari, oʻquv dala markazlari va h.k.) bilan ta'minlanganligi katta ahamiyatga ega. Ilmiy-texnikaviy salohiyat mehnat unumdorligining ortishini, mamlakatning iqtisodiy oʻsishi va iqtisodiy xavfsizligini belgilab beradi.

5.4. Mehnat salohiyati

Mehnat salohiyati – jamiyatning imkoniyatdagi mehnat qobiliyati, jamiyat muayyan vaqt mobaynida ega boʻlgan mehnat resurslarining koʻlamidir.

Mehnat salohiyati miqdor va sifat tomonlariga ega.

Mehnat salohiyatining miqdor tomoni quyidagi koʻrsatkichlar orqali ifodalanadi:

- □ mehnat qobiliyatiga ega boʻlgan aholining umumiy soni;
- ☐ mehnatga qobiliyatli aholi mehnatining shakllangan intensivligi darajasi sharoitida ishlaydigan ish vaqtining miqdori.

Ushbu koʻrsatkichlarning olinishi jamiyatning muayyan davrdagi vaqt mobaynida ega boʻlgan mehnat salohiyatining miqdor xususiyatini beradi.

Mehnat salohiyatining sifat tomoni quyidagilarda ifodalanadi:
□ mehnat qobiliyatiga ega aholining sogʻliq va jismoniy layoqat
darajasi;
☐ mehnat qobiliyatiga ega aholi ma'lumoti va malaka tayyorgar-
ligining sifati.
Binobarin, mehnat salohiyatining sifat tomoni mehnat qobiliyatiga
ega aholining jismoniy va aqliy rivojlanishi majmui bilan ifodalanadi, bu
esa, oʻz navbatida, uning mehnat faolligi darajasini belgilab beradi.
Mehnat salohiyatining miqdor koʻrsatkichlari uning ekstensiv
oʻsishini koʻrsatsa, sifat koʻrsatkichlari – intensiv oʻsishidan dalolat
beradi.
Mehnat salohiyatini shakllantirish va undan foydalanishning maqbul
jarayonlariga jamiyatning mehnat resurslarini boshqarishni maqbullash-
tirish orqali erishish mumkin.
Mehnat salohiyati insonga sarflangan investitsiyalarga bogʻliq boʻlib,
bu investitsiyalar jamiyatda inson kapitali yaratilishi, jamlanishi va
ishlatilishiga olib keladi. Bu esa ishlab chiqarish va daromadning
koʻpayishini ta'minlaydi. Mehnat salohiyatining rivojlanishi quyidagi
demografik jarayonlar bilan bogʻliq:
□ aholining mutlaq soni;
□ katta va kichik yoshdagi shaxslarning ulushi;
□ aholining kasallanish darajasi;
□ demografik yuk (nagruzka) koeffitsiyenti (bolalar va qariyalar
umumiy sonining mehnatga layoqatli yoshdagi odamlar soniga nisbati).

Mamlakat iqtisodiy salohiyatini baholashning universal indikatori (koʻrsatkichi) – yalpi ichki mahsulot (YAIM). U nafaqat milliy iqtisodiyot rivojlanishining hozirgi darajasini, balki uning tarmoq va hududiy tuzilishiga xos xususiyatni, uning ayrim sohalari, tarmoqlari va mintaqalari faoliyatining samaradorligini, jahon integratsiya jarayonlariga jalb etilish darajasini va shu kabilarni ifodalaydi.

Yalpi ichki mahsulot – statistikaning umumlashtiruvchi iqtisodiy koʻrsatkichi boʻlib, bir yil ichida mamlakatda ishlab chiqarilgan pirovard mahsulot (tovarlar va xizmatlar)ning bozor narxlaridagi jami qiymatini ifodalaydi. Ayni vaqtda ushbu mamlakatga ham, boshqa mamlakatlarga ham xos boʻlgan ishlab chiqarish omillaridan foydalangan holda hisoblanadi.

YAIM xuddi YAMM (yalpi milliy mahsulot) singari uchta usul bilan hisoblanadi:

□ daromadlar (omilli (faktorli) daromadlarning barcha turlari – ish haqi, mukofotlar, foydalar, renta daromadlari, foizlar yigʻindisi) hamda daromad hisoblanmaydigan ikki tarkibiy qism – amortizatsiya, shuningdek biznesdan olinadigan sof bilvosita soliqlar, ya'ni soliqlardan subsidiyalarning olingani qoʻshiladi. Bunga davlat qarzi boʻyicha foizlar toʻlanishi kirmaydi;

□ xarajatlar boʻyicha (barcha iqtisodiy subyektlar – uy xoʻjaliklari, firmalar, davlatlar, xorijiy sektorning xarajatlari jamlanadi);

qoʻshimcha qiymat boʻyicha (oxirgi mahsulotni ishlab chiqarishning har bir bosqichida qoʻshilgan qiymat jamlanadi). Bu usul turli firma va tarmoqlarning YAIM (YAMM) ishlab chiqarishga qoʻshgan ulushini aniqlashga imkon beradi. Qoʻshimcha qiymatning summasi oxirgi tovar va xizmatlar qiymatiga teng boʻladi.

Joriy bozor narxlarida hisoblangan YAIM (YAMM) nominal, doimiy narxlarda hisoblangani esa – real YAIM (YAMM) deb ataladi.

Nominal YAIM (YAMM) butun mahsulotning jismoniy hajmi oʻsishi evaziga ham, narx darajasining oʻsishi hisobidan ham koʻpayishi mumkin. Real YAIM (YAMM)ga narxlar darajasi ta'sir etmaydi. Shu bois real YAIM (YAMM) tovar va xizmatlar jismoniy hajmining asosiy koʻrsatkichi hisoblanadi.

Æî đèé éèëí èí ā í àđōëàđèí èí ā èí äåêñè=
$$\frac{\text{Æî đèé éèëí èí ā í àđōëàđè}}{\text{Åñî ñ ³èëèá î ëèí āàí éèë í àđōëàđè}}$$
Õ100%

Narxlar indeksi muayyan davr mobaynida keng doiradagi tovarlar narxining oʻrtacha darajasidagi oʻzgarishni ifodalaydi.

Nominal va real YAIM (YAMM) oʻrtasidagi oʻzaro aloqa quyidagi formula bilan ifodalanadi:

$$\begin{array}{ll} \text{BÈ} \hat{l} & \text{(B)} & \hat{l} & \text{)} & \text{äåôeÿòî ðè} = \frac{\hat{l} \hat{l} \hat{l} \hat{e} \hat{l} \hat{a} \hat{e} \hat{B} \hat{E} \hat{l} & \text{(B)} & \hat{l} & \text{)} \\ & & & & & & & \\ & & & & & & \\ & & & & & & \\ & & & & & & \\ & & & & & & \\ & & & & & \\ & & & & & \\ & & & & & \\ & & & & \\ & & & & & \\ & & & & \\ & & & & \\ & & & & \\ & & & \\ & & & \\ & & & \\ & & & \\ & & & \\ & & \\ & & \\ & & \\ & & \\ & & \\ & & \\ & & \\ & & \\ & & \\ & \\ & & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ & \\ &$$

YAIM (YAIM) deflyatori – nominal va real YAIM (YAMM) oʻrtasidagi farqni ifodalaydi, inflatsiya darajasini aniqlashda foydalaniladi.

Iqtisodiy salohiyat hajmi, tuzilishi va dinamikasiga ta'sir etuvchi
omillar ichida quyidagilarni ajratish mumkin:
□ iqtisodiyot resurslarining hajmi va ulardan foydalanish mum-
kinligi;
□ ilmiy texnikaviy taraqqiyot rivojlanishining mamlakat erishgan
darajasi, u iqtisodiyot texnik bazasining sifati va unumdorligini belgilab
beradi;
☐ mamlakat fundamental va amaliy tadqiqotlar sohasida toʻplagan
salohiyat, mamlakat mehnat resurslarining sifatini ifodalovchi
xodimlarning kasbiy-malakaviy darajasi.
Iqtisodiy salohiyat tarkibida mazkur omillarning kompleks oʻzaro
ta'siri salohiyatlarning butun boshli tizimi shakllanishiga olib keladi:
mehnat salohiyati, tabiiy-resursli salohiyat, ilmiy-texnikaviy salohiyat,
ishlab chiqarish salohiyati va h.k. Ularning har biri oʻziga xos rivojlanish
tamoyillari (tendensiyalari) va qonuniyatlariga ega.
Iqtisodiy salohiyatning eng muhim elementi – milliy boylik.
5.5. Milliy boylik (MB)
<i>Milliy boylik</i> – mamlakat iqtisodiy qudratining eng muhim koʻrinishlaridan biri boʻlib, jamiyat oʻzining butun ishlab chiqarish
faoliyati davrida toʻplagan iste'mol qiymatining majmuini (muayyan
sanaga) pul koʻrinishida ifodalaydi.
Milliy boylik jamiyat moddiy va madaniy rivojlanishining asosi,
kengaytirilgan takror ishlab chiqarishning shart-sharoiti va natijasi, xalq
hayotining darajasi va sifatini oshirishning zaruriy shartidir.
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi:
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: ijtimoiy (mehnat bilan yaratilgan) boylik;
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: □ ijtimoiy (mehnat bilan yaratilgan) boylik; □ tabiiy (mehnat bilan ishlab chiqarib boʻlmaydigan) boylik −
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: □ ijtimoiy (mehnat bilan yaratilgan) boylik; □ tabiiy (mehnat bilan ishlab chiqarib boʻlmaydigan) boylik − ijtimoiy ishlab chiqarishga jalb etilmagan resurslar (yer, suv, oʻrmonlar,
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: □ ijtimoiy (mehnat bilan yaratilgan) boylik; □ tabiiy (mehnat bilan ishlab chiqarib boʻlmaydigan) boylik − ijtimoiy ishlab chiqarishga jalb etilmagan resurslar (yer, suv, oʻrmonlar, foydali qazilmalar).
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: ijtimoiy (mehnat bilan yaratilgan) boylik; tabiiy (mehnat bilan ishlab chiqarib boʻlmaydigan) boylik – ijtimoiy ishlab chiqarishga jalb etilmagan resurslar (yer, suv, oʻrmonlar, foydali qazilmalar). Ijtimoiy boylik ham muayyan ahamiyatga ega.
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: ijtimoiy (mehnat bilan yaratilgan) boylik; tabiiy (mehnat bilan ishlab chiqarib boʻlmaydigan) boylik – ijtimoiy ishlab chiqarishga jalb etilmagan resurslar (yer, suv, oʻrmonlar, foydali qazilmalar). Ijtimoiy boylik ham muayyan ahamiyatga ega. Milliy boylik murakkab iqtisodiy tuzilishga ega boʻlib, uning
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: □ ijtimoiy (mehnat bilan yaratilgan) boylik; □ tabiiy (mehnat bilan ishlab chiqarib boʻlmaydigan) boylik − ijtimoiy ishlab chiqarishga jalb etilmagan resurslar (yer, suv, oʻrmonlar, foydali qazilmalar). Ijtimoiy boylik ham muayyan ahamiyatga ega. Milliy boylik murakkab iqtisodiy tuzilishga ega boʻlib, uning tarkibida quyidagi elementlar ajratiladi:
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: □ ijtimoiy (mehnat bilan yaratilgan) boylik; □ tabiiy (mehnat bilan ishlab chiqarib boʻlmaydigan) boylik − ijtimoiy ishlab chiqarishga jalb etilmagan resurslar (yer, suv, oʻrmonlar, foydali qazilmalar). Ijtimoiy boylik ham muayyan ahamiyatga ega. Milliy boylik murakkab iqtisodiy tuzilishga ega boʻlib, uning tarkibida quyidagi elementlar ajratiladi: □ asosiy fondlar (ishlab chiqarish va noishlab chiqarish fondlari);
hayotining darajasi va sifatini oshirishning zaruriy shartidir. Milliy boylik quyidagi ikki asosiy tarkibiy qismni qamrab oladi: □ ijtimoiy (mehnat bilan yaratilgan) boylik; □ tabiiy (mehnat bilan ishlab chiqarib boʻlmaydigan) boylik − ijtimoiy ishlab chiqarishga jalb etilmagan resurslar (yer, suv, oʻrmonlar, foydali qazilmalar). Ijtimoiy boylik ham muayyan ahamiyatga ega. Milliy boylik murakkab iqtisodiy tuzilishga ega boʻlib, uning tarkibida quyidagi elementlar ajratiladi:

□ xalq xoʻjaligining tovar zaxiralari;
□ davlat zaxiralari, jumladan sugʻurta, mudofaa ahamiyatiga ega
boʻlgan, shuningdek, oltin va xorijiy valuta zaxiralari;
□ aholining uy xoʻjaligida uzoq vaqt foydalaniladigan narsalar
(individual transport vositalari, mebel, madaniy-maishiy va xoʻjalikda
ishlatilayotgan narsalar, zargarlik buyumlari, kitob jamg'armalari va
boshqalar);
☐ iqtisodiy muomalaga jalb etilgan tabiiy resurslar (oʻzlashtirilgan
yerlar, oʻrmonlar, suvlar, yer osti konlaridagi boyliklar va h.k.).
Keng ma'noda, milliy boylikka jamiyatning ilmiy, ma'rifiy,
malakaviy va madaniy salohiyati kiradi. Noashyoviy (nomoddiy) boylik
tarkibida millatning sogʻligʻi darajasi alohida oʻrin tutadi.
Milliy boylik dinamikasiga ijtimoiy takror ishlab chiqarishning
samaradorligi xosdir. Shu bois milliy boylik muammosi iqtisodchilar
tadqiqotlarining mavzui boʻlgani bejiz emas. Ilk bor milliy boylik ingliz
iqtisodchisi U. Petti tomonidan 1664-yilda hisoblab topilgan. Milliy
boylik ilk bor Fransiyada 1789-yilda, AQShda 1805-yilda, Rossiyada
1864-yilda hisoblangan.
Muayyan mamlakat valutasida hisoblangan milliy boylik odatda
qandaydir umumiy valutada, masalan, AQSh dollarida qayta hisoblanadi
va mamlakat aholisining jon boshiga nisbatan aniqlanadi. Bu koʻrsatkich
ayrim mamlakatlar iqtisodiy qudratlarini va ularning moddiy farovonlik
darajasini qiyosiy tahlil qilish uchun asos boʻladi.
Milliy boylik tarkibini ifodalashda bir qator iqtisodiy katego-
riyalardan foydalaniladi. Ularning ayrimlariga toʻxtalamiz: Nomoliyaviy ishlab chiqarish aktivlari — ishlab chiqarish jarayoni
natijasida yaratilgan aktivlar. Bu aktivlar quyidagilarni oʻz ichiga oladi:
□ tovar ishlab chiqaruvchi va xizmat koʻrsatuvchi tarmoqlarning
asosiy fondlari;
□ moddiy muomala vositalarining zaxiralari;
□ qimmatliklar (boyliklar).
Asosiy fondlar (asosiy vositalar, asosiy kapital) – bu doimiy ishlab
Asosiy Johalai (asosiy vosilalai, asosiy kapilal) – oa aomiy ismao

chiqarish kapitalining ishlab chiqarish jarayonida butunlay ishtirok etuvchi, ammo oʻz qiymatini tayyor mahsulotga qism-qism qilib moddiy va ma'naviy eskirish jarayonida oʻtkazib boradigan qismi.

Asosiy fondlarga avanslashgan kapitalning bino, inshootlar qurish,

Asosiy fondlarga avanslashgan kapitalning bino, inshootlar qurish, mashina, uskunalar, asboblar xarid qilishga sarflangan qismi kiradi. Tovar sotilganidan keyin asosiy kapital qism-qism boʻlib pul shaklida tadbirkorga qaytib keladi.

Asosiy fondlar tarkibiga, shuningdek *nomoddiy ishlab chiqarish aktivlari* – inson mehnati bilan yaratilgan, biror axborot tashuvchida keltirilgan va barcha uchun foydalanish mumkin boʻlmagan axborot koʻrinishidagi obyektlar. Ushbu aktivlar qiymatiga foydali qazilmalarni izlab topish, dasturiy ta'minot ishlab chiqish, adabiyot va san'atning orginal asarlarini yaratish kabilarga sarflangan xarajatlar kiradi.

Moddiy muomala vositalari – milliy boylikning muhim tarkibiy qismi, uning doimiy ravishda yangilanib (tiklanib) boradigan elementi. Ular tarkibiga ishlab chiqarish zaxiralari (xom ashyo, materiallar, yonilgʻi, ehtiyot qismlar, uskunalar, xoʻjalik tovarlari, urugʻlar, ekish materiallari va yem-xashak, boquvdagi hayvonlar, yosh chorva mollar va boshqalar), tugallanmagan ishlab chiqarish, tayyor mahsulot hamda qayta sotish uchun moʻljallangan tovarlar va moddiy zaxiralar kiradi.

Qimmatliklar (boyliklar) – uzoq muddat foydalanishga moʻljallangan, vaqt oʻtishi bilan eskirmaydigan, odatda iste'mol uchun yoki ishlab chiqarishda foydalanilmaydigan hamda asosan qiymatni zamonda saqlab qolish vositasi sifatida sotib olinadigan qimmatbaho tovarlar boʻlib, ularning qiymati narxlarning umumiy darajasiga nisbatan kamaymasligi kerak. Boyliklar qimmatbaho (nodir) metallar va toshlar, san'at asarlari kabilardan tashkil topadi. Boyliklarning eng muhim xususiyati shundaki, vaqt oʻtishi bilan koʻplab obyektiv va subyektiv omillar oqibatida boyliklarning tuzilishi oʻzgaradi.

Moliyaviy boʻlmagan va ishlab chiqarishga aloqador boʻlmagan aktivlar — milliy boylikning tarkibiy qismlaridan biri. Unga iqtisodiy salohiyatning nafaqat hajmi va tuzilishini, balki dinamikasini ham belgilovchi ikki tarkibiy qism kiradi:

- a) moddiy noishlab chiqarish aktivlari;
- b) nomoddiy noishlab chiqarish aktivlari (patentlar, savdo markalari, nou-xau va boshqalar).

Moddiy noishlab chiqarish aktivlari — tabiiy kelib chiqqan aktivlar (tabiiy aktivlar — yer, kon resurslari, boshqa tabiiy aktivlar), ya'ni mulkchilik huquqi belgilangan yoki belgilanishi mumkin bo'lgan ishlab chiqarish jarayonlarining natijalari bo'lmagan aktivlar.

Ushbu aktivlarga tabiiy aktivlar kirmaydi, ayrim mulkchilik huquqlari belgilanmagan yoki belgilanishi mumkin emas (masalan, ochiq dengiz yoki osmondagi makon).

Nomoddiy ishlab chiqarilgan aktivlar — bular oʻz egalariga faoliyatning muayyan turlari bilan shugʻullanish yoki muayyan turdagi tovarlar ishlab chiqarish va xizmatlar koʻrsatishga alohida huquq beruvchi aktivlar. Bunda boshqa institutsional birliklar (yuridik va jismoniy

shaxslar) tegishli aktivlar egalarining maxsus ruxsatisiz bunga huquqli boʻlmaydilar. Bu aktivlarga patentlashtirish obyektlari (litsenziya, nouxau va boshqalar), ijara haqidagi shartnomalar va foydalanish uchun berish huquqini beruvchi boshqa kontraktlar, shuningdek sotib olingan gudvill (ishbilarmonlik aloqalari va obroʻyi qiymatining shartli bahosi) kiradi.

Ularni hisobga olish metodikasi hali oxirigacha ishlab chiqarilmaganligi sababli bizning statistika milliy boylikning ushbu qismi boʻyicha ma'lumotlarga ega emas.

Moliyaviy aktivlar (passivlar) – ular tarkibiga quyidagilar kiradi:

 □ monetar oltin va oʻzlashtirishga oid maxsus huquq (SPZ);
 □ valuta va depozitlar;
 □ qimmatbaho qogʻozlar (aksiyalardan tashqari);
 □ aksiyalar hamda aksionerlik kapitalida ishtirok etishning boshqa turlari;
 □ kredit va zayomlar (qarzlar);
 □ sugʻurtaga oid texnik zaxiralar;
 □ boshqa debitorlik va kreditorlik qarzlari;
 □ bevosita xorijiy investitsiyalar (ma'lumotnomaga oid).

Moliyaviy aktivlar va passivlar (majburiyatlar), agar tashkil qilingan moliyaviy bozorlarda oldi-sotdi obyekti boʻlsa, joriy qiymati boʻyicha baholanadi. Bunda bahoga xizmatlar koʻrsatganlik uchun toʻlovlar, yigʻimlar, komission toʻlovlar hamda bitimlar tuzish chogʻida xizmat koʻrsatish uchun toʻlanadigan boshqa oʻxshash toʻlovlar kiritilmaydi.

Tayanch tushunchalar:

Mulk, davlat mulki, jamoa mulki, xususiy mulk, aralash mulk, mulkchilikning obyekti, subyekti, mulkiy demokratiya, mulkiy plyuralizm, Oʻzbekiston Respublikasi Konstitutsiyasining 53-moddasi.

Savol va topshiriqlar:

- 1. Nima uchun jamiyatning iqtisodiy asosini mulkchilikning turli shakllari tashkil etadi?
- 2. Mulkchilikning turli shakllariga oʻtishning zarurligi nimalarda koʻrinadi?
- 3. Oʻzbekiston Respublikasining Konstitutsiyasida turli mulk shakllari teng huquqliligining e'tirofini izohlang.

- 4. Bozor tizimi xilma-xil mulkchilikka asoslanadi, ammo xususiy mulkchilik ustuvorligining sababini tushuntiring.
 - 5. Mulkiy munosabat qanday manfaatlarni yuzaga keltiradi?
 - 6. Inson manfaati va mulkdor manfaatining farqi qanday?
- 7. Hozirgi bosqichda xususiylashtirish ommaviy tus olganining sabablarini tushuntirib bering.
 - 8. Mulkni saqlashning qanday usullari qulay?

Mavzuni chuqur o'rganish instrumentariysi

Mulkchilik – kishilar oʻrtasida ishlab chiqarish vositalari va mehnat mahsulini oʻzlashtirish yuzasidan paydo boʻlgan va tarixan aniq bir shaklda namoyon boʻluvchi iqtisodiy munosabatlar.

Mulkning institutsional tizimi — mulkning barcha tarkibiy darajalarida amal qiladigan va takror ishlab chiqariladigan institutlarning oʻzaro bogʻliq birligi.

Mulk huquqining spetsifikatsiyasi – ayrim «vakolatlar»ning ushbu «vakolatlar»ning ularni yuqori baholaydigan va ulardan foydalanish orqali koʻproq foyda ola biladigan xoʻjalik yurituvchi subyektlar sotib olishlari uchun qulay sharoit yaratish maqsadida bir yoki bir necha iqtisodiy subyektlarga biriktirilishi.

Mulkning demokratik (fuqarolik) tizimi – mulkning barcha shakl va turlari xilma-xilligi va tengligi tizimi.

Oʻzlashtirishning kapitalga yoʻnaltirilgan usuli — ashyo va pul kapitalidan shaxsiy manfaatlar yoʻlida foydalanish oqibatida foizdagi daromadlarni oʻzlashtirish.

Mulkni tadqiq etishning ilmiy paradigmasi – tegishli asosiy tadqiqot prinsiplari va metodlari tizimi.

Mulkning birinchi tarkibiy darajasi – ne'matlarni tom ma'nodagi mulkning tabiiy asosi bo'lgan ijodiy mehnat bilan o'zlashtirish.

Mulkning ikkinchi tarkibiy darajasi — xoʻjalik yurituvchi agentlar oʻrtasida ne'matlarni oʻzlashtirish subyektni aniqlash borasida yuzaga keladigan raqobatli munosabatlar tizimini ifodalovchi ijtimoiy-iqtisodiy munosabatlar.

Mulkning uchinchi tarkibiy darajasi – oʻzlashtirish sohasidagi ijtimoiy munosabatlar shakli boʻlib, tegishli rasmiy, avvalo yuridik normalar va norasmiy cheklovlarning oʻzaro bogʻliq birligida namoyon boʻladi.

Oʻzlashtiruvchi faoliyat – xoʻjalik subyektlarini oʻzlashtirishning turli shakl va usullari doirasida ne'matlarga egalik qilish borasidagi faoliyati.

Oʻzlashtirish – u yoki bu ne'matni oʻzlashtirishning muayyan shakli doirasida uni oʻzlashtirishning muayyan usuli.

Rentaga yoʻnaltirilgan xatti-harakat — iqtisodiy agentlarning renta daromadlari olish borasidagi maqsadli faoliyati.

Oʻzlashtirishning rentaga yoʻnaltirilgan usuli – turli shakllardagi (tabiiy, monopol, ma'muriy) renta daromadlarini oʻzlashtirish.

Mulk – xoʻjalik yurituvchi subyektlar oʻrtasida ne'matlarni oʻzlashtirish borasida yuzaga keladigan ijtimoiy munosabat shakli yoki institutsionallashgan raqobatli munosabatlar.

Oʻzlashtirishning ijtimoiylashgan usuli — davlatning jamiyat a'zolarini muayyan ne'matlar bilan ta'minlash borasidagi qayta taqsimlash faoliyati natijasida yuzaga keladigan daromadlarini oʻzlashtirish.

Mulkning iqtisodiy shakli – ne'matni yaratishning ijodiy mehnat jarayonini bevosita tashkil qilish va boshqarish shakli.

Mulkning endogen (ichki) tizimi – uning uchta tarkibiy darajasining oʻzaro bogʻliq va rivojlanuvchi birligi.

Ichki (endogen) ishlab chiqarish — shaxsning oʻz insoniy kapitalini yaratish borasidagi ijodiy mehnat faoliyati; shaxsning uni rivojlantirishga yoʻnaltirilgan investitsiyalarni «oʻzlashtirish borasidagi» faoliyati.

Mulk muammosiga takror ishlab chiqarish nuqtai nazaridan yondashish – ijodiy mehnat usuli bilan oʻzlashtirilgan mahsulotning yaratilish bosqichidan tortib ushbu ne'matning tabiiy mulkdori muayyan daromad olgunicha davom etadigan harakatini tadqiq etish.

Fuqaroviy yoki sivilitar mulk – fuqarolik jamiyati, huquqiy davlat va erkin bozorning asosini tashkil qiluvchi shaxsiy, xususiy va ijtimoiy mulklar tizimi.

Mulkning rivojlanishi qonuni – yuzaga kelgan mulk shakli ertamikechmi modifikatsiyalanishini belgilovchi zarurat.

Mulkning shakllanishi va rivojlanishi qonuni — ayni vaqtning oʻzida mulkning tabiiy ravishda yuzaga kelgan shakl va turlarining «rasmiylashuvi»ni, shuningdek ularning obyektiv ravishda oʻzgarishi va modifikatsiyasini ifodalovchi ichki aloqalarni aks ettiruvchi qonun. Mulkning shakllanishi va rivojlanishi qonunining mohiyati muayyan ne'matlarni oʻzlashtirish sohasida yuzaga keladigan munosabatlarning ijtimoiy shakllari ular yaratuvchi oʻzlashtirilishining mavjud tabiiy-huquqiy shakl va usullariga muvofiqligining obyektiv zarurligidadir.

Mulkning shakllanish qonuni – ne'matni yaratishning har qanday ijodiy mehnat jarayoni ertami-kechmi munosabatlarning muayyan ijtimoiy shakli bilan yakunlanadigan zarurat.

Intellektual mulk – faoliyatning barcha daraja va sohalaridagi xoʻjalik yurituvchi subyektlar oʻrtasida intellektual boyliklarning oʻzlashtirilishi va keyinchalik mansubligini ta'minlash borasida yuzaga keladigan munosabatlarning ijtimoiy shakli.

Shaxsiy mulk – shaxs hamda xoʻjalik munosabatlarining boshqa subyektlari oʻrtasida shaxsiy ne'matlarni oʻzlashtirish borasida yuzaga keladigan munosabatlarning ijtimoiy shakli.

Jamoat mulki – davlat siymosida namoyon boʻladigan jamiyat hamda boshqa xoʻjalik yurituvchi subyektlar oʻrtasida insonning jamiyat a'zosi sifatida ijtimoiy ne'matlarni oʻzlashtirishi borasida yuzaga keladigan munosabatlarning institutsionallashgan tizimi.

Nominal mulkdorlar sinfi – jamiyatning inson, ashyolarga va tabiiy kapitalga boʻlgan mulkdorlik yuridik huquqiga ega boʻlgan, ayni vaqtda iqtisodiy hokimiyatga ega boʻlmagan ijtimoiy guruhlari.

Real mulkdorlar sinfi – rasmiy institutlar ishlab chiqarish hamda shu bilan ishlab chiqariladigan mahsulotni taqsimlash va qayta taqsimlashda faol ishtirok etish imkoniyatiga ega boʻlgan ijtimoiy guruhlar.

Fandorlik – mahsulot birligiga toʻgʻri keladigan fanga xarajatlar kattaligi; kapital samarasi – muayyan vaqt mobaynida yaratuvchi kapitalning qoʻshimcha birliklaridan foydalanish natijasida olingan mahsulot; materiallar hajmi – mahsulot birligini tayyorlash uchun zarur boʻlgan barcha turdagi materiallar sarfi.

Inson kapitalining haqiqiy mulkdori – yaratiladigan, jumladan muayyan shaxs tomonidan yaratiladigan barcha hayotiy ne'matlar majmuini taqsimlash va qayta taqsimlash chogʻida yuzaga keladigan manfaatlarni kelishishga amalda ta'sir eta oladigan shaxs.

Inson kapitaliga boʻlgan mulkchilik tizimi — mazkur kapitalning subyekt-obyekt tuzilishining barcha elementlari, shuningdek uning iqtisodiy amalga oshuvi va rivojlanishini belgilovchi shart-sharoitlar va omillarning oʻzaro bogʻliq va rivojlanib boruvchi birligi.

Inson kapitaliga boʻlgan mulk – shaxs bilan boshqa xoʻjalik yurituvchi agentlar oʻrtasida mazkur shaxsning dolzarblashgan bilimlar, koʻnikmalar, oʻquv va qobiliyatlarni oʻzlashtirish va keyinchalik ularning mansubligi borasida yuzaga keladigan munosabatlarning ijtimoiy shakli.

Inson kapitaliga boʻlgan mulkning ijtimoiy shakli — bir tomondan, shaxsning u yoki bu ijtimoiy uyushmada ixtiyoriy ishtiroki bilan shaxsiy tusga ega boʻladigan mulk shakli; boshqa tomondan, bu shaxsiylashuv muayyan ijtimoiy uyushmaning ushbu shaxs va oʻxshash iqtisodiy manfaatlarga ega boʻlgan boshqa shaxslar manfaatlarini ifodalashga tayyorligi va qodirligida moddiylashadi.

Mulkning yuridik huquqi spetsifikatsiyasi – mazkur huquqning tegishli yuridik vakolatlarga (egalik, foydalanish, tasarruf etish, javobgarlik kabilarga) boʻlinishi.

Xususiy mulk – xususiy ne'matlarni oʻzlashtirish borasida xoʻjalik munosabatlari subyektlari oʻrtasida yuzaga keladigan munosabatlarning ijtimoiy shakli.

Mulkning ekzogen (tashqi) tizimi – hozirgi zamon iqtisodiyotida mulkning barcha shakllari va turlarining oʻzaro bogʻliq va rivojlanib borayotgan birligi.

Inson kapitaliga boʻlgan mulkning iqtisodiy shakli — mulkning tabiiy tarzda shaxsiy tus oladigan shakli: inson kapitalining iqtisodiy mulkdori adolatli ravishda ushbu ne'matni amalda ichki ishlab chiqarish jarayonida yaratadigan shaxsdir.

Oʻrta sinf – jamiyatning oʻz tasarrufidagi mulk obyektlari asosida kengaytirilgan individual takror ishlab chiqarishni amalga oshiradigan qismi.

Protoo'rta sinf – jamiyatning o'rta sinfiga yaqinlashadigan, uning tarkibiga kirishga urinadigan, ammo hozircha tashqaridan, avvalo davlat tomonidan bo'ladigan yordamsiz individual kengaytirilgan takror ishlab chiqarishni amalga oshira olmaydigan ijtimoiy qatlami.

Mavzu yuzasidan asosiy xulosalar:

- 1. Mustaqillik yillari mulkchilik masalasini hal qilish bozorni vujudga keltirishga qaratilgan butun tadbirlar tizimining tamal toshi boʻlib xizmat qildi.
- 2. Amalga oshirilayotgan demokratik islohotlarning barcha bosqichlarida eng muhim dolzarb vazifa sifatida mulkiy munosabatlarni tubdan oʻzgartirishga e'tibor qaratildi. Uning tub mohiyati mulkni haqiqiy egalari qoʻliga berishni tezlashtirish, kichik biznes va tadbirkorlik uchun keng imkoniyatlar berish va mulkdorda yangi mulk egasi hissiyotini tarbiyalashdan iborat boʻldi.
- 3. Konstitutsiyaviy tarzda bozor munosabatlarini rivojlantirishga qaratilgan Oʻzbekiston iqtisodiyotining negizini xilma-xil shakldagi, teng huquqli, daxlsiz, davlat himoyasidagi mulk tashkil etishi va bunda ustuvorlik xususiy mulkka berilishi qayd etildi. Mamlakatimizda bozor iqtisodiyotining butun dunyoda qabul qilingan tamoyillarga oʻtish, va strategik taraqqiyotimizning eng muhim ustuvor yoʻnalishi sifatida xususiy mulkning daxlsizligini mustahkamlashga yuksak e'tibor qaratildi.
- 4. Milliy qonunchiligimizda xususiy mulk va mulkdorlarning himoya qilish kafolatlarini belgilovchi bir qator huquqiy hujjatlar amal qilmoqdaki, ularga koʻra, xususiy mulk huquqi shaxsning qonun hujjatlariga muvofiq qoʻlga kiritgan mol-mulkka egalik qilish, undan foydalanish va uni tasarruf etish huquqidir.
- 5. Xulosa oʻrnida qayd etish kerakki, mulkdorlarning davlat organlari bilan oʻzaro munosabatlarda huquqlarining ustuvorligi prinsiplari amal qiladi.

Unga muvofiq, qonun hujjatlaridagi xususiy mulk huquqini amalga oshirish bilan bogʻliq holda yuzaga keladigan, bartaraf etib boʻlmaydigan barcha ziddiyatlar va noaniqliklar mulkdorning foydasiga hal etiladi.

6. Oʻzbekistonda kichik biznes va xususiy tadbirkorlikning tez va jadal rivojlanishini ta'minlash, shu asosida bugungi kunda jamiyatning eng muhim va hal qiluvchi qatlami, ijtimoiy siyosiy barqarorlik hamda xavfsizlik kafolati, mamlakatni isloh etish va modernizatsiya qilish, shuningdek, ijtimoiy-siyosiy barqarorlikni ta'minlaydigan oʻrta sinf — ya'ni mulkdorlar sinfini shakllantirish deb qaralmoqda. Oʻtkazilgan soʻrovlardan ma'lum boʻlishicha, 2013-yil 1-yanvarigacha mamlakatimiz aholisining 50 foiziga yaqini oʻzini oʻrta sinfga mansub deb biladi, 2000-yilda bu koʻrsatkich atigi 24 foizni tashkil etgan.

5-MAVZU. BOZOR IQTISODIYOTI VA UNING QONUN-QOIDALARI

1. Bozor iqtisodiyoti va uning tub belgilari

Hozirgi zamon iqtisodiyoti bozor iqtisodiyotidir. Bu iqtisodiyot Yer yuzidagi koʻpgina mamlakatlarda har xil darajada va oʻziga xos xususiyatlar bilan rivojlanib bormoqda. Uning mohiyatli belgilarini eng rivojlangan mamlakatlar iqtisodiyotida koʻrish mumkin.

Davlatimiz rahbari Islom Karimov «Prezidentdan to oddiy fuqarogacha, yoshi va vazifasidan qat'i nazar — hammani bugungi zamon talablariga, bozor iqtisodiyoti qonun-qoidalariga oʻrgatish, malakasini oshirish kerak»ligini mustaqillikning dastlabki yillaridayoq birinchi galdagi vazifa sifatida belgilagan.

Bozor asosida tovar-pul munosabatlari yotadi. Tovar-pul munosabatlari tovar ishlab chiqarish, tovarlarni ayirboshlash va pul muomalasiga xos munosabatlarning yaxlitligidir. Tovar ishlab chiqarishga oid munosabatlar tovarni yaratishda moddiy va jonli mehnat sarf etilishi, bu sarf-xarajatlar jamiyat uchun zaruriy darajada boʻlishi, tovarning sifati va narxining muvofiqligi. ta'minlanishi, individual mehnat sarflari zaruriy sarfga keltirilishi, tovarlar qiymati mehnat unumdorligiga teskari proporsional tarzda oʻzgarishi kabi aloqalarni bildiradi. Tovar ishlab chiqaruvchilar mustaqil ravishda, bozorga qarab tovarlarni yaratadilar, bozor talabi qondirilganda daromad topadilar. Yaratilgan tovarlarni ayirboshlash sohasidagi munosabatlar sotuvchi va xaridor oʻrtasidagi erkin oldi-sotdi munosabatlaridir. Turli tovar ishlab chiqaruvchilar bozorda ayni

bir vaqtda ham sotuvchi, ham xaridor vazifasini oʻtashadi. Bozor aloqalari kerakli tovarlar zaruriy miqdorda va kelishilgan narxda ayirboshlanishini bildiradi. Tovarlar bevosita emas, balki pul vositasida ayirboshlanadi. Pul muhim iqtisodiy vazifalarni bajaradi, uning nufuzi yuqori boʻladi. Tovarpul munosabatlari umuminsoniy hodisa, ular turli tizimlarga xos, ularni bir-biriga bogʻlab turadi. Ammo bu munosabatlar yuksak darajada rivoj topganda bozor iqtisodiyotiga aylanishi nazariyotchilar tomonidan tan olingan.


Iqtisodiyotning nimani, qancha va kim uchun ishlab chiqarish zarur, degan azaliy muammosi bozorda aniqlanadi. Shu sababli bozor tizimi qonunqoidalarini oʻrganishni bozordan boshlaymiz va eng avval bozorning oʻzi nimaligini aniqlaymiz, soʻngra uning turlarini koʻrib chiqamiz.

Ishlab chiqarishda yaratilgan turli-tuman mahsulotlar va koʻrsatiladigan xizmatlar iste'molchilarga toʻgʻridan-toʻgʻri emas, balki bozor orqali yetib boradi. Bozor ishlab chiqarishni iste'mol bilan bogʻlaydi, chunki hech bir narsa tekinga berilmaydi, uni bozorda pulga sotib olish talab qilinadi.

Bozor – bu xaridorlar bilan sotuvchilar oʻrtasidagi iqtisodiy aloqalar, ularni bir-biriga bogʻlaydigan mexanizmdir.

Bozorga tovar egasi uni sotish uchun, xaridor esa uni olish uchun chiqadi. Sotuvchilar – bu tovar ishlab chiqaruvchi firmalar, fermer xoʻjaliklari, yakka tarzda ishlab chiqaruvchi kishilardir. Xaridorlar esa jamiki iste'molchilar, ya'ni xonadonlar, resurslarni olib ishlatuvchi firmalar, davlat idoralari va yakka tartibda ishlab chiqaruvchilar boʻladi. Agar aholi bozordan iste'mol buyumlari va xizmatlarni sotib olsa, firmalar va yakka tartibda ishlovchilar asbob-uskuna, mashinalar, yoqilgʻi, elektr energiya, xom ashyo va ish kuchini sotib oladilar. Bozorda tovarlarni pul vositasida ayirboshlash, ya'ni oldi-sotdi munosabatlari paydo boʻladi. Bir tovar pulga ayirboshlansa, shu pulga qaytadan boshqa tovar sotib olinadi. Tovar pulga ayirboshlanganda (T-P boʻlganda) sotish operatsiyasi, pul tovarga ayirboshlanganda (P-T) xarid etish operatsiyasi yuz beradi.

Demak, bozor munosabatlarida ham tovarlar, ham pul ishlatiladi (1-rasm). Shuning uchun buni tovar-pul munosabati deb aytiladi.



1-rasm. Tovar ayirboshlash.

Ishlab chiqarishda yaratilgan mahsulot va xizmatlar bozorda tovar shakliga kiradi. Shuning uchun ham tovar deganda, bozorda sotish uchun chiqarilgan narsalar tushuniladi.


Hammaning ishi bozorda bitadi, chunki u yerdan pulga barcha kerakli iste'mol buyumlari va resurslarni topsa boʻladi. «Hamma narsaning otasi ham bozor, onasi ham bozor» degan gapning ma'nosi mana shunda. Hamma ishning bozorda bitishi uning afzalligi bor degani. Xoʻsh, bu afzallik nimada? Bu bozor aloqalarining iqtisodiy jihatdan qulay boʻlishida, albatta. Gap shundaki, hamma narsani oʻzi ishlab chiqargandan koʻra, bir xil mahsulotni chiqarib, boshqasini sotib olish nafli boʻladi. Tovar yaratuvchining mehnati ixtisoslashgan boʻladi, ya'ni ishlab chiqaruvchilar faqat u yoki bu tovarni ishlab chiqarish bilan mashgʻul boʻladilar, natijada kasblarning turi koʻpayib boradi. Masalan, XXI asrga kelib yer yuzida 20 mingdan ziyod kasblar paydo boʻldiki, ular bilan mashgʻul kishilar 60 trillion dollardan ziyod (2010-y.) mahsulot va xizmatlarni yaratdilar, bular gʻoyat xilma-xil tovarlar boʻlib, ularni ishlab chiqaruvchilar bozor orqali bir-biriga yetkazib beradilar.

Hozirgi dunyoda, ayniqsa, Gʻarb mamlakatlarida iqtisodiyot haqida gap ketganda, faqat bozor iqtisodiyoti anglanadi. Hozirgi zamon nazariyalarida bozor iqtisodiyoti deganda iqtisodiy xatti-harakatlarning erkin, mustaqil ravishda yuz berishi va ularning bozor mexanizmi orqali bir-biriga bogʻlanib muvofiqlashuvi tushuniladi. Bozor iqtisodiyoti gʻoyat koʻp qirrali va murakkab iqtisodiyotdir. Uning mohiyatini anglash uchun unga xos tub belgilarni yaxlitlikda olib qarash kerak. Bu belgilar shakllanib ulgurgan, aralash iqtisodiyotga aylangan bozor iqtisodi sharoitida vujudga keladi, hozirgi eng rivojlangan mamlakatlarda aniq koʻrinadi.

Bozor iqtisodiyoti erkin tovar-pul munosabatlariga asoslangan, iqtisodiy monopolizmni inkor etuvchi, ijtimoiy moʻljalga, aholini ijtimoiy muhofaza qilish yoʻnalishiga ega boʻlgan va boshqarilib (tartiblanib) turuvchi iqtisodiyotdir. Oʻziga xos mulkiy munosabatlari, ijtimoiy yoʻnalishlari va tartiblanib turish usullari jihatidan bu tizim kapitalistik iqtisodiyotdan va tarixda mavjud boʻlgan sotsialistik iqtisodiyotdan farq qiladi.

Bozor iqtisodiyotining quyidagi subyektlari mavjud:

iqtisodiy mustaqil mulk egasi yoxud iste'molchi boʻlgan ayrim kishilar yoki guruhlar. Bularga odatda yollanib ishlovchilar, yer egalari, kapital sohiblari, ishlab chiqarish vositasi egalari kiradi. Ular tadbirkorlik qilmay, oʻz mulkidan daromad topadi yoki yollanib ishlaydi;



davlat, aniqrogʻi, davlatning barcha mahkama-idora tashkilotlari. Ular ham ishlab chiqarish, ham iste'mol bilan shugʻullanadilar, bozor va unda qatnashuvchilar faoliyati ustidan nazorat qiladilar.

Bozor iqtisodiyoti ishtirokchilari oʻzaro aloqaga kirishadilar. Ish kuchi, yer, kapital va boshqa vosita egalari ularni korxona, firmalarga sotadi. Ular oʻz navbatida ishlab chiqarish omillaridan foydalanib, tovar va xizmatlar yaratadilar, ularni taklif etadilar.

Bozor iqtisodiyotining eng muhim belgisi - iqtisodiy plyuralizm hisoblanadi, ya'ni mulk shakllari va xo'jalik yuritish usullarining turlituman bo'lishidir. Turli shakllardagi mulklar erkin, yonma-yon, hech bir chegaralanmagan holda rivojlanadi. Turli mulklar muvozanatda bo'lib, ayrim mulk shaklining hukmronligiga yoʻl berilmaydi. Xoʻjalik yuritish usullari ham har xil boʻladi. Yakka tartibda, jamoa-uyushmaga birikkan holda, sherikchilik-paychilik yoxud aksionerlik asosida, o'z mablag'iga yoki qarzga olingan mablagʻga tayanib xoʻjalik yuritish, yer va boshqa vositalarni ijaraga olish va ishlatish kabilar birgalikda boradi. Bozor iqtisodiyotiga xos yangi huquqiy tizimning o'zagini – O'zbekiston Respublikasining Konstitutsiyasi tashkil etadi. Shu bois ham, Oʻzbekiston Respublikasi Konstitutsiyasining 53-moddasida: «Bozor munosabatlarini rivojlantirishga qaratilgan O'zbekiston iqtisodiyotining negizini xilma-xil shakllardagi mulk tashkil etadi. Davlat iste'molchilarning huquqi ustunligini hisobga olib, iqtisodiy faoliyat, tadbirkorlik va mehnat qilish erkinligini, barcha mulk shakllarining teng huquqliligini va huquqiy jihatdan bab-baravar muhofaza etilishini kafolatlaydi. Xususiy mulk boshqa mulk shakllari kabi daxlsiz va davlat himoyasidadir. Mulkdor faqat qonunda nazarda tutilgan hollarda va tartibdagina mulkidan mahrum etilishi mumkin», – deyilgan.

Bozor iqtisodiyoti *erkin iqtisodiyot*. Iqtisodiy faoliyat erkinligining asosi ishlab chiqarish omillari yoki yaratilgan tovarlarning mulk obyekti boʻlishi, mulkdorlarning esa mustaqillikka ega boʻlishidir. Ishlab chiqaruvchi yoki iste'molchi oʻz tovarini yoki pulini oʻzi bilganicha ishlatadi, bunga u haqli. Har bir korxona, tashkilot, kichik biznes bilan shugʻullanuvchilar, fermerlar, ayrim fuqarolar oʻz ixtiyoriga koʻra, oʻziga ma'qul boʻlgan ish bilan shugʻullanadi. Xoʻjalik yurituvchilar faoliyati bir-biridan alohida boʻladi, chunki ular, *birinchidan*, mulk egalari, *ikkinchidan*, mehnat taqsimoti asosida ixtisoslashib, har xil ish bilan

shugʻullanadilar. Bozor iqtisodiyotini tashkil etuvchi tadbirkorlar koʻpchilikdan iborat boʻlib, tarqoq holda foyda-zararni oʻz zimmasiga olib ish yuritadilar. Ammo ularning faoliyati qanchalik tarqoq boʻlmasin, baribir bozor orqali bir-biriga bogʻlanadi. Bozor iqtisodiyoti erkin boʻlganidan, u har qanday iqtisodiy monopolizmni inkor etadi.

Iqtisodiy monopolizm – korxona, tashkilot yoxud davlatning umuman iqtisodiyotda yoki uning biror sohasida tanho hukmronlik qilishi. Iqtisodiyotdagi monopolizm ishlab chiqarishning oʻzida, savdo-sotiqda, yoki iste'mol doirasida tizimida mavjud Iqtisodiyotdagi monopolizmning tayanchi muayyan mulk shaklining tanho hukmronligidir. Bunday mavqe esa siyosiy hokimiyat va gʻoyaviy sohadagi monopolizmni yuzaga chiqaradi. Iqtisodiy taraqqiyotga yoʻl ochish uchun iqtisodiyotdagi monopolizmni tugatish zarur, chunki mopopoliya o'z tabiatiga ko'ra ishlab chiqarishda turg'unlik paydo qiladi, hukmron mavqega tayanib, sarflarni kamaytirmay, foyda koʻrishi mumkin, raqobatning yoʻqligi yoki zaifligidan foydalanib, bozorda oʻz izmini o'tkazishi mumkin. Monopoliya turg'unlikni yuzaga chiqaradi, tashabbusni chegaralaydi. Shu sababli bozor iqtisodiyoti u bilan chiqisha olmaydi. Mana shu jihatdan bozor iqtisodiyoti antimonopol yoʻnalishga ega. Shu bois, davlat raqobatlashish muhitining vujudga kelishi va uni saqlashda muhim rol oʻynaydi. Oʻzbekistonda davlat tomonidan iqtisodiy monopolizmni cheklash, umuman antimonopol yo'l tutishga mustaqillikning dastlabki yillaridan e'tibor qaratildi. Chunki busiz raqobatlashish vaziyati paydo bo'lmaydi. Shuni nazarda tutib, O'zbekistonda «Monopolistik faoliyatni cheklash toʻgʻrisida»gi qonun qabul qilindi. Bu qonunga koʻra:

□ bozorda sun'iy taqchillik hosil etish;
 □ narxlarni monopollashtirish;
 □ raqobatlarning bozorga kirib borishiga to'sqinlik qilish;
 □ raqobatning g'irrom usullarini qo'llash man etiladi.

Biroq mazkur qonun moliyaviy xizmatlar bozorlaridagi raqobatni tartibga solish masalalarini oʻz ichiga olmagan. Bu esa oʻz navbatida, mazkur sohada raqobatga qarshi harakatlarga yoʻl qoʻymaslik yuzasidan poralarni amalga oshirishga imon bermoqda. 2012-yil 6-yanvarda qabul qilingan Oʻzbekiston Respublikasining «Raqobat toʻgʻrisida»gi qonunida tovar va moliya bozorlarida raqobat sohadagi munosabatlarni tartibga soladi.

Bozor iqtisodiyoti sharoitida oʻzaro munosabatlar manfaatlarni koʻzlagan holda oʻrnatiladi. Ish yuzasidan boʻlgan munosabatlar (sheriklik) erkin shakllanadi. Turli ishlab chiqaruvchilar bir-biri bilan manfaatli aloqa oʻrnatadilar. Bozorda esa xaridor bilan sotuvchi bir-birini erkin tanlaydi. Bozor iqtisodiyotida tovar taqchilligi boʻlmaydi, shu sababdan bozorda ishlab chiqaruvchi emas, balki iste'molchi (xaridor) oʻz izmini oʻtkazadi, tovar va xizmatlarni sifatiga va narxiga qarab tanlab olish imkoniga ega boʻladi. 2008-yilning avgustida boshlangan jahon moliyaviy-iqtisodiy inqirozi talabning pasayishiga olib keldi. Dunyo mamlakatlarida talabni oshirish borasida chora-tadbirlar ishlab chiqildi. Oʻzbekistonda ishlab chiqilgan inqirozga qarshi dasturlar mamlakatning iqtisodiy, ijtimoiy, moliyaviy xavfsizligini ta'minlashda dasturilamal boʻlib xizmat qilmoqda.

Bozor iqtisodiyotining yana bir belgisi — *narxlarning liberallashuvi*, ya'ni narx-navoning erkin tashkil topishidir. Tovarlar narxini davlat yuqoridan belgilamaydi, narx ayrim ishlab chiqaruvchi yoki iste'molchi tazyiqi ostida shakllanmaydi. Narx bozordagi talab va taklifga qarab, xaridor bilan sotuvchining savdolashuviga binoan yuzaga keladi. Bozor munosabatiga kelishilgan narxlar xizmat qiladi. Narx pul bilan oʻlchanadi. Bozor iqtisodiyoti pulsiz boʻlishi mumkin emas. Pul iqtisodiy munosabatlarning asosiy vositasi, iqtisodiyotda oʻta muhim rol oʻynaydi. Pul munosabatlari bozor iqtisodiyotining ajralmas qismi hisoblanadi. Pul oboroti, pul emissiyasi, qadr-qiymati, inflatsiya, valuta kursi kabi hodisalar iqtisodiy vaziyatning koʻzgusi hisoblanadi.

Bozor iqtisodiyotida, uning iqtisodiy mexanizmida raqobat asosiy oʻrin tutadi. Raqobat iqtisodiy munosabatlar ishtirokchilarining xususiy, oʻzgalarnikidan alohidalashgan manfaatini bildiradi, lekin bu manfaat yoʻlida kurash qoidalariga rioya qilish shart hisoblanadi. Manfaatlarni yuzaga chiqarishning birdan-bir yoʻli talabgir, ya'ni jamiyat uchun zarur tovarlarni ishlab chiqarishdir. Raqobat moddiy va mehnat resurslarini kam sarflagan holda ularni samarali ishlatish koʻplab va sifatli tovarlar ishlab chiqarishga undaydi. Shu jihatdan raqobat bozor iqtisodiyotini harakatga soluvchi vositadir. Ragobat igtisodiyotni tartiblovchi va nazorat giluvchi kuch hisoblanadi. Raqobatlashuvchi kuchlar muvozanatda bo'lib, ulardan ham monopol mavqega ega bo'lmaydi. Erkin raqobat cheklanmagan iqtisodiy erkinlikni, xohlagan usulda kurashni, hatto monopoliya hosil etgan holda o'z bilganicha ish yuritishni bildirmaydi, chunki raqobatni davlat tartiblab turadi. Tartiblanmagan raqobat iqtisodiy erkinlikka kafolat bera olmaydi, iqtisodiyotni monopollashtirishga intilishni jilovlab tura olmaydi, chunki u oʻzbilarmonlik boʻladi. Shakllangan bozor iqtisodiyotida antimonopol kuchlar yuzaga kelib, ular

xolis raqobatga yoʻl bergan holda monopollashtirish yoʻlini toʻsadi. Bozor iqtisodiyotining hamma subyektlari uchun bir xil imkoniyat yaratiladi, lekin ulardan foydalana olish ishbilarmonlikka bogʻliq boʻladi. Iqtisodiy sharoit shunday boʻladiki, har bir subyekt uchun raqobat qilish sharti bu ijtimoiy foydali faoliyat bilan shugʻullanish boʻladi. Subyektlar bozorga chiqqan ehtiyoj qondirilganda, zarar koʻrmaslikni foyda olib ishlaganda, boshqalarga tobe boʻlmaslikni bilgan holda raqobatga kirisha oladilar. Ijtimoiy foydali ish bilan shugʻullanish raqobatga yengilmaslik sharti hisoblanadi.

Zamonaviy bozor iqtisodiyotida, birinchidan, manfaatlar toʻqnashib raqobat yuz bersa, ikkinchidan, subyektlar o'z faoliyatini, binobarin, manfaatlarini ham muvofiqlashtirishga intiladilar. Aks holda, ularning ishi yurishmaydi. Subyektlarning ajralishi va yaqinlashib o'z xattiharakatlarini moslashtirishi bu iqtisodiyotning ikki ziddiy tomonidir. Raqobat iqtisodiy subyektlarning ajralishi bo'lsa, integratsiya ularni birlashtiradi. Integrasiyaning zarurligi ham doim raqobat qilavermay, murosaga kelish, shu yoʻsinda manfaatlarni moslashtirishni talab qiladi. Gap shundaki, ishlab chiqarishdagi oʻzaro bogʻliqlik kuchayishi bilan integratsiyalashmay turib yaxshi foyda koʻrish qiyinlashadi. Mana shu oʻzaro bogʻliqlik ayrim iqtisodiy subyektlarga mopopol mavqe bermaydi. integratsiya va erkin raqobat monopollashuvga Binobarin, Zamonaviy bozor iqtisodiyotida subyektlarning oʻzaro qoʻymaydi. aloqalari tasodifiy emas, balki ular muntazam boʻlib, barqarorligi bilan ajralib turadi. Bu aloqalar negizida yotgan narsa ishlab chiqarishning chuqur ixtisoslashuvi, korxonalar va tarmoqlarning bir-biriga integratsiya orqali bogʻlanib qolishidir. Shu tufayli mijozlar oʻrtasida tijorat aloqalari bozorda bir marta yuz beradigan oldi-sotdi bilan tugallanmay uzoq davom etadi. Bu aloqalarni yuzaga chiqaruvchi muhim omil iqtisodiy subyektlar o'rtasidagi ishonch hisoblanadi, bu halol raqobat sharoitidagina bo'lishi mumkin. Bozor iqtisodiyotida raqobatga xos bo'lmagan munosabatlar ham kelib chiqadi. Masalan, marketing (ishlab chiqarishni bozor bilan bog'lash) orqali ishlab chiqarish bilan iste'mol bog'lanadi. Bunda sotuvchi bilan xaridor raqobati oʻrniga oʻzaro ma'qul aloqa oʻrnatiladi. Xaridorga kerakli tovar yetkazib beriladi, narx esa sotuvchi uchun qulay bo'ladi. Bu yerda **manfaatlarning uyg'unlashuvi** yuzaga chiqadi. Ishchilarning oʻzaro ish oʻrni, xoʻjayinlarni ishchilar bilan ishga yollashni qulayligi uchun kurashi oʻrniga ish topib berish, yaxshi ish bilan ta'minlash munosabati paydo bo'ladi. Masalan, firma ishchiga yangi kasbni olishga moddiy koʻmaklashadi, toki u ishsiz qolganda, yangi ishga

joylasha olsin. Davlat iqtisodiy subyektlar munosabatiga aralashib, uni tartiblaydi. U qonun yo'li bilan monopoliyani cheklaydi, raqobatning halol borishini ta'minlaydigan qoidalarni joriy etadi. Individual mulk hadeb kurashavermay, aksioner jamiyatga (sherikchilik sohiblari shirkatiga) birlashadilarki, natijada ularning manfaati umumiy bo'lib qoladi. Bozor iqtisodining subyekti boʻlgan ishchilar ham aksiya sotib olib, mulkning sherigi – egasiga aylanadilar. Foyda koʻrish borasida ularning manfaati kapital egalari manfaati bilan yaqinlashadi. Demak, bozor iqtisodiyotida raqobatdan boshqacha, hamkorlik munosabatlari ham iqtisodiyoti oʻzining regulatorlariga maviud. Bozor regulatorlari – bozordagi oʻzgarishni ishlab chiqarishga yetkazib, uning bozorga moslashuvini ta'minlovchi vositalardir. Albatta, ular ma'muriy emas, balki iqtisodiydir. Ulardan eng muhimi bozor narxidir. Narx oshib, tovarlar jadal sotilsa, foyda koʻpayadi, ular koʻproq ishlab chiqariladi. Tovarlar narxi pasayib, ular yaxshi oʻtmasa, ishlab chiqarishni qisqartirish yoki undan tamomila voz kechish kerak bo'ladi.

Bozor munosabatlarining har bir subyekti, bu korxonami, davlatmi, ayrim kishimi – buning ahamiyati yoʻq, oʻz manfaatini koʻzlab faoliyat koʻrsatadi. Ammo, koʻr-koʻrona xohlagan ishini qila olmaydi. U bozor bilan hisoblashishga majbur, aks holda ishi yurishmaydi, daromad topmaydi, xonavayron bo'ladi. Ishlab chiqaruvchiga ham, iste'molchiga ham nima qilish kerakligini bozordagi narx koʻrsatadi. Hozirgi bozor iqtisodiyoti ijtimoiy yoʻnalishga ega, lekin bu uning oʻz tabiatidan kelib chiqmaydi, balki uning aralash iqtisodiyot tarzida rivojlanishi natijasidir. Xilma-xil mulkchilik, mehnatkashlarning mulk egasiga aylanishi, ishlab chiqarishning to'kinchilikni ta'minlay olishi kabi yangi hodisalar aralash iqtisodiyotga xoski, ular ijtimoiy kafolatlarni yuzaga chiqaradi. Bozor iqtisodiyotining oʻziga xos ijtimoiy adolat qoidalari bor. Iqtisodiyotdagi resurslar miqdori, ularning samarasiga qarab ishlab chiqilgan tovarlar va xizmatlarni taqsimlash va shunga mos ravishda daromadga ega boʻlib, yuqori farovonlik darajasiga chiqish adolat hisoblanadi. Ammo, adolat prinsipi hammani bir qilish emas, balki jamiyatning tabaqalashuvini bildiradi. Iqtisodiy subyektlar mehnatiga, ishbilarmonligiga va mulkiga qarab bir-biridan farqlanadi, shu sababli ularning daromadi, turmush darajasi va jamiyatdagi mavqei bir xil boʻlmaydi. Tabaqalanish, boylarga havas qilib, shunday bo'lishga intilishni hosil qiladi, bu esa yaxshi ishlashga undaydi. Bozor iqtisodiyoti shunday iqtisodiy munosabatlarki, ular ishlab chiqarish faoliyatini ragʻbatlantiruvchi kuchni yuzaga chiqaradi. Bozor regulatorlari moddiy, mehnat va moliya resurslarini

kerakli tovarlar va xizmatlarni ishlab chiqarish tomon buradi. U behuda mehnat sarfini hech qachon tan olmaydi, aksincha, unga yoʻl qoʻyganlarni iqtisodiy jihatdan jazolaydi, ya'ni ular zarar koʻradi.

Bozor iqtisodiyoti moslashuvchan iqtisodiy tizimdir. U sharoit oʻzgarishlariga darhol javob beradi, nima yetishmasa, shuni darhol ishlab chiqarishni ta'minlaydi. Uning muhim belgilaridan yana biri novatsiyaga moyillikdir. U fan-texnika yangiliklarini darhol qabul qiladi, yangi tovarlarni, yangi texnologiyani va ishlab chiqarishni boshqarish usullarini joriy etishni ta'minlaydi, chunki bu raqobatda yutqazmaslik, yaxshi foyda koʻrish, obroʻ-e'tibor orttirish sharti boʻlib xizmat qiladi. Bozor iqtisodiyoti tovarlar va xizmatlar toʻkinchiligini yuzaga keltiradi, koʻpchilik tovarlardan eng yaxshisini tanlab olgan holda, ehtiyojni qondirish imkonini beradi.

Ammo bozor iqtisodiyotini hamma dardga davo deb, uni haddan tashqari olqishlash unga xolisona baho berishdan yiroq. Uning oʻziga xos muammolari, nobop, zaif tomonlari ham yoʻq emas, albatta. Bozor iqtisodiyoti millionlardan iborat ishlab chiqaruvchi va iste'molchilarning faoliyati boʻlganidan, unga tarqoqlik va xudbinlik (egoizm) ham xos. U oʻz-oʻzidan davlat va jamoatchilik ishtirokisiz tabiatni muhofaza etish, ekologik muvozanatni ta'minlashni yuzaga chiqarmaydi. Jamiyat uchun zarur boʻlgan, lekin xarajatlar qaytimi sekin boʻladigan, katta mablagʻ talab qiladigan inshootlar va binolarning qurilishini ragʻbatlantirmaydi. Darhol foyda keltirmaydigan, lekin ilm-ma'rifat kelajagi uchun muhim boʻlgan nazariy izlanishlarni ham ragʻbatlantirmaydi. Bozor iqtisodiyoti ham sakrab-sakrab siklli ravishda rivojlanadi, iqtisodiy yuksalishlar bilan birga inqiroz va tanglik ham paydo boʻladi.

Prezident Islom Karimov «Jahon moliyaviy-iqtisodiy inqirozi, Oʻzbekiston sharoitida uni bartaraf etishning yoʻllari va choralari»ga bagʻishlangan xalqaro ilmiy-amaliy anjuman ishtirokchilariga yoʻllagan tabrigida Oʻzbekistonning iqtisodiy rivojlanish tajribasi va hozirgi jahon moliyaviy-iqtisodiy inqirozi sharoitida barqarorlikka erishayotgani haqida toʻxtalib, dunyoviy taraqqiyotda muhim ahamiyatga ega boʻlgan quyidagi xulosa va qoidalarni alohida ta'kidlagan: «bozor (talab va taklif) hamma narsani hal qiladi, degan tamoyildan kelib chiqqan holda, bozor munosabatlariga sajda qilaverish mumkin emas. Hayot tajribasi shuni necha bor koʻrsatdiki, iqtisodiy va moliyaviy munosabatlarni boshqarish, murakkab vaziyatlardan chiqib ketish uchun ustuvorliklar tanlashda davlatning rolidan foydalanish (bozor kuchlilar yengadi, degan Darvin

tamoyiliga amal qilishini e'tiborga olgan holda), aholining koʻpchilik qismi manfaatlarini ifodalovchi davlatning rolini, kuchli ijtimoiy siyosat yuritish va uzoq istiqbolga moʻljallangan milliy strategiyaning oʻrnini hech kim va hech narsa bosa olmaydi» ilmiy qoidasi bozor iqtisodiyotini ilohiylashtirish kerak emasligiga undaydi.

Bozor iqtisodiyotining ham, har qanday iqtisodiyot kabi oʻz rivojlanish qonunlari mavjud. Unga xos qonunlar tizimini ikki guruhga boʻlish mumkin:

- a) umumiqtisodiy, lekin bozor iqtisodiyotida ham amal qilishda davom etgan qonunlar;
 - b) faqat bozor iqtisodiyotining oʻziga xos boʻlgan qonunlar.

Biz mazkur boʻlimda bozor iqtisodiyoti mohiyati va belgilarini umumiy tarzda koʻrib chiqdik.

2. Bozorning funksiyalari va tarkibiy tuzilishi

Bozor shuning uchun ham zarurki, u bir qator foydali funksiyalarni bajaradi.

- 1. Bozor ishlab chiqarish bilan iste'molni bogʻlash funksiyasini bajaradi. Tovar harakati uni ishlab chiqarishdan boshlanib, iste'mol bilan tugallanadi. Shu harakatning qanday yuz berishi bozorga bogʻliq. Ma'lumki, har qanday ishlab chiqarishdan pirovard maqsad iste'mol uchun tovar yaratishdir. Bozor tizimida ehtiyojlar tovarlarni pulga ayirboshlash orqali qondiriladi, chunki tovar ishlab chiqarish bor joyda mahsulotlar va xizmatlar bozordan oʻtmay turib, toʻgʻridan-toʻgʻri iste'molga kelib tushmaydi. Tovarlarni albatta bozordan sotib olish zarur.
- 2. Bozor ishlab chiqarishning qaytadan yangilanib turishiga, ya'ni uzluksiz yuz berishiga sharoit hozirlaydi. Bozorda tovarlar sotilgach, ularning egasi qilgan xarajatlarining pulini chiqarib olish bilan birgalikda foyda ham koʻradi. Tovarni sotishdan tushgan pulga bozorning oʻzidan resurslar olinib, ularning oʻrni qoplanadi, ular miqdoran koʻpayadi, ya'ni ishlab chiqarish omillari yangidan hosil boʻladi. Natijada iqtisodiy faoliyat takrorlanadi.
- 3. Bozor iqtisodiy regulator, ya'ni iqtisodiyotni tartiblovchi vosita bo'lib xizmat qiladi. Bunga bozor narxlari orqali erishiladi. Narx pasaygan joydan resurslar chiqib ketadi, ular narx oshgan yerga oqib o'tadi. Bozor talabning o'zgarishiga qarab nimani va qancha ishlab chiqarish kerakligi haqidagi signalni (axborotni) ishlab chiqarishga yetkazadi. Shunga binoan resurslar taqsimlanib, kerakli sohalarga yuboriladi va talabgir tovarlarni ishlab chiqarishga erishiladi. Mana shu jarayonlar bozor iqtisodiyotini tartiblashda

qatnashib turishiga dalolat beradi. Shuningdek, pulni resurslar bilan ta'minlab pul muomalasini barqarorlashtirish vazifasini oʻtaydi.

4. Bozor turli mamlakatlar, millatlar va elatlar oʻrtasida oʻzaro manfaatli iqtisodiy aloqalarni oʻrnatishga xizmat qiladi. Bozor iqtisodiy hamkorlikning yetakchi xalqaro munosabatlari sohasi hisoblanadi. Xitoy, Hindiston, O'rta Osiyo, Yaqin Sharq, Yevropa davlatlari bilan bogʻlovchi qadimgi savdo yoʻli – Buyuk ipak yoʻlidir. Bu yo'l orqali asosan ipak eksport qilinganligi sababli «Ipak yo'li» nomi bilan shuhrat qozongan. Xalqaro savdo-sotiq orqali turli mamlakatlar o'rtasida muntazam aloqalar o'rnatiladi, davlatlar iqtisodiy jihatidan birbiriga bogʻlanadi. Bozor ishlab chiqarishning davlatlararo miqyosda aniq ixtisoslashuvini, xalqaro miqyosdagi talab-ehtiyojni moʻljalga olib yuritilishini taqozo etadi. Xullas, bozor xalqaro aloqalarni oʻrnatish va ularni kengaytirish vositasi ham boʻladi.

Bozorning ichki tuzilishiga har xil mezonlar jihatidan baho beriladi. Bu mezonlar raqobat, bozor subyektlarining ahvoli, bozor obyektining xarakteri, bozor muomalasining miqyosi, bozor aloqalarining qonuniyligi kabilardir. Ularning orasida raqobat va subyektlarning ijtimoiy-iqtisodiy mavqei asosiy oʻrinda turadi. Iqtisodiy aloqalar xarakteriga koʻra bozorni ikki turga ajratish mumkin: a) erkin, mukammal raqobatli bozor; b) nomukammal raqobatli, monopollashgan yoki raqobat mutlaqo boʻlmagan bozor.

Erkin bozorda sotuvchilar va xaridorlar koʻpchilik boʻlib, ulardan hech biri bozorda hukmron mavqega ega boʻlmaydi, aksincha, ular doimo raqobatda boʻlishadi. Bozor ishtirokchilarining aloqasi erkin oldi-sotdi munosabatiga asoslanadi.

Monopollashgan bozor – bu ozchilik sotuvchilar va xaridorlar hukmron boʻlgan, raqobat cheklangan yoki raqobat umuman yoʻq bozor.

Mazkur bozor 4 xil bo'ladi:

- a) **monopol raqobatli bozor** bu yerda koʻp sonli korxonalar bozorni oʻz qoʻlida tutib turadi. Ular tovarlarning asosiy qismini taklif etadilar, ammo ulardan ayrimlari yoki bir nechtasining bozordagi hissasi, ularga hukmronlik qilish imkonini bermaydi. Bu bozor monopol boʻlsa-da, unda raqobat boʻladi, ammo u cheklangan tarzda yuz beradi, ya'ni ozchilikning raqobati shaklida boʻladi. Bu bilan u erkin bozordan farqlanadi;
- b) **sof monopoliya bozori** bu yerda sotuvchi monopoliyasi boʻladi, ya'ni xaridorlar koʻp boʻlgani holda sotuvchi bitta boʻladi, xaridorning mana shu tanho sotuvchi tovarini olishdan boshqa iloji boʻlmaydi;

- c) **oligopoliya bozori** bu yerda bitta emas, balki bir necha, ammo ozchilikdan iborat sotuvchilar hukmronligi mavjud boʻladi. Tovarlarning asosiy qismi mana shular qoʻlida toʻplanadi, bu yerda ham sotuvchi monopoliyasi boʻladi;
- d) **monopsoniya bozori** bu yerda sotuvchi emas, balki xaridor monopoliyasi boʻladi, ya'ni sotuvchilar koʻp boʻlgani holda xaridor yagona boʻladi. Monopsoniya odatda resurslar bozorida boʻladi, bu yerda ayrim korxonalar xom ashyo, yoqilgʻi, ish kuchi kabi resurslarning asosiy qismini sotib oladi. Agar monopoliya bozorida sotuvchi xaridorga oʻz izmini oʻtkazsa, monopsoniyada xaridor sotuvchiga oʻz hukmini oʻtkazadi.

Bozorlar oʻzining obyekti jihatidan, ya'ni nimalar oldi-sotdi qilinishi jihatidan ham farqlanadi. Shu oʻrinda iste'mol tovarlari bozori, resurslar bozori va moliya bozori ajratiladi.

A. Iste'mol tovarlari yoki iste'molchilar bozori. Bu bozorda kishilarning shaxsiy ehtiyojini qondiruvchi, ya'ni ularning tirikchiligi uchun zarur bo'lgan tovarlar oldi-sotdisi yuz beradi. Mazkur bozorga sotuvchilar ikki turdagi tovarlarni qoʻyadilar. Birinchisi, moddiy shakldagi iste'mol tovarlari bo'lib, bularga oziq-ovqat, kiyim-kechak, uy jihozlari, transport vositalari (yengil avtomobil, velosiped, mototsikl) kabilar kiradi. Ikkinchisi, nomoddiy, ya'ni moddiy ko'rinishi bo'lmagan tovarlar. Bular turli-tuman xizmatlardan iborat bo'lib, ularning moddiy shakli bo'lmaydi. Xizmatlarning o'zi tovarlashmagan va tovarlashgan bo'ladi. Tovarlashmagan xizmatlar bepul xizmat bo'ladi, shu sababli ular bozorga chiqmaydi, binobarin, oldi-sotdi obyektiga aylanmaydi. Bular jumlasiga xonadondagi oʻziga-oʻzi xizmat koʻrsatish va bepul davlat xizmati (oʻqitish, davolash, sport, madaniy xizmat) kiradi. Bozorga chiqarilgan yoki tovarlashgan xizmatlar pulli xizmatlar boʻlib, ular g'oyat xilma-xil bo'ladi. Bular ta'lim, tibbiyot, sport, sayohat, tomosha, transport, maishiy xizmat kabilardan iborat bo'ladi, ularni aholi sotib oladi. Bu xizmatlarning bozor obyekti sifatidagi xususiyati shundan iboratki, ularning yaratilishi va iste'moli bir vaqtning o'zida yuz beradi. kostum avval tikiladi, soʻngra bozorga chiqadi, olinganidan keyin iste'mol etiladi. Bundan farqliroq shifokorning tibbiyot xizmati yoki o'qituvchining ta'lim berish xizmatining ko'rsatilishi va iste'moli aynan bir vaqtda yuz beradi. Konsert ijrosi va uni tomosha qilish, futbol o'yini va uni ko'rish ham bir vaqtda yuz beradi. Xizmatning moddiy shakli bo'lmaganidan uni yaratish va iste'mol etish qo'shilib ketadi.

Iste'molchilar bozorida eng koʻp turdagi va miqdori gʻoyat katta tovarlar va xizmatlar oldi-sotdisi yuz beradi, bu bozorning ishtirokchilari mutlaq koʻpchilikdan iborat boʻladi. Mazkur bozorning Oʻzbekistondagi aniq koʻrinishi, bu mol bozori, dehqon bozori, supermarket, univermaglar, minimarket, turli doʻkonlar (shoplar), konsert zallari, teatr, kino-teatr, stadionlar, sport zallari, pulli kasalxonalar, pulli oʻquv kurslari, shartnoma bilan oʻqishdan iboratdir.

Iste'molchilar bozorida, birinchidan, ulgurji savdo boʻlsa, ikkinchidan chakana savdo qilinadi. **Ulgurji savdo** boʻlganda ishlab chiqaruvchilar oʻz tovarlarini vositachi savdo firmalari yoki ayrim savdogarga koʻtarasiga, ya'ni katta miqdorda sotadilar. Bular oʻz navbatida mana shu tovarlarni **chakana savdoda** maydalab iste'molchilarga sotadilar. Bozorda ishlab chiqaruvchi bilan iste'molchining bevosita aloqa oʻrnatishi ham boʻladi. Bunda ishlab chiqaruvchi oʻz tovarini chakana narxda iste'molchining oʻziga sotadi. Masalan, Toshkentdagi «Yulduz» tikuvchilik firmasi oʻzining doʻkonida tovarlarini aholiga sotadi, bozorga kelgan dehqon ham oʻz mahsulotini iste'molchiga chakanasiga sotadi.

B. Resurslar bozori. Bu yerda xilma-xil moddiy resurslar va ish kuchining oldi-sotdisi yuz beradi. Bu bozorning ishtirokchilari resurslarni ishlab chiqaruvchilar va ularni sotib oluvchi firmalar, davlat idoralari va xonadonlardan iborat. Bu bozorda moddiy shaklga ega asbob-uskuna, turli mashinalar, xom ashyo, butlovchi qismlar, yoqilgʻi, elektr energiyasi, gaz, koʻchmas mulkni tashkil etuvchi binolar, inshootlar va yer oldi-sotdisi yuz beradi. Mazkur bozorning maxsus turi bu mehnat bozori boʻlib, bu yerda moddiy shakli boʻlmagan tovar, ya'ni ish kuchi taklif etiladi.

Resurslar bozorining xususiyati shundan iboratki, bu yerdan sotib olingan tovarlar shaxsiy iste'mol uchun emas, balki ishlab chiqarish uchun xizmat qiladi. Resurslar iste'mol tovarlaridan farqliroq ikki xil usulda oldi-sotdi qilinadi: 1) resurslar to'la-to'kis sotib olinadi. Bunda ular sotuvchi mulkidan xaridor mulkiga o'tib iste'mol qilinadi. O'zbekiston tovar-xom ashyo birjasida resurslar sotilib, ular ishlab chiqarishda iste'mol etildi; 2) resurslarning o'zi emas, balki ulardan vaqtincha foydalanib turish huquqi sotiladi. Bunda resurs sotuvchi mulki bo'lib qoladi, lekin u ijaraga olib ishlatiladi. Masalan, qimmatbaho uskuna, kema, samolyot, mashina, bino, inshoot yoki yer butunlay sotib olinmagan holda, u ijaraga olinib, egasiga ijara haqi beriladi. Moddiy resurslar bozori O'zbekistonda Tovar-xom ashyo birjasi, savdo uylari va mashina-uskunalar sotuvchi firmalar timsolida gavdalanadi. Uning tarkibiy qismi bo'lgan mehnat bozorining xususiyati shundan iboratki, bu

yerda insonning mehnat qilish qobiliyati boʻlgan ish kuchi sotiladi. Biroq u tamomila emas, ma'lum vaqtda ishlatib turish uchun sotiladi. Oʻzbekistonda mehnat bozorining ikki turi amal qiladi: *birinchisi*, mehnat birjalari, bu tashkil etilgan mehnat bozori; *ikkinchisi*, mardikor bozori, bu tartibsiz mehnat bozoridir.

V. Moliya bozori. Bu jamiyatdagi moliya xizmatlari bozoridir. Bu bozorning maxsus shakli bo'lib, bu yerda moliya resurslari, ya'ni pul va daromad keltiruvchi qimmatli qogʻozlar oldi-sotdisi yuz beradi. Uning tarkibidagi pul bozori uch qatlamli bo'ladi. Birinchisi, shaxsiy ehtiyojni qondiruvchi **oddiy pul** bozori. Bu yerda pul tirikchilik buyumlarini xarid etish uchun haqini to'lash sharti bilan qarzga olinadi, ya'ni ishlatib turish uchun pul sotib olinadi. Masalan, mebel toʻplami, avtomashina yoki kvartira olish uchun kishilar bankdan garz oladilar. Bunda bank sotuvchi, qarz koʻtargan esa xaridor maqomida boʻladi. Ikkinchisi, kapital bozori. Bunda pul tirikchilik yurgizish uchun emas, balki kapital sifatida ishlatib foyda chiqarish uchun qarzga sotib olinadi. Bunga misol qilib tadbirkor, fermer yoki dehqon xoʻjaligi sohibining tijorat bankidan qarz olib, buni o'z xo'jaligi rivoji uchun ishlatishini ko'rsatish mumkin. Kapital bozorining oʻzi ikki xil boʻladi, bu kredit bozori va qimmatli qogʻozlar bozoridir. Kredit bozoridan (masalan, banklardan) tadbirkorlar kreditni (qarzni) sotib olib, uni kapital sifatida ishga qoʻyadilar. Bozordan kapitalni jalb etishning yana bir shakli bu aksiya, obligatsiya va sertifikatlarni chiqarib sotishdir. Bularni chiqarganlar emitent, sotib olganlar investor deviladi. Emitent sotuvchi bo'lsa, investor xaridor hisoblanadi. Oʻzbekistonda kredit bozorini tijorat banklari, kredit shirkatlari va ulardan qarz oluvchi mijozlar tashkil etsa, qimmatli qogʻozlar bozori fond birjalaridan, qogʻozlarni saqlovchi depozitariylardan iboratdir. Oʻzbekistondagi fond bozorining ishtirokchilari korxona, aholining ma'lum qatlami, davlat idoralari va turli tashkilotlar, vositachilar hisoblanadi.

Pul bozorining *uchinchi*, oʻziga xos turi — bu **valuta** bozoridir. Bu bozorda turli mamlakatlarning milliy puli — valuta oldi-sotdi qilinadi. Uning ishtirokchilari korxonalar, turli tashkilotlar, davlat idoralari va fuqarolar hisoblanadi. Ulardan biri valuta sotsa, boshqasi uni sotib oladi. Mazkur bozor banklar, ularning valuta ayirboshlovchi shoxobchalari, valuta auksioni (kim oshdi savdosi) shaklida namoyon boʻladi.

Intellektual tovarlar bozori bozorning maxsus turi boʻlib, aqliy mehnat mahsuli boʻlgan tovarlar va xizmatlarning ayirboshlanishini bildiradi. Bu yerda sotuvchilar va xaridorlar maxsus tovar hisoblangan ilmiy gʻoyalar, texnikaviy yangiliklar, san'at va adabiyot asarlari, xilma-xil axborotlarni oldi-sotdi etish yuzasidan munosabatda boʻladilar. Bu tovarlar egalari yoki ulardan vakolat olgan firmalar bozorda sotuvchi vazifasini bajaradi. Xaridorlar esa turli firmalar, uyushmalar, davlat idoralari, har xil tashkilotlar va fuqarolar boʻladi. Mazkur bozor kichik qismlardan iboratki, ular ilmiy-texnik ishlanmalar bozori, kino bozori, tasviriy san'at bozori, musiqa va tomoshalar bozori, antikvar buyumlar bozori kabilardan tashkil topadi. Intellektual tovarlar bozorida ilmiy-texnikaviy ishlanmalar oldi-sotdisi katta oʻrin tutadi. U amalda patent, litsenziya va nou-xau (patent — yangilikni ishlatish huquqini beruvchi hujjat; litsenziya — ruxsatnoma, nou-xau — ishlatish huquqi egasida boʻlgan yangilik) sotishdan iboratdir. Bu yerda ilmiy-texnikaviy yangiliklar xaridor mulkiga aylanish sharti bilan yoki oʻz egasi mulki boʻlaturib, vaqtincha foydalanish sharti bilan sotiladi.

Bu bozor ishlab chiqarish novatsiyasiga, ya'ni unga yangilik kiritishga xizmat qiladi, fan-texnika rivojiga ta'sir etadi. Ilmiy-texnik *ishlanmalar* bozoridagi munosabatlar koʻpincha mamlakatlararo boʻladi. Intellektual tovarlar bozori **eng dinamik** bozordir, u tez kengayadi, yangi-yangi qismlarga ajraladi. Buning sababi iqtisodiyotda intellektual mehnat mavqeining kuchayishidir. Gap shundaki, hozirgi bozor iqtisodiyoti ilmtalab ishlab chiqarishning oʻsishi, turli xizmatlar, eng avval axborot xizmati ahamiyatining kuchayishi bilan xarakterlanadi. Buni internet xizmati bozorining shiddat bilan yer yuzida oʻsib borishi tasdiqlaydi.

Mehnat bozori – bu ish kuchini oldi-sotdi qilish munosabatini bildiradi. Bu yerda insonning mehnat qilish qobiliyati, shartnoma asosida ma'lum muddatga sotiladi. Ish kuchi avvalo iste'mol qilinib, soʻngra uning haqi toʻlanadi.

Bozorning oʻzi yaxlit boʻlganidek, uning turlari ham bir-biri bilan oʻzaro bogʻliq holda amal qiladi. Iste'mol tovarlar bozoriga mos holda resurslar bozori tashkil topadi. Oʻz navbatida, resurslar bozoridagi holatga qarab mehnat bozori, ilmiy-texnikaviy yangiliklar bozori shakllanadi. Bozor turlarining bir-biriga moslashuvi iqtisodiy oʻsishning sharti hisoblanadi.

Iqtisodiyot uchun bozor koʻlami gʻoyat muhim, chunki bozor qanchalik keng boʻlsa, shunchalik ishlab chiqarishning oʻsishiga sharoit muhayyo boʻladi, ya'ni tovarlar oʻz vaqtida sotiladi, kerakli resurslar sotib olinib, ishlab chiqarish davom etadi. **Bozor koʻlami** – bu bozorning kattakichikligi boʻlib, oldi-sotdining hajmi bilan oʻlchanadi. Koʻlam

tovarlarning miqdori, ularning narxi va necha marta oldi-sotdi qilinishiga bogʻliq boʻladi. Masalan, mamlakatda, 1 mln. dona tovar yaratilgan bo'lib, uning o'rtacha narxi 100 birlikka teng deb olsak, jami tovarlar narxining summasi 100 mln. birlikni bozorda sotadilar. Bozor miqyosi tovar oborotining (aylanmasi) hajmi bilan oʻlchanadi, bu esa oldi-sotdi koʻlamini bildiradi. Bozorning katta-kichikligi umumiy tarzda va ayrim bozorlarga tatbiqan aniqlanadi. Agar iste'mol tovarlari bozorini olsak, uning umumiy hajmini ayrim tovarlar bozori, masalan, oziq-ovqat, kiyimkechak va turli xizmatlar bozorining hajmi aniqlaydi. Buning qanday ekanligini chakana savdo oborotiga qarab bilish mumkin. Soʻnggi yillarda Oʻzbekistondagi chakana savdo oboroti miqdori ortib bormoqda. Bu bozorning kengayib, uning koʻlamining ortib borishi ifodalaydi. Bu oʻz navbatida ishlab chiqarishning hajmiga va yaratilgan mahsulot va xizmatlarning naqadar xilma-xil boʻlishi, binobarin ayirboshlashga moʻljallanganligiga bogʻliq boʻladi. Mahsulotning qanday ayirboshlanishi uning tovarlilik darajasini bildiradi. Bu daraja qanchalik yuqori bo'lsa, bozor hajmi shunchalik katta bo'ladi. Demak, iqtisodda shunday qoida bor: bozorning koʻlami ishlab chiqarilgan mahsulot va xizmatlarning miqdoriga va ularning tovarlilik darajasiga toʻgʻri mutanosiblikda boʻladi.

Mahsulot va xizmatlar bozor va shuningdek, oʻzi uchun yaratiladi. Bular oʻzi uchun qanchalik kam va bozor uchun qanchalik koʻp yaratilsa, shunchalik bozor keng boʻladi. Shu sababli jami yaratilgan mahsulot bozor mahsulotidan farq qiladi. Masalan, Oʻzbekistondagi sutning mutlaq katta qismi dehqon, fermer xoʻjaliklari va tomorqada ishlab chiqariladi. Sut bozorining hajmi uning sutning qanday qismi xoʻjaliklarda xonadon iste'moli va buzoqlarni boqish uchun qolishiga va qanchasi sotishga chiqarilishiga bogʻliq boʻladi. Bozor munosabati rivojlangan sari oʻzi uchun ishlab chiqarish qisqaradi va bozor uchun ishlab chiqarish kengayadi.

Bozorning hajmi ishlab chiqarish holatiga qarab oʻzgarib turadi. Undagi oʻzgarishlarni dinamikada (harakatda) bilish uchun real tovar oborotini aniqlash zarur. Real tovar oboroti oʻzgarmas yoki bazaviyyildagi narxlar vositasida, ya'ni inflatsiya ta'siridan xoli etilgan narxlarda hisoblangan oborotdir. Buni aniqlash uchun joriy narxlarda hisoblangan tovar oboroti narxning oʻzgarish indeksiga boʻlinadi. Masalan, joriy narxdagi chakana savdo oboroti 696 mlrd. pul birligiga teng, joriy yildagi

narx 1,2 marta o'sdi (shu narx indeksi). Bunda real savdo oboroti – u = 580 mlrd. Mana shu bozorning real hajmi bo'ladi. Real oborotga qarab bozorning kengaygani yoki torayganini bilish mumkin.

Bozor koʻlami va ishtirokchilari jihatidan mahalliy, hududiy, milliy, davlatlararo va jahon bozoriga ajratiladi.

Mahalliy bozor — bu muayyan mamlakatning davlat chegaralari doirasi bilan cheklangan shahar, tuman, viloyat hududlaridagi bozordir. Bu bozorda asosan mahalliy tovarlar oldi-sotdisi yuz beradi. Bunga misol qilib Oʻzbekistondagi tuman bozorini olish mumkinki, bunga shu yerdagi savdo shoxobchalari, buyum bozorlari, dehqon bozorlari kiradi. Uning ishtirokchilari tuman ahli boʻlib, bular iste'molchilar, ishlab chiqaruvchi firmalar, savdo firmalari, fermer va dehqon xoʻjaliklari hamda tomorqa sohiblaridan iboratdir.

Hududiy bozor — bu bir necha chegaradosh hududlar doirasidagi bozor boʻlib, mahalliy bozorlar majmuidan iborat. Uning subyekti — ishtirokchilari hududdagi tovar ishlab chiqaruvchilar va iste'molchilar hisoblanadi. Uning obyekti turli hududlarda yaratilgan mahsulot va xizmatlar hamda tashqaridan keltirilgan tovarlar hisoblanadi. Hududiy bozor koʻlami mahalliy bozor koʻlamidan katta boʻladi, uning ishtirokchilari ham koʻp. Hududiy bozorga misol qilib Oʻzbekistondagi Sharqiy hudud (Fargʻona vodiysi) bozorini koʻrsatish mumkin.

Milliy bozor — bu muayyan mamlakatning milliy chegarasi doirasidagi, ya'ni mamlakatning ichki bozori. Bu bozor milliy iqtisodiyotning ajralmas qismi hisoblanadi. Uning ishtirokchilari muayyan mamlakatdagi barcha tovar ishlab chiqaruvchilar, iste'molchilar va ular oʻrtasida turgan vositachilardan iborat. Milliy bozordagi tovarlarning asosiy qismi mamlakatning oʻzida ishlab chiqariladi, qisman chet eldan keltiriladi, ammo iqtisodi qoloq va qaram mamlakatlarda ular yaratgan mahsulotlar asosan xom ashyo boʻlib, u mamlakat ichki tovar oborotida ishtirok etmaydi, balki chetga chiqariladi. Ular ichki bozorida chetdan keltirilgan tovarlar ustuvor boʻladi. Bunday milliy bozorda qaramlik alomati boʻladi.

Milliy bozor mamlakatdagi barcha bozorlarni birlashtiradi, bu yerda milliy pul xarid uchun yagona toʻlov vositasi boʻlib xizmat qiladi. Milliy bozor davlat himoyasida boʻladi. U ochiq bozor, unga kirib kelish, undan chiqib ketish erkindir.

Davlatlararo bozor – bu ikki va undan koʻp mamlakatlarning oʻzaro bozori boʻlib, bunda turli mamlakatlar firmalari va davlat idoralari qatnashadi. Bu bozorda tovarni bevosita iste'mol etuvchilar – xonadonlar

qatnashmaydi. Bu bozor chegaradosh davlatlar bozori boʻlib, bu yerda shu mamlakatlarda yaratilgan tovarlar, chetdan keltirgan tovarlar oldi-sotdi qilinadi. Aytilgan mamlakatlarda chegara oldi savdo-sotigʻi keng tarqalgan boʻladi.

Jahon bozori — bu dunyo mamlakatlari oʻrtasidagi savdo-sotiq munosabati. Bu bozorda taraqqiyot darajasi, binobarin tovar ishlab chiqarish salohiyati har xil mamlakatlar qatnashadi. Ulardan biri tayyor mahsulotlar yetkazib bersa, boshqasi xom ashyo va yoqilgʻi kabi resurslarni bozorga chiqaradi. Jahon bozori oʻzining uchta belgisi bilan ajralib turadi. Birinchidan, bu bozorda barcha tovarlar emas, balki saylangan, ya'ni koʻpchilik uchun zarur tovarlar (masalan, neft, gaz, koʻmir, yogʻoch, metall, paxta, don, jun va boshqalar) oldi-sotdisi yuz beradi. Ikkinchidan, bu bozorda iste'molchilarning oʻzi, ya'ni aholi xaridor sifatida qatnashmaydi. Bu vazifani savdo firmalari bajaradi. Uchinchidan, bu bozorda tovarlar ulgurjiga sotiladi. Jahon bozori xalqaro birjalar va savdo-sotiq tashkilotlari faoliyatida namoyon boʻladi.

Jahon bozorining hajmi turli mamlakatlardagi ishlab chiqarish koʻlamiga va uning naqadar ixtisoslashuviga, ya'ni bozorga tovar yetkazib berishiga bogʻliq boʻladi. Odatda jahon ishlab chiqarishining oʻsishi bilan jahon bozorining koʻlami ham kengayib boradi.

3. Bozor infratuzilmasi

Bozordagi iqtisodiy aloqalarda koʻpchilikdan iborat subyektlar qatnashadi. Bu aloqalar gʻoyat xilma-xil boʻlib, murakkab kechadi, bular bevosita aloqalar va bilvosita aloqalardir. **Bevosita** bozor munosabati paydo boʻlganda, sotuvchi va xaridor bir-biri bilan toʻgʻridan-toʻgʻri aloqa oʻrnatadi, bu yerda hech kim ular oʻrtasida vositachilik qilmaydi. **Bilvosita** bozor munosabati yuz berganda, sotuvchi va xaridor oʻrtasidagi aloqalar vositachilar orqali oʻrnatiladi. Ular oldi-sotdi sohasida bozor ishtirokchilariga oʻz xizmatini koʻrsatadilar, bu infratuzilma xizmati boʻladi.

Bozor infratuzilmasi bozor aloqalarini oʻrnatishda ishtirok etuvchi, ya'ni sotuvchilar va xaridorlarga xizmat koʻrsatuvchi institutlardir, ya'ni firma va turli muassasalardir.

Bozorning miqyosi, unda ishtirok etuvchi tovarlarning tarkibi, oldisotdi munosabatlarining xarakteriga qarab turli infratuzilma boʻgʻinlari amal qiladi. Infratuzilma ikki xil boʻladi. **Birinchisi,** hamma bozor aloqalariga xizmat qiluvchi infratuzilma. Bu tovarlar qanday koʻlamda,

qanday usullar bilan sotilishidan qat'i nazar, hamma bozorlarga xos boʻladi. Bunga sugʻurta, savdo-sotiqda sherik topish, pulni undirish kabi xizmatlarni koʻrsatuvchi muassasalar kiradi. Ular xizmatidan bozorning barcha ishtirokchilari kerak boʻlgan paytda foydalanadi. Infratuzilmaning ikkinchi turi bu maxsus bozorlarda maxsus xizmat koʻrsatuvchi institutlardir. Bular jumlasiga savdo uylari, tovar birjalari, reklama kompaniyalari, mehnat birjalari, fond (qimmatli qogʻozlar) birjalari, broker kompaniyalari, auditor firmalarini kiritish mumkin. Bular ham vositachilik qiladi, ammo ular xizmati hamma yerda emas, balki ayrim bozorlarda yuz beradi. Tovar birjalari ulgurji savdo xizmatini koʻrsatadi, ular orgali tovar ishlab chiqaruvchilar xaridor topadi. Mehnat birjasi ish beruvchi bilan ishga kiruvchiga xizmat koʻrsatadi. Fond birjasi qimmatli qogʻozlar (aksiya, obligatsiya, sertifikat va boshqalar) egalari bilan ularga xaridorlarni bir-biriga bogʻlashda xizmat qiladi. Broker firmalari ulgurji savdoda vositachilik qiladi. Auditor firmalari xizmati maxsus tavsifga ega. Ular axborot xizmatini koʻrsatadilar, ya'ni taftish firmalarning ahvoliga tegishli xolisona axborotni bozor ishtirokchilariga yetkazib beradi.

Bozor infratuzilmasida huquqiy xizmat koʻrsatish alohida oʻrin Bozorda faoliyat yuritishning qoidalari turli qonunlarda belgilanadi, ularga rioya etish nazorat qilinadi. Bozor qoidalari uning hamma ishtirokchilari manfaatini hisobga oladi, qanday ish qilish mumkinligini va qanday ishga yoʻl berilmasligini aniqlab qoʻyadi. Bozor qonun-qoidalari buzilganda, uning layoqatsizligi paydo bo'ladi, muhimi bozor aloqalarini oʻrnatishga qaratilgan xarajatlar (bular transaksion xarajatlar deb yuritiladi) ortib ketadi, bozor o'z vazifalarini yaxshi qoʻyadi. Shu sababli qonun-qoidalarning bajarilishini bajarmay ta'minlovchi huquqiy xizmatlar borki, bularni xo'jalik sudlari, arbitraj firmalar va advokatlar firmalari bajaradi.

Bozor infratuzilmasi deganda bozor iqtisodiyoti uchun xizmat koʻrsatuvchi har xil sohalar tushuniladi.

Bozor infratuzilmasi boʻgʻinlari quyidagilardan iborat:

Ishlab chiqarishga xizmat qiluvchi infratuzilmasi (transport, aloqa, ombor xoʻjaligi, yoʻl xoʻjaligi, suv va energetika ta'minoti). Ular bozor iqtisodiyotidan oldin ham mavjud boʻladi. Bozor iqtisodiyotiga oʻtish sharoitida ularni tijoratchilik yoʻliga oʻtkazishga toʻgʻri keladi, ya'ni ular yaxshi ishlab pul topish va oʻz-oʻzini moliyalashtirish yoʻliga oʻtkaziladi.

Tovarlar va xizmatlar muomalasiga, ya'ni savdo-sotiq ishlariga xizmat qiluvchi infratuzilmasi (birjalar, savdo uylari, auksionlar, tijoratchilik idoralari, reklama firmalari va agentliklari, davlatning savdo-sotiq va ularni nazorat etuvchi muassasalari).

Moliya-kredit munosabatlariga xizmat qiluvchi infratuzilmasi (tijorat banklari, oʻz-oʻzini kreditlash idoralari, sugʻurta kompaniyalari, moliya kompaniyalari, soliq undirish mahkamalari, har xil pul fondlari).

Aholiga xizmat qiluvchi yoki ijtimoiy infratuzilmasi (uy-joy kommunal va transport xizmati, maorif, madaniyat hamda sogʻliqni saqlash muassasalari, aholini ishga joylashtirish firmalari va idoralari. Ularning aksariyati bozor iqtisodiyotidan oldin ham mavjud boʻladi, lekin ularni isloh etib, bozor sharoitida pulli xizmat koʻrsatish, tijorat yoʻliga oʻtkazishga toʻgʻri keldi).

Axborot xizmati (iqtisodiy faoliyat uchun zarur boʻlgan har xil axborotlar – ma'lumotlar va xabarlarni toʻplash, umumlashtirish va sotish bilan shugʻullanuvchi turli kompaniyalar, firmalar, maslahat idoralari).

Zamonaviy bozor infratuzilmasi yaratish bozor munosabatlariga haqiqiy madaniy-ma'rifiy xarakter baxsh etish, stixiyaga va boshboshdoqlikka yoʻl qoʻymaslik imkonini beradi.

Bozor strukturasi – bu shu bozorning tarkibida amal qiluvchi boʻgʻinlarni, bozor haroratini belgilovchi birliklarni bildiradi.

Milliy bozor davlat himoyasida boʻladi. Ma'lumki, ochiq iqtisodiyot sharoitida chet el tovarlari, kapitali turli yoʻllar bilan kirib keladi, bu xavfsizlik choralarini koʻrishni talab etadi. Bu huquqni muhofaza qiluvchi organlar xodimlariga muayyan vazifalarni yuklaydi.

Bozor intervensiyasi deganda milliy yoki mintaqaviy bozorga tashqaridan suqilib kirish va u bozorni oʻziga tobe etish tushuniladi. Xorijiy tovarlar muayyan mamlakat yoki mintaqa bozorini himoya qiladigan toʻsiqlarni bartaraf etib, bozorga kirib oladi va shu yerdagi tovarlar bilan raqobat qiladi, xaridorlarni oʻziga ogʻdirib oladi.

Bozor intervensiyasi har xil vositalar bilan amalga oshiriladi:

- demping eksport (ichki bozordan ham past baholarda eksport)ni ishlatish;
 - yuqori boj toʻlovlariga ham rozi boʻlish;
 - bozor chaqqon yerlarda korxonalar qurib, tovar chiqarish;
- □ import qiluvchi mamlakat yoki mintaqaga moddiy yordam koʻrsatish, siyosiy tazyiq oʻtkazish va boshqalar.

Bozor muhofazasi deganda milliy bozorning yoki ayrim tovarlar bozorining davlatning eksport-importni tartibga soluvchi tadbirlari vositasida himoya qilinishi tushuniladi. Bozor muhofazasi:

- chetdan tovar keltirishni cheklash, taqiqlash;
- boj toʻlovini oshirish orqali amalga oshiriladi.

Bozor muhofazasini chetlab oʻtishning muhim yoʻli ilgari tovar chiqarilgan mamlakatga kapital chiqarib, muayyan tovarni oʻsha yerning oʻzida yaratish va sotish hisoblanadi. Masalan, Yaponiya avtomobil firmalari oʻz tovarini AQShga kiritish yoʻlidagi yuqori boj toʻlovlariga «chap berish» uchun AQShda oʻz zavodlarini qurib, chiqarilgan avtomobilni shu yerning oʻzida sotadi.

Bozor muhofazasi mamlakatlararo «savdo janglari»da istehkom vazifasini oʻtaydi.

Bozor segmentatsiyasi deganda ma'lum belgi-alomatlar va savdosotiqning shart-sharoitiga qarab bozorni har xil boʻgʻin (qism)larga ajratish, tabaqalash tushuniladi. Segment — bu bozorning kichik bir qismi. U yerda xaridorlarning guruhi cheklangan boʻladi. Ularga ma'lum turdagi tovarlar sotiladi.

Bozorni segmentlarga ajralishiga ikki narsa sabab bo'ladi:

- mehnat taqsimoti chuqurlashib, gʻoyat xilma-xil tovarlar ishlab chiqarilishi va ularning ma'lum guruh iste'molchilarga moʻljallangani;
- iste'molchilarning ijtimoiy-iqtisodiy jihatdan tabaqalanishi, ular talabining farqlanishi.

Bozorning segmentlarga ajratish mezonlari gʻoyat koʻp. Masalan, bir segment uchun aholining xarid qobiliyati ustuvor boʻlsa, boshqa segment uchun raqobatning bor yoki yoʻqligi muhim belgi boʻladi.

Segmentlar hududiy va ijtimoiy-demografik mezonlarga qarab ajratiladi. **Hududiy segment** quyidagi mezonlarga ega:

- aholining soni va zichligi;
- transport va aloqa shoxobchalarining mavjudligi va rivojlanish darajasi;
 - tabiiy iqlim sharoiti;
- tijorat ishining asosiy yoʻnalishi va uning qaysi toifa kishilarga xizmat qilishi;
 - iqtisodiyotning umumiy ahvoli;
 - inflatsiya darajasi;
 - bozor infratuzilmasining mavjudligi va boshqalar.

Ijtimoiy-demografik segment quyidagi mezonlarga ega:

- iste'molchi xaridorlarning yoshi, jinsi;
- iste'molchi xaridorlar tarkibidagi ishlovchilar, o'quvchilar va nafaqalarning salmog'i;
 - iste'molchi xaridorlarning bilim darajalari, saviyasi;
 - aholi pul daromadining darajasi;
 - oila va uning tarkibi;
 - aholining kasb-kori, irqi va millati;
 - aholi tarkibi kabilar.

Bozor segmentlari aholining urf-odati, rasm-rusumi, turmush tarzi va qaysi bir tovarni afzal koʻrishiga qarab ham ajraladi. Segmentlarga ajralish muayyan tovarlarga nisbatan ham yuzaga keladi, masalan, kiyim-kechak bozorida: bolalar kiyimi, erkaklar kiyimi, ayollar kiyimi, yoshlar kiyimi, qariyalar kiyimi bozorlariga ajraladi.

Bozor segmentatsiyasi orqali tovarlarni kam sarf-xarajatlar bilan yuqori narxda sotish imkoni yaratiladi.

Tayanch tushunchalar:

Bozor, bozorning turlari, bozor infratuzilmasi, bozorning funksiyalari, erkin bozor, monopollashgan bozor, iste'molchilar bozori, resurslar bozori, mehnat bozori, moliya bozori, bozor koʻlami, mahalliy va hududiy bozor, milliy va jahon bozori, tartibli bozor, tartibsiz bozor, taqchil bozor, toʻyingan bozor, bozor segmenti.

Savol va topshiriqlar:

- 1. Bozorning mohiyatini tushuntiring.
- 2. Bozor infratuzilmasi deganda nimani tushunasiz?
- 3. Bozorning hajmi nima uchun ishlab chiqarishga bogʻliq?
- 4. Bozorda iste'molchilarning sa'y-harakatlariga ta'sir etuvchi omillarni izohlang.
- 5. Bozor iqtisodiyoti va kasbga oid oʻzgarishlar deganda nimalarni tushunasiz?

Mavzuni chuqur o'rganish instrumentariysi

Bozor – xoʻjalik yurituvchi agentlar oʻrtasida qadriyatlarni ayirboshlash masalasida yuzaga keladigan munosabatlar tizimining ijtimoiy shakli; ne'matlarni ayirboshlashning institutsionallashgan transaksiyalari.

Bozor iqtisodiyoti — ayirboshlash transaksiyalari amalga oshiriladigan iqtisodiyot, ya'ni koʻplab ne'matlar koʻplab alohida ishlab chiqaruvchilar tomonidan ayirboshlash uchun maqsadli ishlab chiqariladi.

Bozor iqtisodiy subyektlari – ayirboshlash uchun ne'matlar ishlab chiqaradigan subyektlar. Bozorga oid boʻlmagan iqtisodiy subyektlar – natural xoʻjalik doirasida yaratuvchilik faoliyatini amalga oshiruvchi subyektlar.

Uy xoʻjaligi — odatda qarindoshlik rishtalari bilan bogʻlangan va iqtisodiyotning iste'mol sektorida faoliyat koʻrsatayotgan bir yoki bir necha shaxsdan iborat iqtisodiy birlik.

Institutsional bozor – xoʻjalik yurituvchi subyektlar oʻrtasida ayirboshlashni tartibga soluvchi va muvofiqlashtiruvchi institutlarning legal va yashirin «oldi-sotdisi» sohasida yuzaga keladigan munosabatlarning muayyan shakli.

Ma'muriy bozor — iqtisodiy faoliyat sohasidagi «ruxsatnomalar» va «taqiqlar» oldi-sotdisi borasida amaldorlar byurokratiyasi hamda xoʻjalik yurituvchi subyektlar oʻrtasida yuzaga keladigan munosabatlarning muayyan shakli.

Davlat (bozor iqtisodiyoti subyekti sifatida) – iqtisodiy oʻsish, ish bilan toʻliq bandlik, xoʻjalik sohasidagi barqarorlik, mamlakatning iqtisodiy va milliy xavfsizligining yangi sifatini ta'minlash maqsadida iqtisodiyot tizimiga ta'sir koʻrsatish uchun vakolatlarga ega boʻlgan turli muassasalar majmuidan iborat murakkab institutsional tuzilma.

Bozor muvozanati mexanizmi – talab va taklif hajmi muvozanatda boʻlgan sharoitda obyektiv bozor bahosi oʻrnatilishiga olib keladigan iste'molchilar va ishlab chiqaruvchilar raqobatining mexanizmi; talab va taklifning belgilangan (statik) darajalarida bozor bahosi shakllanishining mexanizmi.

Nohuquqiy ayirboshlash – xoʻjalik sohasidagi teng huquqqa ega boʻlmagan agentlar oʻrtasidagi noekvivalent ayirboshlash.

Ayirboshlash – kimdandir istalayotgan obyektni oʻrniga nimadir taklif etib olish harakati.

Ayirboshlashning huquqiy xususiyati — ayirboshlashning ishlab chiqarish omillarining teng huquqli mulkdorlari qabul qiladigan va ular yordamida yaratiladigan ne'matlar oldi-sotdisi borasidagi qarorlar natijasi hisoblanadigan ekvivalentligi.

Raqobatli bozor iqtisodiyoti — mulk shakllarining xilma-xilligi mavjud boʻlgan va huquqiy ayirboshlash transaksiyalari amalga oshiriladigan iqtisodiyot.

Bozor iqtisodiyotida ijtimoiy himoya – har bir shaxsga uning rivojlanishi va yaratuvchilik imkoniyatlaridan nihoyatda samarali foydalanishi uchun zarur boʻlgan muayyan turmush darajasining kafolatlanishini

ta'minlovchi davlat iqtisodiy choralari, shart-sharoitlari va munosabatlari tizimi.

Ijtimoiy yoʻnaltirilgan raqobatli bozor iqtisodiyoti – xoʻjalik yuritish jarayonlari batamom shaxsni har tomonlama rivojlantirish vazifalariga boʻysundirilgan iqtisod.

Bozor intervensiyasi – milliy yoki mintaqaviy (regional) bozorga tashqaridan suqilib kirish va u bozorni oʻziga tobe etish tushuniladi. Xorijiy tovarlar muayyan mamlakat yoki region bozorini himoya qiladigan toʻsiqlarni bartaraf etib, bozorga kirib oladi va shu yerdagi tovarlar bilan raqobat qiladi, xaridorlarni oʻziga ogʻdirib oladi.

Bozor intervensiyasi har xil vositalar bilan amalga oshiriladi:

- demping eksport (ichki bozorda ham past baholarda eksport)ni ishlatish;
- yuqori boj toʻlovlariga ham rozi boʻlish;
- bozor chaqqon yerlarda korxonalar qurib, tovar chiqarish;
- import qiluvchi mamlakat yoki mintaqaga moddiy yordam koʻrsatish, siyosiy tazyiq oʻtkazish va boshqalar.

Bozor muhofazasi deganda milliy bozor yoki ayrim tovarlar bozori davlatning eksport-importni tartibga soluvchi tadbirlari vositasida himoya qilinishi tushuniladi. Bozor muhofazasi:

- chetdan tovar keltirishni cheklash, taqiqlash;
- boj toʻlovini oshirish orqali amalga oshiriladi.

Bozor muhofazasini chetlab oʻtishning muhim yoʻli ilgari tovar chiqarilgan mamlakatga kapital chiqarib, muayyan tovarni oʻsha yerning oʻzida yaratish va sotish hisoblanadi.

Mavzu yuzasidan asosiy xulosalar:

1. *Bozor* xaridorlar bilan sotuvchilar oʻrtasidagi iqtisodiy aloqalar, ularni bir-biriga bogʻlaydigan mexanizmdir. Bozorda hamma teng. Chunki unda xaridor va sotuvchi mustaqil harakat qiladi.

Bozorda manfaatsiz shaxslar boʻlmaydi. Sotuvchi qimmat sotishi payida, xaridor arzonroq xarid qilish harakatida boʻladi.

- 2. Bozor infratuzilmasi bozor aloqalarini oʻrnatishda ishtirok etuvchi, ya'ni sotuvchilar va xaridorlarga xizmat koʻrsatuvchi muassasalardir. Bozor tovar va xizmatlarni oldi-sotdi qilish borasidagi munosabatlar boʻlib, ular vositasida sotuvchilar va xaridorlar bir-biri bilan aloqaga kirishadilar. Bu aloqalarni oʻrnatishda bozor infratuzilmasi institutlari vositachi sifatida ishtirok etadi, ular bozor funksiyalarini amalga oshiruvchi xizmatlarni koʻrsatadi.
- 3. Bozor tovarlarni iste'molchiga yetkazib berish, ishlab chiqarishning yangilanishini resurslar bilan ta'minlash, iqtisodiyotni tartibga keltirish va mamlakatlararo hamkorlikni o'rnatishdan iborat funksiyalarni bajaradi.

- 4. Bozor ishtirokchilarining mavqei jihatidan erkin va monopollashgan bozorga, oldi-sotdi obyekti jihatidan iste'mol tovarlari, resurslar, moliya va intellektual tovarlar bozorlariga ajraladi. Ulardan har birining oʻziga xos xususiyatlari mavjud.
- 5. Iqtisodiyot uchun bozorning koʻlami gʻoyat muhim, chunki ishlab chiqarishning oʻsishi shunga bogʻliq boʻladi. Bozor koʻlamini u yerdagi tovarlar miqdori va ularning narxi belgilaydi. Koʻlam savdo oboroti (aylanmasi)ga qarab baholanadi. Koʻlam jihatidan qaralganda mahalliy, hududiy, milliy, davlatlararo va jahon bozorlari mavjud.

6- MAVZU. OʻZBEKISTONDA BOZOR IQTISODIYOTINI SHAKLLANTIRISH NAZARIYASI

1. Oʻzbekistonning bozor iqtisodiyotiga borishdagi oʻz taraqqiyot yoʻli

XX asrning soʻnggi oʻn yilligi jahon tarixiga ijtimoiy dunyoqarashda, jahon hamjamiyatining jugʻrofiy-siyosiy (geopolitik) tuzilishida tub oʻzgarishlar davri boʻlib kiradi. Jahon yangi davrga qadam qoʻydi. Bu davrning oʻziga xos belgilari, bir tomondan, davlatlar va xalqlar oʻrtasida yaqinlashuv jarayonlari va hamkorlikning kuchayishi, yaxlit siyosiy va iqtisodiy makonlarning vujudga kelishi, yagona xalqaro me'yorlar (normalar), qoidalar va andozalarga oʻtish boʻlsa, ikkinchi tomondan, sotsialistik lagerning yemirilishi, totalitar tuzumlarning tugatilishi, unitar tizimlar oʻrnida yosh mustaqil davlatlarning paydo boʻlishidir. Yer kurrasining oltidan bir qismida tub islohotlar davom etmoqda. «Bu esa yangi tuzilgan mustaqil davlatlarda davlat qurilishi va ijtimoiy-iqtisodiy islohotlar oʻtkazish muammolari mintaqalarning doiralaridan tashqari chiqib, haqli ravishda umumjahon tusini olganidan yaqqol dalolat beradi.

Sobiq sotsialistik va boshqa mamlakatlar voqeligi keltirib chiqargan yangi hodisalar, munosabatlar va jarayonlar XX asrning 90-yillaridan boshlab an'anaviy tushunchalarga mos kelmay qolganligi yaqqol koʻrindi. Mulkchilik, ishlab chiqarish munosabatlari, ishlab chiqarish va iqtisodiy oʻsish omillari, boshqarishning bozor va rejali tartibga solish mexanizmlari, davlatning ijtimoiy-iqtisodiy vazifasi va ijtimoiy yoʻnaltirilgan faoliyati kabi boshqa tushunchalar umuman yangi mazmun kasb etmoqda.

Bozor islohotlari – xalq ishtirokida, lekin davlat tomonidan ishlab chiqilgan bozor munosabatlarini shakllantirish chora-tadbirlarining davlat nazorati ostida amalga oshirilishidir.

Islohotlarning quyidagi turlari mavjud:
 □ mulkiy munosabatlar islohoti;
 □ agrar islohot;
 □ moliya-kredit tizimi islohoti;
 □ ijtimoiy islohotlar;
 □ tashqi iqtisodiy aloqalar islohoti;
 □ huquqiy islohotlar.

Mamlakatimizda amalga oshirilayotgan islohotlar Oʻzbekistonning bozor iqtisodiyotiga oʻtish konsepsiyasini inobatga olgan holda amalga oshiriladi.

Oʻzbekiston jahon tajribasini rad etmagan holda, ijtimoiy taraqqiyotning oʻziga xos va mos yoʻlini ishlab chiqdi va shu yoʻldan dadil bormoqda.

Oʻz yoʻli deganda Oʻzbekistonda bozor iqtisodiyotiga oʻtish va mustaqillikni ta'minlash muammolarining birgalikda hal etilishi tushuniladi. Mazkur yoʻlning oʻziga xosligi shundaki, ilgari birorta mamlakat ijtimoiy (davlat) mulkka asoslangan sotsialistik tuzum oʻrnida bozor iqtisodiyoti tamoyillariga yoʻnaltirilgan koʻp ukladli tuzum qurmagan, ya'ni bu borada sinalgan yoʻl yoʻq edi.

Bu yoʻlning **oʻziga mosligiga** kelsak, Sharq mamlakatlari, ayniqsa, Oʻzbekistonda yashash, ishlash, tadbirlar oʻtkazish — hamma-hammasi qadimdan sherikchilikka, jamoa boʻlib ish tutishga asoslangan.

Bu yo'l O'zbekistonni kelajakda iqtisodiyoti rivojlangan, demokratiya rivoj topgan, sotsial barqarorlik hukm surgan davlatga aylantirishni moʻljallaydi, Oʻzbekiston kelajagi buyuk davlat degan ilmiy xulosaga asoslanadi. Mustaqillikning ilk yilidayoq Prezident Islom taraqqiyotini ta'minlovchi yo'lning Karimov Vatan ahamiyatini quyidagicha ta'kidlab: «Respublikaning bozor munosabatlariga o'tishida o'z yo'lidan izchillik bilan borishi demokratik o'zgarishlar, respublikani rivojlangan mamlakatlar qatoriga olib chiqish, uning xalqaro obro'e'tiborini mustahkamlash uchun puxta moddiy negiz yaratadi»¹, – deb ta'kidlagan edi. Bu borada O'zbekiston oldiga quyidagi vazifalarni belgiladi:

 $^{^1}$ *Каримов И. А.* Ўзбекистон — бозор муносабатларига ўтишнинг ўзига хос йўли. — Т.: «Ўзбекистон», 1993. — Б. 8.

- barcha mulk shakllarining tengligini ta'minlash;
- iqtisodiy faoliyatga erkinlik berish;
- ishbilarmonlikni rivojlantirish, tadbirkorlikka keng yoʻl ochib berish;
 - erkin narx-navoga oʻtish;
- iqtisodiy monopolizmga yoʻl bermagan holda raqobatga keng yoʻl ochish;
- ishlab chiqarishning zamonaviy milliy manfaatga mos bo'lgan strukturasini yaratish;
- > qudratli iqtisodiy salohiyatga tayangan holda mamlakat milliy boyligini oshirib, xalqning hamma qatlamlariga farovonlik, kelajakka ishonch berish;
- > xalqaro iqtisodiy munosabatlarda faol ishtirok etish, mamlakat iqtisodiyotining jahon xoʻjaligi bilan integrasiyalashuviga erishish.

Yuqoridagilardan koʻrinib turibdiki, **bozor iqtisodiyoti** — bu mukammal ishlab chiqarish omillariga ega boʻlgan, tovar-pul munosabatlariga asoslangan aniq ijtimoiy moʻljali bor, bozor signallariga binoan va pul vositasida boshqarilib turuvchi iqtisodiyotdir.

Bozor iqtisodiyotining mohiyati va belgilari quyidagilardan iborat:

iqtisodiy faoliyatning erkinligi;
mulk shakllarining xilma-xilligi;
iqtisodiyotning antimonopolistik xarakteri;
raqobat;
sogʻlom pul muomalasi;
yuridik va jismoniy shaxslarning teng imkoniyati;
narx-navoni erkinlashtirish;
iqtisodiy manfaatlarni uygʻunlashtirishga erishish;
ijtimoiy yoʻnalishlarning kuchayishi;
boshqaruvga asoslanganligi.

Bozor iqtisodiyotining jadal borishini ta'minlovchi kuchlar:

iqtisodiy faoliyat erkinligi – bu tadbirkorlar uchun keng imkoniyat yaratadi;

qonuniy daromadlarning cheklanmasligi – bu qoʻshimcha daromad topishga undaydi;

sogʻlom raqobat kurashi — bu kim oʻzdi qoidasini yuzaga keltiradi, yangilikni joriy etishga undaydi, texnika-texnologiyani, mehnat unumdorligini va sifatini oshiradi. Qattiq mehnat va ijro etish intizomini yaratadi.

Shunday qilib, Oʻzbekiston oʻzining istiqlol va taraqqiyot yoʻlini tanlab oldi, oʻzining ijtimoiy yoʻnaltirilgan bozor iqtisodiyoti yoʻlini ishlab chiqdi. Ammo, bu yoʻl gʻoyat mashaqqatli va uzoq yoʻldir. Mustaqillikning dastlabki yillarida «Oʻz istiqlol va taraqqiyot yoʻlimiz, – deb ta'kidlagan edi Islom Karimov, – bu gul bilan qoplangan yoʻl emas, bu totalitarizm merosidan xalos boʻlish va poklanish, mafkuraviylik illati yetkazgan ziyon-zahmatlarni bartaraf etishning qiyin, uzoq davom etadigan yoʻlidir. Bu – jahon sivilizatsiyasiga qoʻshilish chinakam siyosiy va iqtisodiy istiqlolga erishish yoʻlidir.

Bu yoʻldan faqat haqiqiy vatanparvargina, oʻz mamlakati va xalqining taqdiri uchun butun qalbi va yuragini bagʻishlagan, oʻz manfaatlarini respublikaning qudratli va farovon boʻlishiga erishish maqsadlariga boʻysundira oladigan, bunga oʻzining kuch-gʻayrati, tashabbusi, bilimi va mehnatini bagʻishlay oladigan kishilargina yura oladi»¹.

«Oʻzbekiston yoʻli» va unga binoan respublikamizda oʻtkazilayotgan islohotlarni akademik M. Sharifxoʻjayev «Istiqlol istiqbollari» risolasida ta'kidlaganidek, «Islom Abdugʻaniyevich islohotlari», deb atalsa xato boʻlmaydi. Chunki islohotlarning ilmiy-nazariy asoslari va yoʻnalishlari Prezidentning mamlakat taraqqiyotiga bagʻishlangan risolalari, nutq va chiqishlarida bayon etilgan. Islohotning oʻzi ham bevosita Islom Karimov rahbarligida amalga oshirilmoqda².

L. Levitin va D. Karlaylning «Islom Karimov – yangi Oʻzbekiston Prezidenti» asarida «Oʻzbekiston yoʻli» xususida quyidagilar bayon qilingan: «Aminmanki, «Oʻzbekiston yoʻli» – bu Islom Karimovning kashfiyoti, koʻp jihatdan, agar ta'bir joiz boʻlsa, uning «NOU-XAU»sidir. Bu uning iqtisodiy tafakkurining natijasi, yaqqol fikrlash qobiliyati, siyosiy yoʻlboshchilik iste'dodi hamda oddiy odamga nima kerakligini bilishi va tabiiyki, dunyo tajribasini juda yaxshi bilishi oqibatidir» ³.

Islom Karimovning «Oʻzbekiston iqtisodiy islohotlarni chuqurlashtirish yoʻlida» (1995) kitobida esa ma'lum darajada yaxlit davrda – bozor iqtisodiyotiga oʻtishning birinchi bosqichi ya'ni istiqlolning toʻrt yili mobaynida mamlakatimiz taraqqiyotining barcha jabhalarida amalga

 $^{^1}$ *Каримов И. А.* Ўзбекистон – бозор муносабатларига ўтишнинг ўзига хос йўли. – Т.: «Ўзбекистон», 1993. – Б. 127.

 $^{^2}$ Шарифхўжаев М. Ш. Истиклол истикболлари. — Т.: «Ўзбекистон», 1994. — Б. 20.

 $^{^3}$ Левитин Л., Карлайл Д. Ислом Каримов — янги Ўзбекистон Президенти. — Т.: «Ўзбекистон», 1996. — Б. 44.

oshirilgan tarixiy ishlarning amaliy yakunlari va uning saboqlari, istiqbolda bajarilishi lozim boʻlgan ustuvor va dolzarb vazifalar chuqur va atroflicha tahlil etilgan.

Shuningdek, bu haqda Koreya Respublikasi Milliy assambleyasi sobiq spikeri Li Man-sop O'zbekiston Prezidentining asarlari, shuningdek, uning nazariyasi va rahbarligida O'zbekistonda tadrijiy bosqichma-bosqich amalga oshirilib kelinayotgan islohotlar bilan anchadan buyon yaxshi tanish ekanligi, soʻnggi oʻn yil va asosan avj olayotgan jahon moliyaviy inqirozi nafaqat asosiy ijtimoiy-siyosiy islohotlarni amalga oshirish, balki jahon inqirozi oqibatida yuzaga kelgan murakkab vaziyatdan chiqish borasida ham Oʻzbekiston tomonidan tanlangan yoʻlning toʻgʻri ekanligini aniq koʻrsatgani haqida yozadi. U sanoatni modernizatsiya qilish va texnik jihatdan yangilashda bank va takomillashtirishning davlat tomonidan quvvatlanishi Oʻzbekistonga tashqi salbiy ta'sirdan kelayotgan zararni kamaytirishi va asosiy makroiqtisodiy koʻrsatkichlarning barqarorligini ta'minlash imkoniyatini berganini ta'kidlagan. Yuqorida ko'rib chiqilgan bozor iqtisodiyotiga oʻtishning turli modellari barcha mamlakatlarni bitta manzilga – erkin bozor igtisodiyoti tizimiga olib keladi. Ammo, bozor munosabatlari shakllanishining sotsial-iqtisodiy, tarixiy, milliy va xalqaro sharoiti har xil bo'lganligi tufayli, unga o'tishning milliy xususiyatlari ham mavjud boʻladi.

Shu nuqtai nazardan biror mamlakatning taraqqiyot yoʻlini yoki taraqqiyot modelini borligicha qabul qilib boʻlmaydi. Fransiyada chop etiladigan «Liberasyon» gazetasi muxbirining «Turkiya modeli» xususida bergan savoliga Prezident Islom Karimov quyidagicha javob berdi: «Turkiya bozor munosabatlari yoʻliga oʻtib erishgan tub oʻzgarishlari bilan ham hurmatga loyiqdir. Biroq, mustaqil Oʻzbekiston Turkiya yoʻlidan koʻr-koʻrona nusxa koʻchirmoqchi emas. Odamzod birovning boʻyiga qarab oʻziga toʻn bichmaydi» 1.

Oʻz mamlakati milliy manfaatlarini hisobga olmay, Vatan taraqqiyoti va xalq farovonligini ta'minlash mumkin emas. Turli xorijiy mamlakatlar taraqqiyot modeliga koʻr-koʻrona tayanib, ish tutgan MDH doirasidagi ayrim mamlakatlarda islohotlarda depsinish hollari, tashqi qarzga botish, jahon moliyaviy-iqtisodiy inqirozi sharoitida ochilib, oʻzining zaif tomonlarini koʻrsatdi.

 $^{^1}$ *Каримов И. А.* Истиклол йўли: муаммолар, режалар. – Т.: «Ўзбекистон», 1992. – Б.11.

Prezident Islom Karimov bozor munosabatlariga oʻtishda oʻxshashi boʻlmagan, betakror yaxlit andozamizni ishlab chiqdi va oʻz yoʻlimizni belgilab berdi. *Bu yoʻl uch tarkibiy qismdan iborat:*

- ijtimoiy jihatdan yoʻnaltirilgan bozor iqtisodiyoti milliy andozasi mohiyatining tavsifi (xarakteristikasi);
- ➤ qat'iy markazlashtirilgan ma'muriy-buyruqbozlik tizimidan xo'jalik yuritishning bozor munosabatlariga asoslangan yo'liga o'tishning eng muhim prinsiplari;
- iqtisodiy islohotlarni amalga oshirishning, tanglikdan chiqib olishning, barqarorlikni va muhim ijtimoiy-iqtisodiy rivojlanishni ta'minlashning aniq yoʻnalishlari.

Bu uch tarkibiy qism, ya'ni yangi dasturning eskilaridan farqi nimada, degan savolga Prezident Islom Karimov «Istiqlol yo'li: muammolar va rejalar» risolasida (1992) quyidagicha javob bergan: «Birinchidan, unda O'zbekiston Respublikasining davlat mustaqilligi to'liq aks etgan. Ikkinchidan, bu dastur xom xayol gaplardan iborat emas, balki jamiyat taraqqiyotining ustuvor yoʻnalishlari xususida»dir.

Mustaqillikni qoʻlga kiritgan har bir mamlakat oʻz taraqqiyot yoʻlini izlagan, yangi jamiyat barpo etish borasida oʻz milliy andozasini ishlab chiqqan. Bunda ilk poydevor vazifasini:

- ➤ kishilarning oʻz qadriyatlari tizimi va aniq maqsadni koʻzlab tutilgan yoʻli;
 - milliy an'analar va tarixiy shart-sharoit;
 - real ijtimoiy-iqtisodiy va siyosiy muhit;
 - odamlarning tarkib topgan turmush tarzi va dunyoqarashi oʻtagan.
- «Oʻzbekiston yoʻli» Islom Karimov bozor islohoti yuzasidan olgʻa surgan besh tamoyilga asoslanadi. Ularning mohiyati quyidagicha:

Iqtisod siyosatga nisbatan ustuvor boʻlishi zarur — bu qoida iqtisodiy faoliyat ijtimoiy hayotning birlamchi asosi ekanligidan kelib chiqadi. Iqtisodiyot qanday boʻlsa, ijtimoiy hayotning boshqa tomonlari ham shunga yarasha boʻlishini tarix tasdiqlagan.

Davlat bosh islohotchi boʻlmogʻi kerak — bu bozor iqtisodiyotiga oʻtish uchun zarur boʻlgan islohotlar keng jamoatchilik ishtirokida, davlat ishlab chiqqan dasturlar asosida, uning bevosita ishtiroki va rahbarligida amalga oshiriladi.

Qonunlar va ularga rioya qilish ustuvorligi – bu tamoyil qonunlar oldida barchaning baravarligi, qonunlarga rioya etish, hamma uchun ham

farz, ham qarz boʻlishini bildiradi. Bozor iqtisodiyoti qonunchilikka tayanishi, unga xos boʻlgan faoliyat qoidalari, iqtisodiy munosabatlar, qabul qilingan huquqiy qonunlarda qayd etilishi zarurligi Oʻzbekiston konsepsiyasida hisobga olinadi.

Faol ijtimoiy siyosat yurgizish — Oʻzbekiston konsepsiyasida aholining keng qatlamlari, eng avval uning nochor guruhlarining ijtimoiy himoyasini ta'minlash chora-tadbirlarini koʻrish zarur, deb qaraladi. Himoyalash dasturlari aholining ruhiyati va koʻnikmalarini e'tiborga olishi zarur.

Bozor iqtisodiyotiga bosqichma-bosqich oʻtish — totalitar tizim oʻzoʻzidan bozor tizimiga aylana olmaydi, uni faqat chuqur isloh qilish bilangina bozor tizimiga oʻtish mumkin. Tarixda hech qachon bir iqtisodiy tizimdan boshqasiga oʻtish birdaniga, qisqa vaqt ichida va farmon e'lon qilgan bilan boʻlmaydi.

Bu qoidalar oʻz istiqlol, rivojlanish va taraqqiyot yoʻlimizga asos qilib olingan boʻlib, oʻtish davri dasturining negizini tashkil etadi.

Bu beshta qoidaga oʻz munosabatini Germaniyaning sobiq kansleri Gelmut Kol shunday bildirdi: «Davlat rivojining besh tamoyilini ishlab chiqib, uni qoʻrqmay olamga e'lon qilayotgan yangi davlatning rahbari tutgan yoʻl muvaffaqiyatning garovidir»¹.

Bu qoidalar Oʻzbekistonning oʻziga xos sharoitlarini hisobga olgan holda izchillik bilan shakllantirib borishni, unga sekin-asta, bosqichma-bosqich, xalqni himoya qilib borib, ijtimoiy barqarorlikni ta'minlash orqali bozor iqtisodiyotiga oʻtishni bildiradi.

Davlatimiz rahbari Islom Karimov: «Faqat farmonlar, farmoyishlar chiqarish bilan bozor iqtisodiyotini barpo etib boʻlmaydi. U uzoq tarixiy taraqqiyotning natijasi boʻlib, tegishli infrastrukturani va huquqiy asosni yaratishgina emas, shu bilan birga, qadriyatlar tizimida chuqur oʻzgarishlarni, xoʻjalik faoliyati va amaliy munosabatlarni asoslashni ham koʻzda tutadi»², – deb ta'kidlagan.

Mustaqillikka erishgandan buyon oʻtgan davr ichida Oʻzbekiston Respublikasi oʻz taraqqiyot yoʻlining salmoqli qismini bosib oʻtdi. Iqtisodiy va siyosiy tizimni yanada isloh qilish, ijtimoiy yoʻnaltirilgan

 $^{^1}$ Шарифхўжаев М. Истиклол истикболлари. — Т.: «Ўзбекистон», 1994. — Б. 66.

 $^{^2}$ *Каримов И. А.* Ўзбекистон: миллий истиклол, иктисод, сиёсат, мафкура. Т.1. – Т., 1996. – Б. 315.

bozor iqtisodiyotini barpo etish, ichki va tashqi siyosatni shakllantirishning puxta bazasi yaratildi.

2. Bozor iqtisodiyotiga oʻtish konsepsiyasi va islohotlar strategiyasi

O'zbekistonning bozor iqtisodiyotiga o'tish konsepsiyasi deganda totalitar iqtisodiy tizimdan bozor iqtisodiyotiga o'tishning qonunqoidalari va uning Oʻzbekistondagi xususiyatlariga oid ilmiy qarashlar majmui tushuniladi. Bu konsepsiya umumlashgan holda Prezident Islom Karimovning risolalari, maqolalari va nutqlarida, asarlarida, mamlakat Oliy Majlisi qabul etgan qarorlar va qonunlarda, oʻzbekistonlik olimlar va mutaxassislarning asarlarida atroflicha ishlab chiqildi. Bu konsepsiya umumlashgan holda Islom Karimovning «Istiqlol yoʻli: muammolar va rejalar» (1992), «O'zbekistonning o'z istiqlol va taraqqiyot yo'li» (1992), «O'zbekiston: bozor munosabatlariga o'tishning o'ziga xos yo'li» (1993), «O'zbekiston igtisodiy siyosatining ustuvor yo'nalishlari» (1993), «O'zbekiston iqtisodiy islohotlarni chuqurlashtirish yo'lida» (1995), «O'zbekiston XXI asr bo'sag'asida: ... » (1997), «O'zbekiston XXI asrga intilmoqda» (2000), «Bizning bosh maqsadimiz jamiyatni demokratlashtirish va yangilash, mamlakatni modernizatsiya va isloh etishdir» (2005), «Vatanimiz va xalqimizga sadoqat bilan xizmat qilish - oliy saodatdir» (2007), «O'zbekistonning 16 yillik mustaqil taraqqiyot yo'lida» (2007), «Yuksak ma'naviyat – yengilmas kuch» (2008), «Jahon moliyaviyiqtisodiy inqirozi», «Oʻzbekiston sharoitida uni bartaraf etishning yoʻllari va choralari» (2009), «Asosiy vazifamiz – Vatanimiz taraqqiyoti va xalqimiz farovonligini yanada yuksaltirishdir» (2010), «Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi» (2010), «O'zbekiston mustaqillikka erishish demokratik (2011),«Bizning yoʻlimiz ostonasida» islohotlarni chuqurlashtirish va modernizatsiya jarayonlarini izchil davom ettirish yoʻlidir» (2011) asarlarida bayon etilgan va mamlakatimiz iqtisodiy tafakkur tarixida oʻziga xos sahifa boʻlib, shubhasiz erkin ilmiy izlanishlar mahsulidir. Yuqoridagi asarlarda bildirilgan fikr-mulohazalarni milliy mustaqillik nazariyasining ajralmas qismi deb qarash zarur, chunki iqtisodiyotni rivojlantirmay turib milliy mustaqillikni ta'minlash mumkin emas. Shuningdek, mazkur asarlar iqtisodiyot nazariyasi fanining rivojlanishida muhim metodologik manba bo'lib xizmat qilmoqda.

Oʻzbekistonning bozor iqtisodiyotiga oʻtish konsepsiyasi real iqtisodiy sharoitdan kelib chiqqanligini hayotning oʻzi isbotladi. Gap shundaki, Oʻzbekiston, *birinchidan*, sotsialistik iqtisodiy tizim sharoitida, *ikkinchidan*, esa Sovet imperiyasi tarkibida rivojlandi. Bu esa uni qoloqlikka mahkum etdi. Oʻzbekiston resurslarga boy mamlakat boʻla turib, iqtisodiy taraqqiyotda koʻpgina Sharq mamlakatlaridan orqada qolib ketdi. 1990-yili aholi jon boshiga ishlab chiqarish boʻyicha dunyoda 75–80 oʻrinni egalladi, ishlab chiqarishning oʻsish sur'ati, uning strukturasi, tarkibining yangilanishi, ya'ni diversifikatsiyasi jihatidan dunyo talablaridan ancha orqada qoldi.

Mustaqil Oʻzbekiston iqtisodiy yangilanishga muhtoj edi, buning uchun esa bozor munosabatlarini yaratish kerak boʻldi. Butun dunyo tajribasi koʻrsatganidek, iqtisodiy yuksalish uchun bozor munosabatlariga oʻtishdan boshqa najot yoʻli yoʻq. Prezident Islom Karimov «jahon sivilizatsiyasi ijtimoiy taraqqiyotning sifat jihatidan yangi yoʻllarini ishlab chiqdi, tartibga solingan bozor iqtisodiyoti mana shu yoʻlga asoslanib olingan»ligini ta'kidlaydi. Ammo bu yoʻlning hamma yerda oʻziga xos xususiyatlari borligini, Oʻzbekiston konsepsiyasi mana shundan kelib chiqadi va bozor iqtisodiyotiga oʻtishda oʻz yoʻli borligini koʻrsatadi¹.

Bozor iqtisodiyotiga oʻtishning yoʻllari²:

Rivojlangan mamlakatlar yoʻli — bu yoʻl asrlar osha tarixiy-tabiiy jarayon sifatida amalga oshib, uzundan-uzoq davom etgan oʻzgarishlar orqali bozor iqtisodiyotiga xos belgilar yuzaga keladi. Bu yoʻl — bozor iqtisodiyotining oʻziga xos klassik shakllanish jarayonidir.

Mustamlakadan ozod boʻlib mustaqil taraqqiyot yoʻliga oʻtib rivojlanayotgan Osiyo, Afrika va Lotin Amerikasi mamlakatlari yoʻli — ikkinchi yoʻlga xos muhim tomon — bu mustamlakachilikdan meros qolgan qoloq an'anaviy iqtisodiyotdan bozor iqtisodiyotiga oʻtishdir. Bunda bozor iqtisodiyotiga xos belgilar xoʻjalik turlarining transformatsiyasi orqali roʻy beradi. Natural xoʻjalik bozor doirasiga tortilib, tovar xoʻjaligiga aylanadi va undan bozor iqtisodiyoti belgilari oʻsib chiqadi.

Sobiq sotsialistik mamlakatlar yoʻli — uchinchi yoʻlning muhim belgisi — totalitar iqtisodiy tizimdan erkin bozor tizimiga oʻtish hisoblanadi. Totalitar tizim davlatlashgan sotsializm shaklida amal qilgan.

 $^{^1}$ Қаранг: *Каримов И. А.* Ўзбекистон – бозор муносабатларига ўтишнинг ўзига хос йўли. – Т., 1993. – Б. 22.

 $^{^2}$ Ўлмасов А., Вахобов А.В. Иктисодий назария: Дарслик. — Т., 2006. — Б. 88–89.

Unga davlat mulkining tanho hukmronligi, iqtisodiyotning oʻta davlatlashgan boʻlishi, moddiy ne'matlarni davlat bir tekisda taqsimlashi, xususiy-iqtisodiy faoliyatning man etilishi, tadbirkorlikni boʻgʻib qoʻyib, mahalliy tashabbusga yoʻl bermaslik, eksport-importni qattiq nazorat qilish, iqtisodiyotning oʻta harbiylashgan boʻlishi xosdir.

Bozor iqtisodiyotiga xos yangi huquqiy tizimning oʻzagini Asosiy qonun — respublika Konstitutsiyasi tashkil etadi. Shu bois ijtimoiy yoʻnaltirilgan bozor iqtisodiyotining qonunchilik asosini yaratish — bu faqat oʻtish davrining majburiy sharti boʻlib qolmay, balki huquqiy davlat barpo etishning oʻziga xos xususiyati hamdir.

Bozor iqtisodiyoti qonunchilikka tayanishi, unga xos boʻlgan faoliyat qoidalari, iqtisodiy munosabatlar qabul qilingan huquqiy qonunlarda qayd etilishi zarurligi Oʻzbekiston konsepsiyasida hisobga qilingan amaldagi qonunlar olinadi. tarkibida, Oabul munosabatlarini tartiblovchi, ularning ma'lum yo'nalishda bo'lishini ta'minlovchi va iqtisodiyotga oid qonunlar alohida o'rin tutadi. Davlatimiz rahbari: «Yaxlit bozor tizimi vujudga kelishi uchun uning turli tomonlariga oid barcha qonunlar o'zaro muvofiqlashgan bo'lishi shart. Qonunlardagi nomuvofiqliklarga yoʻl qoʻyib boʻlmaydi», ta'kidlagani barchamizga ma'lum. Darhaqiqat, qonunlar barcha faoliyat turlarining uzviy bogʻlanishiga xizmat qilganda haqiqiy bozor munosabati kelib chiqadi. Mustaqillik yillarida qonunlarni amalga oshirish, ularni ta'sirchan qilish uchun zarur bo'lgan barcha dastak va vositalar yaratilishiga erishildi. Amaldagi qonunlar biz intilayotgan fuqarolik jamiyatining iqtisodiy negizini mustahkamlashga xizmat qilmoqda. Prezident Islom Karimov mukammal qonunlarsiz bozor iqtisodiyoti amal qila olmasligini inobatga olib: «Ijtimoiy yoʻnaltirilgan madaniy-ma'rifiy bozor xoʻjaligini tegishli ravishda huquqiy jihatdan ta'minlamasdan turib bunday xo'jalikni shakllantirishni tasavvur qilib bo'lmaydi»¹, – deb ta'kidlaydi.

Bozor iqtisodiyotiga xos huquqiy tizim va huquqiy davlatni barpo etish tamoyillari:

- ➤ qonunlarning hayot, amaliyot bilan uzviy bogʻliqligi va undan kelib chiqishi;
- > qonun hujjatlari bevosita ta'sir ko'rsatish kuchiga ega bo'lishi kerak;
 - > qonunga boʻysunish huquqiy davlatning muhim xususiyatidir;

 $^{^1}$ *Каримов И. А.* Ўзбекистон – бозор муносабатларига ўтишнинг ўзига хос йўли. – Т., 1993. – Б. 67.

- > qonunning ustuvorligini ta'minlash;
- ➤ huquqiy madaniyat yuqori darajada boʻlishi kerak.

Mustaqillikning dastlabki yillarida Prezident Islom Karimov «bozor munosabatlariga oʻtish davrida davlat bosh islohotchi boʻlishi, iqtisodiyot va ijtimoiy turmushning hamma sohalarini oʻzgartirish rejalarini tuzib, uni izchillik bilan amalga oshirishi zarur»ligi vazifasini qoʻydi.

Davlat iqtisodiy faoliyatining asosiy yoʻnalishlari:

- bozor iqtisodiyoti huquqiy asoslarini ta'minlash;
- ➤ bozor mexanizmi yaxlitligi va uning me'yorida ishlashi uchun shart-sharoit yaratish;
- ➤ aholini iqtisodiy jihatdan himoya qilish va daromadlarini adolatli taqsimlash;
 - > atrof-muhitni muhofaza etish;
- > xalqaro iqtisodiy munosabatlarning samarali rivojlanishini ta'minlash.

Bunda (1991–2000-yillar) davlatning iqtisodiy vazifalari:

- ➤ tartibga solinadigan bozor sharoitida asosiy maqsad yoʻnalishlarini ishlab chiqish ijtimoiy-iqtisodiy islohotlarni amalga oshirishning strategik yoʻlini belgilaydi va bu boradagi taktik xatti-harakatlarni amalga oshiradi;
- ➤ bozor iqtisodiyotiga oʻtish davrida iqtisodiy erkinliklarning kafolati vazifasini oʻtaydi;
 - bozor institutlarini yaratish uchun qulay sharoit tugʻdiradi;
- > vujudga kelayotgan ishbilarmonlik tuzilmalari qaror topishi va rivojlanishiga koʻmaklashadi;
- ➤ aniq maqsadga qaratilgan tuzilma siyosatni amalga oshiradi (ustuvor yoʻnalishlarni aniqlaydi);
- ➤ hamma ma'lum iqtisodiy vositalar moliya, kredit, soliq, valuta siyosati, narx-navoni nazorat qilish va bevosita ta'sir o'tkazishning choralari orqali iqtisodiy va ijtimoiy jarayonlarni tartibga soladi;
- iqtisodiyotni sogʻlomlashtirish muammolarini birinchi navbatda hal etadi.

Oʻzbekiston konsepsiyasida Prezident Islom Karimov «Oʻzbekiston oʻz yangilanish va taraqqiyot yoʻliga asos boʻlgan eng muhim qoidalardan biri sifatida bozor iqtisodiyotiga oʻzining barcha bosqichlarida oldindan kuchli ijtimoiy siyosat oʻtkazish» zarurligini koʻradi va ijtimoiy siyosatni amalga oshirish bosqichlarini belgilab

berdiki, bu jahon moliyaviy-iqtisodiy inqirozi sharoitida ijtimoiy xavfsizlikni ta'minlash sharti boʻlib xizmat qildi.

Ijtimoiy siyosatni amalga oshirish bosqichlari. Davlatimiz rahbari Islom Karimov: «Bozor mexanizmlarini joriy etishdan oldin insonlarni ijtimoiy himoya qilish tadbirlari amalga oshirilmogʻi lozim»¹, – degan edi. Yurtboshimiz Shvetsiya, Germaniya, Avstriya va boshqa mamlakatlar tajribasiga tayanib, kafolatlangan ijtimoiy himoya mexanizmi yaratilsagina, ijtimoiy-siyosiy barqarorlikni saqlagan holda iqtisodiyotni isloh qilish zarurligini ta'kidlaydi. Chunki:

- ➤ ijtimoiy siyosat aholi moddiy ahvolining keskin yomonlashib, ommaviy ravishda qashshoqlanishiga yoʻl qoʻymaslikdan iborat;
- ➤ ijtimoiy siyosatning ijtimoiy himoyalanish vositalarini chuqurlashtirish va oʻzgarib borayotgan sharoitlarga moslashtirishdan iborat;
- ijtimoiy himoyalash chora-tadbirlari faqat shunday himoyaga haqiqatan ham muhtoj boʻlganlarga nisbatan qoʻllaniladi.

Bozor munosabatlarini 1991–2000-yillarda shakllantirishning ijtimoiy siyosatning asosiy yoʻnalishlari:

- ➤ fuqarolarning mehnat qilish borasidagi konstitutsiyaviy huquqlarini ta'minlash;
- ➤ ijtimoiy himoyalash maqsadli va aniq yoʻnaltirilgan boʻlishi kerak;
- ➤ aholining ijtimoiy jihatdan eng muhtoj tabaqalarini qoʻllabquvvatlash;
 - iqtisodiy jihatdan faol aholi mehnatini ragʻbatlantirish;
 - > real mehnat bozorini shakllantirish;
- ijtimoiy soha, sogʻliqni saqlash, ta'lim, madaniyat va san'at, ilmfanning rivojlanmay qolishiga yoʻl qoʻymaslik.

Insonparvarlik gʻoyalariga sodiqlikni yuzaga chiqarib, kundalik hayotda «Inson huquqlari umumiy deklaratsiyasi»da mustahkamlangan me'yorlarni izchilik bilan, ogʻishmay qaror toptirish maqsadida Oʻzbekistonning ijtimoiy bozor iqtisodiyotida quyidagi muhim elementlarga e'tibor qaratildi:

➤ kishilar farovonligini oshirishni ta'minlaydigan pirovard natijaga erishishga qaratilgan ijtimoiy yoʻnalish;

 $^{^1}$ *Каримов И. А.* Ўзбекистон: миллий истиклол, иктисод, сиёсат, мафкура. Т.1. – Т., 1996. – Б. 65.

- iqtisodiyotni barqarorlashtirish muammosini hal etish bilan mehnatga layoqatli aholini ish bilan yetarli darajada ta'minlangan holda makroiqtisodiyotni o'stirish o'rtasidagi teng nisbat;
- piymat, talab va takliflar qonunining amal qilishi asosida barcha xoʻjalik yurituvchi subyektlarni ishlab chiqarishdan eng koʻp samara olish yoʻlini izlashga undashni ta'minlovchi bozor mexanizmidan foydalanish asosida iqtisodiy boshqarish;
- ishlab chiqarishning bevosita davlat tomonidan boshqarilishidan uzoqlashish, iqtisodiy jihatdan maqsadga muvofiqlikdan kelib chiqqan holda, faoliyat turini, yetishtiriladigan mahsulot hajmini va xilini, ishlab chiqarish xoʻjalik aloqalarini aniqlash erkinligini tovar ishlab chiqaruvchilarning oʻziga berish;
- investitsiya siyosatining ustuvor jihatlarini tanlashda va chet el sarmoyasini jalb etishda maqsadga muvofiq shartlarni joriy etish, iqtisodiy dastaklar va ragʻbatlardan foydalanish, ishonchli ijtimoiy kafolatlarni ta'minlash yoʻli bilan iqtisodiyotni boshqarishda davlatning faol rolini saqlab qolish.

Mana shunday sharoitda respublika oldida turgan asosiy masala bir tizimdan ikkinchi bir tizimga oʻtishda odamlarning yashash darajasini ogʻirlashtirmaslik edi.

Davlatimiz rahbari Islom Karimov «Mustaqillikka erishish davri haqida, eski tuzum inqirozga duchor boʻlib, sobiq Ittifoq parokandalikka yuz tutgan bir paytda mamlakatimizda tobora keskin tus olgan siyosiy, ijtimoiy va iqtisodiy vaziyat, oʻzligimizni anglash va toptalgan milliy gʻururimizni tiklashga qaratilgan intilish kuchayib borgani, Vatanimiz mustaqilligini qoʻlga kiritish qanday sharoitda kechgani haqida yaxlit, yagona va xolis koʻz bilan qarab baho beradigan jiddiy tahlil-tadqiqot hozirgacha amalda yoʻqligini afsus bilan aytishga toʻgʻri keladi.

Oʻzbekiston mana shunday tahlikali va murakkab vaziyatda qanday maqsadlarni koʻzda tutib, qanday amaliy chora-tadbirlarni amalga oshirganini, bu harakatlarning ilmiy-tarixiy, mantiqiy va qonuniy zamini va omillari, kerak boʻlsa, istiqlol oʻzbek xalqiga tuhfa tariqasida berilmagani — bularning barchasi haqida har taraflama chuqur yoritib va isbotlab beradigan izlanish va tahlil bugungi kunda ham oʻzining dolzarbligi va ahamiyatini yoʻqotmaganini» qayd etadi.

Ma'lumki, SSSR parchalanib ketganidan keyin sobiq sovet hududida juda keskin va tahlikali vaziyat yuzaga keldi. Bu esa boshboshdoqlikning

 $^{^1}$ *Каримов И. А.* Ўзбекистоннинг 16 йиллик мустақил тараққиёт йўли. – Т.: «Ўзбекистон», 2007. – Б. 4.

oldini olish, huquq-tartibotni saqlash va aholining eng zarur, birinchi galda, oziq-ovqat mahsulotlariga boʻlgan ehtiyojini ta'minlash boʻyicha zudlik bilan tegishli choralar koʻrishni talab etdi. Oʻsha qaltis va murakkab davrda yurtimizda bor-yoʻgʻi oʻn-oʻn besh kunga yetadigan bugʻdoy va un zaxirasi qolgani, mamlakat amalda ocharchilik ostonasiga kelib qolganini yoddan chiqarib boʻlmaydi.

Tabiiyki, bunday hol avvalo butun sovet tizimiga xos boʻlgan markazlashtirilgan usulda rejalashtirish va taqsimlashdek illatlarning ta'siri edi. Lekin, eng yomoni, Oʻzbekiston iqtisodiyoti asosan xom ashyo tayyorlashga yoʻnaltirilgani, biryoqlama rivojlanish hisobidan moʻrt va nochor holga tushib qolgan boʻlib, iqtisodiyotga, ekologiya va aholi genofondiga halokatli ta'sir oʻtkazadigan paxta yakkahokimligi yurtimizdagi vaziyatni jar yoqasiga olib kelib qoʻygan edi. Buning oqibatida ulkan tabiiy, mineral-xom ashyo, mehnat va inson salohiyatiga ega boʻlishiga qaramay, respublikamiz sobiq SSSRda aholi turmush darajasi, ijtimoiy va gumanitar sohalar rivoji boʻyicha oxirgi oʻrinlardan birida turar edi. Buni aholini roʻyxatga olish boʻyicha 1989-yilda oʻtkazilgan statistik ma'lumotlar ham tasdiqlaydi.

Boz ustiga, amaldagi sovet puli oʻz qimmatini yoʻqotib boʻlgan, yangi milliy valutamiz esa hali joriy etilmagan edi. Bunday sharoitda iqtisodiyotning fojiali ravishda inqirozga yuz tutishi va inflatsiyaning oʻta keskin, hatto yiliga minglab foizga oʻsib ketishini jilovlash favqulodda muhim ahamiyat kasb etar edi. Birinchi galda ilgari shakllangan xoʻjalik, ishlab chiqarish va moliyaviy aloqalarning butunlay uzilishiga barham berish, ommaviy ishsizlikning oldini olish zarur edi.

Ichki va tashqi xavfsizlikni ta'minlash tizimining parchalanishi natijasida jamiyatda huquqiy boʻshliq vujudga kelgani, millatlar va dinlararo, hududiy va turli guruhlar, urugʻ-aymoqlar oʻrtasidagi ziddiyatlarning avj olib ketish xavfi, radikal kayfiyatlarning, ayniqsa, yoshlar oʻrtasida kuchayishi gʻoyat jiddiy xatarga aylangan edi. Qisqacha aytganda, tub ildizlari sovet davlatining soʻnggi yillariga borib taqaladigan ichki va tashqi mojarolardan mamlakatimizni asrab qolish talabi oʻta keskin boʻlib turar edi.

Bu oʻrinda, avvalambor, el-yurtimiz boshidan kechirgan 1984–1989-yillardagi mudhish qora kunlarni eslash kifoya, deb oʻylayman. Oʻsha davrda respublikamizda yuzaga kelgan ogʻir ijtimoiy ahvol sababli aholining kuchayib borayotgan noroziligining oldini olish va toʻxtatish uchun KPSS Markaziy komiteti qarori bilan Oʻzbekistonga yuborilgan, xalq juda topib, «desantchilar» deb atagan guruh tomonidan sodir etilgan

qonunsizlik va zoʻravonlikni koʻpchilik yaxshi eslaydi. Bu haqda gapirganda, Quvasoy, Fargʻona va Qoʻqon, Namangan, Boʻka va Parkent, Guliston, Toshkent va Oʻshda roʻy bergan fojiali voqealar odamlarimiz qalbida qoldirgan bitmas jarohatlarni, yurtimizga chet eldagi markazlar tomonidan moliyaviy ta'minlangan va boshqarilgan terrorchi toʻdalar Surxondaryo va Toshkent viloyatlarining togʻli tumanlari orqali suqilib kirgan tahlikali kunlarni ham eslashimiz lozim. Agarki ana shu yovuz niyatli kuchlarning qabih va uzoqni koʻzlagan buzgʻunchilik maqsadlari amalga oshganida bormi, mamlakatimiz fuqarolar urushi olovi ichida qolib ketgan va uning oqibatlari, hech shubhasiz, butun Oʻrta Osiyodagi vaziyatni portlatib yuborgan boʻlur edi.

Respublikada vujudga kelgan bunday oʻta murakkab va fojiali sharoitda Prezident Islom Karimov oʻzini yoʻqotmasdan, vazminlik siyosati bilan ish tutib, qat'iy siyosiy irodani namoyon etib, mamlakatni chuqur tanazzuldan olib chiqishga qaratilgan, har tomonlama puxta oʻylangan strategiyani ishlab chiqdi va uni amalga oshirish uchun jamiyatdagi barcha sogʻlom kuchlarni safarbar etganligini qayta-qayta va takroran eslash joiz.

Biz siyosiy va iqtisodiy taraqqiyot, davlat va jamiyat qurish strategiyasini barpo etishda xalqimizning tarixan shakllangan milliy va madaniy oʻziga xos xususiyatlarini hisobga olgan, mamlakatimizning mavjud tabiiy-iqtisodiy, mineral xom ashyo va insoniy salohiyatini xolisona va jiddiy baholagan holda, jahon xoʻjalik aloqalari tizimida oʻzimizga munosib joy egallashni maqsad qilib qoʻyib, bunday marralarga erishishni asosiy vazifamiz sifatida belgilab oldik.

Shu borada mamlakatimizni isloh qilish va milliy davlatchilik poydevorini barpo etish boʻyicha qabul qilingan ana shu strategiyani amalga oshirishdagi birinchi qadamlarimizning nimalardan iborat boʻlganini yana bir bor eslab, uni nimalardan iborat boʻlganligini keltirishni lozim topdik.

Avvalo, tarixan juda qisqa muddatda Asosiy qonunimiz — Oʻzbekiston Respublikasining Konstitutsiyasi ishlab chiqildi va qabul qilindi. Bu qomusiy hujjatda mamlakatimizda davlat va jamiyat qurilishining asosiy tamoyillari aniq ifodalab berildi, davlat hokimiyatining qonun chiqaruvchi, ijro etuvchi va sud tarmoqlariga boʻlinishi eng muhim tamoyil sifatida belgilandi. Shuningdek, inson huquqlarining davlat manfaatlaridan, umume'tirof etilgan xalqaro huquq normalarining esa milliy huquqiy me'yorlardan ustunligi ham Konstitutsiyada muhrlab qoʻyildi. Asosiy qonunimizda hech qanday

mafkuraning davlat mafkurasi sifatida oʻrnatilishi mumkin emasligi va ijtimoiy-siyosiy hayot siyosiy institutlarning rang-barangligi, mafkura va fikrlarning xilma-xilligiga asoslanishi belgilab berildi. Ayni paytda barcha mulk shakllarining teng huquqliligi sharoitida xususiy mulkning ustuvorligi konstitutsiyaviy asosda mustahkamlab qoʻyildi.

Ana shu tamoyillarni inobatga olib, davlat va iqtisodiyotni boshqarishning mustabid, markazlashgan tizimiga barham berish, mustaqil Oʻzbekistonning yangi siyosiy va davlat tuzilishi asoslarini, avvalo qonunchilik tizimini shakllantirish, markazda va joylarda vakolatli hokimiyat organlarining yaxlit tizimini tashkil etishga qaratilgan ishlar aniq maqsadni koʻzlab bosqichma-bosqich amalga oshirildi.

Ikkinchidan, murakkab oʻtish davrida qabul qilingan qonunlarning amalda bajarilishini ta'minlay oladigan, fuqarolarning huquq va erkinliklarini himoya qilish, siyosiy va iqtisodiy islohotlarni amalga oshirishga qodir boʻlgan ijro hokimiyatining samarali tizimi va tuzilmalarini yaratish muhim ahamiyatga ega edi. Shu maqsadda tub ma'muriy islohotlar amalga oshirildi: markazlashgan rejalashtirish va taqsimlash tizimining tayanchlari boʻlgan Davlat plan komiteti, Davlat ta'minot komiteti, Davlat narx komiteti, Davlat agrosanoat komiteti va koʻplab tarmoq vazirliklari tugatildi, mahalliy hokimiyat organlari qayta tashkil qilindi — viloyat, tuman va shaharlarda hokimlik instituti joriy etildi.

Oʻtgan davr mobaynida milliy iqtisodiyotni shakllantirish va uni tubdan isloh qilish mamlakatimiz mustaqil taraqqiyotining eng muhim omili va asosini tashkil etganini alohida ta'kidlash zarur. Bu borada davlatimiz oldida respublika va aholi ehtiyojini, birinchi navbatda yoqilgʻi-energetika resurslari, iste'mol va oziq-ovqat mahsulotlariga boʻlgan talabni ishonchli tarzda qondirishdek dolzarb hayotiy vazifa turar edi.

Yurtimizda yoqilgʻi-energetika va gʻalla mustaqilligiga erishish muhim strategik vazifa sifatida kun tartibiga qoʻyildi. Bu oʻrinda avvalo shuni aytish lozimki, Oʻzbekiston tabiiy gaz, neft va gaz kondensati boʻyicha aniqlangan ulkan sanoat zaxiralariga ega boʻlganiga qaramasdan, ilgari iqtisodiyot tarmoqlari va aholi ehtiyojini qondirish uchun-yiliga 6–7 million tonna neft va neft mahsulotlarini chetdan keltirish va buning uchun katta miqdordagi valuta resurslarini sarflashga majbur boʻlar edi. Bu jiddiy muammoni hal etish maqsadida qisqa fursat ichida Oʻzbekistondagi uglevodorod xom ashyosini qazib olish va qayta ishlash boʻyicha maqsadli dasturlar ishlab chiqildi va amalga oshirildi.

Yangi neft-gaz konlarini aniqlash, neft va tabiiy gazni qazib olish uchun zarur boʻlgan investitsiyalar topildi, jumladan, xorij sarmoyasi jalb etildi. Buxoroda neftni qayta ishlaydigan yangi zamonaviy zavod barpo etildi, Fargʻona va Oltiariqdagi neftni qayta ishlash zavodlari modernizatsiya va rekonstruksiya qilindi, ularning barqaror va ishonchli faoliyat koʻrsatishi uchun shart-sharoit yaratildi.

Shuningdek, oʻzining ishlab chiqarish va iqtisodiy salohiyatiga koʻra oʻxshashi boʻlmagan Shoʻrtan gaz-kimyo majmui kabi noyob inshoot barpo etildi. Ushbu korxonada tayyorlanayotgan suyultirilgan gaz, turli markadagi polietilen va boshqa mahsulotlarga nafaqat mamlakatimiz, balki chet ellarda ham talab katta ekanini qayd etish lozim.

Mustaqillik yillarida ana shunday yirik korxonalarning qurilishi va rekonstruksiya qilinishi natijasida hozirgi vaqtda yurtimizda neft mahsulotlari ishlab chiqarish hajmi 1990-yilga nisbatan 3 barobardan ziyod ortdi. Bugungi kunda Oʻzbekiston bu borada mamlakatning va aholining oʻsib borayotgan ehtiyojlarini ta'minlash bilan birga, eksport hajmini ham koʻpaytirishga erishdi.

Asaka va Samarqand shaharlarida avtomobil zavodlarini barpo etganimiz tufayli mustaqillik yillarida avtomobillar soni keskin oshdi va har 100 oilaning avtomobil bilan ta'minlanish darajasi 6 barobardan ziyod oʻsdi. Oʻz-oʻzidan ayonki, respublikamizda benzin va yoqilgʻi-moylash mahsulotlariga boʻlgan talab ham shunga mos ravishda oshib bormoqda. Aynan neft va neft mahsulotlari ishlab chiqarishni oshirish hisobiga biz bugun jahon moliyaviy-iqtisodiy inqirozi davom etayotganiga qaramasdan respublikamizning rivojlanayotgan sanoati va aholining keskin oʻsib borayotgan mana shunday talab va ehtiyojlarini ta'minlashga erishmoqdamiz.

Ma'lumki, mustaqillikning dastlabki kunlarida aholini non va non mahsulotlari bilan ta'minlash bo'yicha ham o'ta og'ir qiyinchilik va muammolar paydo bo'lgan edi. Bu muammoning sababi avvalo shundaki, O'zbekiston sobiq SSSR va sotsialistik lagerga mansub mamlakatlar uchun asosan paxta xom ashyosi tayyorlar, g'alla va un mahsulotlariga bo'lgan ichki ehtiyojimizning 80 foizdan ortig'i esa chetdan keltirilgan mahsulotlar hisobidan qoplanar edi. Shuni ham ta'kidlash lozimki, o'shayillarda yetishtirilgan paxta xom-ashyosining 7 foizginasi mamlakatimizning o'zida qayta ishlanar, qolgan qismi suvtekin narxda chetga chiqarilar edi.

Aholini oziq-ovqat tovarlari, jumladan, goʻsht va sut, yuz foiz chetdan keltiriladigan shakar mahsulotlari bilan ta'minlash borasida ham murakkab vaziyat vujudga kelgan edi. Ayniqsa, aholini kartoshka bilan ta'minlashning ahvoli bunga yaqqol misol bo'ladi. O'sha vaqtda yurtimizga har-yili Rossiya, Belorussiya, Polsha va boshqa mamlakatlardan qariyb 1 million tonna kartoshka keltirilar edi. Eng yomoni, bu mahsulot noyabr-dekabr oylarida keltirilgani uchun muzlab, uning katta qismi yaroqsiz holga kelar va chorvaga yem bo'lardi. Bugun esa xalqimizning kartoshkaga bo'lgan ehtiyoji to'liq o'zimizda yetishtirilgan hosil hisobidan qoplanmoqda.

Ana shunday murakkab bir davrda biz gʻalla mustaqilligiga erishishdek hayotiy muhim masalani ham oʻz oldimizga ustuvor vazifa qilib qoʻydik. Birinchi navbatda qishloq xoʻjaligini tubdan isloh qilganimiz, mamlakatimiz iqtisodiyoti va ekologiyasiga katta zarar yetkazgan paxta monopoliyasiga barham berganimiz tufayli bu vazifani ham muvaffaqiyatli hal etishga erishdik. Oʻzbekiston bugungi kunda oʻzining gʻallaga boʻlgan ehtiyojini qoplabgina qolmasdan, Mustaqil Davlatlar Hamdoʻstligi tarkibidagi qoʻshni mamlakatlarga, Afgʻoniston, Eron va boshqa davlatlarga gʻalla va un mahsulotlarini eksport qilmoqda. Ushbu mahsulotlarning eksport hajmi Oʻzbekistonda qariyb bir million tonnani tashkil etadi.

Shuni ta'kidlash kerakki, g'alla mustaqilligining qo'lga kiritilishi mamlakatimiz aholisini nafaqat un va non mahsulotlari bilan ta'minlash, ayni paytda uning go'sht va sut mahsulotlariga bo'lgan ehtiyojini barqaror ravishda o'z hisobimizdan qondirish masalasini ham hal qilish imkonini berdi. Bunday ulkan yutuqlar zamirida ana shu murakkab vazifalar yechimini o'z zimmasiga olgan dehqon va fermerlar, qishloq xo'jaligida, iqtisodiyotning barcha tarmoqlarida faoliyat ko'rsatayotgan millionlab mehnatkash insonlarning fidokorona mehnati yotibdi.

Iqtisodiy rivojlanish haqida gapirganda, markazdan rejalashtirish va taqsimlash tizimi samarali mehnat, sifatli va raqobatbardosh mahsulot ishlab chiqarish, tashabbuskorlik va tadbirkorlik yoʻlida asosiy gʻovtoʻsiq boʻlib kelganini ta'kidlash lozim. Shu sababli oʻzining mutlaqo yaroqsiz ekanini koʻrsatgan bu tizimning barcha illatlaridan Prezident rahnamoligida butunlay voz kechganimiz, ayniqsa, prinsipial ahamiyatga ega boʻldi.

Dastlabki yillardayoq Oʻzbekiston xalqi uchun yangilik boʻlgan bozor iqtisodiyotining asoslari yaratildi, bozor infratuzilmasi institutlarini tashkil etish va raqobat muhitini shakllantirish orqali bozor munosabatlarining mexanizmi ishga tushirildi. Mamlakatimizda xususiy

mulkchilik tiklanib, uning rivoji ustuvor ahamiyat kasb etdi. Xususiy mulk konstitutsiyaviy asosda ishonchli kafolatga ega boʻldi.

Iqtisodiyotning asosiy tarmoqlari, savdo va xizmat koʻrsatish sohasi korxonalarining butunlay davlat tasarrufidan chiqarilishi va xususiylashtirilishi natijasida mamlakatimizda amalda koʻp ukladli iqtisodiyot shakllandi, mulkdorlar va tadbirkorlarning yangi sinfi paydo boʻldi va bu sinf yildan-yilga yurtimiz hayotida tobora salmoqli rol oʻynamoqda.

Ayni paytda biz uchun mutlaqo yangi boʻlgan, bozor iqtisodiyoti talablariga javob beradigan moliya va bank tizimini shakllantirish hamda oʻz milliy valutamizni muomalaga kiritish ham ulkan ahamiyat kasb etdi. Albatta, milliy valutaga oʻtish va uning qat'iy toʻlov qobiliyatini ta'minlash oson kechgani yoʻq, lekin qanchalar qiyin va ogʻir boʻlmasin, Oʻzbekiston 2003-yildayoq uning erkin konvertatsiya qilinishiga erishildi.

Zamonaviy ikki pogʻonali bank tizimini yaratish orqali mustaqil pulkredit siyosati yuritish, budjet va pul siyosatining mas'uliyat doirasini aniq belgilab qoʻyish, ularning oʻzaro samarali munosabatini ta'minlash imkoniyati paydo boʻldi. Buning natijasida iqtisodiyotimiz manfaatlarini barqaror va ishonchli tarzda qondirib borishga erishildi. Xoʻjalik yurituvchi subyektlar va budjet tashkilotlarining moliyaviy mablagʻlardan foydalanish borasidagi mustaqilligi sezilarli darajada oshdi.

Ijtimoiy nuqtai nazardan boshlangʻich bosqichda, iqtisodiyotni va butun jamiyatni isloh qilishning eng murakkab oʻtish davrida kuchli ijtimoiy siyosat yuritish va aholini himoya qilishning oʻxshashi boʻlmagan, samarali mexanizmi ishlab chiqilib, muvaffaqiyatli amalga oshirildi. Koʻmakka muhtoj oilalarga moddiy yordam berishda asosan oʻzini oʻzi boshqarishning noyob tuzilmasi boʻlgan mahalla instituti imkoniyatlaridan foydalanish oʻzini toʻla oqladi. Bu, avvalambor, zarur moddiy va ma'naviy yordamni ochiqlik va oshkoralik tamoyillari asosida aniq yoʻnaltirish — aholining haqiqatan ham nochor qatlamlarini qoʻllabquvvatlash, ularni oʻtish davrining qiyinchiliklaridan ishonchli himoya qilish imkonini berdi.

Shu tariqa biz yurtimizda ijtimoiy-siyosiy barqarorlikni ta'minlabgina qolmasdan, ayni paytda islohotlar va mamlakatni yangilash borasida olib borayotgan siyosatimizning xalqimiz tomonidan keng qo'llab-quvvatlanishiga ham erishdik.

Davlatimiz **«oʻzini oʻzi boqishga kuchi yetmagan oʻlkadan bugun oʻzining kuch-qudrati va salohiyatiga tayangan»**¹, izchil iqtisodiy oʻsish ta'minlanayotgan zamonaviy Oʻzbekistonga aylandi.

Yuqoridagi oʻz vaqtida koʻrilgan oqilona chora-tadbirlar chet el ekspertlari ta'kidlaganlaridek, bugungi kunda jahon moliyaviy-iqtisodiy inqirozining Oʻzbekistonda yengil kechishining omillari boʻlib xizmat qildi va qilmoqda.

Mustaqil va suveren davlat maqomini olgan Oʻzbekiston endi xalqaro mehnat taqsimotida qatnashish imkoniga ega boʻldi. Shuningdek, totalitar tizim oʻziga xos usullar bilan ancha kuchli ishlab chiqarish, ilmiytexnikaviy va kadrlar salohiyatini yaratganligini ham aytib oʻtish joiz. Unga tayangan bozor iqtisodiyotiga oʻtish yengil kechadi.

Tayanch tushunchalar:

Konsepsiya, islohot, bosqichma-bosqich bozor iqtisodiyotiga oʻtish, bozor iqtisodiyotining afzalliklari, ijtimoiy himoya siyosati, davlat bosh islohotchi, qonun ustuvorligi, iqtisodiyotning siyosatdan ustuvorligi, totalitarizmdan bozor iqtisodiyotiga oʻtish, ijtimoiy barqarorlik, davlat siyosati.

Savol va topshiriqlar:

- 1. O'zbekistonning bozor iqtisodiyotiga o'tish konsepsiyasining mohiyatini tushuntiring.
- 2. Oʻzbekistonning bozor iqtisodiyoti sari borishidagi oʻz yoʻlini qanday tushunish kerak?
- 3. Oʻzbekistonga xos qanday xususiyatlar uning bozor iqtisodiyoti sari borishiga ta'sir etganini tushuntirib bering.
 - 4. Nima sababdan davlat bosh (asosiy) islohotchi boʻlishi kerak?
- 5. Nima uchun bozor iqtisodiyotiga oʻtish bosqichma-bosqich amalga oshirilishini izohlang.
- 6. Bozor iqtisodiyotiga oʻtishda ijtimoiy himoyaning qanday ahamiyati bor?
- 7. BMT, XVF va Jahon banki ijtimoiy sohalarga 20 foizdan ortiq sarflamaslikni tavsiya etadi. Lekin, xalqaro ekspertlarning ma'lumotlariga koʻra, Oʻzbekiston budjetining 59,2 foizdan ortigʻi ijtimoiy tadbirlarga sarflanayotgani sabablarini sharhlang.

¹ Президент Ислом Каримовнинг Ўзбекистон Республикаси мустақиллигининг йигирма бир йиллигига бағишланган тантанали маросимдаги табрик сўзи. — Халқ сўзи. — 2012. — 1 сент.

- 8. Qonun ustuvorligini ta'minlashning bozor iqtisodiyotiga oʻtishdagi ahamiyati qanday?
- 9. Bozor iqtisodiyotining jadal borishini ta'minlovchi kuchlar nimalardan iborat?

Mavzuni chuqur o'rganish instrumentariysi

Demokratik bozor islohotlari – xalq ishtirokida, davlat tomonidan ishlab chiqilgan bozor munosabatlarini shakllantirish chora-tadbirlarining davlat nazorati ostida amalga oshirilishi degani.

Bozorlarni liberallashtirish – muayyan institutsional toʻsiqlarni bartaraf etish orqali erkin raqobatning yangi ishtirokchilari uchun bozorlarni ochish jarayoni.

Demokratik islohotlarni chuqurlashtirish – liberallashtirish (erkinlashtirish) darajasini yanada oshirish, ya'ni iqtisodiy erkinlikni chuqurlashtirish va kengaytirish.

Bozor infratuzilmasi – bozor iqtisodiyoti uchun xizmat qiluvchi sohalar. **Iqtisodiyotni liberallashtirish** – muayyan institutsional toʻsiqlarni bartaraf etish orqali erkin, sogʻlom raqobatning yangi ishtirokchilari uchun bozorlarni ochish jarayoni.

Mavzu yuzasidan asosiy xulosalar:

1. Oʻzbekiston mustaqillikning ilk kunlaridan boshlab oʻz umrini oʻtab boʻlgan eski mustabid sovet tizimidan voz kechib, mamlakatimizda ijtimoiy yoʻnaltirilgan bozor iqtisodiyotiga asoslangan ochiq demokratik davlat barpo etish va fuqarolik jamiyatini shakllantirish yoʻlini tanladi. Yangi davlat va jamiyat qurishda amalda oʻzini toʻla oqlagan besh tamoyil asos qilib olindi.

Ushbu tamoyillar avvalo kommunistik mafkuradan butunlay voz kechganimizning yaqqol ifodasi boʻlib, yigirmanchi asrning 90-yillari boshidagi real hayotni oʻzida yorqin aks ettirdi va mamlakatimizni isloh etish boʻyicha aniq prinsipial maqsad va vazifalarni belgilab olish imkonini berdi.

Oʻzbek xalqi aynan ana shu tamoyillardan kelib chiqqan holda, yangi davlat, yangi jamiyat poydevorini barpo etishga kirishdi. Aynan ana shu tamoyillarni amalga oshirish zarurati tufayli «Yangi uy qurmay turib, eskisini buzmang», «Islohotlar — islohot uchun emas, avvalo inson uchun, uning manfaatlari uchun» degan, bugun koʻpchilikka yod boʻlib ketgan hayotiy shiorlar paydo boʻldi.

Mamlakatimizni isloh etish va yangilashga qaratilgan dasturiy vazifalarni bajarishda Oʻzbekiston oʻz milliy qadriyatlariga, urf-odat va an'analarini saqlashga, xalqimizning asrlar davomida shakllangan mentalitetiga hurmat

bilan munosabatda boʻlishga katta e'tibor qaratdi. Shu bilan birga, muvaffaqiyatli va barqaror rivojlanadigan zamonaviy demokratik davlat qurishning oʻzini oqlagan jahon tajribasini chuqur oʻrganish va qabul qilishga alohida e'tibor qaratildi.

Tarixan qisqa vaqt ichida sovet davridagi eski ma'muriy-buyruqbozlik tizimiga barham berildi, milliy davlatchilikni shakllantirishning puxta huquqiy asoslari yaratildi, davlat hokimiyatining qonun chiqaruvchi, ijro etuvchi va sud hokimiyati tarmoqlari tashkil etildi, ijtimoiy va fuqarolik institutlari faoliyati yoʻlga qoʻyildi, iqtisodiyotni erkin bozor munosabatlariga oʻtkazish jarayoni amalga oshirildi. Eng muhimi, aholining ongu tafakkurida tub oʻzgarishlar roʻy berdi, ularning uzoq yillar mobaynida kommunistik va sovet mafkurasi tamoyillari asosida shakllantirilgan fikrlash tarzi va dunyoqarashi, bir soʻz bilan aytganda, odamlarning oʻzi oʻzgardi.

2. Bugun yangicha fikrlaydigan, oʻz kelajagini jamiyatda demokratik qadriyatlarni mustahkamlash, mamlakatimizning kelajagini jahon hamjamiyatiga integratsiyalashuvi bilan bogʻliq holda koʻradigan yangi avlod vakillari hayotga kirib kelmoqda.

Bu esa mamlakatimizda amalga oshirilayotgan tub siyosiy, iqtisodiy, ma'naviy-ma'rifiy oʻzgarishlarni ortga qaytarib boʻlmasligi, islohotlar muqarrarligining ishonchli kafolatidir. Bugun ana shu mustahkam poydevor asosida mamlakatimizni jadal isloh etish va modernizatsiya qilishning yangi davri — milliy taraqqiyotimizning keyingi mantiqiy bosqichi izchil davom etmoqda.

3. Konstitutsiya va qonun ustuvorligini ta'minlash. Bozor iqtisodiyotiga xos yangi huquqiy tizimning oʻzagini Asosiy qonun — Respublika Konstitutsiyasi tashkil etadi.

Ijtimoiy yoʻnaltirilgan bozor iqtisodiyotining qonunchilik asosini yaratish – bu faqat oʻtish davrining majburiy sharti boʻlib qolmay, balki huquqiy davlat barpo etishning oʻziga xos xususiyati hamdir.

3.1. Bozor iqtisodiyotiga xos huquqiy tizimni va huquqiy davlatni barpo

tamoyillari:		
onunlarning hayot, amaliyot bilan uzviy bogʻliqligi va undan kelib		
chiqishi;		
qonun hujjatlarining bevosita ta'sir koʻrsatish kuchiga ega boʻlishi;		
qonunga boʻysunish huquqiy davlatning muhim xususiyati;		
qonunning ustuvorligini ta'minlash;		
huquqiy madaniyat yuqori darajada boʻlishi kerak.		

Huquqiy tizim — mamlakat hududida amal qiladigan barcha yuridik vositalar, institutlar va muassasalarning yigʻindisi boʻlib, butun jamiyat hayotining huquqiy tashkil etilishini ifodalaydi.

3.2. Davlat iqtisodiy oʻzgarishlarning tashkilotchisi va bosh islohotchisi.

Bozor munosabatlariga o'tish davrida davlat bosh islohotchi bo'lishi, iqtisodiyot va ijtimoiy turmushning hamma sohalarini o'zgartirish rejalarini tuzib, uni izchillik bilan amalga oshirishi zarur. 3.3. Davlat iqtisodiy faoliyatining asosiy yoʻnalishlari: □ bozor iqtisodiyoti huquqiy asoslarini ta'minlash; □ bozor mexanizmi yaxlitligi va uning normal ishlashi uchun shartsharoit yaratish; □ aholini iqtisodiy jihatdan himoya qilish va daromadlarini adolatli taqsimlash; □ atrof-muhitni muhofaza etish; □ xalqaro iqtisodiy munosabatlarning samarali rivojlanishini ta'minlash. 3.4. Ijtimoiy yoʻnaltirilgan bozor iqtisodiyoti sharoitida davlatning iqtisodiy vazifalari: tartibga solinadigan bozor sharoitida asosiy maqsad yo'nalishlarini ishlab chiqadi, ijtimoiy-iqtisodiy islohotlarni amalga oshirishning strategik yoʻlini belgilaydi va bu yoʻlni oʻtkazish yuzasidan taktik xatti-harakatlarni amalga oshiradi; bozor iqtisodiyotiga oʻtish davrida iqtisodiy erkinliklarning kafolati vazifasini o'taydi; bozor institutlarini yaratish uchun qulay sharoit tugʻdiradi; vujudga kelayotgan ishbilarmonlik tuzilmalari qaror topishi va rivojlanishiga koʻmaklashadi; aniq maqsadga qaratilgan tuzilma siyosatni amalga oshiradi (ustuvor yoʻnalishlarni aniqlaydi); hamma ma'lum iqtisodiy vositalar – moliya, kredit, soliq, valuta siyosati, narx-navoni nazorat qilish va bevosita ta'sir oʻtkazishning choralari orgali iqtisodiy va ijtimoiy jarayonlarni tartibga soladi; iqtisodiyotni sogʻlomlashtirish muammolarini birinchi navbatda hal etadi. 4. O'zbekistonning o'z yangilanish va taraqqiyot yo'liga asos bo'lgan eng muhim qoidalardan biri bozor iqtisodiyotiga oʻzining barcha bosqichlarida oldindan kuchli ijtimoiy siyosat o'tkazishdir. 5. Bozor iqtisodiyotiga oʻtishning bosqichma-bosqich amalga oshirilishi. Bozor igtisodiyoti tomon izchillik bilan bosqichma-bosqich borishda Oʻzbekistonga xos xususiyat mana shundadir. 5.1. Oʻzbekistonning bozor iqtisodiyotiga oʻtishida dastlabki vazifalar: □ bozor iqtisodiyotining huquqiy asoslarini yaratish;

☐ mulkni davlat tasarrufidan chiqarish va xususiylashtirish;

☐ fuqarolarni ijtimoiy jihatdan himoya qilish;

□ bozor infratuzilmasini yaratish;

□ mulkning xilma-xil shakllarini rivojlantirish;		
□ bevosita xoʻjalik aloqalarini har tomonlama rivojlantirish;		
□ narx-navoni bosqichma-bosqich erkinlashtirish;		
☐ iqtisodiyotning ochiqligi va jahon tizimiga kirib borishini ta'minlash;		
□ tadbirkorlikni ragʻbatlantirish;		
☐ iqtisodiyotni ma'naviy barqarorlashtirish, milliy pulni joriy etish.		
5.2. Boshqaruvning ma'muriy-buyruqbozlik tizimidan bozor iqtisodiyotiga		
oʻtish xususiyatlari:		
□ bu mavjud xoʻjalik yuritish usulini yangilash yoki takomillashtirish		
emas, balki tamoman yangicha xoʻjalik yuritish tizimini joriy etishdir;		
□ bu bir sifat holatidan ikkinchisiga oʻtishdir;		
□ bu odamlar uchun mutlaqo yangi hayot falsafasidir;		
□ bu bir vaqtning oʻzida boʻladigan tadbir sifatida amalga oshirilishi		
mumkin emas, balki bir qancha bosqichlarni oʻz ichiga oluvchi uzoq davrni		
talab etadi.		
6. Taraqqiyotning «Oʻzbek modeli»ning hayotiyligi. Mustaqil rivojla-		
nishning oʻtgan davrini umumlashtirish va tahlil etish isloh qilishning «Oʻzbek		
modeli» asosli va toʻgʻri boʻlib chiqdi, deb aytish uchun toʻla imkon beradi.		
Bugun uni obroʻli xalqaro iqtisodiy tashkilotlar, jahonning koʻpgina		
mamlakatlari tan olmoqda. Eng asosiysi – hayotning oʻzi uni tasdiqlamoqda.		
7. «Oʻzbek modeli»ning amaliy natijalari:		
☐ iqtisodga ortiqcha siyosiy tus berilmadi, mafkuradan xoli etildi;		
☐ iqtisodiy islohotlarni oʻtkazishda davlatning roli kuchaytirildi;		
bozor munosabatlariga oʻtish odamlar ongini oʻzgartirish bilan		
bogʻliq holda asta-sekin amalga oshirildi;		
iqtisodiy islohotlar kuchli ijtimoiy siyosat bilan qoʻshib olib		
borildi, bu ijtimoiy keskinlikning oldini olishga olib keldi;		
bor imkoniyatlar, cheklangan resurslar iqtisodiyotning hayotiy		
ustuvor sohalariga qaratildi;		
mamlakatning neft mahsulotlari, gaz, yoqilgʻi hamda don bilan		
ta'minlash sohalariga ustuvor sohalar deb qaraldi;		
ishlab chiqarishning keskin pasayishiga yoʻl qoʻyilmadi.		
8. Islohotlar natijasida Oʻzbekistondagi barcha yer osti va usti boyliklari,		
barcha korxonalar, transport va aloqa vositalari, boy xom ashyo, yerimiz,		
suvimiz respublika mulkiga aylantiriladi. Oʻzbekiston markazning iqtisodiy		
sohaga hukmronligidan xalos boʻldi, iqtisodiyotimiz toʻla-toʻkis respublika		

9. Oʻzbekiston uchun bosh yoʻl va maqsad iqtisodiyoti rivojlangan, xalqi farovon yashaydigan, inson haq-huquqlari toʻla tantana qilgan, chinakam demokratik jamiyat barpo etishdan iborat. Shunday jamiyat sari borishning

aholisi manfaatiga xizmat qiladigan boʻldi.

sharti bozor iqtisodiyotiga oʻtish hisoblanadi. Bozor iqtisodiyoti ishlab chiqarishni barqaror va shaxdam oʻstirish vositalarini yuzaga keltirishi bilan istiqbolli hisoblanadi.

Butun dunyo tajribasi koʻrsatganidek, iqtisodiy yuksalish uchun bozor munosabatiga oʻtishdan boshqa umid yoʻli yoʻq. Jahon sivilizatsiyasi ijtimoiy taraqqiyotning sifat jihatidan yangi yoʻllarini ishlab chiqdi, tartibga solingan bozor iqtisodiyoti mana shu yoʻlga asos qilib olingan.

- 10. Bozor iqtisodiyotiga oʻtish yoʻlining hamma yerda oʻziga xos xususiyatlari bor. Davlatimiz rahbari Islom Karimov tomonidan ishlab chiqilgan Oʻzbekiston konsepsiyasi mana shundan kelib chiqadi va bozor iqtisodiyotiga oʻtishda oʻz yoʻli borligiga asoslanadi. Bu yoʻl bozor iqtisodiyotini Oʻzbekistonning oʻziga xos sharoitlarini hisobga olgan holda izchillik bilan shakllantirib borishni, unga sekin-asta, bosqichma-bosqich, xalqni himoya qila borib, ijtimoiy barqarorlikni ta'minlash orqali oʻtishni bildiradi. Ammo bu bozor iqtisodiyotiga xos boʻlgan qandaydir yangi milliy qonuniyatlar bor va ular faqat Oʻzbekistonga xos degan soʻz emas. Bozor iqtisodiyoti umuminsoniy istiqbol yoʻli, insoniyat uchun umumiy qadriyat hisoblanadi, uning rivojlanish qonun-qoidalari ham umumiy, lekin bu umumiylik xususiylikni inkor etmaydi, aksincha, uni taqozo qiladi. Bozor iqtisodiyoti mavhumlik emas, aniq koʻrinishga ega va bu har bir mamlakatning oʻziga xos sharoitida ifoda etiladi.
- 11. Bozor iqtisodiyotiga oʻtish konsepsiyasi shu iqtisodiyotning tub belgilarini ilmiy izohlagan holda, ularni shakllantirish yoʻllarini ochib beradi. Bozor iqtisodiyoti keng ma'noda erkin, monopollashmagan, yuksak rivojlangan va aniq ijtimoiy moʻljalga ega boʻlgan iqtisodiyot deb qaraladi, unga iqtisodiy faoliyat erkinligi, mulk shakllarining tengligi; iqtisodiyot subyektlarining raqobatlashuvi, xoʻjalik yuritish shakllarining turli-tumanligi, iqtisodiyotni tartiblash zarurligi, ijtimoiy hayotda ijtimoiy hamkorlik munosabati boʻlishi qayd etiladi.
- 12. Oʻzbekistonning oʻz taraqqiyot yoʻli bu ijtimoiy-iqtisodiy taraqqiyot yoʻli, yangi iqtisodiy tizim zamirida inson manfaatini yuzaga chiqarish, uning mehnatini qadrlash, aholining nochor qatlamlarini ijtimoiy himoyalash maqsadlari yotadi. Tarixan tasdiqlangan tajribaga koʻra, bozor mexanizmi ijtimoiy yangilanishning eng samarali vositasi hisoblanadi, chunki u xalqning ijodiy va mehnat potensialini toʻla ishga tushiradi, boqimandalik va tekinxoʻrlik kayfiyatiga chek qoʻyadi, iqtisodiy tashabbus va ishbilarmonlikni rivojlantiradi, har bir kishini milliy boylikni orttirishdagi mas'uliyatini oshiradi, har bir kishini boy qilish orqali jamiyatni ham boy qilib boradi. Bozor munosabatlari ishlab chiqarishni iste'molchining talab-ehtiyojiga boʻysundiradi, yangilikka, tejamli xoʻjalik yuritishga, kasbiy mahorat va tashabbusni qadrlashga undaydi.

- 13. Oʻzbekiston konsepsiyasi bozor iqtisodiyotini ilohiylashtirishdan yiroq, uning oʻz muammolari borligini e'tirof etadi, unga oʻtish uzoq davom etishini, iqtisodiy beqarorlik, ishlab chiqarish munosabatlarida buzilishlar boʻlishi singari noxush voqealar boʻlib turishini nazardan qochirmaydi hamda davlat ishtirokida ularning oldini olish va yoyilishiga yoʻl qoʻymaslik choratadbirlarini koʻradi. Unga koʻra bozor iqtisodiyoti inqilobiy sakrashlar, ijtimoiy toʻqnashuvlar orqali emas, balki tinchlik vaziyatida, ketma-ket evolyutsion oʻzgarishlarni oʻtkazish orqali shakllanadi.
- 14. Qariyb 21 yillik mustaqil taraqqiyot yillari mobaynida iqtisodiy yutuqlarni tahlil etar ekanmiz, bu natijalarga avvalo keng koʻlamli tizimli bozor islohotlarini joriy etish va xorijiy investisiyalarni jalb qilish, iqtisodiyotda chuqur tarkibiy oʻzgarishlarni amalga oshirish va uni modernizatsiya qilish hamda boshqa izchil islohotlar, puxta oʻylangan siyosat orqali erishayotganimizni alohida qayd etish lozim.

Bu haqda chet el ekspertlari har yili dunyoning 162 ta mamlakati boʻyicha iqtisodiy erkinlik indeksini e'lon qiladigan «Naslediye» fondi xalqaro reyting agentligining bu boradagi xulosasi e'tiborga sazovor. Bu tashkilot 2000–2007-yillarda Oʻzbekistonda erkinlashtirish indeksi 18 punktga yaxshilanib, 53 foizni tashkil qilganini e'tirof etgan edi. 2011-yilda esa «Gallup International» tadqiqot markazi tomonidan oʻtkazilgan soʻrov tadqiqotlariga koʻra, Oʻzbekiston aholisi hayotdan mamnun boʻlib yashash boʻyicha ancha yuqori mavqeda ekan. Oʻzbekiston bu borada 13 oʻrinda turishi e'tirof etilgan. Ya'ni mamlakatimizda baxtiyorlik indeksi 62 foizni tashkil qilar ekan.

Hech shubhasiz, bu koʻrsatkichlar milliy iqtisodiyotimizni erkinlashtirish sohasida sezilarli darajada rivojlanishga erishganimizdan dalolat beradi. Nufuzli xalqaro tashkilotning ushbu e'tirofi mamlakatimizda izchil olib borilayotgan iqtisodiy islohotlar, mustaqillikning ilk davridanoq belgilab olingan qat'iy ijtimoiy-iqtisodiy siyosatning sobitqadamligi bilan bogʻliq boʻlib, «Oʻzbek modeli»ning hayotiyligini yana bir bor isbotladi.

Yuqoridagi e'tirof, shubhasiz, O'zbekiston — ulkan imkoniyatlar mamlakati ekanligini tasdiqlaydi. Ulardan oqilona foydalanishda hamjihatlik, ahillik va mehr-oqibat muhiti zarurligini anglashimizning o'zi mustaqillik, sobitqadamlik, barqarorlik va xavfsizlikni ta'minlashning muhim sharti hisoblanadi.

2-BO'LIM. MIKROIQTISODIYOT

7-MAVZU. TADBIRKORLIK FAOLIYATI VA UNING TASHKILIY-HUQUQIY SHAKLLARI

1. Tadbirkorlikning mohiyati, belgilari va prinsiplari

Tadbirkorlik bozor tizimiga xos boʻlgan maxsus iqtisodiy faoliyat boʻlib, tovar va xizmatlarni yaratish hamda iste'molchilarga yetkazib berish orqali foyda topishga qaratilgan biznesning asosiy turi hisoblanadi. Tadbirkorlik maxsus tizim hosil etadiki, bunga tadbirkorlikning obyekti, subyekti, tadbirkorlik qonun-qoidalari, axloqiy me'yorlari, tadbirkorlik siyosati va uning infratuzilmasi kiradi.

Tadbirkorlik mulkiy jihatdan xususiy, jamoaviy va davlat tadbirkorligini, yuritilish uslubi jihatidan oshkora va yashirin tadbirkorlikni, yuritilish sohasi jihatidan industrial, agrar va servis tadbirkorligini va nihoyat faoliyat koʻlami jihatidan kichik, oʻrta va yirik tadbirkorlikni tashkil etadi. Tadbirkorlik bilan shugʻullanuvchi kishilar tadbirkorlar toifasini hosil etadi, ular iyerarxiyasida quyi, oʻrta, yuqori (elita) va eng yuqori (super elita) tabaqalari mavjud boʻladi. Mazkur toifa ikki yoʻl bilan shakllanadi, *birinchidan*, tadbirkorlik avloddan-avlodga oʻtadi, *ikkinchidan*, tadbirkorlik qilmaganlar u bilan shugʻullanadi. Ikkinchi yoʻl oʻtish davridagi mamlakatlarga xos boʻlib, bu Oʻzbekistonda ham kuzatiladi. Chunki mustaqillikka qadar xususiy tadbirkorlik ta'qib ostiga olingan.

Tadbirkorlik naqadar foyda keltirishini foydalilik, ya'ni rentabellik darajasi belgilaydiki, bu qancha foyda topilganini, ya'ni iqtisodiy faoliyatning samaradorligini ko'rsatadi, buni bilish uchun tadbirkorlik natijasida qo'lga tekkan foyda sarflar bilan taqqoslanadi, natijada foyda sarflarining necha foiziga tengligi aniqlanadi. Firma ishining samaradorligi tahlil etilganda ishlab chiqarish va mahsulot rentabelligi aniqlanadi. Rentabellikni oshirish uchun ishlab chiqarish restrukturizatsiyalanadi, resurslar tejaladi, kapital tarkibi takomillashtiriladi, mehnat motivatsiyasi kuchaytiriladi.

Foydani maksimumlashtirish uni iloji boricha koʻp olishni bildiradi, bunga rentabellikni oshirish va kapitalni koʻpaytirish, ya'ni ishlab chiqarishni kengaytirish orqali erishiladi. Biroq buning uchun ishlab chiqarishning eng maqbul hajmiga erishish zarurki, bunda tovar narxi marginal xarajatlarga tenglashadi. Faqat shundagina narx bilan oʻrtacha xarajatlar oʻrtasidagi foydani yuzaga keltiruvchi farq eng katta boʻladi.

Tushgan daromadlar xarajatlarni qoplashga yetmay qolgan taqdirda zarar koʻriladi, buning sababi chiqarilgan tovar va xizmatlarni bozor koʻtarmasdan ular narxining, binobarin daromadning pasayib ketishi va xarajatlarning ortib ketishini yuzaga keltiradi. Zarar me'yoridan oshib ketganda, uni qoplash imkoniyati boʻlmay bankrotlik yuzaga keladi, bu firmaning yopilib ketishi yoki boshqalarga qoʻshilib ketishini bildiradi.

Oʻzbekiston Respublikasida «Tadbirkorlik toʻgʻrisida»gi qonunga koʻra tadbirkorlarga oʻz mol-mulkidan foydalanish erkinligi, mahsulotlarni taqsimlash mustaqilligi, huquqiy tenglik, ixtiyoriy ishga yollash, cheklanmagan daromad olish imkonini kafolatlaydi.

Tadbirkorlikning oʻz axloqiy qoidalari boʻlib, ulardan eng muhimi halollik va haromdan hazar qilishdir. Bu qoida islom ta'limotida qoʻllanishi shart deb bilinadi. Alloh taolo Qur'oni karimda: «Halol va pokiza nafaqa yenglar va solih ishlar bajaringlar», — deb buyurgan. Hadisi shariflaridan birida paygʻambarimiz: «Halol nafaqa bilan ta'minlash har bir musulmon uchun farzdir»¹, — deganlar. Islom ta'limotiga koʻra, mehnatsiz qoʻlga kiritilgan luqma haromdir. Tadbirkorlar ham oʻz rizqu nasibasini halol mehnat bilan topishlari shart, halollik tadbirkorlarning obroʻli boʻlishini kafolatlaydi.

Tadbirkorlikning muhim belgilari yoki amal qilish prinsiplari quyidagilar:

- mulkiy munosabatlarning ishtirokchisi boʻlish, ishlab chiqarish omillarining barchasiga yoki ba'zi biriga va yaratilgan tovarlarga egalik qilish;
- iqtisodiy erkinlik, xoʻjalik faoliyati turini tanlash, uni resurslar bilan ta'minlash, oldi-sotdi ishlarini yuritish, ishlab chiqarishni boshqarishda erkinlik;
- iqtisodiy xatti-harakatlar uchun mas'uliyatni o'z zimmasiga olish,
 ish natijasiga javob berish, tavakkal qilib ish yurita olish, iqtisodiy xatarli
 ishga qo'l urish;
- foyda olishga intilish, foydaga erishish chora-tadbirlarini koʻrish, olingan foydani oʻz bilganicha ishlatish;

 $^{^1}$ Қаранг: *Сайҳон С.* Тижорат ва бир луқма ҳалол ош. – Т., 1992. – Б. 6.

- tijorat siriga ega boʻlish, biznesga oid va oʻzgalarga oshkor etilmaydigan ma'lumotlarni sir tutish;
- raqobat kurashida qatnashish, bozorda amal qiluvchi qoidalarga rioya etgan holda halol raqobatda qatnashib, uning gʻirrom, yovvoyi usullaridan voz kechish;
- halollik bilan ish yuritish, qalloblik, tovlamachilik, firibgarlik, g'irromlik va aldamchilikka moyil bo'lmaslik. Obro'ga ega bo'lish, boshqalarga ishonish va boshqalar ishonchini qozonib sha'n-e'tibor orttirish, firma nomini e'zozlab, unga putur yetkazmaslik, firmani obro'sizlantirmaslik.

O'zbekiston Respublikasining «Tadbirkorlik faoliyati erkinligining kafolatlari toʻgʻrisida»gi (2012-yil 2-may) yangi tahrirdagi qonuniga koʻra, «tadbirkorlik faoliyati» tushunchasi: «Tadbirkorlik faoliyati (tadbirkorlik) tadbirkorlik faoliyati subyektlari tomonidan hujjatlariga muvofiq amalga oshiriladigan, oʻzi tavakkal qilib va oʻz mulki javobgarligi ostida daromad (foyda) olishga qaratilgan tashabbuskorlik faoliyatidir». Qonunga koʻra, tadbirkorlik faoliyati (tadbirkorlik subyektlari) belgilangan subyektlari tartibda ro'yxatidan o'tgan hamda tadbirkorlik faoliyatini amalga oshirayotgan yuridik va jismoniy shaxslardir.

Tadbirkorlik faoliyatining mohiyati toʻgʻrisidagi asosiy nazariyalar:

- tadbirkorlar, bu noaniq daromadga ega kishilar. Tavakkalchilik xatari uning bosh xususiyatidir (R. Kontilyon bu atamani iqtisod faniga ham olib kirgan);
- tadbirkor tijorat bilan shugʻullanib, foyda olish maqsadida tavakkalchilik qiluvchi mulk egasi (A.Smit);
- tadbirkor iqtisodiy agent sifatida foyda olish uchun oʻz tajribasi va bilimini tavakkalchilik xataridan qoʻrqmay ishga soluvchi shaxs (J. B.Sey);
- tadbirkor foydaning oʻsishini maqsad qilib qoʻyadigan, xatarga tayyor turadigan va kishilarni birlashtira oladigan tashabbuskor shaxs (V. Zamberg);
- tadbirkor ishlab chiqarish omillari uygʻunlashuvining yangi nisbatini izlovchi, iqtisodiy oʻsishni ta'minlovchi va novatorlik xususiyatlari yuqori darajada rivojlangan kishi (I. Shumpeter).

Tadbirkor deganda uning oʻtmishdagi qoʻpol, yovvoyi emas, balki zamonaviy turlari, ya'ni madaniylashgan shakllari haqida soʻz yuritiladi. Hozirgi zamon tadbirkori eng avval bozorni talabgir tovarga toʻydira oladigan tovar ishlab chiqaruvchidir. U yangilikni joriy eta oladigan, ishlab chiqarish omillaridan oqilona foydalanib, iqtisodiy oʻsishni ta'minlaydigan, oʻzining va oʻz jamiyatining boyligini oshiradigan, kishilarning farovonligiga hissa qoʻsha oladigan boʻlishi zarur.

Bugungi kunda Prezident Islom Karimov ta'kidlaganidek, «iqtisodiy islohotlarni amalga oshirishda bizning asosiy ustuvor yoʻnalishimiz bundan buyon ham biznes, jumladan, xususiy biznes uchun zarur boʻlgan barcha qulay sharoitlarni yaratishdan, davlatning iqtisodiyotdagi ishtirokini izchil kamaytirib borishdan iborat boʻlib qolaveradi».

Xususiy mulk va xususiy tadbirkorlik huquqini himoya qilishga doir qonunchilikni yanada mustahkamlash masalasiga mamlakatimizda katta e'tibor qaratilmoqda. Chunki tadbirkorlik iqtisodiy taraqqiyotni belgilovchi kuch hisoblanadi.

1.2. Kichik biznes va xususiy tadbirkorlikni rivojlantirish zaruriyati

XXI asrda Oʻzbekiston iqtisodiyotini modernizatsiya qilishning ustuvor yoʻnalishlaridan biri, avval ta'kidlaganimizdek, oʻrtacha mulkdorlar sinfi vujudga kelishiga yordam beradigan kichik biznes va xususiy tadbirkorlikni rivojlantirishdir.

Shu bois, Oʻzbekistonda kichik biznes va xususiy tadbirkorlik bugungi kunda ijtimoiy-siyosiy barqarorlikning kafolati va tayanchi, mamlakatimizni taraqqiyot yoʻlida faol harakatlantiradigan kuchga aylanib bormoqda.

Prezident Islom Karimov Oʻzbekiston Respublikasi Oliy Majlisi Qonunchilik palatasi va Senatining 2010-yil 12-noyabrda boʻlib oʻtgan qoʻshma majlisida soʻzlagan «**Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi**» nomli ma'ruzasida respublikamiz iqtisodiyotida kichik biznes, birinchi navbatda, xususiy tadbirkorlikning roli va ulushini yanada kengaytirish hamda uning huquqiy asoslarini mustahkamlashga qaratilgan qonunlarni qabul qilish muhim masala ekanligini ta'kidlab oʻtdi. Aytish joizki, bugungi kunga kelib yalpi ichki mahsulot tarkibida kichik biznes va xususiy tadbirkorlikning ulushi koʻpayib, uning yurtimiz iqtisodiyotini rivojlantirishdagi roli sezilarli darajada oshmoqda.

XXI asrning ikkinchi oʻn yilligi boshida aholisi soni boʻyicha dunyoda 39-oʻrinda turadigan Oʻzbekistonda demokratik islohotlarni yanada chuqurlashtirish va mamlakatni modernizatsiya qilishni izchil

davom ettirish orqali davlatimiz iqtisodiy negizlarini yanada mustahkamlash va xalq farovonligini yanada yuksaltirish uchun kichik biznes va xususiy tadbirkorlikni rivojlantirishga davlatimiz rahbari Islom Karimov asosiy e'tiborni qaratib, «yaqin besh-o'n yil ichida ushbu sohada yalpi ichki mahsulotning salmoqli ulushini ishlab chiqarishga erishish» vazifasini qo'yadi hamda «bu sohani rivojlantirish aholini ish bilan ta'minlash va uning daromadlari o'sishining eng muhim manbalaridan biriga aylanishi lozim» ekanligi va «mamlakatimizdagi siyosiy, iqtisodiy va ijtimoiy barqarorlikning poydevori boʻlmish kichik va oʻrta mulkdorlar sinfini shakllantirishdan iborat»ligini uqtirib oʻtdi. Shu bilan birga, «xususiy tarmoqning jadal rivojlanishini, uning mamlakat iqtisodiyotidagi ulushi koʻpayishini ta'minlash» ustuvor vazifa ekanligini bundan qariyb 5–6 yil ilgari ta'kidlaganini eslash joiz. Ushbu sohani rivojlantirishga vaqtida qilingan e'tibor bugunga kelib o'z natijasini berdi. Shu bois, davlatimiz rahbari Islom Karimov: «Kichik biznes va xususiy tadbirkorlik sohasining mamlakatimizni modernizatsiya qilish va yangilashning ishonchli tayanchi boʻlgan mulkdorlar sinfini, ya'ni oʻrta ahamiyatini hech shakllantirishdagi ulkan narsa bilan bo'lmaydi», – deb ta'kidlaganida yuz karra haq edilar. Chunki mulkdorlar sinfi biz qurayotgan huquqiy demokratik davlatning iqtisodiy va siyosiy negizini tashkil etadi.

Darhaqiqat, kichik biznes va xususiy tadbirkorlik dunyoning taraqqiy topgan davlatlarida yaratilayotgan yalpi ichki mahsulot hajmida yetakchi va hal qiluvchi oʻrin egallaydi.

Jahon tajribasi shundan dalolat beradiki, aynan kichik biznes, xususiy tadbirkorlik jahon moliyaviy-iqtisodiy inqirozining salbiy oqibatlarini bartaraf etishda eng samarali vosita, aholi bandligini ta'minlash, uning daromadlari oshib borishining gʻoyat muhim omili hisoblanadi. Darhaqiqat, kichik biznesning YAIMdagi hissasi AQShda 50–55 foiz, Buyuk Britaniyada 55–60 foiz, Italiyada 57–60 foiz, Germaniyada 50–55 foiz, Yaponiyada 52–55 foiz, Xitoyda 60–65 foizni tashkil etadi, umumiy bandlikda 50–70 foizni va jami korxonalarda 97–99 foizni tashkil etadi.

Iqtisodiyoti rivojlangan davlatlarning tajribasiga yana e'tibor qaratadigan bo'lsak, ularning iqtisodiy o'sishi biznesning ushbu shakliga davlat tomonidan alohida ahamiyat berilayotganligi va qo'llab-quvvatlanayotganligi samarasi ekanini kuzatish mumkin. Masalan, Xitoy davlati hukumatining taxminiga ko'ra, iqtisodiyotning to'liq modernizatsiyasi 2030-yilga kelib tugaydi, bunda hukumat asosiy o'rinni kichik biznes tashkil etishiga e'tibor qaratadi.

«SNN Time Warner Group» tomonidan olib borilgan tadqiqotlar natijasiga koʻra, Singapur davlati kichik biznes va xususiy tadbirkorlikni rivojlantirish boʻyicha dunyoda beshinchi oʻrinni egallaydi. Mazkur mamlakatda kichik tadbirkorlik subyektlari mavjud korxonalar umumiy sonining 90 foizini tashkil etadi va har-yili ular tomonidan aholini ish bilan ta'minlash boʻyicha oʻsish 5–6 foiz koʻtarilib bormoqda.

Fan sigʻimi yuqori boʻlgan ishlab chiqarishga ixtisoslashgan kichik korxonalar rivojlantirilishini qoʻllab-quvvatlash borasida Yaponiya tajribasi e'tiborga loyiqdir. Yaponiyada barcha kompaniyalarning 99,6 foizi, sotilgan mahsulotning 55 foizi va sanoatda band boʻlganlarning 80 foizi kichik va oʻrta korxonalar ulushiga toʻgʻri keladi.

Yuqoridagilardan koʻrinib turibdiki, kichik biznes va xususiy tadbirkorlik nafaqat mamlakat iqtisodiyotini rivojlantirishda, balki yuz berishi mumkin boʻlgan turli inqirozlardan chiqib ketishda ham katta ahamiyatga ega va eng asosiysi, barqaror, shu bilan birga, tez moslashuvchan soha hisoblanadi.

Yurtboshimiz tashabbuslari bilan mustaqilligimizning dastlabki yillaridanoq ushbu masalaning davlat siyosati darajasiga koʻtarilishi bejiz emas. Binobarin, kichik tadbirkorlikning ichki bozorni oziq-ovqat mahsulotlari, kundalik ehtiyoj tovarlari bilan toʻldirishni ta'minlashdagi roli beqiyosdir.

Oʻzbekiston Respublikasi Prezidenti Islom Karimovning «Oʻzbekistonda ijtimoiy-iqtisodiy siyosatni amalga oshirishda kichik biznes va xususiy tadbirkorlikning roli va ahamiyati» mavzuidagi xalqaro anjumanning ochilish marosimidagi nutqida «Kichik biznes va xususiy tadbirkorlikni jadal rivojlantirishni ustuvor yoʻnalish sifatida belgilash nima bilan, qanday omil va sabablar bilan bogʻliq edi», degan savolga javob berar ekan, ular quyidagilardan iborat ekanligini ta'kidladi:

birinchidan, jahon tajribasi shuni koʻrsatadiki, iqtisodiyotning muhim tarkibini tashkil qiluvchi tarmoq boʻlgan kichik biznes ichki bozorni zarur tovar va xizmatlar bilan toʻldirishning asosiy manbai boʻlib xizmat qiladi. Kichik biznes nafaqat iqtisodiyotdagi ma'lum bir boʻshliqlarni toʻldiradi, balki uni diversifikatsiya qilish va barqaror sur'atlar bilan rivojlantirishni ta'minlashda oʻta muhim rol oʻynaydi.

Tadbirkorlik biznesi aholi bandligi va daromadining oʻsishini ta'minlashda, ayniqsa, bizning sharoitda qanday muhim ahamiyat kasb etishini baholashning oʻzi qiyin. Quyidagi raqamlarni e'tiborga oladigan boʻlsak, shunday xulosa chiqarish mumkin.

Agar 2005–2011-yillarda mamlakatimiz iqtisodiyotida 5 milliondan ortiq yangi ish oʻrni tashkil etilgan boʻlsa, ularning 60 foizdan ortigʻi kichik biznes va xususiy tadbirkorlik hissasiga toʻgʻri keladi. Buning natijasida hozirgi vaqtda mamlakatimizda ish bilan band boʻlgan jami aholining 75 foizdan koʻprogʻi ushbu sohada mehnat qilmoqda.

Yuqoridagi raqamlarning oʻziyoq koʻp narsani anglatadi va ijtimoiyiqtisodiy taraqqiyotning ishonchli yoʻldan borayotganidan dalolat beradi.

Ikkinchidan, tuzilishiga koʻra ixcham, qarorlar qabul qilishda tezkor va harakatchan, yangi tartib-qoidalarni qisqa muddatda oʻzlashtiradigan kichik biznes jahon va mintaqalar bozorlaridagi talab va konyunktura oʻzgarishlariga ancha tez moslashadi.

Uchinchidan, kichik biznesni tashkil qilish va yuritish katta xarajat hamda kapital qoʻyilmalarni talab etmaydi. Bu esa ishlab chiqarishni tez va oson modernizatsiya qilish, texnik hamda texnologik qayta jihozlash, yangi turdagi mahsulotlarni oʻzlashtirish, ularning nomenklaturasini muntazam yangilab borish va raqobatdoshligini ta'minlash imkonini beradi.

Toʻrtinchidan, jahon moliyaviy-iqtisodiy inqirozining tahdid va salbiy oqibatlariga yirik korxonalarga nisbatan ushbu sohaning bardosh bera olish qobiliyati ancha yuqoridir. Faqat kichik biznes va xususiy tadbirkorlikni jadal rivojlantirish hamda ushbu sohaning mamlakatimiz iqtisodiyotida ustuvor mavqega ega boʻlishi natijasida biz 2008–2009-yillarda global inqirozning salbiy oqibatlarini ortiqcha qiyinchilik va talafotlarsiz yengib oʻtish, ishlab chiqarishni jahon bozori konyunkturasi oʻzgarishlarini hisobga olgan holda qisqa muddatlarda qayta tashkil etishga muvaffaq boʻldik.

Sanoatda kichik biznes va xususiy tadbirkorlik tarmogʻining oʻsish sur'atlari 2008–2009-yillarda oʻrtacha 23–24 foizni, xizmatlar va servis sohasining oʻsish sur'atlari esa 15–16 foizdan kam boʻlmagan koʻrsatkichni tashkil etdi.


Beshinchidan, kichik tadbirkorlik nafaqat daromad manbai, balki odamlarning ijodiy va intellektual qobiliyatini roʻyobga chiqarish vositasi hamdir. Mazkur soha har bir kishiga oʻz iste'dodi va imkoniyatlarini namoyon etish uchun zamin tugʻdirmoqda, shu tariqa tashabbuskor, omilkor, mustaqil faoliyat yurita oladigan, oʻz oldiga qoʻygan maqsadlariga erishishga qodir insonlar toifasini shakllantirishga xizmat qilmoqda.

Kichik biznes va xususiy tadbirkorlik oʻrta sinfni shakllantirish uchun muntazam kengayib borayotgan baza boʻlib xizmat qilmoqda. Oʻrta sinf esa, ma'lumki, har qanday demokratik jamiyatning asosi bo'lib hisoblanadi va mamlakat iqtisodiy va ijtimoiy xavfsizligini ta'minlashda muhim rol o'ynaydi.

2. Tadbirkorlik tizimi

Tadbirkorlik tizimi – bu tadbirkorlikka xos boʻlgan iqtisodiy munosabatlar va tadbirkorlikning huquqiy tashkiliy jihatlari va unga oid siyosatning yaxlitligi, ya'ni majmuidir.

Bu tizimning nimalardan iborat boʻlishini quyidagi chizmada koʻrish mumkin.



Tadbirkorlik rivojlanib, jamiyatda mustahkam oʻrin egallashi uchun aytilgan tizimning barcha boʻgʻinlari birgalikda ishlashi kerak boʻladi. Bular orasida tadbirkorlikka oid qonun-qoidalarga rioya etish alohida oʻrin egallaydi. Ayniqsa, 2010-yil 12-noyabrda bayon qilingan Konsepsiyaga muvofiq, Oʻzbekistonda tadbirkorlik faoliyatini tartibga soluvchi qonunlar va qarorlar qabul qilingan boʻlib, ular faoliyatini tartibga solishda muhim rol oʻynaydi. Ularning ayrimlarini keltiramiz:

□ Oʻzbekiston Respublikasining «Tadbirkorlik faoliyati erkinligining kafolatlari toʻgʻrisida»gi 2012-yil 2-may (yangi tahrirda); «Oilaviy tadbirkorlik toʻgʻrisida»gi 2012-yil 2-may; «Xususiy mulkni himoya

qilish va mulkdorlar huquqlarining kafolatlari toʻgʻrisida»gi 2012-yil 24-sentabr qonunlari;

□ Oʻzbekiston Respublikasi Prezidentining «Tadbirkorlik subyektlari tomonidan taqdim etiladigan hisobot tizimini takomillashtirish va uni noqonuniy talab etganlik uchun javobgarlikni kuchaytirish toʻgʻrisida»gi 2005-yil 15-iyun PQ-100-sonli; «Davlat xaridlari tizimini optimallashtirish hamda ularga kichik biznes subyektlarini jalb qilishni kengaytirish toʻgʻrisida»gi 2011-yil 7-fevral PQ-1475-sonli; «Kichik biznes va xususiy tadbirkorlik yili» Davlat dasturi toʻgʻrisida»gi 2011-yil 7-fevral PQ-1474-sonli; «Kichik biznes va xususiy tadbirkorlik subyektlariga kredit berishni koʻpaytirishga oid qoʻshimcha chora-tadbirlar toʻgʻrisida»gi 2011-yil 11-mart PQ-1501-sonli qarorlari;

☐ O'zbekiston Respublikasi Prezidentining «Tadbirkorlik subyektlarini huquqiy himoya qilish tizimini yanada takomillashtirish choratadbirlari toʻgʻrisida»gi 2005-yil 14-iyun; «Tadbirkorlik subyektlarining xoʻjalik sohasidagi huquqbuzarliklari uchun moliyaviy javobgarligini erkinlashtirish toʻgʻrisida»gi 2005-yil 24-iyun; «Tadbirkorlik subyektlarini tekshirishni yanada qisqartirish va uning tizimini takomillashtirish to'g'risida»gi chora-tadbirlari 2005-yil 5-oktabr; «Tadbirkorlik subyektlarini tekshirishlarni yanada qisqartirish va ular faoliyatini nazorat qilishni tashkil etish tizimini takomillashtirish borasidagi qo'shimcha chora-tadbirlar toʻgʻrisida»gi 2011-yil 4-aprel; «Kichik biznes va xususiy tadbirkorlikni yanada rivojlantirish uchun qulay ishbilarmonlik muhitini shakllantirishga doir qo'shimcha chora-tadbirlar to'g'risida»gi 2011-yil 24-avgust farmonlari;

Oʻzbekiston Respublikasi Vazirlar Mahkamasining «Kompleks tadbirkorlik litsenziyasi (franshizing) shartnomalarini davlat roʻyxatidan oʻtkazish tartibi toʻgʻrisidagi nizomni tasdiqlash haqida»gi 2010-yil 4-noyabr 244-sonli; «Xususiy tadbirkorlar yuridik shaxs tashkil etmasdan shugʻullanishi mumkin boʻlgan faoliyat turlari roʻyxatini tasdiqlash toʻgʻrisida»gi 2011-yil 7-yanvar 6-sonli qarorlari.

Tadbirkorlik faoliyati qonuniylikka asoslanar ekan, ularning qonuniy manfaatlarini himoya qilish huquqni muhofaza qiluvchi organlar xodimlariga mas'uliyatli vazifani yuklaydi. Chunki mamlakatda qanchalik oʻrtacha mulkdorlar sinfi mustahkam qaror topsa, jamiyatning iqtisodiy negizlari shu qadar mustahkam boʻladi. Barcha ham tadbirkor boʻla olmaydi, faqat tadbirkorlik qobiliyati sohiblari tadbirkorlikni oʻz zimmasiga oladi. Shu bois, jahon tajribasiga koʻra tadbirkorlik qobiliyati iqtisodiy oʻsishning muhim sharti sifatida qaraladi.

Tadbirkorlik gʻoyat murakkab va mas'ul faoliyat boʻlganidan uning har xil turlari mavjud. U tasniflanganda mulkiy maqom, qonuniylik, faoliyat turi kabi mezonlar asos qilib olinadi.

Mulkiy jihatdan xususiy, jamoaviy-guruhiy va davlat tadbirkorligi ajratiladi:

Xususiy tadbirkorlik — bu xususiy mulkchilikka asoslangan tadbirkorlik. Bu yerda tadbirkorlikka jalb etilgan moddiy, moliyaviy resurslar, yaratilgan tovar va xizmatlar, ularni sotishdan kelgan daromad, birinchidan, individual (yakka tarzdagi), ikkinchidan, korporativ (guruh tarkibidagi) xususiy mulk hisoblanadi. Bozor iqtisodining yetakchisi xususiy tadbirkorlik hisoblanadi. Shu sababli Oʻzbekistonda xususiy mulkning ustuvorligini ta'minlash strategik vazifa hisoblanadi. Oʻzbekistondagi kichik biznes va xususiy tadbirkorlik jami tovar va xizmatlarning 54 foizdan ziyod qismini (2012-y.) yaratgan. Oʻzbekistondagi xususiy tadbirkorlik xususiy korxonalar (firmalar), fermer va dehqon xoʻjaliklari, yakka tartibda biznes qilish doirasida kechadi.

Jamoaviy-guruhiy tadbirkorlik xususiy mulk sohiblari oʻz mulkini koʻngilli ravishda birlashtirganda paydo boʻladi. Bu turli kooperativlar, uyushmalar va shirkatlardan iborat. Bu yerda mulk ikki qismga ajraladi, birinchisi – jamoaga birikkanlarning umumiy mulki, ikkinchisi – ularning individual mulki. Oʻzbekistondagi tadbirkorlikning bu turi kichik kooperativlardan va qishloqdagi shirkat xoʻjaliklaridan iborat.

Davlat tadbirkorligi – bu davlatga qarashli korxonalar faoliyati boʻlib, iqtisodiyotning davlat sektorini tashkil etadi. Ular davlat mulki hisoblanadi, lekin bozor qoidalariga amal qilgan holda mustaqil ish yuritadilar. Davlat sektorining iqtisodiyotdagi oʻrni har xil boʻladi, biroq koʻpchilik mamlakatlarda uning yaratilgan tovar va xizmatlar miqdoridagi hissasi 20 foiz atrofida boʻladi. Tadbirkorlik oʻzining yoʻnalishi, ya'ni qaysi sohada yuz berishiga qarab, industrial, agrar va servis bizneslariga ajraladi.

Amaldagi qonun hujjatlariga koʻra kichik tadbirkorlik subyektlari quyidagilar:

- 1) yakka tartibdagi tadbirkorlar;
- 2) ishlab chiqarish tarmoqlarida band boʻlgan xodimlarning oʻrtacha yillik soni koʻpi bilan yigirma kishi, xizmat koʻrsatish sohasidagi va ishlab chiqarish bilan bogʻliq boʻlmagan boshqa tarmoqlarda band boʻlgan xodimlarining oʻrtacha yillik soni koʻpi bilan oʻn kishi, ulgurji,

chakana savdo hamda umumiy ovqatlanish tarmoqlarida band boʻlgan xodimlarning oʻrtacha yillik soni koʻpi bilan besh kishi boʻlgan kichik firmalar.

Yakka tartibdagi tadbirkorlik — jismoniy shaxs tomonidan tadbirkorlik faoliyatini yuridik shaxs tashkil etmagan holda amalga oshirishdir. Amaldagi qonunga koʻra, yakka tartibdagi tadbirkorlik yakka tadbirkor tomonidan mustaqil, xodimlarni yollash huquqisiz, mulk huquqi asosida oʻziga tegishli boʻlgan mol-mulk negizida, shuningdek, mol-mulkka egalik qilish va undan foydalanishga yoʻl qoʻyadigan oʻzga ashyoviy huquq sifatida amalga oshiriladi.

Industrial biznes – bu sanoat, qurilish, aloqa va transport sohasidagi tadbirkorlik, unga dinamizm, ya'ni shiddat bilan yangilanib borish xos, lekin bu serxarajat hisoblanadi. Uning asosini sanoat firmalari tashkil etadi. Sanoatda kichik biznes va xususiy tadbirkorlik tarmogʻining oʻsish sur'atlari 2008–2009-yillarda oʻrtacha 23–24 foizni tashkil etdi.

Agrobiznes – bu qishloq xoʻjaligidagi tadbirkorlik boʻlib, bu ham serxarajat, lekin uning turlari gʻoyat cheklangan. Uning asosini fermer xoʻjaligi tashkil etadi. Qishloqda fermerlar xoʻjaliklariga barcha xizmatlarni koʻrsatayotgan zamonaviy ishlab chiqarish va bozor infratuzilmasi shakllantirilmoqda.

Servis biznesi – bu aholiga xizmat koʻrsatishga qaratilgan biznes. Bu kam xarajat hisoblanadi, lekin uning turlari gʻoyat koʻp, chunki unga ham dinamizm xos. Bunga tibbiyot, ta'lim, shou (tomosha), sport-turizm (sayyohlik), qimor (kazino, avtomat oʻyinlari), madaniy-maishiy xizmat koʻrsatishga oid biznes turlari kiradi. Iqtisodiyot qanchalik yuksak boʻlsa, servis biznesi shuncha rivoj topadi.

Tadbirkorlik koʻlamini belgilash me'yorlari bir xil emas. Bir mamlakatdagi yirik korxona boshqa yerda oʻrtacha hisoblansa, yana bir yerdagi kichik korxona boshqa yerda oʻrta korxona safiga kiritiladi. Bundan qat'i nazar, hamma yerda tadbirkorlik koʻlamini belgilashda kapital miqdori, ishlovchilar soni va nihoyat ishlab chiqarish hajmi nazarda tutiladi. Biroq bularning hammasi yoki ayrimlari qoʻllaniladi. Turli miqyosdagi tadbirkorlik iqtisodiyotda har xil oʻrin tutadi. Iqtisodiyoti rivojlangan mamlakatlarda kichik biznes va xususiy tadbirkorlik tovar va xizmatlarning 50–80 foizini yaratadi.

Oʻzbekistonda kichik biznes va xususiy tadbirkorlikning rivojlanish sur'atlari (foiz)

	2000-yil	2005-yil	2010-yil	2011-yil
Kichik biznes va xususiy				
tadbirkorlikning ulushi, foiz				
YAIMda	31,0	38,2	52,5	54,0
Sanoatda	12,9	10,0	21,1	_
Ish bilan band	49,7	64,8	74,3	74,3
boʻlganlarning umumiy				
sonida				
Eksportda	10,2	6,0	13,6	16,3

Kimki tadbirkorlik ishi bilan shugʻullansa, oʻsha tadbirkor deyiladi. Barcha tadbirkorlik birgalikda tadbirkorlar toifasini tashkil etadiki, bu ma'lum guruh kishilarning ijtimoiy-iqtisodiy yaxlitligini tashkil etadi. Tadbirkorlarga xos umumiylik shuki, ularning barchasi xususiy mulk sohiblari va foyda topishni koʻzlaydilar, boy-badavlat yashab, ish beruvchilar hisoblanadilar, ular tavakkaliga ishlab, oʻzaro bellashadilar, iqtisodiy faol hisoblanadilar. Mazkur umumiylik tadbirkorlarning maxsus toifa hosil etishiga asos beradi. O'zbekistonda tadbirkorlar toifasini shakllantirish va mavqeini mustahkamlash yoʻli tutilmoqda. Bu toifaga xususiy korxona egalari, qoʻshma korxonalardagi sheriklar, fermerlar, dehqon xoʻjaligi sohiblari va yakka tartibda biznes bilan shugʻullanuvchilar kiradi. Biznes turlarining iqtisodiyotdagi salmogʻi har xil boʻladi. Yigirma bir yil avval Oʻzbekistonda tadbirkorlik deyarli yoʻq edi. Bugun esa mavjud barcha xoʻjalik subyektlarining 90 foizdan ortigʻini kichik biznes korxonalari tashkil etadi. 2012-yilda yalpi ichki mahsulotning 54,5 foizi, ishlab chiqarilayotgan mahsulotlarning 22 foizi va qishloq xo'jalik mahsulotlarining 98 foizi aynan shu soha hissasiga to'g'ri kelmoqda. O'tish davrini boshidan kechirayotgan mamlakatlarda bu koʻrsatkich katta emas.

Tadbirkorlar boy toifa hisoblansa-da, tarkiban bir xil emas. Katta korxona egasini mayda, oʻzi ishlaydigan tijoratchilar bilan solishtirib boʻlmaydi, albatta. Tadbirkorlarning oʻz iyerarxiyasi, ya'ni martabasiga qarab oʻrin egallashi bor. Ular ham quyi, oʻrtacha, yuqori va oliy tabaqalarga ajraladi. Tadbirkorlar toifasi quyidan yuqoriga qarab quyidagi tabaqalarga ajraladi:

- 1) faqat foyda olishni koʻzlab, uning ketidan tinimsiz quvuvchi tadbirkorlar. Ular biznesga yangidan kirib kelgan boʻladilar, shu sababli ular boyib ulgurmagan va *quyi tabaqani* hosil etadilar;
- 2) foyda koʻrish bilan birgalikda oʻz ishidan qoniqish oluvchi tadbirkorlar. Bular ma'lum darajada boylik toʻplab ulgurganidan biznesda oʻz oʻrnini topishga intiladilar. Ularni tadbirkorlarning *oʻrta toifasiga* kiritish mumkin;
- 3) foyda olib, oʻz ishidan qoniqish hosil etishdan tashqari biznes olamida oʻz hokimiyatini oʻrnatishga va raqobatda doimo gʻalabaga intiluvchi tadbirkorlar. Ular tadbirkorlik iyerarxiyasidagi yuqori qatlamni hosil etadi, shu sababli *biznes elita* deb yuritiladi;
- 4) yuqori foydaga ega boʻlishdan tashqari, biznes olamida mutlaq hokimiyat oʻrnatishga, oʻz biznes imperiyasini tashkil etib biznes tarixida oʻz nomini qoldirishga intiluvchilar ham mavjud. Bular biznesdagi *super elitani* hosil etadilar. Uchinchi va toʻrtinchi toifadagi tadbirkorlar dunyoning eng boy milliarderlaridir. Dunyoning eng boy odami «Microsoft» firmasining egasi B. Geyts hisoblangan.

Oʻzbekistonda mol-mulkni xususiylashtirish tartibli ravishda va qattiq nazorat ostida o'tkazilganidan bu yerda katta mulkni tekinga hisobidan shakllangan oligarxlar guruhi o'zlashtirish bo'lganidek yuzaga kelmadi. Shu sababli bu yerda elita va super elita toifalari kuzatilmadi, tadbirkorlar iyerarxiyasida uning birinchi va ikkinchi toifalari asosiy oʻrin egalladi. Tadbirkorlik yuzaga kelishi uchun tadbirkorlik qobiliyatining mavjudligi kifoya qilmaydi. Buning uchun yetarli miqdorda kapital ham topilishi kerak. Turli sohalardagi biznesning kapital sig'imi, ya'ni uni boshlash uchun zarur bo'lgan kapital miqdori turlicha bo'ladi. Bir yerda u katta bo'lsa, boshqa yerda kichik bo'ladi. Lekin bundan qat'i nazar, biznes boshlash uchun minimal miqdorda kapital to'plash zarur. Shu massa jamg'arilgach, tadbirkorlik faoliyati boshlanadi. Shu sababli oʻtish davrida kapitalning dastlabki jamgʻarilishi yuz beradi. quyidagi yoʻllar bilan boradi, bu yoʻllar Kapital Oʻzbekistonga ham xos.

Tadbirkorlar toifasi *ikki yoʻl* bilan shakllanadi:

1) tadbirkorlik avloddan-avlodga oʻtadi, ya'ni bu toifa oʻzini oʻzi takroran yaratadi. Buning natijasida tadbirkorlar sulolasi paydo boʻladi. Masalan, AQShda Fordlar, Mellonlar, Dyuponlar sulolasi, Fransiyada Rotshildlar, Germaniyada Krupplar sulolasi yuzaga kelib, soʻngra tarqab ketgan;

2) ilgari tadbirkorlik qilmaganlar tadbirkorlikka qoʻl uradi, natijada tadbirkorlar safiga kirib boradi. Bu yoʻl oʻtish davridagi mamlakatlarga, jumladan Oʻzbekistonga xos. Oʻzbekistondagi tadbirkorlarning kelib chiqishini tahlili koʻrsatishicha, ular tadbirkorlikdan oldin turli kasb sohiblari boʻlganlar. Hozirgi tadbirkorlar avlodi yangidan shakllangan boʻlsa, ularning soʻnggi avlodi oʻzini oʻzi qaytadan yaratish asosida yuzaga keladi. Tadbirkorlar toifasining shakllanib ulgurishi oʻtish davrining tugallanganini bildiradi, chunki iqtisodiyot bozor qoidalariga amal qiluvchi faol kishilar qoʻliga oʻtadi.

Tadbirkorlik quyidagi guruhlardan tashkil topadi:

- ➤ mayda ishlab chiqarish bilan band boʻlgan ishbilarmonlar, ularni odatda yakka tartibda faoliyat koʻrsatuvchilar deb atashadi;
- intellektual mulk sohiblari, aqliy ijodiy mehnat bilan shugʻullanuvchi kishilar;
 - > fermerlar, tomorqa xoʻjaligi sohiblari, dala hovli egalari;
 - ➤ jamoa va aksionerlar mulkining birgalikdagi egalari.

Aytish joizki, 21 yil avval Oʻzbekistonda xususiy tadbirkorlik deyarli yoʻq edi. Totalitar iqtisod bunga yoʻl qoʻymas edi. Vaholanki, bizda ajdodlarimizdan meros boʻlgan tadbirkorlik an'analari tarixiy boʻlib, otabobolarimiz asrlar davomida oʻz yeri, mulki va kasb-korini e'zozlab, qadrlab, asrab-avaylab kelganlar. Tariximizda azal-azaldan xususiy tadbirkorlik muhim oʻrin tutgan.

3. Oshkora va yashirin tadbirkorlik

Tadbirkorlik oʻzining qonuniyligi, ya'ni qonunlarga naqadar mos yuritilishi jihatidan *oshkora va yashirin* tadbirkorlikka ajraladi.

Bu hamma yerda bor, lekin uning miqyosi har xil. Iqtisodiyotga qanchalik erkinlik berilgan boʻlsa, shunchalik yashirin tadbirkorlik kam boʻladi. Bordi-yu erkinlik cheklangan boʻlib, soliqlar ogʻir boʻlsa, faoliyat turlarini man etish koʻp boʻlsa, yashirin tadbirkorlik shunchalik rivojlanadi. Oʻzbekistonda yashirin ishlash kichik korxonalarda, xonaki ishlab chiqarishda, yakka tartibdagi tadbirkorlikka xos. Yashirin tadbirkorlik Oʻzbekiston iqtisodiyotida ham mavjud. Bu asosan soliq toʻlamaslik uchun ruxsat olmasdan biznes qilishdan iborat. Yashirin tadbirkorlik ijtimoiy foydali boʻlganda bozor talabini qondirish uchun kishilar ehtiyojini qondiradigan tovarlar va xizmatlar yaratiladi. Toʻgʻri, bu ruxsatsiz boʻladi, lekin iqtisodiyotga salmoqli hissa qoʻshadi. Yashirin tadbirkorlikning eng xavflisi — bu kriminal (jinoiy) biznesdir. Bu

kishilarga foyda oʻrniga zarar keltiradigan ishdir. Bunga narkobiznes, parnobiznes, kishilarni oʻgʻirlab qullikka sotish, ularni garovga olib pul talab qilish, yashirin ravishda qurol-aslaha sotish, harom pullarni bank orqali halollab olish kabilar kiradi. Bularning orasida eng rivoj topgani narkobiznes boʻlib, bu narkotik moddalarni (geroin, kokoin, marixuanna, qoradori, nasha, koʻknori va boshqalar) ishlab chiqarish va sotishni anglatadi. Hozirgi dunyodagi narkotiklar oldi-sotdisining 50 foiz ziyod qismi Afgʻonistonga toʻgʻri keladi. Kriminal biznes ashaddiy va gʻoyat zararli faoliyat boʻlganidan jamiyat unga qarshi bor kuchi bilan kurashadi.

Oshkora tadbirkorlik – ruxsat berilgan va davlat belgilagan qonunqoidalarga binoan yuritiladigan tadbirkorlik boʻlib, bu ochiq-oydin yuritiladi. Uning qanday faoliyat bilan shugʻullanishidan jamiyat ahli xabardor boʻladi. Bu iqtisodiyotning rasmiy, ya'ni oshkora sektori hisoblanadi. Bu yerda tovar va xizmatlarning asosiy qismi yaratiladi.

Yashirin tadbirkorlik – rasman ruxsat etilmagan, lekin amalda xufiyona tarzda va sir saqlangan holda yuritiladigan tadbirkorlik.

Hozirda odam savdosi global xavfsizlik, jamiyat barqarorligi, jahon hamjamiyatining rivojlanishiga tahdid solayotgan jinoyat sifatida baholanmoqda. U xavflilik darajasi boʻyicha noqonuniy qurol-yarogʻ sotish va narkobiznes kabi transmilliy jinoyatlar bilan bir qatorga qoʻyilmoqda. Odam savdosi transchegaraviy, kompleks xarakterga ega, uyushgan guruhlar tomonidan sodir etiluvchi juda keng tarqalgan jinoyat boʻlib, unda inson «tovar»ga aylantiriladi. Amalda esa bu qullikning zamonaviy shaklidir.

Birlashgan Millatlar Tashkilotining ma'lumotiga koʻra, dunyoda har yili 2 million 800 ming kishi odam savdosining qurboni boʻladi. Bu esa odam savdosi xalqaro jinoyatchilikning serdaromad moliyaviy manbaiga aylanganligini koʻrsatib, bu fikr ekspertlarning xulosalariga qaraganda, odam savdosidan yiliga koʻriladigan daromad 7 mlrd. AQSh dollaridan oshayotganligi bilan tasdiqlanadi. Boshqa ma'lumotlarga qaraganda, odam savdosi 12 millionga yaqin kishini «toʻriga ilintirib», yiliga 32 mlrd. AQSh dollari miqdorida daromad olayotganligini koʻrsatadi.

Oʻzbekiston Respublikasining «Odam savdosiga qarshi kurash toʻgʻrisida»gi qonunining 3-moddasiga koʻra: «Odam savdosi — kuch bilan tahdid qilish yoki kuch ishlatish yoxud boshqacha majburlash shakllaridan foydalanish, oʻgʻirlash, firibgarlik, aldash, hokimiyatni suiiste'mol qilish yoki vaziyatning qaltisligidan foydalanish orqali yoxud boshqa shaxsni nazorat qiluvchi shaxsning roziligini olish uchun uni toʻlovlar yoki manfaatdor etish evaziga ogʻdirib olish orqali odamlardan

foydalanish maqsadida ularni yollash, tashish, topshirish, yashirish yoki qabul qilish. Odamlardan foydalanish boshqa shaxslarning fohishaligidan foydalanishni yoki ularni shahvoniy foydalanishning boshqa shakllarini, majburiy mehnat yoki xizmatlarni, qullik yoki qullikka oʻxshash odatlarni, erksiz holat yoxud inson a'zolari yoki toʻqimalarini ajratib olishni anglatadi».

Xalqaro migratsiya tashkilotining ma'lumotlariga ko'ra, odam savdosi bilan shugʻullanuvchi jinoiy guruhlar odamlarni nafaqat jinsiy ekspluatatsiyasi, balki ularning mehnat ichki transplantatsiya qilish, narkotik moddalarni tarqatish, boshqa turdagi jinoyatlar sodir etish uchun ham yollab majburlamoqdalar. Shuningdek, ma'lumotlarda yanada dahshatliroq raqamlar qilgan e'lon **BMT** keltiriladi. Xususan, ayni paytda, 12 mln.dan ziyod kishi qullik iskanjasida ekanligi, insoniyatning uzoq oʻtmishida bunday ayanchli holat kuzatilmaganligi aytiladi. Biroq, ayrim ekspertlar bu raqamlarni dengizdan tomchi, deya ta'kidlamoqdalar. Ularning hisob-kitoblariga koʻra, sayyoramiz boʻyicha 200 mln.dan ziyod kishi zamonaviy qulchilik qurboniga aylangan. Qiyoslash uchun: soʻnggi 400 yil davomida birgina Afrika qit'asidan okeanorti mamlakatlariga 12 mln.dan ziyod tirik tovar olib ketilgan. Ushbu jinoyat chegara bilmas jinoyatga aylanib, hozirgi kunda dunyoning 127 mamlakatiga tarqalgan. 137 ta davlatga esa, iqtisodiy beqarorlik, surunkali ishsizlik hukm surayotgan joylardan majburiy ishlatish uchun odamlar keltirilishi davom etmoqda. Ushbu qabih jinoyat insoniyatning kelajagi bo'lgan bolalarni o'z domiga tortayotgani esa eng xunuk va eng dahshatli ijtimoiy hodisaga aylandi. Yana Xalqaro migratsiya tashkiloti ma'lumotini keltiramiz. Unga ko'ra, 2010-yilning 1-yanvariga qadar 5,7 mln. bola oʻgʻirlangan boʻlib, ulardan 1,2 mln. nafari qurbon bo'lgan, qolganlari esa og'ir mehnatga jalb etilgan. Asosan norasidalarning sogʻlom tana qismlari pullansa, qoʻlida qurol ushlay oladigan 300 mingga yaqin bola mintaqalardagi mavjud 30 ta qaynoq nuqtalarda askar sifatida jalb qilishga majburlanmoqda.

Alohida ta'kidlanishi lozim bo'lgan holat shuki, shahvoniy va boshqa g'araz maqsadlarda yollangan ayollarning asosiy qismi «iste'molchi» davlatlar — Birlashgan Arab Amirliklari, Saudiya Arabistoni va Turkiya mamlakatlariga yuborilgan. Fuqarolarimiz chet davlatlarga «tranzit» mamlakatlar Qirg'iziston, Qozog'iston, Rossiya, Ukraina, Armaniston, Ozarbayjon Respublikalari orqali olib chiqilgan. Rasmiy statistik ma'lumotlarga ko'ra, odam savdosi jinoyatidan jabrlanganlarning 85–90

foizi Rossiya Federatsiyasi va Qozogʻiston Respublikasida tekin ishchi kuchi sifatida foydalanilib, ekspluatatsiya qilingan.

Jinsiy ekspluatatsiyada jabrlanuvchilardan koʻchada, fohishaxonalarda, striptiz klublarda, restoran va tungi barlarda, saunalarda, uqalash xonalarida, shaxsiy uylarda mijozlarning xohishiga koʻra barcha turdagi jinsiy xizmatlarni bajarishlari talab qilinadi va sutkalab ekspluatatsiya qilinadi. Bular faoliyati yashirin sexlar (jinoiy biznes) faoliyatiga aylantirilgan.

Soʻnggi paytlarda MDH mamlakatlari ommaviy axborot vositalari ushbu dahshatli ijtimoiy hodisaning qurboni boʻlmasliklari uchun quyidagi ma'lumotlarni keng jamoatchilikka yetkazishga harakat qilmoqda. Jumladan, Oʻzbekiston OAV tomonidan jabrlanuvchilarni boʻysundirish maqsadida shaxsiy hujjatlarini olib qoʻyish; yoʻl xarajatlari uchun berilgan pul qarz ekanligi va uni ishlab qutulishi lozimligini uqtirish; boshqa insonlar bilan aloqa qilishini mutlaqo cheklash, yopiq xonadonlarda saqlash, doimiy nazoratda ushlash; mahalliy huquqni muhofaza qiluvchi organlarga murojaat qilmaganligi uchun javobgarlikka tortilishi va deportatsiya qilinishi; ularga yoki ularning yaqinlariga nisbatan jismoniy yoki boshqa turdagi zoʻravonlikni qoʻllash bilan qoʻrqitish kabi holatlar toʻgʻrisidagi ma'lumotlar yetkazilmoqda. Bu fuqarolarimizda ogohlikni oshirish va shu kabi hodisalarning qurboniga aylanmaslikning oldini olish maqsadida qilinmoqda.

4. Davlatning kichik biznes va xususiy tadbirkorlikni rivojlantirish siyosatini qoʻllab-quvvatlash va himoya qilishda ichki ishlar idoralari xodimlarining roli

4.1. Kichik biznes va xususiy tadbirkorlikning davlat tomonidan qoʻllab-quvvatlanishi

Tadbirkorlik oʻz-oʻzidan, davlat ishtirokisiz, uning yordamisiz rivoj topmaydi. Davlat soliqlar, subsidiyalar, eksport imtiyozlari, oʻzining axborot xizmatlari orqali, shuningdek, oʻz hisobidan bepul umumiy ta'lim berish orqali tadbirkorlikni qoʻllab-quvvatlaydi. Darhaqiqat, kichik biznes va xususiy tadbirkorlikning asosiy xususiyatlaridan biri iqtisodiyotning ushbu sohasi doimo davlat tomonidan qoʻllab-quvvatlanishiga ehtiyojmand ekanligidir. Davlat moddiy-texnik, informatsion, texnologik, maslahat, marketing, ta'lim xizmati, moliyaviy ta'minot va boshqa yoʻnalishlardagi tadbirkorlikni qoʻllab-quvvatlaydi va tartibga soladi. Kichik biznes va xususiy tadbirkorlikni rivojlantirish nafaqat davlat va

jamiyat taraqqiyotida, balki har bir insonning yuksalib borayotgan hayotiy ehtiyojlarini qondirishda muhim ahamiyatga ega, ya'ni xizmat ko'rsatish, chakana savdo, oziq-ovqat mahsulotlarini ishlab chiqarish kabi sohalarda ushbu faoliyat yaqqol namoyon bo'ladi.

Demokratik bozor islohotlarini va iqtisodiyotni liberallashtirishni yanada chuqurlashtirish jarayonlarida tadbirkorning banklar bilan aloqalarida iqtisodiy erkinligi ta'minlanishiga katta e'tibor berilmoqda. Tadbirkorning oʻzi tanlagan bankda oʻz hisob varagʻi (schoti)ni ochishi, oʻz pul mablagʻlarini oʻz bilganicha qonuniy sarflashi, mablagʻini naqd pul qilib yoki naqd pulsiz schotdan schotga koʻchirib olishiga imkoniyat yaratilmoqda. Tadbirkor qonuniy faoliyat bilan shugʻullanganda, uning moliyaviy ishlariga hech kim aralashishga haqli emas. Mamlakatimizda tadbirkorlarning budjet bilan ham erkin aloqada boʻlishiga keng imkoniyatlar yaratilmoqda. Belgilangan soliq summasini budjetga toʻlaydi, budjetdan tegadigan pulni oʻzi oʻzlashtiradi.

Keyingi-yillarda tadbirkorlik subyektlarini «bir darcha» orqali tezlik bilan davlat ro'yxatidan o'tkazish tizimi hamda bir necha turdagi soliqlarni to'lash o'rniga kichik biznesni yagona soliq to'lovi shaklidagi soddalashtirilgan soliqqa tortish tizimi joriy etildi. Bunda kichik firmalar va korxonalar uchun yagona soliq toʻlovi stavkalari 2005-yilda 13 foiz, 2008-yilda 10 foizdan 8 foizgacha, 2009-yildan boshlab esa 7 foizgacha pasaytirilgan bo'lsa, 2011-yilda 6 foizga, 2012-yilda 5 foizga tushirildi. Xalq amaliy san'ati va oilaviy biznes obyektlari esa umuman soliqqa tortilmaydi yoki eng kam stavka boʻyicha soliqqa tortiladi. Davlat soliq qo'mitasidan olingan ma'lumotlarga ko'ra, ushbu tadbirlar natijasida 2011-yilda tadbirkorlar ixtiyorida 58 milliard soʻm mablagʻ qoldirildi. Bu ularning yangi istiqbolli loyihalarni amalga oshirishlari uchun xizmat qiladi, deganidir. Yangidan tashkil etilayotgan kichik va xususiy qoʻllab-quvvatlash uchun imtiyozli kreditlash tizimi korxonalarni yaratildi. Kichik biznes va xususiy tadbirkorlikni moliyalashtirish boʻyicha ixtisoslashtirilgan «Mikrokreditbank» tashkil etildi. Shu oʻrinda alohida qayd etish kerakki, hatto jahon moliyaviy inqirozi sharoitida ham yalpi ichki mahsulotda soliq yukini yengillashtirish Oʻzbekistondagi soliq siyosatining muhim jihatidir.

Tadbirkorlik yuridik jihatdan qayd etiladi, uning shart-sharoiti, qonun-qoidalari, haq-huquqini belgilovchi, davlat va jamoatchilik tomonidan himoya qilinishi va kafolatlanishini ta'minlovchi qonunlar, farmon va qarorlar amalga kiritilgan. Oʻzbekiston Respublikasining 2012-yil 2-mayda qabul qilingan yangi tahrirdagi «*Tadbirkorlik faoliyati*

erkinligining kafolatlari toʻgʻrisida»gi qonunida tadbirkorlarga oʻz molmulkidan foydalanish erkinligi, mahsulotlarni taqsimlash mustaqilligi, huquqiy tenglik, ixtiyoriy ishga yollash, cheklanmagan qonuniy daromad olish imkoni kafolatlanadi. 2011-yilning «Kichik biznes va xususiy tadbirkorlik-yili» deb e'lon qilinishi zamirida jamiyatimiz koʻzlagan maqsad inobatga olingan edi. U ham boʻlsa, dunyoning demokratik taraqqiy topgan mamlakatlari qatoridan oʻrin egallashdir.

soʻnggi-yillarda kichik Respublikamizda biznesning ahamiyatini inobatga olgan holda, uni qoʻllab-quvvatlash va yanada rivojlantirishni rag'batlantirish bo'yicha aniq chora-tadbirlar izchillik bilan amalga oshirib borilmoqda, bular mamlakatimizda 2009-2012yillarga moʻljallangan Inqirozga qarshi dastur hamda «Barkamol davlat dasturi talablari asosida yili 2009-yil 15-mayda avlod» Oʻzbekiston Respublikasi Prezidentining «Tadbirkorlik faoliyatini yanada qoʻllab-quvvatlash va rivojlantirish chora-tadbirlari toʻgʻrisida»gi 1112-2010-yil 28-iyuldagi «Ta'lim hamda muassasalarining bitiruvchilarini tadbirkorlik faoliyatiga jalb etish borasidagi qoʻshimcha chora-tadbirlar toʻgʻrisida»gi 4232-farmoni, shuningdek, Oʻzbekiston Respublikasi Vazirlar Mahkamasining 2009-yil 10-iyundagi «Tadbirkorlik faoliyatini amalga oshirishda ruxsatnomalar olish tartibotlarini takomillashtirish va soddalashtirish toʻgʻrisida»gi 158-sonli hamda 2009yil 29-iyuldagi «Oilaviy tadbirkorlikni hamda hunarmandchilik faoliyatini rivojlantirish va kengaytirish chora-tadbirlari toʻgʻrisida»gi 216-sonli qarorlaridir.

Prezident Islom Karimovning Oliy Majlis palatalarining 2010-yil 12-noyabrda boʻlib oʻtgan qoʻshma majlisidagi «**Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi**» nomli ma'ruzasida ta'kidlanganidek, mamlakatimizda biznesni tashkil qilishning ushbu shakli biznesni yuritishda yuzaga kelgan milliy an'analarimizga, xoʻjalik yuritish faoliyatining mavjud holatiga toʻla mos keladi.

Oilaviy biznesni kengaytirish Oʻzbekistonda kichik biznes va xususiy tadbirkorlikni rivojlantirishning muhim yoʻnalishlaridan biridir. Bugungi kunda milliy iqtisodiyotimizda ushbu tarmoqning roli muntazam ortib bormoqda. Oilaviy biznes muhim daromad manbaiga aylanmoqda. Darsligimizda 2011-yil 2-aprelda «Xalq soʻzi» gazetasida e'lon qilingan, «Ijtimoiy fikr» jamoatchilik fikrini oʻrganish markazi tomonidan aholi oʻrtasida oilaviy biznesning bugungi ahvoli va uni rivojlantirish

istiqbollarini aniqlashga bagʻishlab oʻtkazilgan soʻrov natijalarini keltirishni lozim topdik. Unda yurtimizning barcha hududlaridan aholi qatlamlari vakillari ishtirok etdi. Soʻrov qatnashchilari kichik biznes va xususiy tadbirkorlik sohasi oʻz rivojlanish jarayonida jamiyatimizda ijtimoiy-siyosiy barqarorlikning muhim kafolatlaridan biri boʻlib xizmat qilayotganini qayd etdilar.

Mamlakatimizda 2011-yilning «Kichik biznes va xususiy tadbirkorlik yili» deb e'lon qilinishi munosabati bilan tegishli Davlat dasturi qabul qilindi. Unda amaldagi me'yoriy-huquqiy bazani tanqidiy baholash va takomillashtirish, ushbu sohadagi islohotlarni izchil rivojlantirish va jadallashtirish boʻyicha zamon talablariga javob beradigan yangi qonun hujjatlarini qabul qilish muhim vazifalar sirasiga kiritildi.

Oʻzbekistonda xalqimizning eng yaxshi milliy an'analarini qayta tiklash, jumladan, odamlarning hunarmandchilik va xususiy biznes yuritish koʻnikmalarini rivojlantirish uchun barcha shart-sharoit yaratilgan. Bu borada oilaviy biznes ijtimoiy ishlab chiqarishning ana shu koʻnikmalarini qoʻllash va rivojlantirishga har tomonlama koʻmaklashadigan samarali tashkiliy-huquqiy omil boʻlib xizmat qilishi mumkin.

Soʻrov davomida bugun mamlakatimizda har toʻrt oiladan biri oilaviy biznes bilan shugʻullanayotgani aniqlandi. Har uch oiladan biri qishloq xoʻjaligi mahsulotlari yetishtirmoqda, har olti oiladan biri savdo sohasida mehnat qilmoqda, har sakkiz oiladan biri hunarmandchilik hamda kundalik ehtiyoj tovarlari ishlab chiqarish bilan shugʻullanayotir. Soʻrov ma'lumotlariga koʻra, oilalarning 6,5 foizi transport xizmatlarini koʻrsatish sohasida mehnat qilmoqda. Oilaviy biznes tibbiy, ta'lim, huquqiy va boshqa turdagi xizmat koʻrsatish sohalarida ham rivojlanmoqda.

Ijtimoiy tadqiqot qatnashchilari oʻz oilaviy biznesini amalga oshirishga yordam berayotgan mavjud shart-sharoit va qoidalarni ijobiy baholaydi. Soʻralganlarning 41,3 foizi bu qoidalar oilaviy biznesni samarali rivojlantirish imkonini berayotganini qayd etdi.

Tadqiqot natijalari Oʻzbekistonda oilaviy biznes katta istiqbolga ega ekanini tasdiqladi. Ayni paytda ishtirokchilarning 53,8 foizi iqtisodiyot real sektorining ushbu sohasini kengaytirish uchun *oilaviy biznes huquqlarini himoya qilish bilan bogʻliq muayyan qiyinchiliklarni bartaraf etish zarur*, deb hisoblaydi. Prezidentimiz ham «Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi»da bu masalaga alohida e'tibor qaratgan.

Soʻrov natijalariga koʻra, mamlakatimizning barcha hududlarida yashayotgan oilalarning uchdan bir qismi kelajakda oʻz oilaviy biznesini yoʻlga qoʻyishni istaydi. Ularning orasida qishloq ahli shaharliklarga qaraganda 1,2 marta koʻp. Soʻrov qatnashchilarining aksariyati oilaviy biznesini *umumiy ovqatlanish*, *hunarmandchilik*, *savdo*, *qishloq xoʻjaligi*, jumladan, *chorvachilik mahsulotlarini yetishtirish*, *xizmat koʻrsatish*, *tikuvchilik* va boshqa sohalarda tashkil etish istagini bildirgan.

Fuqarolarimizning fikricha, davlatimiz rahbari tomonidan ishlab chiqilgan Konsepsiyaga muvofiq, oilaviy biznesni tashkil qilishning qonunchilik bazasini yaratish huquqiy kafolatlarni yanada mustahkamlash imkonini beradi va ushbu sohani jadal rivojlantirish sharoitlarini shakllantiradi. Shuningdek, joylarda rasmiyatchilik holatlariga barham berishga koʻmaklashadi. Muxtasar aytganda, «Oilaviy biznes — rivojlanishning yangi bosqichi» mavzuida oʻtkazilgan soʻrov mamlakatimiz aholisi Oʻzbekiston Respublikasi Prezidenti Islom Karimovning qonunchilik tashabbuslarini toʻliq qoʻllab-quvvatlashini koʻrsatdi. Chunonchi, soʻrov natijalariga koʻra, fuqarolarning aksariyati (92,9 foiz) «Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi»da qayd etilgan biznesning yangi shakli — oilaviy biznesning tashkiliy-huquqiy bazasini qonuniy belgilash zarurligi toʻgʻrisidagi qoida milliy iqtisodiyotimiz va aholi farovonligini jadal yuksaltirishda oʻta muhim ahamiyatga ega, deb hisoblaydi.

Darhaqiqat, ijtimoiy hodisa boʻlmish oilaga ilmiy tadqiqotlarda ham borgan sari koʻproq va asosliroq e'tibor berilmoqda. 1992-yilda iqtisodiyot sohasi boʻyicha Nobel mukofoti amerikalik olim Garri Bekkerga mikroiqtisodiy tahlilni oilaning faoliyatini shakllantirishni boshqarishgacha kengaytirgani uchun berildi. Iqtisodiy xavfsizlikni ta'minlashning muhim sohasi oilaning iqtisodiy darajasidir. Oila iqtisodining baquvvatligi, uning farovonligi **ijtimoiy xotirjamlikni** kafolatlaydi. Oila iqtisodiy tizimning bosh nuqtasi, u faqat iste'molchi emas, balki ishlab chiqaruvchi hamdir. Oilaga iqtisodiy hujayra deb qarash zarur.

Koʻpchilikka ma'lum boʻlgan shaxsiy tomorqa xoʻjaligining yoyilganligi bilan ajralib turadigan Oʻzbekistondagi vaziyat muayyan darajada oila iqtisodiy xavfsizligini ta'minlash uchun qulay sharoit mustaqillikka qadar davlatimiz rahbari Islom Karimov tashabbusi bilan ta'minlangan. Yurtboshimiz Vatanimiz poytaxti Toshkent shahrining 2200 yilligiga bagʻishlangan tantanali marosimdagi nutqida «Qishloq xoʻjalik sohasini, qishloq taraqqiyotini mamlakatimiz rivojining yetakchi

kuchi sifatida davlat siyosatining ustuvor yoʻnalishi darajasini koʻtarishga alohida ahamiyat berilganligi jahon moliyaviy-iqtisodiy inqirozi sharoitida iqtisodiyotimiz negizlarini mustahkamlashda muhim omil boʻlganligini» ta'kidlagan edi.

Binobarin, jamiyat hayotini modernizatsiyalash davrida boshqa sohalar qatori qishloq joylarida ham ijtimoiy infratuzilmani takomillashtirish, aholi turmush darajasini yaxshilash muhim ahamiyat kasb etadi. Milliy iqtisodiyotni rivojlantirish, qishloqda ijtimoiy-siyosiy, iqtisodiy, ma'naviy islohotlarni amalga oshirish jarayonida aholi turmush tarzini yuksaltirish, fuqarolarni ijtimoiy himoyalash dolzarb masalalardan hisoblanadi.

Shu oʻrinda nafaqat qishloq joylarda ajratilgan tomorqalar, balki shahar joylardagi tomorqalardan samarali foydalanish ham tadbirkorlik ekanini eslatib oʻtish joizdir. Afsuski, davlatimiz tomonidan ajratilgan tomorqalardan joylarda oqilona foydalanilmayapti. Shu bois mutasaddi tashkilotlar, rahbarlar, huquqni muhofaza ailuvchi organlarning xodimlari, faollar joylarda tomorqalardan samarali foydalanishga oid targ'ibot-tashviqot ishlarini kundalik faoliyatiga aylantirishi lozim. Chunki bugungi kunda tabiat injiqliklari, global iqlim, qurgʻoqchilik oziq-ovqat xavfsizligini ta'minlash jahon muammoga aylanmoqda. Bu jahonda oziq-ovqat narxlarining oʻsishiga olib kelyapti. Tomorqa xoʻjaligining mavjudligi ham oilada ish bilan band etish va daromad olishning samarali omili hisoblanadi.

Yuqorida ta'kidlaganimizdek, davlatning iqtisodiyotga ta'siri iqtisodiy, huquqiy va ma'muriy usullar orqali yuz beradi. Soʻnggi yillarda iqtisodiyotimizni isloh qilishning eng muhim yoʻnalishlari sifatida davlat va nazorat tuzilmalarining korxonalar, moliya xoʻjalik subyektlari hamda kichik biznes va xususiy tadbirkorlikning iqtisodiy erkinligi va huquqlarini sezilarli darajada kengaytirish boʻyicha salmoqli ishlar amalga oshirildi. Noqonuniy tekshiruvlar soni kamaydi.

Biznesning erkin faoliyat koʻrsatishining asosiy majburiy shartlaridan biri, birinchi navbatda, tadbirkorlik erkinligining kuchli huquqiy kafolatlarini ta'minlash, ularni soʻzda emas, amalda bajarish, davlat, huquq-tartibot, nazorat organlari va tuzilmalari tomonidan ularning faoliyatiga noqonuniy aralashuvlarga chek qoʻyish hisoblanadi. Tadbirkorlik subyektlarining davlat, huquqni muhofaza etuvchi va nazorat organlari bilan oʻzaro munosabatlarida tadbirkorlar huquqlarining ustuvorligi tamoyili qonunchilik darajasida joriy etilgan, bunda qonunchilikdagi har qanday qarama-qarshilik va nomuvofiq oʻrinlar

tadbirkorlar foydasiga talqin qilinishi kerak. Kichik biznes subyektlarida ular roʻyxatdan oʻtgan paytdan boshlab uch yil davomida rejali soliq tekshiruvlarini oʻtkazishni taqiqlaydigan va keyinchalik barqaror faoliyat yuritayotgan, soliq qonunchiligi va tartib-intizomga qat'iy rioya qilayotgan soliq toʻlovchilarda tekshiruvlar oʻtkazishni cheklaydigan tartib joriy etilgan.

2005-yildan boshlab tadbirkorlik subyektlarini davlat roʻyxatidan oʻtkazishning ruxsat berish tizimidan xabardor qilish tizimiga oʻtildi. Oʻz biznesini ochish uchun tadbirkorga ikki kundan ortiq boʻlmagan muddat talab etiladi va bu qoida rivojlangan davlatlarda amal qilayotgan mezonlarga javob beradi. Oʻzbekistonda kichik biznes va xususiy tadbirkorlik rivojlanishini qoʻllab-quvvatlaydigan institutsional va bozor infratuzilmasini shakllantirishga katta e'tibor qaratilmoqda. Tovar-xomashyo birjasi bozorda narxlar shakllanishi va yuqori likvidli xomashyo resurslari va tovarlaridan teng foydalanish imkoniyatini yaratishning eng muhim vositasi hisoblanadi. Bugungi kunda mamlakatimizda birja savdolarining izchil yoʻlga qoʻyilgan mexanizmi mavjud boʻlib, u har bir tadbirkorga xomashyo resurslaridan birja savdolari orqali teng va hech qanday toʻsiqlarsiz foydalanish imkoniyatini bermoqda.

2012-yilda mamlakatimizda eksport qiluvchi korxonalar, shuningdek, xorijiy investorlar uchun qoʻshimcha ragʻbat va imtiyozlar berildi. 2012-yilning iyul oyida Xalqaro moliya korporatsiyasi bilan hamkorlikda ishbilarmonlik muhitini tubdan yaxshilash va tadbirkorlikka yanada koʻproq erkinliklar berish boʻyicha chora-tadbirlar ishlab chiqilib, ular asosida Oʻzbekiston Respublikasi Prezidentining ikkita farmoni qabul qilindi.

Mamlakatimizda statistik, moliyaviy va soliq hisobotlarini taqdim etish, soliq va majburiy toʻlovlarni toʻlash, roʻyxatga olish va ruxsat berish jarayonlarini amalga oshirish, xoʻjalik sudlariga da'vo arizalari va tavsiyanomalar kiritish boʻyicha elektron tizimni keng joriy etish koʻzda tutilgan boʻlib, bu oʻz navbatida davlat, nazorat qiluvchi organlar bilan tadbirkorlik subyektlari oʻrtasidagi bevosita aloqalarni sezilarli darajada qisqartirish yoki butunlay bekor qilish imkonini beradi.

Tasdiqlangan choralar 2012-yilning 1-avgustidan boshlab biznesni roʻyxatga olish paytidagi tartib-qoidalar sonini ikki barobar qisqartirish imkonini berdi, roʻyxatdan oʻtishdan avval birlamchi ustav jamgʻarmasini shakllantirish boʻyicha talab bekor qilindi, tadbirkorlik subyektlarining sud xarajatlari 2,5 barobar qisqartirildi.

Davlatning tadbirkorlik subyektlari faoliyatiga aralashuvini tubdan kamaytirish maqsadida joriy yilda ruxsat berishga oid 80 ta tartib-qoida, shuningdek, litsenziyalanadigan faoliyat turlarining 15 tasi bekor qilindi, moliyaviy hisobotlarni topshirishning shakllari va davriyligi 1,5 barobar qisqartirildi. Bundan tashqari, 2013-yilning 1-yanvaridan boshlab 65 ta statistik hisobot va 6 ta soliq hisoboti shaklini bekor qilish, ularni topshirish davriyligini ikki barobardan ziyod qisqartirish haqida qaror qabul qilindi.

Davlatimiz rahbari Islom Karimov: «Mamlakatimizda qabul qilingan qonunchilik talablariga koʻra, davlat organlarining noqonuniy qarorlari, mansabdor shaxslarning xatti-harakati yoki harakatsizligi, shuningdek, qonunchilikka zid tarzda qabul qilingan idoraviy hujjat tufayli tadbirkorlik subyektiga yetkazilgan zarar davlat tomonidan qoplanadi»¹, – deb alohida qayd etishi bugun tadbirkorlik taraqqiyotni belgilovchi kuch ekanligidan dalolat beradi.

Jumladan, bugungi kunda respublikamizda kichik biznes va xususiy tadbirkorlikni rivojlantirishni davlat tomonidan tartibga solish va qoʻllabtizimini takomillashtirish talab etilmoqda. quvvatlash tadbirkorlikning samarali faoliyat yuritishi, yangi xususiy korxonalarni tashkil etish va ularni rivojlantirishda qator moliyaviy, ma'muriy va tashkiliy muammolar saqlanib qolayotganligi bois davlatimiz rahbari Islom Karimov «boshqaruv tizimini takomillashtirish, ortiqcha byurokratik toʻsiqlarni bartaraf etish maqsadida «Tadbirkorlik faoliyati sohasida ruxsat berish tartib-qoidalari toʻgʻrisida»gi qonunni ishlab chiqish va qabul qilish muhim ahamiyat kasb etadi. Bunda tadbirkorlik faoliyatini yuritish uchun zarur bo'lgan ruxsat berish tartib-qoidalarining qat'iy cheklangan ro'yxati va turlarini aniq belgilab qo'yish, qonunda nazarda ortigcha ruxsatnoma berish tutilmagan va ruxsat qoidalarining yangi turlari kiritilishini qonun bilan keskin taqiqlash zarur»ligini vazifa etib belgiladiki, bu kichik biznes va xususiy tadbirkorlik rivojlanishi uchun yanada qulay va keng imkoniyatlar yaratadi.

Shuningdek, kichik biznes va xususiy tadbirkorlikni rivojlantirish oʻziga xos xususiyatlarga egaligi bu sohada qonunchilikni takomillashtirishni taqozo etmoqda. Prezident Islom Karimov ham Konsepsiyada

¹ Ўзбекистон Республикаси Президенти Ислом Каримовнинг «Ўзбекистонда ижтимоий-иктисодий сиёсатни амалга оширишда кичик бизнес ва хусусий тадбиркорликнинг роли ва ахамияти» мавзуидаги халқаро конференциянинг очилиш маросимидаги нутқи //Халқ сўзи. – 2012. – 15 сент.

kichik biznes va xususiy tadbirkorlik sohasidagi qonunchilik bazasini takomillashtirish zarurligini ta'kidlagan. Jumladan, Konsepsiyada ta'kidlanganidek, «hozirgi vaqtda yana bir muhim masala — mamlakatimiz iqtisodiyotida kichik biznes, birinchi navbatda, xususiy tadbirkorlikning roli va ulushini yanada kengaytirishni ta'minlay oladigan qonunlarni qabul qilish masalasi biz uchun dolzarb bo'lib qolmoqda.

Oʻzbekistonning bu yilgi yalpi ichki mahsulotida kichik biznesning ulushi 54 foizdan ortib borayotganiga qaramasdan, afsuski, bu soha real iqtisodiyotimizda, avvalambor sanoatda yetakchi oʻrinni egallay olmayapti. Ushbu vazifani hal etish uchun «**Tadbirkorlik faoliyati erkinligining kafolatlari toʻgʻrisida»gi qonunning** yangi tahriri 2012-yil 2-mayda qabul qilindi. Bu qonunda kichik biznes va xususiy tadbirkorlik subyektlarini tashkil qilish yoʻllarini soddalashtirish, ularning faoliyati uchun koʻproq erkinliklar berish koʻzda tutilgan.

Hozirgi kunda mamlakatimizda 30 ta tijorat banki, 115 ta kredit tashkiloti, 36 ta mikrokredit tashkiloti hamda 28 ta lombard faoliyat yuritmoqda. Endilikda ushbu moliya muassasalari kichik biznes va xususiy tadbirkorlikning yaqin hamkoriga aylanayotir. Respublikamizda 2010-yilda ushbu soha vakillariga ajratilgan kreditlar hajmi 1,4 barobarga koʻpayib, 2 trillion 700 milliard soʻmni tashkil etdi.

Yaratilgan huquqiy zaminlar, qabul qilingan kafolatlar, imtiyoz va preferensiyalar hayot, najot, saodat yoʻli boʻlgan kichik biznesning jadal rivojlanishiga imkoniyat yaratdi, buning natijasida uning yalpi ichki mahsulotdagi ulushi 2000-yildagi 31,0 foizdan 2012-yil yakuniga kelib qariyb 55,0 foizga yetdi. Bugungi kunda jami band aholining 74,3 foizdan koʻprogʻi mazkur sohada mehnat qilmoqda. Kichik biznes va xususiy tadbirkorlikning eksportda 13,6 foiz, importda 36,6 foiz ulushga ega boʻlgani bejiz emas. Muhim yangilik yana shundan iboratki, bugunga kelib kichik biznes va xususiy tadbirkorlikni davlat tomonidan qo'llabquvvatlashning natijasi sifatida aholining daromadlari tarkibida tadbirkorlik faoliyatidan olinayotgan daromad ulushi tobora salmoqli oʻrin egallayotganini alohida qayd etish lozim. Chunki barcha daromadlarning 51 foizdan ortigʻi tadbirkorlik faoliyatidan olinayotgan daromad hissasiga to'g'ri kelmoqda. Bu natijalar mamlakatimizda so'nggi yillarda kichik hajmdagi moliyaviy resurslar bilan ta'minlashning maxsus samarali shakli hisoblangan mikromoliyalash tizimini rivojlantirishga e'tibor qaratilganidandir.

Davlatimiz rahbari Islom Karimov mamlakatimizni modernizatsiya qilish yoʻlini izchil davom ettirishda «2011-yil – Kichik biznes va xususiy

tadbirkorlik yili»ning oʻrni beqiyosligiga toʻxtalib, «*Kichik biznes va xususiy tadbirkorlik yili*» boʻyicha qabul qilinadigan davlat dasturida bir qancha ustuvor yoʻnalishlarga alohida e'tibor qaratish zarurligini ta'kidladi.

Ustuvor yoʻnalishlardan biri – kichik biznes va xususiy tadbirkorlik faoliyati uchun yanada qulay muhit yaratishdan iboratligi Prezidentimiz ma'ruzasining markaziy yoʻnalishlaridan biri hisoblanadi. Unda oxirgiyillarda tadbirkorlik sohasida oʻz ishini ochish uchun ruxsat olish, soliq, moliya va statistika organlariga hisobot topshirish masalalarini tartibga solish boʻyicha ancha ishlar qilingani va qilinayotgani ta'kidlanib, lekin bu sohada bajaradigan ishlarimiz hali kam emasligi koʻrsatib oʻtildi.

Ayni paytda, kichik biznes subyektlarining *energiya*, *gaz*, *suv* va *kanalizatsiya*, *issiqlik ta'minoti* va boshqa shu kabi muhandislik-kommunikatsiya tarmoqlariga ulanishi yoki ularni qurishda ishtirok etishi uchun ruxsat olish tartib-qoidalarini soddalashtirish masalasi boʻyicha ham dasturda aniq chora-tadbirlar belgilanishi va ularning ijrosini qat'iy nazoratga olish yoʻlga qoʻyildi.

Bundan tashqari, davlatimiz rahbari kichik biznes va xususiy tadbirkorlik subyektlarining huquq va manfaatlarini himoya qilish, ushbu soha rivoji uchun yanada keng yoʻl ochib berish maqsadida mavjud normativ-huquqiy bazani tanqidiy nuqtai nazardan qayta koʻrib chiqish, yangi qonun hujjatlarini qabul qilish masalasiga toʻxtaldi.

Bu haqda Islom Karimov joylarda kichik boʻlsa ham oʻz ishini, oʻz biznesini ochishga intilayotgan xususiy tadbirkorlarni qoʻllab-quvvatlash oʻrniga, mahalliy amaldorlar tomonidan ularni koʻrolmaslik, qoʻlidan ish keladigan odamlarning yoʻliga turli-tuman gʻov-toʻsiqlar qoʻyilayotganiga aslo toqat qilib boʻlmasligini aytib oʻtib, keyingi yillarda bunday salbiy holatlarni bartaraf etish maqsadida tegishli ishlar olib borilayotganligi, jumladan, korxonalarning moliya-xoʻjalik faoliyatiga davlat va nazorat tuzilmalarining aralashuvini keskin kamaytirish, shuningdek, xoʻjalik va tadbirkorlik subyektlarining iqtisodiy huquq va erkinliklarini sezilarli darajada kengaytirish boʻyicha katta ishlar amalga oshirilganini ta'kidladi. Lekin nazorat organlariga mansub ayrim mansabdorlar malakasining pastligi hanuz oʻtkir muammo boʻlib qolayotganligi va ishimizga salbiy ta'sir oʻtkazayotganligini kuyinib gapirdi.

Shular qatorida koʻpgina viloyat va tumanlarda korrupsiya degan balo, ya'ni poraxoʻrlik, tamagirlik, xizmat vazifasini suiiste'mol qilish

kabi illatlar uchrab turayotganini inkor etib boʻlmasligini, qonunga zid boʻlgan bunday xunuk holatlar bilan murosa qilishga chek qoʻyishning vaqti kelganligi, yoshi va vazifasidan qat'i nazar, bizningcha, keng jamoatchilik ongiga korrupsiyaning iqtisodiy, siyosiy, ijtimoiy va ma'naviy sohalarda mamlakatning barqarorligi va iqtisodiy oʻsishiga gʻov ekanligi, oxir-oqibatda aholi farovonligini oʻstirishga salbiy ta'sir koʻrsatuvchi illat ekanligini singdirish zarurligi davlatimiz rahbari tomonidan alohida qayd etilgan.

Mamlakatimizning barcha mintaqalarida biznesni rivojlantirish uchun yanada qulay ishchan muhit yaratish, tadbirkorlik, kichik va xususiy biznesga yanada keng erkinlik berish, byurokratik toʻsiq va gʻovlarni bartaraf etish boʻyicha zarur chora-tadbirlarni amalga oshirish lozimligi talabidan kelib chiqib, «**Tadbirkorlik faoliyati sohasida ruxsat berish tartib-qoidalari toʻgʻrisida**»gi qonun qabul qilindi. Qonun haqidagi ma'lumotimiz kichik biznes va xususiy tadbirkorlik subyektlarning bu boradagi yangiliklardan xabardor etishga koʻmak beradi.

Darhaqiqat, kichik biznes va xususiy tadbirkorlik rivojlanishida ishlab chiqilgan qonunning ahamiyati va dolzarbligini qayd etish maqsadida yaqin oʻtmishga bir nazar tashlab, tadbirkorlar oʻz ishini boshlashi uchun zarur boʻlgan ruxsatnoma va kelishuvni olishda qanday qiyinchiliklarga duch kelganini bugungi kunda e'tirof etib oʻtish zarur. Chunki, ushbu hujjatlarsiz ish boshlab boʻlmasligi barchamizga yaxshi ma'lum. Zero, tadbirkor oʻz biznesi bilan shugʻullana turib, amaldagi tartib-qoidalarga rioya etmogʻi, boshqalarning huquq va qonuniy manfaatlarini hisobga olishi zarurdir.

Ammo ruxsat beruvchi hujjatlarni olish koʻplab muammolar bilan bogʻlanib ketgan edi. Mahtal boʻlib kutilgan ruxsatnoma qanchaga tushganini tadbirkorlarning koʻpchiligi yaxshi ma'lum. Chunki ular uzoq vaqt mobaynida idoralar ostonasida sargʻayib turishga, turli hujjatlarni yigʻishga vaqt, kuch va anchagina mablagʻ sarflashga majbur boʻlishardi. Ish shu darajaga borgan ediki, hatto har bir idora turli xil ichki idoraviy buyruq va qoidalar chiqarib, oʻzlari tartib oʻrnatgan edi. Ushbu me'yoriy hujjatlarning ayrimlari amaldagi qonunchilik normalariga ham muvofiq emas edi.

U yoki bu turdagi ruxsatnoma va kelishuvlar olishni tartibga soluvchi qoida hamda me'yorlarning shaffof emasligi, shuningdek, ushbu hujjatlarni beradigan organlarning koʻpchiligi qoʻshimcha ma'muriy toʻsiqlarni yaratib, Oʻzbekistonda tadbirkorlik va sogʻlom raqobatchilik muhitining rivojlanishiga salbiy ta'sir koʻrsatardi. Sir emas, ayrim

kelgan vaziyatdan oʻzining amaldorlar yuzaga shaxsiy maqsadlarida ham foydalanganlar. Bugunga kelib Prezidentimiz qoʻygan talablar asosida ushbu muammolarni hal etish uchun aniq chora-tadbirlar koʻrilmoqda. Bunday ishlar, ayniqsa, mamlakatimizda faol demokratik oʻzgarishlar va mamlakatni modernizatsiya qilish davriga toʻgʻri keldi. 2003-yilning sentabridan boshlab bu boradagi vaziyat tubdan o'zgara boshladi. O'shanda hokimiyatlar huzuridagi maxsus inspeksiyalarda ruxsatnoma va kelishuvlar olishni soddalashtirish uchun «bir darchaga» tizimi joriy etildi. Bu tizim tadbirkorlarning idorama-idora sarson yurishiga barham berib, hujjatlar toʻplamini bitta joyda topshirishga imkon yaratdi. Muhimi, barcha qolgan ishlarni tegishli davlat organlari bajarishi lozim edi. Yangi tizim oʻzining ijobiy jihatlariga qaramay, bir qator muammolarni hal etolmadi. Xususan, «bir darchaga» ruxsatnoma va kelishuvlarni olish faqatgina toʻrtta ruxsatnoma turlari bilan cheklangan edi. Bular:

□ inshootlarni qurishga;
 □ inshootlarni ta'mirlash va faoliyat yoʻnalishini oʻzgartirishga;
 □ turar joylarni noturar joy toifasiga oʻtkazishga;
 □ auksion savdolarida xarid qilingan yer uchastkalarida inshootlar qurishga berilardi.

Ayni paytda «bir darchaga» doirasidan yer uchastkalaridan foydalanish huquqini beruvchi ruxsatnomalar, gigiyenik sertifikatlar olish, yongʻin xavfsizligi qoidalariga muvofiqligi haqida xulosalarni olish singari koʻplab ruxsatnoma va kelishuvlar chetda qoldi. Tadbirkorlar oʻzlari olishga majbur boʻlgan mazkur hujjatlarning bir qismini yangi tizimga kiritishlari ham mumkin edi.

Qolaversa, koʻpchilik tadbirkorlar yangi tizim boʻyicha ruxsat beruvchi guvohnomalarni olish muddati qonunchilikda koʻzda tutilganidan uzayib ketishini ta'kidlashgan. Bu, oʻz navbatida, tashkiliy ishlar vaqtini kechiktirib, ular biznesining rivojlanishiga ta'sir koʻrsatardi. Bundan tashqari, tadbirkorlar tomonidan yana koʻplab e'tirozlar bildirilardi. Xususan, ularning fikricha, talab qilinadigan ruxsatnoma va kelishuvlar soni haddan tashqari koʻp boʻlib, ularning hammasi ham asoslab berilmasdi.

Oʻzbekiston Respublikasi Prezidentining 2005-yil 21-sentabr PQ-186-sonli «**Tadbirkorlik faoliyati yuritish uchun ruxsatnoma turlarini qisqartirish va ularni berish tartib-qoidalarini soddalashtirish toʻgʻrisida**»gi qarori qabul qilindi. Unga muvofiq, 12 ta ruxsatnoma,

xususan, talab yuqori boʻlgan chakana savdoga ruxsatnoma berish bekor qilindi. Keng tarqalgan ruxsatnomalardan yana biri — ulgurji savdo bilan shugʻullanish uchun ruxsatnoma bir martalik beriladigan litsenziyaga almashtirildi.

Shuningdek, «**Tadbirkorlik faoliyati sohasida ruxsat berish tartib-qoidalari to'g'risida**»gi qonun mamlakatimiz ijtimoiy-iqtisodiy rivojlanishida muhim ahamiyatga ega bo'lgan kichik biznes va xususiy tadbirkorlik uchun shart-sharoitlarni yaxshilashda yana bir muhim qadam bo'ladi.

Shu munosabat bilan davlatimiz rahbari Islom Karimov tadbirkorlik faoliyati muhitining qanday holatda ekani, buning uchun zarur shart-sharoitlarni yaratish va bu faoliyatning amaldagi rivojlanish sur'atlari barcha darajadagi hokimlar faoliyatini baholashning asosiy mezoniga aylanishi darkorligiga alohida e'tibor berib kelmoqda.

prokuraturaga kichik biznes va xususiy tadbirkorlik subyektlarining moliyaviy-xoʻjalik faoliyatiga har qanday noqonuniy igtisodiy islohotlarni chuqurlashtirish bo'yicha davlat aralashuvni qaratilgan harakat sifatida koʻrib garshi huquqbuzarlarga nisbatan qonunchilikka muvofiq javobgarlik normalarini qo'llash vazifasi topshiriladi deb, bu borada Prezidentimiz ta'kidlagan, «Mamlakatimizning kelajagini va obro'-e'tiborini qadrlaydigan har bir vijdonli fuqaro bu tahdidni korrupsiya va jinoyatchilikni esda tutmogʻi darkor. Halol mehnat qilish, o'z bilimi, kuch-g'ayrati va ijodiy qobiliyatini sarflash uchun barqaror shart-sharoit bo'lishini istaydigan, farzandlari va yaqin kishilari kelajakda ham demokratik, fuqarolik jamiyatida sivilizatsiyalashgan bozor munosabatlarining samaralaridan to'la-to'kis foydalanishini orzu qiladigan har bir fuqaro, jinoyatchilik va korrupsiya yoʻliga oʻz vaqtida zarur toʻsiq qoʻyilmasa, bu illatlar qanday ayanchli oqibatlarga olib kelishi mumkinligini yaxshi anglab yetmogʻi lozim»ligini bugungi kunda eslash oʻta dolzarbdir. Chunki biz mamlakatimizni isloh etish va modernizatsiya qilishning yangi davri – milliy taraqqiyotimizning navbatdagi mantiqiy bosqichi davom etayotgan davrda yashayapmiz. Zero, davlatimiz rahbari Islom Karimov: «O'z mehnati, aql-zakovati va salohiyati bilan oʻzini oʻzi boqadigan, oʻzini himoya qilishga, kelajagini o'z qo'li bilan qurishga qodir bo'lgan xalqni jahon ahli e'tirof etadi. Barchamiz, avvalo, yoshlarimiz bu oddiy haqiqatni hech qachon unutmasligimiz zarur», - deganlarida haq gapni aytdilar. Yurtimizda tadbirkorlik yanada rivojlanaversa, taraqqiyotimiz ham shunchalik ravnaq topib boraveradi. Eng muhimi, tadbirkorlik

faoliyati bilan shugʻullanish amaldagi qonunlarni puxta egallashga undaydi. Bu tadbirkorning huquqiy va iqtisodiy savodxonligi hamda madaniyatini yuksaltirishga zamin boʻladi. U oʻrtacha mulkdor darajasiga yetganda siyosiy faolligi yanada kuchayadi: yon atrofdagi demokratik oʻzgarishlarga daxldorlik hissi bilan yashash koʻlami ortadi. Bu jihatlar esa jamiyatimizda barqarorlikka ham iqtisodiy, ham siyosiy tayanch boʻladi. Muhimi milliy va iqtisodiy xavfsizligimizni ta'minlashga va oson kechmagan mustaqilligimizni mustahkamlashga xizmat qiladi.

Tayanch tushunchalar:

Tadbirkorlik, tadbirkorlik belgilari, tadbirkorlik tizimi, tadbirkorlik turlari, tadbirkorlar toifasi, firmalar, firmalarning tashkiliy-huquqiy shakllari, firmalarning iqtisodiy uyushmalari, tadbirkorlarning nodavlat jamoat tashkilotlari.

Savol va topshiriqlar:

- 1. Quyidagi shaxslardan qaysi biri haqiqiy tadbirkor ishbilarmon hisoblanadi?
 - a) Sohib uyini ijaraga berib pul topadi;
 - b) Said yerini ijaraga berib pul topadi;
 - v) Qurbon tijoratchiga yollanib pul topadi;
 - g) *Ivan* xususiy doʻkon ochib, savdo qilish orqali pul topadi.
- 2. Biznes-reja nima? 1994-yilning yanvar oyida Yevropa bankidan kredit olish maqsadida oʻrta va kichik biznes bilan shugʻullanuvchi tadbirkorlar Oʻzbekiston Milliy bankiga 100 ta biznes-reja taqdim etganlar. Shundan 38 tasini Oʻzbekiston Milliy banki maqullagan. Yevropa banki 38 ta loyihadan faqat 8 tasini ma'qul topgan. Biznes-rejalarning Yevropa banki tomonidan toʻla qabul qilinmagani sabablarini izohlang.
- 3. Siz tadbirkor boʻldingiz, ishingiz yurishib ketdi. Topgan pulingizning 25 ming dollariga yengil avtomashina sotib oldingiz, 30 ming dollar sarflab, ikki qavatli dangʻillama uy qurdingiz. Shu xatti-harakatingiz toʻgʻrimi?
 - 4. Tadbirkorlik prinsiplarini tushuntiring.
 - 5. Tadbirkorlikning axloqiy talablarini bilasizmi?
 - 6. Yashirin biznes deganda nimani tushunasiz?
 - 7. Jinoiy biznesning mohiyatini sharhlang.
 - 8. Qalbakilashtirilgan iqtisodiy faoliyatni sharhlang.
 - 9. Norasmiy biznes aloqalari qanday?
 - 10. Soxta tadbirkorlik deganda nimani tushunasiz?
 - 11. Kuch ishlatuvchi tadbirkorlik mavjudmi?

Mavzuni chuqur o'rganish instrumentariysi

Tadbirkorlik – mulkchilik subyektlarining foyda olish maqsadida tavakkal qilib va mulkiy javobgarligi asosida amaldagi qonunlar doirasida tashabbus bilan iqtisodiy faoliyat koʻrsatishdir.

Oilaviy tadbirkorlik – oila a'zolari tomonidan tavakkal qilib va o'z mulkiy javobgarligi ostida daromad (foyda) olish maqsadida amalga oshiriladigan tashabbuskorlik faoliyatidir.

Oilaviy korxona — uning ishtirokchilari tomonidan tovarlar ishlab chiqarish (ishlar bajarish, xizmatlar koʻrsatish) va realizatsiya qilishni amalga oshirish uchun ixtiyoriy asosda, oilaviy korxona ishtirokchilarining ulushli yoki birgalikdagi mulkida boʻlgan umumiy mol-mulk, shuningdek oilaviy korxona ishtirokchilaridan har birining mol-mulki negizida tashkil etiladigan kichik tadbirkorlik subyektidir. Oilaviy korxona faoliyati uning ishtirokchilarining shaxsiy mehnatiga asoslanadi. Oilaviy korxona tadbirkorlik subyektlarining tashkiliy-huquqiy shakllaridan biridir.

Institutsional tadbirkorlik – iqtisodiy munosabatlar subyektining institutsional yangiliklarni yaratish va xoʻjalik amaliyotiga joriy etish borasidagi faoliyati.

Soxta tadbirkorlik – ustavida koʻrsatilgan faoliyatni amalga oshirish maqsadini koʻzlamasdan ssudalar, kreditlar olish, foydani (daromadni) soliqlardan ozod qilish (soliqlarni kamaytirish) yoki boshqacha mulkiy manfaat koʻrish maqsadida korxonalar va boshqa tadbirkorlik tashkilotlarini tuzish. (*Oʻzbekiston Respublikasining Jinoyat kodeksi, 179-modda*).

Tadbikorlar riskini kamaytirishning ayrim yoʻllari:

Ishlab chiqarishni diversifikatsiyalash – bunda kapital bir-biriga bogʻliq boʻlmagan turli sohalarga joylashtiriladi. Bunda bir yerdagi yoʻqotish boshqa yerdagi yutuq bilan qoplanib turadi. *Sherikchilik kapitalini hosil etish* – bunda shirkat firmalari tashkil etilib, uning kapitali bir necha sheriklarga qarashli boʻladi. Bu yerda faqat erishilgan yutuq emas, balki ehtimolidan yiroq boʻlmagan yoʻqotish ham sheriklar oʻrtasida taqsimlanadi.

Axborotni toʻplash va undan samarali foydalanish. Firma riskning oldini olish yoki uni kamaytirish uchun ichki va tashqi bozordagi ahvol, u yerda narxlarning oʻzgarishi, tovar sotilishining dinamikasi, raqobatchilarning fe'l-atvori va sa'y-harakatlari toʻgʻrisida, partnyorlar ahvoli, davlat siyosatida kutilayotgan oʻzgarishlardan xabar topishi kerak. Firma oladigan axborot qanchalik xilma-xil, koʻp manbali va miqdoran koʻp boʻlsa, shunchalik uning simmetrik boʻlish ehtimoli katta.

Tadbirkorlik daromadi – tovar va xizmatlarni sotishdan kelgan pul tushumi boʻlib, bu yaratilgan tovar va xizmatlarning miqdoriga va ulardan har

birining bozor narxiga bogʻliq boʻladi. Yalpi daromad muayyan paytda firma topgan jami daromad boʻlsa, tovar va xizmatlar birligini sotishdan kelgan pul oʻrtacha daromad hisoblanadi. Marginal daromad qoʻshimcha tovar birligini sotishdan tushgan qoʻshimcha pul boʻladi. Daromad birinchidan xarajatlarni qoplasa, ikkinchidan foyda hosil qiladi.

Foyda – tadbirkorlik faoliyati uchun bizneschilar oladigan mukofot boʻlib, uni tadbirkorlik qobiliyati va biznesga qoʻyilgan kapital keltiradi. Tadbirkorlik qobiliyati uchun olinadigan foyda me'yordagi foyda hisoblanadi va xarajatlar tarkibiga kiradi. Kapital uchun tegadigan foyda iqtisodiy foyda boʻlib, daromadning jami xarajatlardan ortib qolgan qismi boʻladi. Tadbirkorlikda omad foydasi ham bor, bu mazmunan boshqalarnikidan ortiqcha foyda boʻlib, bozor narxlarining kutilmaganda ortib ketishi tufayli hosil boʻladi, buni omadi yurishganlar oladi, u juz'iy boʻlganidan narxlar eski holiga tushgach yoʻq boʻlib ketadi.

Foyda topish – xatar (risk)li ish. Risk tadbirkorlik yoʻlida xavf-xatarga yoʻliqib, oʻz maqsadiga erisha olmay qolishdir. Riskni noaniqlik yuzaga keltiradi, bu oʻz navbatida bozordan kelgan axborotning asimmetrik boʻlishi, ya'ni real vaziyatni toʻla aks ettirmasligi natijasidir. Risk muqarrar boʻlsa-da, uni boshqarish mumkin. Bu riskka har xil munosabatda boʻlishni bildiradi: riskka bormaslik, riskka befarq boʻlish, riskka borish. Risk yoʻq joyda kichik foyda bilan qanoat hosil etiladi, risk bor joyda katta foyda ham kutiladi. Riskni kamaytirish uchun ishlab chiqarish diversifikatsiyalanadi, tadbirkorlik xatari sugʻurtalanadi, risk sheriklar oʻrtasida taqsimlanadi va nihoyat axborotdan samarali foydalaniladi.

Mavzu yuzasidan asosiy xulosalar:

- 1. Tadbirkorlik bozor iqtisodiyotining muhim belgisidir. U muhim iqtisodiy faoliyat boʻlib bozorni toʻyintirishda muhim ahamiyat kasb etadi, ya'ni tovar va xizmatlar yaratish va iste'molchilarga yetkazib berish borasida foyda topishga qaratilgan biznesning asosiy turidir. Tadbirkorlik amaldagi qonunlar doirasida faoliyat koʻrsatadi. Ularning qonuniy manfaatlarini himoya qilish huquqni muhofaza qiluvchi organlar xodimlarining vazifalaridan biri hisoblanadi.
- 2. Mustaqillikka qadar (1989–1990) xoʻjalik yuritishda totalitar boshqaruv hukmron boʻlgan, xususiy mulkka esa «yot unsur» deb qaralgan davrlarda Oʻzbekistonning davlat mustaqilligi, Respublikaning iqtisodiy mustaqillikka va bozor iqtisodiyotiga oʻtish gʻoyasi davlatimiz rahbari tomonidan ilgari surilganligi ulkan jasorat edi.

- 3. Oʻzbekistonda iqtisodiy islohotlarning dastlabki bosqichlaridan boshlab kichik biznes va xususiy tadbirkorlikni rivojlantirish masalasi koʻp ukladli bozor iqtisodiyotini shakllantirishning asosini tashkil etdi.
- 4. Bugungi kunga kelib kichik biznes va xususiy tadbirkorlik Oʻzbekistonda ijtimoiy-iqtisodiy siyosatni amalga oshirishda muhim ahamiyatga ega boʻlmoqda. Chunki taraqqiyotni belgilovchi bu kuch mamlakatimiz ijtimoiy iqtisodiy rivojlantirishning asosiy omillaridan biriga aylandi. Agar kichik biznes va xususiy tadbirkorlikning yalpi ichki mahsulotdagi ulushi 1991-yilda 1,5 foiz, 2000-yildagi 31 foizdan 2012-yilga kelib qariyb 55 foizga yetdi.
- 5. Jahon banki hisob kitoblariga koʻra, 2012-yilda Oʻzbekiston biznesni yuritish boʻyicha reytingda 14 oʻrin yuqoriga koʻtarildi. Bu Oʻzbekistonda jahon banki tomonidan ishlab chiqilgan metodologiyaga mos mamlakatimizda biznesni yuritish bilan bogʻliq barcha jarayonlarni yanada liberallashtirish, soddalashtirish, va ularning ochiqligini ta'minlashga yoʻnaltirilgan kompleks dastur qabul qilinganligining natijasidir.

8-MAVZU. KORXONA (FIRMA) FAOLIYATI VA UNING IQTISODIY KOʻRSATKICHLARI

1. «Korxona (firma)» tushunchasi, belgilari, vazifalari va funksiyalari

Korxona – iqtisodiy faoliyatni tashkil qilishning asosiy ijtimoiyiqtisodiy shakli hisoblanib, milliy iqtisodiyotning birlamchi boʻgʻinidir. Korxona tovarlar ishlab chiqaradi va xizmatlar koʻrsatadi. Agar uning nizomida korxonaning tashkiliy-huquqiy vazifalari belgilangan boʻlsa, uning ishlab chiqarish va iqtisodiy faoliyati tarkibiga esa asosiy va aylanma fondlar, pul mablagʻlari va boshqa aktivlar kiruvchi nizom jamgʻarmasi mavjud boʻlib, unga tayanadi. Korxona oʻz pasport va nizomiga ega. Nizom jamgʻarmasi qonunga asosan korxonani tashkil qilish jarayonida ta'sischilar: davlat, huquqiy va jismoniy shaxslar tomonidan shakllantiriladi. Korxona rivojlanishi va ishlab chiqarishning kengayib borishi, daromad hajmi va boshqa moliyaviy tushumlarning ortishi natijasida nizom jamgʻarmasi koʻpaytirilishi mumkin. Umuman olganda, nizom jamgʻarmasi korxonaning iqtisodiy barqarorligi va moliyaviy jihatdan baquvvatligini aks ettiradi.

Oʻzbekiston Respublikasining 1991-yil 15-fevralda qabul qilingan «Korxonalar toʻgʻrisida»gi qonuniga asosan, korxona huquqiy shaxs maqomiga ega, mustaqil ravishda xoʻjalik faoliyati yurituvchi subyekt boʻlib, oʻziga tegishli mol-mulkidan foydalanish asosida iste'molchilar (xaridorlar) talabini qondirish va daromad (foyda) olish maqsadida mahsulot (ish, xizmat) ishlab chiqaradi va sotadi yoki ayirboshlaydi.

Korxonani turli jihatlariga koʻra tavsiflash mumkin:

- ishlab chiqarish va texnika munosabatlarida korxona ishlab chiqarilayotgan mahsulotlar hajmi va turlari, ularni tayyorlash texnologiyasiga miqdor va sifat jihatidan mos keluvchi mashinalar tizimi;
- ijtimoiy munosabatlarda korxona turli kategoriyadagi xodimlar oʻrtasida ularning huquq va majburiyatlari asosida yuzaga keluvchi munosabatlar;
- tashkiliy huquqiy munosabatlarda korxona huquqiy shaxs sifatida faoliyat yuritadi;
- moliyaviy-iqtisodiy munosabatlarda korxona tarmoqning mustaqil boʻgʻini boʻlib, oʻz-oʻzini moliya bilan ta'minlash, oʻz-oʻzini boshqarish, ya'ni bozor munosabatlari tamoyillarida faoliyat yuritadi.

Amaldagi qonunchilikka asosan korxona davlat roʻyxatidan ўтгач, yuridik shaxs sifatida tan olinadi. Davlat roʻyxatidan oʻtish uchun quyidagi hujjatlar ahamiyatga ega boʻladi: ta'sischining arizasi; korxonaning nizomi; korxonani tashkil qilish haqida qaror yoki ta'sischilar shartnomasi; davlat bojini toʻlaganlik haqida kvitansiya va hokazo. Korxona quyidagi xususiyatlarga ega:

birinchidan, korxona oʻziga tegishli va xoʻjalik boshqaruvidagi mulkka ega boʻlib, ushbu mulk uning faoliyatini, moddiy-texnikaviy imkoniyatlarini, iqtisodiy mustaqilligini va ishonchliligini ta'minlaydi;

ikkinchidan, korxona kreditorlar, jumladan, davlat bilan oʻzaro munosabatlardagi majburiyatlar yuzasidan oʻz mulki bilan javob berish xususiyatiga ega boʻladi;

uchinchidan, korxona oʻz nomidan harakat qiladi hamda amaldagi qonunlarga asosan xoʻjalik faoliyati yurituvchi hamkorlar, mahsulot (ish, xizmat) iste'molchilari, xom ashyo va asbob-uskuna yetkazib beruvchilar, shuningdek, boshqa huquqiy va jismoniy shaxslar bilan shartnoma tuzish huquqiga ega;

toʻrtinchidan, korxona qonunchilikka asosan sudda da'vogar va javobgar sifatida qatnashish huquqiga ega;

beshinchidan, korxona mustaqil balans yoki smetaga ega boʻlib, ishlab chiqarish va mahsulot savdosi xarajatlarini hisobga olib boradi

hamda davlat idoralari tomonidan belgilangan tartibda oʻz vaqtida hisobotlarni taqdim etadi;

oltinchidan, korxona oʻz nomiga ega boʻlib, unda korxonaning tashkiliy-huquqiy shakli oʻz aksini topadi.

Har bir korxonaning faoliyati ishlab chiqarish, qayta ishlab chiqarish va muomala jarayonlaridan iborat boʻladi. Korxonaning ishlab chiqarish sohasidagi faoliyati yangi mahsulotni ishlab chiqarishga tayyorlash va ishlab chiqarishni tashkillashtirishda namoyon boʻladi. Qayta ishlab chiqarish sohasidagi faoliyat ishchi kuchini yollash, kadrlar tayyorlash va ularning malakasini oshirish, ishlab chiqarish vositalarini yangilash va kengaytirish jarayonlarida aks etadi. Muomala sohasidagi faoliyat esa ishlab chiqarishning moddiy-texnika ta'minotini tashkil etishda, mahsulot (ish, xizmat)larni sotish va foydalanilgan ishlab chiqarish vositalarining daromad shaklida qaytib kelishida koʻzga koʻrinadi.

Korxonalarni ijtimoiy-iqtisodiy tizim sifatida uni tashkil qiluvchi ikkita tarkibiy qism tizimning oʻzi (korxona) va ushbu tizim faoliyat yurituvchi tashqi muhitni koʻrib chiqish lozim. Korxonaning ichki muhiti ishlab chiqarish vositalari, pul mablagʻlari, axborotlar va inson resurslaridan tashkil topadi. Ishlab chiqarish oʻzaro aloqalari natijasida tayyor mahsulot paydo boʻladi, ishlar bajariladi va xizmat koʻrsatiladi, ya'ni toʻgʻri yoʻlga qoʻyilgan ishlab chiqarish va mehnatga haq toʻlash faoliyati yuzaga keladi.

Korxonalarning aloqasi ularning tashqi tizimga chiqishida roʻy berib (resurslarni jalb qilish, ularning qiymatini aniqlash, xom ashyo, material va yoqilgʻining oʻz vaqtida yetkazib turilishi va hokazo), tashqi muhitga ishlab chiqarilgan tovar va xizmatlar oqimi yordamida ta'sir koʻrsatish jarayonida namoyon boʻladi.

Iqtisodiyotimiz oldida turgan asosiy vazifalardan biri sanoat ishlab chiqarishini jahon iqtisodiyotida oʻz oʻrniga ega boʻlgan raqobatbardosh korxonalar tashkil qilish maqsadidagi tuzilmaviy qayta qurishdan iborat. Buning uchun integratsiya hamda turli tashkiliy-huquqiy shakldagi korxonalarni vaqtinchalik yoki doimiy ravishda kooperatsiya yoki konsentratsiya asosida birlashtirish amalga oshiriladi. Kooperatsiya jarayonida konsern, konsorsium, xoʻjalik assotsiasiyasi kabi tashkiliy shakllar vaqtinchalik yoki doimiy ravishda tuzilishi mumkin. Ushbu tuzilmaviy birliklarning mohiyatiga qisqacha toʻxtalamiz.

Konsern – umumiy manfaatlarga ega hamda shartnomalar, kapital va qoʻshma faoliyatda ishtirok etish bilan bogʻliq boʻlgan korxonalarning yirik birlashuvini aks ettiradi.

Konsorsium – kompaniya va banklarning vaqtinchalik birlashuvi natijasida yirik kapital talab qiluvchi loyihalarni amalga oshirish yoki mablagʻni birgalikda joylashtirish maqsadlari uchun umumiy kelishuvlar asosida yuzaga keladi. Konsorsium buyurtmachilar oldidagi majburiyatlar uchun javobgar hisoblanadi.

Xoʻjalik assotsiatsiyasi — jismoniy yoki huquqiy shaxslarning oʻzaro hamkorlik yuritish maqsadida koʻngilli birlashuvini anglatadi va unda birlashgan subyektlar oʻz mustaqilligini saqlab qoladilar.

Korporatsiyalar — umumiy maqsadlarga erishish, hamkorlikda faoliyat yuritish maqsadida birlashib, mustaqil huquqiy subyekt — huquqiy shaxsni tashkil qiluvchi shaxslar yigʻindisini tavsiflaydi. Ular aksiyadorlik (hissadorlik) jamiyatlari shaklida tashkil qilinadi.

Korxonalarning konsentratsiya asosida birlashuvi kartel, sindikat, xolding va moliya-sanoat guruhlari koʻrinishida amalga oshiriladi.

Ishlab chiqarish sohasidagi kartellar ishlab chiqarish masalalari, narxlar, tovarlarni sotish, ishchi kuchini yollash va shu kabi masalalar borasida kelishuvga asoslanib faoliyat yuritadi. Integratsiyaning bu shaklida korxonalar mustaqillikni saqlab qolgan holda kooperatsiya asosida birlashadilar.

Sindikat tijorat faoliyatini (ta'minot, sotish, narxning paydo boʻlishi) hamkorlikda tashkil qilishga asoslangan birlashmadir. Sindikat tarkibida korxonalar huquqiy va xoʻjalik yuritishni saqlab qoladilar.

Trestlar yuqori darajada markazlashgani bilan ajralib turadi. Uning tarkibiga kiruvchi korxonalar ishlab chiqarish, tijorat va mustaqilligini yoʻqotib, yagona reja asosida faoliyat yuritadi.

Xoldinglar ishtirokchilarning moliyaviy imkoniyatlarini birlashtirish va muvofiqlashtirish hamda ishlab chiqarish bilan bogʻliq vazifalarni tezkor ravishda amalga oshirish imkonini beruvchi boshqaruvning samarali shaklini ifodalaydi.

Integratsiya jarayonlarini amalga oshiruvchi korxonalar quyidagi maqsadlarni koʻzlaydi:

- resurslardan yanada samaraliroq foydalanishga erishish;
- kooperatsiya asosidagi aloqalarini yangilash va mustahkamlash;
- mamlakatdagi korxonalarning tashqi bozorga chiqishi;
- ishlab chiqarishga investitsiyalarning yangi turlarini jalb etish;
- ichki va tashqi bozordagi raqobatda muvaffaqiyat qozonish maqsadida narx va sotish boʻyicha yagona siyosat yuritish.

2. Korxona (firma)ni tashkil qilish tamoyillari

Iqtisodiyotning jadal rivojlanishi va ishlab chiqarish kuchlarining oʻsishi faoliyat yuritayotgan korxonalardan tashqari, yangi korxonalarni tashkil qilish va ishga tushirishga tayanadi. Bunday qadam iqtisodiy jihatdan maqbullikka, resurslar imkoniyati va korxona mahsulotlariga boʻlgan talabga asoslanadi. Biron-bir mahsulotning taqchilligi yoki umuman yoʻq boʻlishi ham yangi korxona yoki ishlab chiqarishni tashkil qilishga sabab boʻlishi mumkin.

Yangi korxonani tashkil qilish quyidagi tashkiliy tamoyillar asosida amalga oshiriladi:

- korxona tashkil qilish fikrining paydo boʻlishi;
- korxona ta'sischilarini tanlash;
- taklif qilinayotgan mahsulotga bozordagi talabni oʻrganish;
- korxona Nizom jamgʻarmasini tuzish biznes-rejasini tayyorlash;
- davlat ro'yxatidan uchun moliya manbalarini aniqlash;
- korxonaning ta'sis hujjatlari va o'tish;
- muhr, shtamp va boshqa rekvizitlarni tayyorlash;
- soliq idoralarida roʻyxatdan oʻtish.

Oʻzbekiston Respublikasining «Korxonalar toʻgʻrisida»gi qonuniga asosan, korxonalar mulk egasi (egalari) yoki u (ular) tayinlagan vakillik idorasi, mehnat jamoasi yoki ta'sischilar guruhining qarori boʻyicha belgilangan qonun-qoidalarga asosan tashkil qilinishi mumkin. Shuningdek, korxonalar, agar korxona mulki egasi yoki u tayinlagan vakillik idorasining roziligi boʻlsa, faoliyat yuritayotgan korxona tarkibidan bir yoki bir necha tarkibiy boʻlinmalarni, ushbu boʻlinmalarning mehnat jamoalari tashabbusiga koʻra, ajratib chiqarish natijasida ham tashkil topishi mumkin.

Korxona joriy va hisob-kitob raqamlari ochish va ular toʻgʻrisidagi holatlarni tasdiqlash huquqiga ega boʻlgan, mustaqil huquqiy shaxs maqomidagi shoʻʻba korxonalari, filiallar, vakolatxonalar, boʻlim va boshqa tashkiliy boʻlinmalarni tashkil qilishi mumkin. Korxona mulkini shakllantirish va undan foydalanish Nizom va Ta'sis shartnomasining muhim qismi hisoblanadi. «Korxonalar toʻgʻrisida»gi qonunga asosan quyidagilar korxona mulkini shakllantirishning manbalari hisoblanadi:

- ta'sischilarning pul va moddiy ko'rinishdagi badallari;
- mahsulot (ish, xizmat) sotishdan va boshqa turdagi faoliyatdan olingan daromadlar;
 - qimmatbaho qogʻozlardan olingan daromadlar;
 - banklar va boshqa kreditorlardan olingan kreditlar;

- budjetdan olinuvchi mablagʻlar (dotatsiya), kapital qoʻyilmalar;
- korxona, tashkilot va fuqarolarning begʻaraz va xayriya badallari, shuningdek, almashish, meros va sovgʻa tariqasida olinuvchi mulk;
- qonun bilan taqiqlanmagan boshqa manbalar. Davlat korxonalarning mulkiy huquqlarini kafolatlaydi. Davlatning korxonalar mulkini (asosiy fondlar, aylanma mablagʻlar va hokazo) tortib olishiga yoʻl qoʻyilmaydi, qonunchilikda koʻzda tutilgan hollar bundan mustasno.

Korxona (firma)larning davlat tomonidan roʻyxatga olinishi va korxona (firma)ni tugatish va qayta tashkil qilish masalasiga toʻxtalamiz.

2. 1. Korxonalarning davlat tomonidan ro'yxatga olinishi

Yuqorida aytib oʻtilganidek, korxona joylashgan manzilgohi boʻyicha davlat idoralarida roʻyxatga olingan kundan boshlab tashkil qilingan hisoblanadi. Bu vazifani asosan hokimiyatlar bajarib, ular korxonani roʻyxatga olish toʻgʻrisidagi ma'lumotlarni oʻn kun mobaynida Moliya vazirligiga yagona davlat reyestriga kiritish uchun taqdim etishlari shart.

Davlat roʻyxatidan oʻtish uchun korxonani tashkil qilish toʻgʻrisidagi qaror, korxona nizomi (ta'sis shartnomasi) va Vazirlar Mahkamasi tomonidan belgilab beriluvchi roʻyxatdagi boshqa hujjatlar taqdim etiladi. Korxonani davlat tomonidan roʻyxatga olish zarur hujjatlar ilova qilingan ariza berilgan kundan boshlab, 30 kun muddatda amalga oshirilishi lozim. Korxonalarni roʻyxatga olishdan, ularni tashkil qilish maqsadga muvofiq emas, degan sabab bilan bosh tortishga yoʻl qoʻyilmaydi.

Agar korxonani roʻyxatga olish oʻz vaqtida amalga oshirilmasa yoki ta'sischi roʻyxatga olinmaslik sabablarini asossiz deb hisoblagan taqdirda, ta'sischi sudga murojaat qilishi mumkin. Korxonani roʻyxatga olishdan asossiz ravishda bosh tortish mahalliy hokimiyat idoralarining moddiy javobgarlikka tortilishiga olib kelishi mumkin.

Korxonani roʻyxatga olish uchun quyidagi hujjatlar talab qilinadi:

- 1) korxonani roʻyxatga olish toʻgʻrisidagi ariza;
- 2) ta'sis shartnomasi yoki korxonani tashkil qilish to'g'risidagi qaror;
- 3) korxona nizomi;
- 4) ta'sis shartnomasi yoki korxonani tashkil qilish toʻgʻrisidagi qarorda koʻrsatilgan nizom jamgʻarmasining kamida 50 foiz miqdoridagi qismi toʻlanganligini tasdiqlovchi hujjatlar;
 - 5) davlat bojini toʻlaganlik haqida guvohnoma;
- 6) monopoliyaga qarshi muassasaning korxonani tashkil qilishga roziligini tasdiqlovchi hujjat;

7) Davlat mulkini boshqarish qoʻmitasi yoki uning quyi idoralari roziligi haqidagi hujjat.

Roʻyxatga olish korxonaga kelib tushuvchi hujjatlarni qayd qilish kitobida tartib raqami berish orqali amalga oshiriladi. Yuqoridagi jarayonlar amalga oshirilgach, korxona joylashgan manzilgohi boʻyicha soliq idoralarida hisobda turishi va buni tasdiqlovchi hujjat olishi hamda bankda hisob raqami ochishi mumkin.

2.2. Korxonani tugatish va qayta tashkil qilish

Korxona faoliyatini toʻxtatish uni tugatish yoki qayta tashkil qilish shaklida amalga oshirilishi mumkin. Ishlab chiqarishning barqaror emasligi, moliyaviy qiyinchiliklar, surunkali zarar koʻrish va toʻlov qobiliyatining yoʻqolishini korxonalarni tugatish yoki qayta tashkil qilishga asosiy sabab qilib koʻrsatish mumkin.

Korxonani qayta tashkil qilish uning birlashib ketishi, qoʻshilishi, boʻlinishi, ajralib chiqish va shaklini oʻzgartirishidir. Korxonani qayta tashkil qilish ta'sischi (ta'sischilar) yoki korxona boshqaruvi qaroriga muvofiq amalga oshiriladi. Qayta tashkil qilish korxonaning ishlab chiqarish koʻrsatkichlari, moliyaviy va iqtisodiy koʻrsatkichlari avvalgiga nisbatan yaxshilanishiga xizmat qilishi lozim.

Korxonani tugatish huquqiy xatti-harakat boʻlib, ishlab chiqarish va xoʻjalik yuritish faoliyatining toʻxtatilishini anglatadi. Korxona tugatilganda u davlat roʻyxatidan chiqariladi, uning bankdagi hisob raqami yopiladi hamda muhr, shtamp va boshqa rekvizitlari haqiqiy emas, deb hisoblanadi. Korxonani tugatishga quyidagilar sabab boʻlishi mumkin:

- ishlab chiqarilayotgan mahsulot (ish, xizmat)ga boʻlgan talabning pasayib ketishi yoki umuman yoʻqolishi;
 - ishlab chiqarishning zarar keltirishi;
 - ishlab chiqarishning atrof-muhit va aholi hayotiga xavf tugʻdirishi;
- korxonaning bino va inshootlari, asbob-uskunalari va boshqa vositalaridan iqtisodiy jihatdan unumliroq, yanada sifatli va iste'molchilar talabiga javob beruvchi mahsulotlar ishlab chiqarishda foydalanish imkoniyatining yuzaga kelishi.

Korxonani tugatishda tugatish komissiyasi tuzilib, unga kreditorlarga korxona tugatilganini xabar qilish, kreditorlarni aniqlash va debitorlik qarzini undirish choralarini koʻrish, shuningdek, korxonaning tugatilishi sababli ishsiz qolgan xodimlar ish bilan ta'minlanishiga yordamlashish

vazifasi yuklanadi. Korxonani tugatish jarayonida oraliq tugatish balansi tuzilib, unga tugatilayotgan korxonaning mulki, kreditorlarning talablari va ularni koʻrib chiqish natijalari roʻyxati kiritiladi. Ushbu balans korxonaning ta'sischisi (ta'sischilari) yoki korxonani tugatish toʻgʻrisida qaror chiqargan idora tomonidan tasdiqlanadi. Tugatish komissiyasining aybi bilan keltirilgan zarar uchun tugatish komissiyasi javobgar hisoblanadi.

3. Milliy iqtisodiyot rivojlanishida korxona (firma)ning oʻrni va roli

1. 1990-yillardagi vaziyat. Avvalgi ma'muriy buyruqbozlik tizimi sharoitlarida sobiq Ittifoq iqtisodiyoti yagona xalq xoʻjaligi majmui sifatida tavsiflangan. Unda barcha ittifoqdosh respublikalarning butun Ittifoq iqtisodiyotini rivojlantirishdagi majburiy ishtiroki va «Markaz» tomonidan belgilab berilgan yoʻnalishlar asosida milliy iqtisodiyotini ham rivojlantirishi aks ettirilgan.

Biroq davlat boshqaruv holatidan va birinchi oʻrinda respublikalarning imkoniyatlari va manfaatlari nuqtai nazaridan qaraganda, bunday «birlik» respublikalarga ijtimoiy-iqtisodiy rivojlanishning muhim masalalarini mustaqil hal qilish imkonini bermasdi. Respublikalarning milliy iqtisodiyotlariga kiritiluvchi investitsiyalar asosan umumittifoq «qozoni»dan olinardi va koʻpincha qoldiq tamoyili asosida amalga oshirilardi. Bir qancha tarmoqlar va yirik ishlab chiqarish birlashmalari bir vaqtning oʻzida ham respublika, ham butun ittifoq vazirliklariga va mahkamalariga boʻysunar edi.

Ittifoqdosh respublikalar SSSRning yagona xalq xoʻjaligi majmui tarkibida soʻnggi bor qatnashgan 1990-yil boʻyicha statistik ma'lumotlar Oʻzbekiston iqtisodiyotining ahvoli va tuzilmaviy tuzilishi toʻgʻrisida ma'lum bir tushuncha beradi: jami ishlab chiqarilgan sanoat mahsulotlarida markazga boʻysunuvchi korxonalarda ishlab chiqarilgan mahsulotlar salmogʻi 33 foiz, sanoat va ishlab chiqarishda mashgʻul boʻlgan xodimlar miqdorida – 35 foiz, sanoat va ishlab chiqarish asosiy fondlarida 65 foizni tashkil qilgan boʻlsa, respublika hukumatiga boʻysunuvchi korxonalar esa mos ravishda 67 foiz, 65 foiz va 35 foizni tashkil etgan¹.

 $^{^{1}}$ Қаранг: *Маҳмудов Э. Х.* Корхона иқтисодиёти: Ўқув қўлланма. – Т., 2004. – Б. 208.

Rejali iqtisodiyotda ma'muriy-buyruqbozlik boshqaruvning negizi va asosiy usuli, vositasi hisoblanadi. Korxonada ishni tashkil qilish, ish haqi toʻlash, texnologik asbob-uskunalarni yangilash, korxona faoliyatini kengaytirish yoki qisqartirib optimallashtirish, yangi mahsulotlar ishlab chiqarishni yoʻlga qoʻyish, ma'naviy eskirgan mahsulotlar ishlab chiqarishni toʻxtatish kabi masalalarning birortasida obyektiv iqtisodiy zarurat hisobga olinmaydi. Bu masalalarda korxona mustaqillikka mutlaqo ega emas. Ularni hal qilish uchun yuqoridan ruxsat olinishi zarur. Texnologik qayta jihozlash tadbirlarini oʻtkazish va yangi mahsulotlar ishlab chiqarishni esa besh yillik rejalariga kiritish talab qilinardi.

Xoʻjalik yurituvchi subyektlar oʻrtasida oʻzaro mustaqillik aloqalar oʻrnatilishiga, xom ashyo va butlovchi qismlarni, ishlab chiqilgan mahsulotni mustaqil, shartnomalar asosida yetkazib berilishiga deyarli ruxsat berilmasdi. Korxona oʻzidan 4–5 ming kilometr uzoqlikda joylashgan boshqa korxonaga yoki savdo tashkilotiga qancha mahsulot joʻnatish toʻgʻrisida yuqoridan topshiriq, naryad olardi. Sovet tuzumining turgʻunlik-yillari deb atalgan davrida korxonalar faoliyatiga xoʻjalik hisobi va ba'zi bir erkinliklarni joriy qilishga boʻlgan urinishlar hech qanday natija bermaydi. Chunki iqtisodiy tizim, oʻz tabiatiga koʻra, bunday oʻzgarishlarni qabul qila olmas edi.

Oʻzbekiston Respublikasining mustaqillikka erishishi milliy iqtisodiyotimizda miqdor va sifat oʻzgarishlariga sabab boʻldi. Bugungi kunda mamlakatimiz iqtisodiyoti jamiyatni demokratlashtirish, iqtisodiyot salohiyatlarini mustahkamlash va mamlakatni rivojlangan davlatlar qatoriga kiritishga yoʻnaltirilgan, bozor munosabatlariga oʻtishning mamlakatimiz uchun maxsus ishlab chiqilgan modeli asosida izchil rivojlanib bormoqda. Bu model Oʻzbekiston Respublikasi Prezidenti tomonidan ilgari surilgan iqtisodiyotni isloh qilishning beshta muhim tamoyiliga asoslangan hamda xoʻjalik faoliyati yurituvchi subyektlarning erkinligi, xususiy mulkchilik va tadbirkorlikni himoya qiluvchi zaruriy qonun hujjatlari bilan belgilab berilgan.

Iqtisodiyotning rivojlanishi uchun talab qilinuvchi vazifalarning amalga oshirilishida korxonalarga katta rol ajratilib, ular iqtisodiyotning asosiy ishlab chiqarish boʻgʻini boʻlish bilan birga mahsulot ishlab chiqarish, aholiga xizmat koʻrsatish tufayli iste'mochilarning talablarini ham qondiradilar.

Har bir mamlakatning sanoat quvvati fan-texnika taraqqiyoti va iqtisodiyotni modernizatsiyalash koʻrsatkichlarini birinchi oʻrinda yirik korxonalar belgilab beradi. Korxonalar faoliyati milliy iqtisodiyot va

uning tarmoqlariga toʻgʻridan-toʻgʻri ta'sir koʻrsatadi. Korxonalar qanchalik yaxshi, samarali va rentabelli ishlasa, bugungi iqtisodiyotning, jumladan, ularning tizimlarining ham koʻrsatkichlari yuqori boʻladi. Bozor iqtisodiyoti korxonalar faoliyatini erkinlashtiradi, ularning mustaqilligini mustahkamlaydi hamda ishlab chiqarishni tashkil etish va rentabellikning yuqori koʻrsatkichlariga erishishga keng imkoniyatlar yaratadi, deb hisoblanadi. Biroq korxona, ayniqsa, davlatga tegishli boʻlgan korxona qanday ishlashi, uning jamiyatga keltiruvchi foydasi, rentabellik darajasi, xodimlarning bandligi qanday bo'lishi faqat korxonalarning emas, davlatning ham nazoratida bo'lishi zarur. Xuddi shuning uchun ham davlat korxonalarga katta imkoniyatlar yaratib berish bilan birga, ularni belgilangan tartibda nazorat qilib ham boradi. Davlat korxonalar «taqdiriga», ularning ishlab chiqarish faoliyati yaxshi natijalariga befarq qarab tura olmaydi. Bankrotga uchragan korxonalar, zarar keltiruvchi ishlab chiqarish, iqtisodiy nochorlik bularning barchasi korxona jamoasi uchun ham, davlat uchun ham ogʻir yuk hisoblanadi.

Jahon tajribasi shuni koʻrsatadiki, bozor iqtisodiyoti sharoitlarida barcha korxonalar ham raqobatchilikni yengib, samarali ishlab keta olmaydi hamda daromad yoki foyda ololmaydi. Natijada minglab korxonalar tashkil qilinib, xoʻjalik faoliyati doirasiga qoʻshiladi va deyarli shunchasi turli sabablarga koʻra tugatiladi. Shu sababli bankrotlik, korxonalarning tugatilishi bozor iqtisodiyot sharoitlarida odatiy hol boʻlib, bu ahvolga tushib qolishdan ehtiyot boʻlish kerak boʻlsa-da, lekin bunga fojia sifatida qarash kerak emas.

Bugungi kunda mamlakatimizda korxonani bankrot boʻlishga olib uning iqtisodiy mustaqilligi, faoliyat qobiliyati daromadligini ta'minlash uchun barcha zarur choralarni qo'llash yo'lga qoʻyilgan. Korxonaning mehnat qobiliyati va daromadliligi milliy iqtisodiyotga qoʻshiladigan hissa boʻlishdan tashqari respublikamizda tobora koʻpayib borayotgan aholini ish bilan ta'minlashda ham ahamiyat kasb etishini unutmaslik muhim. Koʻrinib turibdiki, istalgan korxonaning milliy iqtisodiyotdagi o'rni va ahamiyati ishlab chiqarilayottan mahsulotlar, olinadigan foyda yoki daromad miqdoridan tashqari bu korxonaning aholini ish bilan ta'minlashdagi ishtirokiga ham bog'liq bo'ladi. Aholini ish bilan ta'minlar ekan, korxonalar o'zlarining bevosita chiqarish vazifalarini bajarishdan tashqari ishsizlikning ishlab

kamayishiga, demak, mehnat faolligining ortishi va ijtimoiy ahvolning yaxshilanishiga ham sababchi boʻladi.

Bu yerda hamma narsa faqat korxonaning oʻziga bogʻliq emasligi koʻrinib turibdi, albatta. Chunki korxona oʻz faoliyatini amalga oshirish jarayonida xom ashyo, material, asbob-uskuna va boshqa ishlab chiqarish vositalari yetkazib beruvchi yoki mahsulot iste'molchilari sifatida harakat qiluvchi boshqa korxonalar bilan oʻzaro aloqaga kirishadi. Bu munosabatlarda har bir kamchilik va nuqsonlar, jumladan, xom ashyo, material va asbob-uskunalarni vaqtida yetkazib bermaslik, vaqtida haq toʻlamaslik, qarzlarni toʻlash muddatlarining oʻtkazib yuborilishi va boshqa xoʻjalik yuritish qoidalari va majburiyatlarining buzilishi korxona iqtisodiy ahvolining yomonlashuviga, uning nochorlikka uchrashiga olib keladi. Shu sababli korxonalar faoliyatini samarali va yuqori rentabelli darajada amalga oshirish zaruriyati, barcha korxonalar ishlab chiqarishni kerakli tarzda tashkil qilish hamda oʻz hamkorlari va davlat oldidagi majburiyatlarni qat'iy tarzda bajarish intizomi bilan uzviy bogʻliqdir.

O'zbekistonda ko'plab kichik, o'rta va yirik ishlab chiqarish korxonalari faoliyati koʻrsatayotgan boʻlib, ular iqtisodiyotning deyarli barcha tarmoqlarini ogʻir sanoatdan yengil sanoatgacha, qishloq xoʻjalik mahsulotlarini qayta ishlashdan ilmiy ishlab chiqarishgacha qamrab olgan. Ular o'z faoliyatida ishlab chiqarishning barcha omillaridan yer, tabiiy va mehnat resurslari, texnika va texnologiyalar, investitsiyalar, zamon fani tomonidan ishlab chiqarishning mamlakatning milliy boyligi deb ataluvchi zamonaviy axborot tizimidan foydalanadi. Ma'lumki, boylik yoki salohiyat bir nechta avlod va butun jamiyatning xatti-harakatlari evaziga yaratiladi. Korxonalarning vazifasi ushbu boylikni asrab-avaylash va undan samarali foydalanishda ifodalanadi. Xoʻjalik yuritishning mazkur tamoyillaridan bir oz boʻlsa-da chiqarishi chiqish jamoatchilik ishlab samaradorligining chetga pasayishiga, xoʻjasizlik va isrofgarchilikka olib keladi. Korxonalar ham bundan mustasno emas.

Mustaqillik yillarida Oʻzbekistonda sanoat korxonalarining oʻsish sur'atlari va tarmoq tarkibiga e'tiboringizni qaratamiz. Sobiq sovet xoʻjalik yuritish tizimining barham topish davridagi bir oz pasayishdan soʻng, yurtimizda 1996-yildan boshlab sanoat ishlab chiqarishi hajmi izchil oʻsib bormoqda. Sanoat mahsulotlari ishlab chiqarishning yillik hajmi 2009-yilda 1990-yildagiga nisbatan 2,7 barobar, 2010-yilda esa 3

barobar o'sdi.

Jahon moliyaviy-iqtisodiy inqirozining davom etayotganiga qaramasdan 2011-yilda sanoat ishlab chiqarishi 6,3 foizga oʻsdi.

Iqtisodiyotimizda yuz berayotgan jiddiy tarkibiy va sifat oʻzgarishlarini birgina misolda, ya'ni 2000-yilda mamlakatimiz yalpi ichki mahsulotini shakllantirishda sanoat ishlab chiqarishining ulushi bor-yoʻgʻi 14,2 foizni tashkil etgan boʻlsa, 2011-yilda bu koʻrsatkich 24,1 foizga yetganida yaqqol koʻrish mumkin. Sanoat mahsuloti umumiy oʻsishining qariyb 70 foizini yuqori qoʻshimcha qiymatga ega boʻlgan tayyor mahsulot ishlab chiqarishga yoʻnaltirilgan sohalar tashkil etdi. Bugungi kunda iqtisodiyotimizning lokomotiviga aylangan mashinasozlik va avtomobilsozlik (12,2 foiz), kimyo va neft-kimyo sanoati (9,4 foiz), oziqovqat sanoati (13,1 foiz), qurilish materiallari sanoati (11,9 foiz), farmatsevtika va mebelsozlik (18 foiz) 2011-yilda jadal sur'atlar bilan rivojlandi.

Mustaqillik yillarida yurtimizda avtomobilsozlik, neft-gazkimyo sanoati, neftgaz mashinasozligi, zamonaviy qurilish materiallari sanoati, temir yoʻl mashinasozligi, maishiy elektrotexnika, farmatsevtika, zamonaviy oziq-ovqat sanoati va yengil sanoat kabi bir qator mutlaqo yangi sanoat tarmoqlari yaratildi.

Mamlakatimiz igtisodiyotida avtomobilsozlik sanoati alohida oʻrin egallamoqda. Bu tarmoq Asaka shahrida AQShning «Jeneral Motors» kompaniyasi bilan hamkorlikda yengil avtomobillar ishlab chiqaradigan, Toshkent shahrida Germaniyaning dunyoga mashhur «Daymler Bens» va Yaponiyaning «Isuzu» shahrida kompaniyalari hamkorlikda avtobuslar ishlab chiqaradigan hamda Samarqand shahrida Germaniyaning «MAN» kompaniyasi bilan tashkil etilgan avtomobillari ishlab chiqaradigan yangi zavodlarni o'z ichiga oladi. Ana shunday o'zgarishlar natijasida mashinasozlik va metallni qayta ishlash sanoatida mahsulot ishlab chiqarish hajmi 1990–2010-yillarda 11,6 barobar o'sdi. Faqat oxirgi o'n yilning o'zida yengil avtomobillar ishlab chiqarish 7,1 barobar, avtobuslar 2,6 barobar va yuk avtomobillari tayyorlash 12,9 barobar oshdi.

Neft qazib chiqarish va uni qayta ishlash sanoatining yaratilishi mamlakatimizning energetik xavfsizligini ta'minladi. Neft va gaz kondensati qazib olish 1990-yilga nisbatan 1,4 barobar oʻsdi. Tabiiy gaz ishlab chiqarish sur'ati 1990–2010-yillar davomida 1,6 barobar,

suyultirilgan gaz ishlab chiqarish hajmi esa 15,2 barobar koʻpaydi. Energetika mustaqilligini ta'minlash, neft va gazni qayta ishlash tarmoqlarini rivojlantirish dasturi doirasida, istiqlol yillarida eng zamonaviy texnologiyalarga ega boʻlgan chet el kompaniyalari bilan hamkorlikda Buxoro neftni qayta ishlash zavodi («Teknip», Fransiya) va Shoʻrtan gazkimyo majmuasi («ABB») barpo etildi, Fargʻona neftni qayta ishlash zavodi toʻliq rekonstruksiya qilindi. Gaz-kimyo tarmogʻining tashkil etilishi tabiiy gazni qayta ishlashni chuqurlashtirish va turdosh tarmoqlarda yangi ishlab chiqarish quvvatlarini rivojlantirish imkonini yaratdi.

Qoʻngʻirot soda zavodida 2006-yildan boshlab kalsiyli soda, Samarqand kimyo zavodida nitrokalsiy fosfat oʻgʻiti ishlab chiqarish yoʻlga qoʻyildi, 2010-yilda mintaqamizda yagona boʻlgan Dehqonobod kaliyli oʻgʻitlar zavodi ishga tushirildi.

1990–2010-yillar davomida yogʻochni qayta ishlash va sellulozaqogʻoz sanoatida ishlab chiqarish hajmi 13,4 barobar, oziq-ovqat sanoatida 5,7 barobar, yengil sanoatda 3,8 barobar oʻsdi.

1990-yilga nisbatan ip-kalava ishlab chiqarish 2,2 barobar koʻpaydi. Gilam va gilam mahsulotlari ishlab chiqarish hajmi 2010-yilda 21 million kvadrat metrdan ziyod boʻldi, bu esa 2000-yilda ishlab chiqarilgan mahsulot hajmiga nisbatan 13,6 barobar koʻpdir.

Oʻtish davrining murakkab sharoitida makroiqtisodiy barqarorlikni mustahkamlash maqsadida iqtisodiyotning bazaviy tarmoqlari, xususan, neft, gaz, oltin qazib olish, rangli metallurgiya, kimyo va neft-kimyo sanoatini jadal rivojlantirish uchun davlat barcha shart-sharoitlarni yaratib berdi. Natijada chuqur sifat oʻzgarishlari roʻy berdi va Oʻzbekiston sanoatining tarmoq tarkibi ancha diversifikatsiya qilindi va mutanosiblashdi.

Mamlakatimiz iqtisodiyotining real sektori qoʻllab-quvvatlanayotgani hamda har xil tekshiruvchi va nazorat qiluvchi organlarning korxonalar faoliyatiga asossiz aralashuviga yoʻl qoʻyilmagani bois, korxonalar iqtisodi samarali yoʻlga qoʻyildi. Ularning iqtisodiy xatti-harakatlari uchun javobgarligi kuchaytirildi.

4. Korxona (firma) xavfsizligini ta'minlashning maqsadi, vazifalari va tamoyillari

Xavfsizlik — bu murakkab va serqirra kategoriyadir. U asosan va qoʻshimcha ishlab chiqarishda foydalanilayotgan vositalarning xavfsizligi nuqtai nazaridan baholanadi va koʻrib chiqiladi. Shu sababli hozirgacha biz «texnika xavfsizligi», «piyoda xavfsizligi», «oziq-ovqat xavfsizligi», «yoʻl harakati xavfsizligi» kabi tushunchalarni uchratsak-da, «korxona xavfsizligi» haqidagi tushuncha XX asrning soʻnggi oʻn yilligida ommalasha boshladi.

Mahsulotlarning zamonaviy namunalari, ishlab chiqarish texnologiyasi, investitsiya rejalari va boshqalar sanoat aygʻoqchiligining diqqat markazida turib, korxona va mamlakat uchun ma'lum bir xavf tugʻdiradi. Shu sababli xavfsizlik va tijorat sirlari muammolari hozirgi bozor va raqobatchilik sharoitlarida iqtisodiyot fanining, jumladan, zamonaviy korxonalar iqtisodiyotining muhim boʻlimlaridan biri hisoblanadi.

Korxona xavfsizligini ta'minlashning asosiy maqsadlari quyidagilardan iborat:

- •korxona va uning barcha boʻlinmalari, mehnat jamoasining davlat tuzilmasi, xorijiy hamkorlar va raqiblar bilan oʻzaro munosabatlarda qonuniy huquqlarni himoya qilish;
 - korxona mulkini saqlash, undan oqilona va unumli foydalanish;
- ishlab chiqarilayotgan mahsulotning ichki va tashqi bozordagi raqobatbardoshligini oshirish;
- tashkiliy va ishlab chiqarish barqarorligiga erishish, butlovchi qismlar yetkazib beruvchilarga yordamchi va hamkorlarga bir tomonlama qaram boʻlishga yoʻl qoʻymaslik;
- barcha tuzilmaviy boʻgʻinlardagi xodimlar orasida mehnat intizomini mustahkamlash;
- mehnat unumdorligini oshirish uchun moddiy va ma'naviy manfaatdorligini ta'minlash;
- ishlab chiqarishda fan-texnika yutuqlaridan foydalanish, samarali axborot bazasini rivojlantirish;
 - korxona obroʻsini oshirish.

Koʻrsatilgan maqsadlardan kelib chiqqan holda korxona xavfsizligini ta'minlash vazifalari belgilanib, ular korxonaning ichki tartib-qoidalari va ish tartibida hamda maxsus ishlab chiqilgan chora-tadbirlarda oʻz aksini topishi mumkin. Bular qatoriga quyidagilarni kiritish mumkin:

1) korxona ichida hamda tashqi tashkilotlar hukumat idoralari, boshqaruv tuzilmasidagi qoidabuzarlik omillari, vakolatni oshirish holatlarini aniqlash;

- 2) korxonaning barqaror ishlashiga ta'sir qilishi mumkin boʻlgan xavf-xatar hamda bozor konyunkturasidagi noqulay oʻzgarishlarni aniqlash va zarur choralarni qoʻllash;
- 3) boʻlajak hamkorlarni oʻrganish, ularning moliyaviy ahvolini tahlil qilish va baholash;
 - 4) iqtisodiy aygʻoqchilikka qarshi chora-tadbirlarni tayyorlash;
- 5) korxona sirlaridan xabardor boʻlgan malakali xodimlarni boshqa korxonalarga jalb qilishning oldini olish;
 - 6) nosogʻlom raqobatchilikni yengish;
 - 7) korxona hududi va moddiy resurslarini himoya qilish;
 - 8) tijorat sirlarini muhofaza qilishni tashkil qilish;
 - 9) mehnat jamoasi a'zolaridagi salbiy fikrlarni aniqlash;
- 10) favqulodda hodisalarning oldini olish va xavfsizlikning boshqa choralari.

Ma'lumki, qo'yilgan maqsad va vazifalar o'z-o'zidan hal qilinmaydi. Buning uchun, avvalo, o'z ishini yaxshi bilishdan tashqari, mohir va yuqori malakaga ega bo'lgan hamda o'zlari ishlayotgan korxona uchun jon kuydiruvchi kadrlar zarur. Ularsiz muvaffaqiyatga erishib bo'lmaydi.

Xavfsizlik tamoyillari — xavfsizlikni ta'minlash taktika va strategiyasiga boʻlgan asosiy talablar, xavfsizlikning maqsad va vazifalarini hal qilishning toʻgʻri yoʻllarini tanlashdir. Ularga quyidagilarni kiritish mumkin:


- qonuniylik tamoyillari;
- mustaqillik va mas'uliyat;
- iqtisodiy maqsadga muvofiqlik va foydalilik;
- maqsadli dasturiy rejalashtirish;
- o'zaro aloqalar va muvofiqlashtirish;
- mehnatni ilmiy tashkil qilish;
- oshkoralik va zaruriy maxfiylikning uygʻunligi;
- ixtisoslashuv va yuqori kasbiy malaka.

4.1. Korxona (firma) xavfsizligini ta'minlashni tashkil qilish va boshqarish

Xavfsizlik hodisalarning oldini olish va ogohlantirish chorasi sifatida har bir alohida holatdagi aniq harakat boʻlib, korxona xarakteri, uning joylashuvi, ahamiyati kabilarga bogʻliq boʻladi. Mazkur jarayonda xavfsizlik tizimining oʻzini belgilash muhim ahamiyat kasb etadi. Uning

rahbari xavfsizlik konsepsiyasini ishlab chiqarishning muayyan sharoitlariga nisbatan ishlab chiqishda shaxsan ishtirok etishi zarur.

Xavfsizlik konsepsiyasi, *birinchidan*, korxonaning maqsad va vazifalariga zid kelmasligi, *ikkinchidan*, korxona xavfsizligiga bevosita va bilvosita ta'sir koʻrsatishi mumkin boʻlgan tashqi muhit ta'sirini inobatga olishi zarur. Bu ta'sirni quyidagi koʻrinishida aks ettirish mumkin (1-chizma):



1-chizma. Korxona xavfsizligiga tashqi muhitning ta'siri.

Shu bilan bir vaqtda korxona oʻz faoliyatining muhim yoʻnalishlari xavfsizligini ta'minlash uchun muayyan chora-tadbirlarni amalga oshirishi kerak va buning uchun avvalo, mos keluvchi qoʻriqlash tartibini yaratish lozim. Mamlakatimiz va xorij amaliyoti tajribasi bunda quyidagi faoliyat turlarini ajratib koʻrsatadi:

- 1. Bino va inshootlar, aloqa tarmogʻi qurilma va uskunalarini qoʻriqlash tartibini ta'minlash.
- 2. Tezkor xavfsizlik, maxfiy axborotlarga boʻlgan vakolatni boshqarish, kelib ketuvchilar, transport va yuk tashishni nazorat qilish, qoidabuzarlik holatlarini tekshirish, axborot xavfsizligini ta'minlash.
- 3. Xavfsizlikni ta'minlash bo'yicha ma'muriy faoliyat personali (xodimlari)ni tayyorlash va o'qitish, inspeksiya, taftish va nazorat, muammoli vaziyatlarning oldini olish, istiqbolli chora-tadbirlarni ishlab chiqish.
- 4. Moddiy boyliklarni himoya qilish va tabiiy ofatlarga qarshi kurash, yongʻinlarning oldini olish, yongʻin xavfsizligi va ogohlantirish qurilmalari

holatini kuzatib borish va hokazo.

Korxonalar rahbarlari mehnat jamoalarini doimiy ravishda xavfsizlikni ta'minlash natijalari to'g'risida xabardor etishlari lozim. Faqat zarur hollarda xavfsizlik chora-tadbirlari maxfiy bo'lishi mumkin. Xavfsizlik chora-tadbirlarining maxfiyligi korxona bo'limlarining zaruriy qoidalarni qo'llash va ularga amal qilishini, nazorat qilishni maxsus tashkil etishni ko'zda tutadi.

Hozirgi jamiyatni axborotlashtirish va elektronlashtirish sharoitlarida korxonalarning xavfsizligini ta'minlash uchun doimiy ravishda faoliyat koʻrsatuvchi, tijorat faoliyatining xavfsizligini ta'minlashning barcha shakl va usullarini qamrab oluvchi tizim amal qilishi lozim. Shu sababli xavfsizlik xizmati marketing va menejment xizmati, valuta, kredit va huquqiy boʻlimlar kabi iqtisodiy boʻlinmalar bilan chambarchas bogʻliqlikda ishlab, iqtisodiy xavfsizlikka kuchliroq yondashgan holda, ularning faoliyatini toʻldirishi zarur.

5. Korxona (firma)ning xavfsizlik xizmati, uning tuzilishi va vazifalari

Xavfsizlik xizmati korxonaning tuzilmaviy birligi boʻlib, xavfsizlik tartibini ishlab chiqish, oʻrnatish va qoʻllab-quvvatlash, shuningdek, unga rioya qilinishini nazorat qilishni amalga oshiradi. U oʻz faoliyatida quyidagilarga asoslanishi lozim:

- qoʻriqlash tartibini tashkil etish boʻyicha qoidalar;
- rahbar, mutaxassis va texnik xodimlar uchun maxfiy ma'lumotlar bilan ishlash boʻyicha lavozim yoʻriqnomasi;
- texnik muhandislik jihatidan himoya qilishni tashkil etish boʻyicha lavozim yoʻriqnomasi;
- •xorijiy vakolatxonalar va vakillar bilan ishlash boʻyicha lavozim yoʻriqnomasi.

Korxona xavfsizlik xizmati tarkibida axborot-tahlil boʻlinmalari, xavfsizlikni ta'minlash yoʻnalishlari boʻyicha tashkiliy boʻgʻinlar hamda muayyan vazifalarni bajarish uchun vaqtinchalik tuzilmalar yaratilishi mumkin. Korxona rahbariyati yoki aksiyadorlik jamiyati boshqaruvi qaroriga koʻra, muayyan maqsadlar va yuzaga keluvchi sharoitlarda xavfsizlikni ta'minlashning murakkab vazifalarini hal qilish uchun korxonaning yetakchi mutaxassislarini jalb qilgan holda vaqtinchalik tuzilmalar yaratilishi mumkin.

Belgilangan vazifalarni bajarish uchun korxonaning xavfsizlik xizmati quyidagilarni amalga oshiradi:

- ma'muriy taqsimlash vazifasi, xavfsizlik tartibini oʻrnatish va ta'minlash, mas'ul shaxslarning korxona xavfsizligini ta'minlash masalalari boʻyicha huquq va majburiyatlarini belgilash, shuningdek, korxonaning vakolat vazifalarini bajarishga oid qarorlar tayyorlash yoʻli bilan amalga oshiriladi;
- xoʻjalik-taqsimlash vazifasi, xavfsizlik xizmatining korxona xavfsizligini ta'minlashda zarur boʻlgan resurslarni belgilashi. Korxona mulki va boyliklarini saqlash hamda ulardan oqilona foydalanishni ta'minlash chora-tadbirlarini tayyorlash va amalga oshirish yoʻli bilan amalga oshiriladi;
- hisob-nazorat vazifasi, tijorat-moliyaviy faoliyatning eng muhim yoʻnalishlarini ajratib koʻrsatish va korxonaning moliyaviy barqarorligiga tahdid soluvchi xavf-xatarning oldini oʻz vaqtida olish, ularning manbalarini baholash, xavfli holatlarni nazorat qilishni yoʻlga qoʻyish, korxona xavfsizligiga ta'sir koʻrsatuvchi salbiy omillarni hisobga olish, shuningdek, korxonaning hayotiy ehtiyojlariga tahdid soluvchi gʻirrom raqiblar, ishonchsiz hamkorlar, shaxslar va tashkilotlar haqidagi ma'lumotlar yordamida amalga oshiriladi;
- ijtimoiy-kadrlar vazifasi, xavfsizlik xizmatining kadrlarni joylashtirish, mehnat jamoalaridagi salbiy fikrlar, janjallarning oldini olish, xodimlarga yoʻriqnoma berish, ularda belgilangan xavfsizlik me'yorlariga rioya qilish uchun javobgarlik tuygʻusini shakllantirishda ishtiroki orqali amalga oshiriladi;
- tashkiliy-boshqaruv vazifasi, korxona xavfsizligini ta'minlash jarayonini boshqarishning doimiy tashkiliy tuzilmasini yaratish, qoʻllabquvvatlash va oʻz vaqtida qayta tashkil etishga boshqaruv ta'sirini koʻrsatish, faoliyatning alohida yoʻnalishlari boʻyicha moslashuvchan vaqtinchalik tuzilmalar, alohida boʻgʻinlar oʻrtasida belgilangan dasturiy maqsadlarga erishish uchun oʻzaro aloqalar va muvofiqlashtirishni tashkil etish yordamida amalga oshiriladi;
- rejali ishlab chiqarish vazifasi, korxona xavfsizligini ta'minlash bo'yicha alohida maqsadli rejalar va dasturlar majmuini ishlab chiqish, ularni amalga oshirish, xavfsizlik tartibini o'rnatish va qo'llab-quvvatlashga oid chora-tadbirlarni tayyorlash va bajarish yordamida amalga oshiriladi;
- tashkiliy-texnik vazifa, korxonada xavfsizlik tartibini moddiytexnik jihatdan ta'minlash, maxsus texnikalar hamda yangi, ilg'or

texnologiyalar, maxfiy tartib va boshqa maxsus faoliyatlarni oʻzlashtirish yordamida amalga oshiriladi;

- umumiy uslubiy vazifa, korxona xavfsizligini ta'minlashning ilgʻor tajribalarini toʻplash va yoyish, xodimlarni oʻqitishni tashkil etish, korxona xavfsizligini ta'minlashga oid muammolarni hal qilishni ilmiy jihatdan ishlab chiqish va uning bu sohadagi faoliyatini uslubiy koʻrsatmalar bilan ta'minlash yordamida amalga oshiriladi;
- axborot-tahlil vazifasi, xavfsizlikka oid ma'lumotlarni maqsadli ravishda yigʻish, toʻplash va ular ustida ishlash, buning uchun zarur boʻlgan ma'lumotlarni analitik tahlil qilishning texnik va uslubiy vositalarini yaratish va ulardan foydalanish, korxonaning manfaatdor boʻlinmalari va alohida shaxslarni xavfsizlik xizmatida mavjud boʻlgan ma'lumotlar bilan ta'minlash yordamida amalga oshiriladi.

Korxona xavfsizlik xizmati Nizomida uning maqsad va vazifalari, huquq va majburiyatlari, nazorat-taftish faoliyati belgilab beriladi. Xavfsizlik xizmati oʻz faoliyatini korxona xavfsizligini yuqori darajada ta'minlash va qoʻllab-quvvatlash asosida olib borib, quyidagilarni qamrab oladi:

- maxfiy tartibdagi faoliyatni tashkil etish;
- axborot xavfsizligini ta'minlash;
- muhandislik-texnik muhofaza;
- mehnat jamoalaridagi salbiy yoʻnalishlarning oldini olishga oid faoliyat.

Korxona xavfsizligini ta'minlash uning iqtisodiy koʻrsatkichlarini yaxshilashga olib keladi. Bu esa korxonaning nufuzini oshiradi. Jamoa va jamiyat farovonligiga xizmat qiladi.

6. Korxona (firma)ning tijorat sirlari va himoya qilish tartibi

Korxonaning tijorat sirlari ishlab chiqarish, texnologik ma'lumotlar, boshqaruv, moliya va shu kabilar bilan bogʻliq boʻlib, ularni oshkor qilish korxona manfaatlariga zarar yetkazishi mumkin boʻlgan ma'lumotlardir. Korxona tijorat sirlari toifasining qonunchilikda belgilab berilgan tavsifnomasi shunday.

Mavjud nuqtai nazarlarga koʻra, korxonaning tijorat sirlari umumiy holda quyidagilar haqidagi ma'lumotlarni qamrab oladi:

• korxonaning savdo aloqalari;

- kapital hajmi va tuzilmasi, investitsiya rejalari;
- ta'minotchi va iste'molchilar, tuzilgan shartnomalar;
- ishlab chiqarish hajmi, aylanma mablagʻlar va foyda hajmi;
- bahoni shakllantirish siyosati va tovarlar bahosining shakllanishi;
- bank operatsiyalari va hokazo.

Koʻpincha «tijorat sirlari» tushunchasidan tashqari, «korxonaning ishlab chiqarish sirlari» tushunchasi ham qoʻllanadi. U ishlab chiqarish usullari, texnologiyalar, texnik kashfiyotlar, tadqiqot ishlari, mehnatni tashkil qilish, aloqa tarmogʻi va shu kabilar haqidagi ma'lumotlarni oʻz ichiga oladi.

Bugungi bozor munosabatlari, ayniqsa, raqobatchilik maxfiy sharoitlarda korxona tijorat va ishlab chiqarish sirlarining oshkor qilinishi uning ahvoliga salbiy ta'sir koʻrsatishi, ishlab chiqarilayotgan mahsulotlar iste'molchilarini yoʻqotishga olib kelishi mumkin. Mutaxassislarning fikriga koʻra, tijorat sirlariga mansub ma'lumotlarning toʻrtdan bir qismi yoʻqotilishi ham raqiblar uchun katta imkoniyat yaratadi hamda bir necha oy ichida ma'lumotlar chetga chiqib ketishiga yoʻl qoʻygan firmalarning yarmi bankrotga uchrashiga olib keladi. Shu sababli hozirgi paytda tijorat sirlarining huquqiy maqomi va toifasini aniq belgilash, ularni oshkor qilish uchun javobgarlik mexanizmini ishlab chiqish maqsadga muvofiq hisoblanadi.

Amaliyot shuni koʻrsatadiki, tijorat sirlarini muhofaza qilish mexanizmi, korxonaning moliyaviy va texnik imkoniyatlari bilan aloqada boʻlganda, shuningdek ma'lumotlarni himoya qilishning ishonchli tizimi mavjud boʻlganda toʻliq kuch bilan ishlaydi. Bundan tashqari quyidagilarni toʻgʻri tashkil qilish ham muhim ahamiyat kasb etadi:

- tayyor mahsulot (ayniqsa, tajriba namunalari) va materiallarning ba'zi turlarini hisobga olish va qoʻriqlash;
- tadbirkorlik sirlari mavjud boʻlgan hujjatlar bilan ishlash tartibi (ularni hisobga olish, saqlash, yoʻq qilish qoidalari va boshqalar);
- hujjatlarni koʻpaytirish va ulardan nusxa olish vositalarini nazorat qilish;
- aloqa vositalari va hisoblash texnikasida tijorat ma'lumotlarini himoya qilish;
- korxona hududi va uning asosiy bino hamda inshootlarini qoʻ-riqlash;
- mazkur korxonaga begona shaxslar tashrif buyurishini nazorat qilish.

Yuqorida sanab oʻtilgan barcha vazifalarni samarali bajarish boshqaruv apparatida tijorat sirlarini muhofaza qilish bilan shugʻullanuvchi maxsus xizmatlarni yaratishni koʻzda tutadi. Xorij mamlakatlarida mazkur faoliyat bilan firmalarning maxsus boʻlinmalari shugʻullanadi. Ular raqobatchilar toʻgʻrisidagi ma'lumotlarni izlash va toʻplash bilan ham shugʻullanadi. Shu bilan bir vaqtning oʻzida ular savdo hamkorlarining tijorat sirlarini birgalikda himoya qilish imkoniyatini ham rad qilmaydilar. Masalan, ba'zi firmalar faoliyatida tadbirkorlik aloqalari davomida hamkorlarga berilgan ma'lumotlarni birgalikda himoya qilish boʻyicha maxsus shartnomalar tuzish tartibi koʻzda tutilgan.

Sanoati rivojlangan mamlakatlarning davlat idoralarida maxsus vositachilik xizmatlari mavjud boʻlib, u mijozlarni ularni qiziqtirayotgan tashkilotlar haqidagi ma'lumotlar bilan ta'minlaydi. Mamlakatimizda korxonalar davlatga soligga tortish va igtisodiy ma'lumotlarni yig'ish va ular bilan ishlash tizimi uchun zarur bo'lgan ma'lumotlarni taqdim etishi qonun hujjatlarida belgilab qo'yilgan. Shuningdek, korxonalar o'z faoliyatlari to'g'risidagi ma'lumotlarni, jumladan, yillik balansni nashr qiladilar. Shu bilan bir paytda korxonalar tijorat sirlariga oid ma'lumotlarni bermaslik huquqiga ega. Tijorat sirlari davlat boshqaruv va nazorat idoralari xodimlari orgali chetga chiqib ketishining oldini olish maqsadida korxona rahbari ularning vakolatlarini bilishi hamda ular talab qilgan istalgan ma'lumotni emas, balki faqat xizmat vakolatiga doir ma'lumotlarni taqdim etishi zarur. Birinchi o'rinda bu statistika xizmati, monopoliyadan chiqarish va raqobatni rivojlantirish qo'mitasi, huquqni muhofaza qilish organlari, moliya, soliq, sanitariya, yongʻinga qarshi kurash va boshqa xizmatlar vakillariga tegishli. Korxona rahbari, shuningdek, davlat idoralari xodimlarining noqonuniy xattiharakatlari ustidan arz qilish tartibi, ular tufayli korxonaga yetkazilgan moddiy va ma'naviy zararni qoplash mexanizmini bilishi va unga amal qilishi zarur.

Ilmiy-texnik, ishlab chiqarish, iqtisodiy va boshqa xizmatlar mutaxassislari oʻzi ishlayotgan korxonaning tijorat sirlariga oid ma'lumotlar chetga chiqib ketishi oqibatida yuzaga kelishi mumkin boʻlgan va real yoʻqotishlarni toʻgʻri va aniq (qiymat shaklida) baholashni oʻrganib olishlari zarur. Korxonalarning maxfiylik shartlariga rioya qilmaslik natijasida yuzaga keluvchi yoʻqotishlari umumiy koʻrinishda quyidagilarga olib keladi:

• ilmiy tadqiqotlarga litsenziya sotish imkoniyatlari pasayadi, fantexnika taraqqiyoti sohasida erishilgan ustunliklar yoʻqotiladi, ilmiy

tadqiqot boʻlinmalarining yoʻnalishni oʻzgartirishlari uchun xarajatlari oʻsadi:

- ishlab chiqarish faoliyatida zarur boʻlgan xom ashyo, texnologiya va ashyolarni sotib olishda qiyinchiliklar yuzaga keladi (yoki raqobatchilar tomonidan sun'iy ravishda yaratiladi);
- korxonaning tadbirkorlikdagi sheriklar bilan hamkorligi cheklanadi, foydali shartnomalarni imzolash imkoniyatlari kamayadi, shartnoma majburiyatlarini bajarishda muammolar vujudga keladi;
- korxonaning yangi bozor strategiyasini yaratish, marketing tadqiqotlari tuzilmasini oʻzgartirish kabilarga sarflanuvchi xarajatlari oʻsadi;
- tijorat sirlarini oshkor qilganlarga nisbatan iqtisodiy jazo choralari qoʻllash xavfi kuchayadi.

Barcha yoʻqotishlarning umumiy miqdori qiymatini aniq hisoblash juda murakkab va kuchli mehnat talab qiluvchi jarayon boʻlib, ba'zida ishonchli ma'lumotlar yoʻqligi sababli ularni hisoblashning imkoni ham boʻlmaydi. Yuqorida keltirilganlar korxonalardan qoʻshimcha xarajatlarni talab qilib, ishlab chiqarish samaradorligi va raqobatdagi muvaffaqiyatlar imkoniyatini kamaytiradi. Xuddi shuning uchun ham hozirgi paytda tijorat sirlarini muhofaza qilishga katta e'tibor qaratilmoqda.

Tayanch tushunchalar:

Korxona (firma), xususiy firma, mas'uliyati cheklangan firma, aksioner firma, davlat korxona (firma)si, aralash firma, xolding kompaniya, korxona (firma) siyosati (tijorat, narx, moliya, raqobat siyosati). Korxona daromadi, yalpi daromad, foyda, iqtisodiy foyda, rentabellik, bankrotlik, soxta bankrotlik, kapital, asosiy kapital, korxona xayfsizligi.

Savol va topshiriqlar:

- 1. Korxona (firma)ni ta'riflang.
- 2. Xarajatlar, ichki va tashqi xarajatlar nima?
- 3. Korxonaning iqtisodiy manfaatlari deganda nimalarni tushunasiz?
- 4. Korxona faoliyatiga ta'sir etuvchi ichki va tashqi tahdidlarni sharhlang.
- 5. Korxonaning bankrot boʻlishi sabablarini tushuntiring.
- 6. Bankrot bo'lgan firmani qanday oqibatlar kutadi?
- 7. Oʻzbekistonda kichik biznesni rivojlantirish gʻoyat muhim ishligini tushuntirib bering.

- 8. Korxonaning tijorat sirlari va axborot obyektlarini himoya qilishning mohiyatini tushuntirib bering.
- 9. Mamlakatimizda bandlik muammosini hal etishda korxona (firma)larning rolini izohlang.
- 10. Kichik biznes imkoniyatlaridan yanada kengroq foydalanishdagi muammolar va ularni bartaraf etish yoʻllari haqidagi fikringizni bayon eting.
 - 11. Korxona xavfsizligi nima?
- 12. Korxonalarning mamlakat iqtisodiy negizlarini mustahkamlashdagi oʻrni va roliga baho bering.
- 13. Mustaqillik yillarida sanoat va qishloq xoʻjaligi korxonalarining rivojlanishini tahlil qiling.
 - 14. Oilaviy korxonaning mohiyatini tushuntiring.

Mavzuni chuqur o'rganish instrumentariysi

Oilaviy korxona – uning ishtirokchilari tomonidan tovarlar ishlab chiqarish (ishlar bajarish, xizmatlar koʻrsatish) va realizatsiya qilishni amalga oshirish uchun ixtiyoriy asosda, oilaviy korxona ishtirokchilarining ulushli yoki birgalikdagi mulkida boʻlgan umumiy mol-mulk, shuningdek oilaviy korxona ishtirokchilaridan har birining mol-mulki negizida tashkil etiladigan kichik tadbirkorlik subyektidir.

Korxona – yuridik shaxs huquqiga ega boʻlgan, mulkchilik huquqi yoki xoʻjalikni toʻla yuritish huquqi boʻyicha oʻziga qarashli mol-mulkdan foydalanish asosida mahsulot ishlab chiqaradigan va sotadigan yoki mahsulotni ayirboshlaydigan ishlarni bajaradigan, xizmat koʻrsatadigan, bellashuv hamda mulkchilikning barcha shakllari teng huquqliligi sharoitida amaldagi qonunlarga muvofiq oʻz faoliyatini roʻyobga chiqaradigan mustaqil xoʻjalik yurituvchi subyekt.

Mikrofirma – kichik biznes subyektlarining bir turi boʻlib, mamlakatimizda amaldagi qonunchilikka koʻra sanoat ishlab chiqarishning tarmoqlarida 20 kishigacha, xizmat koʻrsatish sohasida 10 kishigacha, savdo va umumiy ovqatlanish sohasida 5 kishigacha ishlovchi korxonalar mikrofirma hisoblanadi.

Kichik korxona – kichik biznes subyektlarining bir turi boʻlib, mamlakatimizda amaldagi qonunchilikka koʻra sanoat ishlab chiqarishning ayrim tarmoqlarida (masalan, yengil va oziq-ovqat sanoati, metallga ishlov berish va asbobsozlik sanoati va h.k.) 100 kishigacha, ayrimlarida (masalan, mashinasozlik, metallurgiya, yoqilgʻi-energetika sanoati va boshqalarda) 50 kishigacha, xizmat koʻrsatish sohasida 25 kishigacha ishlovchi korxonalar kichik korxona hisoblanadi.

Firma – iste'molchilar ehtiyoji va oʻz rivojlanishini qondirish maqsadida tovar va xizmatlar tayyorlash va sotish uchun ishlab chiqarish omillaridan eng yaxshi foydalanish borasida mustaqil qarorlar qabul qiluvchi iqtisodiy birlik.

Tadbirkorlik riski – firmaning koʻzlangan maqsadiga erishish yoʻlida duch keladigan iqtisodiy xavf-xatardir.

Ishlab chiqarish riski – firmaning moʻljallangan miqdordagi va turdagi tovarlarni ishlab chiqara olmay qolishi.

Tijorat riskida firma oʻzi moʻljallagan miqdorda va narxda hamda oʻz vaqtida tovarlarini sota olmay qoladi, natijada uning pul tushumlari koʻzlanganidek boʻlmaydi.

Moliya riski – koʻzlangan miqdordagi foydani olmasdan, belgilangan rentabellikka erisha olmay qolish yoki foyda oʻrniga zarar koʻrish.

Transformatsion xarajatlar – ishlab chiqarish omillarining biror xil ne'matlar yaratishga sarflanishi, ya'ni tabiat «ashyosi»ni muayyan ne'matga aylantirish bilan bogʻliq xarajatlar.

Soxta bankrotlik – xoʻjalik yurituvchi subyektning oʻz majburiyatlarini iqtisodiy jihatdan bajara olmasligi haqida bila turib, haqiqatga toʻgʻri kelmaydigan e'lon berishi kreditorlarga zarar yetkazilishiga sabab boʻladigan iqtisodiy hodisa (*Oʻzbekiston Respublikasi Jinoyat kodeksining 180-moddasi*).

Biznes-inkubatorlar — maxsus tanlab olingan kichik korxonalarni oʻz maydonlariga joylashtiruvchi va ularga maslahat, oʻqitish va ofis xizmatlarini koʻrsatuvchi tuzilmalar.

Ijtimoiy-amaliy markaz – ish bilan band boʻlmagan aholi va ishsizlar oʻrtasida kichik tadbirkorlikni rivojlantirish orqali yangi ish oʻrinlarini yaratish bilan shugʻullanuvchi, odatda bandlik markazlari qoshida tashkil etiluvchi tuzilma.

Texnopark – oʻz hududida kichik innovatsion korxonalarni yaratish va rivojlantirish orqali ilmiy salohiyatdan foydalanish va ishlab chiqilgan texnologiyalarni tijoratlashtirish maqsadida tashkil etiluvchi tuzilma.

Konsalting – ishlab chiqarishga ish yuzasidan xizmat koʻrsatish sohasida ixtisoslashgan firmalarning oʻz mijozlariga maslahat xizmati koʻrsatish va texnikaviy loyihalarni ekspertiza qilish bilan bogʻliq iqtisodiy faoliyat.

Auditorlik kompaniyasi — xoʻjalik yurituvchi subyektlarga buxgalteriya hisobini tashkil etish va yuritish, buxgalteriya va moliyaviy hisobotlarni tayyorlash, bu borada turli maslahatlar berish, moliya-xoʻjalik faoliyati toʻgʻrisida xulosalar berish va shu turdagi boshqa xizmatlar koʻrsatish bilan shugʻullanuvchi muassasa.

Sugʻurta kompaniyasi – sugʻurtalovchi rolida maydonga tushuvchi, ya'ni sugʻurta hodisasi roʻy bergan chogʻda sugʻurtalangan shaxsning zararlarini qoplash majburiyatini oʻziga oluvchi tashkilot.

Mavzu yuzasidan asosiy xulosalar:

1. Tadbirkorlik faoliyati korxona (firma) doirasida va individual tarzda yuz beradi. Firma tovar ishlab chiqaruvchi hisoblanadi, u muayyan mulk

shakliga tayanadi, ishlab chiqaruvchilar jamoasi boʻladi, uning korporativ guruhiy manfaati mavjud, nihoyat u ixtisoslashgan boʻladi. Firmalarning uchta asosiy turi boʻlib, bular xususiy, shirkat va davlat firmalaridir.

- 2. Korxona (firma)lar oʻz maqsadiga erishish uchun iqtisodiy birlashmalar tashkil etadi. Bulardan asosiylari xolding, konglomerat, kartel va transmilliy korporatsiyalardir. Firmalarning jamoatchilik uyushmalari boʻlib, bular tadbirkorlar ittifoqi, savdo-sanoat palatalari va turli biznesni qoʻllabquvvatlash jamgʻarmalaridan tashkil topadi.
- 3. Foyda olish maqsadida tadbirkorlikka qoʻyilgan mablagʻ kapital boʻlib, bu individual yoki korporativ mulk hisoblanadi, tarkiban asosiy va aylanma kapitaldan iborat. Asosiy va aylanma kapital moddiy shakli, oʻz qiymatini oʻtkazishi, qaytadan tiklanish muhlati jihatidan farqlanadi, ularning nisbati ishlab chiqarishning texnikaviy darajasi, uni serkapital, sermehnat yoki serashyoviy boʻlishiga bogʻliqdir.
- 4. Korxona (firma)ning oʻz biznesiga sarflagan kapitali uning joriy xarajatlariga aylanadiki, bu uning tovar va xizmatlarni yaratish va ularni sotish uchun qilgan sarflaridan iborat, xarajat qilish foyda topishning shartidir. Xarajatlar tabiati jihatidan har xil boʻladi, miqdori ishlab chiqarish miqyosiga bogʻliq boʻlmagan xarajatlar doimiy boʻlsa, miqdori bunga bogʻliq xarajatlar oʻzgaruvchandir. Firma uchun u yaratgan tovarlar va xizmatlar qanchaga tushishini ularning birligini yaratishga ketgan xarajatlar, ya'ni oʻrtacha xarajatlar belgilaydi. Qoʻshimcha ishlab chiqarish uchun ketgan qoʻshimcha xarajatlar marginal xarajatlar boʻladi.
- 5. Korxona (firma) xarajatlari oʻzgarib turadi, bu esa resurslarning bozor narxiga, ularning naqadar tejalishiga, xarajatlar turlarining nisbatiga, nihoyat ishlab chiqarish koʻlamiga bogʻliqdir. Oʻrtacha xarajatlar miqdori mehnat unumdorligiga teskari mutanosiblikda boʻladi.
- 6. Bozor iqtisodiyotiga oʻtish davrida erkinlik darajasiga qarab uch toifa korxona (firma) paydo boʻladi:

□ davlat buyurtmasi saqlangan korxona;
□ faqat bozorga ishlovchi korxona;
□ ham buyurtma, ham bozor uchun ishlovchi korxona.

9-MAVZU. TALAB VA TAKLIF NAZARIYASI

1. Talabning iqtisodiy mohiyati. Talabning oʻzgarib turishiga ta'sir etuvchi omillar

Bozor mexanizmida talab va taklif muhim oʻrinni egallaydi va koʻzga koʻrinmas kuchga ega. Talab – bu shunchaki ehtiyoj emas, balki toʻlovga qobil pul bilan ta'minlangan ehtiyojdir.

Ehtiyoj – kishilarning hayotiy vositalarga zaruriyatini, taraqqiyotning hamma bosqichlari uchun umumiy va doimiylikni ifodalovchi ilmiy kategoriya. Uning bozor iqtisodiyoti sharoitida ifodalanishi «talab» tushunchasidir. Talab ehtiyojdan farq qilib, mustaqil iqtisodiy kategoriya sifatida amal qiladi.

Ehtiyojning faqat pul bilan ta'minlangan qismi talabga aylanadi. Demak, talab – bu pul bilan ta'minlangan ehtiyojdir.

Bozorda xaridor oʻziga zarur boʻlgan narsalarni sotib olib, ehtiyojlarini qondirishga intiladilar. Ammo kishi ehtiyojlarining qay darajada qondirilishi uning muayyan tovarga boʻlgan talabi, aholining pul daromadlari va uning oʻzgarishiga, bozor hajmiga, bozordagi mollarning narxlariga, iste'molchilarga beriladigan imtiyozlar kabi omillarga bogʻliq boʻladi. Bularning ichida talabni aniqlab beradigan asosiy omil bu tovarning bahosidir. Chunki bu omil talabning u yoki bu tomonga qarab oʻzgarishiga olib keladi. Xoʻsh, talabning oʻzi nima?

Talab – bu iste'molchining muayyan joyda va muayyan vaqtda tovar yoki xizmat sotib olish istagi va imkoniyatidir. Boshqacha aytadigan boʻlsak, bu pul bilan ta'minlangan ehtiyoj, ya'ni toʻlovga qodir ehtiyojdir. Aynan mana shu ehtiyojga qarab bozorga chiqarilishi lozim boʻlgan tovarning miqdori va assortimenti aniqlanadi. Talab iste'molchi sotib olish qobiliyatiga ega boʻlgan tovar miqdorini belgilab beradi. Demak, talabni iste'molchi tomonidan tovarlarni sotib olish mumkin boʻlgan baho sifatida koʻrishimiz ham mumkin. Tovar bahosi bilan xaridor sotib olishi mumkin boʻlgan tovar miqdori oʻrtasidagi bogʻlanishni koʻrib chiqamiz.

Talablar har xil boʻlib, bir xil tovar yoki xizmatlarga boʻlgan talabning ikki turi farq qilinadi: yakka talab va bozor talabi.

Talab – iqtisodiy subyektning muayyan miqdordagi ne'matlarni muayyan bozor bahosida sotib olish istagi va imkoniyati. **Talab** – bu shunchaki ehtiyoj emas, balki toʻlovga qobil, pul bilan ta'minlangan ehtiyojdir.

Vahima talab – bozordagi shov-shuv hamda vahima ta'sirida sun'iy paydo bo'ladigan va shiddat bilan ortib boradigan talab. Vahima talab odatdagi normal talabga nisbatan ortiq talab hisoblanadi. Bunday talab, *bir tomondan*, aholi orasida mish-mishlar tarqatish va reklama vositasida

muayyan tovarga oʻta yuqori baho berish orqali iste'molchi ruhiyatiga ta'sir etish yoʻli bilan, *ikkinchi tomondan*, tovarlarga boʻlgan gʻoyat katta qiziqish, qimmatchilik va qahatchilik xavfi, pul almashish ehtimoli, har xil shov-shuvlar ta'sirida puldan tezroq qutulish va tovar zaxirasini koʻpaytirishga intilish oqibatida yuzaga keladi. Vahima talabni koʻproq savdo ahli har xil mish-mishlar tarqatish orqali ham yuzaga keltiradi. Vahima talabning paydo boʻlishi bozor narxini koʻtarib yuboradi, tovarlar talashib olinadi, tovar talabi, taqchilligi gʻoyat kuchayib ketadi. Vahima talab iqtisodda uchrab turadigan hodisa. Lekin u oʻtkinchi xarakterga ega boʻlib, uzoq davom eta olmaydi. Vahima talab tartibsizliklarni keltirib chiqarishga olib kelishi mumkin.

Iqtisodiyot uchun bozor koʻlami gʻoyat muhim, chunki bozor qanchalik keng boʻlsa, shunchalik ishlab chiqarishning oʻsishiga sharoit yaratiladi. Tovarlar oʻz vaqtida sotiladi, kerakli resurslar sotib olinib, takror ishlab chiqarish uzluksizligi ta'minlanadi. Muhimi, iste'molchilarning talabini qondirishga erishiladi.

Iqtisodiyotning nimani, qancha va kim uchun ishlab chiqarish zarur degan azaliy muammosi bozorda aniqlanishi barchaga ma'lum. Shu sababli bozor tizimi dunyo mamlakatlari intilayotgan yangi ijtimoiyiqtisodiy tizimdir. Ishlab chiqarishda yaratilgan turli-tuman mahsulotlar va koʻrsatiladigan xizmatlar iste'molchilarga toʻgʻridan-toʻgʻri emas, balki bozor orqali yetib boradi. Bozor ishlab chiqarishni iste'mol bilan bogʻlaydi, chunki hech bir narsa tekinga berilmaydi, uni bozorda pulga sotib olish talab qilinadi.

Bozor – bu talabning subyekti boʻlgan xaridorlar (iste'molchilar) bilan taklifning subyekti boʻlgan (ishlab chiqaruvchilar) sotuvchilar oʻrtasidagi iqtisodiy aloqalar, ularni bir-biriga bogʻlaydigan mexanizmdir.

Bozorga tovar egasi uni sotish, xaridor esa uni olish uchun chiqadi. Sotuvchilar – bu tovar ishlab chiqaruvchi firmalar, fermer xoʻjaliklari, kichik biznes sohiblari, yakka tarzda ishlab chiqaruvchi kishilardir. Xaridorlar esa jamiki iste'molchilar, ya'ni xonadonlar, resurslarni olib ishlatuvchi firmalar, davlat idoralari va yakka tartibda ishlab chiqaruvchilar boʻladi. Agar aholi bozordan iste'mol buyumlari va xizmatlarni sotib olsa, firmalar va yakka tartibda ishlovchilar asbob-uskuna, mashinalar, yoqilgʻi, elektr energiya, xom ashyo va ish kuchini sotib oladilar. Bozorda tovarlarni pul vositasida ayirboshlash, ya'ni oldi-sotdi munosabatlari paydo boʻladi. Bir tovar pulga ayirboshlansa, shu pulga

qaytadan boshqa tovar sotib olinadi. Xullas, bozor talab va taklif qonuni talablari asosida ish koʻruvchi mexanizmdir.

Talabning oʻzgarib turishiga ta'sir etuvchi omillar. Talabga ta'sir etuvchi omillar uch guruhga ajraladi: a) narxlar. Bu muayyan paytdagi aniq bir tovar narxi, oʻrinbosar tovarlar narxi va oʻzgarishi kutiladigan narxlar. Bular talabni oshirishi yoki qisqartirishi mumkin; b) xaridorning pul daromadi yoki xarid qurbi. Narx oʻzgarmagan holda daromad oshsa, talab koʻpayadi, aksi boʻlsa, talab kamayadi; c) xaridorning qaysi tovarni afzal koʻrishi, bu uning didiga va xohishiga bogʻliq. Narx va daromadni xaridor oʻz bilganicha oʻzgartira olmaydi, lekin ularni nazarda tutgan holda xaridor oʻzi afzal koʻrgan tovarga talab bildiradi.


Mahsulot narxi bilan sotib olinadigan tovar miqdori oʻrtasida boʻladigan teskari yoki qarama-qarshi bogʻliqlik talab qonuni deyiladi.

Talabga narxdan tashqari quyidagi omillar ta'sir qiladi: iste'molchi didi, bozordagi iste'molchilar soni, iste'molchining daromadi, bir-biriga bogʻliq tovarlarning narxi, kelajakda narx va daromadlarning oʻzgarishi.

2-jadval

Tovar birligining bahosi	Talab miqdori (dona)		
(soʻm)			
5000	1000		
4000	2000		
3000	3000		
2000	4000		
1000	5000		

Jadvaldan koʻrinib turibdiki, tovar birligining bahosi qanchalik past boʻlsa, iste'molchining xarid quvvati, ya'ni sotib olishi mumkin boʻlgan tovar miqdori shunchalik koʻp boʻladi va aksincha. Demak, tovar bahosi bilan tovar miqdor oʻrtasidagi bogʻlanish nisbat koʻrinishda boʻladi va talab egri chizigʻi deyiladi.



OP – tovar birligining bahosi, OQ – tovarga boʻlgan talab miqdori.

Talab egri chizigʻi talab qonunini ifodalaydi. Talab faqat baho omili bilangina belgilanmaydi, uning oʻzgarishiga quyidagi omillar ham ta'sir koʻrsatadi:

- 1) iste'molchilar urf-odat va didlarining o'zgarishi. U asosan reklamaning yoki modaning o'zgarishi natijasida ro'y beradi. Masalan, hozirda kompakt disklarning yaratilishi grammplastinkalarga bo'lgan talabni keskin pasaytirib yubordi;
- 2) bir-birining oʻrnini bosuvchi tovarlarning mavjudligi. Masalan, ikki xil bir turdagi tovar bir xil talabni qondirishi mumkin. Bu tovarlar bir-birining oʻrnini bosuvchi tovarlar deyiladi. Bunday tovarlardan biri narxining oʻzgarishi, ikkinchisiga boʻlgan talabni oʻzgartiradi;
- 3) toʻldiruvchi tovarlar narxlarining oʻzgarishi. Masalan, koʻp turdagi tovarlar birgalikda sotib olinadi. Poyafzal bilan uning moyi biri-birini toʻldiradi. Shuning uchun poyafzal narxining oʻsishi unga boʻlgan talabni pasaytiradi. Binobarin, poyafzal moyiga boʻlgan talab ham pasayadi;
- 4) tovar nafliligining oʻzgarishi. Masalan, sabzavot-mevalarning mavsumlarga qarab iste'mol qilinishi sogʻliq uchun foydaliligi haqidagi ma'ruza yoki reklama unga boʻlgan talabni oshiradi;
- 5) daromadning oʻzgarishi. Aholi daromadlarining oshishi ularning xarid quvvatini oshiradi, bu esa tovarlarga boʻlgan talabni ham oshiradi;
- 6) atrof-muhitdagi oʻzgarishlar. Masalan, agar havo isib ketsa, salqin ichimliklar, muzqaymoqqa va xona sovutgichlariga boʻlgan talab oshadi va aksincha;
- 7) aholi sonining oʻsishi. Masalan, aholining tugʻilishi darajasining oʻsishi akusherlik xizmati, maktabgacha tarbiya, maktab

tarbiyasi kabi xizmatlarga, bolalar uchun kerak mahsulotlarga talabni oshiradi va aksincha.

2. «Taklif» tushunchasi. Taklifning oʻzgarib turishiga ta'sir etuvchi omillar

Taklif – ishlab chiqaruvchilar tomonidan ishlab chiqarilgan va muayyan paytda bozorga chiqarilgan yoki keltirish mumkin boʻlgan jami tovarlar va xizmatlar miqdoridir. Shuningdek, taklif ishlab chiqaruvchi ma'lum vaqt ichida ishlab chiqarishga qodir boʻlgan narxning har bir darajasida bozorga sotishga chiqaradigan mahsulotlar miqdorini koʻrsatadi. Narx oʻzgarishi bilan sotishga chiqariladigan mahsulot miqdori ham oʻzgarishi sababli talab va taklifning ham bir qator muqobil variantlari mavjud boʻladi.

Bozordagi tovarlarning bahosi faqat talabga bogʻliq boʻlmay taklifga ham bogʻliq boʻladi. Ya'ni bozordagi tovarlarning miqdori ham ma'lum darajada bahoning shakllanishiga sabab boʻladi. Narxning muayyan darajasida talab va taklif miqdori bir-biriga mos kelgan holat bozor muvozanati deyiladi. Taklif – bu bozorga sotish maqsadida keltirilgan yoki keltirilishi aniq boʻlgan mahsulotlar miqdoridir. Taklifning bahoga nisbatan yoki bahoning taklifga nisbatan oʻzgarishini quyidagi jadval orqali ifodalash mumkin:

 $2\hbox{-}jadval$ Alohida ishlab chiqaruvchining mahsulot taklifi

1 kg un narxi (soʻm)	Taklif qilinadigan un miqdori (kg)
1500	60
1400	50
1300	35
1200	20
1100	5

Jadvaldan koʻrinib turganidek, mahsulotga qoʻyilgan baho qanchalik yuqori boʻlsa, bozorga keltirilayotgan mahsulot miqdori ham shuncha koʻp boʻladi. Demak, tovarning bahosi bilan xaridorga taklif qilinayotgan mahsulot miqdori oʻrtasida toʻgʻri munosabat mavjuddir. Bu bogʻlanish taklif egri chizigʻi orqali ifodalanadi va **taklif qonuni** deyiladi.

Taklifning oʻzgarib turishiga ta'sir etuvchi omillar. Taklif hajmining oʻzgarishi tovar bahosiga bevosita bogʻliq boʻladi. Taklif hajmi darajasining baho oshishi (pasayishi)ga javoban oʻzgarishi taklif egiluvchanligi deyiladi. Lekin taklif ham talab singari faqat baho omili natijasida oʻzgarmaydi. Buning oʻzgarishiga bahoga bogʻliq boʻlmagan omillar ham ta'sir qiladi. Bular quyidagilar:

- 1. Resurslar bahosining oʻzgarishi. Ma'lumki, ishlab chiqarish jarayonlari resurslar bahosi bilan uzviy bogʻliqdir. Shuning uchun ishlab chiqarilayotgan mahsulot miqdori bevosita resurslar bahosiga bogʻliq.
- 2. Texnologiyaning oʻzgarishi. Texnologiyalarni takomillashtiruvchi mahsulot birligini ancha samarali ishlab chiqarishga imkon beradi. Yangi texnologiyaning joriy etilishi resurslardan samarali foydalanishga, bu esa oʻz navbatida koʻproq mahsulot ishlab chiqarishga olib keladi.
- 3. Soliq va dotatsiya miqdori. Koʻpchilik soliqlar ishlab chiqarish xarajatlari tarkibiga kiradi. Shu sababli soliqlarning oshishi ishlab chiqarish xarajatlarini oshiradi va taklifni qisqartiradi. Masalan, import tovarlarga boj toʻlovlarining oshishi uning taklifini qisqartiradi.
- 4. Boshqa tovar narxi. Boshqa tovarlar narxining oʻzgarishi ham mazkur tovar taklifini oʻzgartiradi. Masalan, qoʻy goʻshti narxining pasayishi mol goʻshti taklifini oshiradi va aksincha holat ham boʻlishi mumkin.
- 5. Narx oʻzgarishining kutilishi. Kelgusida mahsulot narxining oʻzgarishi kutilishi ham ishlab chiqaruvchilarning bugungi kundagi bozorga mahsulot yetkazib berishi xohishiga ta'sir koʻrsatishi mumkin.
- 6. Bozordagi ishlab chiqaruvchilar, sotuvchilar soni va hokazo. Tovar ishlab chiqaruvchilar qanchalik koʻp boʻlsa, taklif qilinadigan mahsulot miqdori shunchalik koʻp boʻladi. Tarmoqdagi ishlab chiqaruvchilar soni ortib borishi taklifni koʻpaytiradi, chunki tovar ishlab chiqarish koʻpayadi.

Lekin talab qonuni singari bu omillar taklifning oʻzini oʻzgartiradi, taklif hajmini emas. Taklif hajmining oʻzgarishiga tovarning saqlanish xususiyati, saqlash xarajatlari va transport tashish imkoniyatlari ham ta'sir koʻrsatadi, ishlab chiqarish jarayonining

xususiyati tabiiy resurslarning mavjud darajasi ham taklifga ta'sir koʻrsatadi.

3. Talab va taklif qonuni hamda bozor muvozanati

Biz yuqorida turli omillar ta'sirida talab va taklif miqdorining oʻzgarib turishini koʻrdik. Lekin, talab bilan taklif miqdori bir-biri bilan doimo ma'lum nisbatda boʻladi, bu nisbatlar oʻzgarib turadi. Ba'zan talab miqdori taklif miqdoridan oshib ketib narx koʻtarilsa, ayrim paytda taklif miqdori talab miqdoridan oshib ketib, baho pasayib ketadi. Talab miqdori bilan taklif miqdori oʻrtasidagi nisbat bir-biriga teng toʻlgan holat bozor muvozanati deyiladi.

Shu oʻrinda yalpi talab va taklifning ta'riflarini keltiramiz.

Yalpi talab — narxlarning mavjud darajasida milliy iqtisodiyotda ishlab chiqarilgan pirovard tovarlar va xizmatlarni sotib olishga qilingan barcha sarflar summasidir.

Yalpi taklif – bu narxlarning mavjud darajasida iqtisodiyotda ishlab chiqarilgan pirovard tovarlar va xizmatlarning umumiy miqdori (qiymat ifodasidagi).

Xaridor talabi bilan ishlab chiqaruvchi taklifi bir-biriga mos kelgani kuzatilganda oʻrnatilgan narx *muvozanat narx* deyiladi. Muvozanat narx oʻrnatilishi uchun:

birinchidan, xaridorlar sotib olishi mumkin boʻlgan tovarlar miqdori taklif miqdoriga mos kelishi kerak; ikkinchidan, narx va tovar miqdorining oʻzgarishi kuzatilmaydi. Lekin hayotda bunday emas. Ya'ni talab va taklif doimo u yoki bu tomonga qarab, turli omillar ta'sirida oʻzgarib turadi. Goh talab taklifdan oshadi, goh esa aksincha, taklif talabdan yuqori boʻladi.

Talab qonuni – bozor qonuni. Unga binoan tovarlarga talab ularning narxiga nisbatan teskari mutanosiblikda boʻladi. Bu qonunning naqadar amal qilishini, talabning narxga bogʻliq elastikligini, ya'ni narx oʻzgarishiga javoban talabning qanday darajada oʻzgarishini ifoda etadi. Bozorga elastik talab xos boʻladi, bunda narx oʻzgarishiga nisbatan talab koʻproq oʻzgaradi.

Bozorda taklif qonuni ham amal qiladi, unga binoan taklif narxga nisbatan toʻgʻri mutanosiblikda boʻladi. Mazkur qonunning amal qilishini taklif elastikligi, ya'ni taklifning narxga javoban qanchalik oʻzgarishini bildiradi. Bozorga elastik taklif xos boʻladi, bu taklifning narxga nisbatan tezroq oʻzgarishini bildiradi.

Bozor muvozanatini ta'minlash uchun ishlab chiqarishni rivojlantirish orqali bozorni tovarlar bilan toʻldirish lozim, talab va taklifga qarab baholarni pasaytirish yoki oshirish mumkin.

Shu maqsadda Prezident Islom Karimov «Asosiy vazifamiz – Vatanimiz taraqqiyoti va xalqimiz farovonligini yanada yuksaltirishdir» asarida (2010) mamlakatimizda iqtisodiyotni barqarorlashtirish orqali yalpi talabni oʻstirish, «2009–2012-yillarga moʻljallangan inqirozga qarshi choralar» davlat dasturining ahamiyatiga toʻxtalib:

- 1) tijorat banklarini zarar koʻrib ishlayotgan va iqtisodiy nochor korxonalarni sogʻlomlashtirish jarayoniga jalb qilish tajribasi amalda oʻzini toʻla oqlaganligi;
- 2) hali ham eski texnika va texnologiyalar asosida ishlayotgan, hech qanday iqtisodiy istiqboli boʻlmagan korxonalarni tugatish va ularning negizida yangi zamonaviy ishlab chiqarish quvvatlarini tashkil etish darkorligi;
- 3) kichik biznes va xususiy tadbirkorlikni, fermerlikni rivojlantirishni moliyalashda tijorat banklarining rolini kuchaytirish boʻyicha ishlarni davom ettirish zarurligi;
- 4) kichik biznes va xususiy tadbirkorlik korxonalariga 2010-yilda kredit resurslari ajratish miqdorini 1,4 barobar koʻpaytirish, mikrokreditlar hajmini 1,3 barobar oshirish vazifasi qoʻyilganligi;
- 5) mamlakatimizning raqobatdoshligini oshirishni ta'minlash uchun iqtisodiyotning tarkibiy oʻzgartirish jarayonlarini chuqurlashtirish siyosatini davom ettirish 2010 va kelgusi yillarga moʻljallangan iqtisodiy dasturni amalga oshirishning muhim ustuvor yoʻnalishiga aylanishi lozimligini ta'kidlagan edi¹.

Prezident Islom Karimov «Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi»da belgilagan muhim masalani keltirishni lozim topdik. «Mamlakatimiz iqtisodiy taraqqiyotining eng muhim istiqbollari va ustuvor yoʻnalishlarini belgilab olar ekanmiz, biz ichki ehtiyojning oʻsishiga alohida e'tibor qaratishimiz kerak boʻladi. Jahon moliyaviyiqtisodiy inqirozi oqibatlarini yumshatishga qaratilgan inqirozga qarshi choralar dasturida ana shunday yondashuv asosida ish tutganimiz oʻtgan

¹ *Каримов И. А.* Асосий вазифамиз – Ватанимиз тараққиёти ва халқимиз фаровонлигини янада юксалтиришдир. – Т., 2010. – Б. 58–59.

yillarda oʻzini toʻla oqladi. Ta'kidlash kerakki, bugungi kunda Osiyodagi koʻplab mamlakatlar aynan shunday pozitsiyaga amal qilib kelmoqda.

Shundan kelib chiqqan holda, bizning yaqin istiqboldagi eng muhim vazifamiz boshlagan ishlarimizni izchil davom ettirish – iste'mol talabini kengaytirish maqsadida ijtimoiy sohani rivojlantirish, mehnatga haq toʻlashni yanada oshirish, xizmat koʻrsatish sektorini, infratuzilma obyektlarini, xizmat koʻrsatish sektorini, infratuzilma obyektlarini rivojlantirishga, transport va kommunikatsiya loyihalari amalga oshirilishiga alohida e'tibor berishdir¹».

Yuqoridagi belgilangan vazifalarning ijrosi mamlakatimizda 2010-2012-yillarda yalpi ichki mahsulotning o'sishiga olib keldiki, oqibatda aholi daromadlarining oʻsishi yalpi talabning ta'minlanishiga moddiy asos yaratdi. Mamlakatimizdagi ishlab chiqilgan modernizatsiya va diversifikatsiya strategiyasi amalga oshirilayotgan iqtisodiy islohotlarning davomi bo'lib, uni amalga oshirish natijasida 2011-yilda mamlakatimiz yalpi ichki mahsulotida sanoat ishlab chiqarishi ulushi 2000-yilda boryoʻgʻi 14,2 foizni tashkil etgan boʻlsa, 2011-yilda bu koʻrsatkich 24,1 foizga yetdi, iste'mol tovarlari ishlab chiqarish hajmi 2011-yilda 11,2 foizga o'sdi. 2000-yilga nisbatan esa bu ko'rsatkich 4 barobardan ziyod oshdi. Ayni paytda qishloq xoʻjaligining ulushi esa 30 foizdan 17,5 foizga kamaydi. Mamlakatimizda xizmat koʻrsatish va serviz sohasi 2011-yilda jadal sur'atlar bilan rivojlanib, uning yalpi ichki mahsulotdagi ulushi 2000-yildagi 37 foiz oʻrniga 50,5 foizni tashkil etdi. Mamlakatimizda iqtisodiyotning real hamda ijtimoiy sektorlarini rivojlantirishga muhim e'tibor natijasida 2011-yilda respublikamizda ish haqi 20,2 foizga, budjet tashkilotlarining ish haqi, pensiyalar, nafaqa va stipendiyalar miqdori esa 26,5 foizga o'sdi. Aholi jami daromadlarining 51 foizi tadbirkorlik faoliyatidan olinayotganligi muhim yangilikdir. Keyingi oʻn yilda O'zbekistonda aholi daromadlari hajmi 8,1 barobarga ortdi. Agar 1991yilda eng kam ish haqiga Xalqaro mehnat tashkiloti va Jahon Sogʻliqni saqlash tashkilotining tavsiyalariga muvofiq tarzda hisoblab chiqilgan iste'mol savati qiymatining faqat 8 foizini tashkil etadigan tovar va xizmatlarni xarid qilish mumkin bo'lgan bo'lsa, 2011-yilda bu ko'rsatkich

 $^{^1}$ *Каримов И. А.* Мамлакатимизда демократик ислохотларни янада чукурлаштириш ва фукаролик жамиятини ривожлантириш концепцияси. – Т., 2010. – Б. 53.

iste'mol savatining 120 foizini tashkil etdi yoki 15 barobar o'sdi, eng kam pensiyaning xarid qobiliyati esa 9 karra oshdi¹.

Aholi farovonligini oʻzida yaqqol mujassam etadigan eng muhim koʻrsatkich — bu oila iste'mol budjetining hajmi va tarkibidir. Ushbu koʻrsatkich oila yalpi daromadlari hajmi va tarkibiga, iste'mol bozorining zarur tovar va xizmatlar bilan toʻldirilishi, oila daromadlarining ana shu iste'mol mahsulotlari va xizmatlarni xarid qilish imkoniyatlariga bogʻliq.

Amalga oshirilayotgan iqtisodiy islohotlarning asosiy tamoyillaridan biri sifatida Prezident Islom Karimov tomonidan chuqur asoslab berilgan kuchli ijtimoiy siyosat aholi yalpi daromadlarining oʻsishi uchun zarur shart-sharoitlar yaratdi. Mustaqillik yillarida mazkur islohotlar natijasida 1990–2010-yillar davomida Oʻzbekiston aholisining yalpi daromadlari aniq hisob-kitoblar boʻyicha 8,6 barobar oshdi. Yalpi daromadlar tarkibida shu davr mobaynida mulk daromadlari, tadbirkorlik faoliyatini amalga oshirishdan olingan daromadlar kabi yangi daromad turlari paydo boʻldi. Tabiiyki, sobiq mustabid tuzum davridagi markazlashtirilgan rejali iqtisodiyot sharoitida aholining bunday daromad manbalari shakllanishiga mutlaqo yoʻl qoʻyilmas edi. Yangi turdagi bunday daromadlar hissasiga 2012-yil soʻngida yalpi daromadlarning 51 foizi toʻgʻri keldi.

3-jadval

Mulkdan va tadbirkorlik faoliyatini amalga oshirishdan olingan daromadlarning oʻsishi

	1990-yil	2012-yil
Mulk va tadbirkorlik faoliyatidan mahsulot sotish hamda		
xizmat koʻrsatishdan olingan daromadlarning yalpi	10,6	51,0
daromaddagi ulushi		

Manba: Oʻzbekiston Respublikasi Davlat statistika qoʻmitasi (uy xoʻjaliklarini oʻrtacha oy davomida tahlil qilganda).

Yangi turdagi ushbu daromadlarning afzalligi shuki, aholining tadbirkorlik sohasida faollashuvi oila yalpi daromadlarining jadal ravishda oshib borishi uchun ragʻbatlantiruvchi bozor omillarini yaratadi, markazlashtirilgan iqtisodiyot sharoitida keng tarqalgan boqimandalik va

 $^{^1}$ *Каримов И. А.* 2012 йил Ватанимиз тараққиётини янги босқичга кўтарадиган йил бўлади. – Т., 2011. – Б. 6–14.

daromadlarning bir xilda boʻlishi darajasini pasaytiradi.

Oʻrtacha oylik ish haqi miqdorining bosqichma-bosqich oshirib borilgani oʻtish davrining dastlabki yillarida boʻlgani kabi, yalpi daromadlar tarkibidagi ulushi yanada pasayib ketishining oldini oldi. Hozirgi paytda aholining yalpi daromadlarida oylik ish haqining ulushi barqaror holat, ya'ni 30–32,1 foiz darajasida saqlab qolinmoqda. Mamlakatimizda aholi daromadlarini oshirishga qaratilgan choratadbirlarning qabul qilinishi, hayotimizda tobora hal qiluvchi kuchga aylanib borayotgan oʻrta sinfni shakllantirish imkonini berdi. Ekspertlar xulosalariga koʻra, oʻrtacha daromadga ega boʻlganlar, agar 1990-yilda aholining 18 foizini tashkil etgan boʻlsa, 2000-yilda uy xoʻjaliklarini tadqiq etish natijalariga koʻra bu koʻrsatkich 24 foizga yetgani ayon boʻldi. 2010-yilda esa 60 foiz uy xoʻjaliklari oʻrtacha darajadan kam boʻlmagan barqaror daromadga ega boʻlgan.

Yalpi iste'mol xarajatlari. Oila yalpi daromadlarining oshib borishi bilan bir vaqtda yurtimizda iste'mol mahsulotlari ishlab chiqarish hajmini oshirish va aholiga koʻrsatilayotgan xizmat turlarini kengaytirish hisobidan ushbu daromadlardan samarali foydalanishga sharoit yaratildi. Agar 1990-yilda aholi daromadlarining bor-yoʻgʻi 46–48 foizi mamlakatimizda ishlab chiqarilgan tovar resurslari bilan ta'minlangan boʻlsa, 2011-yilda bu koʻrsatkich 75 foizdan oshdi.

2010-yilda iste'mol mahsulotlarini ishlab chiqarish hajmi 1990-yilga nisbatan 6,7 barobar, aholiga pullik xizmat ko'rsatish hajmi esa 1,4 barobar o'sdi. Yuqorida qayd etilgan omillar aholi yalpi daromadlarining o'sishi bilan birga, uning pul omonatlari va jamg'arma mablag'lari barqaror o'sib borishini ham ta'minladi. Bu mablag'larning xarajatlar tarkibidagi ulushi o'sib, 1990-yildagi 11,8 foizdan 2010-yilda 15,4 foizga yetdi.

Oilalarning iste'mol xarajatlari makrotarkibi ham optimallashib bormoqda: oziq-ovqat mahsulotlari uchun xarajatlar ulushi barqarorlashib, xizmatlar uchun xarajatlar ulushi ortib bormoqda. Bunday holat iqtisodiy rivojlanib borayotgan davlatlar uchun xosdir.

Oziq-ovqat mahsulotlarini iste'mol qilish. Iste'mol xarajatlarining hajmi va tarkibi koʻp jihatdan aholining asosiy oziq-ovqat mahsulotlarini xarid qilish imkoniyatlari va mazkur mahsulotlarning narxi bilan chambarchas bogʻliq. 1990-yilda eng muhim oziq-ovqat mahsulotlarining chakana savdo tarmoqlaridagi taqchilligi aholining bu mahsulotlarni sotib olish imkoniyatlarini cheklab qoʻygan edi. 1989-yilgi statistik

ma'lumotlarga ko'ra, iste'mol bozorida aholi uchun zarur bo'lgan barcha mahsulotlarning qariyb 95 foizi bo'yicha uzilishlar bo'lib turgan va bu sobiq Ittifoq hududida kundalik asosiy oziq-ovqat mahsulotlarini aholiga kartochkalar orqali sotish tizimini joriy etishga sabab bo'lgan edi.

1989-yili respublika statistika organlari tomonidan yurtimiz aholisi o'rtasida o'tkazilgan rasmiy so'rovlarda qatnashganlarning 89,3 foizi go'sht mahsulotlarini yetarli darajada iste'mol qilmayotganini aytgan. Bu koʻrsatkichlar sut mahsulotlari boʻyicha 56,5 foizni, shakar boʻyicha 55,3 foizni, qandolat mahsulotlari boʻyicha 49,5 foizni, kartoshka boʻyicha esa 17.5 foizni¹ tashkil etgan. O'zbekistonda aholi soni 1990–2010-yillar mobaynida 38,2 foiz oshganiga qaramasdan, jon boshiga go'sht va go'sht mahsulotlari iste'mol qilish 22,6 foizga ortdi, jumladan, sut va sut mahsulotlari 30,3 foiz, tuxum 42,3 foiz, sabzavot 2,2 barobar, kartoshka 1,5 barobar, meva 3,6 barobar va shakar 1,37 barobar o'sdi. Ayni vaqtda iste'mol tarkibi ancha sifatli oziq-ovqat mahsulotlarini ko'proq iste'mol qilish hisobidan oʻzgarmoqda. Bunda uglevodlarga boy oziq-ovqatlarni (birinchi navbatda, non va non mahsulotlarini) iste'mol qilishning barqarorlashgani muhim ahamiyat kasb etmoqda. Mustaqillik yillarida aholi tomonidan iste'mol qilinayotgan oziq-ovqat mahsulotlarining soni, turi oʻnlab barobar oshdi. Agar 1990-yilda iste'mol uchun zarur boʻlgan g'allaning 82 foizi, go'sht va go'sht mahsulotlarining 50 foizi, sut mahsulotlarining qariyb 60 foizi, kartoshkaning 50 foizi, shakar, quruq sut va bolalar ozuqasi 100 foiz chetdan keltirilgan bo'lsa, hozirgi vaqtda yurtimiz ishlab chiqarishni rivojlantirish hisobidan aholining barcha asosiy iste'mol mahsulotlari bo'yicha (shakardan tashqari) ehtiyojini deyarli toʻliq ta'minlamoqda.

Nooziq-ovqat mahsulotlari iste'moli. 1990-yili respublikamizda nooziq-ovqat mahsulotlarining iste'mol bozorida o'ta taqchillik vujudga keldi. Aholining sifatli kiyim-bosh, poyafzal, uzoq muddat foydalanishga mo'ljallangan tovarlarni xarid qilishi imkoniyatlari cheklangan edi. Odamlarga mebel, gilam, muzlatgich, televizor va yengil avtomobillarni sotish ko'pincha korxonalar orqali oldindan tuzilgan ro'yxatlar asosida amalga oshirilar, bunday tovarlarni xarid qilish uchun esa bir necha yillab navbat kutishga to'gʻri kelar edi. Barcha turdagi nooziq-ovqat mahsulotlarining qariyb 88 foizi chakana savdo tarmoqlarida katta uzilishlar bilan sotilardi.

¹ Qarang: Социальное развитие СССР. – М., 1988. – С. 145.

Aholining uzoq muddatli foydalaniladigan mahsulotlar bilan ta'minlanishi (har 100 xonadonga toʻgʻri keladigan tovarlar soni)

	1990-yil	2000-yil	2010-yil
Televizorlar	90	88	132
Muzlatkich va muzxonalar	80	86	99
Konditsionerlar	9	11	18,5
Elektr changyutgichlar	29	30	37
Personal kompyuterlar	_	0,1	12
Fotoapparat va videokameralar	21	21	24
Videomagnitofon, videopleyer va DVD	1	31	64
pleyerlar			
Kir yuvish mashinalari	67	69	75
Mobil aloqa vositalari	_	18	145
Avtomobillar soni oʻrtacha har 1000 nafar	21,9	38,9	51,5
aholiga, birlikda			
Avtomobillar soni oʻrtacha har 100	11,9	20,1	27,1
xonadonga, birlikda			

Manba: Oʻzbekiston Respublikasi Iqtisodiyot vazirligi.

Aholi ehtiyojlarini ta'minlash uchun zarur bo'lgan nooziq-ovqat mahsulotlarining katta qismi respublikamizda ishlab chiqarilmas, balki chetdan keltirilar edi. Jumladan, televizorlar, kir yuvish mashinalari, gazmollarning qariyb 40 foizi, barcha turdagi oyoq kiyim va boshqa shunga o'xshash mahsulotlarning 30 foizi chetdan olib kelinardi.

yillarida yurtimizda iste'mol mahsulotlari Mustaqillik chiqarishning ancha faol o'sishi asosan 2000-yildan so'ng, mamlakatimizda ularni ishlab chiqarishni ragʻbatlantiradigan shart-sharoitlar bosqichmayaratila boshlangandan keyin kuzatildi. bosgich Hozirgi mamlakatimiz sanoati aholining sifatli mebel, gilam mahsulotlari, yengil avtomobillarga boʻlgan ehtiyojini toʻliq ta'minlay oladi. Mamlakatimizda televizorlar, konditsionerlar va ekologik xavfsiz muzlatgichlar ishlab chiqarish hajmi sezilarli darajada o'sdi. Trikotaj mahsulotlari, oyoq kiyimlar tayyorlash va yengil sanoatning boshqa tarmoqlarida ham ishlab chiqarish yuqori sur'atlar bilan rivojlanib bormoqda.

Agar 2000-yilga qadar oʻtish davrining obyektiv shart-sharoitlari

tufayli aholining asosiy nooziq-ovqat mahsulotlariga boʻlgan talabi va ta'minoti pasaygan boʻlsa, soʻnggi oʻnyillikda bu boradagi koʻrsatkichlarda barqaror oʻsish tendensiyasi kuzatilmoqda. Bu jarayonda uy xoʻjaliklari eskirgan va noqulay maishiy va elektrotexnika buyumlaridan voz kechib, yangi, zamonaviy, sifat jihatdan eski buyumlardan keskin farq qiladigan mahsulotlarni tez sotib olmoqda.

Qayd etilgan davrda mutlaqo yangi mahsulotlar paydo boʻldi. Bugun ularni xonadon egalari katta qiziqish bilan sotib olmoqda: raqamli televizor va fotoapparatlar, sun'iy yoʻldosh antennalari va mobil telefonlar, DVD pleyerlar, kompyuter va unga qoʻshimcha qurilmalar, noutbuklar va boshqa elektron texnikalar, qurilish materiallarining yangi turlari, qadoqlash buyumlari va boshqa roʻzgʻor ashyolari shular jumlasidan. Shunisi e'tiborliki, xonadonlarning zamonaviy maishiy va elektrotexnika bilan ta'minlanish sur'atlari yurtimizning barcha hududlarida bir maromda, mutanosib tarzda oʻsib bormoqda.

Tadqiqot natijalariga koʻra, uzoq muddat foydalanishga moʻljallangan buyumlar bilan ta'minlanish boʻyicha mamlakatimizda yuksak darajaga erishilgan. Buni har 100 xonadonga 132 ta televizor, 99 ta sovutgich, 64 ta DVD pleyer, 145 ta mobil telefon toʻgʻri kelishi tasdiqlaydi. 1990-yilda oʻnta oiladan bor-yoʻgʻi bittasi shaxsiy avtomobilga ega boʻlgan boʻlsa, 2012-yilga kelib har uchta oilaning bittasida avtomobil mavjudligi aholi farovonligi va moddiy ta'minlangani oshib borayotganini koʻrsatadi.

Aholining xarid qobiliyati, ya'ni uning oylik maosh va pensiya hisobidan eng zarur iste'mol mahsulotlarini sotib olish va xizmatlardan foydalanish imkoniyatlari aholining iste'mol tovarlariga bo'lgan talab va ehtiyojlarining ta'minlanishi sezilarli darajada yaxshilanib borayotganini aks ettiradi. O'rtacha oylik maosh xarid qobiliyatining o'sish dinamikasi, minimal iste'mol savati bilan qiyoslaganda, hozirgi paytda 7,2 barobar oshdi.

Modernizatsiya strategiyasi iqtisodiyotimizni yaqin yillar ichida yanada barqaror, oʻziga baquvvat, jahon va mintaqaviy bozorlarda raqobatdosh boʻlmogʻi uchun iqtisodiyotimizni tarkibiy oʻzgartirish va diversifikatsiya qilish natijasida aholining mustaqillik yillarida yuksalib borayotgan ehtiyojlarini qondirish pirovard natijada xalqimiz farovonligini yanada yuksaltirishga xizmat qilmoqda. Bu oʻrinda mamlakatimiz va mintaqamizdagi mavjud sharoitdan kelib chiqqan holda, gazni qayta ishlash, neft-kimyo, energetika, avtomobilsozlik, elektrotexnika sanoat-

lari, mashinasozlik, farmatsevtika kabi zamonaviy sohalar, ishlab chiqarish tarmoqlarini va albatta, axborot texnologiyalari va telekommunikatsiya tizimlarini jadal rivojlantirishga alohida ahamiyat berilmoqda, yaqin kelajakda raqamli va keng oʻlchamli televideniyega oʻtish rejalashtirilgan.

Shular qatorida birinchi navbatda yengil, toʻqimachilik va oziq-ovqat sanoatida paxta tolasi, boshqa qishloq xoʻjaligi mahsulotlari va xom ashyo resurslarini chuqur qayta ishlash boʻyicha ishlab chiqarishni, qurilish materiallari sanoatini yanada rivojlantirish, sifatli va barqaror talabga ega boʻlgan tayyor mahsulotlar tayyorlaydigan korxonalar tashkil etishga alohida e'tibor qaratilmoqda. Yuqoridagilarning barchasi mamlakatimizda iqtisodiy oʻsishni ta'minlash orqali aholining ommaviy farovonligini ta'minlashga xizmat qiladi. Ma'lumki, farovonlik ta'minlangan joyda tinchlik osoyishtalikka zamin tayyorlanadi. Oʻrtacha mulkdorlar sinfiga oid qatlam miqdori koʻpayadi, ijtimoiy zoʻriqishning oldi olinadi. Ishsizlar soni minimal darajaga tushiriladi va bu jinoyatchilikning kamayishiga olib keladi. Oqibatda huquqni muhofaza qiluvchi organlar xodimlarining xizmat yuki kamayadi.

Tayanch tushunchalar:

Talab, individual va bozor talabi, talab qonuni, talabning elastikligi, tovarning qadr-qimmati, marginal naflilik qonuni, individual va bozor taklifi, taklifning elastikligi, bozor muvozanati, kechiktirilgan talab, ehtiyoj.

Savol va topshiriqlar:

- 1. Ehtiyoj bilan talabning farqi bormi?
- 2. Ehtiyojning oʻz vaqtida qondirilmasligi qanday ijtimoiy-iqtisodiy oqibatlarga olib kelishini aytib bering.
 - 3. Iqtisodiy resurslarga talab va taklifning xususiyatlari qanday?
 - 4. Vahima talabning kelib chiqishi va oqibatlarini tushuntiring.
 - 5. Bozordagi muvozanat qanday tavsiflanadi?
 - 6. Individual talab va bozor talabining farqini tushuntiring.
 - 7. Daromadlarning talab va taklifga ta'siri qanday kechadi?
 - 8. Ehtiyoj qachon talabga aylanadi?
- 9. Soliq ortishi yoki kamayishining taklifga qanday ta'sir etishini sharhlang.
 - 10. Jahon bozorlarida qaysi resurslarga talab ortmoqda?

- 11. Talabning narxga bogʻliqligini tushuntiring.
- 12. Daromadning ortishi past toifadagi tovarlar talabini oʻzgartirishini sharhlab bering.
 - 14. Talabning harakati va xarakteri jihatidan qanday turlari bor?
- 15. Taklifning oʻzgarib turishi qanday omillar ta'sirida sodir boʻlishini tushuntirib bering.
 - 16. Soliqlarning ortishi yoki kamayishi taklifga qanday ta'sir oʻtkazadi?
 - 17. Qanday resurslarga jahon bozorida talab ortib borayotganini izohlang.

Mavzuni chuqur o'rganish instrumentariysi

Qisqa muddatli muvozanat – tarmoqda firmalar soni oʻzgarmay qolgan sharoitda tovarlar taklifi oʻsib boradigan muvozanat.

Oniy muvozanat – tovarlar taklifi oʻzgarmay qoladigan muvozanat.

Bozor muvozanati mexanizmi – talab va taklif hajmi muvozanatda boʻlgan sharoitda obyektiv bozor bahosi oʻrnatilishiga olib keladigan iste'molchilar va ishlab chiqaruvchilar raqobatining mexanizmi; talab va taklifning belgilangan (statik) darajalarida bozor bahosi shakllanishining mexanizmi.

Normal uzoq muddatli muvozanat – tarmoqda firmalar soni koʻpayishi va ishlab chiqarishning foydalanilayotgan omillari hajmining ortishi evaziga taklifning oʻsishi natijasida qaror topadigan muvozanat.

Taklif qoidasi – ne'mat bahosi bilan uning taklifi kattaligi o'rtasidagi bevosita aloqa.

Talab qoidasi – ne'mat bahosi va talab kattaligi o'rtasidagi teskari aloqa.

Talab va taklif qoidasi – bozor bahosini shakllantirish orqali iste'molchilar va ishlab chiqaruvchilar manfaati muvozanatlashuvining obyektiv va qonuniy xususiyatini aks ettiruvchi qoida.

Taklif – iqtisodiy subyektning bozorga muayyan miqdordagi ne'matlarni ishlab chiqarish va muayyan bahoda yetkazib berish istagi va imkoniyati.

Bozor bahosi – talab va taklif hajmi teng boʻladigan va iste'molchilar ishlab chiqaruvchilar sotishni istagan miqdordagi tovar va xizmatlarni sotib olishi mumkin boʻladigan narx.

Bozor mexanizmi – talab va taklifning dinamik oʻzaro ta'siri mexanizmi.

Talab – iqtisodiy subyektning muayyan miqdordagi ne'matlarni muayyan bozor bahosida sotib olish istagi va imkoniyati. Talab – bu shunchaki ehtiyoj emas, balki toʻlovga qobil, pul bilan ta'minlangan ehtiyojdir.

Vahima talab – bozordagi shov-shuvga vahima ta'siri ostida sun'iy paydo bo'ladigan va shiddat bilan ortib boradigan talabdir. Vahima talab odatdagi me'yordagi talabga nisbatan ortiq talab hisoblanadi. Bunday talab, *bir tomondan*, aholi orasida mish-mishlar tarqatish va reklama vositasida muayyan

tovarga oʻta yuqori baho berish orqali iste'molchi ruhiyatiga ta'sir etish yoʻli bilan, *ikkinchi tomondan*, tovarlarga boʻlgan gʻoyat katta qiziqish, qimmatchilik va qahatchilik xavfi, pul almashish ehtimoli, har xil shov-shuvlar ta'sirida puldan tezroq qutulish va tovar zaxirasini koʻpaytirishga intilish oqibatida yuzaga keladi. Vahima talabni savdo ahli har xil mish-mishlar tarqatish orqali ham yuzaga keltiradi. Vahima talabning paydo boʻlishi bozor narxini koʻtarib yuboradi, tovarlar talashib olinadi, tovar talabi, taqchilligi gʻoyat kuchayib ketadi. Vahima talab iqtisodda uchrab turadigan hodisa. Lekin u oʻtkinchi tusga ega boʻlib, uzoq davom eta olmaydi. Vahima talab tartibsizliklarni keltirib chiqarishga olib kelishi mumkin.

Daromad effekti – bahoning iste'molchi boyligi yoki real daromadining darajasi bilan aloqadorligini ifodalovchi effekt.

Oʻrnini bosish effekti – tovarlarning nisbiy bahosi bilan iste'molchi talabining hajmi.

Mavzu yuzasidan asosiy xulosalar:

- 1. Talab xaridorlarning bozordagi tovarlarni muayyan narxda xarid etishga shay boʻlishlaridir. Talab asosida ehtiyoj yotadi, lekin buni bozorda talabga aylanishi uchun xaridorning tovarlarni sotib olishga puli yetarli boʻlishi kerak. Aks holda ehtiyoj talab hosil etmaydi. Ayrim xaridorning talabi individual talab boʻlsa, jami xaridorlarning talabi bozor talabi boʻladi.
- 2. Talabga ta'sir etuvchi omillar uch guruhga ajraladi: a) narxlar. Bu muayyan paytdagi aniq bir tovar narxi, oʻrinbosar tovarlar narxi va oʻzgarishi kutiladigan narxlar. Bular talabni oshirishi yoki qisqartirishi mumkin; b) xaridorning pul daromadi yoki xarid qurbi. Narx oʻzgarmagan holda daromad oshsa, talab koʻpayadi, aksi boʻlsa talab kamayadi; c) xaridorning qaysi tovarni afzal koʻrishi, bu uning didiga va xohishiga bogʻliq. Narx va daromadni xaridor oʻz bilganicha oʻzgartira olmaydi, lekin ularni nazarda tutgan holda xaridor oʻzi afzal koʻrgan tovarga talab bildiradi.
- 3. Talab qonuni bozor qonuni. Unga binoan tovarlarga talab ularning narxiga nisbatan teskari mutanosiblikda boʻladi. Bu qonunning naqadar amal qilishini talabning narxiga bogʻliq elastikligi, ya'ni narx oʻzgarishiga javoban talabning qanday darajada oʻzgarishi ifoda etadi. Bozorga elastik talab xos boʻladi, bunda narx oʻzgarishiga nisbatan talab koʻproq oʻzgaradi.
- 4. Narxdan tashqari talabga xaridor daromadlari ham ta'sir etadi, biroq buni talab qonuni ifoda etmaydi. Daromadning talabga ta'siri uning samarasi boʻladi. Narx oʻzgarmagan sharoitda talab daromadga nisbatan toʻgʻri mutanosiblikda boʻladi. Talabning daromadga bogʻliq elastikligi ham borki, bunda talab daromaddan jadalroq oʻzgaradi.

- 5. Talabni tovarning qadr-qiymati ham belgilaydi, bu esa tovar nafliligining uning narxiga nisbatan qiyoslanishidir. Naflilik tovarning ehtiyojni qondira olish xususiyati boʻlib, buni xaridorlar subyektiv baholaydilar. Shunga koʻra tovarni afzal koʻrish paydo boʻladiki, bu ham talabni yuzaga chiqaradi. Iqtisodiyotda marginal (cheklangan) naflilik qonuni amal qiladi, unga binoan bozordagi talab qondirilgan sari soʻnggi qoʻshimcha tovarlar nafliligi pasayib boradi. Naflilikning pasayishi talabni qisqartiradi, bozor talabiga javob berish uchun nafliligi yuqori tovarlarni ishlab chiqarishga oʻtish zarur boʻladi.
- 6. Talabga taklif peshvoz chiqadi. Tovarlar taklifi bu muayyan narx amal qilganda tovarni sotish uchun bozorga qoʻyilishidir. Muayyan tovarni ayrim ishlab chiqaruvchining taklif etishi bu individual taklifdir. Ana shunday tovarni barcha ishlab chiqaruvchilar taklif etishi bozor taklifi hisoblanadi.
- 7. Bozorda taklif qonuni ham amal qiladi, unga binoan taklif narxga nisbatan toʻgʻri mutanosiblikda boʻladi. Mazkur qonunning amal qilishini taklif elastikligi, ya'ni taklifning narxga javoban naqadar oʻzgarishi bildiradi. Bozorga elastik taklif xos boʻladi, bu taklifning narxga nisbatan tezroq oʻzgarishini bildiradi.
- 8. Taklifga sotishga qoʻyilgan tovarlar narxidan tashqari boshqa omillar ham ta'sir etadi, lekin buni taklif qonuni taqozo etmaydi. Bular jumlasiga resurslar narxi, ishlab chiqarish texnologiyasi, davlat ishlab chiqaruvchilardan oladigan soliq va ularga beradigan subsidiyalar (yordam puli), narxlarning oʻzgarish ehtimoli, oʻzga tovarlar narxi, qoʻshimcha resurslar va ishlab chiqarish quvvatlarining boʻlish yoki boʻlmasligi kiradi. Mazkur omillar taklifga turli yoʻnalishda va har xil kuch bilan ta'sir etadi va shunga bogʻliq holda taklif oʻzgaradi.
- 9. Ehtiyojlarning oʻz vaqtida qondirilmasligi iste'molchilarni stress (tushkunlik)ga soladi. Oqibatda salbiy hodisalar (oʻgʻrilik, bosqinchilik kabi jinoyatlar) kelib chiqishiga sabab boʻladi.

10- MAVZU. BOZOR TIZIMIDA RAQOBAT

1. Raqobat va uning iqtisodiy mazmuni

Raqobat bozor mexanizmida muhim oʻrinni egallaydi. Bozor mexanizmi ishlab chiqaruvchilarni yangilikka undaydi, ishlab chiqarishni modernizatsiya qilishni talab qiladi. Moddiy resurslar mehnat resurslari insonlarning yuksalib borayotgan ehtiyojlarini qondirish maqsadida tovar va xizmatlarni yaratuvchi sohalarga yoʻnaltiradi.

Raqobat qonuni ham ishlab chiqarishni ragʻbatlantiradi. Global dunyoda raqobatda yutqazmaslik uchun ishlab chiqaruvchilar doimo yangilikni joriy etib boradilar, ular yangi texnologiyani kiritadilar, yangidan-yangi tovarlarni ishlab chiqarib, bozorga taklif etish yoʻliga oʻtadilar.

Raqobat (lotincha «sopsiggege» – qarama-qarshi, musobaqalashmoq ma'nolarida) – iqtisodiy faoliyat ishtirokchilarining oʻz manfaatlaridan kelib chiqib, muayyan maqsadlarga erishish uchun bitta bozorda faoliyat koʻrsatayotgan bir necha kompaniyalarning (xoʻjalik subyektlarining) kurashidir.

Tovar va moliya bozorlari tarkibiga ta'sir koʻrsatuvchi davlat siyosati dastaklari orasida monopoliyaga qarshi raqobat siyosatini alohida ajratish mumkin. Raqobat bozor iqtisodiyoti va umumtovar xoʻjaligining eng muhim belgisini rivojlantirish usuli hisoblanadi. Prezident Islom Karimov raqobatni bozor iqtisodiyotidagi oʻrnini: «Raqobat boʻlmasa, bozor iqtisodiyotini barpo etib boʻlmaydi. Raqobat – bozorning asosiy sharti, aytish mumkinki, uning qonunidir»¹, – deb ta'kidlaydi. Raqobatsiz iqtisodiy taraqqiyot yoʻq, binobarin, farovonlikni ham oshirib boʻlmaydi. Qayerda raqobat soʻnsa, shu yerda iqtisodiy turgʻunlik, retsessiya, hatto tanglik vaziyati paydo boʻladi, demak, farovonlikka erishish qiyinlashadi.

Raqobat iqtisodiy faoliyat ishtirokchilarining oʻz manfaatlarini toʻlaroq yuzaga chiqarish, ya'ni yaxshi daromad topish, oʻz mavqeini mustahkamlash, oʻz qobiliyatini namoyish etish, oʻz obroʻsiga ega boʻlishdir. Raqobatning iqtisodiy mazmunini tushunib olish unga turli tomondan yondashishni talab qiladi. Mustaqil tovar ishlab chiqaruvchilar (korxonalar) oʻrtasidagi raqobat tovarlarni qulay sharoitda ishlab chiqarish va yaxshi foyda keltiradigan narxda sotish, umuman iqtisodiyotda oʻz mavqeini mustahkamlash uchun kurashdan iborat.

Resurslarni yetkazib beruvchilar oʻzlarining resurslarini (kapital, yersuv, ish kuchi) yuqori baholarda sotish uchun raqobat qiladilar. Ishlab chiqaruvchilar va resurslarni yetkazib beruvchilar oʻrtasidagi raqobat bozor munosabatlari rivojlangan, iqtisodiyot toʻliq erkinlashgan sharoitda yorqin namoyon boʻladi. Raqobat iste'molchilar oʻrtasida ham yuz beradi, ular tovarlarni qulay va arzon baholarda sotib olishga harakat qiladilar, ya'ni xaridor har bir sarflangan pul birligi evaziga koʻproq foydaga ega boʻlishga harakat qiladi. Arzon va sifatli tovarni sotib olish uchun kurashadi.

¹ Каримов И. А. Ўзбекистон XXI асрга интилмокда. – Т., 2000. – Б. 34.

Raqobat — bozor subyektlari iqtisodiy manfaatlarining toʻqnashi-shidan iborat boʻlib, ular oʻrtasidagi yuqori foyda va koʻproq nafga ega boʻlish uchun kurashni anglatadi. Bunda ishlab chiqaruvchilar oʻrtasida sarflangan xarajatlarning har bir birligi evaziga koʻproq foyda olish uchun kurash boradi. Mana shuning orqasidan quvish natijasida tovarlarni sotish doiralari, ya'ni qulay bozorlar, arzon xom ashyo va arzon ish kuchi manbalari uchun ular orasida kurash boradi.

Raqobat strategiyasi raqobat kurashining uzoq muddatga moʻljallangan bosh yoʻli va yoʻl-yoʻriqlarini ifoda etadi. Strategiyaning maqsadlari tez kunda foydani maksimallashtirish, oz foyda bilan qanoat qilgan holda oʻz bozorini kengaytirish yoki raqibni bozordan siqib chiqarish, yangi bozorga asta-sekin kirib borish kabi masalalarda harakat yoʻllarini belgilashdan iborat.

Raqobat – umumijtimoiy kategoriya boʻlib, ijtimoiy jarayonlar qatnashchilari oʻrtasidagi yaxshiroq yashash sharoiti uchun boʻladigan kurashni anglatadi. Iqtisodiy sohadagi raqobat esa ishlab chiqarish munosabatlarining subyektlari (ishlab chiqaruvchilar, iste'molchilar, tadbirkorlar va hokazo) oʻrtasida qulayroq ishlab chiqarish sharoitiga ega boʻlish unumliroq texnologiya, ish joyi, yaxshi bozorni qoʻlga olish, umuman yuqori daromad olish imkoniyati uchun kurashdan iborat.

Bozor iqtisodiyotining ilk belgilari paydo boʻlishi bilan unga xos raqobat ham yuzaga keladi. Bunday raqobat tarixan toʻrt bosqichdan oʻtadi.

Birinchi bosqich – raqobat mayda tovar ishlab chiqaruvchilar oʻrtasida boradi, bunda gʻolib chiqish tajriba toʻplab mehnat mahoratini oshirish boʻladi. Raqobat kichkina mahalliy bozorlarda namoyon boʻladi.

Ikkinchi bosqich – bu kapitalistik erkin raqobat bosqichidir. Bunda raqobatda cheklash boʻlmaydi, shiddatli kurash boradi. Raqobatda gʻolib chiqishning sharti mehnat unumdorligini oshirish, yangi texnologiya asosida yangi xildagi bozorbop tovarlarni ishlab chiqish boʻladi.

Uchinchi bosqich – u monopol raqobat bosqichi boʻlib, yirik korxonalarning yakkahokimlikka intiluvchi kurashidir.

Toʻrtinchi bosqich – yangicha erkin raqobat bosqichi boʻlib, u aralash iqtisodiyotga xosdir. Raqobat doirasi kengayib, u faqat ishlab chiqaruvchilar emas, xizmat sohalari oʻrtasida ham namoyon boʻladi. Raqobat – yangicha harakat qilish jarayoni va yangi muvozanatga erishishni bildirib, raqobatchilarning nisbiy ustunlik va yuqori mavqeiga erishishi uchun olib boradigan kurashidan iborat. Bunday kurash muqarrar

ravishda obyektiv shartlar asosida tugʻiladi va turlicha koʻrinishlarda namoyon boʻladi. Bozorda xoʻjalik subyektlari resurslarni arzon sotib olish, oʻz tovar va xizmatlarini esa qimmatroq sotish, shu asosda koʻproq foyda olishga intilsalar, ishchi va xizmatchilar koʻproq mehnat haqi olishni istaydilar. Iste'molchilar esa bozorda tovar va xizmatlarni arzonroq narxlarda sotib olishga harakat qiladi.

Bozor iqtisodiyoti tizimida raqobat iqtisodiy resurslarni tejamli ishlatish, tovar va xizmatlarni sifatli, yuqori texnologiyalar asosida va eng optimal miqdorda ishlab chiqarishga undaydi. Bunda, albatta, ishlab chiqaruvchi yoki xizmat koʻrsatuvchining marketing rejalari katta ahamiyat kasb etadi. Bu esa, oʻz navbatida, fan-texnika yutuqlarini ishlab chiqarishga joriy qilishni va innovatsion yutuqlarni tezlashtirishni talab qiladi. Natijada, raqobat iqtisodiy barqarorlikni ta'minlaydi. Shu ma'noda, raqobat bozor iqtisodiyotining harakatlantiruvchi kuchi hisoblanadi. Demak, bozor va raqobat bir-biri bilan oʻzaro bogʻliq bozor munosabatlari paydo boʻlishi bilan raqobat ham vujudga keladi, binobarin, uning rivojlanishiga qarab raqobat ham takomillashib boradi.

Raqobat bozor mexanizmining yetakchi vositasi sifatida iqtisodiyot ishtirokchilarini faollikka undayli, chunki faqat shu yoʻl bilan raqobatda raqobatlashuv chiqish mumkin. Narx bilan kamaytirishga olib keladi. Sifat bilan raqobatlashuv eski, nafliligi pasayib borayotgan tovarlarni, yangi, nafliligi yuqori tovarlar bilan almashtirishni ta'minlaydi. Ish joyi uchun raqobat kishilarni o'z bilimi, malaka va ish mahoratini doimo oshirib borishga undaydi, ishlab turgan joyini qadrlash, bu yerdagi ish sifati va mehnat unumdorligini oshirib borishga undaydi, ishlab turgan joyini qadrlash, bu yerdagi ish sifati va mehnat unumdorligini oshirib borishiga ragʻbat beradi. Raqobat iqtisodiy tanlovga kuch berib, uquvsiz va ishyoqmaslarni bankrot holiga tushirib biznesdan siqib chiqaradi, biznesni haqiqiy ishbilarmon, yangilikka moyil boʻlganlar qoʻliga beradi.

Respublikamiz mustaqillikka erishgach, uning oldidagi muhim strategik masalalardan biri sifatida barqaror va sogʻlom iqtisodiyotni shakllantirish vazifasi turar edi. Zero, barqaror iqtisodiyotni shakllantirmay turib, aholi farovonligi va turmush darajasini yuksaltirib, barqaror iqtisodiy oʻsish sur'atlariga erishib boʻlmaydi.

Oʻzbekistonda davlatning iqtisodiyotni monopoliyadan chiqarish va raqobatchilik muhitini shakllantirishga qaratilgan siyosatida xususiylashtirish, davlat mulki hisobidan mulkchilikning boshqa shakllarini vujudga keltirish asosiy oʻrin tutadi. Xususiylashtirish natijasida, birinchidan, mulk oʻz egalari qoʻliga topshirilsa, ikkinchidan, koʻp ukladli iqtisodiyot, ya'ni kichik va oʻrta biznesni rivojlantirgan holda korxonalar oʻrtasida haqiqiy raqobatchilik muhiti vujudga keltiriladi. Mamlakatimizda xususiylashtirishning huquqiy asoslari yaratilganligi, rasmiy xususiylashtirishdan real xususiylashtirish sari amaliy qadamlar qoʻyilganligi bugungi kunda xoʻjalik yurituvchi subyektlar oʻrtasida raqobatchilik muhiti yaratilganidan dalolatdir.

Xususiylashtirish jarayonining boshqa muhim, ajralmas qismi real raqobatli muhitning, tovar, xom ashyo va kapital bozorlarining shakllanishidir. Faqat real raqobat mavjud boʻlganda, bozor mexanizmlari toʻliq va samarali ravishda ishlab ketishi mumkin.

Mustaqillikning ilk yillaridan boshlab respublikamizda ijtimoiy yoʻnaltirilgan bozor iqtisodiyotiga oʻtishning ilmiy asoslangan yoʻli ishlab chiqildi va unga tayangan holda iqtisodiy islohotlar amalga oshirila boshlandi. Mazkur iqtisodiy islohotlarning ikkinchi bosqichida qoʻlga kiritilishi lozim boʻlgan natijalardan biri – ragʻbatlantiruvchi raqobatchilik muhitini vujudga keltirishdan iboratligi koʻrsatib berildi. Prezidentimiz ta'kidlaganidek, mulkchilik shakllari turlicha boʻlgan korxonalar oʻrtasidagi raqobatchilik kurashi ularni ishlab chiqarishni boshqarishning ichki tashkiliy tizimlarini takomillashtirishga, zamonaviy texnika bilan qayta qurollantirishga, fan va texnika sohasidagi yangi yutuqlarni qoʻllashga moyil boʻlishga, kam sarf-xarajat qilgan holda yanada yuqori sifatli va arzon narxda mahsulot ishlab chiqarishga undaydi. Pirovard natijada bu iqtisodiy va ilmiy-texnikaviy taraqqiyotning qudratli vositasi boʻlib xizmat qiladi.

Davlat ishlarida samarali raqobat siyosati amalga oshirilishi oqibatida tovarlar va xizmatlar bozorlarida monopoliyalashtirish darajasi sezilarli ravishda pasaydi. Erishilgan natijalar asosan tovarlar va xizmatlar bozorida erkin raqobatlashadigan yangi xoʻjalik yurituvchi subyektlar va tadbirkorlik subyektlari tashkil etish uchun qulay shart-sharoitlar yaratilishida namoyon boʻldi. Pirovardida bu sogʻlom raqobat muhitini shakllantirdi. Ayniqsa, iste'mol bozorida monopol korxonalar soni sezilarli darajada qisqarmoqda. Bu kichik biznes va xususiy tadbirkorlikning dinamik rivojlanayotganidan dalolat beradi. Saqlanib qolgan monopollashgan bozorlarda, bozor subyektlari va monopoliyaga qarshi qonunlarni buzuvchi subyekt tuzilmalarining harakatlari sezilarli ravishda oʻzgardi.

Respublika iqtisodiyotida yuz berayotgan ijobiy oʻzgarishlar va huquqiy himoya tizimini takomillashtirish yuzasidan bir qancha yangi qonun hujjatlari qabul qilinishi, tadbirkorlik subyektlarining moliyaviy javobgarligini erkinlashtirish, nazorat funksiyalarini bajarish tizimini takomillashtirish va yanada qisqartirish uchun dasturilamal boʻlib xizmat qilmoqda. Hukumatimiz tomonidan keyingi yillarda xususiy biznes, ya'ni tadbirkorlikni qoʻllab-quvvatlash boʻyicha bir qator me'yoriy hujjatlar ishlab chiqildi va ularni amaliyotga tatbiq etish boʻyicha tinimsiz ish olib borilmoqda. Oʻzbekiston Respublikasi Prezidentining 2009-yil 15-maydagi «Tadbirkorlik faoliyatini yanada qoʻllab-quvvatlash va rivojlantirish chora-tadbirlari toʻgʻrisida»gi qaroriga asosan tadbirkorlik subyektlariga imtiyozlar yaratildi. Bu esa tovar bozorlarida tadbirkorlik subyektlari ishtirokini ragʻbatlantirib, pirovard natijada sogʻlom raqobat muhitini yaratishda muhim ahamiyat kasb etadi.

Binobarin, respublikamizda bozor munosabatlari tizimida sogʻlom raqobat muhitini shakllantirish, rivojlantirish va asosan yaratilgan raqobat muhitini himoyalash bugungi kunning dolzarb vazifalaridan biri hisoblanmoqda.

2. Raqobat turlari

Raqobat qaysi bosqichda sodir boʻlishidan qat'i nazar, uning ikki turi mavjud:

- yovvoyi raqobat (tartibsiz);
- tartibga solinuvchi sogʻlom raqobat.

Raqobat iqtisodiy oʻsishni ta'minlaydi, bu esa oʻz navbatida raqobat doirasini kengaytiradi. Raqobat bozorning hamma turlarida amal qiladi.

Tadbirkorlar tovar bozorida sotuvchi, resurslar bozorida xaridor sifatida raqobatda boʻlishadi.

Raqobat kurashida oʻz muxolifining bozordagi mavqesini bilish muhimdir. Shu sababli raqobatga tayyorlanish tadbirkorlikning strategiyasida muhim oʻrin tutadi. Bozor tizimida raqobatning *mukammal* va *nomukammaldan* iborat asosiy turi mavjud.

Mukammal yoki *sof raqobat* shundan iboratki, unda koʻpchilik qatnashadi. Erkin raqobatli bozorda sotuvchilar va xaridorlar koʻpchilik boʻlib, ulardan hech biri monopol mavqega ega boʻlmaydi, bozorda zoʻravonlik qilib, oʻz izmini yurgiza olmaydi.

Nomukammal raqobat, cheklangan raqobat tabiatan *monopol raqobatdir*. Bunda koʻpchilik boʻlmagan, lekin tovarlarning katta qismini taklif etuvchi yoki sotib oluvchi firmalar raqobatlashadi.

Sof monopol sharoitida hukmron firmalar resurs bozorida xaridor sifatida bellashadilar. Ular sifatli va arzon resurslarni qoʻlga kiritish, malakali ish kuchini sotib olish uchun kurashadilar.

Erkin raqobat ikki darajada namoyon boʻladi: **tarmoq ichida**, ya'ni bir xil tovar ishlab chiqaruvchi korxonalar oʻrtasidagi raqobat va **tarmoqlararo**, ya'ni turli tarmoqlardagi korxonalar oʻrtasidagi raqobat.

Tarmoq ichidagi raqobat tovarlarning ijtimoiy qiymatini, boshqacha aytganda, bozor qiymatini aniqlaydi va belgilaydi. Bu qiymat odatda oʻrtacha sharoitda ishlab chiqarilgan va muayyan tarmoq tovarlarning anchagina qismini tashkil etadigan tovarlarning qiymatiga mos keladi. Tarmoq ichidagi raqobat natijasida texnikaviy darajasi va mehnat unumdorligi yuqori boʻlgan korxonalar qoʻshimcha foyda oladilar va aksincha, texnik jihatdan nochor korxonalar esa, oʻzlarida ishlab chiqarilgan tovar qiymatining bir qismini yoʻqotadilar va zarar koʻradilar.

Tarmoqlararo raqobat turli tarmoqlar korxonalari oʻrtasida eng yuqori foyda normasi uchun olib borilayotgan kurashdir. Bunday raqobat foyda normasi kam boʻlgan tarmoqlardan foyda normasi yuqori tarmoqlararo kapitallarining oqib oʻtishiga sabab boʻladi.

Iqtisodiy saralanish oqibatida korxonalarning bir qismi gʻoyat yirik korxonalarga aylanib, monopol mavqeni egallaydi. Ular til biriktirib, erkin narxlar oʻrniga monopol narxlarni belgilaydi. Oʻzbekiston Respublikasida bu borada monopoliyaga qarshi kurash siyosati olib borilmoqda. Bular:

- 1) monopoliyalashuvga yoʻl bermay monopol faoliyatni jilovlash toʻgʻrisida qonunlar qabul qilish;
- 2) sherikchilik asosidagi tadbirkorlikda bir korxona mulkining boshqasiga oʻtishini cheklash;
- 3) bozorda narx-navoning erkin tashkil topishi uchun oldindan kelishib narx belgilashni qonun yoʻli bilan tartibga solish;
- 4) davlatning raqobatning qonun-qoidalarini yaratib, uni buzganlik uchun jazo belgilashi;
- 5) monopol hukmronlikka yoʻl bermaslik uchun tovarlarni mamlakatga kiritishni koʻpaytirish maqsadida boj toʻlovlarini kamaytirish kabilar.

G'ayriqonuniy raqobat ham mavjud:

- 1) raqib haqida notoʻgʻri va noaniq ma'lumotlar tarqatish;
- 2) mahsulotning sifati, ishlab chiqargan joyi xususida iste'molchini aldash;
 - 3) raqibning mahsulot belgisi nomidan notoʻgʻri foydalanish;
 - 4) past sifatli mahsulotlarni reklama qilish;

5) raqib mahsulotlarining sifati toʻgʻrisida asossiz ma'lumotlar tarqatish.

3. Raqobat muhiti va strategiyasi

Oʻzbekistonda raqobatchilik muhitini yuzaga keltirish va amal qilishi uchun ma'lum shart-sharoitlar mavjud boʻlishini taqozo qiladi. Bu shart-sharoitlar faqat bozor iqtisodiyoti munosabatlari qaror topgan muhitda yuzaga kelishi mumkin. Shunday ekan, bozor iqtisodiyotini yuzaga keltirish ayni vaqtda raqobatchilik muhitining shakllanishini bildiradi.

Ijtimoiy-iqtisodiy islohotlarni bosqichma-bosqich amalga oshirish jarayonida bozor infratuzilmasini shakllantirish va rivojlantirish, raqobat muhitini yuzaga keltirish va uni rivojlantirish zaruriyati tugʻiladi. Ushbu masala 1996-yil 27-dekabrda qabul qilingan «Tovarlar bozorlaridagi monopolistik faoliyatni tiklash va raqobat toʻgʻrisida»gi yangi qonunda oʻz aksini topgan edi.

Ushbu qonun asosan ikkita maqsadni koʻzda tutadi. *Birinchisi* — mavjud va saqlanib qolayotgan monopol korxonalar tomonidan bozordagi hukmronlik mavqeini suiiste'mol qilishlariga yoʻl qoʻymaslik va buning oldini olishni koʻzlovchi avvalgi qabul qilingan korxonalardan tubdan farq qiluvchi yangi monopoliyaga qarshi tartibni ishga solish. *Ikkinchisi* — yanada muhimrogʻi — bu monopoliyadan chiqarish va sogʻlom sof raqobat muhitini yaratishdir.

Raqobat muhitining shakllanishiga xususiylashtirish jarayoni samarali ta'sir qilishi uchun, bu tadbir katta korxonalarni raqobatga qodir alohida tizimlarga boʻlish orqali monopoliyadan chiqarish bilan qamrab olib borilishi kerak. Xususiy tadbirkorlik, kichik va oʻrta biznes raqobatni rivojlantirish omili, tadbirkorlarning mavjudligi esa, bozor rivojlanishining asosiy shart-sharoitlaridan biri hisoblanadi.

Ayrim tarmoqlarda iqtisodiyotning monopollashuvi asossiz ravishda yuqori darajada saqlanib qolayotgani ishlab chiqarish hajmining oʻsishiga, mahsulot sifati va raqobatbardoshligining ortishiga, narxlarning pasayishiga hamon toʻsqinlik qilayotgani doimo Prezidentning diqqat markazida boʻlib kelmoqda. Jumladan, sement, shifer, polietilen, yengil va yogʻ-moy sanoati mahsulotlari va boshqa qator tovarlarga boʻlgan ehtiyojni qondirish imkoniyati nisbatan cheklangan holda saqlanib qolayotgani davlatimiz rahbari tomonidan tanqid qilingani barchamizga ma'lum. Bu esa ana shu mahsulotlarga konyunktura talablari oshib ketgan

paytda monopolist korxonalarga oʻz mahsulotining narxini asossiz ravishda oshirish uchun qoʻl kelmoqda.

Davlatimiz rahbari Islom Karimov 2007-yilning fevralida Davlat monopoliyadan chiqarish qoʻmitasi, Iqtisodiyot, Moliya va Adliya vazirliklari, Davlat soliq va Davlat bojxona qoʻmitalari, Savdo-sanoat palatasi boshqa manfaatdor vazirlik va idoralar bilan birga ana shu masalalarga doir ishlarning ahvolini oʻrganib chiqishlari, bir oy muddatda Vazirlar Mahkamasiga bozorning barcha ishtirokchilari uchun teng raqobat sharoitini ta'minlash borasida tegishli takliflar kiritishlari toʻgʻrisida koʻrsatma bergani iqtisodiyot rivojining bugungi bosqichida monopolizm koʻrinishlariga qarshi kurash va amalda raqobat muhitini shakllantirishning gʻoyat muhimligidan dalolat beradi.

Iqtisodiyotda monopollashuv prinsiplarining kuchayib borishi raqobatni cheklaydi. Shu sababli raqobatchilik muhitini vujudga keltirishda davlat ham qatnashadi. Bu esa, davlatning monopoliyaga qarshi raqobatni rivojlantirish siyosatida oʻz aksini topadi. Har bir davlat oʻz iqtisodiyotini rivojlantirishda aniq vaziyatni, iqtisodiyotning monopollashuv darajasi, uning miqyosi va xarakterli holati, bu siyosat erkin raqobat muhitini yangidan yaratish hamda uni saqlab qolish zarur boʻlganda, qaytadan tiklash, raqobat usullarini qaror toptirishga qaratadi.

Rejali va buyruqli iqtisodiyotdan bozor iqtisodiyotiga oʻtayotgan mamlakatlarda, shu jumladan bizning mamlakatimizda sogʻlom raqobatga shart-sharoit hozirligi, iqtisodiy subyektlarning mustaqilligini kengaytirish orqali ularni raqobatchilikka jalb qilishga qaratilgan choratadbirlarining muhim jihatlari hisoblanadi.

Mamlakatimizda davlatning raqobatchilik muhitini shakllantirishga qaratilgan holatda xususiylashtirish, davlat mulki hisobi mulkchilikning boshqa shakllarini vujudga keltirishda asosiy oʻrin tutadi. *Birinchidan*, xususiylashtirish natijasida beriladigan mulk oʻz egalari qoʻliga topshirilsa, *ikkinchidan*, koʻp ukladli iqtisodiy va raqobatchilik muhitini vujudga keltiradi. Hozirgi kunda mamlakatimizda yalpi ichki mahsulotning 80 foizdan ortigʻini nodavlat sektor ta'minlamoqda. Bu borada Prezident Islom Karimov: «Tan olishimiz kerakki, 1991-yilda qabul qilingan «**Davlat tasarrufidan chiqarish va xususiylashtirish toʻgʻrisida»gi qonun**, oʻtgan davr mobaynida 80 tadan ortiq qonunosti hujjati unga uygʻunlashtirilganiga qaramasdan, **bugun qayta koʻrib**

chiqishni va yangi tahrirda qabul qilishni talab etmoqda»¹, – deb tegishli mutasaddi tashkilotlarga vazifa yuklagani barchamizga ma'lum.

Shunday qilib, Oʻzbekiston Respublikasida raqobatchilik muhitini vujudga keltirishning asosiy yoʻli, bu raqobatni inkor qiluvchi davlat monopoliyasidan nodavlat turli xoʻjalik shakllarining mavjudligiga asoslangan va iloji boricha erkin raqobatni taqozo etuvchi bozor tizimiga oʻtishdir. Bu yerda raqobatchilik munosabatlarini shakllantirish, avvalo mustaqil erkin tovar ishlab chiqaruvchilarning paydo boʻlishini taqozo qiladi, chunki raqobatning asosiy sharti alohidalashgan, mulkiy mas'uliyatlar asosida oʻz manfaatiga ega boʻlgan tadbirkorlik texnikasini zimmasiga oluvchi erkin xoʻjalik subyektlarining mavjudligi, ularning bozor orqali aloqa qilishidir.

Oʻzbekiston Respublikasi «Tovar bozorlarida monopolistik faoliyatni cheklash va raqobat toʻgʻrisida»gi qonunining amal qilishi, unga zid ravishda mahalliy davlat hokimiyati organlarining tadbirkorlik rivojiga toʻsiq boʻluvchi ayrim xatti-harakatlar uchrab turibdi.

Yuqorida qayd etilgan qonunning 7-moddasiga asosan, mahalliy davlat organlariga quyidagilar taqiqlanadi:

- birdan-bir faoliyat sohasidagi xoʻjalik yurituvchi subyektlarni tashkil qilishga cheklashlar joriy etish, shuningdek, ayrim faoliyat turlarini amalga oshirish yoki muayyan bir tovarlar ishlab chiqarishni taqiqlash;
- xoʻjalik yurituvchi subyektlarga ayni bir tovar bozorining oʻzida ishlaydigan boshqa xoʻjalik yurituvchilar.

Raqobatchilik muhitini yaratishda va unga qarshi kurashda mamlakatimizda qonunchilik asoslarini yaratishga katta e'tibor qaratilmoqda.

Raqobatning amal qilishi ma'lum shart-sharoitlar mavjud boʻlishini taqozo qiladi. Bu shart-sharoitlar faqat bozor munosabatlari qaror topgan muhitda boʻlishi mumkin. Bozor munosabatlari rivojlangan mamla-katlarda raqobatchilik muhiti uzoq davr davomida oʻz-oʻzidan tadrijiy yoʻl bilan vujudga kelgan.

Oʻzbekiston davlatining raqobatchilik muhitini shakllantirishga qaratilgan siyosatida xususiylashtirish, davlat mulki hisobidan mulkchilikning boshqa shakllarini vujudga keltirish asosiy oʻrin egallaydi. Xususiylashtirish natijasida, *birinchidan*, mulk oʻz egalari qoʻliga

¹ *Каримов И. А.* Мамлакатимизда демократик ислохотларни янада чукурлаштириш ва фукаролик жамиятини ривожлантириш концепцияси. – Т.: «Ўзбекистон», 2010. – Б. 52.

topshiriladi, *ikkinchidan*, koʻp ukladli iqtisodiyot va raqobatchilik muhitini vujudga keltiradi. Shunday qilib, Oʻzbekistonda raqobatchilik muhitini vujudga keltirishning asosiy yoʻli, bu raqobatni inkor qiluvchi davlat monopoliyasidan nodavlat, turli xoʻjalik shakllarining mavjudligiga asoslangan va iloji boricha erkin raqobatni taqozo etuvchi bozor tizimiga oʻtishdir. Bu yerda raqobatchilik munosabatlarini shakllantirish, avvalo mustaqil tovar ishlab chiqarishning paydo boʻlishini taqozo qiladi, chunki raqobatning asosiy sharti alohidalashgan, mulkiy mas'uliyat asosida oʻz manfaatiga ega boʻlgan va tadbirkorlikni oʻz zimmasiga olgan erkin xoʻjalik subyektlarining mavjudligidir.

Oʻzbekistonda raqobatchilik muhitini vujudga keltirish Prezident Islom Karimovning ikkinchi chaqiriq Oʻzbekiston Respublikasi Oliy Majlisi birinchi sessiyasidagi ma'ruzasida ta'kidlaganidek: «Iqtisodiyotni erkinlashtirish — bu xoʻjalik yurituvchi subyektlarning erkinligi va iqtisodiy mustaqilligi oshirish, tadbirkorlik faoliyatini oshirish yoʻlidagi mavjud toʻsiqlarni bartaraf etishni anglatadi». Shu maqsadda Oʻzbekiston Respublikasining «Iste'molchilar huquqlarini himoya qilish toʻgʻrisida»gi qonuni (1996-y.) gʻirrom raqobatga yoʻl qoʻymaslik, respublika bozorlarini belgilangan talablarga javob bermaydigan mahsulotlardan (kontrabanda tovarlaridan) himoyalash kabilarga yordam beradi.

Raqobat bozor iqtisodiyotining gʻoyat muhim xususiyati. U amal qilishi uchun ma'lum shart-sharoitlar muhayyo boʻlishini talab qiladi. Raqobat faqat bozor iqtisodiyoti muhitida boʻlishi mumkin, chunki shunda unga zaruriyat boʻladi, shuningdek unga yoʻl ochiladi.

Gʻarb mamlakatlarida raqobatga davlat aralashmaydi. Davlat xususiy monopoliyalarni jilovlashga qaratilgan tadbiri — 1890-yilda AQShda «Sherman qonuni» qabul qilingan, tarixda antitrest deb ham nom olgan. Antimonopol qonunchiligi asosan uch yoʻnalishda boʻladi:

- 1) ishlab chiqarish tizimini boshqaruvchi qonunlar yoki ular modellarini aniq belgilash, ya'ni hech bir korxonaga yuqoridagi me'yordan ortiq tovar ishlab chiqarishga yo'l bermaydi, mahsulotning qolgan qismini albatta, boshqa korxonalar ishlab chiqaradi, demak, ular o'rtasidagi raqobat ta'minlanadi;
- 2) barcha yirik korporatsiyalarning ishtirokchilari boshqa korporatsiyalar aksiyalarining ma'lum cheklangan miqdoridan ortigʻiga ega boʻlmasligi kerak;
- 3) narxlarning talab va taklif muvozanati belgilangan darajadan yuqori yoki past tutib turishini, narx xususida kelishib olishni man qiluvchi antitrest qonunlarini joriy etish.

Bozor erkin iqtisodiy faoliyatni talab qilgandan jamiyat raqobatchilarga bir xil imkoniyat yaratib beradi, xoʻjalik subyektlariga oʻzini saqlab turishi uchun bir xil sharoit hozirlaydi, davlat raqobat qoidalariga rioya etilishini oʻz nazoratiga oladi, ayrim yoki bir guruh tadbirkorlarning monopol mavqeida boʻlishiga yoʻl bermaydi.

3.1. O'zbekiston Respublikasining «Raqobat to'g'risida»gi qonunining (2011-yil 6-yanvar) ahamiyati to'g'risida

O'zbekiston Respublikasi Prezidenti Islom Karimovning 2010-yil 12-noyabrda Oʻzbekiston Respublikasi Oliy Majlisi Qonunchilik palatasi va Senatining qoʻshma majlisidagi «Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi» nomli ma'ruzasida demokratik o'zgarishlarni yanada chuqurlashtirishning eng muhim ustuvor vazifalari belgilangan «Demokratik bozor islohotlarini va iqtisodiyotni liberallashtirishni yanada chuqurlashtirish» nomli 6yo'nalishi to'g'risida davlatimiz rahbari: «Hammamiz yaxshi tushunamizki, bozor munosabatlarining asosi boʻlgan raqobatni rivojlantirishda monopoliyaga qarshi qonun hujjatlari katta rol o'ynaydi. Ammo, amaldagi «Tovar bozorlarida monopolistik faoliyatni cheklash va raqobat toʻgʻrisida»gi qonun bugungi kunda eskirdi va zamon talablariga javob bermay qoldi. Shuni e'tiborga olgan holda, «Raqobat to'g'risida»gi yangi qonunni ishlab chiqishimiz va qabul qilishimiz zarur. Ushbu qonunda monopolistik faoliyatni nafaqat tovarlar bozorida, balki moliya bozorlarida ham tartibga solishni nazarda tutish Shuningdek, birja savdolarida ham monopoliyaga mexanizmlarni, aksiyalarni sotib olish, qo'shish va birlashtirish bitimlarini tartibga solish va nazorat qilish tartib-qoidalarini soddalashtirish bo'yicha normalarni ushbu qonunga kiritish maqsadga muvofiqdir», deb ta'kidlagan edi.

Darhaqiqat, mustaqillikning dastlabki yillarida monopolistik faoliyatga qarshi siyosat yuritish, xususiylashtirish va xususiy sektorning jadal rivojlanishini ta'minlash milliy iqtisodiyotning asosiy yoʻnalishlaridan biri etib belgilangan edi. Ayniqsa, Oʻzbekiston Respublikasining «Tovar bozorlarida monopolistik faoliyatni cheklash va raqobat toʻgʻrisida»gi qonuni qabul qilingach, iqtisodiyot sohalarida sogʻlom *raqobat muhiti* shakllanib, respublika iqtisodiyotining tuzilishi bosqichma-bosqich oʻzgara boshladi. Masalan, bundan oʻn besh yil avval monopolist korxonalar davlat reyestrida 4351 xil

mahsulot va xizmatlar turi boʻyicha 827 ta xoʻjalik subyekti mavjud edi. Oʻtgan davr mobaynida esa, monopoliyaga qarshi davlat organi tomonidan turli tovar bozorlaridagi raqobat sharoitini oʻrganish yuzasidan doimiy ravishda tahlillar oʻtkazilib, ular asosida reyestrga tegishli oʻzgartishlar kiritildi. Natijada 2000-yildan 2010-yilgacha boʻlgan davrda monopolist korxonalar soni 4 baravarga, monopol mahsulot va xizmatlar miqdori esa 12 baravarga kamaydi. Hozirgi kunda mamlakatimiz yalpi ichki mahsulotida kichik biznesning ulushi 54,5 foizni, monopol mahsulot va xizmatlarning hissasi esa 19 foizdan sal koʻproqni tashkil etayotgani ana shundan dalolat beradi.

Konsepsiya talablaridan kelib chiqqan holda, Oʻzbekiston Respublikasi Monopoliyadan chiqarish va raqobatni rivojlantirish davlat qoʻmitasi tomonidan manfaatdor davlat organlari bilan birgalikda Oʻzbekiston Respublikasining «Raqobat toʻgʻrisida»gi qonuni loyihasi ishlab chiqildi.

Darhaqiqat, amaldagi «Tovar bozorlarida monopolistik faoliyatni cheklash va raqobat toʻgʻrisida»gi Oʻzbekiston Respublikasi qonuni moliyaviy xizmatlar bozorlaridagi raqobatni tartibga solish masalalarini «oʻz ichiga» olmagan. Bu esa, oʻz navbatida, mazkur sohada raqobatga qarshi harakatlarga yoʻl qoʻymaslik yuzasidan choralarni amalga oshirishga imkon bermas edi. 2011-yil 6-yanvarda Prezident Islom Karimov tomonidan Oʻzbekiston Respublikasining «Raqobat toʻgʻrisida»gi qonuni imzolandi. Ushbu qonunning maqsadi tovar va moliya bozorlarida raqobat sohasidagi munosabatlarni tartibga solishdan iborat.

Ma'lumki, moliya bozori iqtisodiyotning eng asosiy qon tomiri hisoblanadi. Qonunning 4-moddasida asosiy tushunchalar berilgan bo'lib, iqtisodiy savodxonlikni oshirish maqsadida undan ayrimlarini keltiramiz:

Raqobat – xoʻjalik yurituvchi subyektlarning (raqobatchilarning) musobaqalashuvi boʻlib, bunda ularning mustaqil harakatlari, ulardan har birining tovar yoki moliya bozoridagi tovar muomalasining umumiy shart-sharoitlariga bir tomonlama tartibda ta'sir koʻrsatish imkoniyatini istisno etadi yoki cheklaydi.

Bir-birining oʻrnini bosadigan tovarlar — oʻzining belgilangan vazifasi, qoʻllanilishi, sifat va texnik xususiyatlari, narxi hamda boshqa oʻlchamlari boʻyicha taqqoslanishi mumkin boʻlgan shunday tovarlarki, ularni oluvchi iste'mol qilish chogʻida bir tovarni boshqasiga haqiqatan ham almashtiradi yoki almashtirishga tayyor boʻladi.

– xoʻjalik yurituvchi subyektning yoki shaxslar guruhining iqtisodiy faoliyatni amalga oshirishda afzalliklarga ega boʻlishga qaratilgan, qonun hujjatlariga, ish muomalasi odatlariga zid boʻlgan hamda boshqa xoʻjalik yurituvchi subyektlarga (raqobatchilarga) zarar yetkazadigan yoki zarar yetkazishi mumkin boʻlgan yoxud ularning ishchanlik obroʻsiga putur yetkazadigan yoki putur yetkazishi mumkin boʻlgan harakatlari.

Kamsituvchi shartlar (sharoitlar) – tovar yoki moliya bozoriga kirish, tovarni ishlab chiqarish, iste'mol qilish, olish, realizatsiya qilish, oʻzgacha tarzda boshqa shaxsga oʻtkazish shartlari (sharoitlari) boʻlib, ular boshqa teng shartlarda (sharoitlarda) bitta yoki bir nechta xoʻjalik yurituvchi subyektni oʻzga xoʻjalik yurituvchi subyekt (raqobatchi) bilan taqqoslaganda, teng boʻlmagan holatga solib qoʻyadi.

Kelishib olingan harakatlar – tovar yoki moliya bozorida ikki yoki undan ortiq xoʻjalik yurituvchi subyektning bozorning mazkur ishtirokchilaridan har birining manfaatlarini qanoatlantiradigan va ulardan har biriga oldindan ma'lum boʻlgan, raqobatni cheklashga olib keladigan yoki olib kelishi mumkin boʻlgan harakatlari.

- raqobatchilar yoki boshqa shaxslar tomonidan tarqatiladigan, tovar yoki moliya bozorida ayrim xoʻjalik yurituvchi subyektga afzalliklar yaratadigan yoxud xoʻjalik yurituvchi subyektni (raqobatchini) yoki raqobatchi ishlab chiqargan tovarni yomonlovchi yolgʻon, noaniq yoki buzib taqqoslash.
- raqobat toʻgʻrisidagi qonun hujjatlarida xoʻjalik yurituvchi subyektlar uchun man etilgan harakatlar, shuningdek davlat boshqaruvi organlari, mahalliy davlat hokimiyati organlari hamda ular mansabdor shaxslarining raqobatni cheklashga qaratilgan harakatlari (harakatsizligi).

Tovar – faoliyatning olish va realizatsiya qilish uchun moʻljallangan mahsuli, shu jumladan ishlar va xizmatlar.

- tovarning (shu jumladan bir-birining oʻrnini bosadigan tovarning) Oʻzbekiston Respublikasi hududidagi yoki uning bir qismidagi muomala doirasi boʻlib, u Oʻzbekiston Respublikasining ma'muriy-hududiy boʻlinishiga mos kelmasligi mumkin va mazkur muomala doirasi chegaralarida tovarni olish yoki realizatsiya qilish imkoniyati mavjud boʻladi.
- tovarlarni ishlab chiqarish, olish va realizatsiya qilish faoliyati bilan shugʻullanuvchi yuridik shaxs, shu jumladan chet ellik yuridik shaxs, xoʻjalik boshqaruvi organi, shuningdek yakka tartibdagi tadbirkor.

Moliya bozori – banklar hamda boshqa kredit, sugʻurta va oʻzga moliya tashkilotlari tomonidan koʻrsatiladigan moliyaviy xizmatning, shuningdek qimmatli qogʻozlar bozori professional ishtirokchilari xizmatlarining Oʻzbekiston Respublikasi hududidagi yoki uning bir

qismidagi muomala doirasi bo'lib, u O'zbekiston Respublikasining ma'muriy-hududiy bo'linishiga mos kelmasligi mumkin va mazkur muomala doirasi chegaralarida bunday xizmatni ko'rsatish imkoniyati mavjud bo'ladi. Mazkur bozorda hozirgi kunda yuzlab subyektlar faoliyat yuritib kelmoqda. Mustaqillikning dastlabki yillarida moliya tizimining barqarorligini ta'minlash ushbu sohada raqobatni rivojlantirishdan ustun hisoblangan. Bugungi kunga kelib esa, mazkur tizimda sogʻlom raqobat muhiti shakllangan va unda raqobatga qarshi harakatlar hamda qayta monopollashuvning oldini olish muhim ahamiyat kasb etadi. Chunki, moliya tizimida monopoliyaga qarshi tartibga solish mexanizmini joriy etish dolzarb muammo bo'lib qolmoqda. Moliya bozorlarida raqobatni ta'minlash bo'yicha yangi qonun loyihasida ko'pgina me'yorlar ko'zda tutilgan. Xususan, amaldagi qonunda «bir-birining oʻrnini bosadigan «kamsituvchi raqobat», «insofsiz shartlar (sharoitlar)», «noto'g'ri taqqoslash» va hokazo. Prezidentimizning 2008-yil 18noyabrdagi «Iqtisodiyot real sektori korxonalarining moliyaviy barqarorlichora-tadbirlari toʻgʻrisida»gi yanada oshirish farmoni aksiyadorlik jamiyatlari ustav fondlarining hajmi 10 barobardan ziyodga ko'tarildiki, bu ham aksiya va ulushlar sotib olish bo'yicha bitimlarda investor va uning qiymati amaldagi qonunda belgilangan eng yuqori me'yordan sezilarli darajada ortishini ta'minlamoqda.

Yangi qonunning qabul qilinishi yuqorida koʻrsatilgan kamchiliklarni bartaraf etishga, raqobatni rivojlantirish va uni himoya qilish boʻyicha munosabatlarni huquqiy tartibga solishni takomillashtirishga, ushbu sohadagi davlat siyosatining huquqiy asoslarini aniqlashtirishga, tovar bozorlarida monopolistik faoliyatni bartaraf etish hamda oldini olish boʻyicha huquqiy vositalarni yangilashga xizmat qiladi. Yuqori likvidli, jumladan, tovar bozorida ustun mavqega ega korxona tomonidan ishlab chiqarilgan tovarlarning birja savdolari rivojlanishi bilan monopol yuqori narx tavsifiga yondashuv ham oʻzgaradi. Xususan, qonun loyihasida birja savdolari natijasida vujudga kelgan narx monopol yuqori hisoblanmasligi nazarda tutilgan.

Yangi qonunda yuqorida keltirilgan umumiy tavsiflarni aniqlashtirish bilan bir qatorda, yangi tushunchalar ham kiritildi. Shuningdek, unda «ustun mavqe»ni tavsiflash prinsipi, subyektning tovar va xizmatlar bozoridagi ustun mavqei, mezonlarini aniq va puxta belgilash hamda bozor ulushi hajmini qisqartirish yoʻli bilan oʻzgartirish koʻzda tutilgan.

Ma'lumki, monopoliyaga qarshi qonunchilikning yoʻnalishlaridan biri, bu — bozor subyektining xoʻjalik faoliyatini yuritishiga ta'sir

koʻrsatish yoʻli bilan tovar bozorlarining monopollashuviga va raqobatni cheklashga yoʻl qoʻymaslik maqsadida xoʻjalik subyektining ustav fondida shaxs yoki shaxslar guruhining ustunlik darajasi oshishiga olib keluvchi qoʻshilish, qoʻshib yuborish, aksiyalarni, mulkiy huquqlarni sotib olish va boshqa bitimlarni (harakatlarni) tartibga soluvchi yangi bob kiritildi. Shuningdek, xoʻjalik subyektlariga nisbatan ma'muriy ogʻirliklarni qisqartirish maqsadida aktivlarning balans qiymati oshirildi.

Jahon iqtisodiyotida vujudga kelayotgan tendensiyalardan, shuningdek, mamlakatimizni kelajakda iqtisodiy va ijtimoiy rivojlantirish strategiyasidan kelib chiqqan holda, 2012-yilda va undan keyingi yillarda quyidagi ustuvor vazifalarning amalga oshirilishi muhim ahamiyat kasb etadi. Birinchi darajali e'tibor mamlakatimiz iqtisodiyotining raqobatdoshligini oshirish boʻyicha dastur tayyorlash va uni amalga oshirishga qaratilishi zarur. Bu maqsadning dolzarbligi va ahamiyati, avvalo, shu bilan belgilanadiki, biz oʻrta muddatli istiqbolda iqtisodiyotimizni rivojlangan demokratik davlatlar darajasiga olib chiqishni hozirgi bosqichdagi bosh strategik vazifa sifatida oʻz oldimizga qoʻyganmiz.

Oʻz-oʻzidan ayonki, raqobatdosh iqtisodiyotni shakllantirmasdan, pirovard natijada esa raqobatdosh mamlakatni barpo etmasdan turib, biz qabul qilgan «Mamlakatimizda demokratik islohotlarni chuqurlashtirish va fuqarolik jamiyatini rivojlantirish konsepsiyasi»da koʻzda tutilgan maqsadli vazifalarni amalga oshirmasdan turib, bu haqda jiddiy soʻz yuritish mumkin emas. Bu vazifaning oʻrtaga qoʻyilishi, shuningdek, inqiroz jarayonlarining chuqurlashuvi, dunyo miqyosida xarid talabining pasayishi va shunga muvofiq tarzda jahon bozorida xom ashyo, materiallar, ayniqsa, tayyor mahsulotlar boʻyicha raqobatning yildan-yilga kuchayib borayotgani bilan ham bogʻliq, albatta.

Bugungi kunda koʻplab rivojlangan va jahon iqtisodiyotida yetakchi oʻrin tutadigan mamlakatlar tajribasi shuni soʻzsiz isbotlab bermoqdaki, raqobatdoshlikka erishish va dunyo bozorlariga chiqish, birinchi navbatda iqtisodiyotni izchil isloh etish, tarkibiy jihatdan oʻzgartirish va diversifikatsiya qilishni chuqurlashtirish, yuqori texnologiyalarga asoslangan yangi korxona va ishlab chiqarish tarmoqlarining jadal rivojlanishini ta'minlash, faoliyat koʻrsatayotgan quvvatlarni modernizatsiya qilish va texnik yangilash jarayonlarini tezlashtirish hisobidan amalga oshirilishi mumkin.

Ishlab chiqarish hajmini kengaytirish va raqobatdosh mahsulotlarning yangi turlarini oʻzlashtirish boʻyicha qabul qilingan birinchi navbatdagi chora-tadbirlar dasturiga muvofiq, 2012–2016-yillarda hisob-kitoblar

boʻyicha qiymati 6 milliard 200 million dollar boʻlgan 270 dan ziyod investitsiya loyihasini, shuningdek, ishlab chiqarishni modernizatsiya qilish, texnik va texnologik qayta jihozlash boʻyicha tarmoq dasturlarini amalga oshirish koʻzda tutilmoqda.

Masalan, 2012-yilda Surgʻil koni bazasida hatto dunyo mezonlari boʻyicha ham noyob boʻlgan, qiymati 25 milliard dollardan ziyodni tashkil etadigan Ustyurt gaz-kimyo kompleksi qurilishi boshlandi. Mazkur obyektning qurilishi 2016-yilda nihoyasiga yetkaziladi va bu korxona 4 milliard 500 million kub metr tabiiy gazni qayta ishlash, 400 ming tonna polietilen va 100 ming tonna polipropilen ishlab chiqarish imkonini beradi.

Ushbu loyiha texnologik jihatdan dunyodagi eng ilgʻor loyihalardan biri boʻlib, eng yuksak darajadagi gaz-kimyo texnologiyalarini joriy etishni koʻzda tutadi. Bu, oʻz navbatida,tabiiy gazdan 97 foizgacha etan, propan va boshqa qimmatbaho komponentlarni ajratib olishni ta'minlaydi.

Mazkur loyihada yetakchi xorijiy banklar konsorsiumi, davlat kafolatlarini jalb etmagan holda, loyihalarni moliyalashtirish prinsiplari asosida ishtirok etmoqdalar.

Dunyodagi yirik «Tomson Reyter» biznes-axborot agentligining moliya sohasidagi jahonga mashhur «Projekt faynens interneshnl» jurnali ushbu loyihaning noyobligi va ishga novatorlik bilan yondashish natijasi ekanini qayd etib, Ustyurt gaz-kimyo kompleksi qurilishini neftgazkimyo sanoatidagi yilning eng yaxshi loyihasi, deb tan oldi. Bu, hech shubhasiz, barchamizni ertangi kunga ishonchimizni yanada mustah-kamladi.

2012-yilda Janubiy Afrikaning «Sosol» kompaniyasi va Malayziyaning «Petronas» korporatsiyasi bilan hamkorlikda qiymati 4 milliard dollardan ziyodni tashkil etadigan, tozalangan metan asosida sintetik suyuq yoqilgʻi ishlab chiqarish boʻyicha katta istiqbolga ega boʻlgan yirik loyihani amalga oshirish boshlandi.

Ushbu loyiha asosida barpo etiladigan zavod dunyodagi sanoqli korxonalardan biri boʻlib, u sintetik suyuq yoqilgʻi — suyultirilgan gaz, aviakerosin va «premium klass» toifasidagi, ya'ni Yevro-4 standartidan kam boʻlmagan dizel yoqilgʻisi ishlab chiqaradi.

Hozirgi kunda «Angren» maxsus industrial zonasi hududida qiymati 186,0 million dollarlik 8 ta investitsiya loyihasi amalga oshirilmoqda. Shular qatorida zarurat va ehtiyoj baland boʻlgan turli tayyor mahsulotlarni va butlovchi buyumlarni ishlab chiqarish, shuningdek,

yangi shakar zavodini qurish, tayyor charm buyumlar ishlab chiqaradigan kompleksni barpo etish alohida oʻrin tutadi.

Aytish kerakki, hozirgi vaqtda ushbu jamgʻarma kapitali 9 milliard dollardan oshib ketdi. 2012-yilda jamgʻarma mablagʻlari hisobidan sanoat va ishlab chiqarish infratuzilmasining yetakchi tarmoqlarida 758 million dollardan ziyod hajmdagi 29 ta strategik investitsiya loyihasini birgalikda moliyalash moʻljallanmoqda, bu oʻtgan yilga nisbatan 38,2 foizga koʻp, demakdir.

Vazirlar Mahkamasi strategik ahamiyatga molik loyihalarning amalga oshirilishini alohida nazoratga olishi, loyiha-smeta hujjatlarining puxta ishlanishini, tanlov savdolarining oʻz vaqtida oʻtkazilishini, zarur asbob-uskunalarning yetkazib berilishi boʻyicha shartnomalar tuzilishi hamda qurilish-montaj ishlarining belgilangan muddatlarda bajarilishini ta'minlashi zarur.

Hukumatning chorak yakunlariga bagʻishlangan yigʻilishlarida qabul qilingan birinchi navbatdagi chora-tadbirlar dasturini va modernizatsiyalash boʻyicha tarmoq dasturlari hamda loyihalarni amalga oshirish boʻyicha tasdiqlangan tarmoq jadvallari ijrosi ta'minlanishini koʻrib chiqish va ularning bajarilishi uchun oʻz vaqtida tegishli choralar koʻrish tartibini joriy etish darkor.

bilan belgilangan topshiriqqa O'tgan yili protokol binoan mamlakatimizning barcha yirik korxonalari va ishlab chiqarish tarmoqlarida o'tkazilgan texnik audit natijasida 37 mingga yaqin asbob-uskuna va texnologiyalarning jahon miqyosida sinovdan o'tgan zamonaviy turlariga almashtirilishi lozimligi aniqlandi. Vazirlar Mahkamasiga ushbu audit natijalari asosida moddiy va ma'naviy jihatdan eskirgan asbobbo'yicha loyihalarning uskunalarni yangilash amalga oshirilishi yuzasidan, ularni moliyalashning aniq manbalariga alohida e'tibor qaratish vazifasi yuklatilgan.

Bugungi kunda iqtisodiyotimizning samarasi haqida soʻz yuritar ekanmiz, shuni tan olishimiz kerakki, bu yoʻnalishda eskidan qolgan va hali-beri roʻy berib kelayotgan oqsoqlik holatlari borligi, birinchi navbatda, ishlab chiqarilayotgan mahsulotlarning material va energiya sarfi yuqori darajada saqlanib qolayotgani ayon boʻlmoqda. Muqobil energiya resurslarini izlash va joriy etish ishlari talab darajasida emas. Umuman, ushbu sohada zudlik bilan hal qilinishi lozim boʻlgan koʻplab muammolar toʻplanib qolganini afsus bilan qayd etish kerak.

Mamlakatimizda ishlab chiqarilayotgan mahsulotlar sifatini boshqarish tizimlarini joriy etish, mahsulotlarning xalqaro standartlarga mosligini ta'minlashni barcha korxonalarda ham hal etish masalasi ko'rilmoqda. Bu O'zbekiston iqtisodiyoti uchun o'ta muhim ahamiyatga ega bo'lgan yengil sanoat, farmatsevtika va qurilish materiallari sanoati kabi iste'mol tovarlari ishlab chiqariladigan tarmoqlarga tegishlidir.

1-jadval

Mustaqillik yillarida Oʻzbekiston iqtisodiyotining lokomotiviga aylangan tarmoqlar

Lokomotiv tarmoqlar	foizda
Mashinasozlar va avtomobilsizlik	12,2
Kimyo va neft-kimyo sanoati	9,4
Oziq-ovqat sanoati	13,1
Qurilish materiallari sanoati	11,9
Farmatsevtika va mebelsozlik	18,0

Mamlakatimizda yaratilgan ishlab chiqarish salohiyatidan foydalanish borasida ham ishga solinmagan ulkan imkoniyatlar mavjud. Bu ishlab chiqarishni yangilash va modernizatsiya qilish masalasidir. Buning uchun soʻnggi yillarda katta mablagʻ sarflanmoqda. Koʻp miqdordagi xorijiy investitsiyalar jalb etilmoqda. Qator tarmoqlarda ishlab chiqarish quvvatlaridan, asosiy fondlardan toʻliq foydalanishda, mehnat samaradorligini oshirishda kamchiliklarga yoʻl qoʻyilmaslik choralari qoʻyilmoqda. Shu bois, mahsulotlar tannarxining asossiz ravishda oʻsib ketishining oldi olinmoqda.

Mamlakatimizda samarali iqtisodiyotni barpo etish maqsadida quyidagi masalalarga 2012-yilning 19-yanvarida boʻlib oʻtgan Vazirlar Mahkamasining yigʻilishida katta e'tibor qaratildi. Bular:

birinchidan, manfaatdor vazirliklar, idoralar, xoʻjalik birlashmalari, kompaniya va korxonalar ishtirokida sanoatda mahsulot tannarxini 10–15 foizga pasaytirish yuzasidan har bir sanoat korxonasi boʻyicha kompleks chora-tadbirlarni koʻzda tutadigan dastur ishlab chiqish lozimligi;

ikkinchidan, mamlakatimiz korxonalarida qishloq xoʻjaligi xom ashyosini qayta ishlash darajasini tanqidiy tahlil qilish va uni rivojlantirish boʻyicha mavjud resurs va imkoniyatlarni aniqlash hamda sanoatning qayta ishlash tarmoqlarini jadal rivojlantirish, ishlab chiqarilayotgan iste'mol tovarlari turlarini koʻpaytirish va sifatini yaxshilash, buning uchun qoʻshimcha imtiyozlarni koʻzda tutadigan maxsus qaror qabul qilish kerakligi. Bu borada, birinchi navbatda, mahalliy xom ashyo va

materiallar asosida sanoat kooperatsiyasi va ishlab chiqarishni mahalliylashtirish tizimini yanada rivojlantirishga oid ishlarni davom ettirishga alohida e'tibor qaratish darkorligi;

uchinchidan, bugungi keskin raqobat sharoitida mahsulotlarimizning jahon va mintaqaviy bozorlarda xaridorgir boʻlishi va mustahkam oʻrin egallashi uchun bu boradagi ishlarni yana bir bor tanqidiy koʻrib chiqish lozim. Bunda tashqi bozorda xaridorbop, yuqori likvidli mahsulotlar ishlab chiqarishni kengaytirish uchun eksportga mahsulot chiqaradigan korxonalarni ragʻbatlantirishni yanada kuchaytirish, ularga yangi imtiyoz va preferensiyalar berish boʻyicha qoʻshimcha chora-tadbirlar tayyorlash zarurligi;

toʻrtinchidan, mamlakatimizdagi raqobatdosh mahsulotlar ishlab chiqaradigan sanoat korxonalari va boshqa tarmoqlarning eksport yarmarkalari oʻtkazishini kengaytirish, shuningdek, mahsulot sotishning zamonaviy usullaridan keng foydalanish, asosiy ishlab chiqaruvchilarimizni oʻz mahsulotlari taqdimotini oʻtkazish va yangi eksport shartnomalari tuzishi uchun nufuzli xalqaro yarmarkalarga jalb etish boʻyicha alohida hukumat qarorini qabul qilish lozimligi davlatimiz rahbari Islom Karimov tomonidan vazifa etib belgilangan¹.

Yuqorida ta'kidlanganidek, davlatimiz tomonidan ko'rilayotgan barcha izchil chora-tadbirlar tizimi mamlakatimizda ragobat muhitini yaratishga zamin ta'minlaydi. Bozor tizimidagi raqobat iqtisodiy resurslarni tejamli ishlatishga, tovar va xizmatlarni koʻplab va sifatli ishlab chiqarishni rag'batlantiradi, xo'jalik yuritishning eng samarali usullarini yuzaga keltiradi. Iqtisodiy aloqalarning eng ma'qulini topishga undaydi. O'zbekiston Respublikasining «Raqobat to'g'risida»gi qonuni eng avvalo iqtisodiy o'sishni ta'minlash, bu esa o'z navbatida raqobat maydonini kengaytirishga, muhimi sogʻlom yangi raqobatchilarni yuzaga keltiradi. Chunki hozirgi kunda kichik biznes va xususiy tadbirkorlar hamda fermerlar harakati safi kengayib bormoqda. Bugungi tadbirkorlar raqobatda qo'li baland kelishi uchun ilg'or texnologiyadan samarali foydalanishga qodir bo'lgan malakali ishchilar va mutaxassislarni jalb etishdan manfaatdordirlar. Raqobat oila a'zolarining faolligini ham yuzaga chiqaradi. Oilaviy tadbirkorlik bilan shug'ullanuvchi oilalar soni kundan- kunga ortib bormoqdaki, bu ham raqobat muhitini yaratishga xizmat qiladi. Raqobatda bozor xoʻjaligiga xos iqtisodiy saralanib olish tamoyili amal qiladi. Raqobatda yutib chiqqanlar iqtisodiy jihatdan mustahkamlanadi. Yutqazganlar nochor korxona hisoblanib xonavayron

 $^{^{1}}$ Қаранг: *Каримов И. А.* 2012 йил Ватанимиз тараққиётини янги босқичга кутарадиган йил булади. – Т., 2011. – Б. 19–21.

boʻladi ya'ni bankrotga uchraydi. Davlat sogʻlom raqobat muhitini yaratishdan manfaatdor. Chunki qayerda raqobat munosib oʻrin egallasa, shu yerda iqtisodiy oʻsish yuz beradi. Xalq farovonligi darajasi yangi bosqichga koʻtariladi.

Muxtasar qilib aytganda, mazkur qonun raqobat sohasidagi munosabatlarni tartibga soluvchi, hozirgi kunda koʻpgina alohida qonunosti hujjatlaridan iborat boʻlgan me'yorlarni jamlab, yaxlit shaklga keltirishga xizmat qiladi. Bu esa, mazkur sohadagi huquqiy munosabatlarda oshkoralikni ta'minlab, raqobat muhitini yanada sogʻlomlashtiradi. Sogʻlom raqobat esa rivojlanish garovidir. Raqobatlashish muhitining vujudga kelishi va uni saqlashda davlatning roli beqiyosligini ta'kidlash joiz. Davlat iqtisodiy monopolizmni cheklash, umuman antimonopol yoʻl tutishni talab qiladi, chunki busiz raqobatlashish vaziyati paydo boʻlmaydi. Bu nazarda tutilib, Oʻzbekistonda «Raqobat toʻgʻrisida»gi yangi qonunga koʻra:

	bozorda sun'iy taqchillik hosil etish;
	narxlarni monopollashtirish;
	raqobatlarning bozorga kirib borishiga toʻsqinlik
qilish;	
	raqobatning gʻirrom usullarini qoʻllash man etiladi.

Tayanch tushunchalar:

Raqobat, raqobat qonuni, gʻirrom raqobat, halol raqobat. Narx orqali raqobatlashuv, sifat orqali raqobatlashuv, reklama vositasida raqobatlashuv, mukammal raqobat, nomukammal monopolistik raqobat, partnyorlik, raqobat strategiyasi, raqobatchilik muhiti, raqobatbardoshlik, antimonopol siyosat.

Savol va topshiriqlar:

- 1. Raqobatning bosqichlarini tushuntiring.
- 2. Bozor tizimi va raqobat oʻrtasida qanday bogʻlanishlar bor?
- 3. Sof raqobat va sof monopoliyaning umumiy va farqli tomonlarini sharhlab bering.
 - 4. Mulk shakli raqobatni belgilaydimi yoki raqobat mulk shaklinimi?
 - 5. Raqobatning g'irrom va yovvoyi usullarini sharhlab bering.

Mavzuni chuqur o'rganish instrumentariysi

Demping – tovarlarni tashqi bozorda ichki bozorga nisbatan arzon narxda sotish; tashqi bozorni egallash uchun tovar ba'zan ishlab chiqarish xarajatlaridan past baholarda chetga chiqariladi.

Duopoliya – bozorda ikkita oligopol firma bir-biri bilan raqobat qiladigan vaziyat.

Narx hosil boʻlishida yetakchilik — oligopol bozorlardagi narx yetakchisiga qolgan oligopoliyalar roziligi bilan tarmoq narxlarini belgilashda yetakchilik roli beriladigan hodisa.

Kurno modeli – har bir firma oʻz raqobatchisining ishlab chiqarish hajmini doimiy deb hisoblaydi va shunday keyin ishlab chiqarish hajmi boʻ-yicha oʻz qarorini qabul qiladi, degan taxminga asoslanadigan duopoliya xatti-harakatining modeli; ishlab chiqarish hajmining muvozanatlashgan darajasi ikkala firma reaksiyasi oʻzgaruvchilarining kesishgan nuqtasiga mos keladi.

Monopolistik raqobat – tarmoqda garchi bir xil boʻlsa-da, ammo «markali», shu bois monopol mahsulot ishlab chiqaradigan koʻplab raqobatchi firmalar faoliyat koʻrsatadigan bozor vaziyati.

Iqtisodiyotdagi monopoliya – bozor hokimiyatiga ega boʻlgan iqtisodiy tuzilma.

Tabiiy monopoliyalar – iqtisodiy faoliyatning texnikaviy va texnologik xususiyatlari taqozo qilib, ular raqobatni qoʻllash mumkin boʻlmagan yoki qiyin boʻlgan sohalarni oʻz ichiga oladi:

- suv, energiya, gaz ta'minoti korxonalari;
- temir yoʻl transporti;
- harbiy mudofaa majmui korxonalari.

Iqtisodiy (**sun'iy**) **monopoliyalar** ishlab chiqarish va kapitalning toʻplanishi hamda korxonalarning turli yoʻllar bilan birlashishi natijasida vujudga keladi.

Kartel – bir tarmoq korxonalarning ittifoqi boʻlib, uning ishtirokchilari toʻliq iqtisodiy mustaqilligini saqlab qoladi, faqat ishlab chiqarish hajmi, sotish bozorlari va baholari toʻgʻrisida kelishib oladi.

Sindikat – bir turdagi mahsulot ishlab chiqaruvchi korxonalar birlashmasi boʻlib, uning a'zolari ishlab chiqarish sohasida mustaqilligini saqlab qoladi, mahsulot esa sindikat mulki sifatida sotiladi.

Trest – ishlab chiqarish vositalari va mahsulotga birgalikda egalik qiluvchi korxonalar guruhi boʻlib, foyda qoʻshilgan kapital hajmiga qarab taqsimlandi.

Oligopoliya – amalga oshmagan raqobatning tarmoqda odatda bir necha yirik raqobatchi firma mavjudligi bilan ajralib turadigan muayyan shakli.

Muvozanatlashgan monopol narx – eng koʻp yoki eng kam daromadning eng koʻp yoki eng kam xarajatlarga tengligi sharoitida eng katta foyda olishni ta'minlovchi narx.

Bozor hokimiyati – muayyan bozor tuzilmalarining oʻz tovar va xizmatlariga subyektiv ravishda narx belgilash imkoniyati.

Til biriktirish – tarmoq firmalari oʻrtasidagi aniq narxlar va ishlab chiqarish hajmlarini belgilash yoki ular oʻrtasidagi raqobatni biror usul bilan cheklash uchun oshkora yoki boshqacha kelishuv.

«Sof» monopoliya (monopsoniya) – bozorda yolgʻiz harakatlanuvchi va cheksiz bozor hokimiyatiga ega boʻlgan iqtisodiy tuzilma.

Bozor axloqi – erkin raqobatda ishtirok etish natijasida olingan har qanday daromad adolatli sanaladigan axloq.

Aksilmonopol siyosat – davlat boshqaruvi tegishli organlarining iqtisodiyotni monopoliyadan chiqarish hamda monopoliyalarni tartibga solish borasidagi faoliyati.

Qaytarib bo'lmas yo'qotishlar – iste'molchilar va ishlab chiqaruv-chilarning monopol hokimiyatni amalga oshirishdan ko'radigan to'liq sof zarari.

Iqtisodiyotni monopoliyadan chiqarish — davlatning firmalar qoʻshilishini va boshqa firmalararo bitimlarni cheklovchi choralar tizimini ishlab chiqishga qaratilgan siyosati.

Ishlab chiqaruvchining ortiqcha mahsuloti – ishlab chiqaruvchilar tovar va xizmatlar sotishdan oladigan jami sof foyda; monopol hokimiyat sharoitida iste'molchilarning ortiqchalari hisobiga toʻldiriladi.

Inflatsiya salohiyati – iqtisodiyotda monopoliya tamoyillarining kuchayishi bilan bogʻliq inflatsiya imkoniyati, ular orasida eng xavflisi iste'mol sektoridagi tovar yetishmovchiligi.

Ma'muriy buyruqbozlik monopoliyalari – xarajatlarni sun'iy ravishda oshirish, mahsulot sifatini pasaytirish va raqobatning asoslarini ma'muriy asosda yo'q qilish natijasida yuzaga kelgan monopoliyalar.

Tadbirkorlik monopoliyalari – transformatsion va transaksion xarajatlarni kamaytirish oqibatida raqobatchilarni siqib chiqarish natijasida yuzaga kelgan monopoliyalar.

Monopoliyalar faoliyatini tartibga solish — davlatning mavjud monopoliyalar faoliyatini maqbullashtirish va ularning bozordagi hokimiyatini bir qadar cheklashga qaratilgan choralari tizimi.

Monopoliya bozor strategiyasining maqsadi — ortiqcha iste'molchilarni egallab olish va uni qoʻshimcha foyda olish manbaiga aylantirish.

Monopoliyaga qarshi qonun hujjatlarini buzish — monopoliyaga qarshi faoliyat olib borish vakolati berilgan organga axborot bermaslik yoki haqiqatga toʻgʻri kelmaydigan ma'lumotlarni bila turib, taqdim qilish, shunday qilmishlar uchun ma'muriy jazo qoʻllanilganidan keyin sodir etilgan boʻlsa, eng kam oylik ish haqining yigirma besh baravarigacha miqdorda jarima yoki uch yilgacha muayyan huquqdan mahrum qilish bilan jazolanadi.

Monopoliyaga qarshi faoliyat olib borish vakolati berilgan organning qonun-qoidalarni buzishni toʻxtatish, dastlabki holatni tiklash, shartnomalarni bekor qilish yoki oʻzgartirish toʻgʻrisidagi talablarini yoxud boshqa qonuniy koʻrsatmalarini bajarishdan boʻyin tovlash yoki ularni oʻz vaqtida bajarmaganlik, shunday qilmishlar uchun ma'muriy jazo qoʻllanilganidan keyin sodir etilgan boʻlsa, eng kam oylik ish haqining yigirma besh baravaridan ellik baravarigacha miqdorda jarima yoki uch yildan besh yilgacha muayyan huquqdan mahrum qilish yoxud tuzatish ishlari bilan jazolanadi (Oʻzbekiston Respublikasining Jinoyat kodeksi, 183-modda).

Mavzu yuzasidan asosiy xulosalar:

- 1. Raqobat iqtisodiyot subyektlari manfaati toʻqnashgan sharoitda ular oʻrtasida yuz beradigan kurashdir. Bu kurash raqobat qonuniga koʻra muqarrar boʻladi, bozorga xos usullarda yuz beradi, iqtisodiyot subyektlarining saylanib olinishini keltirib chiqaradi. Raqobatlashuv usullari narxni oʻzgartirish, tovar sifatini oshirish, servisni yaxshilash va reklamani oʻtkazishdan iborat.
- 2. Raqobat maydoni bozor, biroq turli bozorlarda raqobat ishtirokchilari har xil boʻladi, ularning raqobatdan koʻzlagan maqsadi ham turlichadir. Bir bozorda ishlab chiqaruvchilar-sotuvchilar kurashsa, boshqa bozorda iste'molchilar bellashadi, yana boshqa yerda ishlab chiqaruvchilar bilan iste'molchilar raqobatlashadi.
- 3. Erkin bozorda mukammal raqobat yuz beradi, bu sof raqobat hisoblanadi, chunki raqobat hech bir cheklanmagan boʻladi, unda koʻpchilik ishtirok etadi, ularning raqobati narx vositasida boʻladi. Erkin bozorda uning hech bir ishtirokchisi narxga ta'sir eta olmaganidan uni borligicha qabul qilib, shunga koʻra ish tutadi. Bu yerda narx marginal xarajatlarga yaqin turadi, biroq kurash jarayonida u oʻzgartiriladi. Erkin bozor ochiq boʻlganidan bu yerga kirib kelish va undan chiqib ketish mumkin, shu sababli raqobat soʻnmaydi. Biroq foyda topilganda bu bozorga kiriladi, zarar koʻrilganda undan chiqiladi. Mukammal raqobat ishlab chiqarishdan ham ishlab chiqaruvchilarni, ham iste'molchilarni manfaatdor qiladi, chunki ishlab chiqarish yutugʻini ular baham koʻrishadi.
- 4. Nomukammal raqobat ishtirokchilari ozchilik boʻlgan va cheklangan tarzda yuz beradigan, monopoliyalarga xos raqobatdir. Buning asosiy koʻrinishi *monopol* va *oligopol* raqobatdir. Monopol raqobatli bozorda koʻpchilik firmalar sifat, servis, reklama va tovar belgilari vositasida kurashadilar. Bu yerda erkin bozordagidan yuqori, ya'ni marginal xarajatdan yuqori boʻlgan narxlar amal qiladi. Bu bozor ochiq, lekin unga kirib oʻrnashib olish uchun katta kapital kerak, binobarin, bu raqobatni cheklaydi.

Oligopoliya bozorida gʻoyat yirik va ozchilikdan iborat kompaniyalar sifat va servis vositasida raqobatlashadilar, ular narxni kelishgan holda, marginal xarajatdan ancha yuqori qilib oʻrnatadilar. Bu bozorga kirib raqobatlashuv juda qiyin, lekin buning uddasidan ulkan firmalar chiqa oladilar. Sof monopoliya bozorida tovar taklifi yakka-yu yagona firma qoʻlida boʻlganidan uning raqibi boʻlmaydi, biroq bu firma resurslar bozorida raqobatlashadi. Bu yerda bozor konsentratsiyasi kuchli boʻlganidan bozor hokimiyati hosil boʻladi va bu bozor narxiga ta'sir etish miqyosi bilan aniqlanadi. Bozor hokimiyati koeffitsiyenti amaldagi narxlarning marginal xarajatdan naqadar yuqori boʻlishini bildiradi.

Monopsoniya bozorida xaridor yagona boʻlganidan koʻpchilik ishlab chiqaruvchilar uning pulini olish uchun kurashadilar. Raqobat turlari sof holda kamdan-kam uchraydi, ular yonma-yon turadi, hatto chirmashib ham ketadi.

- 5. Raqobat muqarrar boʻlganidan firmalar unga oid strategiyasini ishlab chiqadi. Bunda bozorda oʻzini qanday tutish, raqobatga borish yoki til biriktirib, unga bormaslik yoʻli aniqlanadi. Raqobatga borilganda oʻz tovarlarining raqobatbardoshligiga, ya'ni uning xaridorlarga ma'qul boʻlishiga asosiy e'tibor beriladi, strategiyada raqobatlashuv usuli ham belgilanadi.
- 6. Bozor tizimiga raqobatchilik muhiti xos boʻladiki, bu iqtisodiy erkinlikdan boshqa narsa emas. Buni ta'minlashda davlat faol qatnashadi. Xususiy mulk va iqtisodiy erkinlik qonun yoʻli bilan kafolatlanadi, raqobatchilarning bozorga kirib kelishi uchun qulay sharoit yaratiladi, davlat mulki xususiylashtiriladi. Raqobatchilikni ta'minlab turish uchun davlat antimonopol siyosat qoʻllaydiki, bunga binoan yangi monopoliyalarning hosil boʻlishining oldi olinadi, eski monopoliyalar jilovlab turiladi, kompaniyalar qoʻshilib monopoliya hosil etishi taqiqlanadi, saqlanib qolgan monopoliyalar narxi nazorat qilinadi.
- 7. Raqobatlashish muhitining vujudga kelishi va uni saqlashda davlatning roli. Davlat iqtisodiy monopolizmni cheklash, umuman antimonopol yoʻl tutishni talab qiladi, chunki busiz raqobatlashish vaziyati paydo boʻlmaydi. Bu nazarda tutilib Oʻzbekistonda Monopolistik faoliyatni cheklashga oid huquqiy kafolatlar yaratildi. Huquqiy kafolatlarga koʻra:

□ bozorda sun'iy taqchillikni hosil etish;
□ narxlarni monopollashtirish;
□ raqobatlarning bozorga kirib borishiga toʻsqinlik qilish;
□ raqobatning gʻirrom usullarini qoʻllash man etiladi.
8. Jenevada oʻtkazilgan jahon iqtisodiy forumidagi ma'ruzada
mamlakatlarning raqobatbardoshliligiga ta'sir etuvchi omillar quyidagilar deb
belgilangan edi:
☐ ichki mikroiqtisodiy salohiyat;
🗆 boshqaruv darajasi (foydaliligi, javobgarligi va yangiliklarni kiritish
nuqtai nazaridan);
☐ ilmiy-texnik salohiyat (fundamental va aniq fanlar izlanishlarining
muvaffaqiyatliligi jihatidan);

xalqaro savdoda qatnashishi va investitsiyaning oqimi darajasi;
raqobat muhitini shakllantirishga hukumat siyosatining ta'siri darajasi;
moliya tizimining sifati va samaradorligi;
infratuzilma ahvoli;
mehnat resurslarining holati va kvalifikatsiyasi.

9. Ma'lumki, iqtisodiyot rivojining bugungi bosqichida monopolizm koʻrinishlariga qarshi kurash va amalda raqobat muhitini shakllantirish masalalari gʻoyat ahamiyatlidir. Respublikamizda sogʻlom raqobat muhitini yaratishga mustaqillikning dastlabki yillaridayoq alohida e'tibor qaratilgan. Bu haqda Oʻzbekiston Respublikasining maxsus qonunlari qabul qilingan.

O'zbekiston Respublikasining antimonopol qonunchiligi:

- «Raqobat toʻgʻrisida»gi qonun (2011-y). Unda bozorda ataylab taqchillik hosil qilish, narxlarni monopollashtirish, raqobatga toʻsqinlik qilish va uning gʻirrom usullarini qoʻllash taqiqlanadi;
- «Obyektlarning xoʻjalik yurituvchi jamiyatlar va shirkatlar tarkibidan chiqish tartibi toʻgʻrisida»gi nizom» (1994-y). Unda oʻz monopol mavqeini suiiste'mol qilgan monopolistik birlashmalarni boʻlib tashlash yoki maydalashtirish koʻzda tutiladi;
- «Iste'molchilarning huquqlarini himoya qilish toʻgʻrisida»gi qonun (1996-y). Qonunda belgilanishicha, gʻirrom raqobat va bozorlarga belgilangan talablarga javob bermaydigan tovarlarni chiqarish taqiqlanadi.

Oʻzbekistonda monopoliyaga qarshi siyosatni amalga oshiruvchi muassasalar:

Oʻzbekiston Respublikasi Prezidentining «Monopoliyaga qarshi ishlarni tartibga solish va raqobatni rivojlantirish tizimini yanada takomillashtirish chora-tadbirlari toʻgʻrisida» 2010-yil 26-fevraldagi farmoniga muvofiq, monopoliyaga qarshi ishlarni tartibga solish tizimini yanada takomillashtirish, raqobat muhitini izchil rivojlantirish, tabiiy monopoliyalar korxonalari faoliyatini nazorat qilishni kuchaytirish va xoʻjalik yurituvchi subyektlar tomonidan narxlarning asossiz oshirilishiga yoʻl qoʻymaslik, iqtisodiy nochor korxonalarni moliyaviy sogʻlomlashtirish ishlarini faollashtirish maqsadida Oʻzbekiston Respublikasi Monopoliyadan chiqarish, raqobat va tadbirkorlikni qoʻllab-quvvatlash davlat qoʻmitasi Oʻzbekiston Respublikasi Monopoliyadan chiqarish va raqobatni rivojlantirish davlat qoʻmitasi etib qayta tashkil qilindi.

11- MAVZU. MENEJMENT VA MARKETING ASOSLARI

1. Menejment faoliyatining iqtisodiy mazmuni, vazifalari

«Boshqaruv» atamasi italyancha «managgiare» soʻzidan olingan. Dunyoning juda koʻplab mamlakatlarida esa iqtisodiy sohadagi boshqaruv «management», siyosiy sohadagi boshqaruv «governance» («government»), texnika sohasidagi boshqaruv esa «control» («controlling») atamalari bilan ifodalanadi.

Boshqaruvning mohiyati haqida aniq va bir xilda tushuniladigan fikrlar mavjudligi boʻyicha tasavvurlar vujudga kelishi mumkin. Afsuski, real hayotda bunday emas. Hozirgi kunda boshqaruvni aniq ilmiy kategoriya sifatidagi, umume'tirof qilingan ta'rifi ishlab chiqilmagan.

Umuman olganda, «boshqaruv» tushunchasi turli ma'nolarni ifodalaydi. Juda koʻp hollarda «boshqaruv» tushunchasi boshqaruv faoliyatini amalga oshiradigan subyektlar — muassasa (tashkilot)larni ifodalashda qoʻllaniladi.

Menejmentga iqtisodiy va yuridik adabiyotlarda quyidagicha ta'rif berilgan:

Menejment (ingl. management – boshqaruv, tashkilotchi) – firma faoliyatining bozor sharoitiga moslashib turishida katta ahamiyatga ega faoliyat. Keng ma'noda menejment maxsus boshqarish faoliyatini bildiradi. Menejment firmaning ishlab chiqarish, tijorat va moliyaviy faoliyatini boshqarish boʻlib, firma jamoasining guruhiy manfaatiga xizmat qiladi. Menejmentning obyekti korxona faoliyati, uning subyekti esa boshqarish ishini bajaruvchi idoralar va ularning xodimlaridir.

Menejer (ingl. manager – boshqaruvchi) – korxona va tashkilot hamda uning quyi qatlamining boshqaruvchisi. Shuningdek, menejerlar maxsus tayyorgarlik koʻrgan, boshqarishning sir-asrorlarini, qonunqoidalarini chuqur biluvchi malakali mutaxassislar, yollanma boshqaruvchilar boʻlib hisoblanadilar.

Menejment xoʻjalik faoliyatini samarali tashkil etish uchun boshqarish, rahbarlik qilish, moddiy, moliyaviy va mehnat resurslaridan unumli foydalanish san'ati, usullari, shakllari va vositalari majmuidir. U oʻz oldiga qoʻygan maqsadlariga erishish yoʻlida ishlab chiqarish faoliyatini tashkil etish, rejalashtirish va nazorat qilishni oʻz ichiga oladi. Menejment ishlab chiqarishni tashkil etishning eng asosiy omillaridan biri hisoblanadi. Chunki u ishlab chiqarish omillarini holat sifatiga bevosita ta'sir etadi. Menejment hozirgi zamon iqtisodiy munosabatlarining alohida sohasidir.

Menejment fan sifatida XIX asrning o'rtalarida paydo bo'ldi. Chunki shu davrda texnika va texnologiya rivojlanib, ishlab chiqarish miqyoslarining o'sishi kuchaydi. Bu esa uni boshqarishni murakkablashtirib yubordi va u boshqarishga tegishli bilimlarni talab etuvchi, faoliyatning maxsus sohasiga aylandi. Menejment ishlab chiqarish korxonalarining iqtisodiy faoliyatini tashkil etish bilan ularning ijtimoiy-sotsial va iqtisodiy samaradorligini ta'minlaydi. U ishlab chiqarish samaradorligini oshirishga ta'sir etgan holda pirovard natijada mavjud ehtiyojlarini toʻliq qondirishga qaratilgandir.

Ma'lumki, bozor iqtisodiyoti sharoitida sotuvchilar oʻz tovarini imkon boricha koʻproq foyda beradigan qilib sotishga, xaridorlar esa bu tovarlarni imkon boricha arzonroq xarid qilishga intiladi. Ularning manfaatlari bozordagi baholar mexanizmi orqali muvozanatlashadi. Shu munosabat bilan bozor iqtisodiyotining qanday tamoyillari tadbirkorlarga xos boʻlib hisoblanadi, degan savol tugʻilishi tabiiy.

Menejmentning asoschisi amerikalik muhandis va tadqiqotchi F.Teylordir. U boshqaruvchi nima qilishni va eng yaxshi, arzon usulda uni amalga oshirishni aniq bilishi san'ati, deb ta'kidlaydi. Shu ta'rifga asosan boshqaruv sikllari quyidagi toʻrt vazifani ado etadi:

- rejalashtirish;
- tashkil etish;
- motivatsiya;
- nazorat.

Bu vazifalar moddiy boylik yaratish, mablagʻ bilan ta'minlash, marketing va boshqalarga doir boshqaruv faoliyatining hamma turlarini oʻz ichiga oladi. Vazifalarni birma-bir tavsiflab chiqish maqsadga muvofiqdir:

- 1. Rejalashtirish oʻz mohiyat-e'tibori bilan qarorlar tayyorlash jarayonidir, ya'ni F. Teylor ta'kidlaganidek, maqsadni tanlash va uning bosqichlari quyidagilar:
 - maqsadni oʻrtaga qoʻyish;
 - mavjud imkoniyatlarni, shart-sharoitlarni aniqlash;
 - muqobil sharoitlarni belgilab olish;
 - eng yaxshi yoʻlni tanlash;
 - rejani ishga solish va bajarish.
- 2. Tashkil etish, ya'ni vositalarni tanlash menejer va ijrochilar faoliyatini tartibga solishga qaratilgan. Bu, avvalo, menejerning oʻz imkoniyatlariga baho berishi, oʻziga boʻysunadigan xodimlarni oʻrganib chiqishi, har bir xodimning nimalarga qodir ekanligini aniqlab olishi, kuchlarni joy-joyiga qoʻya bilishidir. Ushbu tashkilotchilik faoliyati boshidan oxirigacha korxonaning juda aniq yozilmalari doirasida oʻtadi.
 - 3. Motivatsiya. Tayyorgarlik choralarini koʻrib boʻlgandan keyin

menejer ishning muvaffaqiyatli sur'atda bajarilishini ta'minlashi kerak. Shu maqsadda quyidagilardan foydalanadi:

- a) ragʻbatlantirishdan, ya'ni tashqi omillar (moddiy va ma'naviy ragʻbatlantirish) yordamida xodimni joʻshqin faoliyatga undashdan;
- b) asl motivatsiya, ya'ni xodimda mehnatga ichki (psixologik) ragʻbatlar hosil qilishdan mehnatdan manfaatdorlik, mehnat faoliyatiga ehtiyoj sezish, mehnat faoliyatidan qanoat tuygʻusini hosil qilish muhimdir.
- 5. Nazorat haqiqatda erishilgan natijalarni tekshirib chiqish va topshirilgan vazifalar bilan solishtirib koʻrishdir. Teskari aloqa yaxshi yoʻlga qoʻyilgan taqdirda, ya'ni tegishlicha nazorat olib boriladigan mahalda tashkiliy jihatdan oldinga qoʻyilgan maqsadlarga erishish mumkin.

Menejmentning hamma asosiy vazifalari menejerning qaror qabul qilishga doir xatti-harakatlari bilan bogʻliq boʻladi. «Samarali qarorlar, – deb ta'kidlaydi menejment xususida amerikalik nazariyotchi K. Killen, – tijorat korxonasining yashab borishi uchun garovdir. Bunday qarorlar boshqaruvchining yuqorida aytib oʻtilgan vazifalaridan har birining muhim elementidir».

Menejerlar – korxona va kompaniya egalari boʻlmagan yollanma, malakali boshqaruvchilardir. Bozor iqtisodiyoti sharoitida kompaniyalar, firma, korxona, bank, moliya muassasalarining ijroiya hokimiyatiga ega boʻlgan boshqaruvchisi, direktor, rahbar, mudir, ma'muriy boshqaruvchi kabi rahbar xodimlari, qimmatbaho qogʻozlar bilan uning egalari nomidan harakat qiluvchilar ham menejerlardir. Ular ma'rifatli jamiyatdagi maxsus ijtimoiy qatlamni tashkil qiladi. Bozor iqtisodiyoti sharoitlarida menejerlar xizmatining ishlab chiqarish va tovarlar muomalasini uyushtirishda vazifasi va roli beqiyosdir.

Hozirgi davrda menejerlik vazifalari quyidagilardan iborat:

- 1) maqsad va manfaatlarni aniqlab olish;
- 2) ijtimoiy imtiyozlar berish;
- 3) ishdan bo'shatish;
- 4) kasbga tayyorlash va malaka oshirish;
- 5) ish haqi toʻlash va ragʻbatlantirish;
- 6) vazifalarni almashtirish;
- 7) xodimlarni tanlash va yollash;
- 8) xodimga baho berish va shahodatlash.

Qaror qabul qilish, ya'ni bir to'xtamga kelish, qanday bo'lmasin biror fikrga kelish yoki qilinishi mumkin bo'lgan ishlarning aniq-tayin bir

yoʻlini tanlab olish — menejment sohasining eng muhim elementlaridan biridir. Bu ish menejerning fikri-zikrini doimo band qilib turadigan tashvishdir. U juda xilma-xil masalalar — tashkiliy, kadrlarga oid, texnologik, ta'minot va savdo yuzasidan qaror qabul qiladi. Boshqaruvga oid har qanday qaror samarali boʻlsagina, ana shu holda u oʻrinli deb hisoblanadi.

Shu oʻrinda davlatimiz rahbari Islom Karimov ta'kidlaganidek: «Bankrotlikka uchramaslikning yana bir muhim omili, bu oʻz biznesini boshqarishni takomillashtirish, boshqacha aytganda, menejment san'atini puxta egallashdir. Katta biznesga nisbatan kichik biznesda menejmentning roli koʻproq ahamiyat kasb etadi, chunki kichik biznes sohasida ishlab chiqarishning tezkorligi, moslashuvchanligi katta biznesga nisbatan ancha yuqori boʻlishi lozim»¹.

Qaror qabul qilish tamoyillari. Boshqaruvga oid qaror qabul qilish faoliyati juda tayinli tamoyillarning talablariga muvofiq amalga oshiriladi. Amaliyotda keng tarqalgan tamoyillar quyidagilar:

- yakkaboshchilik, bunda qaror yakkaboshchilik asosida qabul qilinadi. Agar shu qaror yaxshi deb topilsa, menejment nuqtai nazaridan u oʻrinli deb hisoblanishi mumkin. Shunday boʻlsa-da, bu xildagi qarorlar asoslangan tanqidga uchrab turadi. Bu shunga bogʻliqki, menejerlar oʻzlarini koʻrsatmoqchi boʻlib, yakkaboshchilik bilan qaror qabul qilishadi. Ana shunday menejerlar xatti-harakatlarining 90 foizga yaqini buyruqdan iborat boʻladi. Bu narsa ishchi guruhlarda keskinlikni yuzaga keltiradi. Boshqaruv ishi obroʻ-e'tiborga asoslanib olib borilganda, shaxslar oʻrtasidagi munosabatlar oʻzaro ishonch yoʻqolib qolishi va janjallar koʻp boʻlib turishi bilan ta'riflanadi;
- yakdillik bunday tamoyilning bozor munosabatlari sharoitida toʻla namoyon boʻlishi qiyin. U mohiyat-e'tibori bilan oldinga surilayotgan muqobil fikrni soʻzsiz qoʻllab-quvvatlashdan iborat. Bunday boʻlishi juda kam uchraydigan hodisadir. Chunki qarorlarni qabul qilishda qatnashadigan kishilar demokratik uslubda fikrlash tarafdorlari boʻlsalar, odatda boshqalarnikidan farq qiladigan oʻz fikrlariga ega boʻladilar;
- koʻpchilik bu tamoyil «kaolitsiyalar» roʻyi-rost ma'lum boʻlib turgan vaziyatlarda, ya'ni qarorni ishlab chiqish jarayonida ham ayrim shaxslar, ham guruhlar tomonidan bildirilgan har xil fikrlar raqobat

 $^{^1}$ *Каримов И. А.* Ватан равнақи учун ҳар биримиз масъулмиз. Т. 9. – Т.: "Ўзбекистон" , 2001. – Б. 422.

qiladigan mahalda amalga oshiriladi. Shu munosabat bilan qaror qabul qilishda ovoz berish yoʻliga oʻtiladi.

Qaror qabul qilish uchun aksariyat koʻpchilikning ovozi yetarlidir, gohida ba'zi prinsipial masalalar yuzasidan me'yor 2/3 deb tasdiqlanadi;

konsensus, bu tamoyilning paydo boʻlishi bir qancha omillarga bogʻliq. Birinchidan, bu – boshqaruvni demokratlashtirish jarayonining chuqurlashib borishidir. Fikrlar plyuralizmi (xilma-xilligi) sharoitida hal etiladigan muammolarni oʻzlaricha talqin etadigan, tasavvur qiladigan kishilarning qandaydir bir guruhiga yoki ayrim kishilarga tazyiq oʻtkazish mumkin emas. Tarbiya koʻrgan demokratik jamiyat oʻziga shunday muomala qilinishiga mutlaqo yoʻl qoʻymaydi.

Ikkinchidan, bu axborot oqimining tobora zoʻrayib borayotgani va qaror qabul qilishning texnik-iqtisodiy sharoitlari murakkablashayotganidir. Bularning unisi ham, bunisi ham har bir fikrga, gʻoyaga ehtiyotkorlik bilan munosabatda boʻlishini, har bir insonga samimiylik bilan e'tibor berishni talab qiladi.

Konsensus qarorlarini ishlab chiqish jarayonida barcha bahsli masalalar va turli-tuman fikrlar yuzasidan bir bitimga kelish, kelishishdir. Bu narsaga oʻzaro fikr almashinish va maslahat qilish, shuningdek oldinga surilayotgan muqobil masalalarni maqsadga muvofiqlashtirishning har xil usullarini qoʻllash bilan erishiladi. Oʻz mustaqil faoliyatini boshlamoqchi boʻlgan tadbirkor, qanday sohada boʻlishidan qat'i nazar, quyidagi bilimlarga ega boʻlishi lozim:

- 1) bozor nimaligini va unda qanday dastaklar va qonunlar, xususan qiymat, talab va taklif, raqobat qonunlari qanday amal qilib berishini yaxshi tasavvur etmoq zarur;
- 2) tovarlar (ishlar va xizmatlar) bozorda oʻz oʻrnini topishni, qancha ehtiyoj qondirilmay, qolganini «hisoblab chiqishni» va nisbatan qisqa muddatlarda talabni qondirishni bilish va uddalash zarur. Buning uchun tadbirkor kishi qaysi mintaqada ish boshlashni niyat qilgan boʻlsa, oʻsha mintaqadagi marketing tadqiqotlari asoslarini egallab olmogʻi kerak;
- 3) tadbirkorlik faoliyatini uning obyektlari qaror topgan paytdan boshlab tartibga solib boradigan normativ aktlar, qonun-qoidalar mazmuni oʻzlashtirib olmoq zarur. Soliq tizimining huquqiy bazasini, budjetlar, sheriklar, yollanma xodimlar va ishga aloqador boshqa subyektlar bilan boʻladigan oʻzaro munosabatlarga tegishli qonunlar bajarilmaganligi uchun zimmaga tushadigan javobgarlikni aniq bilish zarur;

- 4) ta'sis hujjatlarini ishlab chiqish, biznes-rejani shakllantirish mexanizmini, biznesni ro'yxatdan o'tkazish tartibini yaxshi tasavvur qilmoq lozim. Tadbirkor kishi ishlab chiqarilayotgan mahsulotni tayyorlash texnologiyasini, uning xossalarini, uni sotish, realizatsiya qilish imkoniyatlarini bilishi kerak;
- 5) boshqarish asoslarini, osoyishtalik, mojarolarsiz ishlash imkoniyatlarini oʻzlashtirib olmoq zarur. Ishlab chiqarish menejmentining asoslarini egallab olish muvaffaqiyatga erishmoq uchun katta ahamiyatga ega;
- tadbirkorlik etikasiga, ya'ni odob-axloq qoidalariga alohida 6) e'tibor bermoq va o'z xatti-harakatlari bilan firma xatti-harakatlarini nazaridan nuqtai baholab koʻrmoq axloq-odob lozim. munosabatlar xodimlar, jamiyat, davlat bilan bo'ladigan butun muomala daxldordir. Jamiyatning ma'naviy-axloqiy mezonlari qadriyatlariga, rasm-rusumlariga asoslanib, firmaning axloqqa doir kodeksini ishlab chiqish maqsadga muvofiqdir.

Boshqaruv maqsadi va boshqaruv funksiyalari. Maqsad – bu muddao, murod, ya'ni u yoki bu niyatga erishmoq uchun ko'zda tutilgan mushtarak orzu. Aynan, shu maqsad kishi faoliyatini, o'z orzularining ushalishiga yo'naltiradi. Biz dastlab o'zimizning oldimizda turgan maqsadimizni aniqlab olamiz, so'ngra esa shu maqsadimiz:

- boʻlajak harakatlarimizni oldindan aniqlab beradi;
- faoliyatimizning ustuvor yoʻnalishini belgilaydi;
- faoliyatimizni aniq sohaga, ishga yoʻnaltiradi;
- u yoki bu faoliyatimizning zarurlik darajasini belgilab beradi;
- pirovard natijamizni baholash me'yorini belgilaydi va h.k.

Maqsadning ilmiy asoslanganligi va toʻgʻri belgilanganligi boshqaruv uchun juda muhimdir. Chunki aynan shu maqsadga binoan:

- boshqarish funksiyalari;
- boshqarish usullari;
- boshqarishning tuzilmaviy tarkibi;
- lavozimlarni belgilash va kadrlarni tanlash kabi muhim masalalar hal etiladi.

Boshqaruv maqsadiga qoʻyiladigan asosiy talablar: 1) maqsad bir ma'noli va aniq boʻlishi kerak:

- agar qayoqqa borishni bilmasangiz, u holda biror yoʻlni tanlashga ham hojat qolmaydi;
 - 2) maqsad real va bajarilishi mumkin boʻlishi kerak;

- 3) maqsad miqdoran o'lchovga ega bo'lishi kerak: miqdoran o'lchovga, me'yorga ega bo'lmagan maqsad bu sarob;
 - 4) maqsad barcha bajaruvchilarga tushunarli boʻlmogʻi darkor;
- 5) maqsad boʻlimlar va mas'ullar boʻyicha detallashtirilgan boʻlishi kerak.

Yuqoridagilarga asoslanib quyidagi asosiy xulosalarni bayon etamiz: 1) menejment – boshqaruv san'ati va mahoratidir. Boshqaruv resursi turli tarixiy davrlarda va, ayniqsa, bugungi kunda dolzarb ahamiyat kasb etadi. Gʻijjakchi musiqasini ma'lum maromda oʻzi boshqara oladi. Biroq orkestr uchun albatta dirijor zarur;

- 2) boshqaruv deganda, eng avvalo, inson faoliyatini boshqarish tushuniladi. Boshqaruv samarali faoliyatni ta'minlaydi. U albatta jamiyat, jamoa uchun naf keltiradi;
- 3) boshqaruv rahbar faoliyati bilan bogʻliq. Shu bois, menejerlikning obyekti va subyekti mavjud. Uning obyekti boshqariluvchi obyekt, vaziyat, voqelik. Subyekt esa boshqaruv organi yoki rahbarlik. Boshqaruv turli sohaviy darajalarda amalga oshiriladi (davlat, viloyat, tuman, konsern, firma, tashkilot va h.k.);
- 4) boshqarishning sir-asrorlarini ilmiy asosda oʻrganish, tahlil qilish maqsadida turli uslublar qoʻllaniladi. Alohida boshqaruvda kasbiy tayyorgarlikni amalga oshiruvchi fanlar, koʻproq menejment fani oʻrganiladi;
- 5) boshqarishning huquqiy vositalari deganda, ijtimoiy munosabatlarga yuridik, qonuniy ta'sir oʻtkazish jarayonida qoʻllaniladigan huquqiy normalar majmui tushuniladi. Bu borada quyidagi huquqiy sanksiyalar qoʻllaniladi.

Moddiy javobgarlik korxona va tashkilotlar, shuningdek, ayrim mansabdor shaxslar zimmasiga xoʻjalik faoliyatining natijalari uchun yuklatiladigan mas'uliyatdir. Moddiy javobgarlik jarimalarda, penyalarda, ya'ni aybnoma (neustoyka) koʻrinishlaridan biri. Moliya va toʻlov intizomini buzuvchilarga, shuningdek shartnoma boʻyicha majburiyatlarni bajarish muddatini kechiktirib yuborganlarga qarshi pul jarimasi shaklida qoʻllaniladigan jazo chorasidir.

«Neustoyka» – burdsizlik (lafzsizlik) toʻlovi, ya'ni majburiyatlar (shartnomalar, qonunlar) bajarilishini ta'minlash usullaridan biri. Qarzdor oʻz majburiyatlarini bajarmagan yoki lozim darajada bajarmagani uchun kreditorga toʻlaydigan pul summasi.

Intizomiy javobgarlik – xizmat burchlarini buzish, suiiste'mol qilish natijasida kelib chiqadi. Bunda jazo quyidagi koʻrinishlarda boʻladi:

	tanbeh;
	hayfsan;
	muayyan muddatga maoshi pastroq ishga oʻtkazish;
	muayyan muddatda pastroq vazifaga, lavozimga oʻtkazish va
hokazo	

Ma'muriy javobgarlik – bu yuridik javobgarlik turi bo'lib, vakil qilingan organ yoki mansabdor shaxsning qonunbuzarlik qilgan shaxsga nisbatan ma'muriy jazo chorasini qo'llashida ifodalanadi. Bunday jazolar turli-tuman sanksiyalarda – nachyotlar (qaytarib olinishi lozim bo'lgan xarajat), jarimalar va boshqa ko'rinishda bo'ladi.

2. Oʻrta Osiyoda menejmentning nazariy asoslari va tamoyillari

Oʻrta Osiyoda menejmentning nazariy asoslari va uning asosiy prinsiplari qadim zamonlarda ham u yoki bu koʻrinishda mavjud boʻlgan. Ammo Amir Temur hukmronligi davriga kelib ma'lum shaklni kasb etgan, bunga Amir Temurning «Temur tuzuklari» asari yorqin misol boʻla oladi.

«Temur tuzuklari» jahonga mashhur asardir. Uning qoʻlyozma nusxalari dunyoning deyarli barcha mamlakatlari (Hindiston, Eron, Angliya, Daniya, Fransiya, Rossiya, Fransiya, Germaniya, Armaniston, Oʻzbekiston va boshq.) kutubxonalarida mavjud. Asar ikki qismdan iborat. Birinchi qism Amir Temurning davlat barpo etish, uni har jihatdan mustahkamlash, mukammal qurollangan qudratli qoʻshin tuzish borasida tatbiq etgan «tuzuklari» va rejalaridan iborat boʻlib, unda hatto qoʻshinning jangovar saflanish tartibi ham maxsus jadvallar orqali koʻrsatib berilgan.

Asar oʻn uch qism (kengash)dan iborat. Uning ikkinchi bobida sohibqironning kuchli feodal davlatni barpo etish, qoʻshin tuzish va dushman lashkarini yengish yuzasidan tuzgan kengashlari va amalga oshirgan ishlari ifodalangan. Muallifining fikricha, har qanday toj sohibi davlat va jamiyatni ma'lum ijtimoiy-siyosiy guruhga tayangan holda boshqarishi lozim. Davlatni idora qilishda vazirlar, amirlar va viloyatlardagi noiblarning roli benihoya katta boʻlgan. Shuning uchun ham Amir Temur ularni tanlash va vazifalariga tayinlash ishiga alohida ahamiyat bergan. Ular sohibqironning fikricha, sadoqatli, axloqan pok, adolatpesha, tinchliksevar va tashabbuskor odamlar boʻlishi zarur. Temurning fikricha, masalan, vazirlar toʻrt sifatga ega boʻlishlari shart: 1)

asillik, toza nasllik va ulugʻvorlik; 2) aqlu farosatlilik; 3) sipoh bilan raiyat ahvolidan boxabarlik va ularga gʻamxoʻrlik koʻrsatish, ularga yaxshi muomalada boʻlish; 4) sabru bardoshlilik, muloyimlik.

«Tuzuklar»da keltirilgan ma'lumotlarga koʻra, Amir Temur oʻz davlatini – bir uchi Chin va ikkinchi uchi Shom hududida boʻlgan ulkan mamlakatni bor-yoʻgʻi yetti nafar vazir yordamida boshqargan. Bular quyidagilar (1-jadval):

1-jadval

Vazirlar va ularning vazifalari

$N_{\underline{0}}$	Vazirlar	Vazirlarning vazifalari
1.	Mamlakat va raiyat vaziri	Bu vazir el-yurtning muhim ishlarini, kunda chiqib turadigan muammolarni, raiyat ahvolini, olingan hosil, daromadning miqdori, oliq-soliq, davlat xarajatlari, el-yurtning obodonchiligi va aholining farovonligi qay darajada ekanligidan oliy hukmdorni xabardor qilib turgan.
2.	Sipoh vaziri	Sipohiylarning maosh va tanholarini boshqargan, uning qiyinchilik va parishonlikka tushib qolmasligining chora-tadbirlarini koʻrgan, sipoh ahvolidan doimo podshohni ogoh etib turgan.
3.	Mol-mulk, daromad, xarajatlar vaziri	Turli sabablarga koʻra egasiz qolib ketgan yersuv va mol-mulkni boshqargan, zakot va boj yigʻimiga mutasaddilik qilgan.
4.	Sarkori xossa va saltanat ishlarini yurituvchi vazir	Podshohga qarashli yer-suv va mol-mulk, shuningdek davlat muassasalarining faoliyatini nazorat qilib turgan.
5.	Qozi kalon	Adliya muassasalarini boshqargan.
6.	Jalol ul-islom	Podshohning favqulodda huquqlarga ega boʻlgan nazoratchisi.
7.	Vaziri devoni insho	Turli mamlakatlar bilan olib boriladigan yozishmalar devonining boshligʻi.

Rahbarga qoʻyiladigan talablar. Rahbar madaniyati. Rahbar bir qator talablarga javob berishi kerak. «Rahbarlik qilish» degan iboraga izohli lugʻatlarda boshqarish, maslahat berish, kuzatish, yoʻnaltirish, koʻrsatma berish degan turli ta'riflarlar berilgan. Bundan koʻrinib

turibdiki, hozirgi davrda menejer (rahbar)lar qondirishi zarur boʻlgan talablar juda koʻpdir. Ularni quyidagi beshta yirik guruhga boʻlish mumkin (2-jadval):

2-jadval

Rahbarga qoʻyiladigan talablar

$N_{\underline{0}}$	Talablar	Izoh
1.	Ma'naviy yetuklik	siyosiy, huquqiy va axloqiy yetuklik; yuqori saviya va ong; ma'rifatlilik; madaniyatlilik; xodimlarni vatanparvarlik ruhida tarbiyalashga qodirlik; topshirilgan ish uchun shaxsiy javobgarlikni his qilish, halollik, vijdonlilik; shaxsiy manfaatlarni jamoa manfaatlariga boʻysundirishga qodirlik; kishilarga nisbatan mehribon va e'tiborli boʻlish; tashabbus va ilgʻorlikni qoʻllab-quvvatlash qobiliyati; prinsipiallik; tanqidga chidamli boʻlish, oʻz-oʻzini tanqid qila bilish.
2.	Intizom va mehnatga boʻlgan munosabat	mehnatsevarlik; jamoa oʻrtasida intizomni yoʻlga qoʻya bilish; atrofdagilarda mehnatsevarlikni tarbiyalay bilish; bir noshud rahbarning begʻamligi yuzlab, minglab kishilar taqdirining bedaxl qirralariga ta'sir etishi mumkin. Bu toifa boqibegʻam rahbarlarning ish uslubi bilan murosa qilib boʻlmaydi.
3.	Bilim darajasi	iqtisodiyot, texnika va texnologiyani, boshqarish ilmini, funksiya va tuzilmasini bilish; istiqbolni bilishga qodirligi va h.k. Rahbar aniq, chuqur va keng bilimga ega boʻlishi, uni doimo toʻldirib va yangilab borishi kerak. Aks holda u obroʻ qozonmaydi, xodimlarning ishonchiga sazovor boʻla olmaydi.
4.	Tashkilotchilik qobiliyati	xodimlarni tanlay bilish va ulardan samarali foydalanishni ta'minlay olish; qoʻl ostidagilarni mehnatga oʻrgatish va tarbiyalashni bilish; jipslashgan jamoani vujudga keltira olish; maqsad sari intiluvchanlik; kutilmagan vaziyatlarda boshqarish qobiliyatini yoʻqotmaslik. «Yomon korxona yoki tashkilot yoʻq, lekin yomon rahbarlar bor». Bu ibora shuni anglatadiki, yomon ishlab turgan korxonaga jamoani yaxshi boshqaradigan, tashkilotchilik qobiliyati yuksak, mehnatsevar, talabchan, bilimdon rahbar tayinlansa, u korxonani tezda namunalilar safiga qoʻshadi.

		Agar ishlab turgan korxonaga tasodifan tashkilotchilik qobiliyati past rahbar kelib qolsa, u korxona asta-sekin tanazzulga yuz tutadi.
5.	Boshqarish samaradorligini ta'minlay olish	boshqarishni kollegial tarzda tashkil qila olish qobiliyati; ish haqida qisqa va aniq gapirish qobiliyati; ishga oid xat, buyruq, farmoyishlar yoza bilish, turli manbalardan ish uchun zarur axborotlarni olish qobiliyati; rahbarlarni va qoʻl ostidagilarni tinglay bilish qobiliyati; asoslangan qarorlarni mustaqil va tez qabul qila bilish qobiliyati; rejalarni bajarishdan xodimlarning moddiy va ma'naviy manfaatdorligini ta'minlash qobiliyati; boshqaruv organi qarorlarini bajarish ustidan nazoratni ta'minlay bilish; boshqarish strukturasini takomillashtirib borish qobiliyati va h.k.

Rahbarning sifat, xislatlarini belgilovchi mezonlar koʻp. Biroq quyidagi ijobiy xislatlar ular orasida alohida mavqega ega:

dovyuraklik – bunday rahbarda mardonavorlik, botirlik, dadillik mavjud boʻladi. U omadsizlikdan qoʻrqmaydi. Qoʻrquv uni jasoratga chorlaydi va zafarlarga olib keladi. Har bir yangi harakatni taraqqiyotga va hayotiy tajribalarga erishtiradi;

sabrlilik – bunday rahbar muvaffaqiyatga birdaniga erishish mumkin emasligini yaxshi tushunadi. Unga faqat bardosh va sabr-toqat, sabot-matonat, qiyinchiliklarni yengish orqali erishish mumkinligini biladi;

yaxshi niyatlilik — bunday rahbar xayrixoh va iltifotli, kishilarga nisbatan doimo yaxshi niyatda boʻladi. Oʻzidagi qanoatsizlikni gʻirrom raqobatchilik yoʻli bilan emas, balki xayrixohlik bilan bartaraf qilishga harakat qiladi. Uning hayotdagi shiori: «Birni koʻrib shukr, birni koʻrib fikr qil»;

kamtarinlik – bunday rahbar kamtarlikning deyarli har doim iste'dodga to'g'ri mutanosib ekanligi, kamtarlikning yetishmasligi esa nodonlik ekanligini yaxshi tushunadi;

samimiy xushmuomalalik – bunday rahbar sofdil, ochiq koʻngil boʻladi, chin yurakdan gapiradi. U samimiylik aql va yuksak ma'naviy odobni talab etishini, shuningdek, kimki oʻzgalar bilan nosamimiy munosabatda boʻlishga odatlangan ekan, u pirovard natijada oʻziga ham samimiy boʻla olmasligini yaxshi tushunadi;

rahmdillik – bunday rahbar barchaga rahm-shafqatli boʻladi. U

boshqalarni koʻp narsada kechiradi, ammo oʻzini hech narsada kechirmaydi. U rahm-shafqat insonlarning eng oliy fazilatlaridan biri ekanligini, doimo odamlarga yordam qoʻlini choʻzishini, ojiz va notavon kishilardan xabar olib turish lozimligini yaxshi tushunadi;

xushxulqlik – bunday rahbar inson goʻzalligining asosi uning goʻzal xulqida ekanligini, aynan xushxulqlik insonni ulugʻlashini, yoqimli xulq egasidan barcha xursand boʻlishini, bunday xulq egasi boshqalarni xursand qilishdan tashqari, oʻzi ham doimo xursand yurishini, boshqalardan esa oʻziga muhabbat va muloyimlik qaytishini yaxshi tushunadi;

qanoatlilik – bunday rahbar qanoatsizlikdan keladigan ofatlarni, ya'ni nafs balosi, hasad, xudbinlik, baxillik, tamagirlik oqibatlarini yaxshi anglaydi. Nafs odamni har kuyga solishini, uni tiygan hurmat-izzat topishini va bexavotir yashashini, qanoatni esa izzatning asosi, oʻlmaydigan boqiy xazina, qurimaydigan daraxt, zavol topmaydigan mulk ekanligini yaxshi tushunadi;

obroʻ – bu hamma tomonidan tan olingan, mehnat evaziga orttirilgan, rahbar uchun zarur ishonch va qalqondir. Ayni paytda har qaysi rahbar oʻzidan yuqori turuvchi rahbarlar, oʻziga boʻysunuvchi xodimlar, oʻzi bilan huquqi teng boshqa rahbarlar oldida obroʻga ega boʻlishi lozim. Rahbar yuqorida keltirilgan talablarga rioya qilmas ekan, u oʻz rahbarlik usulida salbiy hodisalarga yoʻl qoʻyishi, pirovardida esa oʻz obroʻyini ketkazishi va el nazaridan qolishi mumkin.

1 va 2-jadvallardagi talablar bevosita ichki ishlar idoralari xodimlariga ham taalluqlidir. Ichki ishlar idoralari sohaviy xizmatlari ushbu talablarga amalda rioya etsalar, oʻz nomlariga putur yetkazmaydilar.

Yuqoridagilarga asoslanib, quyidagi asosiy xulosalarni bayon etamiz: 1) boshqaruv ta'limoti buyuk davlat arbobi, sarkarda bobomiz Amir Temur tomonidan XIV–XV asrlar voqealari va ijtimoiy hayotni oʻzida aks ettirgan qimmatli asar – «Temur tuzuklari»da atroflicha bayon etilgan. Mazkur asarda bayon etilgan boshqarish yoʻl-yoʻriqlari, qonunqoidalari, pand-nasihatlari bugungi kunda dolzarbligicha qolmoqda. Amir Temur kuchli davlatni barpo etish, davlat hokimiyatining qaysi ijtimoiy toifalarga tayanishi, mansabdor shaxslarni ularning sifatlariga koʻra tanlash va vazifalarga tayinlash borasida amaliy jihatdan mukammal boʻlgan ta'limotni yaratdi;

2) davlat va jamiyat arbobi, she'riyat sultoni Alisher Navoiy davlat ishlarini boshqargan, muzokaralar olib borgan, yurt tinchligi va obodligi

uchun kurashgan. «Vaqfiya», «Ixlosiya», «Saddi Iskandariy», «Tarixi muliki Ajam» kabi asarlarida adolatli boshqarishning sir-sinoatlari haqidagi ta'limotni yaratgan;

- 3) Zahiriddin Muhammad Bobur mashhur «Boburnoma» asarida boshqarishga oid prinsiplar, xususan odillik va tadbirkorlik, jasurlik va mohirlik, iste'dod va ma'rifat masalalarini yoritdi. Boburiylar (Jahongirshoh) tomonidan davlatni idora etishning 12 moddadan iborat dasturi yaratildi;
- 4) Boburiylar tomonidan ma'muriy boshqaruv sohasini isloh etish, xazina masalalari borasida korrupsiya (viloyat va tuman hokimlari) deb ataladigan hukumat amaldorligi mansabi joriy etildi va hokazo.

3. Marketingning mohiyati va vazifalari

Marketing va menejment hozirgi zamon iqtisodiy munosabatlarning muhim sohalari boʻlib, oʻzaro bevosita bogʻlangan va biri ikkinchisini toʻldiruvchi elementlaridir. Bunday bogʻlanishning asosini ularning mohiyati va vazifalari tashkil qiladi, uning zaminida esa bozor holatini oʻrganish va olingan ma'lumotlarni tahlil qilib, aniq bir xulosaga kelib, soʻng ishlab chiqarishni zaruriy yoʻnalishda, hajmda tashkil qilish borasida boshqaruv qarorlarni qabul qilish kabi ahamiyatli faoliyat yotadi. Mavzu iqtisodiyot nazariyasi fanining boshqa mavzular bilan asosiy mantiqiy bogʻlovchi sifatida namoyon boʻladi. Shu sababli ushbu sohalarning nazariy bilimlarini oʻzlashtirish va ulardan amaliyotda unumli foydalanish orqali yuqori natijalarga erishish aniqdir.

Marketing – bozor holatini asosli oʻrganish va oldindan baholash bilan tovarlarni ishlab chiqarish va sotishni tashkil etish hamda shu yoʻsinda yaxshi foyda topishni uyushtirish kabi munosabatlarni bildiradi.

Marketing inglizcha «market» soʻzidan olingan boʻlib, bozor yoki bozorni asosida degan ma'noni bildiradi. Merketing nazariyasi XX asrning boshida AQShda vujudga kelgan. Oʻsha davrda takror ishlab chiqarish ziddiyatlarining kuchayishi natijasida mahsulotlar sotish muammosi keskinlashgan davridir. Uning asoschilari, muomaladagi kamchiliklarni iqtisodiy rivojlanishning asosiy toʻsigʻi deb bilib, marketingni takomillashtirishning har xil usullarini taklif etadilar.

Marketingni hozirgi davrgacha boʻlgan rivojlanish bosqichlarini uch davrga boʻlib oʻrganish maqsadga muvofiqdir. Avval marketing amaliyotda faqat tovarga yoʻnaltirilgan tamoyil sifatida koʻrindi. Birinchi davrda tovar sifatli va xaridorni qoniqtiradigan bahoda ishlab chiqarilsa,

iste'molchilar unga yaxshi munosabatda bo'ladilar, degan mulohazalar hukm surgan. Keyinchalik faqat tovarning o'zi bilan cheklanish yetarli emasligi ko'rinib qoldi. Shu sababli ikkinchi davr 20–30-yillarda marketingda tovarlar sotish tamoyili olg'a surildi. Xaridorlar ishlab chiqarilgan tovarlarni sotib olishlari uchun ma'lum darajada ularning savdosini uyushtirish zarur ekanligi to'g'risidagi fikrlar shakllandi. Uchinchi davr 50–60-yillarda marketing to'la bozor konsepsiyasi bo'lib (bozorda esa iste'molchi), asosiy o'rinni egalladi.

Marketing – firma yoki tadbirkorning uzoq muddatli, yuqori darajali foyda olish niyatida faqat iste'molchiga qaratilgan maqsadli ishlab chiqarish va sotish faoliyati ham hisoblanadi. Marketing faoliyatining asosiy obyektlari: bozor, iste'molchi, tovar, xizmat, baho, tovar harakati, reklama, sotish va uni ragʻbatlantirish hisoblanadi.

XX asrning oʻrtalarida marketing nazariyasi menejment (boshqarish) nazariyasi bilan qoʻshilib, boshqarish va marketing qoidalari toʻgʻrisidagi fan sifatida *boshqarishning bozor nazariyasi*, degan nomni oldi.

Marketing, ya'ni «boshqarishning bozor nazariyasi» bozorning mohiyati, uni oʻrganish va ishlab chiqarishning unga moslashishini ta'minlashdan iborat. Marketing tovar ishlab chiqarishda xaridorning aniq ehtiyojlarini va korxona imkoniyatlarini hisobga olishi, tovarlarni belgilangan vaqt va miqdorda sotishni tashkil etishi, xaridorlarning talab va ehtiyojlarini toʻla qondirishi, boʻlgʻusi talablarni hisobga olish va unga mos yangi tovarlarni ishlab chiqarishni oʻzlashtirishi va pirovard natijada korxonaning samarali ishlashini ta'minlashi kerak.

Demak, marketing quyidagi vazifalarni bajaradi:

- ishlab chiqarilayotgan tovarlar assortimentini asoslash;
- iste'molchilar ehtiyojini o'rganish va tahlil qilish;
- bozorlarni tanlash;
- narxni tashkil etish va sotishni rejalashtirish;
- reklama;
- firmaning tovar va xizmat uchun ijtimoiy javobgarligini ta'minlash;
 - savdo-igtisodiy faoliyatni boshqarish;
 - talabdagi oʻzgaruvchanlikni barqarorlashtirish.

Marketingning turli faoliyat sohalari, oʻz strategiyasi, prinsiplari va qoidalari mavjuddir. Hozirgi bozor iqtisodiyoti yuqori darajada koʻtarilgan mamlakatlarda marketing tamoyillari oddiy uy-roʻzgʻor xoʻjaligidan boshlab, to kosmosdan samarali foydalanishgacha boʻlgan jarayonlarda va boshqa sohalarda yaqqol koʻrinmoqda. Shuning uchun marketingning ikki mingdan ortiq faoliyatga mos keladigan ta'rifi (xillari)

yaratilgan. Shunga koʻra, marketing sotilayotgan tovarlarning iste'mol qiymatiga koʻra: iste'mol tovarlari bozori; xizmatlar bozori; ishlab chiqarish vositalari bozori; sarmoyalar bozori kabilarda namoyon boʻladi.

Marketing strategiyasi – marketing vazifalarini bajarish uchun tashkilot, korxona, firmaning qoʻllanma sifatida foydalaniladigan samarali mantiqiy qurilmasi, uzoq muddatga moʻljallangan rejasi.

O'zbekiston Respublikasida Prezident Islom Karimovning «1995yilda ijtimoiy-iqtisodiy rivojlanish yakunlari va 1996-yilda iqtisodiy chuqurlashtirishning kelajak yoʻllari» ma'ruzasidan kelib chiqib, Vazirlar Mahkamasi 1996-yil 7-martda qaror qabul qilgan. Ushbu qarorda Davlat Istiqbolstat qo'mitasi va Tashqi iqtisodiy aloqalar vazirligi respublikada sohalar va korxonalar darajasida ishlab chiqarilayotgan tovarlar ichki va tashqi bozori konyukturasining talab va taklifini oʻrganish boʻyicha marketing tadqiqotlarini oʻtkazish mexanizmini tayyorlash belgilangan edi. Shu asosda barcha vazirliklar, konsernlar, korporatsiya, assotsiatsiyalar, firmalar va tashkilotlarga marketing tadqiqotlari oʻtkazish asosida har bir korxona faoliyatini qayta koʻrib chiqib, raqobatdosh mahsulot ishlashga oʻtkazish uchun chet el sarmoyalarini jalb etib, ularning texnika va texnologiyasini yangilash dasturini ishlab chiqishga aniq muddatlar belgilanib, uning ijrosi oʻtgan davr mobaynida ta'minlandi.

Marketing bozor iqtisodiyotining muhim unsuri boʻlib, uzoq va qisqa vaqtlarga moʻljallangan maxsus dasturlar orqali amalga oshiriladi, ularda xaridorlarni va raqobatchilar oʻrganish asosida tovarlar sifatini yaxshilash, tovar narxini oʻzgartirish, reklama oʻtkazish, tovarlarga talab chiqarish, tovarlarni oʻz vaqtida yetkazib turish, xaridorlarga ma'qul tushadigan xizmat koʻrsatish kabi chora-tadbirlar nazarda tutiladi. Ishlab chiqarish marketing yordamida gʻoyat tez oʻzgarib turadigan bozor talabiga moslashadi va samaraga erishadi. Tovar ishlab chiqaruvchilar marketing tufayli bozor bilan uzviy bogʻlanadilar, ishlab chiqarish manbalarini bozortalab qilib yaratishga qaratadilar, sohibkorlik ishlarini rejalashtiradilar.

Marketingning asosiy qoidalari:

- 1) *tovar* ishlab chiqarishda xaridorning aniq ehtiyojlari va korxona imkoniyatlarini hisobga olish;
- 2) xaridorning talab-ehtiyojlari toʻla qondirilishi, boʻlgʻusi talablarni nazarda tutish;
- 3) moʻljallangan bozorda tovarlarni aytilgan vaqtda va belgilangan miqdorda samarali sotish;

- 4) yangi turdagi tovarlarni oʻzlashtira borib, korxonaning uzoq davr mobaynida samarali ishlashiga erishish;
- 5) korxonaning ishlab chiqarish yoʻnalishlari, tutgan yoʻli bozor sharoitiga, xaridor talabiga moslashishi bilan bir qatorda talabga ta'sir etish.

Marketing faqat bozordagi talab-ehtiyojni qondirish vositasigina boʻlmay, balki ishlab chiqarish samarasining ham yuqori boʻlishiga qaratiladi. Shu sababli korxonalarda marketing xizmatini tashkil etish katta ahamiyatga ega. Marketingni boshqarish — foydali aloqalarni oʻrnatish va ularni mustahkamlash maqsadida tahlil qilishni, rejalashtirishni va boshqa chora-tadbirlarni amalga oshirishni tashkil etishdir.

Marketing vertikal tizimi – bozorning turli qismlarida (sigmentlarida) har qism uchun alohida ishlab chiqilgan rejalar bilan amalga oshiriladigan marketing siyosati.

Marketing muhiti – korxona, firmadan tashqarida, ularning marketing xizmati boʻlimlarining muvaffaqiyatli ish yuritishini ta'minlovchi kuchlar va xodimlar birligi.


Marketing ma'lumot tizimi – marketing sohasida ish koʻruvchi uchun yigʻilgan, muvofiqlashtirilgan, oʻz vaqtida tayyorlangan, dolzarb ma'lumotlar yigʻindisi.

Marketingning rivojlanish darajalari nazariy asosini iste'molning qonuniyatlaridan topishimiz mumkin. Aholi *birlamchi* talabini qondirish – kundalik oziq-ovqatlar va eng zaruriy nooziq-ovqat mollari xarid qilish ularni ishlab chiqaruvchilar va sotuvchilar uchun koʻp muammolar tugʻdirmaydi. Ammo aholi daromadlari oʻsib borishi, iste'molchilarning ikkilamchi talabiga muvofiq, ust-bosh kiyim va uy-roʻzgʻor tovarlarini ishlab chiqarish hamda sotishni tashkil etish birmuncha yuqori saviyani etadi. Iste'molchilar talabining uchinchi bosqichi – hayot kechirishini yuqori darajaga ko'tarish (qulaylik va yuksak xizmat koʻrsatish) bilan bogʻliq zamonaviy uy-roʻzgʻor, texnik, dam olish, sport, qimmatbaho kiyimlar, mashina va boshqalarga bo'lgan ehtiyojni qondirishga o'tilishi marketingning ham tovar va xizmatlar ishlab chiqaruvchilarning bozordagi haqiqiy konsepsiyasiga aylanishi bilan bogʻliq. Chunki har bir mamlakat, shu jumladan chambarchas Oʻzbekistonda ham iqtisodiyotning rivojlanishida aholi iste'mol darajasi o'sib borishining yuqoridagi bosqichlaridan o'tiladi va unga muvofiq bozorning asosiy qonuni – «Talab va taklif» mutanosibligini ta'minlash uchun barcha imkoniyatlar izlanadi.

Marketing esa, ilm-fan sifatida milliy, mintaqaviy va jahon bozorlarida «Talab va taklif» oʻrtasida muvozanat oʻrnatishning asosiy vositasi boʻlib xizmat qiladi.

Marketing faoliyati ishlab chiqarilayotgan tovarlarning yoki koʻrsatilayotgan xizmatlarning turiga qarab quyidagi bozorlarda olib boriladi:

- 1) iste'mol tovarlari bozori aholining shaxsiy ehtiyojini qondiruvchi va hayot uchun zarur bo'lgan jihozlar, mahsulotlar oldi-sotdi munosabatlari majmuini o'z ichiga oladi. Bu bozorning subyektlari: ulgurji savdo bazalari, do'konlar, oshxona, choyxona, dorixona va shu kabi chakana savdo-sotiq bilan shug'ullanuvchi shoxobchalar hisoblanadi;
- 2) *xizmatlar bozori* aholiga maishiy, maorif, tibbiy, texnik, kommunal xizmatlar koʻrsatish boʻyicha oldi-sotdi munosabatlarini ifodalaydi;
- 3) ishlab chiqarish vositalari bozorida sanoat korxonalari, agrofirma va xalq xoʻjaligining qolgan barcha tarmoqlari uchun zarur boʻlgan dastgoh, jihoz va butun kerakli tovarlar oldi-sotdisi tashkil etiladi. Bu bozorni bizning mamlakatda «Oʻzulgurjibirjasavdo»si tizimi miqyosida tashkil etiladi:
- 4) sarmoyalar bozori birlamchi va ikkilamchi guruhlarga boʻlinadi. Birlamchi birjalarda qimmatbaho qogʻozlar egalari qatnashadilar. Ikkilamchida esa ular qayta savdoga qoʻyiladi. Bozorni harakatga keltiruvchi asosiy omillar talab, taklif va baho hisoblanadi. Agar bozor muvozanati, ya'ni talab va taklifning miqdoriy va tarkibiy jihatdan birbiriga muvofiqligi ta'minlangan boʻlsa, bu holatdan taklif sohibi ham talab egasi ham oʻzlarining maqsadlariga erishadilar (1-chizma), taklif qiluvchi oʻz tovarini muvozanatni ta'minlovchi bahoda sotayotganidan manfaatdor, talab egasi ham ushbu muvozanatni ta'minlovchi S bahoda olganidan manfaatdordir.



1-chizma.


A – talab bilan baho oʻrtasidagi oʻzaro bogʻlanishni ifodalovchi egri chiziq, ya'ni talab oshgan sari baho ham oshadi.

V – taklif bilan baho oʻrtasidagi oʻzaro bogʻlanishni ifodalovchi egri chiziq, ya'ni taklif koʻpaygan sari tovarning bahosi pasaya boradi.

S – ikki **A** va **V** egri chiziqlar shunday kesishadiki, bu holatdan ikkala tomon rozi, ya'ni baho muvozanati yuzaga keladi, ya'ni 300 so'mdan sotilgan tovardan sotuvchi ham manfaatdor, oluvchi ham. Bu holat talab va taklifning dialektik birligini, ularning o'zaro bog'liqligini, o'zaro harakatini va obyektiv ravishda muvozanatga intilishini anglatadi.

Ammo ayrim subyektiv va obyektiv sabablarga koʻra, ushbu S muvozanat buzilsa, uni tiklash boʻyicha qonun vositasi — marketing ishga solinadi. Natijada ishlab chiqaruvchi bilan iste'molchi oʻrtasida oʻzaro munosabatlar namoyon boʻladi. Marketing oʻz navbatida tovarni bozorga taklif qilinganlik holatlarini tahlil qiladi. Bir vaqtning oʻzida talab qiluvchi holatlarini ham tahlil qiladi. Qilingan ishlar natijasida olingan ma'lumotlar orqali ishlab chiqarishni moslashtirish uchun zarur qarorlar qabul qilinadi (2-chizmaga qarang). Chizmadan koʻrinib turibdiki, marketing ishlari bir necha yoʻnalishlar boʻyicha amalga oshiriladi. Holatlar chuqur tahlil qilinadi, ularning oʻzgarishi muvozanatga qanday ta'sir koʻrsatishi ustida nazariy va amaliy taxminlar qilinadi. Holatlar tahlil qilinib boʻlgandan soʻng, zarur xulosalar chiqariladi va ularning

variantlari ishlab chiqaruvchiga yetkaziladi. Bu ishlarni menejerlar amalga oshiradilar.



2-chizma. Marketing faoliyati orqali bozor muvozanatini oʻrganish.

Rahbariyat marketingning muhimligini ta'kidlash, uning vazifalarini belgilash va uni firmaning umumiy faoliyatiga qo'shish orqali marketing rolini aniqlaydi. Marketing hal qiluvchi ovoz, bevosita hukmronlikka ega bo'lganda, uning firma uchun zarurligi namoyon bo'ladi; marketing rahbari o'z maqomiga ko'ra faoliyatning boshqa sohalari rahbarlari bilan teng darajada va unga tegishli resurslar ajratib beriladi.

Marketing xizmati aniqlaydigan omillar. Marketing xizmati boshqaradigan asosiy tarkibiy qismlar quyidagilar:

- aniq maqsadga moʻljallangan bozorni tanlash, maqsadli bozor
 (iste'molchilarning ma'lum guruhi)ni tanlash jarayoni uning oʻlchovlari
 va xususiyatlari bilan bogʻliq masalalarni oʻz ichiga oladi;
- marketing maqsadlarini tanlash, u oliy rahbariyat tomonidan belgilangan maqsadlarga emas, koʻproq iste'molchilarga moʻljallangan boʻladi;

- marketing tashkil etishni tanlash, bosh masala, uning bir butunligi, maqsadga erishishda muvaffaqiyatni ta'minlovchi barcha omillarning oʻzaro aloqasidir;
- tanlangan rejani nazorat qilish va boshqarish bu butun faoliyatni, ayni paytda uning ayrim sohasini nazorat va tahlil qilish bilan bogʻliq boʻlgan alohida muhim omillar. Muntazam ravishda baholash ishlarini oʻtkazib turish lozim.

Marketing nazorat qiladigan omillar 3-chizmada berilgan:



3-chizma. Marketing nazorat qiladigan omillar.

Bozorni sigmentlarga ajratish – uning iste'molchilarini maxsus guruhlash demakdir. Marketing amaliyotida bozorni sigmentlarga boʻlishda uch xil yondashuv ishlab chiqilgan:

- 1) korxonaning ommaviy bozorga kirishida u keng xaridorlar ommasiga qaratilgan bir xil marketing dasturiga ega boʻladi;
- 2) sigmentlashgan bozor, korxona unda asosiy e'tiborni alohida belgilarga ega bo'lgan bir xil sigmentlarga qaratadi. Ana shu sigment uchun maxsus dastur ishlatiladi;
- 3) koʻpchilik koʻrsatkichlari bilan tabaqalashgan bozor, bunda oʻz xususiyatlari bilan farqlanadigan bir yoki ikki xil segmentga alohida ishlab chiqiladi.

Bozor segmentlari doimiy emas. Har doim korxona oʻzining imkoniyatlariga va maqsadlariga mos holda bozorni quyidagi

segmentlarga boʻlish mumkin. Masalan, iste'mol tovarlari bozorida quyidagi segmentlar mavjud:

- xaridorlar segmentlari, iste'molchilar, ularning xatti-harakatlari, talablari;
 - tovar segmentlari, ommaviy va arzon, qimmat va yangi;
 - savdo segmentlari, tovar harakati, sotish usullari;
- geografik segmentlari, iqtisodiy rivojlanish darajasi, joylashishiga qarab, tuman, shahar, viloyatlar aholisi soni boʻyicha.

Marketing konsepsiyasiga asosan, har qanday korxona, bozorda muvaffaqiyatga erishish uchun, eng avvalo, iste'molchilar tilak-istaklarini nazarda tutadi. Bu esa iste'mol jarayonini, aholi ehtiyoji va talabini bilish, ularga mos tushadigan tovarlar va xizmatlar taklif etishni taqozo qiladi.

Ushbu masalani yechishda quyidagi qoidalarga rioya qilinadi:

- 1) xaridorni tushunish va uni qiziqtiradigan tovarlarni aniqlash;
- 2) tovar va xizmatlarning mulkchiligini ta'minlash;
- 3) tovarlar haqida kerakli axborotlar yetkazib berish.

Yuqoridagi qoidalarni bajarish, marketingning quyidagi toʻrt aksiomasiga asoslanadi:

- qiziqtirish muvaffaqiyat garovi;
- raqobat tanlashni ragʻbatlantiradi;
- tanlov qiyinchilik tugʻdiradi;
- tanlovdagi raqobat tovarni takomillashtiradi.

Tayanch tushunchalar:

Menejment, moliya menejmenti, ishlab chiqarish menejmenti, biznes rejaning mohiyati, marketing, bozor segmentlari.

Savol va topshiriqlar:

- 1. Prezident Islom Karimovning: «Rahbarning soxta obro'si bo'lishi emas, amaliy faoliyatining obro'si bo'lsin», degan talabining mohiyatini tushuntiring.
 - 2. Menejment ishining mazmuni nima?
 - 3. Menejmentning qanday usullari mavjudligini tushuntirib bering.
 - 4. Menejmentga qanday talablar qoʻyiladi?
 - 5. Motivatsiyaning qanday turlarini bilasiz?
 - 6. Siz qanday fazilatli shaxslarni rahbar boʻlishga loyiq deb oʻylaysiz?

- 7. Siz oʻzingizni rahbar boʻlishga loyiq deb oʻylaysizmi?
- 8. Sizningcha, rahbarlik qobiliyati nimalarda koʻrinadi?
- 9. Rahbarlik kasbmi yoki maxsus qobiliyatning namoyon boʻlishimi?
- 10. Firma faoliyatida marketingning zarurligini tushuntiring.
- 11. Yaponiyada nima uchun ishdan boʻshatishni eng oliy jazo deb biladilar?

Mavzuni chuqur o'rganish instrumentariysi

Menejment (ingl. management – boshqaruv, tashkilotchi) – firma faoliyatining bozor sharoitiga moslashib turishida katta ahamiyatga ega faoliyat. Keng ma'noda menejment maxsus boshqarish faoliyatini bildiradi. Boshqaruv – bu tanlov, qaror qabul qilish va uning bajarilishini nazorat qilish jarayonidir.

Menejment subyekti – boshqarish ishini bajaruvchi idoralar va ularning rahbarlari, ya'ni boshqaruv organlari yoki menejerlar – boshqaruvchilardir.

Menejment obyekti – boshqariluvchi hodisa va voqelikdir (mamlakat, viloyat, tuman, shahar, konsern, xolding, iqtisodiyot, ishlab chiqarish, firma, xodimlar).

Boshqarish funksiyasi – u yoki bu obyektni boshqarishga oid aniq vazifalarni hal etishga qaratilgan bir turdagi ishlar majmui.

Boshqarish strukturasi – boshqaruv maqsadlarini amalga oshiruvchi va funksiyalarini bajaruvchi bir-biri bilan bogʻlangan turli boshqaruv organlari va boʻgʻinlarining majmuidir (vazirlik, birlashma, korxona (firma), sex, uchastka).

Boshqarishning iqtisodiy usullari – iqtisodiy manfaatlardan foydalanishga asoslangan boshqaruvdir.

Boshqarishning ijtimoiy-ruhiy usuli – bu ijtimoiy-ma'naviy vaziyatga ta'sir etish yoʻli bilan kishilarning fe'l-atvori, ruhiyatini hisobga olib, ularning ijtimoiy talablarini qondirish orqali boshqariladi.

Marketing – bozor holatini asosli oʻrganish va oldindan baholash bilan tovarlarni ishlab chiqarish va sotishni tashkil etish hamda shu yoʻsinda yaxshi foyda topishni uyushtirish.

Mavzu yuzasidan asosiy xulosalar:

- 1. Menejment xoʻjalik faoliyatini samarali tashkil etish uchun boshqarish, rahbarlik qilish, moddiy, moliyaviy va mehnat resurslaridan unumli foydalanish san'ati, usullari, shakllari va vositalari majmuidir.
- 2. Menejment ishlab chiqarish korxonalarining iqtisodiy faoliyatini tashkil etish bilan ularning ijtimoiy-sotsial va iqtisodiy samaradorligini ta'minlaydi. U ishlab chiqarish samaradorligini oshirishga ta'sir etgan holda pirovard natijada mavjud ehtiyojlarni toʻliq qondirishga qaratilgandir.
- 3. Dunyo boʻyicha marketingning ikki mingdan ortiq ta'rifi mavjud boʻlib, uning murakkabligi va koʻp qirraligini ifodalaydi. Shuningdek, marketing boʻyicha turli oqimdagi juda koʻp maktablar, biznes guruhlari mavjud.
- 4. Marketing xaridorlarning ehtiyojlarini qondirish, bozor muammolarini yechishga har tomonlama yondashish, ehtiyojlarni ayirboshlash yordamida qondirishga qaratilgan faoliyat turi.
- 5. Marketing bu faol assortiment siyosatini, narx, oldi-sotdi, reklama, iste'molchilarni oʻrganish, tomonlar bilan munosabatlarga kirishish, tijorat tavakkalchiligi va raqobatchilarni oʻrganadigan fan.

III BO'LIM. MAKROIQTISODIYOT

12-MAVZU. MAKROIQTISODIY BARQARORLIK, IQTISODIY O'SISH VA INVESTITSIYA SIYOSATI

1. «Makroiqtisodiyot» tushunchasi, uning asosiy makroiqtisodiy koʻrsatkichlari

Ma'lumki, oʻtmishda Oʻzbekiston iqtisodiyoti sobiq sovet Ittifoqi iqtisodiyotining tarkibiy qismi hisoblanib, mustaqil milliy iqtisodiyot hisoblanmas edi. Bizga bir yoqlama rivojlangan paxta yakka hokimligiga, xom ashyo ishlab chiqarishga va boy mineral – xom ashyo resurslaridan nazoratsiz, ayovsiz foydalanish asosiga qurilgan, yonilgʻi, gʻalla va boshqa koʻpgina ishlab chiqarish resurslari hamda iste'mol tovarlarining ta'minlanishi boʻyicha markazga qaram boʻlgan iqtisodiyot meros boʻlib qolgan edi. Mamlakat Prezidenti Islom Karimov uqtirganidek, «Oʻzbekiston bir yoqlama iqtisodiyotga – markazga butunlay qaram, izdan chiqqan iqtisodiyotga ega boʻlgan» mamlakat edi¹.

1991-yildan buyon oʻtgan qisqa davr mobaynida iqtisodiy mustaqillikni qoʻlga kiritib, mamlakatimiz hududidagi barcha tabiiy, mineral xom ashyo boyliklaridan mamlakatimizdagi butun iqtisodiy resurslar va quvvatlardan oʻz xalqimiz va uning kelajagi manfaatlari yoʻlida foydalanish imkoniyatiga ega boʻldik. Yangi energetika, mashinasozlik va boshqa sanoat tarmoqlarining vujudga kelishi, koʻplab yirik inshootlar, korxonalar, zavod va fabrikalar qurilganligi, yonilgʻi va gʻalla mustaqilligiga erishilganligi iqtisodiyotdagi tarkibiy oʻzgarishlar, izchil oʻsish sur'atlari milliy mustaqil iqtisodiyotni mustahkamlash sari harakat natijalaridir.

Shunday qilib, Oʻzbekistonda bozor munosabatlariga asoslangan yangi, mustaqil rivojlanayotgan, oʻz xalqi, millati manfaatlariga xizmat qiladigan milliy iqtisodiyot shakllanib bormoqda. Milliy iqtisodiyot, barcha tarmoqlar va sohalarni, mikro va makro iqtisodiyotlarni, funksional iqtisodiyotni, koʻplab infratuzilmalarni oʻz ichiga olgan yaxlit iqtisodiyotdir.

Makroiqtisodiyot (lotincha «macro» – «katta», «uzun», arabcha «iqtisodiyot» – xoʻjalik yuritish ma'nolarida) – iqtisodiy tizimdagi barcha

 $^{^1}$ Qarang: *Каримов И. А.* Ўзбекистон XXI асрга интилмокда. – Т.: «Ўзбекистон», 1999. – Б. 6.

ishtirokchilarning xususiyatlarini oʻrganish. Makroiqtisodiyot umumiqtisodiy jarayonlarga urgʻu beradi. Umumiqtisodiy jarayon pul bilan «tirik». Pul boʻlmagan, pul muammolari rivojlanmagan joyda makroiqtisodiyot boʻlishi mumkin emas. Atoqli ma'rifatparvar vatandoshimiz Abdulla Avloniyning yozishicha: «Iqtisodiyot deb, pul va mol kabi ne'matlarning qadrini bilmoqqa aytilur. Mol qadrini biluvchi kishilar oʻrinsiz yerga bir tiyin sarf qilmas, oʻrni kelganda, soʻmni ayamas».

Makroiqtisodiyot alohida mahsulot va xizmatlar bozorlarini oʻrganadigan mikroiqtisodiyotdan farqli oʻlaroq, milliy iqtisodiyotni tizim koʻrinishida, ya'ni mahsulot va xizmatlar, pul va qimmatbaho qogʻozlar, yollanma ishchi kuchi bozorlarini bir-biriga bogʻlashda oʻrganadi. Makroiqtisodiyot fanining vazifasi yuqorida qayd etilgan bozorlar harakatining davlat aralashuvi hisobiga olingan holda makroiqtisodiy xususiyatlarni aniqlashdir.

Makroiqtisodiyot – iqtisodiy fanlarning tarmogʻi boʻlib, iqtisodiyotning amal qilishini yaxlitlikda oʻrganadigan va tushuntiradigan fandir. Makroiqtisodiyot – bu mamlakat miqyosida moddiy ishlab chiqarish va nomoddiy sohalarni bir butun qilib birlashtirgan milliy xoʻjalik darajasidagi iqtisodiyotdir.

Pozitiv makroiqtisodiyot – real iqtisodiy voqeliklarni oʻzaro aloqadorlikda oʻrganadi.

Normativ (me'yoriy) makroiqtisodiyot — iqtisodiy faoliyatning aniq yoʻnalishlarini taklif etadi.

Makroiqtisodiyotni oʻrganishning asosiy metodlari quyidagilar:

- ilmiy abstraksiya;
- analiz va sintez;
- oddiylikdan murakkablikka;
- deduksiya va induksiya;
- statistik;
- iqtisodiy-matematik, modellashtirish.

Makroiqtisodiy siyosatning asosiy shakllari quyidagilardan iborat:

- pul-kredit (monetar);
- budjet soliq (fiskal);
- investitsiya;
- tashqi savdo;
- ijtimoiy.

Makroiqtisodiy siyosatning asosiy vazifasi — makroiqtisodiy mutanosiblikni ta'minlash, iqtisodiy o'sish va aholi farovonligini ta'minlashdir. Milliy xo'jalikning tarkib topgan tuzilishi ijtimoiy mehnat taqsimoti rivojining natijasi hisoblanadi. Makroiqtisodiyot oʻz ichiga xalq xoʻjaligining moddiy va nomoddiy ishlab chiqarish hamda xizmat koʻrsatish sohalarini oladi.

Milliy iqtisodiyot me'yorida faoliyat qilish va barqaror o'sishi uchun barcha tarmoq va ishlab chiqarish sohalarining o'zaro bog'liqligi va muvozanatli rivojlanishi talab qilinadi. Milliy iqtisodiyotda ishlab chiqarish, xizmat koʻrsatish hajmi va ularning oʻsishi bir qator koʻrsatkichlar tizimi orgali, mikro va makroigtisodiy darajada aniqlanib, tahlil qilinadi. Koʻpgina mikro koʻrsatkichlar yordamida korxonalar faoliyatiga baho berilib va ular iqtisodiyotining rivojlanish tamoyillari aniqlansa, makroiqtisodiy koʻrsatkichlar orqali butun iqtisodiyotning holati uning o'sishi yoki orqaga ketishi tahlil qilinib, xulosa chiqariladi. Ular yordamida davlat o'z iqtisodiy siyosatini belgilaydi. Bu tizimga kiruvchi turli xil koʻrsatkichlar, birinchidan, bizga ma'lum vaqt oralig'idagi ishlab chiqarish hajmini hisoblash va milliy iqtisodiyotning faoliyat yuritishiga bevosita ta'sir qiluvchi omillarni aniqlash imkonini beradi. Ikkinchidan, makroiqtisodiy koʻrsatkichlar tizimi, YAMMni uning harakatining barcha bosqichlarida, ya'ni ishlab chiqarish, taqsimlash, qayta taqsimlash va natijada foydalanish bosqichlarida koʻrgazmali shaklda aks ettirishga imkon beradi.

Nihoyat, mazkur koʻrsatkichlar tizimi mavjud resurslar va ulardan foydalanishning mos kelishi (tengligi) kuzatilganda, mamlakatdagi umumiy iqtisodiy muvozanatlik holatini aks ettiradi. Butun milliy iqtisodiyotning holatini xarakterlovchi muhim makroiqtisodiy koʻrsatkichlarni keltirishni lozim topdikki, bu oʻquvchilarda mavzuni oʻrganish uchun qulaylik yaratadi:

> tovarlar va xizmatlar ishlab chiqarish:

- yalpi milliy mahsulot (YAMM);
- *sof milliy mahsulot (SMM);*
- *milliy daromad (MD).*

budjet-soliq sohasi:

- davlat budjetining daromadlari va xarajatlari;
- davlat budjetining defitsiti (taqchilligi);
- YAIMdan soliqlarni olish darajasi.

> pul-kredit sohasi:

- inflatsiya darajasi;
- Markaziy bankning qayta moliyalashtirish stavkasi;
- pul massasi hajmi.

> tashqi savdo:

- eksport;
- import;
- tashqi savdo aylanmasi.
- > turmush darajasi:
- aholi jon boshiga YAIM;
- aholi jon boshiga MD;
- *aholi daromadlari*;
- aholining shaxsiy tasarrufidagi daromadlar;
- iste'mol baholari indeksi.
- > aholi bandligi:
- ishsizlik darajasi;
- ish bilan band boʻlganlar va ish kuchi soni.

Bu koʻrsatkichlar moddiy ishlab chiqarish va nomoddiy xizmat koʻrsatish sohalaridagi barcha xoʻjaliklar iqtisodiy faoliyatining umumiy va pirovard natijalarini qamrab oladi.

Yalpi milliy mahsulot (YAMM) — milliy xoʻjaliklarda bir yil davomida vujudga keltirilgan va bevosita iste'molchilarga borib tushishi mumkin boʻlgan tayyor pirovard mahsulot va xizmatlarning bozor narxidagi qiymatidan iborat boʻladi.

Prezident Islom Karimov Oʻzbekiston Respublikasi Oliy Majlisi Qonunchilik palatasi va Senatining qoʻshma majlisidagi (2010-yil 12-noyabr) «Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi» nomli ma'ruzasida: «Biz oʻz oldimizga qoʻygan uzoq muddatli strategik maqsadlar, ya'ni zamonaviy rivojlangan demokratik davlatlar qatoriga kirish, iqtisodiyotimizning barqaror oʻsishini ta'minlash, hayot sifatini yaxshilash va jahon hamjamiyatida munosib oʻrin egallash borasidagi sa'y-harakatlarimizga bugungi kun nuqtai nazaridan xolisona baho berishimiz tabiiydir. Ma'lumki, Oʻzbekiston 1991-yili oʻz mustaqilligini qoʻlga kiritganidan soʻng umrini oʻtab boʻlgan mustabid, ma'muriybuyruqbozlik, rejali-taqsimot tizimidan voz kechib, «Oʻzbek modeli» deb nom olgan oʻz taraqqiyot yoʻlini tanlab oldi.

Biz ishlab chiqqan va bugungi kunda hayotga tatbiq etayotgan ushbu modelning ma'no-mazmuni – davlat qurilishi va konstitutsiyaviy tuzumni tubdan o'zgartirish va yangilash, iqtisodiyotni mafkuradan xoli etish, uning siyosatdan ustunligini ta'minlash, davlatning bosh islohotchi vazifasini bajarishi, ya'ni islohotlar tashabbuskori bo'lishi va ularni muvofiqlashtirib borishi, qonun ustuvorligini ta'minlash, kuchli ijtimoiy siyosat yuritish, islohotlarni bosqichma-bosqich va izchil olib borish

tamoyillariga asoslanadigan siyosiy, iqtisodiy va ijtimoiy islohotlarni amalga oshirishdan iboratdir.

Biz islohotlarni inqilobiy usulda, ya'ni «shok terapiyasi» yoʻli bilan amalga oshirishdan ongli ravishda voz kechib, tadrijiy taraqqiyot yoʻlini tanlab olganimiz tufayli xalqimizni qanday ogʻir oqibatlarga olib kelishi mumkin boʻlgan iqtisodiy va ijtimoiy toʻfonlardan asrab qolishga muvaffaq boʻlganimizni bugun hayotning oʻzi tasdiqlab bermoqda. Izchil yuqori oʻsish sur'atlari, yurtimizda barpo etilgan bank-moliya tizimining barqaror va ishonchli faoliyat yuritishi, iqtisodiyotda amalga oshirilayotgan yangilanish va oʻzgarishlar, umuman, mamlakatimizni modernizatsiya qilish yoʻlidagi dadil qadamlarimiz dunyo jamoatchiligi, shuningdek, Xalqaro valuta jamgʻarmasi, Jahon banki, Osiyo taraqqiyot banki singari nufuzli xalqaro moliya tashkilotlari tomonidan e'tirof etilmoqda.

Haqiqatan ham, qariyb yigirma yillik mustaqil taraqqiyotimiz mobaynida Oʻzbekistonda yalpi ichki mahsulotning oʻsishi 3,5 barobarni, aholi jon boshiga hisoblaganda esa 2,5 barobarni, aholining real daromadlari 3,8 barobarni tashkil etgani e'tiborga sazovordir. Ayniqsa, ijtimoiy-gumanitar sohada erishilgan marralar — aholini ijtimoiy himoya qilish uchun yoʻnaltirilgan davlat xarajatlarining 5 barobar koʻpaygani, turmush darajasining sezilarli ravishda yaxshilangani va buning natijasida onalar oʻlimi 2 barobardan koʻproq, bolalar oʻlimi 3 barobar kamaygani, odamlarning oʻrtacha umr koʻrishi 67 yoshdan 73 yoshga, jumladan, ayollarning oʻrtacha umr koʻrishi 75 yoshga yetganini mamnuniyat bilan ta'kidlasak arziydi, deb oʻylayman.

2008–2010-yillarda, ya'ni dunyoning aksariyat mamlakatlarida iqtisodiy o'sish sur'atlari sezilarli ravishda tushib ketgan, ishlab chiqarish pasaygan bir vaqtda O'zbekistonda yalpi ichki mahsulotning o'sish sur'atlari 2008-yilda 9 foizni, 2009-yilda 8,1 foizni tashkil etgani, 2010-yilda bu ko'rsatkich 8,5 foizga yetishi kutilayotgani, kelgusi 2011-yilda esa 8,3 foiz darajasida bo'lishi belgilab berilayotgani ko'pgina xalqaro tuzilmalar, ekspert va mutaxassislarda katta qiziqish uyg'otmoqda», – deb ta'kidladi.

Demak, YAMM milliy iqtisodiyotda yil davomida ishlab chiqarilgan barcha pirovard mahsulot (xizmat)larning bozor narxidagi soʻmmasi. Bilamizki, joriy yilda ishlab chiqilgan barcha mahsulotlar sotilmasligi mumkin, ularning bir qismi zaxiralarni toʻldiradi. Ya'ni YAMM hajmini hisoblab topishda zaxiralarning har qanday oʻsishi hisobga olinishi zarur, chunki YAMM yordamida joriy yildagi barcha mahsulotlar (sotilgan va

sotilmagan) hisobga olinadi. Milliy ishlab chiqarishning yalpi hajmini toʻgʻri hisoblab chiqish uchun, mazkur yilda ishlab chiqarilgan barcha mahsulot va xizmatlar bir marta hisobga olinishi zarur. YAMM hajmini topishda sotilgan va qayta sotilgan mahsulotlarni koʻp marta hisobga olishlarni bartaraf qilish uchun, xalq xoʻjaligining barcha tarmoqlarida yaratilgan qoʻshilgan qiymatlar yigʻindisi olinadi.

Qoʻshilgan qiymat — bu korxona tomonidan ishlab chiqarilgan mahsulot qiymatidan yetkazib beruvchilardan sotib olingan va iste'mol qilingan xom ashyo va materiallar qiymati chiqarib tashlangandan keyin qolgan qismining bozor qiymati.

Boshqacha aytganda, qoʻshilgan qiymat — bu korxona yalpi mahsulotidan yoki ishlab chiqargan mahsulotining bozor narxidan (amortizatsiya ajratmasidan tashqari) joriy moddiy xarajatlar chiqarib tashlangan miqdoriga teng.

YAMM yordamida milliy iqtisodiyotda tovar va xizmatlar ishlab chiqarish yillik hajmini hisoblashga harakat qilinadi. YAMM yil davomida ishlab chiqarilgan barcha pirovard tovarlab va xizmatlarning bozor narxidagi so'mmasi bo'lganligi uchun tovarning o'zi, uning nafliligi koʻpaymagan holda baholar oshishi evaziga uning hajmi oshib ketishi mumkin. Baho ishlab chiqarish ymumiy hajmining har xil elementlarini yarona umumiy asosga keltirishning eng keng tarqalgan koʻrsatkichi sifatida foydalaniladi. Shuning uchun yalpi milliy mahsulotga baho berishda nominal va real milliy mahsulot hisobga olinadi. Joriy bozor baholarida hisoblangan milliy mahsulot nominal milliy mahsulot, o'zgarmas baholarda hisoblangan milliy mahsulot esa real milliy mahsulot, deb yuritiladi. Turli yillarda ishlab chiqarilgan YAMM qiymatini faqat narx oʻzgarmagan taqdirda oʻzaro taqqoslash mumkin bo'ladi. Bundan tashqari, narx dapajasi bizga iqtisodiyotda inflatsiya (narx darajasining o'sishi) yoki deflyatsiya (narx darajasining kamayishi) oʻrin tutganligini va uning miqyosi qandayligini bilish imkonini beradi.

Narx darajasi indeks shaklida ifodalanadi. Narx indeksi joriy yildagi ma'lum guruh tovarlar va xizmatlar toʻplami narxlari soʻmmasini, xuddi shunday tovarlar va xizmatlar miqdorining bazis davrdagi narxlar soʻmmasiga taqqoslash orqali hisoblanadi. Taqqoslashning boshlangʻich davri «bazis yil» deyiladi.

Farb mamlakatlari va xususan AQShda narx indekslari ichida eng keng qoʻllaniladigani iste'molchilik tovarlari savati narxlari indeksi hisoblanadi. Uning yordamida tipik shahar aholisi sotib oladigan iste'molchilik tovar va xizmatlarning 300 turini oʻz ichiga oluvchi bozor

savatining qayd qilingan narxlari hisoblanadi. Ammo narxning ymumiy darajasini hisoblash uchun YAMM narx indeksidan foydalaniladi.

YAMM narx indeksi ancha keng tushuncha boʻlib, u oʻz ichiga nafaqat iste'molchilik tovarlari, balki investitsion tovarlar, davlat tomonidan sotib olinadigan hamda xalqaro bozorda sotilgan va sotib olingan tovarlar va xizmatlar narxlarini ham oladi. YAMM narx indeksi, nominal YAMMni real YAMMga aylantirib hisoblash imkoniyatini beradi.

Nominal YAMM shu mahsulot ishlab chiqarilgan davrda amal qilib turgan narxlarda ifodalangan ishlab chiqarish hajmini bildiradi.

YAMM bilan birga, uning tarkibiy qismlari sifatida hisoblanish mumkin boʻlgan bir qator oʻzaro bogʻliq koʻrsatkichlar mavjud boʻlishini bildiradiki, ular milliy iqtisodiyotning turli tomonlarini xarakterlab beradi. YAMM koʻrsatkichiga sof eksport (eksport va import oʻrtasidagi farq) kiradi. Ammo turli mamlakatlarda tashqi savdo faoliyatining salmogʻi keskin farqlanadi. Shu sababli milliy iqtisodiyot rivojlanish darajasini taqqoslash uchun ichki milliy mahsulot (IMM) koʻrsatkichidan foydalaniladi.

IMM ma'lum vaqt davomida (bir yilda) mamlakat hududida ishlab chiqarilgan va iste'mol qilishga tayyor pirovard mahsulot va xizmatlarning bozor narxlaridagi qiymatidir. U barcha ishlab chiqarish subyektlarida qoʻshilgan qiymatlar yigʻindisi sifatida chiqadi. YAMM va IMM ishlab chiqarish yalpi hajmining koʻrsatkichi sifatida bitta muhim kamchilikka ega. Ular mazkur yilda ishlab chiqarish jarayonida foydalanilgan, asosiy kapitalning oʻrnini qoplash uchun zarur boʻlgan qiymatni ham oʻz ichiga oladi.

YAMMdan joriy yilda ishlab chiqarish jarayonida iste'mol qilingan asosiy kapital qiymati yoki yillik moddiy xarajatlar summasi ayirib tashlansa, sof milliy mahsulot (SMM) ko'rsatkichi hosil bo'ladi.

YAMM – moddiy xarajatlar yillik summasi = SMM.

Shunday qilib, SMM moddiy xarajatlar amortizatsiya ajratmasi summasiga kamaytirilgan YAMM sifatida chiqadi. SMM qiymatiga davlat tomonidan oʻrnatiladigan egri soliqlar summasi kiradi. Egri soliqlar davlat tomonidan oʻrnatiladigan narxga qoʻshiladigan xarajat hisoblanadi. Bunday soliqlar ogʻirligi iste'molchi zimmasiga tushadi va uning hisobiga oʻz daromadining bir qismini sarflaydi. Shuning uchun hozirgi davrda hisob tizimida SMMdan egri soliqlar chiqarib tashlansa, milliy daromad (MD) koʻrsatkichi hosil boʻladi, deb koʻrsatiladi.

SMM – biznesga egri soliq= milliy daromad.

Amaliyotda ishlab chiqarilgan va foydalanilgan MD farqlanadi. **Ishlab chiqarilgan MD** – bu yangidan yaratilgan tovar va xizmatlar qiymatining butun hajmi. **Foydalanilgan MD** – bu ishlab chiqarilgan MDdan yoʻqotishlar (tabiiy ofatlar, saqlashdagi yoʻqotishlar va h. k.) va tashqi savdo qoldigʻi chiqarib tashlangan miqdorga teng. Bizning amaliyotda MD iste'mol va jamgʻarish fondiga ajratiladi.

Iste'mol fondi – bu milliy daromadning jamiyat a'zolarining moddiy va madaniy ehtiyojlarini hamda butun jamiyat ehtiyojlarini (ta'lim, mudofaa va h. k.) qondirishni ta'minlashga ketadigan qismi.

Jamgʻarish fondi — bu milliy daromadning ishlab chiqarishni rivojlantirishga sugʻurta rezervlarini koʻpaytirishga sarflaydigan qismini ta'minlaydigan qismi.

Milliy daromadni, daromadlar barcha turlarini (amortizatsiya ajratmasi va biznesra egri soliqlardan tashqari) qoʻshib chiqish yoʻli bilan ham aniqlash mumkin. Shaxsiy daromad koʻrsatkichini topish uchun milliy daromaddan uy xoʻjaliklari qoʻliga kelib tushmaydigan daromadlarning yuqoridagi uchta turini (ishlab topilgan) chiqarib tashlashimiz hamda joriy mehnat faoliyatining natijasi hisoblanmagan daromadlarni unga qoʻshishimiz zarur.

Milliy daromad – ijtimoiy sugʻurta ajratmasi – korxona foydasiga soliqlar – korxonaning taqsimlanmaydiran foydasi + ijtimoiy toʻlovlar (davlatning transfert toʻlovlari) = shaxsiy daromad.

Shaxsiy daromaddan daromad soliqlari toʻlangandan keyin, uy xoʻjaliklarining toʻliq tasarrufida qoladigan daromad shakllanadi. Soliqlar toʻlangandan keyingi daromad shaxsiy daromaddan shu daromad hisobidan toʻlanadigan soliqlar miqdorini chiqarib tashlash yoʻli bilan hisoblanadi. Soliqlari toʻlangandan keyingi daromad uy xoʻjaliklari eng oxirida ega boʻladigan daromad hisoblanib, alohida shaxs va oilalar oʻz tasarrufida by daromadlarninr bir qismini iste'mol uchun sarflaydi va boshqa qismini jamgʻarmaga yoʻnaltiradi.

Makroiqtisodiy koʻrsatkichlarning qarab chiqilgan tahliliga asoslanib, bu koʻrsatkichlar butun tizimi nisbatini koʻrgazmali tasavvur qilishimiz mumkin boʻladi.

Ichki milliy mahsulot – moddiy xarajatlar = SMM. Sof milliy mahsulot – egri soliqlar = MD.

Milliy daromad – ijtimoiy sugʻurta ajratmalari – korxona foydasiga soliqlar – korxonada foydani taqsimlagandan keyin qolgan foydasi taqsimlanmaydigan foydasi + ijtimoiy toʻlovlar = shaxsiy daromad.

Shaxsiy daromad – shu daromad hisobidan daromad soliqlar = soliqlar toʻlangandan keyingi daromad deb nomlanadi.

Yalpi milliy mahsulotni hisoblash usullari. Milliy mahsulotni hisoblashda milliy hisob tizimidan foydalaniladi.

Milliy hisoblar – bu YAMM ishlab chiqarish, milliy daromadni hisoblash, taqsimlash hamda ulardan foydalanishni xarakterlaydigan oʻzaro bogʻliq makroiqtisodiy koʻrsatkichlar tizimidir. Milliy hisoblar tizimi deganda, mamlakatdagi xoʻjalik yurituvchi subyektlarda sarflangan xarajatlarni va ishlab chiqargan mahsulot va xizmatlarni hisoblash (buxgalteriya) majmuini tushunish zarur.

Bunday hisoblar xalqaro statistikada standart tizim sifatida 1953-yildan boshlab qoʻllanila boshladi. Hozirgi davrda dunyoning 100 dan oshiq mamlakatlarida, shu jumladan Oʻzbekistonda mazkur tizim keng qoʻllaniladi.

Milliy hisoblar asosini yigʻma balanslar tashkil qiladi. Bunga daromad va xarajatlar balansi misol boʻlishi mumkin. Daromadlar xoʻjalik birliklari va aholi umumiy daromadlari (ish haqi, foyda, daromadlarning boshqa turlari, amortizatsiya) summasini aks ettiradi. Xarajatlar toʻrtta guruhdan iborat boʻladi: iste'mol, investitsiyalar, davlat xaridi, sof eksport. Milliy hisoblar makroiqtisodiyotning me'yoridagi — muvozanatli holatga erishish darajasini aniqlashga yordam beradi.

YAMM (IMM) uch xil usul bilan hisoblanishi mumkin:

Birinchi usul – bu YAMMni hisoblashga qoʻshilgan qiymatlar boʻyicha yondashuv. Bunda milliy iqtisodiyotning barcha tarmoqlari boʻyicha yaratilgan qoʻshilgan qiymatlar qoʻshib chiqiladi (YAIM tarmoq va ishlab chiqarishlar boʻyicha). Bu usul bilan hisoblangan YAMM (IMM) alohida tarmoqlarning shu mahsulotini yaratishdagi oʻrnini va hissasini aniqlash imkonini beradi.

Ikkinchi usul – bu YAMM (YAIM)ni hisoblashga sarf-xarajatlar boʻyicha yondashuv.

Bunda mazkur yilda ishlab chiqarilgan barcha mahsulot (xizmat)lar hajmini sotib olishga qilingan butun sarflar qoʻshib chiqiladi. Milliy iqtisodiyotda ishlab chiqarilgan pirovard mahsulotlarni mamlakat ichida xoʻjalikning uchta subyekti — uy xoʻjaliklari, davlat, tadbirkorlar hamda tashqaridan chet ellik iste'molchilar sotib olishi mumkin.

Uy xoʻjaliklarining iste'molchilik sarflari. Bu kundalik tovarlarga, xizmatlarga, uzoq muddat foydalaniladigan iste'mol buyumlariga va boshqalarga qilinadigan sarflardir.

Investitsion sarflar tadbirkorlik sektorining asosiy kapitalni yalpi jamgʻarishga qiladigan sarflardir. Investitsion sarflar acocan uchta qismdan iborat: a) tadbirkorlar tomonidan mashina, yskuna va stanoklarning barcha xaridi; b) barcha qurilishlar; c) zaxiralarning oʻzgarishi.

Birinchi guruh elementlarning «investitsion sarflar» tarkibiga kiritilish sababi aniq, qurilishlarning uning tarkibiga kiritilishi, oʻzoʻzidan aniqki, yangi fabrika, ombor yoki gʻalla ombori qurilishi investitsiyalar shakli hisoblanadi.

YAIM tarkibiga zaxiralarining koʻpayishi, ya'ni ishlab chiqarilgan, lekin mazkur yilda sotilmagan barcha mahsulotlar kiritiladi. Boshqacha aytganda, YAIM oʻz ichiga yil davomidari zaxiralar va ehtiyojlar barcha oʻsishining bozor qiymatini oladi. Zaxiralarning by oʻsishi YAIMra joriy ishlab chiqarish hajmi koʻrcatkichi sifatida qoʻshiladi. Zaxiralar kamayganda, u YAIM hajmidan chiqarilishi zarur. Zaxiralarning kamayishi yil davomida milliy iqtisodiyotda ishlab chiqarilgandan koʻproq mahsulot sotilganini bildiradi. Boshqacha aytganda, jamiyat mazkur yilda ishlab chiqarilgan barcha mahsulotni va bunga qoʻshimcha oldingi yillardan qolgan zaxiralarning bir qismini iste'mol qilgan boʻladi.

Milliy hisoblar tizimida YAIMni hisoblashda yalpi, xususiy va «ichki investitsiyalar» tushunchasidan foydalaniladi. Xususiy va ichki investitsiyalar mos ravishda xususiy va milliy kompaniyalar amalga oshiradigan investitsion sarflarni bildiradi. Yalpi investitsiyalar oʻz ichiga joriy yilda ishlab chiqarish jarayonida iste'mol qilingan mashina, uskuna va qurilmalarning oʻrnini qoplash uchun moʻljallangan barcha investitsion tovarlar ishlab chiqarishni hamda iqtisodiyotda kapital qoʻyilmalar hajmiga har qanday sof qoʻshimchalarni oladi. Yalpi investitsiyalar mohiyatiga koʻra iste'mol qilingan asosiy kapitalni qoplash soʻmmasidan va investitsiyalarning oʻsgan qismidan iborat boʻladi. Boshqa tomondan «sof xususiy ichki investitsiyalar» tushunchasi joriy yil davomida qoʻshilgan investitsion tovarlar soʻmmasini tavsiflash uchun ishlatiladi.

Yalpi investitsiyalar va amortizatsiya (shu yili ishlab chiqarish jarayonida iste'mol qilingan asosiy kapital hajmi) oʻrtasidagi nisbat, iqtisodiyot yuksalish, turgʻunlik yoki tanazzul holatida joylashganligini tavsiflab beruvchi koʻrsatkich (indikator) hisoblanadi.

Yalpi investitsiyalar amortizasiyadan ortiq boʻlsa, iqtisodiyot yuksalish bosqichida joylashadi, uning ishlab chiqarish quvvatlari oʻsadi.

Turgʻun iqtisodiyot yalpi investitsiyalar va amortizatsiya teng boʻlgan vaziyatni aks ettiradi. Bu iqtisodiyotda mazkur yilda YAIMni ishlab chiqarish jarayonida iste'mol qilingan vositalarni qoplash uchun zarur boʻlgan miqdorda asosiy kapital ishlab chiqarishni bildiradi. Boshqacha aytganda, sof investitsiyalar taxminan nolga teng boʻladi, ishlab chiqarish quvvatlari kengaymaydi.

Yalpi investitsiyalar amortizasiyaga qaraganda kam boʻlsa, ya'ni iqtisodiyotda ishlab chiqarilganga qaraganda kapital koʻproq iste'mol qilinca, noqulay vaziyat vujudga keladi. Bunday sharoitda iqtisodiyotda investitsiyalarning qisqarishi poʻy beradi. By yil oxirida kapital hajmi boshida mavjud boʻlgandan kam boʻlib qolishiga olib keladi. Masalan, «Buyuk turgʻunlik» davrida, aniqrogʻi 1933-yil AQShda yalpi investitsiyalar hammasi boʻlib 1,6 mlrd. dollarni, yil davomida iste'mol qilingan kapital — 7,6 mlrd. dollarni tashkil qilgan. Shunday qilib, investitsiyalarning sof qisqarishi 6 mlrd. dollarga teng boʻlgan.

Davlat sarflari – bu mahsulotlarni va iqtisodiy resurslarni, xususan ishchi kuchini sotib olishga davlatninr (boshqaruvning quyi va mahalliy oranlari bilan birga) qilgan barcha sarflapini oʻz ichiga oladi.

Chet elliklarning milliy iqtisodiyot tovarlariga sarflari xuddi mamlakat ichidagi iste'molchilik sarflari kabi milliy ishlab chiqarish darajasiga bogʻliq. Shu sababli YAIMni sarflar boʻyicha hisoblashda tovar va xizmatlarga chet elliklarning sarflari, ya'ni eksport qiymati ham qoʻshiladi.

Boshqa tomondan, iste'molchilik va investitsion sarflar hamda davlat mablagʻlarining bir qismi import qilingan, ya'ni chet elda ishlab chiqarilgan tovarlarga sarflanadi. Milliy ishlab chiqarish umumiy hajmi asossiz oshib ketmasligi uchun import hajmi YAIMdan chiqariladi. Buning uchun eksport va import miqdorlari oʻrtasidagi farq aniqlanadi. Bu farq tovar va xizmatlarning sof eksporti yoki oddiy qilib sof eksport deyiladi. Sof eksport ijobiy va salbiy boʻlishi mumkin. Agar eksport importdan ortiq boʻlsa, bu ijobiy, eksportdan import ortiq boʻlsa, salbiy boʻladi.

Qarab chiqilgan sarflarning toʻrt toifasiga notijorat muassasalar (kasaba uyushmalar, siyosiy partiyalar, diniy tashkilotlar va ijtimoiy tashkilotlar) sarflari va moddiy aylanma vositalari zaxirasidagi oʻzgarishlarni qoʻshib chiqish yoʻli bilan YAIM (IMM) hajmi aniqlanadi.

Uchinchi usul – bu YAMM (YAIM)ni daromadlar boʻyicha hisoblash.

Mazkur yilda ishlab chiqarilgan pirovard mahsulot hajmidan olingan barcha daromadlar uy xoʻjaliklari ixtiyoriga ish haqi, renta toʻlovlari, foiz va foyda shaklida kelib tushadi. Shu sababli bu usulda YAMM (YAIM) pirovard mahsulot hisobidan olingan ana shu barcha daromadlarni qoʻshib chiqish orqali aniqlanadi.

YAMM (YAIM)ni daromadlar boʻyicha hisoblashda uy xoʻjaliklari, korxona va davlat muassasalarining dastlabki, ya'ni taqsimlangan daromadlarini mehnat haqi va yalpi foydaga (renta, ssuda foizi va tadbirkorlik foydasi va h.k.) ajratish mumkin. YAMM (YAIM)ni mazkur usul boʻyicha hisoblashda daromadlarning barcha summasiga iste'mol qilingan asosiy kapital qiymati (amortizatsiya ajratmasi) va biznesga egri soliqlar soʻmmasi ham qoʻshiladi. Agar YAMMni hisoblashning oxirgi ikki usulini oddiy tenglik shaklida tasvirlasak:

Mazkur yilda ishlab chiqarilgan IMMni sotib olishga sarflar hajmi = mazkur yilda ishlab chiqarilgan IMMdan olingan pul daromadlari summasi.

Mahsulotni ishlab chiqarishga nima sarflangan boʻlsa, bu mazkur mahsulotni ishlab chiqarishga oʻzining ishchi kuchi va moddiy resurslarini bozorda sotishga qoʻyganlari uchun daromad hisoblanadi.

1-jadval

O'zbekiston Respublikasining asosiy makroiqtisodiy
ko'rsatkichlari (1999–2010-yillar)

	Oʻlchov	1990-	2000-	2010-	1990-yilga	
	birligi	yil	yil	yil	nisbatan foiz	
					hisobida	
					2000-	2010-
					yil	yil
Yalpi ichki mahsulot	million	27106	35277	92326	1,3	3,4
(xarid qobiliyati	dollar				marta	marta
pariteti boʻyicha)						
Sanoatning	foiz	17,6 ¹	14,2	24,0	X	X
YAIMdagi ulushi						
Qishloq xoʻjalik	milliard	$11,1^{2}$	1387	15811	100,6	182,9
mahsulotlari	so'm					
Qishloq xoʻjaligining	foiz	33,4	30.1	17,5	X	X
YAIMdagi ulushi						
Qurilish ishlari	milliard	$4,2^{2}$	388,4	8245,8	86,9	2,3
	so'm					marta

Chakana savdo	milliard	$19,8^2$	1788	21873	99,2	2,8
aylanmasi	so'm					marta
Xizmatlarning	foiz	33,8	37,0	49,0	X	X
YAIMdagi ulushi						
Kichik biznesning	foiz	0	31,0	52,5	X	X
YAIMdagi ulushi						
Asosiy kapitalga	million	833,8	3142,5	9712,7	3,8	11,6
investitsiyalar	dollar				marta	marta
	qiyma-					
	tida					
YAIMga nisbatan	foiz	18,0	22,9	25,0	X	X
foizda						
Tovarlar va xizmatlar	million	442,7	3265	13045	7,4	29,5
eksporti	dollar				marta	marta
YAIMga nisbatan	foiz	3,3	24	33,5	X	X
foizda						
Tovarlar va xizmatlar	million	362,9	2947	8800	8,1	24,2
eksporti	dollar				marta	marta
YAIMga nisbatan	foiz	2,7	21,4	22,6	X	X
foizda						
Tashqi savdo saldosi	million	79,8	317	42,45	X	X
	dollar					

¹ Asosiy ulushni umumittifoq bozori uchun xom ashyo va yarim fabrikatlar ishlab chiqarish egallagan.

Manba: Oʻzbekiston Respublikasi Davlat statistika qoʻmitasi.

Ma'lumot uchun: 2010-yilda YAIMning nominal hajmi 61,8 trillion so'mni tashkil etgan bo'lsa, 2011-yilda 78 trillion so'mni tashkil etgan.

Oʻzbekiston oʻz mustaqilligining dastlabki yillaridanoq bozor iqtisodiyotiga oʻtishning oʻziga xos yoʻlini tanlab, uni izchil amalga oshirishi natijasida MDH boshqa koʻplab mamlakatlaridan farqli ravishda, ishlab chiqarish va aholi turmush darajasining keskin pasayib, davlatning ichki va tashqi qarzlari haddan ziyod oshib ketishiga yoʻl qoʻymaslikka erishgan mamlakatlar qatoriga kiradi. Raqamlar bu haqida dalolat beradi: 1991–1995-yillarda Oʻzbekistonda yalpi ichki mahsulotning pasayishi, MDH davlatlari oʻrtasida eng kam koʻrsatkich – 18,8 foizni tashkil etdi. Holbuki, bu raqam Rossiyada – 53 foiz, Ukrainada – 52 foiz, Belorussiyada – 54,6 foiz, Qozogʻistonda esa 75,4 foizga teng boʻlgan. Qulay ishchan muhit yaratish, ishlab chiqarishni modernizatsiya qilish, texnik va texnologik yangilashga qaratilgan iqtisodiy islohotlarni

² Milliard rubl.

chuqurlashtirish jarayonlarining natijasi sifatida mamlakatimiz iqtisodiyoti 2004-yildan e'tiboran yiliga 7–9 foiz darajasidagi yuqori va barqaror oʻsish sur'atlarini namoyish qila boshlaganini MDH mamlakatlari statistika qoʻmitasi ma'lumotlari ham koʻrsatgan.

Xarid qobiliyati pariteti (XQP) boʻyicha YAIM 2010-yilda 1990-yilga nisbatan 3,4 barobar, ya'ni 27,1 milliard AQSh dollaridan 92,3 milliard AQSh dollariga oshdi. Qulay ishchan muhitning yaratilishi, investitsiyalar oqimining kuchayishi nafaqat iqtisodiy oʻsish sur'atlarini jadallashtirish, balki iqtisodiyot tarkibida muhim sifat oʻzgarishlarining yuz berishini ham ta'minladi. Xususan, iqtisodiyotni tarkibiy oʻzgartirish boʻyicha amalga oshirilgan siyosatning natijasi sifatida 2000–2011-yillarda qishloq xoʻjaligining mamlakatimiz yalpi ichki mahsulotidagi ulushi 30,1 foizdan 17,5 foizga kamayib, sanoatning ulushi 14,2 foizdan 24,1 foizga, xizmatlar ulushi esa 37 foizdan 49 foizga oʻsdi.

1992–1994-yillarda iste'mol narxlarining oʻrtacha oylik oʻsishi 21–23 foiz yoki oʻrtacha yillik oʻsishi 1000 va undan ortiq foizni tashkil etdi. Mamlakatimizda 1994-yilning 1-iyulidan boshlab milliy valutaning muomalaga kiritilishi, mustaqil budjet-soliq siyosatining shakllantirilishi, narxlarni erkinlashtirish jarayonining nihoyasiga yetkazilishi va shuningdek, toʻlov intizomini mustahkamlash boʻyicha koʻrilgan choratadbirlar iste'mol narxlari inflatsiyasini 7–8 foizga tushirish imkonini berdi, bu esa qulay ishchan muhitni yaxshilash va investitsiyalarni ragʻbatlantirishda eng muhim omillardan biri boʻldi.

Investitsion faollik koʻrsatkichlari keyingi-yillarda ishchan muhitning sezilarli darajada yaxshilangani va yuqori iqtisodiy oʻsish sur'atlari barqaror tus olayotganining yorqin dalilidir, Masalan, oʻzlashtirilgan kapital qoʻyilmalar hajmi 1990–2000-yillarda 3,8 barobar oshdi, 2010-yilda esa 1990-yilga nisbatan 11,6 barobar ortib, 9,7 milliard AQSh dollarini tashkil etdi.

Tashqi savdo aylanmasi hajmining YAIMga nisbati 1990-yilda 6 foizni, 2000-yilda – 45,4 foizni, 2010-yilda esa 56,1 foizni tashkil etdi. Agar 1990-yilda eksport importga nisbatan 79,8 million dollar ortiq boʻlgan boʻlsa, 2009-yilda tashqi savdoning ijobiy savdosi 2333 million dollarni, 2011-yilda esa 4 milliard 500 million dollarni tashkil etdi.

Yuqoridagilarning barchasi Oʻzbekiston iqtisodiy tizimini barqarorligini ta'minlash va vatanimiz taraqqiyotiga va xalq farovonligini yuksaltirishga olib keladi. Yalpi ichki mahsulotning yuqori sur'atlar bilan oʻsishi soʻngi yillarda an'anaviy xom ashyo tarmoqlari hisobidan emas,

jahon bozoridagi qulay konyunktura va ayrim xom ashyo turlari hamda materiallar narxining yuqoriligi hisobidan emas, balki birinchi navbatda raqobatga bardoshli tayyor mahsulotlar ishlab chiqarish hamda zamonaviy xizmat koʻrsatish sohalarini jadal rivojlantirishni belgilab beradigan jiddiy tarkibiy oʻzgarishlar va ishlab chiqarish samaradorligini oshirish evaziga ta'minlanmoqda.

Shuni alohida ta'kidlash zarurki, o'tgan 2006-yil — Homiylar va shifokorlar, 2007-yil — Ijtimoiy himoya, 2008-yil — Yoshlar, 2009-yil — Qishloq taraqqiyoti va farovonligi, 2010-yil — Barkamol avlod, 2011 — Kichik biznes va xususiy tadbirkorlik yilida erishilgan ana shunday o'sish sur'atlari va yuksak makroiqtisodiy ko'rsatkichlar jamiyatimizning barcha sohalarini tubdan isloh qilish va yangilash bo'yicha mamlakatimizda amalga oshirilgan ko'p yillik mashaqqatli va murakkab ishlarning mantiqiy natijasi, mamlakatimiz iqtisodiyotini izchil va barqaror rivojlantirishning amaldagi ko'rinishi bo'ldi.

Ma'lumki, raqamlar «oʻjar» boʻladi. Ular soxtalik, qingʻirlikni yoqtirmaydi. Yuqorida keltirilgan har bir raqam zamirida dunyoviy taraqqiyot yoʻlimizga boʻlgan ishonch, fuqarolarimiz qat'iyati, tashabbuskorligi va albatta, oʻz kelajagini yanada farovon etishga intilish hissi yashiringandir. Keltirilgan raqamlar, eng avvalo, odamlar ongidagi oʻzgarishlar mahsuli sifatida baholanayotgani bejiz emas. Mehnatga, mulkka boʻlgan munosabatning oʻzgarganligi mahsulidir bu. Joylarda, nihoyat, tadbirkor va fermerlarga mustaqillikning dastlabki yillaridagidek «oʻgay koʻz bilan qaralmayotgani» xususiy mulkka iqtisodiyotning tayanchi sifatida munosabatda boʻlinayotgani mahsuli bu.

Muhim yutugʻimiz sifatida, bozor islohotlarini chuqurlashtirish, erkinlashtirish va huquqini iqtisodiyotni mulk himoya qilishni choralarning mustahkamlashga garatilgan amalga oshirilishi mamlakatimizda investitsiya muhitini yaxshilash hamda hajmi tobora ortib borayotgan xorijiy sarmoyalarni jalb qilishda ijobiy ta'sir koʻrsatayotganligini sogʻlom fikrlaydigan har bir inson dildan his qilmoqda.

2. Makroiqtisodiy muvozanat. Makroiqtisodiy barqarorlikni ta'minlashda iqtisodiy o'sish, investitsiyaning ahamiyati

Milliy iqtisodiyot darajasida toʻliq bandlikka erishish, inflatsiyani eng kam darajaga keltirish va barqaror iqtisodiy oʻsishga erishish, makroiqtisodiy muvozanatni taqozo etadi. Ijtimoiy ishlab chiqarish va umuman takror ishlab chiqarish ham iqtisodiyotning barcha darajasida, ya'ni mikro va makroiqtisodiyot darajasida iqtisodiy muvozanatning ta'minlanib turilishini zarur qilib qo'yadi. Shunday ekan, iqtisodiy muvozanat, iqtisodiy o'sish va takror ishlab chiqarish jarayonining eng muhim va asosiy shart-sharoiti bo'lib yuzaga chiqadi. Iqtisodiy muvozanatga ta'rif berishdan oldin iqtisodiy fan tarixida bu muammo bo'yicha ancha keng tarqalgan yondashuvlarga alohida e'tiborni qaratamiz.

Iqtisodiyot fani tarixida «iqtisodiy muvozanat» tushunchasining turlicha ta'riflari mavjud boʻlib, ularni umumlashtirilgan holda *ikkita yoʻnalishga* ajratish mumkin. **Birinchi yoʻnalish** bevosita «iqtisodiy muvozanat» tushunchasining vujudga kelish va rivojlantirilishining tarixiy bosqichlari bilan bogʻliq boʻlib, bunda mazkur tushuncha «umumiy bozor muvozanati» sifatida talqin qilinishi darajasigacha yetib keladi. Bu yoʻnalishda iqtisodiy muvozanatlikning koʻplab modellari mavjud boʻlib ular turli davrlarda bu muammoga har xil qarashlarni aks ettirgan:

- 1) oddiy takror ishlab chiqarish modeli (F. Kene tomonidan XVIII asrda Fransiya misolida tushuntirib berilgan);
- 2) oddiy va kengaytirilgan kapitalistik ijtimoiy takror ishlab chiqarish sxemasi (XIX asrda klassik iqtisodchilar tomonidan asoslab berilgan);
- 3) erkin raqobat qonuni amal qilgan sharoitda umumiy iqtisodiy muvozanat modeli (L. Valras tomonidan asoslangan);
- 4) «Xarajatlar mahsulot ishlab chiqarish» modeli (V. Lyontyev asos solgan);
- 5) qisqa davrli iqtisodiy muvozanat modeli (D. Keyns siklik rivojlanishni tahlil qilish orqali koʻrsatib bergan).

Iqtisodiy muvozanat nazariyasiga oid ilk fikrlar klassik siyosiy iqtisod asoschilaridan biri A. Smitning «Xalqlar boyligining tabiati va sabablari toʻgʻrisida tadqiqot» nomli asarida yoritilgan boʻlib, unda iqtisodiy munosabatlarning barchasi bozor mexanizmi yordamida tartibga solinishi, talab va taklif oʻrtasidagi muvozanat faqat bozor mexanizmi yoki «koʻrinmas qoʻl» yordamida ta'minlanishi ta'kidlab oʻtilgan. Uning: «Alohida olingan har bir odam faqat oʻzini oʻylagan holda, oʻzining shaxsiy manfaatlari yoʻlida qilgan harakatlari koʻrinmas qoʻl orqali uning qiziqishi doirasiga mutlaqo kirmagan boshqa maqsadlarga yoʻnaltiriladi va bu harakat ongli ravishda jamiyat manfaatlariga xizmat qilgandagiga qaraganda koʻproq samara beradi», – degan mashhur fikri hozirgi kunda

ham o'z dolzarbligini yo'qotmagan. Ammo, u iqtisodiy muvozanatni ta'minlash jarayonlarida davlat ishtirokini mutlaqo inkor etgan.

Iqtisodiy muvozanat nazariyasini rivojlantirishga oʻz hissasini qoʻshgan namoyandalardan biri J. S. Milldir. U: «Jamiyat ortiqcha puldan oʻz kuchi bilan qutula olmaydi, shu sababli yagona yoʻl narxning oʻsishi boʻlib, faqat shu yoʻl bilan talab va taklif oʻrtasidagi muvozanatni ta'minlash mumkin», — deb ta'riflagan. Uning fikricha, narx oʻsishini talab va taklif oʻrtasidagi mutanosiblik ta'minlangunga qadar davom ettirish zarur¹.

XX asrning 20-yillari oxirlari va 30-yillari boshlarida Gʻarbdagi bozor iqtisodiyoti rivojlangan mamlakatlar iqtisodiyotida depressiya» nomi bilan mashhur boʻlgan barqaror va uzoq davom etgan, makroigtisodiy begarorlik hukm surdi. Bundan vuz vil nazariya shakllantirilgan klassik ta'limoti ro'y bergan jarayonlarning barcha jihatlari boʻyicha tushuntirib berishga layoqatsiz bo'lib goldi. D. J. Keyns klassik iqtisodchilar nazariyasini tanqid qilib, iqtisodiyot nazariyasida haqiqiy toʻntarish qilishga olib kelgan nazariyani yaratdi.

Bu barcha iqtisodchilarning iqtisodiy muvozanatlik toʻgʻrisidagi g'oyalari o'zlari yashagan muhit sharoitidan kelib chiqqan holda, birmuncha cheklangan xarakterga egadir. Avvalo, ularning iqtisodiy g'oyalari umumiy bozor muvozanatini tahlil qilish bilangina cheklanadi, ularning g'oyalari iqtisodiyotning umumiy xolos. Shu sababli muvozanatligi yoki «iqtisodiy muvozanatlik» tushunchasini toʻliq yoritib berish darajasiga yetmagan, bu o'z navbatida iqtisodiy muvozanatning umumiy shart-sharoitlari va namoyon bo'lish shakllarini ham ko'rsatib berolmagan. Buning sababi oddiy bo'lib, siklik rivojlanish natijasida vujudga keladigan ishlab chiqarish sohalarini qamrab olgan va «ortiqcha ishlab chiqarish inqirozlari», deb nomlangan.

Hozirgi zamon bozor iqtisodiyoti doimiy inflatsiya va ishsizlik sharoitida rivojlanib, makroiqtisodiy beqarorlik xarakteri kuchayib borishi natijasida iqtisodiy muvozanatlikni ta'minlash ham ancha murakkab kechib, davlatning samarali makroiqtisodiy siyosat (moliya va pul kredit) olib borishini taqozo etadi. Hozirgi zamon iqtisodiyot fanida iqtisodiy muvozanatlik tushunchasi oʻquv adabiyotlari darajasida boʻlsa-da, barcha

¹ Qarang: *Mill J.S.* On the Defintion of Political Economy; and on the Method of Invtstigation Proper to it. In: Tssays on Some Unsettled Questions of Political Economy. L., p. 133–137.

jihatlari (sabablari, oqibatlari, natijalari) bilan birgalikda ancha keng tadqiq qilinadi. Jumladan, iqtisodiy muvozanatlikning mohiyati, uni ta'minlash muammolari K. Makkonell, S. Bryu tomonidan yopiq va ochiq iqtisodiyot uchun yalpi talab va yalpi taklifning muvozanatligi orqali tushuntirilib beriladi. Ular koʻplab alohida olingan bozorlardagi muvozanatli narx va ishlab chiqarish hajmini oʻrganish orqali xususiy muvozanatlikning tahlili bilan shugʻullangan boʻlsa, barcha turli xil bozorlardagi umumiy taklif hajmi va ulardagi narxlarning oʻrtacha darajasi oʻrtasidagi oʻzaro bogʻliqlikni keng miqyosda oʻrganib chiqish orqali umumiy bozor muvozanatini koʻrsatib berishga harakat qiladilar.

Yuqorida koʻrsatib oʻtilgan mualliflar va boshqa koʻpchilik Gʻarb iqtisodchilari tomonidan «iqtisodiy muvozanat» tushunchasi boʻyicha zikr etilgan barcha iqtisodiy gʻoyalar ham «umumiy bozor muvozanati», ya'ni yalpi talab va yalpi taklif muvozanati doirasi bilan cheklanadi. Bundan tashqari ushbu tushunchalar ancha mavhumlashtirilib, murakkab matematik tenglashtirishlar va jadvali tahlil usullari orqali bayon qilinadi. Bu esa iqtisodiy hodisa va jarayonlarning iqtisodiy mazmunini ilgʻab olishni ancha qiyinlashtiradi.

Dunyodagi iqtisodiy jihatdan taraqqiy etgan mamlakatlar iqtisodiy tizimi yuzlab yillar davomida shakllanib, oʻzining rivojlanishida nisbatan barqarorlikni saqlab qolishi (siklli rivojlanish natijasida kelib chiqadigan iqtisodiy beqarorliklarni hisobga olmaganda) oʻz-oʻzidan «umumiy iqtisodiy muvozanatlik» tushunchasini nazariy tadqiq qilishni «kun tartibi»dan chiqarib qoʻyadi.

Sobiq sotsialistik tizim amal qilib turgan davrda uning tarkibiga kirgan mamlakatlarda jamiyat ehtiyojlari va ishlab chiqarish hajmi bir markazdan turib muvofiqlashtirilib borilganligi tufayli iqtisodiy muvozanatlik muammosi oʻquv adabiyotlarida, ilmiy tadqiqot ishlarida qayd qilinmagan va oʻrganilmagan.

Ishlab chiqaruvchi kuchlarning rivojlanish darajasiga ishlab chiqarish munosabatlarining toʻliq mos kelishi hamda «Rejali va proporsional rivojlanish qonuni»ning amal qilishi, goʻyoki oʻz-oʻzicha iqtisodiy muvozanat va takror ishlab chiqarishning toʻxtovsiz kengayib borishini ta'minlaydi, degan aqidaning mavjud boʻlishi har qanday muvozanatni ilmiy-nazariy tadqiq qilishni ham inkor etgan.

Oʻzbekiston Respublikasi Prezidenti Islom Karimov shu muammo haqida ta'kidlaganidek, «dono» Davlat Plan qoʻmitasi, undan yuqoriroqda esa partiya Markazqoʻmi idoralarni ishga solib, ma'muriy yoʻl bilan, reja-direktiv qarorlar tizimi orqali ishlab chiqaruvchi kuchlarning rivojlanish darajasi bilan ishlab chiqarish munosabatlarining xususiyati oʻrtasida sun'iy muvozanat tiklanardi»¹.

Iqtisodiy muvozanatlik nazariyasidagi **ikkinchi yoʻnalish** sobiq sotsialistik lager mamlakatlari iqtisodiy tizimining inqirozga uchrashi oqibatida vujudga keldi. Bu mamlakatlarda shiddatli tarzda roʻy bergan ijtimoiy-iqtisodiy beqarorliklar, ya'ni iqtisodiy oʻsish sur'atlari va bandlik darajasining surunkali pasayib borishi, inflatsiya jarayonlarining noxush oqibatlari hamda takror ishlab chiqarishdagi doimiy ravishda vujudga kelib turgan boshqa nomutanosibliklar, makroiqtisodiy muvozanatlikka erishish orqali iqtisodiy oʻsishni zarur qilib qoʻydi. Bu nazariya iqtisodiy fanlar oldiga «iqtisodiy muvozanatlik» tushunchasining iqtisodiy mazmunini, uni ta'minlashning shart-sharoitlarini va namoyon boʻlish shakllarini ilmiy nazariy tadqiq qilish vazifasini ham qoʻyadi.

Shu sababli sobiq SSSR hududida vujudga kelgan Mustaqil Hamdoʻstlik Davlatlari iqtisodchi olimlari tomonidan mazkur muammoning nazariy va amaliy tomonlarini oʻrganishga alohida e'tibor qaratila boshlandi. Bunda, albatta, rossiyalik iqtisodchilar bildirgan fikr va qarashlar ustuvorlikka ega. Biroq, «iqtisodiy muvozanatlik tushunchasi» turli iqtisodchilar tomonidan turlicha talqin qilinadi. Ayrimlar, iqtisodiy muvozanatlikni cheklangan ishlab chiqarish resurslaridan foydalanish usullari va ularni jamiyat a'zolari oʻrtasidagi taqsimlashning oʻzaro mos kelishi sifatida tavsiflaydi².

«Iqtisodiy muvozanat» tushunchasiga berilgan bu ta'rif quyidagi sabablarga koʻra cheklangandir:

birinchidan, unda jamiyat ehtiyojlari bilan milliy ishlab chiqarish imkoniyatlari, ya'ni mavjud iqtisodiy resurslar darajasi oʻrtasidagi bogʻliqlik tushuntirib berilmaydi;

¹ Каримов И. А. Ўзбекистон буюк келажак сари. – Т.: «Ўзбекистон», 1998. – Б. 350.

 $^{^2}$ Qarang: Экономическая теория: Учебное пособие / Под общ. ред. Н.И. Базылева. – Минск, $\,2000.$ – $\,C.126.$

ikkinchidan, muvozanatlik resurslardan foydalanish usullari bilan ularning taqsimlanishi oʻrtasidagi bogʻliqlik sifatida bir tomonlama talqin qilinadi.

Boshqa nazariyotchilar iqtisodiy muvozanatlik milliy iqtisodiyotning shunday bir holatiki, bunda tovarlar va xizmatlarni yaratishda foydalaniladigan cheklangan ishlab chiqarish resurslari va ularni jamiyatning turli a'zolari oʻrtasida taqsimlanish jarayoni mos kelishi lozim, ya'ni resurslar va ulardan foydalanish natijalari, ishlab chiqarish va iste'mol, talab va taklif, moddiy buyumlashgan va moliyaviy oqimlar oʻrtasida yalpi mutanosiblik mavjud boʻladi¹, degan fikrni ilgari suradi.

Bizningcha, «iqtisodiy muvozanatlik» tushunchasining mazmuni haqida gapirganda, ishlab chiqarishning natijalari uning pirovard maqsadi «jamiyat ehtiyojlari» bilan bogʻlanganligiga e'tibor qaratish kerak. Koʻpchilik hollarda makroiqtisodiy muvozanatlikka yuzaki yondashib, umumiy (abstrakt) ta'rif berilsa, ayrim adabiyotlarda unga milliy mahsulot va milliy daromad alohida qismlari, mahsulotlar va daromadlar oʻrtasidagi ma'lum bir nisbat (makroiqtisodiy nisbat) sifatida qaraladi².

Koʻpincha iqtisodiy muvozanatlik bozor muvozanatini xarakterlovchi yalpi talab va yalpi taklif oʻrtasidagi nisbat sifatida ham talqin qilinadi.

Yuqoridagi barcha qarashlarni umumlashtirib, «iqtisodiy muvozanat» tushunchasiga quyidagicha ta'rif berish mumkin: *iqtisodiy muvozanat* — bu makroiqtisodiyot darajasida jamiyat ehtiyojlariga mavjud iqtisodiy resurslar miqdorining va ijtimoiy ishlab chiqarish natijalari hajmi hamda tarkibining oʻzaro mos kelishini xarakterlaydi.

Iqtisodiy muvozanatlik milliy iqtisodiyotning turli darajasidagi (mikro va makro) turli muvozanatlarni qamrab oladi. Shartli ravishda *umumiy va xususiy muvozanatlarni* ajratib koʻrsatish mumkin (*1-chizmaga* qarang). Umumiy muvozanatlik makroiqtisodiy muvozanatni ancha toʻliq darajada ifodalaydi.

Umumiy muvozanat – bu jamiyatning barcha ehtiyojlari (aholi, davlat, korxona) va milliy ishlab chiqarish real hajmining oʻzaro mos kelish darajasini bildiradi. Qiymat ifodasida bu muvozanat yalpi talab va yalpi taklifning nisbati orqali namoyon boʻladi. Milliy iqtisodiyotda roʻy beradigan barcha oʻzgarishlar pirovard natijada yalpi talab va yalpi

 2 Qarang: *Меньшиков П*. Новая экономика. – М., 1999. – С. 199.

 $^{^1}$ Qarang: *Сажина М. А., Чибриков Г. Г.* Экономическая теория: Учебник для вузов. – М., 1998. – С. 267.


taklifdagi oʻzgarishlar orqali ifodalanadi. Yalpi talab tovarlar bozorida taqdim qilingan pirovard tovarlar va xizmatlarga boʻlgan barcha alohida talablar yigʻindisidan iborat. Iqtisodiy muvozanatlik yalpi talab va yalpi taklifning tengligini taqozo etsa ham, amaliyotda ularning nisbati oʻrtasidagi oʻzgarishining mumkin boʻlgan har xil variantlari mavjud boʻladi. Jumladan:

- yalpi talabning ortishi. Ishlab chiqarish hajmi, milliy daromad va baholarning oʻsishi bilan birga boradi;
- yalpi talabning tushishi. Ishlab chiqarish hajmi, milliy daromad va baholarning pasayishi bilan;
- yalpi taklifning ortishi. Ishlab chiqarish hajmining oʻsishi bilan birga boradi va baholarning tushishini keltirib chiqaradi;
- yalpi taklifning kamayishi va shunga mos ravishda ishlab chiqarishning qisqarishi, baholarning oʻsishiga olib keladi.

Bu barcha shart-sharoitlar ideal holda potensial imkoniyat darajada vujudga keladi. Real hayotda esa umumiy muvozanatlik tarkibiy nomutanosibliklar, resurslardan samarasiz foydalanish, baholarning beqarorligi, iqtisodiy sikl fazalarining oʻzgarishi, bozor konyukturasi, bozor subyektlari daromadlari va talabi tarkibidagi oʻzgarishlar ta'sirida ta'minlanib boriladi.

Bunday sharoitda umumiy muvozanatlik holatini (yalpi talab va yalpi taklif mos kelishi), turgʻun iqtisodiyotdagi shartli umumiy muvozanatlik sifatida qarab chiqishni taqozo etadi. Bu barcha aytilganlardan xulosa chiqaradigan boʻlsak, umumiy muvozanatlik butun ijtimoiy ishlab chiqarishning, mamlakat milliy iqtisodiyotining mutanosibligidir. Bu barcha tarmoqlar, sohalar va iqtisodiyot birlamchi boʻgʻinlarining bir me'yorda rivojlanishini ta'minlagan, iqtisodiy faoliyatning barcha qatnashchilari, barcha bozorlar va iqtisodiy jarayon munosabatlarining ayrim tomonlari oʻrtasidagi barqarorlik xarakteridagi bir qator muvozanatliklar tizimini oʻz ichiga oladi.

Bu muvozanatliklarning shakllari turli-tuman boʻlganligi sababli ular alohida holda xususiy muvozanatliklar sifatida chiqadi.



1-chizma. Makroiqtisodiy muvozanatlik va uning turlari.

Xususiy muvozanatlik – bu ikkita oʻzaro bogʻliq boʻlgan iqtisodiy miqdorlar yoki iqtisodiyot tomonlarining miqdoran teng kelishidir.

Xususiy muvozanatlik ishlab chiqarish va iste'mol, aholining sotib olish layoqati va tovarlar taklifi budjet daromadlari va xarajatlari, alohida tovarlarga bo'lgan talab va taklif o'rtasidagi muvozanatliklar ko'rilganda yuzaga chiqadi. Bu muvozanatliklar ichida Prezidenti Islom Karimov ta'kidlaganidek, « ichki bozorda talab va taklif o'rtasidagi mutanosiblikka erishish, ya'ni chiqarilgan pul miqdori bilan unga sotib olinadigan mollar salmog'i o'rtasidagi nisbatni ta'minlash g'oyat katta rol o'ynaydi»¹.

Shunday qilib, iqtisodiy muvozanatlik oʻzining barcha shakllari bilan birgalikda inqirozsiz va ijtimoiy iqtisodiy larzalarsiz rivojlanishni xarakterlaydigan iqtisodiy idealdir. Real iqtisodiy hayotda makroiqtisodiy muvozanatlik talablari turli tuman beqarorliklar ta'sirida buzilib turadi, biroq iqtisodiy muvozanatlik nazariy modelini bilish, real jarayonlarning ularning ideal andozasidan farq qilinishini keltirib chiqaradigan aniq omillarni aniqlash, iqtisodiyotning optimal holatida faol hal qilinishini ta'minlash yoʻllarini topish imkonini beradi.

Iqtisodiy muvozanatlikni aniqlash usullari. Iqtisodiy muvozanatlik erkin raqobat bozorida barcha xaridorlar tengligi, iqtisodiy vaziyat barqarorligi kabi qator shart-sharoitlarni ham taqozo qiladi.

Real hayotda iqtisodiyot doimiy harakatda va toʻxtovsiz rivojlanish holatida boʻladi. Iqtisodiy sikl fazalarida, bozor konyukturasi, bozor subyektlari daromadlari va talabi tarkibida oʻzgarishlar roʻy berib turadi. Bularning hammasi muvozanatli holatni turgʻun iqtisodiyotdagi shartli umumiy muvozanatlik sifatida qarab chiqishni taqozo qiladi. Iqtisodiy muvozanatlik darajasini aniqlashda asosan ikkita oʻzaro bogʻliq usuldan foydalaniladi:

- 1) yalpi sarflar va ishlab chiqarish hajmini taqqoslash usuli;
- 2) jamgʻarma va investitsiyalarni taqqoslash usuli.

Yalpi sarflar va ishlab chiqarish hajmini taqqoslash uchun ishlab chiqarish umumiy hajmining miqdoriy koʻrsatkichi sifatida sof milliy mahsulot (SMM), iqtisodiyotda yalpi sarflar sifatida iste'mol hajmi va investitsiyalarga sarflarning umumiy summasi (S+1p) olinadi.

Iqtisodiyotning muvozanatli darajasi — bu ishlab chiqarishning shunday hajmiki, u ishlab chiqarish mazkur hajmini sotib olish uchun yetarli umumiy sarflarni ta'minlaydi. Boshqacha aytganda, sof milliy

¹ Каримов И. А. Ўзбекистон буюк келажак сари. – Т.: «Ўзбекистон», 1999. – Б. 348.

mahsulot muvozanatli darajasida ishlab chiqarilgan tovarlarning umumiy miqdori (SMM) xarid qilingan tovarlar umumiy miqdoriga (S+Ip) teng boʻladi. Toʻliq bandlik sharoitida yalpi sarflar SMM hajmi bilan mos kelmasligi mumkin. Bu mos kelmaslik retsession yoki inflyatsion farqda ifodalanadi. Yalpi sarflarning SMM hajmidan kam boʻlgan miqdori retsession, yalpi sarflarning SMM hajmidan ortiqcha boʻlgan miqdori inflyatsion farq deyiladi.

Jamgʻarma va investitsiyalarni taqqoslash usulining mohiyati shundaki, ishlab chiqarilgan mahsulotning har qanday hajmi shunga mos daromad hajmini beradi. Biroq aholi bu daromadning bir qismini iste'mol qilmasdan jamgʻarishga qoʻyishi mumkin. Jamgʻarish, sarflar — daromadlar oqimidan potensial sarflarni olib qoʻyish hisoblanadi. Bunda jamgʻarmaga qoʻyilgan mablagʻ investitsiyalar bilan toʻliq qoplansa, yalpi sarflar ishlab chiqarish hajmiga teng boʻladi.

Investitsion sarflarning koʻpayishi ishlab chiqarish hajmi va daromad darajasining oʻsishiga olib keladi. Bu oʻzaro natija multiplikator samarasi deyiladi. *Multiplikator samarasi* — bu sof milliy mahsulotdagi oʻzgarishning sarflardagi (investitsiyalardagi) oʻzgarishga nisbati.

Real SMMdagi oʻzgarish

Multiplikator samarasi = _____
investitsion sarflardagi oʻzgarish

SMMdagi oʻzgarish = multiplikator x investitsiyalardagi oʻzgarish.

Agar investitsion sarflarning 5 mlrd. soʻmga koʻpayishi sof milliy mahsulotning 20 mlrd. soʻmga ortishiga olib kelsa, multiplikator samarasi 4 ga (20:5), SMMdagi oʻzgarish 20 mlrd. soʻmga (4x5) teng boʻladi. Investitsion sarflardagi oʻzgarishdan tashqari iste'mol, davlat xaridi yoki eksportdagi oʻzgarishlar ham multiplikator samarasiga ta'sir koʻrsatadi.

Multiplikator samarasi ikkita holatga asoslanadi. *Birinchidan*, iqtisodiyotda bir subyekt tomonidan qilingan sarf, boshqasi tomonidan daromad shaklida olinadi. *Ikkinchidan*, daromaddagi har qanday oʻzgarish iste'mol va jamgʻarishda xuddi shunday yoʻnalishda oʻzgarish boʻlishiga olib keladi.

Iqtisodiy muvozanatlik darajasini aniqlashda yuqoridagidan tashqari balans usulidan va «xarajat va natija»larni taqqoslash usulidan ham foydalaniladi. Balans usulida tarmoqlararo balans, moddiy, moliyaviy va ishchi kuchi balanslaridan foydalanilib, iqtisodiyotdagi muvozanatlik darajasiga baho beriladi.

«Xarajat va natija»larni taqqoslash usulida ishlab chiqarishga qilingan iqtisodiy resurs xarajatlari miqdori olingan mahsulot hajmi bilan taqqoslanib, muvozanatlik darajasi tahlil qilinadi.

Iqtisodiy mutanosiblik va uning turlari. Milliy iqtisodiyotdagi muvozanatlik uning turli tomonlari va sohalari oʻrtasida mutanosiblik boʻlishini taqozo qiladi.

Iqtisodiy mutanosiblik – iqtisodiyotning turli tomonlari va sohalari oʻrtasida miqdor va sifat jihatdan ma'lum moslik boʻlishidir. Bunda tenglik boʻlishi shart emas. Ular mos keluvchi (2:3, 5:3, 3:1) nisbatlarida boʻlishi mumkin.

Makroiqtisodiy jarayon gʻoyat murakkab va koʻp qirrali boʻlgani sababli mutanosiblik turlari ham koʻp va xilma-xil. Ularning barchasini umumlashtirib, mutanosiblikning quyidagi guruhlari tarkibiga kiritish mumkin:

- 1. Umumiqtisodiy xarakterdagi mutanosibliklar. Bunga milliy daromaddagi tarkibiy qismlar: iste'mol fondi va jamgʻarish fondi, iqtisodiyotdagi tovar va xizmatlar massasi bilan pul massasi, aholining daromadlari bilan xarajatlar oʻrtasidagi mutanosibliklarni misol qilib koʻrsatish mumkin.
- 2. Tarmoqlararo mutanosibliklar. Milliy iqtisodiyotning muvozanatini ta'minlashda tarmoqlararo mutanosibliklar alohida o'rin tutadi. Mamlakat xalq xoʻjaligi juda koʻp tarmoq va sohalardan iborat boʻlib, ularning rivojlanishi bir-birini taqozo qiladi. Bir tarmoqda yaratilgan mahsulot boshqa tarmoqda iste'mol qilinadi yoki pirovard mahsulotga aylantirilib, o'z iste'molchisini topadi. Masalan, qishloq mahsulotlarining koʻpchilik qismi (paxta, gʻalla, pilla, sut va h.k.) sanoatning tegishli tarmoqlarida qayta ishlanib, pirovard mahsulotga va iste'molchilik tovarlari bozoriga chiqariladi. aylantiriladi navbatida sanoatning ishlab chiqarish vositalari yaratadigan sohalarining mahsulotlari xalq xoʻjaligining boshqa tarmoqlari (qishloq xoʻjaligi, qurilish va h. k.)da unumli iste'mol qilinadi. Bu ularning bir-biriga bogʻliqlikda rivojlanishini taqozo qiladi. Tarmoqlararo mutanosibliklarga sanoat bilan qishloq xoʻjaligi va xalq xoʻjaligining boshqa tarmoqlari oʻrtasidagi mutanosibliklar misol boʻladi.
- **3.** Tarmoq ichidagi mutanosibliklar. Tarmoqlararo mutanosiblik va milliy ishlab chiqarish darajasidagi muvozanatlik tarmoqlar ichidagi mutanosiblik orqali ta'minlanadi. Tarmoqlar ichidagi mutanosiblik alohida olingan tarmoq tarkibidagi soha va ishlab chiqarishlar oʻrtasidagi bogʻliqlikni ifodalaydi. Masalan, sanoatning ishlab chiqarish vositalari va

iste'mol buyumlari ishlab chiqaradigan sohalari, qishloq xo'jaligining dehqonchilik va chorvachilik sohalari o'rtasidagi mutanosibliklar va h. k. Shu bilan birga, ta'kidlab o'tilgan sohalarning ichidagi tarkibiy bo'linmalar o'rtasida ham bog'liqlik bo'lishi zarur. Masalan, sanoatning qazib olish va qayta ishlash tarmoqlari, chorvachilikning sut va go'sht ishlab chiqarish sohalari o'rtasida va boshqalar.

- 4. Hududiy (territorial) mutanosibliklar. Iqtisodiy rivojlanish mamlakat ayrim hududlari oʻrtasidagi bogʻliqlikni ham taqozo qiladi. Yuzaki qaraganda hududlar oʻrtasidagi mutanosibliklarning mamlakat iqtisodiy rivojidagi roli toʻliq namoyon boʻlmaydi. Lekin alohida hududiy boʻlinmalar (viloyat, tuman, shahar va boshqa hududiy birliklar)ning birbiriga iqtisodiy va tashkiliy jihatdan bogʻliqligi, ixtisoslashish, ishlab chiqarish kooperatsiyasi va kommunikatsiya nuqtai nazaridan qaralsa, bu bogʻliqlikning ahamiyati yaqqol koʻrinadi.
- **5. Davlatlararo mutanosibliklar.** Bu mutanosiblikni ikki holat taqozo qiladi. *Birinchidan*, dunyoning koʻpchilik mamlakatlari xalqaro mehnat taqsimoti orqali bir-biri bilan bogʻlangan, *ikkinchidan*, shu bogʻliqlik orqali milliy ishlab chiqarishning bir qismi chet elliklar tomonidan xarid qilinadi yoki milliy ishlab chiqaruvchilar oʻz iste'molining bir qismini chetdan keltirilgan mahsulotlar hisobiga qondiradi. Bu bogʻliqlik qanchalik katta boʻlsa, sof eksport hajmi orqali makroiqtisodiy muvozanatlikka shunchalik kuchli ta'sir koʻrsatadi.

Qarab chiqilgan mutanosibliklarga erishish orqali milliy ishlab chiqarishning muvozanatli rivojini ta'minlab borishdan quyidagilar koʻzda tutiladi:

- > mamlakatda mavjud boʻlgan iqtisodiy resurslardan samarali foydalangan holda jamiyatning ehtiyojlarini toʻlaroq qondirib borish;
- > toʻla bandlikka erishish, ya'ni mehnat qilishga layoqatli boʻlgan va ishlashni xohlaganlarni toʻliq va samarali ish bilan ta'minlash;
- > narx-navoning nisbiy barqarorligiga erishish va uni inflatsiya ta'siridan xoli qilish;
- iqtisodiyotning bir maromda oʻsib borishini yetarli darajada investitsiya bilan ta'minlash va muomaladagi pul massasiga bogʻlab borish;
- ➤ eksport va importni muvofiqlashtirish asosida tashqi savdo balansining faolligiga erishish.

Bu maqsadlar faqat ularga intilish boʻlib, bunga erishish muqarrar ekanligini bildirmaydi. Chunki mutlaq muvozanatga erishish mumkin emas, u buzilib va qaytadan tiklanib turishi orqali iqtisodiy oʻsish notekis boradi.

Oʻzbekistonda iqtisodiyot tarkibiy tuzilishini oʻzgartirish vazifalari. Iqtisodiyotni butunlay yangi tartiblar asosida isloh qilish uning rivojida nomutanosibliklar boʻlishi va tanglik holatlarning kelib chiqishini muqarrar qilib qoʻyadi. Shu sababli iqtisodiyotni barqarorlashtirish, bozor iqtisodiyotiga oʻtish jarayonida uni jonlantirish va bir tekis rivojlantirish gonuniy bosqichdir. U iqtisodiy rivojlanishda butunlay uchrashga chap berish uchun ishlab ingirozga chigarish chiqarilayotgan mahsulot tarkibini oʻzgartirishga, ya'ni tanglik holatlariga barham berishga yoʻnaltiriladi. Respublikada iqtisodiy islohotlarni amalga oshirishning dastlabki davrida barqarorlashtirish siyosatidan koʻzda tutilgan maqsad, eng avvalo, makroiqtisodiyotda muvozanatni saqlash, ishlab chiqarish keskin darajada pasayishining oldini olish va ommaviy ishsizlikning kelib chiqishiga yoʻl qoʻymaslikdan iborat boʻldi. Shu bilan birga, bu siyosat pul emissiyasini boshqarish, uning qadrsizlanishining oldini olish, mamlakat to'lov balansini bir me'yorda saqlash kabi maqsadlarni ham o'z ichiga oladi.

Respublikada barqarorlashtirish siyosatini ishlab chiqishda jahon tajribasida sinalgan yondashuvlar hisobga olinib, ishlab chiqarish sohalariga ustunlik berildi. «Barqarorlashtirish siyosati, – degan edi Islom Karimov, – eng avvalo, bu makroiqtisodiyotda muvozanatni saqlash, ishlab chiqarishning keskin darajada pasayishiga va yoʻl qoʻymaslikdir. Shuningdek, ommaviy ishsizlikka qadrsizlanishining, pul emissiyasining boshqarilishini ta'minlash, to'lov balansini bir me'yorda saqlash sohasida aniq maqsadni ko'zlab olib siyosatdir». Moddiy ishlab chigarish sohalarining rivojlanishida ularni tarkiban qayta qurish talablari ham koʻzda tutildi. Bunda asosiy e'tibor katta istiqbolga ega bo'lgan, butun xalq xo'jaligining rivojlanish tamoyillarini belgilab beradigan yetakchi tarmoq va sohalarga qaratildi.

Iqtisodiyotda zarur tarkibiy oʻzgarishlarni amalga oshirguncha ishlab chiqarishning orqaga ketishiga barham berish eng muhim maqsad bo'lib Shu sababli respublikada 90-yillarning o'rtalaridayoq makroigtisodiy barqarorlik sohasida ishlab chiqarish sur'atlarining sekinlashtirishga moyillik koʻzga pasayishini tashlanadi, koʻrsatkichlar boʻyicha esa oʻsishga erishildi. Iqtisodiyotning ikkita yetakchi tarmog'i – sanoat va qishloq xo'jaligini isloh qilish va qo'llabquvvatlashga qaratilgan tadbirlar natijasida sanoatda 1995-yildayoq qishloq xo'jaligida, 1997-yilda ishlab chiqarishning orqaga ketishi to'xtatilganini eslash lozim.

Makroiqtisodiy barqarorlik siyosatida 1997-yil keskin burilish davri bo'ldi, islohotlar amalga oshirilgan davr davomida birinchi marta yalpi ichki mahsulotning o'sishi (105,2 foiz) aholi sonining o'sishidan (101,8 foiz) yuqori boʻldi¹. Bu ijobiy tamoyillar 1998 va undan keyingi yillarda Respublikamizda borildi. mustahkamlab amalga oshirilayotgan modernizatsiya strategiyasi bugunga kelib izchil iqtisodiy oʻsish sur'atlarini ta'minladi. Ushbu strategiya iqtisodiyotning real sektorini qoʻllab-quvvatlashga, mamlakatimiz eksport salohiyatini mustahkamlashga, iqtisodiy subyektlarni soliqqa tortish tizimini soddalashtirish va unifikatsiya qilish bo'yicha amalga oshirilgan ishlarga, aholining bandlik muammosini hal etishga yoʻnaltirilgan tadbirlarga, kichik biznes va xususiy tadbirkorlikni qoʻllab-quvvatlashga, oqilona investitsiya siyosati natijasida soʻnggi yillarda amalga oshirilgan investitsion loyihalarga, amalga oshirilayotgan oqilona pul-kredit siyosatiga, yerlarimizning meliorativ holatini yaxshilash boʻyicha amalga oshirilayotgan choratadbirlarga, iqtisodiyotning moliya-bank sektorini mustahkamlashga, mahalliylashtirish dasturini amalga oshirishga qaratildi.

Respublika milliy iqtisodiyotida erishilgan bu ijobiy natijalar, tarkibiy qayta qurishlar asosida butunlay yangi xalq xoʻjalik majmuining bunyod etilganligi, birinchi navbatda, eng muhim makroiqtisodiy va takror ishlab chiqarish nisbatlarini davlat tomonidan samarali tartibga solishning natijasi hisoblanadi. Bunda asosiy e'tibor iqtisodiyotning tarmoq tuzilishi, hududlarning tarkibiy tuzilishini takomillashtirishga qaratiladi. Tarkibiy siyosatning hududiy jihatlarini ta'minlash odamlar turmush darajasida vujudga kelgan hududiy nomutanosiblikni bartaraf etish, resurslar va ishlab chiqarish imkoniyatlaridan samarali foydalanishga erishishda katta ahamiyatga ega boʻldi.

Respublika iqtisodiyotining tarkibiy tuzilishini qayta qurishda ishlab chiqarilayotgan mahsulot turini oʻzgartirish, uning sifatini yaxshilash va mahsulot tayyorlashga ketadigan jami xarajatlarni kamaytirish talablari ham hisobga olinadi. Iqtisodiyot tuzilishidagi oʻzgartirishlar, chetdan mahsulot olib kelishni qisqartirish, xalq xoʻjaligining xom ashyo yetishtirishga qaratilgan bir tomonlama yoʻnalishini bartaraf etish va uning eksport imkoniyatini kengaytirish, tarmoqlar ichidagi va hududiy jihatdan vujudga kelgan nomutanosibliklarni bartaraf etish asosida iqtisodiyotning mutanosib va barqaror rivojlanishini ta'minlash vazifalarini hal etish bilan bogʻliqlikda amalga oshirildi. Shu vazifalardan

¹ Oʻzbekiston Respublikasi Iqtisodiyot vazirligining ma'lumotlari.

kelib chiqib, iqtisodiyot ichki tuzilishidagi oʻzgarishlar — respublikaning energetika va oziq-ovqat mustaqilligini ta'minlovchi tarmoqlarni rivojlantirishga qaratildi. Bunda, birinchi navbatda, eng muhim oʻzak tarmoqlarni — neft va gaz sanoatini, energetikani, rangli metallurgiya sanoatini, mashinasozlik majmuini, qishloq xoʻjalik va agrosanoat majmuining boshqa sohalarini rivojlantirishga ustunlik beriladi.

Xalq xoʻjaligining takror ishlab chiqarish tuzilishini tubdan oʻzgartirish asosida umumiqtisodiy barqarorlikka erishishda iste'mol bilan jamgʻarish fondi oʻrtasidagi eng maqbul mutanosiblikni ta'minlash asosiy oʻrin tutadi. Iste'mol fondining eng maqbul darajasiga erishish – ichki bozorda talab bilan taklif oʻrtasida mutanosiblikni ta'minlattida muhim rol oʻynaydi. Shu sababli davlat eng muhim makroiqtisodiy takror ishlab chiqarish nisbatlarini tartibga solib turuvchi omillarga koʻproq e'tibor berdi. Bozor iqtisodiyotiga oʻtish davrida iqtisodiyotni barqarorlashtirish muammosini hal etishda ishlab chiqarish infratuzilmasining muhandislik kommunikatsiyalari, transport va aloqa tizimi singari tarmoqlarini ustuvor rivojlantirishga ham alohida e'tibor beriladi.

Nomoddiy ishlab chiqarish sohasida tarkibiy qayta qurishlar faol investitsiya siyosatini oʻtkazish orqali amalga oshirildi. Shu sababli respublika investitsiya bazasini rivojlantirishga katta e'tibor berilib, bunda oʻz sarmoyalarimiz, tashqi kreditlar, bevosita investitsiyalar va ularning barcha manbalaridan oʻrinli foydalanish koʻzda tutildi. Tashqi investitsiyalarni jalb qilishda bevosita investitsiyalar tarzida, davlat qarzlari, xalqaro moliya va iqtisodiy tashkilotlar, qarz beruvchi mamlakatlar moliyaviy-kredit resurslari shakllarida amalga oshirish mumkinligi hisobga olinadi.

Shunday qilib, respublikada iqtisodiy islohotlar davomida makroiqtisodiy barqarorlikni ta'minlash va iqtisodiyot tarkibiy tuzilishini qayta qurish vazifalariga aholining real turmush darajasini yaxshilash uchun zaruriy shart-sharoitlarni vujudga keltirish sifatida qaraldi. Iqtisodiyotning barcha sohalari va tarmoqlarida erkinlashtirish jarayonini izchillik bilan oʻtkazish va iqtisodiy islohotlarni chuqurlashtirish tomon yoʻl tutilgan hozirgi sharoitda ham «iqtisodiyotdagi tarkibiy oʻzgarishlarni izchil davom ettirish» iqtisodiyot sohasidagi eng muhim vazifalardan biri hisoblanadi.

 $^{^1}$ *Каримов И. А.* Озод ва обод Ватан, эркин ва фаровон хаёт – пировард мақсадимиз. Т. 8. – Т.: «Ўзбекистон», 2000. – Б. 15.

Bu, oʻz navbatida, boy tabiiy zaxiralarimiz, mineral xom ashyo, mehnat resurslarimiz, intellektual hamda ilmiy texnikaviy salohiyatimizdan toʻliq va samarali foydalanishni taqozo etadi. Tarkibiy oʻzgarishlarni amalga oshirish mahalliy xom ashyo va tabiiy imkoniyatlar asosida ishlaydigan, ilgʻor zamonaviy texnologiyalarni joriy etgan holda, nafaqat ichki, balki tashqi bozorda ham raqobatga bardosh beradigan mahsulot ishlab chiqaruvchi tarmoqlarga qaratilishi zarur.

Yangi bosqichda xizmat koʻrsatish sohalarini rivojlantirish, ularning iqtisodiyotdagi oʻrnini kuchaytirishga alohida e'tibor beriladi. Chunki, bu soha yangi ish joylarini yaratishning muhim omili boʻlishi bilan birga, aholi turmush darajasining oʻsishi, uning rivojlanish darajasiga bogʻliq.

3. Iqtisodiy oʻsishning mazmuni, turlari va koʻrsatkichlari. Iqtisodiy oʻsishni ta'minlashda investitsiyaning ahamiyati

Mamlakatlarning iqtisodiy rivojlanishi koʻp omilli va shu bilan birga ziddiyatli jarayon hisoblanadi. Iqtisodiy rivojlanish hech qachon bir tekis, yuqorilab boruvchi chiziq boʻyicha roʻy bermaydi.

Shu ayonki, har qanday jamiyatda oʻsib borayotgan ehtiyojlarni qondirish va farovon yashash uchun iqtisodiy oʻsish yuz berishi kerak. Iqtisodiy oʻsish deganda, iqtisodiy ravnaq, ya'ni iqtisodiyotning dinamik rivojlanishi boʻlib, yaratilgan tovarlar va xizmatlarning koʻpayib borishini anglatadi. Ammo iqtisodiy rivojlanish hech qachon bir tekis, yuqorilab boruvchi chiziq boʻyicha roʻy bermaydi. Iqtisodiy oʻsishni ikki darajada olib qarash mumkin.

Mikroiqtisodiy va makroiqtisodiy oʻsish. Mikroiqtisodiy oʻsish firma, korxona va tarmoq miqyosidagi rivojlanishni aks ettiradi va ularda oʻsish yaratilgan tovarlar va xizmatlarning bozor narxida hisoblangan hajmiga qarab aniqlanadi. Makroiqtisodiy oʻsish milliy iqtisodiyot, ya'ni muayyan mamlakat miqyosidagi iqtisodiy taraqqiyotni ifoda etadi va yalpi milliy mahsulotning (YAMM) koʻpayishini bildiradi. YAMM hajmi iqtisodiy oʻsishning umumlashgan pulda ifodalangan koʻrsatkichi hisoblanadi. Shu bilan birgalikda, iqtisodiy rivojlanish oʻz ichiga yuksalish va inqiroz davrlarini, iqtisodiyotdagi miqdor va sifat oʻzgarishlarini, ijobiy va salbiy tomonlarni olib, notekis boradi. Milliy iqtisodiyotda iqtisodiy rivojlanish qiyin aniqlanadigan jarayon boʻlganligi sababli, uning mezonlaridan biri boʻlgan iqtisodiy oʻsish koʻproq tahlil qilinadi.

Iqtisodiy o'sish iqtisodiy rivojlanishning tarkibiy qismi bo'lib, o'z ifodasini real YAMM (YAIM) hajmining va uning aholi jon boshiga

ko'payishida topadi. Shuni aniq tasavvur qilish kerakki, mahsulotlar va xizmatlar g'oyat xilma-xil bo'lganidan ularning yagona moddiy o'lchami bo'lmaydi. Yagona o'lcham vazifasini bozor narxi bajaradi. Qanday ish bajarilmasin, qanday mahsulot yaratilmasin, uning hajmi falon pulga teng deb hisoblanadi. Shu sababli YAMM ham ikki usulda hisoblanadi. Birinchi usulda xarajatlar jamlanadi, ya'ni barcha iste'molchilarning tovar va xizmatlarni sotib olishga sarflangan puli jamlanadi. *Ikkinchi usulda* – tovar va xizmatlarni sotishdan tushgan pul daromadlari jamlanadi. Iqtisodiy o'sish esa, YAMMning real hajmi bilan o'lchanadi. Gap shundaki, uning qiymat – pul shakli narxlarga bogʻliq. YAMMning moddiy hajmi o'smasa-da, inflatsiya ta'sirida narx oshsa, uning qiymat-Iqtisodiy oʻsishga miqdori ortib ketadi. tarixiy yondashilganda, u bir xil sur'atlarda va bir tekis bormaydi. Tarixda iqtisodiy o'sish sur'atlarining jadallashish, jiddiy pasayish va hatto cheklanish davrlari ma'lum. Agar katta tarixiy bosqichlar olib qaraladigan bo'lsa, jahon va milliy iqtisodiyotda, barqaror iqtisodiy o'sish, ishlab chiqarishning har tomonlama taraqqiyot manzarasi hosil bo'ladi. Shu bilan birga iqtisodiy o'sish nafaqat miqdor, balki muayyan sifat oʻzgarishlari shaklida ham namoyon boʻladi. Prezident Islom Karimov ta'kidlaganlaridek: «Iqtisodiy rivojlanish sur'atlari haqida gapirganda ... uning mezonlariga va eng avvalo, sifat koʻrsatkichlariga koʻproq e'tibor garatish muhim ahamiyat kasb etadi. Bunday o'sishlar iqtisodiyotimizda yuz berayotgan tarkibiy oʻzgarishlar, uning izchil va barqaror rivoji uchun xizmat qilishi, xalqimizning hayot darajasini yuksaltirishga, bir soʻz bilan aytganda, amaliy hayotimizni yaxshilashga olib kelishi lozim».

Shunday ekan, iqtisodiy oʻsish bevosita yalpi milliy mahsulot miqdorining mutlaq va aholi jon boshiga hamda iqtisodiy resurs xarajatlari birligi hisobiga koʻpayishi hamda sifatining yaxshilanishida va tarkibining takomillashuvida ifodalanadi.

Mahsulotning oʻsish sur'ati bilan ishlab chiqarish omillari miqdorining oʻzgarishi oʻrtasidagi nisbat iqtisodiy oʻsishning ekstensiv yoki intensiv turlarini belgilab beradi.

Ekstensiv iqtisodiy oʻsishga ishlab chiqarishning avvalgi texnikaviy asosi saqlanib qolgan holda ishlab chiqarish omillari miqdorining koʻpayishi tufayli erishiladi. Aytaylik, mahsulot ishlab chiqarishni ikki hissa koʻpaytirish uchun mavjud korxona bilan bir qatorda oʻrnatilgan uskunalarning quvvati, miqdori va sifati ishchi kuchining soni hamda malaka tarkibi boʻyicha xuddi oʻshanday yana bir korxona quriladi. Ekstensiv rivojlanishda, agar u sof holda amalga oshirilsa, ishlab chiqarish samaradorligi oʻzgarmay qoladi.

Igtisodiy o'sishning intensiv turi sharoitida mahsulot chiqarish miqyoslarini kengaytirishga ishlab chiqarish omillarini sifat jihatidan takomillashtirish: yanada progressivroq ishlab chiqarish vositalarini va yangi texnikani qo'llash, ishchi kuchi malakasini oshirish, shuningdek mavjud ishlab chiqarish salohiyatidan yaxshiroq foydalanish yoʻli bilan erishiladi. Intensiv yoʻl ishlab chiqarishga jalb etilgan resurslarning har bir birligidan olinadigan samaraning, pirovard mahsulot miqdorining o'sishida, mahsulot sifatining oshishida o'z ifodasini topadi. Bunda mahsulot ishlab chiqarishni ikki hissa oshirish uchun mavjud korxonaga teng bo'lgan yana bir korxona qurishga hojat yo'q. Bu natijaga ishlab turgan korxonani rekonstruksiya qilish va texnika qurollantirish, mavjud resurslardan yaxshiroq foydalanish hisobiga erishish mumkin. Real hayotda ekstensiv va intensiv omillar sof holda, alohida-alohida mavjud bo'lmaydi, balki muayyan uyg'unlikda, bir-biri bilan qoʻshilgan tarzda boʻladi. Shu sababli ustuvor ekstensiv va ustuvor intensiv iqtisodiy oʻsish turlari tahlil qilinadi.

Iqtisodiy oʻsish murakkab va koʻp qirrali jarayondir. Shu sababli uni baholash uchun qandaydir bitta koʻrsatkich kifoya qilmaydi, muayyan koʻrsatkichlar tizimi talab qilinadi. Bu koʻrsatkichlar tizimida jismoniy va qiymat ifodasidagi koʻrsatkichlar farqlanadi.

Iqtisodiy oʻsishning jismoniy koʻrsatkichlari ancha aniq natija beradi, (chunki ular inflatsiya ta'siriga berilmaydi), lekin universal emas (iqtisodiy oʻsish sur'atlarini hisoblashda har xil ne'matlar ishlab chiqarishni umumiy koʻrsatkichga keltirish qiyin). Qiymat koʻrsatkichlar keng qoʻllaniladi, ammo har doim ham uni inflatsiyadan toʻliq «tozalash» mumkin boʻlavermaydi. Shu sababli iqtisodiy oʻsish sur'atlari qiyosiy yoki doimiy narxlarda hisoblanadi.

Makroiqtisodiy darajada iqtisodiy oʻsishning asosiy qiymat koʻrsatkichlari quyidagilar hisoblanadi:

- 1) YAMM (IMM) yoki milliy daromadning mutlaq hajmi va uning oʻsish sur'ati;
- 2) YAMM (IMM) yoki milliy daromadning aholi jon bosh hisobiga toʻgʻri keladigan miqdori va uning oʻsish sur'ati;
- 3) YAMM (IMM) yoki milliy daromadning iqtisodiy resurs xarajatlari birligi hisobiga toʻgʻri keladigan miqdori va uning oʻsish sur'ati.

Iqtisodiy oʻsishni aniqlashda har uchala koʻrsatkichdan ham foydalanish mumkin, lekin ularning ahamiyati turlicha. Masalan, agar diqqat markazida iqtisodiy potensial muammosi tursa, birinchi

koʻrsatkichdan foydalanish koʻproq mos keladi. Alohida mamlakat va regionlardagi aholining turmush darajasini taqqoslashda, koʻproq ikkinchi koʻrsatkichdan foydalaniladi. Iqtisodiy samaradorlikni baholashda uchinchi koʻrsatkichga ustuvorlik beriladi.

Odatda iqtisodiy oʻsish foizda oʻsishning yillik sur'ati sifatida aniqlanadi. Masalan, agar oʻtgan yili real YAMM 60 mlrd. soʻmni va joriy yilda 70 mlrd. soʻmni tashkil qilgan boʻlsa, oʻsish sur'atini joriy yildagi real YAMMning bazis davrdagi hajmiga boʻlish yoʻli bilan aniqlash mumkin. Bu holda oʻsish sur'ati 16,6 foiz ni (70/60*100) tashkil qiladi.

Mamlakatning iqtisodiy oʻsish sur'atini xarakterlaydigan koʻrsatkichlar (real YAMM va aholi jon boshiga real YAMMning oʻsishi) miqdoriy koʻrsatkichlar boʻlib, ular:

- *birinchidan*, mahsulot sifatining oshishini toʻliq hisobga olmaydi va shu sababli farovonlikning haqiqiy oʻsishini toʻliq xarakterlab berolmaydi;
- ikkinchidan, real YAMM va aholi jon boshiga YAMMning oʻsishi boʻsh vaqtning sezilarli koʻpayishini aks ettirmaydi va farovonlik real darajasining pasaytirib koʻrsatilishiga olib keladi;
- uchinchidan, iqtisodiy oʻsishni miqdoriy hisoblash boshqa tomondan uning atrof-muhitga va insonning hayotiga salbiy ta'sirini hisobga olmaydi.

Iqtisodiy oʻsishning alohida tomonlarini xarakterlovchi koʻrsatkichlari ham mavjud boʻlib, ulardan asosiylari ishlab chiqaruvchi kuchlar rivojlanish darajasi, mehnat unumdorligi va ish vaqtini tejash, shaxsiy daromad va foyda massasi, milliy iqtisodiyotning tarmoq tuzilishi kabilar hisoblanadi.

Ishlab chiqaruvchi kuchlar darajasi quyidagi koʻrsatkichlar bilan xarakterlanadi:

- a) ishlab chiqarish vositalarining rivojlanish darajasi, ya'ni uning unumdorligi;
 - b) xodimning malakasi va tayyorgarlik darajasi;
 - c) ishlab chiqarishning moddiy va shaxsiy omili oʻrtasidagi nisbat;
- d) mehnat taqsimoti, ishlab chiqarishning tashkil etilishi, ixtisoslashtirilishi va kooperatsiyasi.

Iqtisodiy oʻsishning jahon amaliyotida keng qoʻllaniladigan boshqa koʻrsatkichi iqtisodiyotning tarmoq tuzilishi hisoblanadi. U tarmoqlar boʻyicha hisoblab chiqilgan YAMM koʻrsatkichi asosida tahlil qilinadi.

O'zbekiston milliy iqtisodiyoti tarmoqlari bo'yicha YAIM ulushining
oʻzgarishi (joriy baholarda YAIMga foiz hisobida) ¹

Tarmoqlar	1990-yil	2000-yil	2010-yil	2011-yil
Jami	100	100	100	100
Sanoat	17,6	14,2	24,0	24,1
Qishloq xoʻjaligi	33,4	30,1	17,5	15,5
Qurilish	5,8	6,0	6,4	_
Transport va	5,2	7,7	12,4	_
aloqa				
Savdo	4,5	10,8	9,0	_
Boshqa sohalar	22,2	18,7	23,7	_
Sof soliqlar	11,31	12,5	7,0	5,0

Mahsulotlarga markazlashgan subsidiyalardan tashqari. Manba: Oʻzbekiston Respublikasi Davlat statistika qoʻmitasi.

Bunda xalq xoʻjaligining yirik sohalari, moddiy va nomoddiy ishlab chiqarish tarmoqlari oʻrtasidagi nisbat ham oʻrganiladi.

Investitsiyalar sarflarning ikkinchi tarkibiy qismi hisoblanadi. Investitsiyalar darajasi jamiyat milliy daromadi hajmiga sezilarli ta'sir koʻrsatadi, milliy iqtisodiyotdagi koʻplab mutanosibliklar uning oʻsish sur'atiga bogʻliq boʻladi. Investitsiyalar mamlakat miqyosida kengaytirilgan takror ishlab chiqarish obyektlari qurish, stanok, uskuna va shu kabi uzoq muddatli foydalaniladigan asosiy kapitallarni sotib olish, ishga tushirish bilan bogʻliq sarflarni bildiradi.

Investitsiyalar – asosiy va aylanma kapitalni koʻpaytirishga, ishlab chiqarish quvvatlarini kengaytirishga pul shaklidagi qoʻyilmadir. U pul mablagʻlari, bank kreditlari, aksiya va boshqa qimmatli qogʻozlar koʻrinishida amalga oshiriladi.

Investitsiyalarni roʻyobga chiqarish boʻyicha amaliy harakatlar – investitsion faoliyat, investitsiyalarni amalga oshiruvchi shaxs – investor deyiladi.

Investitsiya faoliyati quyidagi manbalar hisobiga amalga oshirilishi mumkin:

¹ Jadval Oʻzbekiston Makroiqtisodiyot va statistika vazirligi ma'lumotlari asosida tuzilgan.

- investorlarning oʻz moliyaviy resurslari (foyda, amortizatsiya ajratmalari, pul jamgʻarmalari va h.k.);
- qarz olingan moliyaviy mablagʻlar (obligatsiya zayomlari, bank kreditlari);
- jalb qilingan moliyaviy mablagʻlar (aksiyalarni sotishdan olingan mablagʻlar, jismoniy va huquqiy shaxslarning pay va boshqa toʻlovlari);
 - budjetdan investitsiyalarni moliyalashtirish.

Investitsiyalarning manbalaridan biri aholi keng qatlamlari (ishlovchilar, oʻqituvchilar, shifokorlar va boshqalar) jamgʻarmasi hisoblanadi. Muammo shundan iboratki, jamgʻarma xoʻjalik yurituvchi bir guruh tomonidan amalga oshiriladi, investitsiyalar esa shaxslar yoki xoʻjalik yurituvchi subyektlarning butunlay boshqa guruhi tomonidan amalga oshirilishi mumkin. Oʻz-oʻzidan aniqki, investitsiyalar manbai boʻlib iqtisodiyotda faoliyat qiluvchi sanoat, qishloq xoʻjalik va boshqa korxonalar foydasi ham hisoblanadi. Bu yerda «jamgʻaruvchi» va «investor» bir-biriga toʻgʻri keladi.

Investitsiyalarga qilinadigan sarflarning harakatlantiruvchi motivi *foyda* hisoblanadi. Tadbirkorlar ishlab chiqarish vositalarini qachonki ular foyda keltiradigan boʻlsa, sotib oladi.

Investitsiyalar darajasini belgilaydigan ikkinchi omil *foizning real stavkasi* hisoblanadi. Foiz stavkasi bu – real asosiy kapitalni sotib olish uchun zarur boʻlgan band qilingan pul kapitaliga korxona toʻlashi zarur boʻlgan pul miqdori hisoblanadi. Agar kutilayotgan sof foyda normasi (10 foiz) foiz stavkasi (7 foiz)dan ortiq boʻlsa, investitsiyani amalga oshirish maqsadga muvofiq boʻladi. Aksincha, foiz stavkasi (aytaylik, 12 foiz) kutilayotgan sof foyda normasidan (10 foiz) ortiq boʻlsa, investitsiyalash samarasiz hisoblanadi. Investitsiya darajasiga kutilayotgan sof foyda normasi va foiz stavkasidan tashqari boshqa quyidagi omillar ham ta'sir koʻrsatadi:

- 1) mashina va uskunalarni xarid qilish, foydalanish va ularga xizmat koʻrsatish xarajatlari;
 - 2) tadbirkorlardan olinadigan soliq miqdori;
 - 3) texnologik oʻzgarishlar.

Iqtisodiy oʻsishni ta'minlash, yangi ish oʻrinlarini tashkil qilish, bandlik muammosini hal etish, aholining daromadlari va farovonligini oshirishda tobora muhim oʻrin tutadigan kichik biznes va xususiy tadbirkorlikni jadal rivojlantirish, ragʻbatlantirish va qoʻllab-quvvatlashga alohida e'tibor qaratildi.

Mamlakatimizda 2005-yildan keyingi, ya'ni ikki palatali parlament faoliyati davrida kichik biznes va xususiy tadbirkorlikning muhim

tarmoqlaridan biri boʻlgan kasanachilikni hukumat dasturi asosida rivojlantirishga keng yoʻl ochildi. Kasanachilikning doʻppidoʻzlik, tikuvchilik (ishchi kiyimlari, qoʻlqop, chopon singari), temirchilik, gilamdoʻzlik kabi hunarmandchilik sohalari kengaydi. Birgina «Qishloq taraqqiyoti va farovonligi» yilida koʻrilgan amaliy choralar natijasida mamlakatimizda 940 mingdan ziyod yangi ish oʻrinlari yaratildi, ularning 500 mingga yaqini qishloq joylarida tashkil etildi. Kichik biznes sohasida 390 mingdan ziyod, shu jumladan, xizmat koʻrsatish sohasida 270 mingdan ortiq yangi ish oʻrinlari ochildi.

bizning Keyingi yillarda sohasida eksport qoʻlga kiritgan yutuqlarimiz, avvalo, mamlakatimiz iqtisodiyotini tubdan tarkibiy oʻzgartirish va diversifikatsiya qilish, qisqa muddatda biz uchun mutlaqo yangi, lokomotiv rolini bajaradigan tarmoqlarni barpo etish, ishlab chiqarishni modernizatsiya qilish, texnik va texnologik yangilash oshirish, zamonaviy infratuzilmasini dasturlarini amalga bozor shakllantirish borasida o'z vaqtida boshlangan, chuqur o'ylangan va uzoq istiqbolga moʻljallangan ishlarimizning natijasidir. Shuni mamnuniyat bilan ta'kidlash kerakki, o'zlashtirilgan barcha investitsiyalarning qariyb korxonalar va aholi mablagʻlari tashkil etadi. soliq yukini kamaytirish va mamlakatimizda xoʻjalik yurituvchi subyektlarning investitsiya faolligini ragʻbatlantirish boʻyicha olib borilayotgan soliq siyosati qanchalik to'g'ri ekanini yana bir bor tasdiqlaydi.

3-jadval

2005–2009-yillarda investitsiyalarni moliyalashtirish tarkibidagi oʻzgarishlar (foizda)

Moliyalashtirish	2005-у.	2006-у.	2007-у.	2008-у.	2009-у.
manbalari					
Davlat budjeti	12,7	10,7	9,0	9,0	8,1
Chet el investisiyalari	19,2	19,0	22,8	25,8	32,4
Korxonalar va aholi	60,3	60,0	59,0	53,9	46,9
mablagʻlari					
Boshqa manbalar	7,8	10,3	9,2	11,3	12,6

Iqtisodiyotimizda tarkibiy oʻzgarishlarni amalga oshirish va uni modernizatsiya qilish borasida strategik muhim rol o'ynaydigan lovihalarni amalga oshirish, birinchi navbatda, ishlab chigarish infratuzilmasini shakllantirishda 2006-yilda tashkil etilgan, bugungi kunda 3 milliard 200 million AQSh dollaridan ortiq nizom jamgʻarmasiga ega bo'lgan O'zbekiston Respublikasi Tiklanish va taraqqiyot fondi faoliyatiga katta ahamiyat berildi. Mamlakatimiz bo'yicha investitsiya dasturlarini amalga oshirish natijasida qariyb 250 milliard soʻmlik asosiy fondga ega bo'lgan jami 423 ta obyekt, jumladan, oziq-ovqat sanoatida 145 ta, qurilish materiallari sanoatida 118 ta, yengil va toʻqimachilik sanoatida 65 ta, qishloq va o'rmon xo'jaligi sohasida 58 ta, kimyo va neftkimyo sanoatida 13 ta, farmatsevtika tarmog'ida 8 ta obyekt ishga tushirildi.

Jahon moliyaviy-iqtisodiy inqirozining dastlabki 2009-yili davomida nihoyasiga yetkazilgan strategik loyihalar

Loyiha obyekti	Loyihaning qisqacha mazmuni
«Fargʻonaazot» korxonasi	Ammiak agregatlarini rekonstruksiya
«Maksam-Chirchiq» korxonasi	qilish
Namangan shahridagi yengil	Yengil avtomobillar uchun fara va
avtomobillar uchun butlovchi qismlar	chiroqlar ishlab chiqarish
ishlab chiqarish zavodi	
Buxoro shahridagi «DEU tekstil»	Paxta tolasini qayta ishlash asosida
toʻqimachilik majmui	toʻqimachilik mahsulotlari ishlab
	chiqarish
«Gazli» qoʻshimcha kompressor	Gaz mahsulotlarini iste'molga
stansiyasi	tayyorlash va ishlov berish jarayonlarini
«Qoʻngʻirot» kompressor stansiyasi	ta'minlash
Turkmaniston-O'zbekiston-Qozog'iston-	Turkmanistondan Oʻzbekiston hududi
Xitoy transmilliy magistral gaz quvuri	orqali Xitoyga oʻtadigan gaz quvurini
	tortish ishlari
«Yangi Angren-Oʻzbekiston» LEP-500	Mamlakat hududlarini elektr energiyasi
elektr uzatish tarmogʻi	bilan ta'minlash
«Gʻuzor-Surxon» yuqori voltli elektr	
uzatish tarmogʻi	
«Ohangaron-Pungon» magistral gaz	Mamlakat hududlarini tabiiy gaz bilan
quvuri	ta'minlash

Bundan tashqari, hududlarimizda, avvalo, qurilish materiallari sanoati, oziq-ovqat, yengil sanoat va boshqa tarmoqlarda kichik biznes

sohasida faoliyat olib boradigan 480 dan ortiq yangi ishlab chiqarish korxonalari tashkil etildi. Iqtisodiyotni jadal rivojlantirish va xalqimiz farovonligini oshirishda mamlakatimiz hududlarida ishlab chiqarish hamda ijtimoiy infratuzilmani rivojlantirish masalalariga alohida e'tibor qaratilmoqda.

Strategik investitsiya loyihalarini amalga oshirish natijasida mamlakatimizda yagona elektr va gaz tarmogʻi tizimlarini tashkil etish ishlari asosan yakunlandi. Bu esa Fargʻona vodiysi va Oʻzbekiston janubida yashaydigan aholini tabiiy gaz va elektr energiyasi bilan ishonchli ta'minlash, shuningdek, elektr energiyasi eksport qilishni sezilarli ravishda oshirish imkonini beradi.

Oʻzbekistonning investitsiya siyosati. Makroiqtisodiy barqarorlikka erishilishi, iqtisodiy va institutsional islohotlarning chuqurlashtirilishi hamda mamlakatimizda investitsiya muhitining yaxshilanishi investitsiya faolligining sezilarli darajada kuchayishiga va iqtisodiyotimizga yoʻnaltirilayotgan kapital qoʻyilmalar hajmining 2010-yilda 1990-yildagiga nisbatan 11,6 barobar oʻsishi uchun imkon berdi. Ayniqsa, moliyalashtirish manbalari boʻyicha investitsiyalar tarkibida tub oʻzgarishlar roʻy bermoqda. Iqtisodiyotimizdagi ancha yuqori oʻsish sur'atlari hisobidan markazlashmagan manbalar, birinchi navbatda, xususiy va toʻgʻridan-toʻgʻri xorijiy investitsiyalarning ulushi ortib bormoqda.

4-jadval Kapital qoʻyilmalar dinamikasi va tarkibi

	Kapital qoʻyilmalar			Kapital qoʻyilmalar		
	(million dollar)			tarkibi (foiz)		
	1990-	2000-	2010-	1990-	2000-	2010-
	yil	yil	yil	yil	yil	yil
Kapital qoʻyilmalar	833,8	3142,5	9712,7	100	100	100
Shu jumladan						
Davlat budjeti, budjetdan	386,1	958,1	1266,6	46,3	30,5	13
tashqari fondlar mablagʻlari va						
boshqa markazlashtirilgan						
manbalar						
Markazlashmagan investitsiyalar	447,7	1456,9	5621,6	53,7	46,3	57,9
Korxonalar mablagʻlari	342,7	852,9	3124,4	41,1	27,1	32,2
Aholi mablagʻlari	105,0	376,6	1554,2	12,6	12,0	16

Bank kreditlari va boshqa kredit	_	227,4	943,0	_	7,2	9,7
mablagʻlari						
Xorijiy investitsiyalar va	_	727,5	2824,5	_	23,2	29,1
kreditlar						
Shu jumladan, toʻgʻridan-toʻgʻri	_	105,2	2454,7	_	3,4	25,3
xorijiy investitsiyalar						

Agar 1990-yilda mamlakatimizning investitsiya portfelida xorijiy investitsiyalar deyarli mavjud bo'lmagan bo'lsa, 2000-yilda investitsiya va kreditlarning ulushi 23,2 foizni, jumladan, hukumat kafolati bilan jalb etilgan xorijiy investitsiya va kreditlar 19,8 foizni, to'g'ridan-to'g'ri xorijiy investitsiyalar esa 3,4 foizni tashkil qildi. Xorijiy investorlar uchun yaratilgan qulay biznes muhiti, keng huquqiy kafolat va imtiyozlar tizimi, xorijiy investitsiyalar ishtirokidagi korxonalarni ragʻbatlantirishga qaratilgan chora-tadbirlar majmui mamlakatimiz igtisodiyotiga to'g'ridan-to'g'ri xorijiy investitsiyalar oqimini tubdan ko'paytirish imkonini berdi. Natijada 2010-yilda xorijiy investitsiyalarning jami kapital qoʻyilmalar tarkibidagi ulushi 29,1 foizni, jumladan, toʻgʻridanto'g'ri xorijiy investitsiyalar 25,3 foizni va hukumat kafolati ostidagi investitsiyalar 3,8 foizni tashkil etdi.

5-jadval
Iqtisodiyot tarmoqlari boʻyicha kapital qoʻyilmalar
tarkibi (foiz hisobida)

	1990-yil	2000-yil	2010-yil
Jami	100	100	100
Ishlab chiqarish tarmoqlari boʻyicha	58,3	57,5	73,5
Yoqilgʻi-energetika	5,2	7,6	11,8
Metallurgiya	0,1	2,7	5,5
Kimyo va yoqilgʻi-kimyo	1,4	7,9	1,2
Mashinasozlik	3,6	4,1	3,4
Yengil sanoat	2,5	2,4	2,5
Oziq-ovqat sanoati	2,3	2,5	1,7
Qurilish materiallari	1,7	0,3	2,5
Qishloq xoʻjaligi	26,7	5,7	3,5
Transport va aloqa	5,4	16,8	29,9
Boshqa sohalar	9,4	7,5	11,5
Noishlab chiqarish tarmoqlari boʻyicha	41,7	42,5	26,5

Manba: Oʻzbekiston Respublikasi Davlat statistika qoʻmitasi.

Agar 1990-yilda iqtisodiyotga kiritilgan investitsiyalarning 46 foizdan ortigʻi davlat budjeti, budjetdan tashqari fondlar va boshqa markazlashgan manbalar mablagʻlari hisobidan moliyalashtirilgan boʻlsa, 2010-yilda markazlashgan moliyalashtirish manbalarining jami kapital qoʻyilmalar hajmidagi ulushi 13 foizga tushdi. Bu jarayonda davlat budjeti va boshqa markazlashgan manbalar hisobidan yoʻnaltirilgan umumiy investitsiyalar hajmi 3,3 barobardan ziyod ortdi.

1990–2010-yillarda iqtisodiyotni modernizatsiya qilish, texnik va texnologik qayta jihozlash borasidagi aniq maqsadga yoʻnaltirilgan siyosat natijasi sifatida ishlab chiqarishga jalb qilingan investitsiyalarning ulushi oʻsib, umumiy kapital qoʻyilmalar hajmidagi 58,3 foizdan 73,5 foizga yetdi. Faol investitsiya siyosati iqtisodiyotni tarkibiy oʻzgartirishning eng samarali vositasi hisoblanadi. Oʻzbekistonning investitsiya strategiyasida yangi va yuksak texnologiyalarga asoslangan, ilgʻor texnologiyalar bilan jihozlangan va xom ashyo resurslarimizni chuqur qayta ishlashni ta'minlaydigan, mamlakatimizning eksport salohiyatini oshirish hamda yangi ish oʻrinlari yaratishga yoʻnaltirilgan investitsiya loyihalariga ustuvor ahamiyat berilmoqda.

1990–2010-yillar davomida investitsiyalar tarkibida yoqilgʻi-energetika sohasini (5,2 foizdan 11,8 foizga), transport va aloqa sohasini (5,4 foizdan 29,9 foizga) hamda metallurgiya sohasini (0,1 foizdan 5,5 foizga) rivojlantirishga yoʻnaltirilgan investitsiyalar ulushi ortdi. Yangi ishlab chiqarish obyektlarini tashkil etish hamda mavjud ishlab chiqarish korxonalarini modernizatsiya qilish uchun mashinasozlik, metallurgiya, kimyo va yoqilgʻi-kimyo, yengil va oziq-ovqat sanoati sohalariga yirik kapital qoʻyilmalar yoʻnaltirildi, bu esa iqtisodiyotga jalb qilingan kapital qoʻyilmalar tarkibida ushbu tarmoqlar ulushining sezilarli darajada oshishiga olib keldi.

Yuqori qoʻshimcha qiymatga ega boʻlgan yuksak texnologiyalar chiqarishga ishlab qaratilgan mahsulotlar investitsiya loyihalarini amalga oshirishda jahondagi eng yirik va mashhur AQShning «Jeneral Motors», «Teksako», Germaniyaning «MAN», «Daymler Bens», Britaniyaning «BAT», Ispaniyaning «Klaas», Buyuk «Maksam», Yaponiyaning «Isuzu», «Ito-chu», Malayziyaning «Petronas», Koreyaning «Korean Eyr», «CNOS», «LG», Xitoyning «CNPC», Rossiyaning «Lukoyl», «Gazprom» kabi kompaniyalari, Osiyo taraqqiyot banki, Jahon banki, Islom taraqqiyot banki singari yirik xalqaro moliya tashkilotlari, Janubiy Koreya, Yaponiya, Xitoy va bir qator arab davlatlarining investitsiya banklari mamlakatimizning asosiy hamkorlari boʻlmoqda.

Investitsiya va sanoat sohasidagi faol siyosat natijasi sifatida mustaqillik yillarida yurtimizda yengil va yuk avtomobillari, avtobuslar ishlab chiqaradigan yangi avtomobil zavodlari tashkil etildi. Jahondagi yetakchi xorijiy kompaniyalar bilan hamkorlikda Buxoro neftni qayta ishlash zavodi, Shoʻrtan gaz-kimyo majmuasi, Qoʻngʻirot soda zavodi, oʻnlab toʻqimachilik majmualari barpo etildi.

Iqtisodiyotning yetakchi, avvalambor, bazaviy tarmoqlarini modernizatsiya qilish va texnik qayta jihozlash boʻyicha loyihalarni va shuningdek, samarali tarkibiy oʻzgarishlar hamda investitsiya siyosatini amalga oshirishda Oʻzbekiston Respublikasi Prezidenti tashabbusi bilan 2006-yilda tashkil etilgan nizom fondi, 2012-yilda qariyb 13 milliard dollardan iborat boʻlgan Oʻzbekiston Respublikasi Tiklanish va taraqqiyot jamgʻarmasi muhim oʻrin egallamoqda. Jamgʻarmaning eng asosiy vazifalaridan biri — iqtisodiyotning yetakchi tarmoqlari rivoji, birinchi navbatda, ishlab chiqarish infratuzilmasining shakllanishi bilan bogʻliq ustuvor vazifalarni amalga oshirishda hal qiluvchi ahamiyat kasb etadigan strategik investitsiya loyihalarini moliyalashtirishdan iborat.

Tiklanish va taraqqiyot jamgʻarmasi hal etadigan yana bir muhim vazifa xorijiy investorlar, moliya institutlari va sheriklarni investitsiya loyihalarini birgalikda moliyalashtirish va amalga oshirish maqsadida mamlakatimizga keng jalb etish hisoblanadi. Jamgʻarmaning qoʻshma loyihalarda ishtirok etishi Osiyo taraqqiyot banki, Yaponiya xalqaro hamkorlik agentligi, Islom taraqqiyot banki, Xitoy eksport-import banki, Xitoy Davlat taraqqiyot banki, Koreya taraqqiyot banki, boshqa xorijiy moliya institutlari, bank va kompaniyalarning mablagʻlari hisobidan 3,2 milliard dollardan ziyod chet el investitsiyasi va kreditlarini jalb etish imkonini berdi.

Oʻtgan yili faoliyat koʻrsatayotgan korxonalarni modernizatsiya qilish, texnik va texnologik qayta jihozlash hamda zamonaviy, yuksak texnologiyalarga asoslangan yangi ishlab chiqarishni tashkil yetishni tezlashtirish borasida faol investitsiya siyosati yuritishga alohida e'tibor qaratildi. 2011-yilda moliyalashtirishning barcha manbalari hisobidan qiymati 10 milliard 800 million dollardan ortiq kapital qoʻyilmalar oʻzlashtirildi, bu 2010-yilga nisbatan 11,2 foiz koʻp, demakdir. Investitsiyalarning yalpi ichki mahsulotdagi ulushi 23,9 foizni tashkil etgani mamlakatimizda investitsiya jarayonlarining jadal faollashib borayotganidan dalolat beradi.

Iqtisodiyotimizning real sektoriga qariyb 2 milliard 900 million dollar hajmida xorijiy investitsiyalar jalb qilindi, ularning 78,8 foizi toʻgʻridan-

toʻgʻri xorijiy investitsiyalardir. Kapital qoʻyilmalarni moliyalashtirish manbalari va ulardan foydalanish borasida ijobiy sifat oʻzgarishlari roʻy bermoqda. Jami investitsiyalarning 73 foizdan ortigʻi mamlakatimizning ichki manbalari hisobidan – korxonalar va aholi mablagʻlari, investitsiya jarayonlarida tobora faol ishtirok etayotgan tijorat banklari kreditlari, shuningdek, davlat budjeti va budjetdan tashqari jamgʻarmalar mablagʻlari hisobidan shakllantirilmoqda.

Jami investitsiyalarning 73,5 foizidan ortigʻi ishlab chiqarish quvvatlarini barpo etishga yoʻnaltirilmoqda. Investitsiyalarning qariyb 45,3 foizi zamonaviy, yuksak samarali asbob-uskunalar xarid qilishga yoʻnaltirilgani ayniqsa, muhimdir.

Mamlakatimizda faol investitsiya siyosati olib borilishi natijasida hisobot davrida oʻnlab zamonaviy korxonalar ishga tushirildi. Jumladan, «Jeneral Motors Pavertreyn Oʻzbekiston» qoʻshma korxonasida yuqori texnologiyalar asosida avtomobil dvigatellari ishlab chiqarish yoʻlga qoʻyildi. Shuningdek, avtomobil generatori va kompressorlari ishlab chiqarish boʻyicha quvvatlar barpo etildi, energiyani tejaydigan lampalar ishlab chiqarish boʻyicha uchta loyiha amalga oshirildi. Shular qatorida «Zenit elektroniks» qoʻshma korxonasida «Samsung» kir yuvish mashinalari ishlab chiqarish oʻzlashtirildi. Ayni paytda maishiy gaz plitalari, konditsionerlar, elektr changyutgich va bir qancha boshqa mahsulotlar ishlab chiqarish yoʻlga qoʻyildi.

«Muborak gazni qayta ishlash zavodi» unitar shoʻ'ba korxonasida suyultirilgan gaz ishlab chiqarish hajmini koʻpaytirish maqsadida propanbutan aralashmasi qurilmasining birinchi navbatini, Samarqand viloyatida «MAN» yuk tashish mashinalari ishlab chiqarish boʻyicha yangi majmuaning dilerlik markazini bunyod etish ishlari yakuniga yetkazildi. Navoiy issiqlik elektr stansiyasida bugʻ-gaz qurilmasini barpo yetish, Oʻzbekiston-Xitoy gaz quvurining uchinchi yoʻnalishi kabi yirik loyihalarni amalga oshirishda qurilish-montaj ishlari qizgʻin pallaga kirdi.

Navoiy shahridagi erkin industrial-iqtisodiy zona muvaffaqiyatli faoliyat yurita boshladi, uning hududida yangi tashkil etilgan korxonalarda spidometrlar, avtomobillar uchun oʻtkazgichlar, kompressorlar, raqamli televizion tyunerlar, energiyani tejaydigan lampalar, yoritish uskunalari, diodli lampalar, modemlar, polietilen va polipropilen quvurlar, kosmetika vositalari hamda tibbiyot mahsulotlari ishlab chiqarish yoʻlga qoʻyildi.

Oʻzbekiston milliy avtomobil magistralini qurish va rekonstruksiya qilish boʻyicha loyihalar doirasida 302,5 kilometr uzunlikdagi yoʻlga

zamonaviy qoplama yotqizilib, rekonstruksiya qilindi. Toshkent va Buxoro shaharlari aeroportlarining mahalliy yoʻnalishlarda xizmat koʻrsatadigan yoʻlovchi terminallari foydalanishga topshirildi. Toshkent—Samarqand yoʻnalishida mazkur ikki shahar oʻrtasidagi 344 kilometr masofani atigi 2 soatda bosib oʻtadigan, yuqori tezlikda harakat qiladigan «Talgo—250» yoʻlovchilar elektr poyezdi qatnovi yoʻlga qoʻyildi.

Bu poyezddan foydalanish maqsadida temir yoʻl infratuzilmasini modernizatsiya qilish va takomillashtirish boʻyicha keng koʻlamdagi ishlar amalga oshirildi. Jumladan, 600 kilometr uzunlikdagi yoʻllar qaytadan tiklandi, 68 kilometrdan iborat yangi temir yoʻllar yotqizildi, Toshkent va Samarqand shaharlari temiryoʻl vokzallari rekonstruksiya qilindi va qaytadan jihozlandi. Oʻtgan yil mobaynida telekommunikatsiya tizimini rivojlantirishga qaratilgan bir qator loyihalarni amalga oshirish ishlari davom ettirildi. Xususan, Jizzax—Bulungʻur yoʻnalishi boʻylab 73 kilometr uzunlikdagi optik tolali aloqa tarmogʻi oʻtkazildi, mobil aloqa va Internet tarmogʻi koʻlami tobora faol kengayib bormoqda. Yurtimizda aholiga raqamli televideniye xizmati koʻrsatish hajmi 38 foizga etgani ham shu boradagi ulkan ishlarimizning amaliy natijasidir.

2011-yilda logistika markazlari faoliyati jadallashdi. Xususan, Navoiy xalqaro intermodal logistika markazi orqali 50 ming tonna yuk tashildi. «Angren logistika markazi» yopiq aksiyadorlik jamiyati tomonidan Qamchiq dovoni orqali 4 million 200 ming tonna, ya'ni 2010-yilga nisbatan 1,3 barobar koʻp yuk tashildi. Mamlakatimiz iqtisodiyotini rivojlantirishga yoʻnaltirilayotgan kapital qoʻyilmalar hajmi ancha oshib, oʻtgan yilga nisbatan ularning oʻsish sur'atlari 109,3 foizni, yalpi ichki mahsulot tarkibidagi ulushi esa 24,5 foizni tashkil etishi kutilmoqda.

Shuningdek, xorijiy investitsiyalar va jalb qilinadigan kreditlar hajmi 16 foizga koʻpayib, 3 milliard 300 million dollardan oshadi. Mazkur mablagʻning 2 milliard 300 million dollardan ortigʻi yoki qariyb 70 foizini toʻgʻridan-toʻgʻri xorijiy investitsiyalar tashkil etishi ayniqsa, e'tiborlidir. Bu xorijiy investorlarning iqtisodiyotimizning mustahkamligi va barqarorligiga, eng muhimi, Oʻzbekiston taraqqiyotining istiqboliga boʻlgan qiziqishi va ishonchi tobora ortib borayotganidan yaqqol dalolat beradi.

Jahon iqtisodiyotida vujudga kelayotgan tendensiyalardan, shuning-dek, mamlakatimizni kelajakda iqtisodiy va ijtimoiy rivojlantirish strategiyasidan kelib chiqqan holda, 2012-yilda va undan keyingi yillarda quyidagi ustuvor vazifalarning amalga oshirilishi muhim ahamiyat kasb etadi: birinchi darajali e'tibor mamlakatimiz iqtisodiyotining

raqobatdoshligini oshirish boʻyicha dastur tayyorlash va uni amalga oshirishga qaratilishi zarur. Bu maqsadning dolzarbligi va ahamiyati avvalo shu bilan belgilanadiki, biz oʻrta muddatli istiqbolda iqtisodiyotimizni rivojlangan demokratik davlatlar darajasiga olib chiqishni hozirgi bosqichdagi bosh strategik vazifa sifatida oʻz oldimizga qoʻyganmiz.

Oʻz-oʻzidan ayonki, raqobatdosh iqtisodiyotni shakllantirmasdan, pirovard natijada esa raqobatdosh mamlakatni barpo etmasdan turib, biz qabul qilgan «Mamlakatimizda demokratik islohotlarni chuqurlashtirish va fuqarolik jamiyatini rivojlantirish konsepsiyasi»da koʻzda tutilgan maqsadli vazifalarni amalga oshirmasdan turib, bu haqda jiddiy soʻz yuritish mumkin emas. Bu vazifaning oʻrtaga qoʻyilishi, shuningdek, inqiroz jarayonlarining chuqurlashuvi, dunyo miqyosida xarid talabining pasayishi va shunga muvofiq tarzda jahon bozorida xom ashyo, materiallar, ayniqsa, tayyor mahsulotlar boʻyicha raqobatning yildan-yilga kuchayib borayotgani bilan ham bogʻliq, albatta.

Bugungi kunda koʻplab rivojlangan va jahon iqtisodiyotida yetakchi oʻrin tutadigan mamlakatlar tajribasi shuni soʻzsiz isbotlab bermoqdaki, raqobatdoshlikka erishish va dunyo bozorlariga chiqish, birinchi navbatda, iqtisodiyotni izchil isloh etish, tarkibiy jihatdan oʻzgartirish va diversifikatsiya qilishni chuqurlashtirish, yuqori texnologiyalarga asoslangan yangi korxona va ishlab chiqarish tarmoqlarining jadal rivojlanishini ta'minlash, faoliyat koʻrsatayotgan quvvatlarni modernizatsiya qilish va texnik yangilash jarayonlarini tezlashtirish hisobidan amalga oshirilishi mumkin.

Ishlab chiqarish hajmini kengaytirish va raqobatdosh mahsulotlarning yangi turlarini oʻzlashtirish boʻyicha qabul qilingan birinchi navbatdagi chora-tadbirlar dasturiga muvofiq, 2012–2016-yillarda hisob-kitoblar boʻyicha qiymati 6 milliard 200 million dollar boʻlgan 270 dan ziyod investitsiya loyihasini, shuningdek, ishlab chiqarishni modernizatsiya qilish, texnik va texnologik qayta jihozlash boʻyicha tarmoq dasturlarini amalga oshirish koʻzda tutilmoqda. Joriy 2012-yilda iqtisodiyotimizni diversifikatsiya qilishni davom ettirishda oʻta muhim ahamiyatga ega boʻlgan loyihalarni amalga oshirish moʻljallanmoqda. Jumladan, Surgʻil koni bazasida Ustyurt gaz-kimyo majmui, Dehqonobod kaliyli oʻgʻitlar va Qoʻngʻirot soda zavodlarining ikkinchi navbatini, sintetik suyuq yoqilgʻi ishlab chiqarish zavodini qurish ishlari boshlanadi. Shuningdek, Tollimarjon issiqlik elektr stansiyasida ikkita bugʻ-gaz qurilmasi, Angren issiqlik elektr stansiyasida yangi energoblok qurish, avtomobil shinalari

va transportyor tasmasi ishlab chiqarishni yoʻlga qoʻyish, toʻqimachilik korxonalari quvvatlarini yanada kengaytirish va butun texnologik jarayonni takomillashtirish boʻyicha loyihalarni amalga oshirish koʻzda tutilmoqda.

Korxonalarni modernizatsiya qilish, texnik va texnologik qayta jihozlash ishlarini amalga oshirishda Oʻzbekiston Respublikasi Tiklanish va taraqqiyot jamgʻarmasining roli tobora ortib borayotganini alohida ta'kidlash joiz. Hozirgi vaqtda ushbu jamgʻarma kapitali 9 milliard dollardan oshib ketdi. 2012-yilda jamgʻarma mablagʻlari hisobidan sanoat va ishlab chiqarish infratuzilmasining yetakchi tarmoqlarida 758 million dollardan ziyod hajmdagi 29 ta strategik investitsiya loyihasini birgalikda moliyalash moʻljallanmoqda, bu oʻtgan yilga nisbatan 38,2 foizga koʻp, demakdir.

Barchamizga ma'lumki, mustaqillikni qo'lga kiritishimiz asosida eski totalitar tizimning barham topishi, eng avvalo, mamlakatimiz hududi bo'ylab, qolaversa, jahonning turli nuqtalari bilan tutashtiruvchi, qulay, samarali va eng muhimi, ishonchli avtomobil yo'llar tizimining barpo etilishini taqozo etar edi. Shunga ko'ra, hozirda yuqori darajadagi xalqaro standartlarga javob beradigan, mamlakatimizning barcha hududlarini o'zaro ishonchli bog'laydigan va mintaqaviy hamda jahon bozorlariga chiqishni ta'minlaydigan O'zbekiston milliy avtomagistralini qurish va rekonstruksiya qilish bo'yicha keng ko'lamli dastur amalga oshirilmoqda. Buning natijasida umumiy foydalanishdagi avtomobil yo'llarining uzunligi 42530 kilometrga yetdi.

Oʻzbekiston Respublikasi avtomobil yoʻllari tarmogʻining umumiy uzunligi

Yoʻl turlari	Uzunligi, km
Umumiy foydalanishdagi avtomobil yoʻllari	42530
Shaharlar va boshqa aholi punktlari koʻchalari	61664
Xoʻjalik avtomobil yoʻllari	79367
shu jumladan:	
– ichki xoʻjalik yoʻllari	67274
– korxonalarga qarashli yoʻllar	12093

Umumiy foydalanishdagi avtomobil yoʻllarining 51 foizi mahalliy ahamiyatdagi, 40 foizi davlat ahamiyatidagi va 9 foizi xalqaro ahamiyatdagi yoʻllar hisoblanadi.

Oʻzbekistonda umumiy foydalanishdagi avtomobil yoʻllari:

- mahalliy ahamiyatdagi yoʻllar 21995 km (51 foiz).
- davlat ahamiyatidagi yoʻllar 16909 km (40 foiz);
- xalqaro ahamiyatdagi yoʻllar 3626 km (9 foiz).

Oʻzbekiston Respublikasi umumiy foydalanishdagi avtomobil yoʻllarida 2009-yil yakuni boʻyicha qurish va ta'mirlash koʻrsatkichlari

Koʻrsatkichlar	Hajmi	2008-yilga
	mlrd.so'm	nisbatan foiz
Jami bajarilgan ishlar	370,6	118,7
Investitsiya dasturi	114,4	104,8
Mukammal va oʻrta ta'mirlash	177,2	126,1
Joriy ta'mirlash va saqlash ishlari	63,2	117,3
Yo'l ta'mirlash texnikalari va jihozlar	15,8	160,9
xarid qilish		

Yoʻl-qurilish texnikasini sotib olish uchun Osiyo taraqqiyot bankining umumiy qiymati 56 million dollarga teng boʻlgan imtiyozli kredit resurslari jalb etildi.

Mamlakatimiz temir yoʻl transport tizimini rivojlantirish va modernizatsiya qilish boʻyicha ishlar davom ettirildi. «Toshgʻuzor—Boysun—Qumqoʻrgʻon» yangi temir yoʻl tarmogʻida Yaponiya kapitali ishtirokida 5 ta koʻprik foydalanishga topshirildi. «Navoiy—Uchquduq—Sulton Uvaystogʻ—Nukus» temir yoʻl tarmogʻining 6 ta yangi razyezdi ishga tushirildi. Temir yoʻllarni elektrlashtirish, temir yoʻl lokomotivlari parki va harakatdagi tarkibni yangilash loyihalarini amalga oshirish ishlari boshlandi.

Mamlakatimizning barcha hududlarini ishonchli ravishda bogʻ-laydigan, mintaqaviy va jahon bozorlariga chiqishni ta'minlaydigan Oʻzbek milliy avtomagistrali tarkibiga kiradigan yoʻllarni qurish va rekonstruksiya qilish loyihalarini jadal amalga oshirish biz uchun gʻoyat muhim ahamiyatga ega. Shu maqsadda 2012-yilda 517 kilometrlik avtomobil yoʻllari, ikkita yirik transport bogʻlamasi, 544 pogon metr koʻprik va yoʻl oʻtkazgichlarini qurish hamda rekonstruksiya qilish moʻljallanmoqda. Buning uchun Respublika yoʻl jamgʻarmasidan 360 million AQSh dollaridan ortiq qiymatdagi, oʻtgan yilga nisbatan 12,5 foiz koʻp mablagʻ yoʻnaltirish rejalashtirilmoqda.

Oʻzbek milliy avtomagistralini modernizatsiya qilish nafaqat mamlakatimiz, balki butun Markaziy Osiyo mintaqasi uchun ulkan strategik ahamiyatga ega ekanini inobatga olgan holda, ushbu loyihani amalga oshirishda Osiyo taraqqiyot banki, Islom taraqqiyot banki, Arab Muvofiqlashtirish guruhi a'zolari singari xalqaro moliya tuzilmalari faol ishtirok etmoqda.

Mazkur tashkilotlar tomonidan 742 kilometrlik avtomobil yoʻllarini qurish va rekonstruksiya qilish, yoʻl qurilishi boʻyicha zamonaviy texnika sotib olish uchun 1 milliard 400 million dollarga yaqin imtiyozli kreditlar ajratildi. Faqat 2012-yilning oʻzida ushbu maqsadlar uchun 109 million dollar miqdoridagi mablagʻni oʻzlashtirish, 165 kilometr sement-beton qoplamali yoʻllarni foydalanishga topshirish, jumladan, Qamchiq dovoni orqali oʻtadigan yoʻlni qayta ta'mirlash moʻljallanmoqda.

«O'zavtoyo'l» davlat aksiyadorlik kompaniyasi, Respublika yo'l jamg'armasi, Qoraqalpog'iston Respublikasi Vazirlar Kengashi, viloyatlar va Toshkent shahar hokimliklariga ajratilayotgan mablagʻlarni samarali oʻzlashtirish hamda avtomobil yoʻllarini qurish, rekonstruksiya qilish va ta'mirlash yuzasidan belgilangan ko'rsatkichlarni so'zsiz bajarish bo'yicha amaliy choralar ko'rish vazifasi topshiriladi. Temir yo'llar kommunikatsiyalarini yanada rivojlantirish, Maroqand – Qarshi va Qarshi - Termiz temir yoʻl uchastkalarini elektrlashtirish boʻyicha loyihalar amalga oshirilishini jadallashtirish zarur. Shu bilan birga, Toshkent -Samarqand temir yoʻl tarmogʻi uchastkasida obodonlashtirish ishlarini davom ettirish hamda yuqori tezlikda harakatlanadigan yoʻlovchi poyezdlarining ishonchli va xavfsiz qatnovini ta'minlashga alohida e'tibor qaratish darkor. «Oʻzbekiston temir yoʻllari» kompaniyasi manfaatdor vazirlik va idoralar bilan birgalikda mazkur ishlarni amalga oshirish bo'yicha tarmoq jadvallarini ishlab chiqishi va tasdiqlatishi, ularning o'z vaqtida bajarilishini ta'minlashi lozim.

Erkin industrial-iqtisodiy zona — mamlakat hududining xorijiy mamlakatlar tomonidan turli shakllardagi hamkorlikdagi tadbirkorlik bilan shugʻullanishlari uchun ruxsat etilgan qismi. Mazkur zonalarda maxsus imtiyozli shart-sharoitlar, jumladan, imtiyozli soliqlar, bojxona toʻlovlari, ijara, viza olish, valuta ayirboshlash, mehnatga yollashning qulay tartiblari belgilangan boʻladi.

Navoiy erkin industrial-iqtisodiy zonasi (2009-yilda) qurilish boshlangan – jahon standartlariga javob beradigan va jahon bozorlarida talab qilinadigan mahsulot ishlab chiqarishni ta'minlaydigan, zamonaviy yuqori texnologiyaga asoslangan ishlab chiqarishni tashkil etish uchun xorijiy investitsiyalarni, birinchi galda toʻgʻridan-toʻgʻri investitsiyalarni jalb etish boʻyicha qulay shart-sharoitlar yaratish, shuningdek Navoiy

viloyatining sanoat salohiyatini, ishlab chiqarish, transport-tranzit va ijtimoiy infratuzilmasini rivojlantirish maqsadida Oʻzbekiston Respublikasi Prezidentining 2008-yil 3-dekabrdagi «Navoiy viloyatida erkin industrial-iqtisodiy zona tashkil etish toʻgʻrisida»gi qarori asosida tashkil etilgan. Navoiy erkin industrial-iqtisodiy zona hududida xoʻjalik yurituvchi subyektlar faoliyatining asosiy yoʻnalishi — zamonaviy xorijiy yuqori unumli asbob-uskunalar va texnika, texnologik tarmoqlar va modullar, innovatsiya texnologiyalarini joriy etish hisobiga yuqori texnologiyali, jahon bozorlarida raqobatbardosh mahsulotlarni keng koʻlamda ishlab chiqarishdan iborat.

Intermodal markaz – yuk tashishlar boʻyicha xalqaro kommunikatsiya va logistika markazi. Oʻtgan-yil mobaynida «Korean Eyr» kompaniyasidan milliy aviakompaniyamiz ijaraga olgan zamonaviy transport samolyotlari bilan ushbu aeroportdan xalqaro yoʻnalishlar boʻyicha 330 dan ortiq reys amalga oshirildi va qariyb 8,5 ming tonna yuk tashildi. Bu Navoiy shahri aeroportini global logistika tarmogʻiga integratsiyalash imkonini berdi.

Angren shahrida mamlakatimiz hududlari va Fargʻona vodiysi viloyatlari oʻrtasida yil davomida kafolatli transport aloqasini ta'minlaydigan Xalqaro logistika markazi qurilishi yakunlandi va foydalanishga topshirildi.

Logistika — inson-mashina tizimida moddiy, mehnat, energiya va axborot resurslari oqimlari harakati jarayonlarini rejalashtirish, boshqarish va nazorat qilish tizimi.

Transport logistikasi – muayyan moddiy buyumlar, yuklar va boshqalarni bir joydan boshqa bir joyga optimal yoʻnalish boʻyicha yetkazib berish, tashishni tashkil etish tizimi.

XXI asrda kommunikatsiya tizimining ahamiyati, uning iqtisodiyotni rivojlantirish hamda aholi farovonligini oshirishdagi oʻrni barchamizga ma'lum. Zero, jahonda globallashuv jarayonlarining kuchayishi, xalqaro maydonda tovar va xizmatlar ayirboshlash, turli jabhalardagi hamkorlikning tobora kengayib borishi bugungi kunda yuqori texnologik telekommunikatsiya tarmogʻini rivojlantirishni muhim strategik vazifaga aylantirdi.

Prezident Islom Karimov «Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi» nomli 2010-yil 12-noyabrda Oʻzbekiston Respublikasi Oliy Majlisining qoʻshma majlisidagi ma'ruzasida: «Barchamizga ayonki, mamlakatimiz mustaqil taraqqiyotining dastlabki bosqichida, ya'ni 1991-

yildan 2000-yilgacha boʻlgan davrda ulkan oʻzgarishlarni amalga oshirishda asosiy e'tiborimiz markazlashtirilgan ma'muriy-buyruqbozlik tizimiga barham berish va bozor iqtisodiyotining asoslarini, avvalambor, qonunchilik bazasini shakllantirish uchun sharoit yaratishga» qaratilgani haqida gapirib, «shu borada qabul qilingan oʻta muhim qonun va normativ hujjatlar qatorida «Chet el investitsiyalari toʻgʻrisida», «Chet ellik investorlar huquqlarining kafolatlari va ularni himoya qilish choralari toʻgʻrisida»gi qonunlarni qayd etish mumkin»ligini ta'kidladi.

Shuningdek, davlatimiz rahbari Islom Karimov «Oʻzbekistonda amalga oshirilayotgan bozor islohotlarining sur'ati va mantiqiy talablaridan kelib chiqqan holda, erkin bozor iqtisodiyoti munosabatlarini yanada rivojlantirishga xizmat qiladigan bir qator qonunlar qabul qilishni hayotning oʻzi taqozo etayotganligi»ni uqtirib, «Investitsiya va pay fondlari toʻgʻrisida», «Innovatsiyalar va iqtisodiyotni modernizatsiya qilish toʻgʻrisida»gi va boshqa yangi qonunlar qabul qilish zarurligini ta'kidladi.

4. Makroiqtisodiy beqarorlik va iqtisodiyotning siklligi. Iqtisodiy inqirozlar


Har qanday mamlakat, shu jumladan industrial rivojlangan mamlakatlar ham iqtisodiy oʻsishga hamda toʻliq bandlilik va narxlarning barqaror darajasiga erishishga harakat qiladi, ammo uzoq muddatli iqtisodiy oʻsish bir tekis va uzluksiz bormaydi, u iqtisodiy beqarorlik davrlari bilan uzilib turadi. Iqtisodiy oʻsish ketidan doimo tanazzul kelib turadi. Vaqti-vaqti bilan obyektiv qonunlarning oʻzgartirib boʻlmaydigan ta'siri ostida takror ishlab chiqarish harakatida uzilishlar paydo boʻladi va bu uzilish iqtisodiyot nomutanosibliklari keskin holatda namoyon boʻlishidir.

Iqtisodiy sikl deganda, odatda ishlab chiqarishning bir iqtisodiy holatidan yoki bir inqirozdan ikkinchisi boshlangunga qadar takrorlanib turadigan toʻlqinsimon harakati tushuniladi. Sikl inqiroz, turgʻunlik, jonlanish, yuksalish fazalarini oʻz ichiga oladi. Ana shu fazalarning har biri rivojlanishi jarayonida navbatdagi fazaga oʻtish uchun sharoit yuzaga keladi.

Inqirozli jarayonlar ishlab chiqarishning pasayishida namoyon boʻladi va siklning qayd etuvchi ifodasidir. U bir siklni nihoyasiga yetkazib, yana muqarrar ravishda inqiroz bilan tugaydi, yangisining boshlanishiga asos soladi, inqiroz vaziyatida asosiy kapitalning ortiqcha jamgʻarilishi uning hamma funksional shakllarida namoyon boʻladi. Inqirozdan keyin turgʻunlik keladiki, uning davomida iqtisodiy faollik jonlanishi uchun sharoitlar vujudga kelishi nihoyasiga yetadi.

Jonlanish fazasining boshlanishi ozmi-koʻpmi darajada barqaror ishlab chiqarishning kengayishiga oʻtishni bildiradi. Ish bilan ta'minlanish darajasining ortishi va foydalarning tez oʻsishi jonlanishning yuksalish bosqichiga oʻsib oʻtishiga koʻmaklashadi. Yangi sikl yuksalishning boshlangʻich nuqtasi hisoblanadi. Yuksalish fazasida ish kuchiga boʻlgan talabning kengayishi, ishsizlikning birmuncha kamayishiga hamda ish haqining oʻsishiga olib keladiki, buning oqibatida iste'mol tovarlariga, toʻlovga qodir talab kengayadi. Pirovard talabning oshishi, oʻz navbatida iste'mol tovarlari ishlab chiqaruvchi tarmoqlarga, bozorni kengaytirishga jadal turtki beradi. Raqobat va foyda ketidan quvish oqibatida nomutanosibliklarning toʻplanib borishidan iborat zanjirli reaksiya tezlashadi. Bu bilan yangi inqiroz muqarrar boʻlib qoladi.

Alohida iqtisodiy sikllar bir-biridan davomiyligi va intensivligi boʻyicha keskin farqlanadi. Shu bilan birga, ularning hammasi bir xil fazalarga ega boʻladi va har xil tadqiqotchilar tomonidan turlicha nomlanadi.



Iqtisodiy sikl chizmasi.

Yuqoridagi chizmada koʻpchilik iqtisodchilar tomonidan tan olingan iqtisodiy sikl koʻrsatilgan. Siklning eng yuqori nuqtasida, iqtisodiyotda toʻliq bandlilik kuzatiladi va ishlab chiqarish toʻliq yoki deyarli toʻliq

quvvat bilan ishlaydi. Siklning bu fazasida narx darajasi oʻsish tamoyiliga ega boʻladi, iqtisodiy faollikning oʻsishi toʻxtaydi.

Tanazzul fazasida ishlab chiqarish va bandlilik qisqaradi, ammo narxlar pasayish tamoyiliga berilmaydi. Tanazzulning quyi nuqtasida ishlab chiqarish va bandlilik oʻzining eng past darajasiga erishishi bilan xarakterlanadi.

Iqtisodiy inqiroz deb, ishlab chiqarish hajmining keskin tushib ketishiga aytiladi. Inqirozning sababi shundan iboratki, jamiyatda ishlab chiqarilgan tovarlar massasi toʻlovga qobil talabga mos kelmay (undan oshib ketadi yoki kam boʻladi) qoladi. Natijada ishlab chiqarishning bir qismi toʻxtab qoladi, tovarlar ishlab chiqarish kamayadi, ishlab chiqarishning oʻsish davri uning tushkunligi bilan almashinadi. Iqtisodiyotning tez oʻsish davrlari koʻpincha inflatsiya, ya'ni narx darajasining koʻtarilishi bilan orqaga ketadi.

Shunday davrlar ham boʻladiki, bunda iqtisodiy oʻsish bandlilik va ishlab chiqarishning past darajasiga oʻrin beradi, ayrim hollarda narx darajasining koʻtarilishi bilan birga ishsizlik ham keskin oʻsadi. Qisqacha aytganda, iqtisodiy oʻsishning uzoq muddatli tamoyillari ham ishsizlik, ham inflatsiya oqibatida uzilib qoladi va murakkablashadi. Inqirozlarning asosiy sababi — takror ishlab chiqarishdagi beqarorlik va nomutanosibliklardir. Bu avvalo ishlab chiqarish va uning natijalarini oʻzlashtirish oʻrtasidagi nomutanosiblik boʻlib, u turli ishlab chiqarish usullari va iqtisodiy tizimning har xil nusxalarida turli shakllarda namoyon boʻladi. Ishlab chiqarish bilan iste'mol, talab va taklif oʻrtasidagi vaqti-vaqti bilan yuzaga kelib turadigan nomutanosibliklar ham iqtisodiy inqirozlarning yuzaga chiqish imkoniyatini saqlaydi.

Kapitalizmgacha boʻlgan davrlarda ishlab chiqarishning keskin qisqarishi, odatda tabiiy ofatlar (qurgʻoqchilik, toshqinlar va h.k.) yoki urushlar va ularning keltiradigan vayrongarchiliklari bilan bogʻliq boʻlgan. Yirik mashinali ishlab chiqarishga oʻtilgandan keyingi davrda vaqti-vaqti bilan iqtisodiyotni larzaga solib turuvchi iqtisodiy inqirozlar ijtimoiy takror ishlab chiqarishga siklik tus beradi.

Koʻpchilik hozirgi zamon iqtisodchilari iqtisodiy sikllarning obyektiv xarakterini tan olib, bu hodisani unga ta'sir koʻrsatuvchi ichki va tashqi omillarni tahlil qilish orqali oʻrganishni tavsiya qiladi. Tashqi omillarga iqtisodiy tizimdan tashqarida yotuvchi va iqtisodiy hodisalarning davriy takrorlanishini keltirib chiqaradigan omillar kiritiladi. Bu tashqi omillar ichidan quyidagilarni ajratib koʻrsatish mumkin:

– urushlar, inqilobiy oʻzgarishlar va boshqa siyosiy larzalar;

- oltin, uran, neft va boshqa qimmatli resurslar yirik konlarining ochilishi:
- ochiq iqtisodiyotning rivojlanishi (globallashuv jarayonlari) va bu
 bilan bogʻliq ravishda aholi migratsiyasi, yer shari aholisi sonining
 oʻzgarib turishi;
- ijtimoiy ishlab chiqarish tarkibini tubdan oʻzgartirishga qodir boʻlgan texnologiya, tadqiqotlar va innovatsiyalardagi qudratli oʻzgarishlar.

Iqtisodiy sikllarni tashqi omillarning mavjudligi bilan tushuntiruvchi nazariyani eksternal nazariya deb atash qabul qilingan. Internal nazariya iqtisodiy sikllarni iqtisodiy tizimning oʻziga xos ichki omillar tugʻdiradi, deb hisoblaydi.

Asosiy kapitalning jismoniy xizmat muddati, koʻpchilik iqtisodchilar tomonidan iqtisodiy siklni tugʻdiruvchi muhim omillardan biri sifatida qaraladi. Agar bir yoki bir necha tarmoqda, mashina-uskunalarga talabning keskin ortishi keltirib chiqaradigan iqtisodiy oʻsish boshlansa, toʻliq tabiiyki, bu hol mashina va uskunalar eskiradigan har 10–15 yildan keyin takrorlanadi.

Boshqa ichki omillardan quyidagilar ajratib koʻrsatiladi:

- shaxsiy iste'molning o'zgarishi (qisqarishi yoki kengayishi);
- investitsiyalar, ya'ni ishlab chiqarishni kengaytirish, uni yangilash va yangi ish joylarini vujudga keltirishga yo'naltiriladigan mablag'lar hajmi;
- ishlab chiqarish, talab va takliflar hajmiga ta'sir koʻrsatishga qaratilgan davlat iqtisodiy siyosatining oʻzgarishi.

Iqtisodiy sikllarning kelib chiqishini faqat eksternal yoki internal nazariya orqali tushuntirish koʻp ham toʻgʻri emas. Iqtisodiy sikl va umuman iqtisodiy tizimdagi miqdoriy va sifat oʻzgarishlar tashqi va ichki omillar oqibatida kelib chiqishi mumkin emas.

4.1. Inqirozga qarshi dastur – iqtisodiy va ijtimoiy xavfsizlik sharti

Prezident Islom Karimov tashabbusi bilan ishlab chiqilgan Inqirozga qarshi choralar dasturi tarixiy ahamiyatga ega hujjatdir, chunki unda milliy iqtisodiyotni jahon moliyaviy-iqtisodiy inqirozining salbiy ta'siridan himoya qilish, mamlakatimizni muayyan davrda ijtimoiy-iqtisodiy rivojlantirishning eng ustuvor yoʻnalishlari belgilab berilgan. Tabiiyki, bu borada Prezidentning bundan bir yil oldin chop etilgan va hozirga kelib dunyodagi oʻnlab tillarga tarjima qilingan «Jahon

moliyaviy-iqtisodiy inqirozi, Oʻzbekiston sharoitida uni bartaraf etishning yoʻllari va choralari» asari muhim dasturilamal boʻlmoqda.

Ma'lumki, hozirgi zamon iqtisodiyoti global xususiyatga ega bo'lib, kichik yoki katta milliy iqtisodiyotlar majmuidan iborat. Ularning hammasi uzilmas rishtalar bilan bir-biriga bog'liq va bir-birini to'ldirib turadi. Hozirgi dunyoda ekstranaliyalar, ya'ni ijobiy yoki salbiy tashqi ta'sirlarga uchramagan iqtisodiyotlar yo'q. O'zbekistonning milliy iqtisodiyoti ham bundan mustasno emas.

Prezident Islom Karimov ta'kidlaganidek, *«tobora chuqurlashib borayotgan jahon moliyaviy inqirozi mamlakatimizga ta'sir ko'rsatmaydi, bizni chetlab o'tadi, degan xulosa chiqarmaslik kerak. Masalani bunday tushunish o'ta soddalik, aytish mumkinki, kechirib bo'lmas xato bo'lur edi»¹. Chunki bugungi kunda O'zbekiston xalqaro hamjamiyat va global moliyaviy-iqtisodiy bozorning ajralmas tarkibiy qismi sifatida rivojlanib borayotgani va bu jarayon tobora kuchayib borishini yaxshi anglab olish darkor.*

Ushbu ta'sir tashqi bozorlarda narxlar tushishi tufayli u yerda tovarlarni sotishdan keladigan eksport daromadining kamayishida koʻrinadi. Bu esa bozor hajmining torayishidan dalolat beradi va bu milliy iqtisodiyotning o'sish sur'atlari, eksportga yo'naltirilgan korxonalarning foydasi va rentabelligi kamayishiga olib keladi. Bunday korxonalar mamlakatimizda koʻp boʻlib, shu bois eksport mamlakatning dollar hisobidagi YAIMning yarimidan koʻprogʻini tashkil qiladi. Inqirozning chuqurlashuvi oqibatida eksport baholarining pasayishi Oʻzbekiston iqtisodiyoti oʻsish sur'atlarining pasayishiga olib kelishi mumkin. Inqirozning bizga salbiy ta'siri boshqa yoʻnalishini xorijiy investitsiya va kreditlarning kamayishi tashkil qilishi mumkin, chunki kapital eksport qiluvchi mamlakatlar iqtisodiyoti oʻzgarishlarga uchrayotgan sharoitda investitsiyalarning aksariyat qismi o'z mamlakatiga yoki iqtisodiyoti rivojlangan mamlakatlarga kiritiladi. Mamlakatimizga tashqi ta'sirlarning kamayishi jamg'armalarda keskinlik keltirib chiqarishi mumkin, chunki iqtisodiyot o'sishining zarur sur'atlarini saqlab turish uchun milliy jamg'armalar ulushini ko'paytirishga to'g'ri keladi, bu esa daromadlar ichida iste'mol ulushining kamayishiga olib kelishi mumkin. Demak, kelib chiqqan inqiroz nafaqat iqtisodiy, balki ijtimoiy talafotlarga ham

¹ Каримов И. А. Жахон молиявий-иктисодий инкирози, Ўзбекистон шароитида уни бартараф этишнинг йўллари ва чоралари. – Т.: «Ўзбекистон», 2009. – Б. 11.

olib kelishi mumkinligi davlatimiz rahbarining «Jahon moliyaviy-iqtisodiy inqirozi, Oʻzbekiston sharoitida uni bartaraf etishning yoʻllari va choralari» asarida e'tirof etiladi. Chunki bu aholi turmush darajasining oʻsishini sekinlashtirishi mumkin. Inqiroz oqibatlarining jiddiyligini inobatga olgan Prezident Islom Karimov: «jahon iqtisodiy inqirozi ishlab chiqarishni muntazam yangilab, modernizatsiya qilib borish zaruratini kun tartibiga yanada oʻtkir qilib qoʻymoqda va buning uchun bor kuch-imkoniyatimiz va resurslarimizni safarbar etishni talab qilmoqda»¹, – deb uqtirgan.

Inqirozga qarshi dasturda inqiroz oqibatida yuzaga kelgan ichki va tashqi iqtisodiy vaziyat yillar davomida xalqaro hamda milliy iqtisod va moliya, boshqaruvning turli bosqichlarida hayotiy tajribaga ega boʻlgan davlat rahbari nigohida baholangan, inqirozning iqtisodiyotimizga salbiy ta'sirini bartaraf etish yuzasidan ilmiy asoslangan va tarixiy tajribada sinovdan o'tgan amaliy takliflar berilganligini qayd etish lozim. Dastur mamlakatning ancha oshgan iqtisodiy salohiyatiga va soʻnggi yillarda iqtisodiyotda amalga oshirilgan jiddiy tarkibiy oʻzgarishlarga asoslanadi. Ta'kidlash lozimki, mazkur dastur barcha mamlakatlar YAIMning moliyaviy-iqtisodiy inqiroz davrida uzluksiz pasayib borayotganiga asoslangan. Biroq, 2009-yilda ekspertlarning bildirgan fikrlari ba'zi mamlakatlar, ayniqsa, Xitoy va Hindiston taraqqiyoti salbiy zonada bo'lmaydi, ushbu mamlakatlar YAIM o'sishining 7 foizdan 5 foizgacha bo'ladi. Ayni vaqtda Yevropa Ittifoqi va AQSh YAIMning ko'rsatkichlari YAIMning 2,5 foizdan 3 foizgacha pasayishi haqidagi taxminlar asosli boʻlib chiqdi. Mamlakatimiz misolida ta'kidlash lozimki, Oʻzbekiston iqtisodiyoti soʻnggi yillarda tez rivojlanayotgan iqtisodiyotlarga xos sur'atlarda o'sayotganligi e'tirof etilmoqda. Mamlakatimizda amalga oshirilayotgan investitsiya siyosati Oʻzbekiston iqtisodiyotiga yuqori darajadagi investitsion faollikka olib keldi.

Investitsiya jarayoniga milliy iqtisodiyotga xorijiy va avvalo bevosita investitsiyalarning oʻsishi xosligini quyida keltirilgan raqamlarda koʻrish mumkin. Investitsiya dasturi va texnik jihatdan modernizatsiya qilish boʻyicha tarmoq dasturlari doirasida 2009-yili 690 ta investitsiya loyihasi amalga oshirildi. Ularning 303 tasi muvaffaqiyatli yakunlandi. Bu ayni chogʻda jiddiy faoliyat hisoblanadi.

¹ *Каримов И. А.* Жаҳон молиявий-иқтисодий инқирози, Ўзбекистон шароитида уни бартараф этишнинг йўллари ва чоралари. – Т.: «Ўзбекистон», 2009. – Б. 36.

Istiqbolda, ya'ni 2010-yilda Investitsiya dasturiga muvofiq, kapital qo'yilmalar o'tgan yilga nisbatan 22,1 foizga ortib, yalpi ichki mahsulotning 30 foizini tashkil qiladi. Bunda birgina ishlab chiqarish sohasiga mo'ljallangan loyihalarni amalga oshirish uchun barcha kapital mablag'larning 75 foizdan ziyodi yo'naltiriladi. 2009-yilda mamlakatimizda muhim strategik loyihalarni amalga oshirish uchun 3 mlrd. AQSh dollaridan ziyod yoki o'tgan yilga nisbatan 30 foiz ko'p xorijiy investitsiya jalb qilinadi. Bu esa mamlakatda xorijiy investitsiyalarni jalb qilishning ishonchli mexanizmi yaratilganidan dalolat beradi hamda mamlakatda milliy iqtisodiyot o'sishining omili bo'lgan jamg'arishning barqaror yuksak normasini saqlab turishga imkon beradi. Janubiy Koreya Respublikasi Prezidenti Li Myon Bak va Qozog'iston Respublikasi Prezidenti Nursulton Nazarboyev ham jahon moliyaviy-iqtisodiy inqirozi davom etayotgan bir paytda O'zbekistonda loyihalarni amalga oshirish muvaffaqiyatli kechayotganligini e'tirof etganlar.

Iqtisodiyot muvaffaqiyatlari koʻp jihatdan iqtisodiyotning agrar xom ashyo yoʻnalishiga chek qoʻyish va iqtisodiyotda tayyor mahsulot ishlab chiqarish ulushini oshirishga imkon bergan tarkibiy oʻzgarishlar bilan bogʻliq. Bu esa xom ashyoni chuqur qayta ishlash, import oʻrnini bosuvchi va eksportga yoʻnaltirilgan mahsulot ishlab chiqarishga asoslangandir. Bugungi Oʻzbekiston iqtisodiyotiga industrial tarmoqlar va xizmat koʻrsatish sohalari roli va ahamiyatining ortib borishi xosdir. Iqtisodiyotdagi tub islohotlar jahon inqirozining Oʻzbekistonga salbiy ta'sirini bartaraf etishning asosidir. Shnudan kelib chiqib, Prezident Islom Karimov mamlakatimiz inqirozga qarshi turish uchun yetarli moddiy, insoniy va moliyaviy resurslarga ega ekanligini qayd etib, ulardan oqilona foydalanishga undaydi.

Oʻzbekistonda hozirgi vaqtda nafaqat inqirozning salbiy ta'sirini yumshatish ustida, shu bilan birga, inqiroz tugagandan keyin Oʻzbekiston iqtisodiyotining yanada kuchli, barqaror va mutanosib rivojlangan holda maydonga chiqishi, jahon bozorida oʻzimizning mustahkam oʻrnimizni egallash, xalqimizning hayot darajasi va farovonligini oshirish boʻyicha jiddiy ish olib borilmoqda.

2009-yilning boshida «2009–2014-yillarda ishlab chiqarishni modernizatsiya qilish, texnik va texnologik qayta jihozlash boʻyicha muhim loyihalarni amalga oshirishga doir chora-tadbirlar dasturi» qabul qilindi. Bu dasturga binoan umumiy qiymati 41,4 milliard dollarga teng boʻlgan 400 dan ziyod investitsiya loyihasini amalga oshirish koʻzda tutilganining oʻzi bizning rejalarimiz naqadar ulkan va jiddiy ekanining

dalilidir. Shuningdek, Oʻzbekistonning 2009–2012-yillarga moʻljallangan qarshi dasturi inqiroz uzoq davom etishi iqtisodiyotimizga ta'siri bir necha yilga cho'zilishi mumkinligidan kelib chiqadi. Asosiysi, ushbu dastur inqiroz doirasidan chiqib, inqirozdan keyingi rivojlanishni ham qamrab oladi. Uning oʻziga xos jihati shundaki, dastur iqtisodiyotni davlat tomonidan faol inqirozga qarshi tartibga solishga asoslanadi va inqirozga qarshilik koʻrsatishning vazifalarni amalga oshirishni nazarda tutadiki, bu, o'z navbatida, mamlakatimiz iqtisodiy, ijtimoiy va moliyaviy xavfsizligini ta'minlaydi. mustaqillikning O'zbekiston dastlabki villaridanog jarayonlardagi tartibsizlikni yoʻq qilish yoki loaqal eng kam darajaga yetkazish uchun boshqariluvchi iqtisodiyotga oʻtish yoʻlini tanladi. Mamlakatdagi bozor islohotlari iqtisodiyotning barqaror o'sishi uchun bozorning o'zini o'zi tartibga solishi yetarli emas va shu bois, davlat tomonidan uni faol tartibga solish zarur, degan qoidadan kelib chiqdi. Shu bois, inqirozga qarshi dasturni amalga oshirishda davlat hal qiluvchi rolni bajaradi. Ayni vaqtda asarda davlat iqtisodiyotga ma'muriy yo'l bilan emas, balki moliyaviy iqtisodiy dastaklar yordamida va oʻzining moliyaviy resurslariga tayanib ta'sir ko'rsatishi kerakligi qayd etilgan. Uning amaliy ijrosi sifatida ustav kapitali 3,2 mlrd. AQSh dollari boʻlgan va kelajakda uning miqdori muntazam o'sib boradigan **O**'zbekiston Respublikasini Tiklash va rivojlantirish fondi tashkil qilinganligi barchaga ma'lum. Ushbu jamg'arma «O'zbekiston Respublikasi Tiklanish va taraqqiyot fondining faoliyatini tashkil qilish chora-tadbirlari to'g'risida»gi Oʻzbekiston Respublikasi Prezidentining 2006-yil 16-maydagi PQ-350-sonli qarori bilan tashkil qilingan. 2009-yil 6-yanvarda esa «Oʻzbekiston Respublikasi Prezidentining 2006-yil 16-maydagi PQ-350sonli qaroriga oʻzgartish va qoʻshimchalar kiritish haqida»gi 1031-sonli Prezident qarorida fondning iqtisodiyotning real sektoridagi korxonalarni modernizatsiyalash, texnik va texnologik jihatdan qayta jihozlash, shuningdek tijorat banklarining investitsion faolligini kengaytirish dasturlarida ishtirokini takomillashtirish chora-tadbirlari nazarda tutildi. Shu bois, ushbu fond iqtisodiyotni faol tartibga solish va inqirozga qarshi dasturni moliyaviy ta'minlash vositasi hisoblanadi.

Inqirozga qarshi dasturda iqtisodiy rivojlanish va ijtimoiy muammolarni hal qilishning ustuvor yoʻnalishlari ajratilgan. Unda *inqiroz* yoʻlidagi toʻsiq boʻlishi kerak boʻlgan iqtisodiyotni modernizatsiyalash va diversifikatsiyalash birinchi oʻringa qoʻyilgan. Modernizatsiya ishlab chiqarishga eng zamonaviy texnologiyalarni joriy etishni anglatadi, bu esa

mehnat unumdorligi va mahsulot sifatini oshirishga imkon beradi. U ichki va tashqi investitsiya resurslarini safarbar etishni talab qiladi hamda ularni va, avvalo, bazaviy eksportga yoʻnaltirilgan tarmoqlarni texnik jihatdan qayta qurollantirishga qaratilgan. U milliy iqtisodiyotning mehnat unumdorligi darajasini ancha oshirishga shart sharoit yaratadi.

Inqirozga qarshi dastur jahon bozorlarida narxlar pasayishi natijasida eksportdan keladigan tushumning kamayishini inobatga oladi. Uning talablarini bajarish uchun eksportni oshirish zarur, bu oʻz navbatida eksportga ishlovchi korxonalarni qoʻllab-quvvatlash va ragʻbatlantirishni talab etadi. Jumladan, ularga aylanma mablagʻlarini toʻldirish uchun imtiyozli kreditlar beriladi. Ular 2010-yilgacha qoʻshimcha qiymat soligʻidan boshqa barcha soliqlardan ozod qilinadilar. Bu xorijiy investitsiya kiritilgan korxonalar hamda tayyor mahsulot ishlab chiqaruvchi eksportga yoʻnaltirilgan korxonalarga taalluqlidir.

Aytish kerakki, dunyoda sodir boʻlgan keyingi voqealar, ya'ni jahon iqtisodiyot maydonida moliyaviy-iqtisodiy inqiroz jarayonlarining avj olayotganligi hech qanday sir boʻlmay qoldi. Ma'lumki, jahon moliyaviy inqirozi dunyodagi manaman degan, iqtisodiy jihatdan eng taraqqiy topgan mamlakatlarni ham qiyin ahvolga solib qoʻymoqda. Nufuzli xalqaro birjalarda qimmatbaho qogʻozlarning narxlari goh tushib, goh koʻtarilib, doimiy beqarorlik koʻzga tashlanmoqda. Dunyo miqyosidagi yetakchi valutalarning kursi ham har kuni oʻzgarib turibdi. Strategik xom ashyolarning narxi pastligicha qolmoqda. Katta-katta korxonalar yopilib, ishsizlar sonining ortishi, ijtimoiy muammolarning keskinlashuvi muttasil davom etmoqda.

Xalqaro miqyosda tan olingan ekspert va tahlilchilar, taniqli davlat va siyosat arboblarining bu inqiroz sabablari haqida bildirgan fikrmulohazalaridan ayon boʻlmoqdaki, bunday global moliyaviy-iqtisodiy inqirozga, ikki muhim hodisa — ma'naviy va moddiy olamning rivojlanish jarayonlarini uygʻunlashtirishga yetarli e'tibor bermasdan, bu jarayonlar bozor mexanizmlari orqali oʻzini oʻzi tartibga soladi, deb ularni oʻz holiga tashlab qoʻyish, ya'ni oqibatini chuqur oʻylamasdan siyosat olib borilgani sabab boʻlgan. Shu ma'noda, Yurtboshimizning «Jahon moliyaviyiqtisodiy inqirozi, Oʻzbekiston sharoitida uni bartaraf etishning yoʻllari va choralari» kitobi dunyo jamoatchiligida, ayniqsa, bu inqirozdan eng koʻp zarar koʻrayotgan dunyodagi yetakchi rivojlangan mamlakatlarda katta qiziqish uygʻotayotgani bejiz emas. Chunki bu kitobda «Islohot — islohot uchun emas, avvalo inson uchun, uning manfaatlari uchun» degan hayotiy mezon asosida xalqning boshqa orzu-intilishlari qatori uning ma'naviy

qadriyatlarini ham barcha oʻzgarishlarning markaziga qoʻyib, *samarali* iqtisodiy siyosat olib borayotgan, zarur boʻlganda, bozor munosabatlarini davlat yoʻli bilan tartibga solib, turli sohalarning oʻzaro mutanosib rivojlanishiga erishayotgan, ulkan tajriba va salohiyatga ega boʻlgan davlat arbobining har tomonlama asoslangan konseptual fikr-mulohazalari oʻrin olgan.

2009-yil kuni 22-may Toshkentda Respublikasi Prezidenti Islom Karimovning «Jahon moliyaviy-iqtisodiy ingirozi, O'zbekiston sharoitida uni bartaraf etishning yo'llari va boʻlib xalqaro choralari» kitobi bo'vicha o'tgan ilmiy-amaliy konferensiya islohotlarning oʻzbek modelini oʻrganish, mustahkam va barqaror rivojlanadigan milliy iqtisodiyotni shakllantirish tajribasiga bagʻishlandi. Anjumanda dunyoning 60 mamlakati va 30 xalqaro tashkilot hamda moliya institutlari, shu jumladan, Xalqaro valuta jamgʻarmasi, Jahon banki, Osiyo taraqqiyot banki, Islom taraqqiyot banki, Birlashgan Millatlar Tashkiloti va uning tarkibiga kiruvchi tashkilotlardan 350 nafardan ziyod davlat va jamoat arboblari, biznesmenlar, olimlar va ekspertlar ishtirok etdi. Ushbu xalqaro anjumanning Toshkentda oʻtkazilishi Oʻzbekistonda olib borilayotgan chuqur va keng koʻlamli islohotlarning nufuzli ekspertlar tomonidan yuksak e'tirofidir.

Darhaqiqat, Prezidentimiz Islom Karimov «Jahon moliyaviyiqtisodiy inqirozi, Oʻzbekiston sharoitida uni bartaraf etishning yoʻllari va choralari» Xalqaro ilmiy-amaliy konferensiyasi ishtirokchilariga yoʻllagan tabrigida *Oʻzbekistonning iqtisodiy rivojlanish tajribasi va hozirgi jahon moliyaviy-iqtisodiy inqirozi sharoitida barqarorlikka erishayotgani haqida muhim ahamiyatga ega boʻlgan quyidagi xulosa va qoidalarni alohida ta'kidlagan edi:*¹

birinchidan, bozor (talab va taklif) hamma narsani hal qiladi, degan tamoyildan kelib chiqqan holda, bozor munosabatlariga sajda qilaverish mumkin emas. Hayot tajribasi shuni necha bor koʻrsatdiki, iqtisodiy va moliyaviy munosabatlarni boshqarish, murakkab vaziyatlardan chiqib ketish uchun ustuvorliklar tanlashda davlatning rolidan foydalanish (bozor, kuchlilar yengadi, degan Darvin tamoyiliga amal qilishini e'tiborga olgan holda), aholining koʻpchilik qismi manfaatlarini ifodalovchi davlatning rolini, kuchli ijtimoiy siyosat yuritish va uzoq istiqbolga moʻljallangan milliy strategiyaning oʻrnini hech kim va hech narsa bosa olmaydi;

 $^{^{1}}$ Халқ сўзи. -2009. -22 май.

ikkinchidan, bugungi kunda soʻnggi 15–20 yil davomida muayyan holatlar sababli uglevodorod xom ashyosi va umuman, mineral xom ashyosi narxlarining keskin oʻsib ketishiga qaram boʻlgan mamlakatlar, ayniqsa, mushkul ahvolga tushib qoldi, boshqacha aytganda, ular oʻzlari bilmagan holda jahon biznesining chayqovchilik bilan shugʻullanuvchi ayrim doiralari tomonidan sun'iy ravishda shishirilgan «narx pufaklari»ga haddan ziyod bogʻliq boʻlib qoldi.

Jahon moliyaviy-iqtisodiy inqirozi oqibatida koʻplab qiyinchiliklarni boshidan kechirayotgan mamlakatlar bugun shuni tan olmoqdaki, ushbu jarayonda iqtisodiyotni modernizatsiya va diversifikatsiya qilish, ishlab chiqarishni muntazam yangilash va innovatsion texnologiyalarni joriy etish rivojlanishning asosiy ustuvor yoʻnalishi boʻlgan va bu tamoyilga amal qilayotgan davlatlar yuksak muvaffaqiyatlarga erishadi. Ana shu omilning ahamiyatini teran anglash va ushbu muhim ustuvorlikni amalga oshirish borasida doimiy, tizimli va puxta oʻylangan ish yuritish — bu har qanday sharoitda, eng murakkab holatlarda ham muvaffaqiyatga erishishning kaliti boʻlib qolaveradi;

uchinchidan, bizningcha, yigirma yetakchi davlat ishtirokida Londonda boʻlib oʻtgan uchrashuvning eng muhim yutuqlaridan biri shundaki, muzokaralar jarayonida oddiy bir haqiqat bilan ifodalanishi mumkin boʻlgan oqilona yondashuv ustuvorlik qildi. Ya'ni, avval jahon moliyaviy-iqtisodiy inqirozi tufayli vujudga kelgan yongʻinni oʻchirish kerak, shundan soʻnggina oʻz umrini yashab boʻlgan Bretton-Vud tizimi va uning institutlaridan yangi moliya-bank tizimiga, uni boshqarish tamoyillariga oʻtish modelini shakllantirish, yangi moliyaviy mexanizmlarni qabul qilish kerak.

Darhaqiqat, e'tirof etish lozimki, Oʻzbekistonda inqirozning dastlabki belgi-alomatlari paydo boʻla boshlashi bilan sergak boʻlib, iqtisodiyotimizdagi real ahvol va sharoitlarni hisobga olib, bu masala boʻyicha zarur tayyorgarlik koʻrganimiz, oʻz vaqtida ehtiyotkorlik bilan ish tutib, keng koʻlamli dasturlarni qabul qilgani bugungi murakkab sharoitlarda Vatanimizning iqtisodiy negizlarini yanada mustahkamlashga xizmat qildi. Bu borada koʻrilgan va koʻrilayotgan chora-tadbirlarning asosiy yoʻnalishlari va maqsadlari quyidagilar:

- iqtisodiyotimiz real sektorining yukini yengillashtirish;
- soliqlarni kamaytirish va davlat tomonidan yordam berish;
- ishlab chiqarish sohasini ichki bozorning talab va ehtiyojlarini qondirish uchun qaratish;

- iste'mol tovarlarini tayyorlaydigan tarmoqlarga, kichik biznes va tadbirkorlik, fermerlik harakatiga keng yo'l ochish va qo'shimcha imtiyozlar berish;
- qishloq xoʻjaligi sohasini, qishloq taraqqiyotini mamlakatimiz rivojining yetakchi kuchi sifatida davlat siyosatining ustuvor yoʻnalishi darajasiga koʻtarishga alohida ahamiyat berilganligi;
- eksportga yoʻnaltirilgan korxonalarni har tomonlama ragʻbatlantirish, ularning soliq yukini keskin kamaytirish, mahsulotini realizatsiya qilish uchun bozorlarni yanada kengaytirish;
- ijtimoiy infratuzilmani, jumladan, toza ichimlik suvi, tabiiy gaz, elektr energiyasi tarmoqlarini;
- xizmat sohalarini rivojlantirish, qishloq joylarda yangi qurilish va obodonlashtirish ishlarini amalga oshirish va shularning hisobidan biz uchun oʻta dolzarb vazifa boʻlgan yangi ish oʻrinlarini barpo etish masalalari e'tiborimiz markazida boʻlganligi;
- joriy etilayotgan dasturdan eng katta oʻrin olgan asosiy maqsadlarimizdan biri mamlakatimizning moliya-bank, kredit tizimini yanada mustahkamlash, ularning real sektorga ijobiy ta'sirini kengaytirish;
- xorijiy investitsiyalarni, avvalo, toʻgʻridan-toʻgʻri investitsiyalarni yurtimizga olib kelish uchun kerakli sharoit tugʻdirib berish va ragʻbatlantirish masalalaridir.

Bugungi kunga kelib taraqqiyot imkoniyatlarimiz kengayib, ham iqtisodiy, ham ma'naviy yuksalish yuz bermoqda. Yurtboshimiz Islom Karimovning «Yuksak ma'naviyat – yengilmas kuch» kitobida ta'kidlanganidek, «Bizning islohotlar davomida nainki moddiy farovonlikka, ayni paytda ma'naviy yuksalishga ham erishishni oʻzimiz uchun asosiy mezon, deb bilganimiz umumiy taraqqiyotimizda bir tomonga ogʻib ketmaslik, jamiyat hayotida suv bilan havodek zarur boʻlgan muvozanat va barqarorlikni ta'minlashda muhim ahamiyat kasb etmoqda. Chunki bozor iqtisodiyoti hamma narsani joy-joyiga qoʻyadi, degan yengil-yelpi qarashga itoat qilib, faqat moddiy boylik ortidan quvish – xalqimizning azaliy orzu-intilishlariga ham, insoniylik bilan yoʻgʻrilgan milliy qadriyatlarimiz mohiyatiga ham toʻgʻri kelmas edi. Shu bois islohotlarni amalga oshirishda ma'naviyat va iqtisodiyot bir-birini inkor etmaydi, aksincha, bir-birini quvvatlab, oʻzaro ta'sirlanib, rivojlanib boradi, degan qoidani oʻzimiz uchun dasturilamal sifatida belgilab oldik»¹.

 $^{^1}$ *Каримов И. А.* Юксак маънавият – енгилмас куч. – Т.: «Маънавият», 2008.

Haqiqatan ham, iqtisodiy omillarning ma'naviy omillar bilan uyg'un va hamohang ravishda hayotga tatbiq etilgani, ya'ni havoyi gaplarga berilmasdan, vaziyatni har tomonlama chuqur tahlil etib, ertangi kunni o'ylab, fikr-mulohaza yuritib, eng maqbul taraqqiyot yo'li tanlab olingani va og'ir-vazminlik bilan siyosat olib borilgani yakka-yu yagona to'g'ri yo'l bo'lgani hozirgi murakkab davrda amalda tasdiqlanmoqda. Iqtisodiyotni isloh etish va modernizatsiya qilish borasida qabul qilinayotgan har bir qaror zamirida iqtisodiy mezonlar bilan birga, kelgusida bu o'zgarishlar xalqimizga nima beradi, degan ma'naviy mezonlar ham e'tiborga olinmoqda.

Murakkab sharoitlarga qaramasdan, Oʻzbekistonda ijtimoiy xavfsizlik tadbirlariga katta e'tibor qaratilmoqda. Gʻarb mamlakatlarida inqirozli davrlarda inson taqdiri bilan bogʻliq ijtimoiy tadbirlar uchun xarajatlarni kamaytirayotgan bir paytda bundan farqli ravishda Oʻzbekistonda ijtimoiy sohalarga alohida e'tibor berilmoqda. 2013-yilda yalpi ichki mahsulotning 60 foizi ijtimoiy tadbirlarga ajratilishi rejalashtirilgan.

Bugun jahonda, yaqin va uzoq atrofimizda boʻlayotgan keskinlashuv holatlari, umuman, butun dunyoda saqlanayotgan xavf-xatar va qaramaqarshiliklar, shular qatorida avvalo xalqaro maydonda davom etayotgan moliyaviy inqirozning oʻzi bizni yanada sezgir, hushyor va ogoh boʻlishga va oʻz vaqtida tegishli xulosalarni chiqarishga da'vat etadi, Vatan taraqqiyoti va xalq farovonligi yoʻlida samarali mehnat qilishga undaydi.

Tayanch tushunchalar:

Makroiqtisodiyot, milliy iqtisodiyot, yalpi ichki mahsulot (YAIM), yalpi milliy mahsulot (YAMM), inqiroz, retsessiya, yuksalish, iqtisodiyotning siklli oʻsishi, sikl, makroiqtisodiy muvozanat, iqtisodiy barqarorlik.

Savol va topshiriqlar:

- 1. Makroiqtisodiyotni ta'riflang.
- 2. Iqtisodiyotning sektorlarini sanang.
- 3. Makroiqtisodiy koʻrsatkichlarning vazifasi qanday?
- 4. Makroiqtisodiy koʻrsatkichlar tizimi nima?
- 5. Makroiqtisodiy aylanma nima?
- 6. Iqtisodiyotning real sektorini ta'riflang.
- 7. Iqtisodiyotning pul sektorini ta'riflang.

- 8. Yalpi ichki mahsulot (YAIM) nima?
- 9. Yalpi ichki mahsulotning mamlakat iqtisodiy salohiyatidagi ahamiyati qay darajada?
 - 10. Iqtisodiy oʻsish va uning omillarini sanab koʻrsating va baholang.
 - 11. Barqarorlik siyosatini ta'riflang.
- 12. Makroiqtisodiy muvozanatning buzilishi qanday ijtimoiy-iqtisodiy oqibatlarga olib keladi?
- 13. Iqtisodiyotning muhim tarmoqlarini modernizasiya qilishda investitsiyalarning roli qanday?
- 14. Investitsiyalarning ishlab chiqarishni texnik va texnologik qayta jihozlash, transport kommunikasiyalarini yanada rivojlantirish bilan bogʻliqligini tushuntiring.
- 15. 2009-yilda mamlakatimizda ijtimoiy infratuzilma ob'ektlarining barpo etilishi borasidagi ishlarni tushuntirib bering.

Mavzuni chuqur o'rganish instrumentariysi

Ijtimoiy takror ishlab chiqarish milliy miqyosda ishlab chiqarishni uzluksiz qayta boshlash faoliyati boʻlib, u ijtimoiy ehtiyojlarning holati va dinamikasi bilan bogʻliq.

Oddiy takror ishlab chiqarish — yaratuvchi kapital hajmi har yili oʻzgarmas boʻlib qolgan sharoitdagi takror ishlab chiqarish, bu yerda faqat jamlanish «nol»ga teng boʻlganda ishlab chiqarish omillari amortizatsiya qilinadi.

Toraytirilgan takror ishlab chiqarish – yaratuvchi kapital hajmi yil sayin kamayib boradigan sharoitdagi takror ishlab chiqarish; aholi ilgari jamlangan boylikni «yeb bitira» boshlaydi.

Ijtimoiy ishlab chiqarish — jamiyatning ijtimoiy mahsulot ishlab chiqarish maqsadida yaratuvchi milliy kapitaldan foydalanish borasidagi faoliyati.

Ijtimoiy takror ishlab chiqarishning uzviy tuzilishi — milliy xoʻjalikning transformatsion va transaksion sektorlarini birlashtiruvchi tuzilma.

Aralash takror ishlab chiqarish – ishlab chiqarish omillarining miqdor jihatdan oʻsishi va ayni vaqtda ularning ilmiy-texnikaviy va malaka darajasi oʻsib borishi asosidagi takror ishlab chiqarish.

Yalpi ijtimoiy mahsulot (YAIM) — jamiyatning oraliq va oxirgi mahsuloti summasi yoki xalq xoʻjaligida amal qiluvchi barcha korxonalar mahsulotlarining majmui.

Ijtimoiy takror ishlab chiqarishning ijtimoiy tuzilishi — muayyan jamiyatdagi sinflar va ijtimoiy guruhlar mulkining mavjud takror ishlab chiqariladigan tizimi bilan bogʻliq tuzilishi.

Ijtimoiy takror ishlab chiqarishning genetik tuzilishi – ishlab chiqarish, taqsimlash, ayirboshlash va iste'molning «fazalar» boʻyicha birligidan iborat tuzilma.

Ekstensiv takror ishlab chiqarish – yaratuvchi kapital va, binobarin, ijtimoiy ishlab chiqarishning oʻzgarmas ilmiy-texnikaviy va kasbiy-malakaviy asosda koʻpayib borishi.

Intensiv takror ishlab chiqarish — ijtimoiy ishlab chiqarish va iste'molning faqat texnika va texnologiyani sifat jihatdan yangilash, xodimlar va menejerlarning ta'lim-malaka darajasini oshirish va ayni vaqtda foydalaniladigan yaratuvchi kapitalning jismoniy hajmini qisqartirish evaziga oʻsishi.

Ijtimoiy takror ishlab chiqarishning funksional tuzilishi – moddiy va nomoddiy ishlab chiqarishning birligi va oʻzaro aloqadorligini aks ettiruvchi tuzilma.

Intellektual elita – asosiy belgisini asosan intellektual mahsulotlar yaratish negizida amalga oshiradigan individual kengaytirilgan takror ishlab chiqarishni tashkil qiladigan ijtimoiy sinf.

Takror ishlab chiqarish proporsiyalar – ijtimoiy takror ishlab chiqarishning ayrim qismlari, unsurlari va kichik tizimlarining muayyan nisbati.

Mavzu yuzasidan asosiy xulosalar:

Makroiqtisodiyot milliy iqtisodiyotning amal qilish qonuniyatlarini oʻrganuvchi fandir.

Makroiqtisodiyot eng avvalo milliy ishlab chiqarish koʻlami, bozor tizimi dinamikasi va muvozanati, ishsizlik va inflatsiyaga doir masalalarni oʻrganadi.

Milliy iqtisodiyot muayyan mamlakat ichida yuz beradigan iqtisodiy faoliyat boʻlib, bunda firmalar, xonadonlar va davlat ishtirok etadi. Hozir dunyoda 210 dan ziyod milliy iqtisod mavjud.

Milliy iqtisodiyot mamlakat mustaqilligining tayanchi hisoblanadi. Chunki u mustaqillikni moddiy jihatdan ta'minlaydi. Milliy iqtisodiyot muayyan mamlakatda yaratilgan tovar va xizmatlar, toʻplangan moddiy va nomoddiy boylik shu mamlakatga qarashli boʻlishini, ya'ni milliy mulkchilik mavjudligini bildiradi.

Makroiqtisodiy koʻrsatkichlar milliy iqtisodiyotning holatini, faoliyat yuritish va natijalarini ifodalaydi.

Milliy iqtisodiyot muayyan mamlakat chegarasida yuz beradigan faoliyat boʻlib, tabiatan makroiqtisoddir. Makroiqtisodiy aylanma jarayonida real va pul sektorlari yuzaga keladi, bunda resurslar, tayyor mahsulot va xizmatlar pulga ayirboshlanadi. Makroiqtisodiy faoliyat natijasida yalpi ichki mahsulot (YAIM) yaratiladi.

Yalpi ichki mahsulot (YAIM) ijtimoiy takror ishlab chiqarishning ijtimoiy-iqtisodiy natijasi boʻlib, uning qiymati yil davomida mamlakat fuqarolari va fuqaroligi boʻlmagan shaxslar yaratgan mahsulot va xizmatlarning bozor narxidir.

YAIM real va nominal mahsulotdan iborat. Iqtisodiy oʻsish real mahsulotning koʻpayishini bildiradi.

Bozor iqtisodiyotining rivojlanishi uchun makroiqtisodiy muvozanatlar ta'minlanishi shart, bular jumlasiga yalpi talab va yalpi taklif, daromadlar va xizmatlar, iste'mol va jamgʻarish, nihoyat tovar-pul muvozanatlari kiradi.

YAMM (YAIM) hajmini aniqlashda unumsiz bitimlar hisobga olinmaydi. Unumsiz bitimlar davlat budjetidan beriladigan transfert toʻlovlari (nafaqa, stipendiya), dotatsiyalar, subsidiyalar hamda pul va unga tenglashtirilgan moliyaviy aktivlarning harakatidir.

13-MAVZU. TOVAR-PUL MUNOSABATLARI VA NARX SIYOSATI

1. Pul va uning vazifalari

Pul – bozor tizimining universal va eng likvidli iqtisodiy vositasi sifatida iqtisodiy oʻlchov, muomala va jamgʻarish funksiyalarini bajaradi. Milliy pul yagona toʻlov vositasi hisoblanadi, uning qadri, ya'ni xarid qurbi mavjud. Pul birligining xarid qurbini kerakli tovarlarni koʻpaytirish yoʻli bilan ta'minlanadi.

Milliy pul muayyan mamlakatga tegishli boʻlib, shu yerda muomalada boʻladi, uni himoyalovchi belgilari bor, bir pul boshqasidan koʻrinishi bilan farqlanadi, oʻziga xos kupura, tanga va chaqa pullardan iborat boʻladi, pul birligining xarid qobiliyati bir xil boʻladi. Milliy pul naqd va naqd boʻlmagan pul shakliga ega, bu faol va sust pullardan iborat, uning ma'lum massasi (miqdori) muomalada yuradi.

Iqtisodiyotning pul bilan ta'minlanishini uning monetizatsiya darajasini bildiradi. Bu darajaning qandayligini pul muomalasi qonuni belgilab beradiki, unga binoan muayyan vaqtda muomalada bo'ladigan pul miqdori jami sotiladigan tovarlar narxining summasi va pul aylanmasining (harakatining) tezligiga bog'liq bo'ladi. Qancha pul zarurligi, bu pulga talab bo'lib, buni oldi-sotdi ko'lami, olibsotarlik ishlari miqyosi, har ehtimolga qarshi pulga ega bo'lish ishtiyoqi va pulning naqadar tez qo'ldan-qo'lga o'tib aylanib turishini yuzaga keltiradi. Pulga

talabni hamma subyektlar bildirsa-da, biroq ularning taklifi davlat nomidan ishlovchi Markaziy bank qoʻlida boʻladi.

Pul muomalasi – bu tovarlar aylanishiga hamda notovar tusidagi toʻlovlar va hisoblarga xizmat qiluvchi naqd pullar va unga tenglashtirilgan aktivlarning harakatidir. Naqd pul muomalasiga bank biletlari va metall tangalar (pul belgilari) xizmat qiladi. Naqd pulsiz hisoblar cheklar, kredit kartochkalari, veksellar, akkreditivlar, toʻlov talabnomalari kabilar yordamida amalga oshiriladi. Ularning hammasi pul agregati, deb yuritiladi. Muomalada mavjud boʻlgan pul massasi ularni qoʻshish yoʻli bilan aniqlanadi.

Pul muomalasi oʻziga xos qonunlarga asoslangan holda amalga oshiriladi. Uning qonunlaridan eng muhimi muomala uchun zarur boʻlgan pul miqdorini aniqlash va shunga muvofiq muomalaga pul chiqarishdir.

Muomalani ta'minlash uchun zarur bo'lgan pul miqdori quyidagilarga bog'liq:

I. Muayyan davrda, aytaylik, bir yil davomida sotilishi lozim boʻlgan tovarlar summasiga. Tovarlar qancha koʻp boʻlsa va narxi baland boʻlsa, ularni sotish va sotib olish uchun shuncha koʻp pul birligi talab qilinadi.

II. Pul birligining aylanish tezligiga.

Pul bir xil boʻlmagan tezlik bilan aylanadi. Bu koʻp omillarga, jumladan ular xizmat qilayotgan tovarlar turiga bogʻliq.

III. Muomala uchun zarur boʻlgan pul miqdori puldan toʻlov vositasi sifatida foydalanishga ham bogʻliq. Koʻpincha tovarlar qarzga sotiladi va ularning haqi kelishuvga muvofiq keyingi davrlarda toʻlanadi. Demak, zarur pul miqdori shunga muvofiq miqdorda kamayadi. Ikkinchi tomondan, bu davrda ilgari kreditga sotilgan tovarlar haqini toʻlash vaqti boshlanadi. Bu pulga ehtiyojni koʻpaytiradi.

Muomalada boʻlgan pul birligi miqdorining tovarlar narxi summasidan oshib ketishi va buning natijasida tovarlar bilan ta'minlanmagan pulning paydo boʻlishi pulning qadrsizlanishi, ya'ni inflatsiyani bildiradi.

Milliy iqtisodiyotda davlatning, tijorat banklari va boshqa moliyaviy muassasalarning majburiyatlari pul sifatida foydalanadi.

Pul operatsiyalarining asosiy koʻpchilik qismi naqd pulsiz, cheklar, plastik kartochkalar va unga tenglashtirilgan moliyaviy aktivlar yordamida amalga oshiriladi. Shu sababli muomalada boʻlgan pul miqdorini hisoblash uchun M1...Mn pul agregatlari yoki tarkibiy qismi tushunchasidan foydalaniladi. Bizning respublikamizda umumiy pul miqdori quyidagi (tarkib)lar asosida hisoblanadi:

Mo – naqd pullar;

M1 = Mo + tegishli hisob varaqalaridagi pul qoldiqlari, mahalliy budjetlar mablagʻlari, budjet, jamoa va boshqa tashkilot mablagʻlari;

M2 = M1 + xalq (jamgʻarma) banklaridagi muddat omonatlar;

M3 = M2 + chiqarilayotgan sertifikatlar + aniq maqsadli zayom obligatsiyalari + davlat zayom obligatsiyalari + xazina majburiyatlari.

Barcha pul agregatlari yigʻindisi yalpi pul massasi yoki yalpi pul taklifini tashkil qiladi. Pulning tarkibiy qismlarida naqd pullar — metall va qogʻoz pullardan iborat boʻladi. Naqd pullar bozor iqtisodiyotida rivojlanayotgan mamlakatlarda umumiy pul massasining 5–7 foizni, bozor iqtisodiyotiga oʻtayotgan Mustaqil Hamdoʻstlik Davlatlarida 30–35 foizni tashkil qiladi.

Pulga talab – bu bitimlar uchun (Pt) va aktivlar tomonidan pulga talab (Pa) ni oʻz ichiga oladi.

Aholi oʻzlarining hisoblariga navbatdagi pul oqimi kelib tushguncha, kundalik ehtiyojlari uchun qoʻllarida yetarli pulga ega boʻlishi zarur. Korxonalarga ish haqi toʻlash, material, yoqilgʻi sotib olish va shu kabilar uchun pul kerak boʻladi. Shu barcha maqsadlar uchun zarur boʻlgan pul bitim uchun pulga talab deyiladi. Bitim uchun zarur boʻlgan pul miqdori nominal yalpi milliy mahsulot (YAMM) hajmi bilan aniqlanadi, ya'ni u nominal YAMMga mutanosib ravishda oʻzgaradi. Aholi va korxonalarga ikki holda bitim uchun koʻproq pul talab qilinadi: narxlar oʻsganda va ishlab chiqarish hajmi koʻpayganda.

Kishilar oʻzlarining moliyaviy aktivlarini har xil shakllarda, masalan, korporatsiya aksiyalari, xususiy yoki davlat obligatsiyalari shaklida ushlab turishi mumkin. Demak, aktivlar tomonidan pulga talab ham mavjud boʻladi. Aktivlar tomonidan pulga talab foiz stavkasiga teskari mutanosiblikda oʻzgaradi. Foiz stavkasi past boʻlsa, kishilar koʻproq miqdordagi naqd pulga egalik qilishni afzal koʻradi. Aksincha, foiz yuqori boʻlganda, pulni ushlab turish foydasiz va aktivlar shaklidagi pul miqdori koʻpayadi. Shunday qilib, pulga boʻlgan umumiy talab, aktivlar tomonidan pulga boʻlgan talab va bitim uchun pulga boʻlgan talabning miqdori bilan aniqlanadi.

Pul quyidagi vazifalarni bajaradi:

- 1) qiymat oʻlchovi. Bunda pul umumiy ekvivalent boʻlgan tovar boʻlib, oʻzida mehnatni mujassamlashtiradi va shu sabab tovar qiymatini oʻlchay oladi;
- 2) muomala *vositasi*. Bunda pul oldi-sotdida ishlatiladi. Pul yorda-mida tovarni xarid etish, pulga tovar ayirboshlash yuz beradi;

3) jamgʻarma vositasi – bu pulning jamlangan boylik shakliga kirib, oʻz egasi uchun kerak boʻlganda xarid etish vositasi boʻlib xizmat qila olishidir.

Hozirgi kunda elektron pullar oʻtkazmalari keng rivojlanmoqda. Sanoqli soniyalarda joʻnatmalar dunyoning koʻrsatilgan manzillariga yetkazilmoqda. Bu aholi uchun qulayliklar tugʻdiradi.

Pul islohoti oʻtkazish yoʻllari:

deflyatsiya – muomaladagi pul miqdorini ortiqcha pul belgilarini iste'moldan chiqarish yoʻli orqali kamaytirish;

denominatsiya – pul belgilari qiymatining oʻzgarishi va ma'lum nisbatda yangi yirik pul birligiga almashtirilishi;

nullifikatsiya – eski pul belgilarini muomaladan olish va ozroq miqdorda yangilarini chiqarish;

revalvatsiya – milliy pul birligi qiymatining rasmiy tartibda chet el valutasi yoki qimmatbaho metallga nisbatan koʻtarilishi;

devalvatsiya — mamlakat savdo va toʻlov balansining keskin yomonlashuvi, valuta rezervining holdan toyishi, xalqaro valuta bozorlarida milliy valuta kursining pasayishi bilan bogʻliq holda pul birligi qiymatining rasmiy tartibda chet el valutasi yoki qimmatbaho metallga nisbatan pasaytirilishi.

Pul bozorida makroiqtisodiy muvozanatni saqlashda Markaziy bank muhim oʻrin tutadi. Shu bois oʻquvchilarga bu borada toʻlaqonli axborotga ega boʻlishlari uchun 1995-yil 21-dekabrdagi «Oʻzbekiston Respublikasining Markaziy banki toʻgʻrisida»gi qonunidan iqtiboslar keltirishni lozim topdik.

33-modda. Markaziy bankning pul belgilarini chiqarishdagi vakolatlari.

Markaziy bank Oʻzbekiston Respublikasi hududida qonuniy toʻlov vositasi sifatida banknotlar va tangalar koʻrinishidagi pul belgilarini muomalaga chiqarishda mutlaq huquqqa ega. Ularni qalbakilashtirish va noqonuniy tarzda tayyorlash qonun hujjatlariga muvofiq javobgarlikka sabab boʻladi.

Muomalada boʻlgan banknotlar va tangalar Markaziy bankning qat'iy majburiyatlari hisoblanadi va uning jamiki aktivlari bilan ta'minlanadi. Markaziy bank yoʻq qilib yuborilgan, yoʻqotilgan, qalbaki, yasama va qonuniy kuchini yoʻqotgan banknotlar va tangalarning oʻrnini qoplamaydi.

Markaziy bank banknotlar va tangalarning namunalarini, shuningdek ularning dizaynini Oliy Majlis Senatining Kengashi bilan kelishgan holda tasdiqlaydi. Banknot va tangalarning dizayni Markaziy bankning mulki hisoblanadi. Markaziy bank yangi namunalardagi banknot va tangalar muomalaga chiqarilishi toʻgʻrisidagi axborotni, shuningdek ularning tavsifini ommaviy axborot vositalarida e'lon qiladi. Markaziy bank va u vakolat bergan banklar talabga koʻra bir nominal qiymatdagi banknot va tangalarni boshqasiga hech qanday toʻlovsiz yoki vositachilik haqisiz ayirboshlab beradi.

34-modda. Pul belgilarini tayyorlash va saqlash.

Markaziy bank banknotlar bosilishi va tangalar zarb qilinishi, muomalaga chiqarilmagan pul belgilari saqlanishini, shuningdek bosma qoliplar va boʻyoqlar saqlanishi hamda yoʻq qilinishini ta'minlaydi, naqd pullarni saqlash, tashish va inkasso qilish, shuningdek ularni yoʻq qilib yuborish qoidalarini belgilaydi.

35-modda. Muomaladagi pul belgilaridan foydalanishga qoʻyiladigan talablar.

Markaziy bank muomalaga chiqargan banknot va tangalar Oʻzbe-kiston Respublikasining butun hududida toʻlovlarning barcha turlarida yozilgan qiymati boʻyicha qabul qilinishi, shuningdek hisobvaraqqa, omonatga oʻtkazish va joʻnatma sifatida oʻtkazish uchun qabul qilinishi majburiydir.

36-modda. Toʻlovlarni amalga oshirish.

Toʻlovlar Oʻzbekiston Respublikasi hududida naqd pul bilan yoki naqd pulsiz hisob-kitoblar koʻrinishida amalga oshiriladi. Naqd pulsiz hisob-kitoblar Oʻzbekiston Respublikasi hududida banklar orqali amalga oshiriladi. Markaziy bank naqd pulsiz hisob-kitoblar shakllari va qoidalarini belgilaydi.

Markaziy bank yuridik shaxslarning kassa operatsiyalarini amalga oshirish tartibini belgilaydi.

38-modda. Naqd pul mablagʻlarini muomalaga chiqarish.

Naqd pul mablagʻlarini muomalaga chiqarish va qaytarib olishni faqat Markaziy bank amalga oshiradi.

39-modda. Pul belgilarini muomaladan qaytarib olish.

Markaziy bank Oʻzbekiston Respublikasi hududida har qanday banknot va tangalarni muomaladan qaytarib olishga haqli. Bunga Markaziy bankning ayirboshlash tartibi va muddati koʻrsatilgan normativ hujjat asos boʻlib xizmat qilishi kerak, ayirboshlash muddati bir yildan kam boʻlishi mumkin emas. Markaziy bank ayirboshlash uchun belgilagan muddat tugaganida ayirboshlanishi kerak boʻlgan banknot va tangalar qonuniy toʻlov vositasi sifatidagi oʻz kuchini yoʻqotadi.

Oʻzbekiston Respublikasida 1994-yilning 1-iyunidan boshlab respublika milliy valutasi «soʻm» muomalaga kiritildi. Oʻzbekiston Respublikasi Markaziy banki muomalaga 1, 3, 5, 10, 25, 50, 100 soʻngra 200, 500 va 1000 soʻmlik kupuralar hamda 1, 3, 5, 10, 20 va 50 «tiyin»lar va 5, 10, 25, 50, 100 soʻmlik tangalar chiqardi. Oʻzbekiston Respublikasining barcha hududlarida hisob-kitoblar, toʻlovlar, respublika rezidentlari va norezidentlari, yuridik va xususiy shaxslar oʻrtasidagi muomalalar, albatta, milliy valuta — «soʻm"da amalga oshirilishi qat'iy belgilab qoʻyilgan.

Iqtisodiyotda pulning likvidligi muhim oʻrin tutadi. Pulning likvidligi uning muomala sifatida hamma narsaga tez va hech bir toʻsiqsiz ayirboshlanishidir. Puldan boshqa likvidli aktivlar ham bor, lekin ular likvidlik jihatdan pulga tenglasha olmaydi. Sababi pul hech bir xarajatsiz xohlagan paytda xohlagan narsaga ayirboshlanishi mumkin. Bino, javohir yoki transport vositasi boshqa narsaga ayirboshlanishi uchun u sotilishi kerak, bu koʻp vaqt va xarajatni talab qiladi.

Milliy pul – bu muayyan mamlakatda muomalada yuruvchi va tanho toʻlov vositasi deb qabul qilingan puldir.

Hozirgi iqtisodiyotda tovar shaklidagi pul qoʻllanilmaydi deyish mumkin. Ularning oʻrniga qogʻoz va elektron pullar qoʻllaniladi. Qogʻoz pullar dekretlangan. Yuqoridagi 39-moddaga muvofiq, davlat tomonidan pul deb e'lon qilingan maxsus belgilari bor qogʻozlardir. Qogʻoz pullar kupura shaklida hamda tangalar sifatida chiqarilishini yuqoridagi ma'lumotlardan bilib oldik. Milliy pul yagona toʻlov vositasi hisoblanadi. U 12 ta himoya belgilariga ega. Himoya belgilari uni qalbakilashtirishning oldini oladi. Pullar muomala qilish jihatidan naqd va naqd boʻlmagan pullarga ajraladi.

Naqd pullar – bu aholi qoʻlida aniq moddiy shakldagi qogʻoz va tanga pullar boʻlib, ular qoʻldan qoʻlga oʻtib yuradi. Bu eng koʻp tarqalgan toʻlov vositasidir.

Naqd boʻlmagan pullar bu bankdagi ayrim fuqarolar (jismoniy shaxslar), firmalar yoki davlat tashkilotlari (yuridik shaxslar) nomiga yozilgan puldir. Naqd boʻlmagan pul bankda turgani uchun u egasiga foiz keltirgan holda oʻsib boradi. Naqd boʻlmagan pullar bankning joriy va muhlatli depozitlarida turadi, u ham toʻlovlarda qoʻllaniladi. Pullar bankda saqlanganda xavfsiz boʻladi. Bugun dunyo mamlakatlarida plastik kartochkalardan ham keng foydalanilmoqda. Biroq ularning oʻzini pul deb boʻlmaydi. Ular pul borligini tasdiqlovchi vositadir. Pul aktiv va passiv pulga boʻlinadi. Aktiv pul amalda harakatda boʻladi, ya'ni iqtisodiyotdagi

oldi-berdi munosabatlarida toʻlov vositasi sifatida harakat qiladi. Passiv pul bu iqtisodiy aylanmada ishtirok etmay turgan puldir. U jamgʻarma, pul rezervlari va kassa qoldiqlaridan iborat boʻladi. Milliy pullardan tashqari jahon pullari ham boʻladi. Bu xalqaro miqyosda, ya'ni mamlakatlararo iqtisodiy aloqalarga xizmat qiluvchi puldir. Ilgarilari jahon puli vazifasini oltin quyilmalari, ya'ni yombilari tashkil etgan. Hozir maxsus chiqarilgan jahon puli yoʻq. Bu pul vazifasini qadri barqaror, ya'ni qattiq valutalar tashkil etadi (AQSh dollari, Angliya funt sterlingi, Yaponiya iyenasi, Yevropa Ittifoqining yevrosi, qisman Xitoy yuani). Pul muomalasi deganda, bu pulning qoʻldan qoʻlga oʻtib, doimo harakatda boʻlishidir. Pul banklardan chiqib firmalar, davlat idoralari va nodavlat tashkilotlari kassasiga kelib tushadi. Iqtisodiyotda pul yetarli boʻlib, uning yetishmay qolishi yoki ortiqcha boʻlib ketishi kabi hollar yuz bermasligi kerak.

Iqtisodiyotning pul bilan naqadar ta'minlanishi uning monetizatsiyalanish darajasi deb yuritiladi. Pul muomalasini boshqarib turuvchi iqtisodiy qonun borki, bu bozor iqtisodiyotining muhim qonunlaridan biridir. Bu qonun muomalada qancha pul zarur bo'lishini belgilab beradi. (Qarang: yuqorida keltirilgan 33–40-moddalar).

2. Inflatsiya, uning mohiyati va turlari

Inflatsiya makroiqtisodiy beqarorlikning koʻrinishlaridan бири hisoblanadi. «Inflatsiya» tushunchasi birinchi marta gʻarbiy Amerikada, (1861–1865-yillardagi fuqarolar urushi davrida) qoʻllanila boshlagan va qogʻoz pul muomalasining koʻpayib ketishi jarayonini bildirgan. Iqtisodiy adabiyotlarda «inflatsiya» tushunchasi XX asrda, birinchi jahon urushidan keyin keng tarqaldi.

Inflatsiya – bu qogʻoz pul birligining qadrsizlanishi va shunga mos ravishda tovar narxlarining oʻsishidir. Inflatsiya bozor xoʻjaligining har xil sohalarida takror ishlab chiqarish nomutanosibliklari tugʻdiradigan murakkab ijtimoiy-iqtisodiy hodisadir.

Qogʻoz pul tovarlarga, oltinga va oʻz qadrini, barqarorligini saqlab qolgan chet el valutalariga nisbatan qadrsizlanadi.

Inflatsiya narx indeksi yordamida bazis davrga nisbatan aniqlanadi. Kelib chiqish sabablari va oʻsish sur'atlariga qarab, inflyasiyaning bir qancha turlari mavjud.

1) talab inflatsiyasi. Narx darajasining an'anaviy o'zgarishi jami talab ortiqchaligi bilan tushuntiriladi. Iqtisodiyotning ishlab chiqarish

sohasi mahsulotning real hajmini koʻpaytirib ortiqcha talabni qondira olmaydi. Chunki barcha mavjud resurslar toʻliq foydalanilgan boʻladi. Shu sababli bu ortiqcha talab narxning oshishiga olib keladi va talab inflatsiyasini keltirib chiqaradi;

2) taklif inflatsiyasi. Inflatsiya ishlab chiqarish xarajatlari va bozordagi taklifning oʻzgarishi natijasida ham kelib chiqishi mumkin. Ishlab chiqarish xarajatlarining oʻsishi natijasida kelib chiqadigan inflatsiya mahsulot birligiga qilinadigan xarajatlarning koʻpayishi hisobiga narxlarning oshishini bildiradi.

Mahsulot birligiga ishlab chiqarish xarajatlarining ortishi iqtisodiyotda foydani va mahsulot hajmini qisqartiradi. Natijada tovarlar taklifi ham qisqaradi. Bu oʻz navbatida narx darajasini oshiradi. Ishlab chiqarish xarajatlari nominal ish haqi, xom ashyo va energiya sarflari narxlarining oʻsishi hisobiga ortib boradi. Inflatsiyaning: a) me'yordagi; b) oʻrmalab boruvchi; c) giperinflatsiya kabi turlari ham mavjud. Inflatsiyaning birinchi turida baholar yiliga 10 foizgacha, ikkinchisida 20 dan 200 foizgacha, uchinchisida astronomik miqdorda oʻsishi kuzatiladi.

Bashorat qilish mumkinligiga qarab kutilayotgan va kutilmagan inflatsiya farqlanadi. Kutilayotgan inflatsiya va uning oqibatlarini oldindan bashorat qilish mumkin, kutilmagan inflatsiyani oldindan aytib boʻlmaydi. Birinchi holda inflatsiyaning kutilayotgan salbiy oqibatlariga tayyorlanib, uni sezilarli darajada yumshatish mumkin. Ikkinchi holda narxlarning kutilmagan oʻsishi natijasida mamlakat iqtisodiy ahvolining sezilarli yomonlashuvi roʻy berishi mumkin.

Pul miqdori keragidan ortib ketganda inflatsiya paydo boʻladi. Bu narxlarning muqim oshib borishi natijasida milliy pul birligining qadrsizlanishidir. Inflatsiyaning sabablari qoʻshimcha pul emissiyasi, ishlab chiqarishning qisqarib ketishi, xarajatlarning oshib ketishi, chet el valutasi zaxiralarining qadrsizlanishi kabilardan iboratdir.

Inflatsiya kelib chiqishi sabablariga koʻra:

- ➤ talab va taklif inflatsiyasiga;
- radigan inflatsiyaga; radigan inflatsiyaga;
- ➤ shiddati jihatidan *oʻrmalovchi*, yoʻrgʻalovchi va tez yuguruvchi giperinflatsiyaga ajratiladi.

Inflatsiya darajasini narxlarning zoʻr berib oʻsishi belgilaydi. Inflatsiya me'yorida boʻlganda (yiliga 10–12 foiz) bu iqtisodiyot uchun xavf tugʻdirmaydi, aksincha, pul inyeksiya orqali iqtisodiyotning oʻsishiga koʻmak beradi. Iqtisodiyot ishtirokchilari me'yoridagi

inflatsiyaga moslashadilar. Davlatning moslashuv tadbirlari inflatsiyani hisobga olib foizini oʻzgartirishdan, daromadlar indeksatsiyasini oʻtkazishdan iborat boʻladi. Inflatsiya belgilangan me'yoridan chiqib ketganda, davlat inflatsiyaga qarshi tadbirlarni qoʻllaydi. Chunki inflatsiya firmalar va fuqarolardagi mavjud pul qadrining pasayishidan turli xil yoʻqotishlarga olib keladi. Giperinflatsiya iqtisodiy tanglikni hosil etadi. Oʻrmalovchi inflatsiya sharoitida iqtisodiy faollik yuz beradi.

Davlatning aksilinflatsiya siyosati asosan muomaladagi ortiqcha pulni olishdan, pul emissiyasini toʻxtatishdan iborat boʻladi. Iqtisodiyotda ortiqcha pul hosil bo'lganda, pul massasi qisqartiriladi. Narxlar pul miqdoriga bogʻliq boʻlar ekan, uning qisqarishi talabni kamaytirib, sekinlashtiradi. Davlatning narxlarning o'sishini aksilinflatsiya siyosatining muhim yoʻnalishidan biri bu iqtisodiyotning real sektorini rag'batlantirishdan iborat. Chunki iqtisodiyotning real sektori xilma-xil mahsulot va xizmatlar ishlab chiqarish bo'lganidan u iqtisodiyotning asosiy tayanch nuqtasi hisoblanadi. Real sektorda yaratilgan barcha ne'matlar ayirboshlanadi, taqsimlanadi va iste'mol etiladi. Ko'rinib turibdiki, bunday harakat uzluksiz yuz beradi. Ya'ni takror ishlab chiqarishni yuzaga chiqaradi. Shu bois iqtisodiyotning real sektorini harakatisiz tasavvur etib boʻlmaydi. aylanma iqtisodiyotda doimo pulga qo'shimcha talab paydo bo'ladi. Bunday sharoitda pul zaxiradan chiqib oborotga kiradi va real sektorga xizmat qiladi. Iqtisodiyotda pulga talabning qondirilishi real sektordagi ishlab chiqarishni kengaytiradi va iqtisodiy oʻsishni ta'minlashga xizmat qiladi. Shuning uchun davlat pulning qadrini mustahkamlash chora-tadbirlarini koʻradi.

3. Pulning qadrini mustahkamlashga qaratilgan chora-tadbirlar

Respublikada milliy valutani mustahkamlash ishida soʻmning xarid quvvatini oshirib borish va uning barqarorligini ta'minlash asosiy vazifa hisoblanadi. Bunga bozorni raqobatdosh mahsulotlar bilan toʻldirish va zarur ehtiyojlar hosil qilish orqali erishiladi. Bozorni iste'mol mollari bilan toʻldirishda milliy ishlab chiqarishni imkoni boricha kengaytirib borish hal qiluvchi ahamiyatga ega. Chunki shu orqali iste'mol mollari sotishning umumiy hajmida milliy mahsulotlar hissasi oshirib boriladi. Bu yerda shuni ta'kidlash lozimki, milliy ishlab chiqarishni kengaytirish orqali soʻmning barqarorligini ta'minlash chetdan mahsulot keltirishni

inkor qilmaydi. Aholini sifatli chet el mollari bilan ta'minlash maqsadida import ham rag'batlantirib boriladi.

Soʻmning barqaror amal qilishi, uning har qanday valutaga erkin almashinishi yetarli valuta zaxirasi boʻlishiga bogʻliq. Unga erishishda korxonalar va barcha subyektlarning, jahon bozorida raqobatga bardosh beradigan mahsulot ishlab chiqarishi uchun zarur boʻlgan ragʻbatlantiruvchi omillarni vujudga keltirish alohida ahamiyatga ega. Soʻmning barqarorligini ta'minlashda undan ehtiyotkorona va tejab, tergab foydalanish, ishlab chiqarishga sarflangan mablagʻlarning eng koʻp samara berishiga, olingan kreditlarning oʻz vaqtida qaytarilishiga erishish muhim oʻrin tutadi.

Inflatsiyaga qarshi aniq o'ylangan siyosat o'tkazish milliy valutani mustahkamlashning muhim shartlaridan biridir. Bu siyosat eng avvalo inflatsiya darajasini keskin kamaytirishga qaratilishi lozim. Bunda pulning qadrsizlanish darajasi ustidan qat'iy nazorat o'rnatish hamda unga qarshi samarali tadbirlar qo'llash hal qiluvchi ahamiyatga ega bo'ladi. Shu orqali pulning qadrsizlanishida maqbul sur'atni tanlashga erishiladi. Inflatsiyaga qarshi siyosat negizini pul miqdorining o'sishini tovarlar va xizmatlar miqdorining tegishli darajada o'sishi bilan bog'lab olib borishga qaratilgan tadbirlar tashkil qilish zarur. Chunki xarid qilish uchun mollar yetarli bo'lmagan holda aholi qo'lida pulning ortiqcha ko'payib ketishi inflatsiyaning yanada avi olib ketishiga sabab bo'ladi. Pul miqdori bilan birga narxlarning ham tobora o'sib borishi muqarrar ravishda, uzoq davom etadigan giperinflatsiyani keltirib chiqaradi. Bu, o'z navbatida, milliy ishlab chiqarishning izdan chiqishi, aholi keng tabaqalarining qashshoqlashishi va butun ijtimoiy tizimning barbod bo'lishi xavfini tugʻdiradi.

Tovarlar taqchilligi mavjud boʻlib turgan hozirgi bosqichda giperinflatsiyaning oldini olish uchun aholi iste'mol fondining oʻsishini ishlab chiqariladigan mahsulot, koʻrsatiladigan xizmatning moddiy hajmi koʻpayishiga bevosita bogʻliq qilib qoʻyish zarur boʻladi. Ichki bozorni mollar va xizmatlar bilan toʻldirish, muomalaga oʻrinsiz ortiqcha pul chiqarilishiga yoʻl qoʻymaslik, milliy valuta barqarorligini ta'minlash va xalq turmush darajasini oʻstirishning muhim shartidir. Soʻmning barqarorligini ta'minlashda naqd pul emissiyasining oʻsishiga, aholi qoʻlida pulning harakatsiz turib qolishiga yoʻl qoʻymaslik birinchi darajali ahamiyatga ega. Bunda muomalaga chiqarilgan pul miqdorining oʻz vaqtida qaytarilishiga erishish, mahsulot ishlab chiqarishning oʻsishi ta'minlamagan korxonalarga kreditlar berilishiga yoʻl qoʻymaslik

choralari koʻrilishi kerak. Inflatsiyani pasaytiruvchi qudratli omil milliy valuta almashuv kursining barqarorlashuviga erishishdir. Bu, oʻz navbatida, import narxlarning barqarorlashuviga olib keladiki, natijada ichki bozordagi narxlar oʻzgaradi.

Valuta birjalarida valuta operatsiyalarining barcha turlari uchun talab va taklif natijasida shakllanadigan yagona almashuv kursini belgilash, valuta kursi barqarorligiga erishishning dastlabki shartidir. Milliy valuta kursi barqarorligini ta'minlashning navbatdagi sharti dastlabki bosqichda valutani naqd pulsiz almashtirish hajmini koʻpaytirishga ustunlik berishdir. Istiqbolda esa bu sohadagi siyosat banklararo valuta birjasidagi oborot miqdorini korxona va fuqarolar o'z pulini xohlagan miqdorda xohlagan valutaga erkin almashtirish imkoniyatini beradigan darajaga yetkazishga qaratiladi. Bunga erishishda milliy ishlab chiqarishda eksport kengaytirish birga, bilan Prezident Islom ta'kidlaganidek, «milliy valutamizning joriy operatsiyalar bo'yicha erkin almashuvini, ya'ni konvertatsiyasini ta'minlash uchun barcha zaruriy shart-sharoitlarni yaratish»¹ alohida ahamiyatga ega. Bu sharoit yaratilishi natijasida erkin almashuv amalga oshmoqda. Shunday qilib, yuqorida qarab chiqilgan chora va tadbirlarning muvaffaqiyatli amalga oshirilishi milliy valutamiz almashuv kursining barqarorlashuviga, uning xarid qilish quvvatining oshishiga ijobiy ta'sir koʻrsatdi.

Mamlakatimizda oʻtkazilayotgan nafaqat iqtisodiy, balki ijtimoiy sohalardagi islohotlardan ham asosiy koʻzlangan maqsad barcha oʻzgarishlarning natijasi va belgisi milliy valutamiz — soʻmimizni mustahkamlash, uni bosqichma-bosqich jahonning kuchli valutalari bilan konvertatsiyalashga, ya'ni erkin almashuviga erishishdir. Chinakam talab va taklif asosida vujudga keladigan erkin bozor narxlarining amal qilishi bozor iqtisodiyotining gʻoyat muhim boʻgʻini boʻlib, bu boʻgʻin mahsulot ishlab chiqaruvchilar bilan iste'molchilarning oʻzaro jips ta'sirini ta'minlaydi.

Pulning baquvvatligiga erishishga qaratilgan davlat dasturlari:

- ichki bozorni iste'mol mollari bilan to'ldirish;
- davlat xarajatlarini keskin qisqartirish, qat'iy moliya, bank-kredit siyosatini o'tkazish;
 - eksport imkoniyatlarini keskin kuchaytirish;

 $^{^1}$ *Каримов И. А.* Озод ва обод Ватан, эркин ва фаровон хаёт – пировард максадимиз. – Т.: «Ўзбекистон», 2000. – Б. 18.

• ortiqcha pul emissiyasiga, ya'ni pul bilan ta'minlanmagan ortiqcha pul muomalada bo'lishiga yo'l qo'ymaslik.

Pulning qadrini mustahkamlashni ta'minlashning vositalari:

- mamlakatning oltin zaxirasi bilan;
- mamlakatning butun boyligi bilan;
- tovar massasining hajmi va tarkibi orqali;
- talab va taklif oʻrtasidagi nisbatni tartibga solish orqali;
- narx-navoni tartiblash orqali;
- pul muomalasi qonunidan foydalanish orqali.

Narxning iqtisodiy mazmuni, vazifalari, turlari. Oʻzbekistonda narxlarni erkinlashtirish

Ma'lumki, bozorda tovar va xizmat xarid etilgan chog'da bunga qancha pul to'lash zarurligini narx belgilaydi. Narx deganda tovar qiymatining puldagi ifodasi tushuniladi. Narx bozor iqtisodiyotining muhim dastaklaridan biridir.

Narxning mazmuni toʻgʻrisida turlicha yondashuvlar mavjud. Jumladan, klassik iqtisod namoyandalari A. Smit, D. Rikardo, J.S, Mill narxni bozor qiymatining puldagi ifodasi, deb ta'riflaganlar. Neoklassik yondashuvga muvofiq narxga tovarlar nafliligini baholash vositasi sifatida qaraladi. Hozirgi zamon neoklassik yondashuv namoyandasi A.Marshall narx keyingi naflilik, ishlab chiqarish xarajatlari hamda talab va taklif nisbatining puldagi mujassamlashishi deb baholaydi. Demak, narx bozor aloqalarining asosiy iqtisodiy vositasi boʻlib, tovar va xizmat birligini sotib olish uchun toʻlanadigan pul miqdorini bildiradi.

Narxning mohiyatini uning vazifalarini oʻrganish orqali chuqur tushunish mumkin. Narx quyidagi vazifalarni bajaradi:

- 1. Bozor muvozanatini ta'minlash. Bunda narx bozordagi talab va taklifning hajmi va tarkibiga ta'sir etish orqali ularni muvozanat holatiga keltiradi.
- 2. Hisob-kitob oʻlchov vazifasini bajaradi. Qilingan xarajatlar, koʻrilgan foyda-zarar, bajarilgan ish hajmining hammasi ma'lum narxlar asosida hisob-kitob qilinadi.
- 3. Iqtisodiy regulatorlik vazifasini bajaradi. Narxdagi oʻzgarish bozor holatini bildiradi, bu esa talab va taklif nisbatiga bogʻliq.
- 4. Raqobat vositasi hisoblanadi. Raqobat turlaridan eng muhimi narx vositasida kurash. Firmalar oʻz raqiblarini yengish, ularni bozordan siqib

chiqarish uchun narxni oʻzgartirib turadilar. Narxning raqobat vositasi ekanligi uning gʻoyat muhim iqtisodiy vosita boʻlganidan kelib chiqadi. Firmalar bozorni egallab olish, undan raqiblarni siqib chiqarish uchun narxlarni oʻzgartirish siyosatini qoʻllaydi.

5. Ijtimoiy himoya vazifasini bajaradi. Narx aholining ayrim toifasi yoki xalqni qimmatchilikdan saqlash vazifasini oʻtaydi. Bunda dotatsion (budjet mablagʻlari hisobidan arzonlashtirilgan) narxlar shunday vazifani bajaradi.

Iqtisodiy mazmunga koʻra narxning quyidagi turlari mavjud:

muvozanat narx – bu turli tovarlar oʻrtasidagi iqtisodiy jihatdan asoslangan nisbatlardir;

demping narx – bu bozordan raqiblarni surib chiqarib, oʻz mavqeini mustahkamlash uchun qoʻllaniladigan maxsus narx;

nufuzli narx – bu firma narx qoʻyganda tovar sotilishini qisqartirmagan holda yuqori narx hisobiga kanda qilmay foyda olish;

milliy narx – bu mamlakat doirasidagi ijtimoiy xarajatlarni, milliy bozordagi talab va taklifni, tovar nafligini va naqadar qadrliligini hisobga olgan narx;

dotatsiyalangan narx – bu davlat budjeti hisobidan maxsus arzonlashtirilgan narx;

jahon narxi – bu tovarga ketgan baynalminal sarf-xarajatlarni, tovarning jahon standarti talabiga mos kelishi darajasini, talab va taklifni hisobga olgan narx;

standart narx — bu xaridor imkoniyatini hisobga olib, ma'lum davrgacha oʻzgarmaydigan narx;

kontrakt narx – bu har ikki tomonning roziligi bilan belgilangan va ularning shartnomasida qayd etilgan narx;

oʻzgaruvchan narx — bu xarajatlar va bozordagi talabning oʻzgarishini hisobga oladigan narx;

chakana narx – bu iste'mol tovarlarini bevosita aholiga sotish narxi; *erkin narx* – bu savdolashuv asosida vujudga keladigan narx;

limit narx – bu maksimal chegarasi aniqlanib, undan oshiq darajada belgilanadigan narx;

monopol narx – bu monopol mavqeiga ega boʻlgan tovarlarga belgilanib, ishlab chiqarish bahosidan yuqori yoki past boʻladigan narx;

yashirin narx – bu xufiyona bozorlarda shakllanadigan narx.

Davlatimiz rahbari Islom Karimov: «Chinakam talab va taklif asosida vujudga keladigan erkin bozor narxlarining amal qilishi bozor iqtisodiyotining gʻoyat muhim boʻgʻini boʻlib, bu boʻgʻin mahsulot ishlab

chiqaruvchilar bilan iste'molchilarning oʻzaro jips boʻlishini ta'minlaydi», — deb ta'kidlaganida narxning shakllantirishda unga ta'sir etuvchi obyektiv omillarga e'tibor qaratishni nazarda tutgan.

Narxning shakllanishiga quyidagi omillar ta'sir etadi: qiymat, raqobat, talab, taklif va naflilik. Narxlarning shakllanishida xarajat muhim oʻrin tutadi. U har qanday narxning umumiy asosi hisoblanadi. Chunki xarajatsiz hech qanday tovar yoki xizmatlar yaratib boʻlmaydi. Narxlarning shakllanishida talab va taklifning oʻrni va ta'siri beqiyos. Demak, talab oshsa, narx oshadi, talab qisqarsa, narx tushadi. Aksincha, taklif koʻpaysa, narx tushadi, u qisqarsa, narx oshadi.

Narxga tovarning nafliligi ham ta'sir etadi. Tovar va xizmat qanchalik naflilik darajasida boʻlsa, naf ma'lum vaqtgacha oshish tendensiyasiga ega boʻladi. Naflilik darajasi pasaysa, narx tushadi. Shu bois tovarning nafliligi qancha yuqori boʻlsa, uning narxi ham shuncha baland boʻladi yoki aksincha.

Narxlarning shakllanishida raqobat muhiti muhim rol oʻynaydi. Raqobat narx bilan belgilanganda, u bozorga ta'sir oʻtkazadi. Raqobat kuchli boʻlsa, narx pasayadi. Agar raqobat cheklansa, narx koʻtarilishiga sabab boʻladi. Shuningdek, narxlarning shakllanishida davlatning iqtisodiy siyosati muhim rol oʻynaydi. Davlatning narx siyosati deganda bozor iqtisodiyotiga oʻtish sharoitida narxlarni erkinlashtirish va milliy bozor narxlarini jahon bozori narxlariga yaqinlashtirish chora-tadbirlari tushuniladi.

Narxlarni erkinlashtirishdan maqsad – xomashyo va mahsulot ayrim turlari narxlari oʻrtasidagi nomutanosiblikni kamaytirish, shuningdek narx bilan aholi daromadlari va korxonalar foydasi oʻrtasidagi mutanosiblikka erishishdir. Bundan tashqari narxlarni erkinlashtirish investitsion tovarlar, iste'mol tovarlari va xizmatlar narxlarining oqilona nisbatini ham ta'minlaydi.

Oʻzbekistonda iqtisodiyotni isloh qilishning oʻziga xos tamoyillari, mamlakatdagi iqtisodiy vaziyat va aholining turmush darajasi hisobga olinib, narxlarni bosqichma-bosqich erkinlashtirish yoʻli tanlab olindi.

Ma'lumki, narxlarni birdaniga yoki «esankiratadigan» darajada qoʻyib yuborish jamiyatda ijtimoiy keskinlikni kuchaytirish, amalga oshirilayotgan islohotlarni obroʻsizlantirishga olib keladi. Shu bois ham mamlakatimizda narxlarni davlat tomonidan tartibga solish va nazorat qilishni ma'lum darajada saqlab qolishga ham e'tibor qaratildi.

Birinchi bosqich (1992-yil boshida) – bu davrda ancha keng turdagi investitsion tovarlar, ayrim iste'mol tovarlari va xizmatlarning erkin

narxlari va ta'riflariga oʻtildi. Cheklangan doiradagi xalq iste'mol tovarlari narxlari, ayrim turdagi xizmatlar ta'riflarining yuqori chegarasi belgilab qoʻyildi.

Ikkinchi bosqich (1993-yil)da ulgurji narxlarni davlat tomonidan tartibga solish toʻxtatildi. Davlat tomonidan qat'iy belgilanadigan va tartibga solib turiladigan tovar va xizmatlar soni ancha qisqardi.

Uchinchi bosqich (1994-yil oktabr-noyabr)da xalq iste'moli tovarlari asosiy turlarining narxlari erkin qo'yib yuborildi, transport va kommunal xizmatlari ta'riflari oshirildi.

Muhimi bugungi kunda mamlakatimizda narxlarning ijtimoiy himoya vazifasi muhim ahamiyat kasb etmoqda. Narx orqali raqobatda uning gʻirrom va yovvoyi usullaridan foydalanishga toʻsiqlar qoʻyilmoqda.

Tayanch tushunchalar:

Pul, pul tizimi, naqd va naqd boʻlmagan pul, aktiv va passiv pul, pulning vazifalari, pul massasi, pulning likvidligi, pul muomalasi, pul likvidli, pulning qadri, pul emissiyasi, milliy pul, inflatsiya va deflyatsiya, denominatsiya, nullifikatsiya, revalvatsiya, devalvatsiya.

Narx, narxning vazifalari, narxga ta'sir etuvchi omillar, narx turlari, demping narx, narxning shakllanishi, narx bilan bogʻliq jinoyatlar, milliy narx.

Savol va topshiriqlar:

- 1. Pulning oltin standarti davrida vazifasi qanday boʻlgan?
- 2. Pul nima uchun bozor iqtisodiyotining muhim vazifasi hisoblanadi?
- 3. Pulning qadr-qiymati nimalarga bogʻliqligini tushuntiring.
- 4. Inflatsiya va uning ijtimoiy-iqtisodiy oqibatlarini tushuntirib bering.
- 5. Konvertirlangan valuta nima?
- 6. Davlat inflatsiyaga qarshi qanday chora-tadbirlar amalga oshirayotganini gapirib bering.
- 7. Qalbaki pul, aksiz markasi yoki qimmatli qogʻozlar yasash, ularni oʻtkazish bilan bogʻliq jinoyatlar qanday oqibatlarga olib kelishini izohlang.
 - 8. Valuta ayirboshlash bilan bogʻliq jinoyatlar haqida fikringiz?
 - 9. Narxning obyektiv iqtisodiy asosi nima?
- 10. Nima sababdan davlat raqibini sindirish va bozordan surib chiqarishni koʻzlab, oʻta past narxlarda tovar sotishni man etadi?
 - 11. Bozor bahosi nima?
- 12. Narxning oshishi hayot darajasiga qanday ta'sir oʻtkazishini tushuntiring.

Mavzuni chuqur o'rganish instrumentariysi

Tovar – ayirboshlash uchun moʻljallangan iqtisodiy ne'mat.

Qiymat – tovar ayirboshlash holatida oʻz ifodasini topadigan hamda ayirboshlanadigan ne'matlarning iste'molchilari va ishlab chiqaruvchilari manfaatlarini maqbullashtirish (kelishtirish) natijasi, tovar ayirboshlash faktida ifodalangan iste'mol va ishlab chiqarish qiymati oʻzaro munosabatining natijasi.

Ishlab chiqarish qiymati – tovarning uni yaratuvchi shaxsning muayyan daromadini ta'minlash qobiliyati.

Qiymat qonuni – ayirboshlash faktining ayirboshlanadigan ne'matlarning iste'molchilari va ishlab chiqaruvchilarining iqtisodiy manfaatlari maqbullashuvi («mos kelishi»)ga bogʻliqligini ifodalovchi ichki, takrorlanuvi va barqaror aloqa va munosabatlar.

Iste'mol qiymati – tovarning muayyan hayotiy ehtiyojni qondirish qobiliyati.

Qiymat me'yori – turli tovar ayirboshlash qiymatlarining puldagi o'lchovi yoki «narx» bo'yicha qiyoslanishi.

Pul – almashish uchun moʻljallangan tovar qiymatlarining umumiy ekvivalenti.

Pulning jamlash vositasi – tovar va xizmatlar sotilganidan soʻng jamgʻariladigan va kelajakda xarid qobiliyatini ta'minlaydigan pul.

Pulning muomala vositasi – tovar va xizmatlar sotib olish uchun foydalaniladigan pul; pul oʻzining ushbu funksiyasi bilan iqtisodiy ne'matlarni olish-sotishda vositachi hisoblanadi.

Pulning to'lov vositasi – xaridorga ilgari kelib tushgan tovar va xizmatlar uchun haq to'lashda foydalaniladigan pul.

Inflatsiya salohiyati – iqtisodiyot haddan tashqari davlatlashtirilgan sharoitda hosil boʻladigan inflatsiya imkoniyati.

Inflatsiya jarayoni – inflatsiyaning kelib chiqishi, dinamikasi va yoʻnalishini belgilovchi barcha elementlarining aloqador birligi va oʻzaro ta'siri.

Inflyatsion transfert – iqtisodiy ne'matlarning milliy xoʻjalikning inflatsiya bilan moliyalashtiriladigan tarmoqlari va sektorlari foydasiga qayta taqsimlanish jarayoni.

Inflatsiya (takror ishlab chiqarish bilan bogʻliq yondashuv) — ijtimoiy takror ishlab chiqarish hodisasi; jami talabning oʻsishi tomon boradigan barqaror makroiqtisodiy nomutanosiblik.

Inflatsiya (monetar talqin) – pul bozorining hodisasi; pul massasi muomala kanallari haddan tashqari toʻlib ketishi oqibatida narxlarning umumiy darajasi oʻsishi.

Inflyatsion kutishlar mexanizmi – inflatsiya oʻsishini kutish boʻlib, firmalar va uy xoʻjaliklari inflyatsion transfertning bir qismini oʻzlashtirish maqsadida bajaradigan tegishli «qoplovchi» (kompensatsion) xatti-harakatini belgilab beradi.

Inflatsiya sababi – inflatsiya jarayonining bevosita inflyatsion makroiqtisodiy nomutanosiblikni keltirib chiqaradigan koʻrsatkichlari.

Stagflyatsiya – inflatsiya va ishlab chiqarishning pasayishi birligida namoyon boʻluvchi murakkab ijtimoiy-iqtisodiy hodisa.

Inflatsiya omillari – inflatsiya imkoniyatiga ega boʻlgan va uni mustaqil ravishda emas, balki davlatning tegishli iqtisodiy siyosatni amalga oshirishi natijasida roʻyobga chiqaradigan obyektiv iqtisodiy holat.

Davlatning aksilinflyatsion siyosati – davlatning inflatsiyani nazorat qilishni ta'minlovchi qisqa, uzoq muddatli va strategik choralari tizimini amalga oshirish borasidagi maqsadga qaratilgan faoliyati.

Destagflyatsiya – ishlab chiqarish hajmining oʻsishi va ayni vaqtda ishsizlikning kamayishi hamda narx darajasining pasayishi.

Inflyatsion xavfsizlik strategiyasi – iqtisodiyotning joriy va ehtimol tutilgan xatarli inflatsiya omillaridan doimiy va amaliy himoyalanganlik holatini ta'minlovchi davlat choralari tizimi.

Barter – muayyan tovar yoki xizmatni pulsiz boshqa tovar yoki xizmatga ayirboshlash.

Likvidlik – turli ne'matlardan to'lov vositasi sifatida foydalanilishi yoki amalga oshishi qobiliyati; shuningdek muayyan qiymat (ne'mat, aktiv)ning naqd pulga tezda aylanish qobiliyati.

Narxlar miqyosi — muayyan mamlakatda qabul qilingan pul birligida (masalan, bir soʻmda) mavjud boʻlgan pul materiali (oltin)ning muayyan miqdori.

Ayirboshlash qiymati – iste'mol va ishlab chiqarish qiymatining oʻzaro ta'siri asosida yuzaga keladigan iqtisodiy ne'matlarning muayyan miqdor mutanosibligida bir-biriga aylanish qobiliyati.

Dunyo pullari – xalqaro hisob-kitoblarda foydalaniladigan pullar (oltin, eng rivojlangan mamlakatlarning milliy valutalari).

Narx (ijtimoiy ma'noda) – tovarning pul shaklida ifodalangan qiymati.

Narx (funksional ma'noda) – xaridor sotuvchiga muayyan iqtisodiy ne'mat uchun to'laydigan pul miqdori.

Mavzu yuzasidan asosiy xulosalar:

«Mamlakatimizda oʻtkazilayotgan nafaqat iqtisodiy, balki ijtimoiy sohalardagi islohotlardan ham asosiy koʻzlangan maqsad barcha oʻzgarishlarning natijasi va belgisi milliy valutamiz – soʻmimizni mustahkamlash, uni bosqichma-bosqich jahonning kuchli valutalari bilan konvertatsiyalashga, ya'ni erkin almashuviga erishishdir» (*Islom Karimov*).

«Chinakam talab va taklif asosida vujudga keladigan erkin bozor narxlarining amal qilishi bozor iqtisodiyotining gʻoyat muhim boʻgʻini boʻlib, bu boʻgʻin mahsulot ishlab chiqaruvchilar bilan iste'molchilarning oʻzaro jips ta'sirini ta'minlaydi» (*Islom Karimov*).

Pulning baquvvatligiga erishishga yoʻnaltirilgan davlat dasturlari:

- ichki bozorni iste'mol mollari bilan to'ldirish;
- davlat xarajatlarini keskin qisqartirish, qat'iy moliya, bank-kredit siyosatini o'tkazish;
 - eksport imkoniyatlarini keskin kuchaytirish;
- ortiqcha pul emissiyasiga, ya'ni pul bilan ta'minlanmagan ortiqcha pul muomalada bo'lishiga yo'l qo'ymaslik.

Pul qadrini mustahkamlashni ta'minlashning vositalari:

- mamlakatning oltin zaxirasi bilan;
- mamlakatning butun boyligi bilan;
- tovar massasining hajmi va tarkibi orqali;
- talab va taklif oʻrtasidagi nisbatni tartibga solish orqali;
- narx-navoni tartiblash orqali;
- pul muomalasi qonunidan foydalanish orqali.

Pul islohoti oʻtkazish yoʻllari:

deflyatsiya – muomaladagi pul miqdorini ortiqcha pul belgilarini iste'moldan chiqarish yoʻli orqali kamaytirish;

denominatsiya – pul belgilari qiymatining oʻzgarishi va ma'lum nisbatda yangi yirik pul birligiga almashtirilishi;

nullifikatsiya – eski pul belgilarini muomaladan olish va ozroq miqdorda yangilarini chiqarish;

revalvatsiya – milliy pul birligi qiymatining rasmiy tartibda chet el valutasi yoki qimmatbaho metallga nisbatan koʻtarilishi;

devalvatsiya — mamlakat savdo va toʻlov balansining keskin yomonlashuvi, valuta zaxirasining holdan toyishi, xalqaro valuta bozorlarida milliy valuta kursining pasayishi bilan bogʻliq holda pul birligi qiymatining rasmiy tartibda chet el valutasi yoki qimmatbaho metallga nisbatan pasaytirilishi.

Pul miqdori keragidan ortib ketganda, inflatsiya paydo boʻladi. Bu narxlarning muqim oshib borishi natijasida milliy pul birligining qadrsizlanishidir. Inflatsiyaning sabablari qoʻshimcha pul emissiyasi, ishlab chiqarishning qisqarib ketishi, xarajatlarning oshib ketishi, chet el valutasi zaxiralarining qadrsizlanishi kabilardan iboratdir. Inflatsiya kelib chiqishi sabablariga koʻra: talab va taklif inflatsiyasiga; qanday borishi jihatidan erkin bozor inflatsiyasi va davlat bostirib turadigan inflatsiyaga; shiddati jihatidan oʻrmalovchi, yoʻrgʻalovchi va tez yuguruvchi – giperinflatsiyaga ajratiladi.

Inflatsiya darajasini narxlarning zoʻr berib oʻsishi belgilaydi. Inflatsiya me'yorida boʻlganda (yiliga 10–12 foiz), bu iqtisodiyot uchun xavf tugʻdirmaydi, aksincha pul inyeksiya orqali iqtisodiyotning oʻsishiga koʻmak beradi. Iqtisodiyot ishtirokchilari me'yoridagi inflatsiyaga moslashadilar. Davlatning moslashuv tadbirlari inflatsiyani hisobga olib foizini oʻzgartirishdan, daromadlar indeksatsiyasini oʻtkazishdan iborat boʻladi. Inflatsiya belgilangan me'yoridan chiqib ketganda, davlat inflatsiyaga qarshi tadbirlarni qoʻllaydi.

Aholining ish haqi va daromadlarini izchil va oldindan oshirib borish hamda iste'mol bozorida narxlar indeksining asossiz tarzda o'sishining oldini olishga doir chora-tadbirlar ham respublikamizda izchillik bilan amalga oshirilmoqda. Bu esa yurtimizning farovonligini yuksaltirish, aholining xarid qobiliyatini oshirishda ko'zda tutadigan eng muhim ustuvor maqsadlarimizga to'la mos keladi.

14-MAVZU. MOLIYA-KREDIT MUNOSABATLARI

1. Moliyaning mohiyati va vazifalari

Oʻzbekiston Respublikasi Konstitutsiyasining XXV bobi «Moliya va kredit» deb nomlanib, uning 122-moddasida: «Oʻzbekiston Respublikasi oʻz moliya va pul-kredit tizimiga ega. Oʻzbekistonning Davlat budjeti respublika budjetidan, Qoraqalpogʻiston Respublikasi budjetidan va mahalliy budjetlardan iborat», — deyilgan.

Oʻzbekiston Respublikasida amalga oshirilayotgan iqtisodiy siyosat va bozor munosabatlarini boshqarishning muhim instrumenti moliya boʻlib, u jamiyatda pul mablagʻlari fondlarini shakllantirishni, taqsimlashni va foydalanishni ifodalaydi. Jamiyatning daromadi – bu YAIMning pulda hisoblangan qiymatidir. Demak, moliya – yalpi milliy mahsulotni taqsimlash va qayta taqsimlash, pul mablagʻlari fondlarini yuzaga keltirish va ulardan foydalanishning iqtisodiy instrumentidir. Moliyaning mohiyati uni taqsimlash, ragʻbatlantirish, ijtimoiy, fiskal va nazorat vazifalarini bajarishda namoyon boʻladi. Moliya tizimining bir tomonini moliya tashkilotlarining majmui tashkil qiladi, ularning vazifalari Oʻzbekiston Respublikasining tegishli qonunlarida belgilangan.

Moliyaviy tizim ijtimoiy-iqtisodiy munosabatlar nuqtai nazaridan markazlashgan, markazlashmagan hamda uy xoʻjaligi moliyalaridan tashkil topadi. Markazlashgan moliya davlat budjet tizimini, krediti, ijtimoiy budjetdan tashqari fondlarni, mulkiy va shaxsiy sugʻurta fondlarini oʻz ichiga oladi. Markazlashmagan moliya oʻz tarkibiga mamlakat moliya resurslarining koʻp qismini oʻzida shakllantiruvchi turli mulk shaklidagi korxona va firmalarni, ya'ni alohida xoʻjalik yurituvchi subyektlarning iqtisodiy va ijtimoiy vazifalarini hal etishga moʻljallangan moliya resurslarini oladi.

Uy xoʻjaligi moliyasi barcha oila a'zolari oʻrtasidagi moliyaviy munosabatlarni ifodalovchi shaxsiy moliyaviy resurslardan tashkil topadi. Moliya tizimining barcha elementlari oʻz vazifalari doirasida jamiyatning iqtisodiy oʻsishiga oʻziga xos ta'sir koʻrsatadi. Xususan, markazlashgan moliyaviy mablagʻlar davlatning markazlashgan fondiga va u fondlar tarmoqlar, viloyatlar, aholining alohida tabaqalariga taqsimlanadi.

Markazlashgan moliyaviy mablagʻlar tarkibiga kiruvchi budjetdan tashqari fondlar aniq maqsadga yoʻnaltirilgan boʻladi. Xususan, nafaqa fondi nafaqaxoʻrlarga toʻlashga moʻljallangan. Sugʻurta fondi korxona va aholiga, oilalarga tabiiy ofatlardan yetgan zararning oʻrnini qoplash uchun toʻlanadigan mablagʻlarni tashkil qiladi.

Korxona va firmalarning moliyaviy mablagʻlari yalpi milliy mahsulotni yaratishga qaratilgan ishlab chiqarishni yoʻlga qoʻyishga, xalq xoʻjaligi yoki korxona, firmalar ichida taqsimlashga xizmat qiladi.

Moliyaviy munosabatlar koʻp qirrali boʻlib, iqtisodiy munosabatlarning muhim sohasini tashkil qiladi. Moliya iqtisodiy kategoriya sifatida pul mablagʻlaridan foydalanish va uning harakatini tartibga solish bilan bogʻliq boʻlgan munosabatlar tizimi boʻlib, uning vositasida turli darajada pul fondlari vujudga keltiriladi va ular takror ishlab chiqarish ehtiyojlari va boshqa ijtimoiy ehtiyojlarni qondirish maqsadida taqsimlanadi.

Moliya iqtisodiyot doirasida oʻzaro bogʻliq boʻlgan bir qator vazifalarni bajaradi:

- 1) moliyaning iqtisodiy jarayonlarni, tadbirlarni moliyaviy ta'minlash va unga xizmat koʻrsatish vazifasini bajaradi;
- 2) moliyaning taqsimlovchi vazifasi. Bu moddiy ishlab chiqarish sohalarida yaratilgan yalpi milliy mahsulotni, ayniqsa, uning milliy daromadni tashkil qiluvchi qismini davlat va mulkchilikning turli shakllariga asoslangan korxonalar, iqtisodiyot tarmoqlari, moddiy ishlab chiqarish sohalari, mamlakat hududlari oʻrtasida taqsimlash va qayta taqsimlashda namoyon boʻladi. Bundan milliy daromadning bir qismi korxona va aholi daromadlaridan turli xil soliqlar olish, renta va bojxona toʻlovlari, aksiz yigʻinlari kabilar orqali davlat qoʻlida toʻplanadi. Oʻz qoʻlida toʻplangan milliy daromadning katta qismini davlat moliya

vositasida aholining ijtimoiy madaniy ehtiyojlariga (uy joy qurilishi, tibbiyot xizmati, maorif, nafaqa, stipendiya va h.k.), daromadlar darajasini ushlab turishga, milliy mudofaaga, atrof-muhitni muhofaza qilish va shu kabilarga sarflaydi;

- 3) moliyaning ragʻbatlantiruvchi vazifasi, birinchidan, yaratilgan mahsulot qiymatini taqsimlash jarayonida, ikkinchidan, pul fondlarini tashkil qilish va sarflash mexanizmi vositasida amalga oshiriladi. Ikki holda ham moliya ishlab chiqarish samaradorligiga, uning pirovard natijasiga, mahsulot sifatiga sezilarli ta'sir koʻrsatadi;
- 4) moliyadan ishlab chiqarish, taqsimlash va iste'mol ustidan nazorat qilish vositasi sifatida foydalaniladi. Moliyaviy nazorat korxona (firma)larning moliya intizomiga rioya qilish uchun moddiy javobgar bo'lish tizimi, turli soliqlar undirib olish va mablag' bilan ta'minlash tizimi orqali amalga oshiriladi.

Moliyaviy munosabatlar va ularga xizmat qiluvchi maxsus muassasalar jamiyatning moliya tizimini tashkil qiladi. Moliya tizimi korxonalar (tarmoqlar) va umumdavlat moliyasini oʻz ichiga oladi. Korxona va tarmoqlar moliyasi ulardagi takror ishlab chiqarish jarayonida hamda alohida fondlar yaratish yoʻli bilan xodimlarning ijtimoiy ehtiyojlariga xizmat qiladi.

Umumdavlat moliyasi davlat budjetini, ijtimoiy sugʻurta fondini hamda davlat mol-mulkiy va shaxsiy sugʻurtasi fondini oʻz ichiga oladi. Davlat pul mablagʻlarining asosiy markazlashgan fondi boʻlgan davlat budjeti moliya tizimining asosiy boʻgʻini boʻlib xizmat qiladi. **Davlat budjeti** — **bu davlat xarajatlari va ularni moliyaviy qoplash manbalarining yillik rejasidir.** Davlat daromadlari va xarajatlarining asosiy qismi davlat budjeti orqali oʻtadi. Uning asosiy vazifasi moliyaviy vositalar yordamida iqtisodiyotni samarali rivojlantirish va umumdavlat miqyosidagi ijtimoiy vazifalarni hal qilish uchun sharoit yaratishdir.

Davlat mol-mulkiy va shaxsiy sugʻurtasi umumdavlat moliyasining keyingi boʻgʻini hisoblanib, mulkchilikning barcha shakllaridagi korxonalar va fuqarolarga joriy qilinadi. U majburiy va ixtiyoriy boʻlishi mumkin. Bu maqsadlar uchun fondlar korxona va aholining toʻlovlari hisobiga shakllanadi. Fond mablagʻlari mol-mulkiy sugʻurtasiga va shaxsiy sugʻurtaga pul toʻlashni koʻzda tutadi.

Shaxsiy sugʻurta aholining pul jamgʻarmalarini tashkil qilishning shakllaridan biri boʻlib ham xizmat qiladi.

Jamiyat moliya tizimi ijtimoiy-siyosiy va ma'rifiy ishlar bilan shugʻullanuvchi tashkilot va muassasalarning moliyasini ham oʻz ichiga

oladi. Kasaba uyushmalar, siyosiy partiyalar, yoshlar, xotin-qizlar, faxriylar tashkilotlari, ijodiy uyushmalar, sport jamiyatlari va boshqa ilmiy-ma'rifiy jamiyatlarning ham oʻziga xos moliyasi mavjud boʻladi. Bunday ijtimoiy tashkilotlarning moliyaviy resurslarining manbai, tashkilot a'zolarining kirish puli va badallari, tijorat faoliyatidan kelgan daromad, homiylar ajratgan yoki xayriya qilgan mablagʻlardan iborat boʻladi. Jamiyat moliya tizimida maxsus va xayriya fondlari ham alohida oʻrin tutadi. Bu fondlar turli xoʻjalik subyektlari va aholining pul mablagʻlarini aniq bir maqsad yoʻlida birlashtiradi va ishlatadi.

Mazkur fondlarga respublikamizda amal qilib turgan «Mahalla», «Navroʻz», «Orol», «Ulugʻbek» va «Nuroniy» fondlarini misol qilib koʻrsatish mumkin. Bozor iqtisodiyotiga oʻtib borish bilan jamiyat moliya tizimida turli xil sugʻurta (ijtimoiy sugʻurta, tibbiy sugʻurta) fondlari va budjetdan tashqari moliya fondlari (pensiya fondi, aholini ish bilan ta'minlash fondi, tabiatni muhofaza qilish fondi, tarixiy yodgorliklarni saqlash fondi, tadbirkorlarga koʻmak berish fondi va boshqalar)ning ahamiyati ortib boradi.

1.2. Moliya tizimi

Ma'lumki, jamiyatning moliyasi muayyan tizimni hosil etadi. Bularga moliya obyekti, moliya subyekti, moliya munosabatlari, moliya mexanizmi, moliya siyosati va moliya institutlari kiradi. Quyidagi ularning ta'rifini keltiramiz.

Moliya obyekti – moliya resursi boʻlib, turli pul fondlaridan iborat. Bu fondlarni barcha iqtisodiyot subyektlari oʻz daromadi – tushumi hisobidan shakllantiradi, ular hisobidan xarajatlarini moliyalashtiradi.

Moliya subyekti — moliya munosabatlarining ishtirokchilari boʻlib, firmalar, xonadonlar, davlat va nodavlat idoralaridan iborat. Bular yuridik va jismoniy shaxslar hisoblanadi.

Moliya munosabatlari – iqtisodiyot subyektlarining moliya resurslari xususidagi oʻzaro aloqalari. Bu aloqalar YAIM va milliy boylikni taqsimlab ishlatish jarayonida yuzaga keladi.

Moliya mexanizmi – turli moliya vositalari boʻlib, soliq, subsidiya, subvensiya, transfert, jarima, dotatsiya, sanatsiya, moliyaviy me'yorlar va boshqalardan iborat. Bular iqtisodiy faollikni ragʻbatlantirish yoki iqtisodiy noshudlikni jazolash uchun qoʻllaniladi. Shuningdek, ular vositasida ijtimoiy yordam amalga oshiriladi.

Moliya siyosati – iqtisodiyot subyektining moliyaviy resurslarni topish, ularni taqsimlash va sarflashga oid yoʻl-yoʻriqlari va sa'yharakatlarining majmuidir. Oʻz moliyaviy siyosatini faqat davlat emas, balki firmalar va xonadonlar ham yurgizadi va bunda subyektlar oʻz manfaatlaridan kelib chiqadi.

Moliya institutlari – bular moliya aloqalarini amalga oshiruvchi va moliya infratuzilmasini tashkil etuvchi kompaniyalar, firmalar, banklar hamda davlat idora va tashkilotlaridan iborat.

Moliya tizimining barcha boʻgʻinlari bir-birini taqozo etgan holda amal qiladi. Moliya turli darajada amal qiladi:

- **1. Mikromoliya** bu firmalar va xonadonlar, nodavlat va jamoat tashkilotlaridagi moliya, moliya tizimining boshlangʻich va asosiy boʻgʻini hisoblanadi.
- **2. Makromoliya** bu mamlakat doirasidagi va milliy iqtisodiyotga xizmat qiluvchi moliya boʻlib, davlat moliyasidan iborat.
- **3. Metamoliya** xalqaro doiradagi moliya boʻlib, davlatlararo pul munosabatlarini anglatadi.

1.3. Moliyaning funksiyalari

Iqtisodiyot real va moliya sektoridan iborat. Moliya sektori iqtisodiy taraqqiyotga xizmat qiladi. Shu bois moliyaning zarurligi uning iqtisodiyotda bajariladigan funksiyalarini belgilab beradi. Bularni qisqacha koʻrib chiqamiz:

1) taqsimlash funksiyasi. Bunda moliya vositasida yaratilgan YAIMning va bozorga chiqarilib sotilgan milliy boylikning pul shaklidagi qiymati taqsimlanadi. Buning natijasida turli pul fondlari hosil boʻladi. Demak, jami pul taqsimlanib, oilalar, firmalar va davlatning moliya resurslari hosil boʻladi.

Davlat ixtiyoriga kelgan pul budjet yordamida taqsimlanib, iqtisodiy va ijtimoiy rivojlanishga xizmat qiluvchi fondlarga yuboriladi;

2) ragʻbatlantirish funksiyasi. Moliya mexanizmi vositasida iqtisodiy faollikni qoʻllab-quvvatlash yuz beradi (ragʻbatlantirish mukofotlari, qoʻshimcha ish haqi). Iqtisodiy-ijtimoiy faollikni ragʻbatlantirish maqsadida davlat soliq stavkalarini pasaytiradi, muhtojlarga moliyaviy yordam koʻrsatadi (Masalan, bir yilda 50 mingdan ortiq oilaga sogʻin sigir berilmoqda). Umumiqtisodiy ahamiyatga molik ishlar bajarilganda moliyaviy qiyinchilikka duchor boʻlgan firmalarga davlat subsidiya (moliyaviy yordam qaytarilmaslik sharti bilan) davlat ajratadi. Moliya

vositasida iqtisodiy jazo ham qoʻllaniladi. Oʻz majburiyatini vaqtida bajarmaganligi uchun subyektlar jarima va pensiya (ustama toʻlov) beradilar. Bu ham ragʻbatlantirishga xizmat qiladi;

- 3) ijtimoiy funksiya. Bunda moliya resurslari ijtimoiy ehtiyojlarni qondirishga sarflanadi (ta'lim, sog'liqni saqlash, sport, madaniyat, ijtimoiy ta'minot, ekologik xavfsizlikni ta'minlash ishlari, aholining muhtoj qatlamlariga yordam);
- 4) nazorat funksiyasi. Moliyaviy resurslarni ajratgan subyektlar ularni maqsadli ishlatilishini nazorat ostiga oladilar. Nazorat ishining asosiy vazifasi moliya resursining samarali ishlatilishini ta'minlashi hisoblanadi.

2. Moliyaviy inqiroz, uning kelib chiqish sabablari, oqibatlari va undan chiqish yoʻllari

Moliyaviy inqiroz deganda, banklar likvidligi (toʻlov qobiliyati)ning zaifligi bilan bogʻliq muammolarning keskinlashuvi natijasida yuz bergan inqiroz tushuniladi. U kredit bozorida yuz bergan tanglik va mablagʻ (pul)ning yetishmasligi tufayli kelib chiqadi. 2008-yilda boshlangan jahon moliyaviy-iqtisodiy inqirozi ham aslida shu asosda ildiz otdi.

Moliyaviy resurslarning globallashuvi ijobiy va salbiy oqibatlarga ega. **Ijobiy oqibatlari** — milliy moliyaviy bozorlarda raqobatning kuchayishi, moliyaviy xizmat narxlarining pasayishi, zarur boʻlganida, moliyaviy resurslarning tezda yigʻilishi, ya'ni moliyaviy taqchillikning yoʻqligi. Moliya resurslari globallashuvining **salbiy oqibatlari** quyidagilardan iborat:

- 1) milliy moliyaviy bozorlarning beqarorligi;
- 2) pul kapitalining real kapitaldan, ya'ni ishlab chiqarish vositalari, tovar zaxiralaridan ustunlik qilishi (koʻpligi);
 - 3) iqtisodiyotning moliyaviy holatga bogʻliqligining oʻsishi;
- 4) moliyaviy mablagʻlarning norezidentlar xatti-harakati, shuningdek mintaqaviy moliyaviy bozorlar va xalqaro moliyaviy markazlar konyunkturasiga bogʻliqligi.

Moliyaviy resurslarning globallashuvi shunga olib keladiki, milliy hukumatlarning moliyani tartibga solish maqsadida unga koʻrsatadigan ta'siri susayib boradi. Jahon moliyaviy bozori va koʻproq darajada transmilliy korporatsiyalarning milliy bozorlari, xalqaro institutsional investorlar va xalqaro olib sotarlarga ta'siri kuchayadi.

Rivojlanayotgan davlatlar va oʻtish iqtisodiyotiga ega mamlakatlar moliyalariga xalqaro iqtisodiy tashkilotlar — XVF, Jahon banki katta ta'sir

koʻrsatadi. Jahon Savdo tashkiloti doirasida 1999-yildan boshlab moliyaviy xizmatlar bozorini liberallashtirishga doir koʻp tomonlama bitim amal qilmoqda. Yuzga yaqin mamlakatlar oʻz hududlarida xorijiy kredit, moliya va sugʻurta muassasalarining faoliyatini cheklamaslik majburiyatini oldilar. Qisqa muddatli kapitalning koʻplab chiqib ketishi mamlakatlar oʻrtasida moliyaviy inqirozni yuzaga keltira oladi. Shu sababli dunyo moliyaviy bozori bugunga kelib beqaror bozorga aylandi.

Moliyaviy bozor inqirozi deganda ekspertlar aksiyalarning mintaqaviy indeksi rivojlangan bozorlarda 20 foizdan va rivojlanayotgan bozorlarda 35 foizdan pasayib ketadigan vaziyat tushuniladi. Jahon iqtisodiyotining mintaqaviylashuvi va globallashuvi ayrim mamlakatlarda yuzaga keladigan moliyaviy inqirozlar aksariyat hollarda *mintaqaviy va global inqirozlarga* aylanishiga olib kelmoqda.

Moliyaviy inqirozlarning quyidagi turlari farqlanadi:

- 1) valuta inqirozi (milliy valutalarning devalvatsiyasiga (qadrsizlanishiga olib keladi);
- 2) bank inqirozi (davlatning bank tizimini mustahkamlash uchun mablagʻ ajratishni talab qiladi);
- 3) qarz inqirozi (ichki yoki tashqi qarz muammolarining keskinlashuvi bilan bogʻliq);
- 4) tizimli inqiroz (mamlakatning butun moliyaviy tizimiga daxldordir va yuqorida sanab oʻtilgan inqirozlarning barchasini qamrab oladi, masalan, 1998-yilda Rossiyada boshlangan inqiroz).

Inqirozlarning asosiy sabablari:

- 1) ojiz makroiqtisodiy siyosat;
- 2) rivojlanmagan moliyaviy tizim;
- 3) tashqi omillarning (eksport uchun moʻljallangan asosiy tovarlar narxining tushib ketishi, siyosiy va iqtisodiy munosabatlarning keskinlashuvi va hokazo) noqulay ta'siri;
 - 4) milliy pul birligining asossiz koʻtarilgan almashuv kursi;
 - 5) siyosiy beqarorlik.

XX asrning oxirgi choragida 200 dan ortiq valuta va bank inqirozining 158 tasi valuta inqirozi boʻlgan. Undan 1/3 qismida esa milliy valuta 75 foizga qadrsizlangan. Rivojlanayotgan va postsotsialistik mamlakatlar moliyaviy inqirozlarni yengish jarayonida oʻz yalpi milliy mahsulotining 55 foizgacha yoʻqotganlar, inqirozdan avvalgi iqtisodiy oʻsish sur'atlarini tiklash uchun esa ularga ikki yildan olti yilgacha vaqt talab etildi.

Moliyaviy barqarorlikka tahdidlar quyidagilardan iborat:

- tashqi qarzni toʻla hajmda qoplash (qaytarish) uchun mablagʻning yoʻqligi bilan bogʻliq budjet muammolari;
 - milliy banklarning qarzdorligi;
- ishlab chiqarish vositalari bozorida hisob-kitoblarni forvard shartnomalari boʻyicha amalga oshirish imkonining yoʻqligi;
- xorijiy valutaga talabning jiddiy ortishi, davlat budjeti taqchilligining koʻpayishi;
 - inflatsiya sur'atlarining o'sishi.

Prezident Islom Karimovning «Jahon moliyaviy-iqtisodiy inqirozi, Oʻzbekiston sharoitida uni bartaraf etishning yoʻllari va choralari» asarida jahon moliyaviy-iqtisodiy inqirozining kelib chiqish sabablari, oqibatlari atroflicha tahlil qilingan.

Jahon moliyaviy-iqtisodiy inqirozi Amerika Qoʻshma Shtatlarida ipotekali kreditlash tizimida roʻy bergan tanglik holatidan boshlandi. Soʻngra bu jarayonning miqyosi kengayib, yirik banklar va moliyaviy tuzilmalarning likvidlik, ya'ni toʻlov qobiliyati zaiflashib, moliyaviy inqirozga aylanib ketdi. Dunyoning yetakchi fond bozorlarida eng yirik kompaniyalar indekslari va aksiyalarning bozor qiymati halokatli darajada tushib ketishiga olib keldi. Bularning barchasi, oʻz navbatida, koʻplab mamlakatlarda ishlab chiqarish va iqtisodiy oʻsish sur'atlarining keskin pasayib ketishi bilan bogʻliq ishsizlik va boshqa salbiy oqibatlarni keltirib chiqardi.

Yirik rivojlangan mamlakatlarda jahon moliyaviy-iqtisodiy inqirozi kelib chiqish sabablari quyidagilar:

- uzoq yillardan buyon muttasil davlat budjeti taqchilligi kuzatilgani va ularning salbiy tashqi savdo balansiga ega ekanligi;
- davlat tashqi qarzining miqdori yalpi ichki mahsulotga nisbatan yuqori boʻlayotgani;
- rivojlangan mamlakatlarda qayta moliyalash stavkasining past darajada ushlab turilishi oqibatida jahon kapital bozorida arzon kreditlarning vujudga kelishi;
- ipoteka kreditlari berish talablarining asossiz ravishda boʻshashtirib yuborilganligi;
- moliyaviy institutlarning oʻz mablagʻlari va qarz majburiyatlari oʻrtasidagi nisbatning keskin buzilishi;
- jahon iqtisodiyotida real va moliyaviy sektor oʻrtasidagi nisbatning keskin oʻzgarishi.

O'zbekiston Respublikasi Prezidenti Islom Karimov «Jahon moliyaviy-iqtisodiy inqirozi, Oʻzbekiston sharoitida uni bartaraf etishning yoʻllari va choralari» nomli kitobida dunyoning hozirgi vaqtda bir qator yetakchi tahlil va ekspertlik markazlari global moliyaviy inqiroz holatini va uning yuz berishi mumkin bo'lgan oqibatlariga doir materiallarini o'rganish umumlashtirish natijasida quvidagi va xulosalarga kelayotganligini qayd etdi: «Birinchidan, moliya-bank tizimidagi inqiroz jarayonlari deyarli butun dunyoni qamrab olayotgani, retsessiya va iqtisodiy pasayishning muqarrarligi, investitsiyaviy faollik koʻlamining cheklanishi, talab va xalqaro savdo hajmining kamayishi, shuningdek, jahonning koʻplab mamlakatlariga ta'sir koʻrsatadigan jiddiy ijtimoiy talafotlar sodir bo'lishi mumkinligi o'z tasdig'ini topmoqda».

Darhaqiqat, keyingi yillarda rivojlangan mamlakatlarda surunkali budjet taqchilligi va salbiy tashqi savdo saldosining kuzatilayotganligi jahon moliyaviy inqirozining vujudga kelishining asosiy omillaridan biri hisoblanmoqda. Ayniqsa, jahon iqtisodiyotida kuzatilgan nomutanosiblik holatlari, ya'ni ayrim rivojlangan mamlakatlar tashqi savdo balansida yirik miqdordagi taqchillikning sezilayotganligi asosan rivojlanayotgan mamlakatlar savdo balansining ortishiga olib keldi. Natijada dunyo mamlakatlari valuta zaxiralarining oʻzgarishi, jumladan, Xitoy, Yaponiya, Yaqin Sharq mamlakatlarida valuta zaxiralarining keskin oʻsishi yuz berdi.

Bundan tashqari, rivojlangan mamlakatlar, ayniqsa, AQSh davlat tashqi qarzi miqdori va uning YAIMga nisbatan salmogʻi oʻsganligi inqiroz kuchayishining asosiy omillaridan biri boʻldi.

2008-yilda ba'zi mamlakatlar tashqi qarzining yalpi ichki mahsulotga nisbatan salmogʻi¹

T/r	Mamlakatlar	Foizda
1.	AQSh	90
2.	Rossiya	37
3.	Qozog 'iston	102
4.	Ukraina	64
5.	Qirg'iziston	81
6.	O'zbekiston	13,3

383

¹ Qarang: Халқ сўзи. – 2009. – 15 апр.

Jadvalda koʻrsatilganidek, bu borada Oʻzbekiston Respublikasida teskari tendensiyani kuzatamiz. Ya'ni, amalga oshirilgan oqilona siyosat natijasida tashqi qarzlarning yalpi ichki mahsulotdagi ulushi 2008-yilda 13,3 foizni tashkil etgan boʻlsa 2010-yilda bu koʻrsatkich 10 foizni tashkil etdi.

Prezident Islom Karimov jahon moliyaviy inqirozi holati va uning yuz berishi mumkin boʻlgan oqibatlariga doir fikrlarini davom ettirib: «Ikkinchidan, avj olib borayotgan global moliyaviy inqiroz jahon moliyabank tizimida jiddiy nuqsonlar mavjudligi va ushbu tizimni tubdan isloh qilish zarurligini koʻrsatdi», – deb alohida ta'kidladi.

Xalqaro ekspertlarning e'tirof etishlaricha, AQSh jahon yalpi ichki mahsulotining asosiy iste'molchisi ekanligi jahon moliyaviy inqirozining kelib chiqishiga faol ta'sir koʻrsatgan. Ma'lumotlarga qaraganda, AQShning jahon yalpi ichki mahsulotidagi ulushi 20 foizni tashkil qilsada, uning iste'moldagi hissasi qariyb 40 foizga teng. Qolgan 20 foiz iste'mol tovarlarini AQSh sotib oladimi? Qanday qilib sotib oladi? Qaysi pulga xarid qiladi, degan savollar tugʻiladi.

Albatta, ularni boshqa mamlakatlar hisobidan, tovar bilan ta'minlanmagan qogʻoz pullar (AQSh dollarlari)ni keragidan ortiq bosib chiqarish hisobiga sotib oladi. Shu yoʻl bilan dunyo milliy boyligini taqsimlashda, aytish mumkinki, adolatsizlik yoʻlini tutadi. Hozirgi kunda AQSh dollarlari emissiyasini oʻz mamlakati iqtisodiyoti muomalasida boʻlgan mamlakatlar hukumati emas, balki AQSh hukumati ham nazorat qila olmasligiga olib keldi.

Xoʻsh, unda AQSh dollarlarini ishlab chiqarish va muomalaga kiritish bilan kim shugʻullanadi? Bunday vakolat 20 ta xususiy bankni birlashtirgan, xususiy tashkilot maqomiga ega boʻlgan AQSh Federal zaxira tizimi (Markaziy banki)ga berilgan. Bu xizmatning sobiq raisi Alan Grinspen boshchiligida tizimda olib borilgan noratsional pul-kredit siyosati hamda qayta moliyalashtirish stavkasining surunkali ravishda past darajada ushlab turilishi natijasida banklarning kredit berish koʻlami keskin oʻsdi. Tijorat banklari faoliyatini tartibga solish tizimining nomuvofiqligi tufayli esa banklar tomonidan kreditlash tizimi talablari yengillashtirildi.

Hozirgi jahon moliyaviy inqirozi AQShdagi ipoteka inqirozidagi tanglik holatidan ragʻbat olgan holda, global ishonch va likvidlilik muammosiga aylanib ketdi. Xoʻsh, bu inqiroz zamirida qanday sabab va omillar mujassam? U qanday oqibatlarga olib keladi? Oʻzbekiston iqtisodiyotiga qanday ta'sir qiladi? kabi savollar har bir insonda tugʻilishi tabiiydir.

Jahon moliyaviy inqirozining zamirida fundamental, xususan, makroiqtisodiy, mikroiqtisodiy va institutsional sabablar yotganligini qayd etish lozim. Ekspertlarning ta'kidlashicha, bunda bosh makroiqtisodiy sabab AQSh iqtisodiyotidagi ortiqcha likvidlilik muammosi boʻlib, buni keltirib chiqaruvchi asosiy omillarni quyidagicha tasniflash mumkin¹:

- 1997–1998-yillardagi inqirozdan soʻng rivojlanayotgan davlatlarga nisbatan umumiy ishonchning pasayishi;
- qator mamlakatlar tomonidan valuta zaxiralari va neft jamgʻar-malarining AQSh qimmatli qogʻozlariga investitsiya qilinishi. Jahon iqtisodiyotida sezilarli darajada yuqori disbalans, nomuvofiqlikning mavjudligi, xususan, Xitoy savdo balansida yirik miqdordagi profitsit, ya'ni xarajatlarga nisbatan daromadlarning yuqoriligi AQShda esa, aksincha, katta miqdordagi defitsit saqlanib qolmoqda. Ajablanarlisi, AQSh savdo balansi defitsitining qariyb 90 foizi Xitoy, Yaponiya, Germaniya va Arab davlatlari savdo balansidagi profitsit hisobidan qoplanmoqda. Bundan tashqari, 10 ta Osiyo davlatiga jahon xalqaro valuta zaxiralarining 59 foizi (3,4 trillion AQSh dollari) toʻgʻri kelmoqda. AQSh hukumati qarz majburiyatlarining 44 foiziga chet elliklar egalik qilmoqda;
- AQSh iqtisodiyotidagi siklik pasayishning oldini olish maqsadida Federal zaxira tizimi tomonidan 2001–2003-yillarda amalga oshirilgan past foiz stavkalari siyosati. AQSh Federal zaxira tizimining sobiq raisi Alan Grinspenning keragidan ortiq ekpansion pul-kredit siyosati natijasida Federal zaxira tizimi diskont stavkasini tarixiy past darajaga tushishini va keragidan ortiq shu holatda uzoq muddat saqlanishini ta'minladi.

Shuningdek, inqiroz rivojlanishiga mikroiqtisodiy omil hisoblangan yangi moliyaviy instrumentlar, avvalambor, tuzilmaviy hosila obligatsiyalari bozori rivojlanishi ham oʻz hissasini qoʻshgan. Aslida moliyaviy hosila instrumentlarini rivojlantirishdan maqsad tavakkalchilikni investorlar oʻrtasida taqsimlash orqali kamaytirishdan iborat edi. Vaholanki, hosilaviy instrumentlardan foydalanish amaliyotining rivojlanishi past sifatli substandart kreditlar bilan bogʻliq risklarning asl qiyofasini berkitish va investorlarning keng ommasiga yetarlicha shaffof (oshkora) boʻlmagan tarzda taqsimlanishiga olib keldi.

Bundan tashqari, tartibga soluvchi organlar va reyting agentliklari tomonidan riskning yetarli darajada baholanmasligini, qolaversa, AQShning Federal ipoteka korporatsiyasi va Federal milliy ipoteka

 $^{^{1}}$ Qarang: *Жумаев Н. Х.* Жахон молиявий-иқтисодий инқирози: мохияти, сабаб-оқибатлари ва Ўзбекистонга таъсири. – Т., 2009. – Б. 50.

assotsiatsiyasi, shuningdek, AQSh investitsion kompaniyalari kapitalining sezilarli darajada kichikligini moliyaviy inqirozni keltirib chiqaruvchi institutsional omillar qatoriga qoʻshish mumkin. Biroq, koʻpchilik iqtisodchi olimlar va ekspertlar hozirgi jahon moliyaviy inqirozining ibtidosi hisoblangan AQSh ipoteka krediti bozoridagi tanglik holatini asosiy sabab sifatida e'tirof etishmoqda. AQSh ipoteka krediti bozoridagi inqiroz zamirida ham bir qator jiddiy sabablar va omillar mujassamligini e'tibordan chetda qoldirmaslik lozim. Bunday omillar sirasiga¹:

- a) kredit berish amaliyotining oʻta qulayligi. Foiz stavkasining pastligi, moliya muassasalari tomonidan taqdim qilingan ipoteka kreditlari hajmining yuqoriligi va ayniqsa, uy inshootlari bahosining oshishi iste'molchilarni uy sotib olishga ragʻbatlantirdi;
- b) kredit berish shartlarining soddalashtirilishi. Ipotekaga nisbatan oʻsib borayotgan talabni qondirish maqsadida kredit beruvchi tashkilotlar kredit berish shartlarini soddalashtirishga kirishdilar va yirik miqdordagi ipoteka kreditlarini muomalaga chiqardilar;
- c) tartibga solishning noadekvatligi. Amaldagi tartibga solish tizimi murakkab tuzilish, past darajadagi shaffoflik va yuqori risk bilan tavsiflanuvchi AQSh moliyaviy mahsulotlaridagi innovatsiyalarga javob bera olmadi;
- d) kredit reyting agentliklari riskli ipotekaga asoslangan qimmatli qogʻozlarga AAA reytingini berish orqali jahon moliyaviy inqiroziga sezilarli hissa qoʻshgan, deb hisoblanmoqda;
- e) bank kapitalini tartibga solish: ayrim ekspertlar bank kapitalini xalqaro tartibga solishni (Bazel I va II) inqiroz sabablaridan biri sifatida e'tirof etishmoqda. Amaldagi bank kapitalini xalqaro tartibga solish (Bazel II) tizimi moliyaviy inqiroz vujudga kelishi uchun zamin yaratganligi ham e'tirof etilmoqda. Gap shundaki, o'tgan asrning 90-yillari boshida qabul qilingan Bazel II tizimi tijorat banklari uchun talab qilinadigan kapital yoki kapitalning yetarliligini aktivlarning investitsion sifatlari va ularning xatarli darajasi bo'yicha guruhlashni ko'zda tutadi.

Zero, bank kapitalini tartibga solish banklarni katta miqdorda riskli kreditlar berish uchun yetarli darajada kapitalga ega boʻlishini talab etar ekan, ularning yuqori riskli aktivlarini sekyuritizatsiyalab, qimmatli qogʻozlarga aylantirishga va investorlarga sotishga ragʻbatlantirgan. Shuningdek, hukumat kafolati berilgan mazkur ipoteka qimmatli qogʻozlar

¹ Qarang: *Жумаев Н. Х.* Жахон молиявий-иқтисодий инқирози: мохияти, сабаб-оқибатлари ва Ўзбекистонга таъсири. – Т., 2009. – Б. 50.

riskka tortilgan aktivlar qatoriga kirmaganligi tufayli, tijorat banklari uchun qulay va foydali investitsiyaga aylangan edi. Chunki bank kapitali yetarliligini aniqlashda riskka tortilgan aktivlar miqdori bilan hisoblanadi, hukumat kafolati ostidagi ipoteka kreditlari bank kapitali yetarliligi talablarining buzilishiga zarracha ta'sir qilmaydi.

2007-yilning avgust oyida AQSh ipoteka kreditlari bozorida avj olgan tanglik holati moliyaviy globallashuv koʻmagida tizimli moliyaviy inqirozga aylanib ketdi. Bu jarayonda yirik banklar va moliyaviy institutlarning likvidliligi va toʻlovga qobiliyati keskin darajada zaiflashdi. Uzoq muddat davomida AQSh moliyaviy muassasalari yomon kredit tarixiga ega boʻlgan qarz oluvchilarni agressiv ravishda kreditlab kelishdi. Mazkur kreditlar, oʻz navbatida, «paketlanib» butun dunyo investorlariga sotildi. Bunda garov ta'minoti turli xil darajada boʻlgan kreditlar asosida ipoteka qimmatli qogʻozlari chiqarildi va mazkur qimmatli qogʻozlar yuqori investitsiya reytingiga ega boʻlganligi bilan ham xorijiy investorlar uchun jozibador edi.

Ipoteka kreditlarini olgan bank mijozlari asosiy qarz va foiz toʻlovlarini toʻlashda muammolarga yuz tutgach, moliyaviy institutlar balansidagi aktivlarida yuz bergan qisqarishlarni oʻz mablagʻlari hisobidan qoplashlariga toʻgʻri keldi. Chunki ipoteka kreditlarining garov ta'minoti hisoblangan uylar bahosi sezilarli darajada pasaygan va mutanosib ravishda garov qiymatining pasayishi va ushbu kreditlarning muammoli kreditlar guruhiga kiritilishiga sabab boʻldi. Mazkur kreditlar boʻyicha zararlar kutilmagan darajada yiriklashgandan soʻng, ma'lum boʻldiki, ushbu kreditlar paketiga investitsiya qilgan investorlar yetarli darajada past baholangan riskka ega edilar.

Bunda investorlarni ayblash ham biroz nooʻrin boʻladi. Zero, AQShning Federal ipoteka korporatsiyasi va Federal milliy ipoteka assotsiatsiyasi tomonidan toʻlovga noqobil mijozlarga yordam berish maqsadida yuqori riskli kreditlar xarid qilingan va kafolatlangan. AQSh hukumati tomonidan kafolatlangan mazkur qarzlar investitsiya banklariga qayta sotilgan. Investitsiya banklari esa, oʻz navbatida, risksiz aktiv sifatida ushbu qarzlarni chet el investorlariga sotishga muvaffaq boʻlgan. Ipoteka kreditlari muammosi, dastavval AQShning muammosi, biroq kreditlar AQSh tashqarisidagi boshqa investorlarga ham sotilgan ekan, bu inqiroz global tus olishi muqarrar edi. Ipoteka kreditlari boʻyicha zararlar kuzatilishi bilan banklar va boshqa moliya muassasalari bir-birlariga kredit berishda ham oʻta ehtiyotkor boʻlib qoldilar. Ular oʻz majburiyatlarini qoplash uchun lividlilikni saqlab turishga urindilar. Mazkur holat foiz stavkalarining oshishi uchun zamin yaratdi.

Yuqoridagi holatlar chindan moliya-bank tizimida jiddiy nuqsonlar mavjudligini va ushbu tizimni tubdan isloh qilish orqali mos yangi moliyaviy arxitekturani shakllantirish zarurligini tasdiqlamoqda.

Prezident Islom Karimov global moliyaviy inqiroz holatini va uning yuz berishi mumkin boʻlgan oqibatlariga doir materiallarni oʻrganish va umumlashtirish natijasida quyidagi uchinchi xulosaga kelganligini ham uqtirdi: «Uchinchidan, moliyaviy-iqtisodiy inqirozning har qaysi davlatdagi miqyosi, koʻlami va oqibatlari qanday boʻlishi koʻp jihatdan bir qancha omillardan kelib chiqadi».

Jahon moliyaviy-iqtisodiy inqirozining miqyosi, koʻlami va oqibatlari:

- 1) avvalambor, muayyan mamlakatning moliya-valuta tizimi qay darajada rivojlanganligi;
- 2) milliy kredit institutlarining kapitallashuvi va likvidliligi (toʻlov imkoniga ega ekanligi) hamda ularning chet el va korporativ bank tuzilmalariga nechogʻli qaram ekanligiga;
 - 3) mamlakatning oltin-valuta zaxirasining hajmi;
 - 4) xorijiy kreditlarni qaytarish qobiliyati;
- 5) mamlakat iqtisodiyotining barqarorligi, diversifikatsiya va raqobatbardoshlilik darajasi kabi omillarga bogʻliqdir.

Bunday omillar turli mamlakatlarda turlicha ta'sir ko'rsatishi va inqirozga qarshi chora-tadbirlar tizimini ishlab chiqishda bular e'tiborga olinishi zarur. Ayni paytda inqirozdan imkon qadar tez chiqish, uning oqibatlarini yengillashtirish jahon hamjamiyati tomonidan qabul qilinayotgan chora-tadbirlarning nechogʻli samaradorligiga, ularning oʻzaro uygʻunligiga bogʻliqdir.

Moliyaviy inqiroz, keskin salbiy ta'sir oʻtkazgan ayrim dunyo mamlakatlarining jahon Yalpi ichki mahsuloti (YAIM)dagi hissasi (2008-yil)

Mamlakatlar	Foizda
Yevropa Ittifoqi mamlakatlari	31,0
(27 davlat a'zo)	
AQSh	23,0
Yaponiya	8,0
Xitoy	7,0
Rossiya	3,2
Qolgan dunyo mamlakatlari	28,0

Ayrim mutaxassislar 2008-yilda jami YAIM 62 trln. AQSh dollarini tashkil qilmoqda desalar, Rossiya olimlari 50 trln. AQSh dollarini tashkil etmoqda, degan fikrni bildirishmoqda.

Tabiiyki, yuqorida keltirilgan misol va raqamlardan, shuningdek nazariy asoslashlar Prezident Islom Karimov ogohlik bilan ta'kidlaganidek, «tobora chuqurlashib borayotgan jahon moliyaviy inqirozi mamlakatimizga ta'sir koʻrsatmaydi, bizni chetlab oʻtadi, degan xulosa chiqarmaslik kerak. Masalani bunday tushunish oʻta soddalik, aytish mumkinki, kechirib boʻlmas xato boʻlur edi».

Moliyaviy inqirozning kelib chiqish sabablari:

- 1. AQSh ipoteka kredit bozoridagi inqiroz.
- 2. Yirik banklar va moliyaviy tuzilmalarning likvidlik, ya'ni to'lov qobiliyatining zaiflashuvi.
- 3. Dunyoning yetakchi fond bozorlarida eng yirik kompaniyalar indekslari va aksiyalariga boʻlgan bozor qiymatining halokatli darajada tushib ketishi.
 - 4. Keragidan ortiq ekspansion pul kredit siyosatining yuritilishi.

Jahon moliyaviy inqirozining oqibatlari quyidagicha:

- 1) jahon YAIMning ishlab chiqarish sur'ati pasayadi;
- 2) ishsizlik darajasi oshadi;
- 3) budjet taqchilligi ortadi;
- 4) xalqaro savdo hajmi kamayadi;
- 5) ijtimoiy transfertlarning koʻpayishi hisobiga davlat xarajatlari oshadi.

Rivojlangan mamlakatlarda jahon moliyaviy-iqtisodiy inqirozidan chiqish yoʻlidagi chora-tadbirlar. Vashington shahrida 2008-yil noyabrida boʻlib oʻtgan sammitda inqirozga qarshi tadbirlarning quyidagi besh asosiy tamoyili belgilangan:

- 1. Iqtisodiy jarayonlarga davlat aralashuvini kuchaytirish.
- 2. Moliya institutlarining hisobdorligini va shaffoflik darajasini oshirish.
- 3. Moliya bozorlaridagi harakatlarni muvofiqlashtirishni ragʻbatlantirish.
- 4. Xalqaro hamkorlikni rivojlantirish va xalqaro savdoga cheklovlarni kamaytirish.
 - 5. Xalqaro moliya tashkilotlarini isloh etish.

Ushbu tadbirlarning muhokamasiga bagʻishlangan mazkur uchrashuv yakuni boʻyicha chop etilgan bayonotda qayd qilingan tamoyillarning zudlik bilan amaliyotda tatbiq qilinishi bildirilgan.

Jahon mamlakatlarining inqirozga qarshi kurashga sarflangan moliyaviy xarajatlari

Mamlakat	Moliyaviy xarajatlar, mlrd. dollar	Mamlakat YAIMga nisb. foiz hisobida (2008-yil)
Rossiya	222	13,9
Buyuk Britaniya	1020	37
AQSh	3539	25
Germaniya	893	23
Yaponiya	576	12
Xitoy	570	13
Dunyo boʻyicha	9400	15

Jahon moliyaviy inqirozining Oʻzbekistonga ta'siri va uning mamlakatimizda yengil kechishiga sabab boʻlgan quyidagi omillar:

- ma'muriy-buyruqbozlik tizimidan bozor iqtisodiyotiga o'tishning bosqichma-bosqich amalga oshirish yo'lining ta'minlanganligi;
- davlat bosh islohotchi sifatida mas'uliyatni o'z zimmasiga olishi zarurligining aniq belgilab olinganligi;
- Oʻzbekistonda moliyaviy-iqtisodiy, budjet, bank-kredit tizimi, shuningdek, iqtisodiyotning real sektori korxonalari va tarmoqlarining barqaror hamda uzluksiz ishlashini ta'minlash uchun yetarli darajada mustahkam zaxiralar yaratilganligi va zarur resurslar bazasining mavjudligi;
 - oqilona tashqi qarz siyosati olib borilganligi;
- aholining ish haqi va daromadlarini izchil va oldindan oshirib borish hamda iste'mol bozorida narxlar indeksining asossiz tarzda o'sishining oldini olishga doir chora-tadbirlarning izchillik bilan amalga oshirilganligi;
- davlatning moliyaviy-iqtisodiy va bank tizimlarining nechogʻlik barqaror va ishonchli ekani, ularning himoya mexanizmlari qanchalik kuchliligi bilan izohlanadi.

Oʻzbekiston uchun inqirozni bartaraf etish va jahon bozorida yangi marralarga chiqishning ishonchli yoʻli sifatida 2009-yilga moʻljallangan

¹ Президент Ислом Каримовнинг «Жаҳон молиявий-иқтисодий инқирози, Ўзбекистон шароитида уни бартараф этишнинг йўллари ва чоралари» асарини ўрганиш бўйича ўқув-услубий қўлланма. – Т., 2009. – Б. 47.

iqtisodiy dasturning quyidagi eng muhim ustuvor yoʻnalishlari belgilab berilgan:

- 1) mamlakatimizda qabul qilingan 2009–2012-yillarda jahon iqtisodiy inqirozi oqibatlarining oldini olish va bartaraf qilish boʻyicha inqirozga qarshi dasturni amalga oshirish, shu asosda iqtisodiy oʻsishning uzoq muddatli barqaror sur'atlarini va iqtisodiyotning muvozanatli rivojlanishini ta'minlash;
- 2) tarkibiy oʻzgartirishlarni davom ettirish va iqtisodiyotni diversifikasiyalash, buni birinchi navbatda, xalqaro sifat standartlariga javob beradigan, ichki va tashqi bozorlarda talab yuqori boʻlgan raqobatbardoshli mahsulotlar ishlab chiqarishga yoʻnaltirilgan iqtisodiyotning eng muhim tarmoqlarini modernizasiya qilish, texnik va texnologik jihatdan qayta jihozlash yoʻli bilan amalga oshirish;
- 3) qishloq turmushi sifatini va qiyofasini tubdan yaxshilashga, qishloq joylarda ijtimoiy va ishlab chiqarish infratuzilmasini jadal rivojlantirishga, mulkdorning, tadbirkorlik va kichik biznesning maqomi, oʻrni va ahamiyatini tubdan qayta koʻrib chiqishga, fermer xoʻjaligini rivojlantirishni har tomonlama qoʻllab-quvvatlashga yoʻnaltirilgan uzoq muddatli, oʻzaro bogʻlangan chora-tadbirlar keng majmuini amalga oshirish;
- 4) aholi bandligini ta'minlash, uning turmush sifatini oshirishning eng muhim omili sifatida xizmatlar ko'rsatish sohasi va kichik biznesni jadal rivojlantirish;
- 5) mamlakatni modernizasiya qilish va aholi bandligini oshirishning eng muhim omili sifatida ishlab chiqarish va ijtimoiy infratuzilmani yanada rivojlantirish;
- 6) banklar ishini yanada takomillashtirish, aholi va xoʻjalik yurituvchi sub'ektlarning boʻsh mablagʻlarini tijorat banklaridagi depozitlarga jalb qilishni ragʻbatlantirish.

3. Moliyaviy xavfsizlik va uning ahamiyati

Moliyaviy xavfsizlik – mamlakat, mintaqalar, korxonalar iqtisodiy xavfsizligining muhim tarkibiy qismi, umuman iqtisodiy samarali davlatning fundamental asosi. U mamlakatning milliy manfaatlariga javob beradigan mustaqil moliyaviy-iqtisodiy siyosatni oʻtkazishning asosiy shart-sharoitidir.

Moliyaviy xavfsizlik, avvalo, davlatning mamlakat moliyaviy-iqtisodiy rivojlanishining barqarorligini ta'minlashga qodirligi (qobiliyati) bilan ajralib turadi. U moliyaviy inqirozlar, xufiyona tuzilmalarning milliy ijtimoiy-iqtisodiy tizimga ta'sirini bartaraf etish zarurligini, kapitalning xorijga va real sektordan chiqib ketishining oldini olish, xorijiy kapitalni milliy iqtisodiyot uchun maqbul shartlarda jalb qilishni nazarda tutadi.

Hozirgi vaqtda davlat moliyasi, jahon moliyaviy tizimlarining alohida olingan davlatga ta'siri sifat jihatdan yangi darajaga oʻtmoqda. Italiyalik mutaxassislar Karlo Jan va Paolo Favoniyning ta'kidlashlaricha, geomoliya geoiqtisodiyotning asosiy tarkibiy qismi hisoblanadi, chunki aynan shu sohada davlat suvereniteti hammadan koʻra sezilarliroq buziladi.

Davlatning moliyaviy xavfsizligi — uning oʻz milliy manfaatlariga monand moliyaviy-iqtisodiy siyosatni mustaqil amalga oshirish qobiliyatining eng muhim sharti. Davlatning moliyaviy xavfsizligi uning organlarining quyidagilarni bajarishga qodirligidan iborat:

- davlatning barqaror iqtisodiy rivojlanishini ta'minlash;
- to'lov-xarajat tizimi va asosiy moliyaviy-iqtisodiy ko'rsatkich-larning barqarorligini ta'minlash;
- jahondagi inqirozlar va jahon omillari (davlatlar, TNK, subdavlat guruhlari va boshqalar)ning, xufiyona (urugʻ-korporativ, mafioz va boshqa) tuzilmalarning milliy iqtisodiyot va ijtimoiy siyosiy tizimga atayin bajaradigan harakatlarining ta'sirini zararsizlantirish (tahrir);
- kapitalning chet elga koʻplab oqib ketishi, iqtisodiyotning real sektoridan «kapitalning qochishi»ga yoʻl qoʻymaslik;
- turli darajalardagi hokimiyat organlari oʻrtasida milliy budjet tizimining resurslarini taqsimlash va ishlatish borasidagi keng koʻlamli nizolarining oldini olish;
- xorijiy qarz mablagʻlarini mamlakat iqtisodiyoti uchun eng maqbul tarzda jalb qilish va ishlatish;
- moliyaviy sohada jinoyatlar va ma'muriy huquqbuzarliklar
 (jumladan jinoiy yoʻl bilan topilgan daromadlarni legallashtirish)ning
 oldini olish.

Moliyaviy xavfsizlikka tahdidlar ichki va tashqi turlarga boʻlinadi. Ichki va tashqi tahdidlar moliyaviy tizimning takror ishlab chiqarishni kafolatlashga, davlat qarziga xizmat koʻrsatishga yetarlicha qodir emasligi natijasida yuzaga keladi.

Ichki tahdidlar asosan quyidagilar tufayli yuzaga keladi:

- noadekvat (notoʻgʻri) moliyaviy-iqtisodiy siyosat;
- hokimiyat va boshqaruv organlarining eng oddiy xatolari;

davlat moliyaviy tizimini boshqarishdagi xatolar, suiiste'molliklar
 va boshqa og'ishlar (xo'jasizlik, sansalorlik, turli-tuman iqtisodiy
 jinoyatlar va sh.k.).

Hozirgi sharoitda moliyaviy xavfsizlikka *tashqi tahdidlar* alohida ahamiyatga ega.

Moliyaviy resurslarni boshqarishda moliyaviy menejment muhim oʻrin tutadi. *Moliyaviy menejment* — bu moliyaviy resurslarni boshqarish tizimi boʻlib, unga moliyaviy siyosat, uning usullari va vositalari, shuningdek boshqaruv qarorlarini qabul qilishda ishtirok etuvchi va moliyaviy xavfsizlik boʻyicha qoʻyilgan maqsadlarga erishish uchun ushbu qarorlarni amalga oshiruvchi odamlar kiradi. Moliyaviy menejmentning asosiy funksiyalari quyidagilardan iborat:

- qarorlar qabul qilish;
- qabul qilingan qarorlarni amalga oshirish.

Axborot yetarli boʻlmagan, qabul qilingan qarorlarning oqibatlarini deyarli bilib boʻlmaydigan katta noaniqlik sharoitida qabul qilinadigan nostandart, ijobiy qarorlar eng katta ahamiyatga ega.

Moliyaviy menejment moliyaviy tizimning barcha tarkibiy qismlarini qamrab oladi va bozor munosabatlari sharoitida boshqaruv tuzilishining muhim tarkibiy unsuri (elementi) hisoblanadi. Moliyaviy menejmentning asosini qisqa va uzoq muddatli davrda moliyaviy resurslardan samarali foydalanish omillarini tahlil qilishga asoslanadigan hamda moliyaviy xizmatlar faoliyatining yoʻnalishlarini belgilab beradigan moliyaviy siyosat tashkil qiladi.

Tegishli siyosatni belgilash maqsadida oʻtkaziladigan moliyaviy tahlil manbalariga davlat moliya organlarining rasmiy hisobotlari, institutsional bozor tuzilmalari (banklar, investitsiya kompaniyalari, tovar, fond va valuta birjalari)ning axboroti, statistik ma'lumotlar, tarmoqlararo va davlatlararo qiyoslash ma'lumotlari, kompaniyalarning tashqi foydalanish uchun tayyorlangan moliyaviy-buxgalterlik hisobotlari kiradi. Korxonalarda tegishli moliyaviy siyosatni belgilash va qarorlar qabul qilish maqsadida xoʻjalikning ichki jarayonlarini toʻliqroq ifodalovchi ichki boshqaruv axborotidan ham foydalaniladi.

Moliyaviy menejmentning quyidagi maqsadlari ajratiladi:

- korxona aktivlarining tuzilishini maqbullashtirish;
- korxonaning moliyaviy barqarorligi va mustaqilligini ta'minlash.

Moliyaviy menejment maqsadlariga erishish tegishli boshqaruv usullaridan foydalanish orqali ta'minlanadi. Moliyani boshqarishning quyidagi asosiy metodlari (usullari) ajratiladi:

- bashoratlash va rejalashtirish;
- oʻzini oʻzi moliyalashtirish;
- moliyalashtirish va kreditlash;
- soliqqa tortish;
- sugʻurta;
- lizing;
- trast;
- faktoring;
- garov;
- moliyaviy ragʻbatlantirish;
- sanksiyalar (jazolar) qoʻllash.

Moliyaviy menejment turli moliyaviy vositalar toʻplami orqali amalga oshiriladi. Ularning ayrimlarini keltiramiz:

- birlamchi: pul mablagʻlari, debitorlik va kreditorlik qarzlari, qisqa muddatli moliyaviy qoʻyilmalar – aksiya va obligatsiyalar;
 - ikkilamchi: opsionlar, fyucherslar, forvard shartnomalari.

Moliyaviy menejmentning hal qiluvchi tarkibiy qismi insondir, chunki korxonalar xodimlar yuksak ijodiy faollik koʻrsatgan sharoitdagina muvaffaqiyatli rivojlanishi mumkin. Ayni vaqtda moliyaviy menejment mehnat jamoasini bevosita boshqarish tizimi emas, balki ijobiy tashabbus rivojlanishi uchun eng qulay ijtimoiy-ruhiy muhit yaratishni taqozo etadi.

4. Kreditning mohiyati. Kreditning mamlakat taraqqiyotidagi oʻrni

Moliya tizimining muhim qismini kredit tizimi tashkil qiladi va u kredit munosabatlari majmuini, kreditlashtirishning koʻrinishlari va tamoyillarini hamda mamlakatning moliya-kredit tashkilotlarini oʻz ichiga oladi. Mamlakatning kredit tizimi jamiyatning ehtiyojlariga asoslanadi hamda ishlab chiqarishni rivojlantirishga xizmat qiladi, banklar va boshqa moliya-kredit tashkilotlari bu tizimning asosiy elementlaridir.

Kredit – bu muayyan bir muddatda pul yoki tovar shaklida qaytarish va foydalanganlik uchun toʻlash tamoyillari asosida qarz berishdir. Kredit tizimida banklar alohida oʻrin tutadi. Ular bir qator muhim iqtisodiy vazifalarni bajaradi; vaqtincha boʻsh mablagʻlarni, jamgʻarmalarni muomalaga kiritadi; vositachilik vazifalarini, kreditlarni taqsimlash hamda moliya intizomiga rioya qilinishini nazorat qiladi. *Kredit* soʻzi lotincha *credit* – ishonch degan ma'noni anglatib, tovar yoki pulni ma'lum bir muddatda qaytarish sharti bilan qarzga berishni bildiradi.

Birov pulini qaytarib olishga ishongani uchun qarz beradi. Kredit munosabatlari juda qadim zamonlarda vujudga kelgan.

Dastlab natura shaklida (gʻalla, chorva va boshqalar) mulkdorlar tomonidan qarzga berish rasm boʻla boshlagan. Keyinroq pul shaklida ham beriladigan boʻldi. Qarzga pul berishning dastlabki shakli sudxoʻrlik boʻlib, u nihoyatda yuqori darajada foiz bilan qaytarilishi bilan kreditdan farq qiladi. Qadimgi Yunonistonda eramizgacha IV asrda oyiga 42 foiz, yiliga 570 foizgacha foiz toʻlangani tarixiy manbalarda qayd etilgan. Bundan tashqari, sudxoʻr qarz oluvchidan qoʻshimcha imkoniyatlar yaratilishini ham talab qilgan. Badiiy adabiyotda birinchi boʻlib fransuz yozuvchisi

O. Balzak sudxoʻr obrazini yaratgan. S. Ayniyning «Sudxoʻrning oʻlimi» asari oʻzining mazmuni, qiyofa ifodasi jihatdan Balzak asaridan ham oʻtib ketgan desak, xato qilmaymiz. Sudxoʻrlik qarzi bir tomondan kuchayib mayda ishlab chiqaruvchilarni xonavayron qilgan, ikkinchi tomondan kapitalning dastlabki jamgʻarish uchun zarur mablagʻlarni shakllanishga yordam bergan.

Industrial ishlab chiqarish va klassik kapitalizmning vujudga kelishi bilan kreditsiz ishlab chiqarish faoliyatini yuritish qiyinlashib qoladi. Kapital bir xoʻjalikda pul shaklida, ikkinchisida tovar shaklida boʻlib, turli sohalarda harakati bir-biriga toʻgʻri kelmaydi. Kapital harakatining alohidalashgani tufayli bir xoʻjalikda pul yetishmasa, ikkinchisida boʻsh pul mavjud boʻladi. Natijada mablagʻi yoʻq xoʻjaliklar boʻsh pul mablagʻi borlardan qarz olishga majbur boʻladilar. Boʻsh pul mablagʻi borlar oʻz pullarini ma'lum muddatga qarzga berar ekanlar, pullarini boshqa birovning qoʻliga topshirib, xatarli tavakkal qilganlari uchun ma'lum miqdorda haq oladilar. Oʻz mablagʻi yetarli boʻlmagan xoʻjalik yurituvchi subyektlar moliyaviy resurslarga boʻlgan ehtiyojini kredit orqali qoplaydi. Takror ishlab chiqarish jarayonining uzluksiz davom etishini ta'minlash zaruriyati kredit munosabatini obyektiv zarur qilib qoʻyadi.

Chunki tovarlar ishlab chiqarish, uni sotish, tovar ishlab chiqarish uchun zarur resurslarni sotib olish bir vaqtning oʻzida yuz bermaydi. Bozor iqtisodiyoti sharoitida boʻsh pul mablagʻlarini oʻlik boylik, xazina sifatida saqlash befoyda. Jamiyat taraqqiy etishi bilan kredit munosabatlari rivojlanib, yangi-yangi imkoniyatlar vujudga kela boradi.

Hozirgi iqtisodiyotni kreditsiz tasavvur qilib boʻlmaydi. Kredit iqtisodiy kategoriya boʻlib, u vaqtincha oʻz egalari qoʻlida boʻsh turgan pul mablagʻlarini boshqalar tomonidan ma'lum muddatga haq toʻlash sharti bilan qarzga olish va qaytarib berish yuzasidan kelib chiqadigan munosabatlarni ifodalaydi.

Shunday qilib, pulning ssuda kapitali tariqasida, ya'ni daromad olish uchun qarzga berish va qaytarib olish bilan bog'liq munosabatlar vujudga keladi.

Kredit munosabatlari faqat pul bilan bogʻliqmi? Tovar shaklida ham kredit berilishi mumkin-ku? degan savol tugʻilishi mumkin. Bozor iqtisodiyoti sharoitida hamma kredit asosan pul shaklida boʻladi. Tovar shaklida berilgan taqdirda ham pul kredit shaklida hujjatlashtiriladi.

Kredit munosabatlari ikki subyekt oʻrtasida yuz beradi. Biri boʻsh pul egasi, ikkinchisi unga muhtoj, ya'ni qarz oluvchi.

Kredit subyektlari har xil. Bular yuridik va jismoniy shaxslar, bank, korxona, firma, davlat, turli toifadagi aholi boʻlishi mumkin. Bir subyektning oʻzi bir vaqtda ham qarz oluvchi, ham qarz beruvchi boʻlishi mumkin. Kredit aloqalari pul egasi bilan qarz oluvchi oʻrtasida bevosita yoki bilvosita boʻlishi mumkin. Birinchi holda ular toʻgʻridan-toʻgʻri muomalaga kirishadi. Ikkinchi holda ular vositachilar orqali aloqaga kirishadilar. Odatda, asosiy *vositachi rolini banklar* oʻynaydi. Kredit iqtisodiy kategoriya sifatida qator vazifalarni bajaradi.

- 1. Taqsimlash. Boʻsh pul mablagʻlarini qaytarish sharti bilan qarzga berish orqali kapitalni turli tarmoqlar, korxonalar oʻrtasida taqsimlash va qayta taqsimlashni amalga oshiradi va ishlab chiqarish resurslarining koʻchib yurishini ta'minlaydi.
- 2. *Emissiya*. Kredit asosida va unga bogʻliq holda pul belgilari, pulga tenglashtirilgan naqd pulsiz toʻlov vositalari, turli qimmatbaho qogʻozlar emissiya qilinadi, xoʻjalik oborotiga kiritiladi.
- 3. Nazorat qilish. Kredit operatsiyalarini bajarish jarayonida iqtisodiy faoliyat, moliyaviy ahvol nazorat qilinadi. Davlat kredit munosabatlari orqali pul aylanmasining barcha jarayonlarini boshqarishni amalga oshiradi.
- 4. Boʻsh pul mablagʻlarini harakatdagi, oborotdagi kapitalga aylantirish. Bunda pulni pul topadi, degan naqlga amal qilinadi.
- 5. Ragʻbatlantirish. U yoki bu maqsad uchun qarz berish, qarzni undirish orqali tejamkorlik, iqtisodiy oʻsish ragʻbatlantiriladi.
- 6. Tovar ishlab chiqarish uzluksizligini ta'minlaydi, ishlab chiqarish vaqtini qisqartiradi.

Kredit berish uchun, avvalo, qarz beradigan mablagʻ boʻlishi kerak. Bu mablagʻlar qayerdan olinadi, manbai nima, degan savol tugʻiladi. Mablagʻlar manbai quyidagilar:

Birinchidan, korxonalarning vaqtincha boʻsh pul mablagʻidir. Bu mablagʻlar kapitalning doiraviy aylanishi bilan bogʻliq boʻlib, ma'lum

muddat uning bir qismi boʻsh boʻladi. Chunonchi amortizatsiya ajratmalari, bu mablagʻlar asosiy kapitalni yangilash payti kelguncha boʻsh boʻlib, bankdagi hisob-kitoblarida jamlanib boradi. «Tezlashtirilgan» amortizatsiya siyosati tufayli bu mablagʻlar oʻsib borish tendensiyasiga ega. Mahsulot sotishdan keladigan pul tushumlari. Bu pul ham xom ashyo, materiallar sotib olish, xodimlar mehnatiga haq toʻlash, vaqti kelguncha boʻsh turadi.

Korxonalarning ishlab chiqarish, fan va texnikani rivojlantirish fondlari, moddiy ragʻbatlantirish fondlari ham asta jamlanib borib, belgilangan maqsad boʻyicha ishlatilguncha boʻsh turadi. Korxonalar foydasi davlat budjeti va kredit tizimi bilan hisob-kitob qilinguncha, shuningdek foydalanguncha bankdagi hisoblarda saqlanadi. Ish haqi ham har 15 kunda berilar ekan, ungacha bu pul yigʻila boradi hamda ishlatilguncha boʻsh boʻladi.

Ikkinchidan, moliya-kredit muassasalarining pul mablagʻlari. Ularning daromadlari bilan xarajatlari oʻrtasidagi farq, xarajatlar qoplaganidan ortgani boʻsh pul mablagʻlarini tashkil etadi. Tijorat banklari va moliya-kredit muassasalarining minimal pul zaxiralari ham qarz fondi manbai boʻladi.

Uchinchidan, davlat ixtiyoridagi pul. Davlatning zaxiradagi pul mablagʻlari, markaziy va mahalliy hokimiyatlarning xarajatlari bilan soliq tushumlari oʻrtasidagi farq tarzida boʻsh pullar mavjud boʻladi. Budjet tizimi mablagʻlari harakati natijasida ma'lum miqdorda boʻsh pullar hosil boʻladi.

To'rtinchidan, turli maxsus (nafaqa, sug'urta, xayriya), ijtimoiy fondlarning mablag'lari. Bu fondlar pullarining hosil bo'lishi va ishlatilishi har xil vaqtda yuz beradi. Bu ma'lum miqdorda pul mablag'larining bo'sh qolib, qarz fondiga aylanishi uchun imkon beradi.

Beshinchidan, aholi pul daromadlari va jamgʻarmalari. Fuqarolarning iste'molchi sifatida qimmatbaho tovarlar olish, uy qurish, marosimlar oʻtkazish uchun jamgʻarilgan pullari ishlatilgunga qadar boʻsh boʻladi.

Oltinchidan, tadbirkorlar, katta puldorlar qoʻlidagi pullar.

Bulardan tashqari, davlat budjetidan uzoq muddatli qarz berish uchun maxsus mablagʻ ajratiladi. Undan tashqari MB qoʻshimcha emissiya tufayli moliya-kredit muassasalariga kreditlar berishi mumkin. Ma'lum vaqt mobaynida boʻsh pullar uning egalariga hech qanday daromad keltirmaydilar, shuning uchun kam miqdordagi foiz bilan ham qarz berish foydali boʻlib qoladi. Natijada ana shu boʻsh pullar qarz kapitaliga

aylantiriladi. Bunda banklar muhim rol oʻynaydi. Ular yuqori foiz bilan pulga muhtoj boʻlgan ishbilarmonlar, tadbirkorlar va boshqalarga oʻz maqsadlarini amalga oshirish uchun qarz beradi. Hozirgi sharoitda xoʻjalikni moliyalashtirishda qarz mablagʻlarining ulushi oshib borishi tendensiyasi kuzatilmoqda. Ularning ulushi, ayniqsa kapital quyilmalar hajmida koʻpayib bormoqda. Bunday tendensiya Yaponiya, Italiya, Fransiyada yaqqol koʻzga tashlanadi. Masalan, Yaponiya firmalari ishlab chiqarishni kengaytirish uchun sarflagan mablagʻlarining 4/5 qismi chetdan jalb qilingan, ya'ni qarz olingan.

Kredit turlari va tamoyillari. Kredit turlari xilma-xil, ularga turli jihatdan yondashish mumkin:

- qarz oluvchilarning asosiy guruhlariga koʻra: korxonalar, aholi, davlat krediti;
- koʻzlangan maqsadga koʻra: iste'mol, qishloq xoʻjaligi, savdo, investitsiya, budjet kreditlari;
- berilgan vaqtiga koʻra: qisqa (bir yilgacha), oʻrta (bir yildan besh yilgacha), uzoq (besh yildan ortiq) muddatli kreditlarga boʻlinadi;
- funksiya qilish sohasiga koʻra, kredit ikki turga boʻlinadi: oborot kapitalini tashkil etish, uni tor ma'noda kredit deb yuritiladi hamda asosiy kapital olish uchun sarflanadigan, odatda uni qarz deb yuritiladi:
- 1. Overdraft bank mijoziga kunlik foiz toʻlash sharti bilan hisob raqamidagi mablagʻi yetmagan hollarda shartlashilgan miqdorda qarz berib, bank krediti ta'minlanishini talab qilmasligi mumkin. Bunda bank mijozi hisobiga kelib tushgan pulni darrov oʻz hisobiga oʻtkazib olmaydi. Mijoz qarzni oʻziga qulay paytda toʻlaydi.
- 2. Kontokorrent shaklida qarz berganda, bank moliyaviy jihatdan barqaror deb topgan mijozlariga oborot mablagʻlari uchun kreditni qattiq cheklamasligi mumkin.
- 3. Avans Yevropa mamlakatlarida bankning har xil shartga koʻra (overdraft, kontokorrent ham shunga kiradi) qarz berishi;
- kreditni qaytarish ta'minlanganligiga ko'ra ham ikki turga bo'linadi: ta'minlanmagan yoki blankli (overdraft, kontokorrent) va ta'minlangan kredit;
- kredit berish usuliga koʻra: kompensatsion, ya'ni oʻz mablagʻlarini toʻldirish uchun hisobvaragʻiga oʻtkaziladigan va toʻlov toʻgʻridan-toʻgʻri qarzni qaytarish, haq toʻlash topshirilgan kredit;
- kredit qaytarilishiga koʻra: toʻlash muddati uzaytirilgan, boʻlib toʻlanadigan hamda biratoʻla qaytariladigan kreditlarga boʻlinadi. Qarz hajmi va muddatining cheklanishi darajasiga koʻra *limitlangan* va

limitlanmagan kreditlarga boʻlinadi. Kreditning qaysi turi, qanday shaklda berilishidan qat'i nazar, kredit berishning asosiy tamoyillariga rioya qilinishi kerak. Ular quyidagilar:

- 1. Belgilangan muddatda qaytarilib berilishi. Bu faqat kreditning tamoyili emas, balki uning xususiyati, mohiyatini ifodalaydi. Uni pul berishning boshqa shakllari subsidiya, dotatsiya kabilardan farqi ham shunda, qaytarish boʻlmasa, kredit munosabatlari ham boʻlmaydi.
- 2. Muddatliligi. Kredit berishning bu tamoyili avvalgi tamoyil bilan chambarchas bogʻlangan. Kredit shartnomasi tuzilayotgan paytda qaytarish sharti bilan birga muddati ham koʻrsatiladi. Qarz mablagʻlaridan foydalanganligi uchun toʻlanadigan haq ham uning muddatiga bogʻliq.
- 3. Kreditdan foydalanganlik uchun haq toʻlash tamoyili. Qarz olib, birovning mablagʻini ishlatib turgani uchun ma'lum miqdorda foiz toʻlanadi. Ssuda kapitali bozorida foiz darajasi muhim rol oʻynaydi, bozordagi vaziyatni belgilaydi. Protsent stavkasi shakllanishiga bozor omillari, eng avvalo, talab va taklif, undan tashqari Markaziy bank hisob stavkasi, banklararo kredit bozoridagi foiz stavkasi, depozitlar stavkasi ta'sir etadi. Depozitlar boʻyicha stavka qancha yuqori boʻlsa, kredit uchun ham shuncha yuqori boʻladi.
- 4. Moddiy jihatdan ta'minlanganligi. Qarz oluvchi ham, qarz beruvchi ham qarzga olingan mablag'ning qaytarilishiga ishonch, ya'ni real imkoniyati borligini ifodalaydi. Agar kredit berish uchun real tovar moddiy boyliklar zaxirasi hisobga olinsa, shuning oʻzi kreditning ta'minlangani boʻladi. Agar kredit mavsumli xarajatlarni qoplash uchun berilsa, bu xarajatlar real moddiy boyliklar qiymatiga kirishi koʻzda tutiladi. Kredit savdo bitimlari uchun berilsa, shartnoma tuzilib, qarz egasiga qaytarilishi hisobga olinadi.

Kredit berishda garov olish alohida oʻrin tutadi. Kafolatli shartnoma asosida kredit jismoniy shaxslar, dehqon xoʻjaliklari, fermerlar, ijarachilarga berilishi mumkin. Bunday shartnomaga koʻra, kafolatchi qarzning qaytarilishiga kafil boʻladi, mabodo qarz olgan qaytara olmasa, kafil boʻlgan shaxs toʻlashi kerak boʻladi. Qarz shartnomasi sugʻurta kompaniyalari javobgarligi asosida ham tuzilishi mumkin.

5. Maqsadliligi. Kredit qat'iy ravishda aniq maqsad uchun beriladi. Bank kredit berish uchun qarz olayotganni uni nima maqsadda olayotgani, undan qanday foyda olishi mumkinligini tahlil qiladi. Tadbirkorlar uni «biznes-reja»da koʻrsatadilar. Kredit berayotganda, bank, albatta, uni hisobga oladi, kreditni qaytarmaslik xatarini belgilaydi.

6. Kredit berishga tabaqalashgan holda yondashish. Bu tamoyil turli qarz oluvchilarga individual tarzda yondashishni ifodalaydi. Bank qarz berib, qaytarib olmaslik xatarini hisoblab chiqib, har bir mijoz uchun qarz berish yoki bermaslik masalasini har tomonlama tahlil qilib, hal etadi.

Kreditning tarixiy rivojlanish jarayonida turli shakllari paydo boʻlib, ularning eng asosiylari *tijorat va bank kreditidir*. **Tijorat krediti** – bu korxonalar, tadbirkorlar va boshqa xoʻjalik subyektlarining bir-biriga tovar shaklida beradigan kreditidir. Bunda tovarlar qarzga beriladi. Koʻpincha, tijorat krediti veksel (qarz majburiyatnomasi) bilan hujjatlashtiriladi. Tijorat krediti cheklangan tarzda qoʻllaniladi. Uning keng tarzda qoʻllanishiga quyidagilar toʻsqinlik qiladi:

- a) qarz beruvchining zaxira mablagʻi, zaxira fondining cheklanganligi;
- b) tovar shaklida kredit ishlatilishining cheklanganligi. Aytaylik, korxona material qarz olgan boʻlsa, uni faqat ishlab chiqarish vositasi xom ashyo sifatida ishlatishi mumkin, uni ish haqi tarzida ishlata olmaydi;
- v) bu qarz ishlab chiqarish vositalari ishlab chiqaradigan korxonalardan ularni iste'mol qiladiganlarga berilishi mumkin, aksincha emas. Tijorat kreditining bu cheklanganligi bank krediti yordamida hal etiladi.

Bank krediti — bu moliya-kredit muassasalari (banklar, fondlar, assotsiatsiyalar) tomonidan har qanday xoʻjalik subyektlari (tadbirkorlar, korxonalar, tashkilotlar va boshqalar)ga pul shaklida — ssuda tarzida beriladi. Bank krediti qisqa (bir yilgacha), oʻrta (bir yildan besh yilgacha) va uzoq (besh yildan ortiq) muddatga berilishi mumkin. Kredit faqat tovar muomalasi (aylanishini)ga xizmat koʻrsatib qolmay, kapital jamgʻarilishga ham xizmat koʻrsatadi. Bank krediti bitimlar hajmi, muddati, yoʻnalishi boʻyicha cheklanmaganligi jihatidan tijorat kreditidan farq qilishi uni kreditning asosiy va ustun shakliga aylantiradi. Kreditning ulardan tashqari quyidagi shakllari mavjud:

Iste'mol krediti. Iste'mol krediti aholi ehtiyojlarini qondirishga mo'ljallangan. U tovar yoki pul shakllarida bo'lishi mumkin. Bu kredit eng avvalo uzoq muddat foydalaniladigan iste'mol tovarlarini sotib olish uchun beriladi. U tovarlar sotilayotgan do'konlar tomonidan to'lov muddatini kechiktirish yoki bank tomonidan shu maqsad uchun qarz berilishi tarzida bo'lishi mumkin. Odatda bu kredit uchun belgilanadigan foiz yuqori bo'ladi. Hozirgi paytda imtiyozli kreditlar ham berilmoqda.

Masalan, AQShda banklar iste'molchilarga kredit kartochkalari beradi, ularga narxi 2500 dollarga qadar tovarlar xarid etiladi, xarid puli

banklarga doʻkonlar bergan schotga qarab toʻlanadi. Bunday kredit gʻoyat imtiyozli boʻladi, uning foizi boshqa qarz foizidan ancha kam boʻladi, hatto foizsiz ham boʻlishi mumkin. Talabalarga oʻqish haqini toʻlashlari uchun maxsus qarz beriladi. Bu qarz uchun foiz eng koʻp boʻlganda 8 foiz qilib belgilanadi, qarz yiliga 2500 dollar, oxirgi kursda esa 5000 dollar miqdorda beriladi. Bunday qarzni talaba oʻqishni tugatib, pul topgach, uzadi. Hozirgi paytda, yakka uy-joylar qurish uchun uzoq muddatli kreditlar pul shaklidagi iste'mol kreditlaridir. Respublikamizda ham hozirgi paytda uy-joy qurish, oliy oʻquv yurtlarida oʻqish uchun imtiyozli kredit berish keng qoʻllanilmoqda.

Ipoteka krediti – koʻchmas mulk (yer, bino, uy-joy kabilar)ni garovga qoʻyib olinadigan kredit. Odatda ipoteka kreditidan asosan qishloq xoʻjaligida asosiy fondlarni yangilash uchun yirik kapital qoʻyilmalarni qoplash uchun foydalaniladi.

Davlat krediti – davlat bir tomondan qarz oluvchi, ikkinchi tomondan qarz beruvchi sifatida maydonga chiqadi. Bunda davlat krediti aholidan, firma, korxonalar, boʻladi. Davlat tashkilotlar. paydo banklardan qarz oladi. U davlatning qarzdorlik guvohnomasi boʻlib, u vaqti kelganda, qarzni uzish va foiz to'lashni kafolatlaydi. Ularni markaziy va mahalliy hokimiyatlar chiqaradilar. Qarz va uning foizi budjet hisobidan qoplanadi. Davlat qarzni eng avvalo budjet tanqisligini qoplash uchun oladi. AQShda davlat obligatsiyalari emissiya tufayli davlat qarzi 3 trln. dollardan oshib ketdi. Kredit munosabatlarida davlat faqat qarzdor vazifasini o'tamay, qarz beruvchi rolini ham bajaradi. Davlat o'z mablag'lari hisobidan bankda qarz fondini tashkil etadi, xazinadan qarz beradi. Xazina qarzi davlat budjetidan, korxona va firma, tashkilotlarga ularning moliyaviy sanatsiyasi (sogʻlomlashtirish) uchun sarflanadi.

Bu qarz ham ma'lum muddatga, qaytarib berish va foiz to'lash sharti bilan beriladi. Foiz g'oyat imtiyozli bo'lib, daromad olishni ko'zlamaydi. Davlat o'z qarzidan voz kechishi ham mumkin.

Xoʻjaliklararo pul krediti xoʻjalik yurituvchi subyektlarning birbiriga beradigan krediti. Korxona, tashkilotlar aksiya, obligatsiya, kredit biletlari va boshqa qimmatbaho qogʻozlar chiqarish orqali beradi. Bu operatsiyalar korxonalarni markazlashtirilmagan moliyalashtirish (aksiya chiqarish) va kreditlash (obligatsiya va boshqa qimmatbaho qogʻozlar) degan nom olgan.

Xalqaro kredit – bu ssuda kapitalining xalqaro miqyosdagi harakatidir. Xalqaro kredit tovar yoki pul (valuta) shaklida beriladi. Qarz

beruvchilar va qarz oluvchilar banklar, xususiy firmalar, davlat organlari, hukumatlar, yirik korporatsiyalar, xalqaro va regional tashkilotlari boʻlib, ularning kredit berish shartlari bir-birinikidan jiddiy farq qilishi mumkin.

Oʻzbekiston Respublikasi Prezidentining farmoniga binoan fuqarolarning banklar depozitlaridagi omonatlari ularning miqdoridan qat'i nazar, davlat tomonidan toʻla kafolatlanadi. Bugungi kunda mamlakatimiz bank tizimi kapitalining etarlilik darajasi Bank nazorati boʻyicha xalqaro Bazel qoʻmitasi talablari asosida belgilangan xalqaro standartlardan qariyb uch barobar koʻp ekanini ta'kidlash joiz.

Hozirgi vaqtda respublikamiz bank tizimining umumiy joriy likvidligi dollar hisobida 1,5 milliard dollardan ortiq. Bu tashqi nodavlat qarzlar boʻyicha toʻlanishi kerak boʻlgan toʻlovlar hajmidan 10 barobar koʻpdir. Bu esa bizda likvidlik, ya'ni toʻlovlarga qodirlik darajasi boʻyicha muammo yoʻq, deb aytish uchun asos beradi.

Xalqaro moliyaviy institutlar bilan hamkorlikni mustahkamlash, ularning kredit tarmoqlarini jalb qilish orqali banklarning investitsion jarayonlardagi ishtirokini kengaytirish maqsadida respublika tijorat banklari tomonidan xalqaro reyting kompaniyalarining kreditga layoqatlilik reytinglarini olish boʻyicha tegishli ishlar amalga oshirildi.

Shuni alohida qayd etish lozimki, 2008-yilning aprel oyida Oʻzbekiston bank tizimiga nufuzli xalqaro reyting kompaniyalaridan biri – «Mudis» reyting agentligi tomonidan xalqaro reyting bahosi berilganligi mamlakatimiz moliya tizimining barqarorligidan dalolat beradi. Xususan, «Mudis» agentligi biryoʻla uchta yoʻnalish boʻyicha respublika bank tizimiga «barqaror» reyting bahosini berdi. «Mudis» xalqaro reyting agentligining hisobotida ta'kidlanishicha, agentlikning ijobiy bahosi mustahkam bank nazorati tizimida, bank sektorining yuqori oʻsish potensialida, moliya tizimining tarkibiy oʻzgarishi va milliy iqtisodiyotning yuqori darajada oʻsishida oʻz ifodasini topdi.

Bundan tashqari, 2008-yilda tijorat banklari tomonidan xalqaro reyting olish uchun «Mudis», «Fitch Reytings», «Standart end Purs», «Tompson Faynenshl Bank Votch», «Japan Kredit Reyting Ejensi», «Reyting Ejensi Malayziya» kabi nufuzli xalqaro reyting kompaniyalari bilan oʻzaro hamkorlik ishlari davom ettirildi. 2008-yilda respublikamizda faoliyat yuritayotgan tijorat banklarining 12 tasi xalqaro «Mudis», «Fitch Reytings» va «Standart end Purs» reyting kompaniyalarining «barqaror» reyting bahosini olishga erishdilar (2-jadval).

Xalqaro reyting kompaniyalarining «barqaror» reyting
bahosini olgan banklar

«Mudis»	«Fitch reyting»	«Standart end Purs»
TIF Milliy bank	Oʻzsanoatqurilish bank	TIF Milliy bank
Ipoteka bank	Paxta bank	Kapital bank
Gʻalla bank	Asaka bank	
Aloqa bank	Hamkor bank	
«Turon» bank	«Ipak yoʻli» bank	
Kredit standart bank		

Shuningdek, xalqaro amaliyot negizida banklar tomonidan chiqarilgan qimmatli qogʻozlarning milliy individual reyting tizimini joriy etish maqsadida, Oʻzbekiston banklari assotsiatsiyasi tomonidan Markaziy bank hamda qimmatli qogʻozlar bozori faoliyatini muvofiqlashtirish va nazorat qilish markazi bilan kelishilgan holda tegishli choratadbirlar dasturi ishlab chiqilgan. Shunga muvofiq, 2008-yil davomida «Axbor-Reyting» milliy reyting agentligi tomonidan 21 ta tijorat bankiga turli darajadagi reyting baholari berildi.

2008-yilda tijorat banklarining kapitallashuv darajasini yanada oshirish, barqarorligini ta'minlash, investitsiya jarayonlarida ishtirokini yanada kengaytirish, ularning erkinligini mustahkamlashga alohida e'tibor qaratildi.

Kreditning obyekti har qanday pul emas, balki oʻz egalari qoʻlidagi boʻsh qolgan pullardir. Kredit takror ishlab chiqarishga xizmat qilishi kerak. Kredit iqtisodiy oʻsishning shartidir. Iqtisodiy oʻsish ommaviy farovonlikni ta'minlashga xizmat qiladi. Shu bois ham, moliya-kredit sohasidagi jinoyatchilikka yoʻl qoʻymaslik huquqni muhofaza qiluvchi organlar xodimlarining vazifalaridan biri hisoblanadi. Faqatgina yuksak ma'naviyatli xodimlar bank-kredit sohasidagi moliyaviy resurslarni suiiste'mol qilishga yoʻl qoʻymaydilar. Huquqni muhofaza qiluvchi organlar mutaxassislarining ma'lumotlariga koʻra, 2002–2007-yillarda ayrim shaxslar respublikamiz iqtisodiyotida 530,7 milliard soʻm mablagʻni oʻzlashtirib yuborganlar. Prokuratura organlarining aralashuvi bilan aybdorlar tomonidan yetkazilgan zararning 435 milliard soʻmi, ya'ni 78 foizi qoplangan. Koʻrinib turibdiki, bu summa iqtisodiy oʻsishga emas,

balki ayrim shaxslar manfaatlariga xizmat qilgan. Aybdorlarning aksariyati rahbar xodimlardir. Bunday insonlar respublikamizda amalga oshirilayotgan islohotlar gʻoyasini obroʻsizlantiradi. Shu bois, bu borada joylarda tegishli tushuntirish ishlarini olib borish maqsadga muvofiqdir.

Oʻzbekiston Respublikasi Prezidenti Islom Karimovning Oʻzbekiston Respublikasi Oliy Majlisi Qonunchilik palatasi va Senatining qo'shma (2010-yil 12-noyabr) «Mamlakatimizda majlisidagi islohotlarni yanada chuqurlashtirish va fuqarolik jamiyatini rivojlantirish konsepsiyasi» nomli ma'ruzasida: «Jahon moliyaviy-iqtisodiy inqirozi davrida mamlakatimiz moliya-bank tizimi oʻzining barqaror va ishonchli ekanini isbotladi. Shu bilan birga, bu tizimning yanada mustahkamlanishi xususiy banklar va xususiy mulkka asoslangan lizing, sugʻurta kompaniyalari, kredit uyushmalari, mikromoliyaviy tashkilotlar kabi moliyaviy institutlarni tashkil etishning qonunchilik asoslarini shakllantirish hisobidan bank-moliya sohasiga xususiy kapitalni jalb qilish bilan ham bogʻliq. Bu esa bank va boshqa moliyaviy xizmatlar bozorida raqobatning kengayishi hamda mijozlarga xizmat koʻrsatish sifatining oshishiga imkon beradi va eng yuksak xalqaro standartlar talabiga mos zamonaviy bozor infratuzilmasining rivojlanishi uchun sharoit yaratadi.

Ta'kidlash kerakki, «Standart End Purs», «Mudis» va «Fitch Reytings» kabi nufuzli xalqaro reyting agentliklari ikki yildan buyon Oʻzbekiston bank tizimiga muttasil ravishda «barqaror» reyting darajasini bermoqda, ayni paytda mamlakatimizning shunday bahoga sazovor boʻlgan banklari soni yildan-yilga ortib bormoqda. Agar 2010-yilda mamlakatimizning 15 ta tijorat banki «barqaror» reytingini olgan boʻlsa, hozirgi kunda ularning soni 23 taga yetdi, bu banklarning aktivlari yurtimiz bank tizimi umumiy aktivlarining 98 foizini tashkil etmoqda.

Ma'lumki, aholining bank tizimiga ishonchi ortib borayotgani banklar faoliyati samaradorligining muhim koʻrsatkichi hisoblanadi. Shu ma'noda, 2011-yilda depozitlarga 18 trillion soʻmdan ortiq, oʻtgan yilga nisbatan 36,3 foiz koʻp mablagʻ jalb qilingani, jumladan, aholi depozitlari 38,8 foizga oshgani ayniqsa e'tiborlidir.

Banklarning kredit portfeli tarkibi sifat jihatidan tubdan oʻzgarmoqda. Agar 2000-yilda kredit portfelining 54 foizi tashqi qarzlar hisobidan shakllantirilgan boʻlsa, 2011-yilda uning 85,3 foizi ichki

manbalar – yuridik va jismoniy shaxslar depozitlari hisobidan shakllantirildi. Bu esa, oʻz navbatida, iqtisodiyotimiz tarmoqlariga investitsiya kiritish va shuning hisobidan taraqqiyotimizni ta'minlashda ichki imkoniyatlarimiz tobora ortib borayotganining dalilidir.

Tijorat banklarining investitsiyaviy faolligi ortmoqda. Tijorat banklari qoʻyilmalarining 75 foizdan ortigʻini uch yildan ziyod boʻlgan uzoq muddatli investitsiya kreditlari tashkil etmoqda. Umuman, soʻnggi oʻn yilda banklarimiz tomonidan iqtisodiyotning real sektorini kreditlash 7 barobar oshganini alohida qayd etish lozim, deb oʻylayman. Bizning iqtisodiy nochor korxonalarni banklar balansiga oʻtkazib, ularni sogʻlomlashtirish borasida qoʻllagan noan'anaviy yondashuvimiz oʻzini oqladi va samaradorligini koʻrsatdi, deb bugun toʻla asos bilan aytishimiz mumkin.

Hozirgi paytda banklarga berilgan 164 ta bankrot korxonadan 156 tasida ishlab chiqarish faoliyati toʻliq tiklandi, 110 ta korxona yangi investorlarga sotildi. Bunday korxonalarni texnik qayta jihozlash va modernizatsiya qilish ishlariga tijorat banklari tomonidan 275 milliard soʻm miqdorida investitsiya kiritildi, natijada 22 mingdan ziyod ish oʻrni yaratildi»¹, – deb ta'kidladi.

Hozirgi vaqtda yana bir muhim masala — mamlakatimiz iqtisodiyotida kichik biznes, birinchi navbatda, xususiy tadbirkorlikning roli va ulushini yanada kengaytirishni ta'minlay oladigan qonunlarni qabul qilish masalasi biz uchun dolzarb boʻlib qolmoqda.

Oʻzbekistonning bu yilgi yalpi ichki mahsulotida kichik biznesning ulushi 50 foizdan ortib borayotganiga qaramasdan, afsuski, bu soha real iqtisodiyotimizda, avvalambor sanoatda yetakchi oʻrinni egallay olmayapti. Ushbu vazifani hal etish uchun «**Tadbirkorlik faoliyati erkinligining kafolatlari toʻgʻrisida»gi Qonunning** yangi tahririni tayyorlash zarur. Bu qonunda kichik biznes va xususiy tadbirkorlik subyektlarini tashkil qilish yoʻllarini soddalashtirish, ularning faoliyati uchun koʻproq erkinliklar berishni koʻzda tutish lozim. Ushbu sektorni kreditlash, resurslardan foydalanish, **davlat buyurtmalarini olish**, tadbirkorlik subyektlari ishlab chiqarayotgan mahsulotlarni sotish uchun yangi imtiyozlar berish, xalqaro amaliyotga muvofiq daromadlarning

 $^{^{1}}$ *Каримов И. А.* 2012 йил Ватанимиз тараққиётини янги босқичга кўтарадиган йил бўлади. – Т.: «Ўзбекистон», 2012. – Б. 5.

yillik deklaratsiyasi shakliga bosqichma-bosqich oʻtish, moliya va statistika hisobotlari tizimini yanada soddalashtirish, jumladan, bunday hisobotlarni vakolatli davlat organlariga elektron shaklda taqdim etish kabi mexanizmlar hisobidan qoʻllab-quvvatlash masalalari ham qonunda oʻz aksini topishi darkor»ligiga alohida e'tibor qaratmoqda.

5. Davlat budjeti, uning shakllanishi va sarflanishi

Moliya tizimida budjet tizimi alohida oʻrinni egallaydi. Oʻzbekiston Respublikasi budjet tizimining asosiy vazifalari 2000-yil 14-dekabrda qabul qilingan «Budjet tizimi toʻgʻrisida"gi qonunda aniq belgilab berilgan.

Oʻzbekiston Respublikasi budjet tizimi turli darajadagi budjetlar va budjet mablagʻlari oluvchilar yigʻindisini; budjetlarni tashkil etish va tuzishni, tuzish prinsiplarini; budjet jarayonida ular oʻrtasida, shuningdek, budjetlar hamda budjet mablagʻlari oluvchilar oʻrtasida vujudga keladigan oʻzaro munosabatlarni oʻzida ifodalaydi.

Moliya muayyan yilga moʻljallangan barcha darajadagi budjetlarni shakllantirish, koʻrib chiqish, qabul qilish va ularning ijrosi hisobini yuritish Oʻzbekiston Respublikasining milliy valutasi — soʻmda amalga oshiriladi.

Budjet tizimining asosiy prinsiplari quyidagilardan iborat:

- budjet tasnifi tizimi, hisob-budjet hujjatlari va budjet jarayoni tuzilishining yagonaligi;
- budjet tuzilishining Oʻzbekiston Respublikasi ma'muriy-hududiy tuzilishiga muvofiqligi;
 - turli darajadagi budjetlarning oʻzaro bogʻliqligi;
 - davlat budjeti balansliligi;
- davlat daromadlarini aniq manbalar va xarajatlarning yoʻnalishlari (moddalari) boʻyicha rejalashtirish;
- davlat budjeti xarajatlarini budjetdan ajratiladigan, tasdiqlangan mablagʻ doirasida sarflash;
 - barcha darajadagi budjetlarning mustaqilligi.
- Davlat budjeti respublika budjetini, Qoraqalpogʻiston Respublikasi budjetini va mahalliy budjetlarni oʻz ichiga oladi.

Davlat budjeti tarkibida davlat maqsadli jamgʻarmalari jamlanadi. Qoraqalpogʻiston Respublikasi budjeti mazkur respublika budjeti hamda respublikaga (Qoraqalpogʻistonga) boʻysunuvchi tumanlar va shaharlar budjetlarini oʻz ichiga oladi.

Viloyatning budjeti viloyat budjetini, viloyatga boʻysunuvchi tumanlar va shaharlar budjetlarini oʻz ichiga oladi. Tumanlarga boʻlinadigan shaharning budjeti shahar budjeti va shahar tarkibiga kiruvchi tumanlar budjetlarini oʻz ichiga oladi.

Tumanga boʻysunadigan shaharlari boʻlgan tumanning budjeti tuman budjeti va tuman boʻysunuvidagi shaharlar budjetlarini oʻz ichiga oladi.

Davlat budjeti daromadlari:

- 1) qonun hujjatlarida belgilangan soliqlar, yigʻimlar, bojlar va boshqa majburiy toʻlovlar;
- 2) davlatning moliyaviy va boshqa aktivlarining joylashtirilishi, foydalanishga berilishi va sotilishidan olingan daromadlar;
- 3) qonun hujjatlariga muvofiq, meros olish, hadya etish huquqi boʻyicha davlat mulkiga oʻtgan pul mablagʻlari;
- 4) yuridik va jismoniy shaxslardan, shuningdek chet el davlatlaridan kelgan qaytarilmaydigan pul tushumlari;
- 5) rezident yuridik shaxslarga va chet el davlatlariga berilgan budjet ssudalarini qaytarish hisobiga tushadigan toʻlovlar;
- 6) qonun hujjatlarida taqiqlanmagan boshqa daromadlar hisobidan shakllantiriladi.

Davlat budjeti xarajatlari tasdiqlangan budjetdan mablagʻ ajratish doirasida quyidagi shakllarda amalga oshiriladi:

- 1) budjet mablagʻlari oluvchilarning joriy xarajatlari shaklida;
- 2) joriy budjet transfertlari shaklida;
- 3) kapital xarajatlari shaklida:
- asosiy fondlar va vositalarni (ular bilan bogʻliq ishlar va xizmatlar ham shular jumlasiga kiradi) davlat ehtiyojlari uchun olish va takror ishlab chiqarishga;
 - chet elda davlat ehtiyojlari uchun yer va boshqa mol-mulk olishga;
- davlat ehtiyojlari uchun yerga boʻlgan huquqni va boshqa nomoddiy aktivlarni olishga;
 - davlat zaxiralarini vujudga keltirishga;
- 4) kapital xarajatlarni qoplash uchun yuridik shaxslarga beriladigan budjet transfertlari shaklida;

- 5) rezident yuridik shaxslarga va chet el davlatlariga beriladigan budjet ssudalari shaklida;
- 6) davlat maqsadli jamgʻarmalariga beriladigan budjet dotatsiyalari va budjet ssudalari shaklida;
- 7) davlat qarzini qaytarish va unga xizmat koʻrsatish boʻyicha toʻlovlar shaklida;
 - 8) qonun hujjatlarida taqiqlanmagan boshqa xarajatlar shaklida.

Oʻzbekiston Respublikasi Moliya vazirligi Davlat budjeti loyihasini budjet mablagʻlari oluvchilar taqdim etgan buyurtmalarga va Davlat budjetining tuzilmasiga kiruvchi budjetlar loyihalariga muvofiq tayyorlaydi. Davlat budjeti Oʻzbekiston Respublikasi Oliy Majlisi tomonidan tasdiqlanadi.

Davlat budjetiga muvofiq: Qoraqalpogʻiston Respublikasi budjeti, viloyatlar va Toshkent shahri budjetlari — Davlat budjeti qabul qilinganidan keyin ikki haftalik muddat ichida tegishli ravishda Qoraqalpogʻiston Respublikasi Joʻqorgʻi Kengesi hamda viloyatlar va Toshkent shahar hokimiyati vakillik organlari tomonidan;

Qoraqalpogʻiston Respublikasi va viloyatlar tarkibiga kiruvchi tumanlar va shaharlar budjetlari — Qoraqalpogʻiston Respublikasi va viloyatlar budjetlari qabul qilinganidan keyin bir haftalik muddat ichida tuman, shahar hokimiyat vakillik organlari tomonidan;

shaharlar tarkibiga kiruvchi tumanlar budjetlari va tuman boʻysunuvidagi shaharlar budjetlari – belgilangan muddatlarda mahalliy hokimiyat yuqori turuvchi vakillik organlari tomonidan qabul qilinadi.

Davlat budjeti davlat tomonidan iqtisodiy sohani tartibga solishga qaratilgan eng muhim mexanizmlardan biridir. Zero, har qanday jamiyatning iqtisodiy tizimini shakllantirish va rivojlantirishda davlat budjeti asosiy oʻrin tutadi. Davlat budjeti daromadlari va xarajatlari siyosati oʻzaro uzviy bogʻliq. Ya'ni, daromad boʻlmasa, ijtimoiyiqtisodiy, ilmiy, texnik va boshqa sohalarni qoʻllab-quvvatlash, rivojlantirish uchun moliyaviy mablagʻ ajratish imkoni boʻlmaydi. Shu bois, bugungi kunda davlatimiz oldiga qoʻyilgan muhim vazifalardan biri — xalqimiz va davlat manfaatlariga mos keladigan hamda ishlab chiqarishni rivojlantirishga qodir moliya-kredit, pul siyosatini toʻgʻri yoʻlga qoʻyishdir.

Oliy Majlis Senati tomonidan ma'qullangan **O'zbekiston** Respublikasining 2013-yilgi Davlat budjetidagi asosiy makroiqtisodiy koʻrsatkichlar prognozi Prezidentimiz tomonidan belgilab berilgan mamlakatni iqtisodiy va ijtimoiy rivojlantirishning eng muhim ustuvor vazifalari negizida ishlab chiqildi. Unda respublikaning 2013-yilgi asosiy makroiqtisodiy koʻrsatkichlari, soliq-budjet siyosatining yoʻnalishlari va Davlat budjeti parametrlari belgilab qoʻyildi. Chunonchi, 2013-yilda soliq siyosatiga barqaror iqtisodiy o'sish, iqtisodiyot va uning alohida tarmoqlari hamda hududlarining makroiqtisodiy va moliyaviy jihatdan muvofiq boʻlishi, aholi turmush darajasining o'zaro ta'minlashga qaratilgan strategik maqsadlar asos qilib olingan. Bunda kichik biznes va xususiy tadbirkorlik subyektlarini qoʻllab-quvvatlash, rivojlantirish, ularning raqobatbardoshligini oshirish va yangi ish joylari yaratishni ragʻbatlantirish maqsadida soliq yukini pasaytirish koʻzda tutilgan.

Keyingi yillarda tadbirkorlik subyektlarini «bir darcha» orqali tezlik bilan davlat roʻyxatidan oʻtkazish tizimi hamda bir necha turdagi soliqlarni toʻlash oʻrniga kichik biznesni yagona soliq toʻlovi shaklidagi soddalashtirilgan soliqqa tortish tizimi joriy etildi. Bunda mikrofirmalar va kichik korxonalar uchun yagona soliq toʻlovi stavkalari 2005-yilda 13 foiz, 2008-yilda 10 foizdan 8 foizgacha, 2009-yildan boshlab esa 7 foizgacha pasaytirilgan boʻlsa, bu koʻrsatkich 2011-yildan 6 foizga tushirildi. 2012-yilda esa 5 foizga tushirildi. Demak, soʻnggi besh yil ichida tadbirkorlik faoliyati bilan shugʻullanuvchi yuridik va jismoniy shaxslar daromadidan olinadigan qat'iy belgilangan soliq miqdori qariyb 2,2 barobarga kamaytirildi.

Sanoat mahsulotlarini ishlab chiqarish sohasidagi kichik biznes va xususiy tadbirkorlikning jadal rivojlanishi uchun qulay shart-sharoitlar yaratish va shu asosda aholi bandligini ta'minlashga e'tibor qaratildi. Shu bilan birga, jismoniy shaxslardan olinadigan daromad soligʻi stavkalarini pasaytirish hisobiga aholi daromadlarini koʻpaytirish nazarda tutildi.

Kredit tashkilotlariga jismoniy shaxslar omonatlarini jalb qilishda teng shart-sharoit yaratish va depozitlar bozoridagi raqobatni rivojlantirish hamda mikromoliyalashtirishni ragʻbatlantirish, bankdan tashqari moliya institutlari faoliyatini qoʻllab-quvvatlash maqsadida kredit uyushmalaridagi depozit qoʻyilmalar boʻyicha olingan daromadlarni jismoniy

shaxslardan olinadigan daromad soligʻidan ozod qilish belgilangan. Davlat budjeti taqchilligi 491,6 mlrd. soʻmni yoki YAIM hajmining 1 foizini tashkil qiladi.

Hozirgi kunda jahon iqtisodiy inqirozi keskin tus olgan, shunga qaramay, mamlakatimizning 2011-yilga moʻljallangan Davlat budjetida ijtimoiy sohaga doir xarajatlar miqdori kamaytirilgan emas. U budjet xarajatlarining 58,7 foizini tashkil etadi. 2012-yilda bu koʻrsatkich 60 foizni tashkil etilishi nazarda tutilgan.

Muxtasar aytganda, davlat budjeti – davlatimiz iqtisodiy siyosatini belgilovchi asosiy moliyaviy hujjat boʻlib, u iqtisodni tartibga solishga, ishlab chiqarishning barqaror oʻsishini ta'minlashga, kam ta'minlangan oilalarni koʻllab-quvvatlash va xalqimiz farovonligini yanada oshirishga xizmat qiladi.

5.1. Budjet kamomadi va profitsiti. Davlat qarzlari. Ularning ijtimoiy-iqtisodiy oqibatlari

Davlat budjetining daromadlari va xarajatlari muvozanatda boʻlishini taqozo qiladi. Lekin koʻpchilik hollarda davlat budjeti xarajatlarining daromadlardan ortiqchaligi kuzatiladi, buning oqibatida budjet taqchilligi tez sur'atlar bilan oʻsadi. Bu holning sabablari koʻp boʻlib, ularning ichida, davlatning jamiyat hayotining barcha sohalaridagi rolining uzluksiz oʻsib borishi, uning iqtisodiy va ijtimoiy vazifalarining kengayishi alohida oʻrin tutadi.

Budjet taqchilligining oʻsishi mutlaq miqdorda va uning yalpi milliy mahsulot (YAMM)ga nisbatida aniq namoyon boʻladi. 2002-yilda Respublikamiz davlat budjetining taqchilligi YAIMga nisbatan bir foizdan oshmagan¹. Budjet taqchilligining oʻzgarishi xoʻjalik konyukturalaridagi joriy tebranishlar, ishlab chiqarishdagi davriy inqiroz va yuksalishlarni ham aks ettiradi, krizislar davrida davlat budjet mablagʻlari hisobidan iqtisodiyotning ma'lum sektorlarini ushlab turishga, umumdavlat ahamiyatiga ega boʻlgan tarmoqlarda investitsiyalar hajmini saqlab turishga majbur boʻladi.

 $^{^1}$ *Каримов И. А.* Иқтисодиётни эркинлаштириш ва ислоҳотларни чуқурлаштириш – энг муҳим вазифамиз. – Халқ сўзи. – 2000. – 15 фев.

Budjet taqchilligini moliyalashtirish (qoplash)ning muhim sharoiti davlat krediti boʻlib chiqadi. *Davlat krediti* deganda, davlat qarz oluvchi yoki kreditor sifatida chiqadigan barcha moliyaviy iqtisodiy munosabatlar yigʻindisi tushuniladi. Moliyaviy resurslarni davlat qarz olishning asosiy shakli – bu davlat zayomlarini chiqarish hisoblanadi. Ularni joylashtirish jarayonida davlat aholi, banklar, savdo va sanoat kompaniyalarining vaqtincha boʻsh turgan pul mablagʻlarini jalb qiladi.

Davlat oʻz majburiyatlarini nafaqat xususiy sektorda joylashtirishi, balki ularni Markaziy bankda hisobga olishi ham mumkin. Bunda bank muomalaga pulning tovar hajmining koʻpayishi bilan bogʻliq boʻlmagan qoʻshimcha massasini chiqaradi. Mazkur holda, davlat budjetini moliyalashtirish pul muomalasiga toʻgʻridan-toʻgʻri inflyatsion ta'sir koʻrsatadi. Pul massasining oʻsishi jamiyat haqiqiy boyligining koʻpayishi bilan birga bormaydi.

Davlat qarzlarining toʻxtovsiz koʻpayib borishi, milliy daromadni foiz toʻlovlari shaklida, tobora koʻproq qayta taqsimlanishiga olib keladi. Katta budjet taqchilligi va davlat majburiyatlari boʻyicha foiz toʻlovlari oʻsish sharoitida, davlat qarzlarini toʻlash vaqtini imkon darajada choʻzishga harakat qiladi. Buning uchun turli xil usullardan foydalanish mumkin. Jumladan, davlat oʻzining qisqa muddatli majburiyatlarini, oʻrta va uzoq muddatli zayomlarga almashtiradi. U oʻzining qisqa muddatli majburiyatlarini, ancha yuqori foiz boʻyicha yangi, uzoq muddatli zayomlar chiqarish hisobiga ham sotib olish mumkin. Bunday turdagi tadbirlar qisqa davrli samara berishi va vaqtincha davlatning moliyaviy ahvolini yengillatishi mumkin, chunki u odatda kelgusida foiz stavkasining oshishi va qarzlar umumiy miqdorining oʻsishi bilan bogʻliq.

Xoʻjalik hayotida baynalminallashuv jarayonlarining tez oʻsishi, xalqaro kreditning jadal rivojlanishi natijasida davlat oʻziga zarur boʻlgan moliyaviy resurslarni jalb qilish uchun, boʻsh pul mablagʻlarining milliy chegaradan tashqaridagi manbalaridan faol foydalanadi. Buning natijasida tashqi qarz vujudga keladi.

Shunday qilib, davlat zarur moliyaviy resurslarini ham ssuda kapitallarining milliy bozoridan ham va tashqi bozoridan qarz oladi. Xalqaro kreditning tez oʻsishi kapitalning mamlakatlararo migratsiyasi, mamlakat va regionlar iqtisodiy oʻzaro bogʻliqligi chuqurlashuvining muqarrar natijasi hisoblanadi. Xalqaro kredit moliyaviy resurslarni ham

xususiy sektorning ehtiyojlarini qondirish, davlat budjeti taqchilligini qoplash uchun jalb qilish imkoniyatini sezilarli kengaytiradi. Shu bilan birga, tashqi qarzlarning oʻsishi bir qator boshqa muammolarni keltirib chiqaradi. Ulardan asosiysi, milliy vositalar bilan nazorat qilib boʻlmaydigan ham kreditor, ham debitor mamlakatlar iqtisodiyotining kuchayib boruvchi bogʻliqligidir.

Oʻzbekiston iqtisodiyotining barqaror va mutanosib rivojlanib borayotganini 2005-yildan boshlab davlat budjeti profitsit bilan bajarilayotgani ham yaqqol tasdiqlab turibdi. Quyidagi jadvalga qarang.

3-jadval

Davlat budjeti koʻrsatkichlarining YAIMga nisbatan tendensiyasi (foizda¹)

Yillar	Davlat budjeti koʻrsatkichlarining Ijrosi
2000	1,0
2001	1,0
2002	0,8
2003	0,4
2004	0,4
2005	0,1
2006	0,5
2007	1,1
2008	1,5
2009	0,2
2010	0,3

Bu borada erishilgan yutuqlar haqida davlatimiz rahbari Islom Karimovning Vazirlar Mahkamasining 2011-yil asosiy yakunlari va 2012-yilda Oʻzbekistonni ijtimoiy-iqtisodiy rivojlantirishning ustuvor yoʻnalishlariga bagʻishlangan majlisidagi ma'ruzasidan quyidagi ma'lumotlarni keltirishni oʻrinli deb bildik²: «2011-yilda Davlat budjetining xarajatlar qismi 2010-yilga nisbatan 25,4 foizga, 2000-yilga nisbatan esa qariyb 17,8 barobar oʻsdi. Qayd etish joizki, davlat budjeti

¹ Ўзбекистон Республикаси Давлат статистика қўмитасининг тегишли йиллар бўйича статистик тўпламлари асосида тузилган.

 $^{^2}$ *Каримов И. А.* 2012 йил Ватанимиз тараққиётини янги босқичга кўтарадиган йил бўлади. – Т.: «Ўзбекистон», 2012. – Б. 5.

xarajatlarining 58,7 foizi ijtimoiy sohani moliyalash va aholining kam ta'minlangan qatlamlarini qo'llab-quvvatlashga yo'naltirildi.

Mana bu raqamlarga alohida e'tiboringizni jalb etmoqchiman. 2012-yilning 1-yanvar holatiga koʻra, mamlakatimizning umumiy tashqi qarzi yalpi ichki mahsulotning 17,5 foizidan, eksport hajmiga nisbatan esa 53,7 foizdan oshmaydi. Bu xalqaro mezonlar boʻyicha «Har jihatdan maqbul holat» deb hisoblanadi.

Bularning barchasi mustaqilligimizning ilk yillaridan boshlab ham davlat, ham tijorat banklari, kompaniya va korxonalar miqyosida har tomonlama puxta oʻylangan chetdan qarz olish siyosatini amalga oshirib kelayotganimiz bilan bogʻliq ekanini, oʻylaymanki, tushunish, anglash qiyin emas. 2011-yilda banklarning kapitallashuvi, ularning barqarorligi va likvidligini yanada mustahkamlashga qaratilgan izchil va aniq maqsadli chora-tadbirlar amalga oshirildi.

Oxirgi besh yil davomida mamlakatimiz bank sektori kapitalining yetarlilik darajasi bank nazorati boʻyicha Bazel qoʻmitasi tomonidan 8 foiz etib belgilangan xalqaro me'yordan uch barobar koʻp boʻlgan darajani tashkil etmoqda. Shuni mamnuniyat bilan ta'kidlash kerakki, «Standart End Purs», «Mudis» va «Fitch Reytings» kabi nufuzli xalqaro reyting agentliklari ikki yildan buyon Oʻzbekiston bank tizimiga muttasil ravishda «barqaror» reyting darajasini bermoqda, ayni paytda mamlakatimizning shunday bahoga sazovor boʻlgan banklari soni yildanyilga ortib bormoqda.

Agar 2010-yilda mamlakatimizning 15 ta tijorat banki «barqaror» reytingini olgan boʻlsa, hozirgi kunda ularning soni 23 taga yetdi, bu banklarning aktivlari yurtimiz bank tizimi umumiy aktivlarining 98 foizini tashkil etmoqda. Ma'lumki, aholining bank tizimiga ishonchi ortib borayotgani banklar faoliyati samaradorligining muhim koʻrsatkichi hisoblanadi. Shu ma'noda, 2011-yilda depozitlarga 18 trillion soʻmdan ortiq, oʻtgan yilga nisbatan 36,3 foiz koʻp mablagʻ jalb qilingani, jumladan, aholi depozitlari 38,8 foizga oshgani ayniqsa e'tiborlidir.

Banklarning kredit portfeli tarkibi sifat jihatidan oʻzgarmoqda. Agar 2000-yilda kredit portfelining 54 foizi tashqi qarzlar hisobidan shakllantirilgan bo'lsa, 2011-yilda uning 85,3 foizi ichki yuridik va jismoniy shaxslar depozitlari hisobidan manbalar shakllantirildi. Bu esa, o'z navbatida, iqtisodiyotimiz tarmoqlariga investitsiya kiritish va shuning hisobidan taraqqiyotimizni ta'minlashda ichki imkoniyatlarimiz tobora ortib borayotganining dalilidir. Tijorat faolligi banklarining investitsiyaviy ortmoqda. **Tijorat** banklari qoʻyilmalarining 75 foizdan ortigʻini uch yildan ziyod boʻlgan uzoq muddatli investitsiya kreditlari tashkil etmoqda. Umuman, soʻnggi oʻn yilda banklarimiz tomonidan iqtisodiyotning real sektorini kreditlash 7 barobar oshganini alohida qayd etish lozim, deb oʻylayman.

Bizning iqtisodiy nochor korxonalarni banklar balansiga oʻtkazib, ularni sogʻlomlashtirish borasida qoʻllagan noan'anaviy yondashuvimiz oʻzini oqladi va samaradorligini koʻrsatdi, deb bugun toʻla asos bilan aytishimiz mumkin.

Hozirgi paytda banklarga berilgan 164 ta bankrot korxonadan 156 tasida ishlab chiqarish faoliyati toʻliq tiklandi, 110 ta korxona yangi investorlarga sotildi. Bunday korxonalarni texnik qayta jihozlash va modernizatsiya qilish ishlariga tijorat banklari tomonidan 275 milliard soʻm miqdorida investitsiya kiritildi, natijada 22 mingdan ziyod ish oʻrni yaratildi».

Davlat moliyasi uning xarajatlarini ham bildiradi, bular budjet xarajatlaridan iborat. Davlat xarajatlari uning daromadiga qarab shakllanadi va quyidagi yoʻnalishda boradi:

- **1. Ijtimoiy soha xarajatlari.** Bular ta'lim-tarbiya, sog'liqni saqlash, jismoniy tarbiya va sport, madaniyat, atrof-muhitni muhofaza qilish, ijtimoiy yordam ko'rsatish sarflari.
- **2. Investitsiya xarajatlari.** Bu davlat hisobidan ijtimoiy-madaniy obyektlarni, ishlab chiqarish infratuzilmasi va kommunikatsiya tizimini yaratish uchun pul sarflash.
- **3. Milliy xavfsizlik va ichki tartibni saqlash xarajatlari.** Bular jumlasiga politsiya (militsiya), xavfsizlik organlari, sud va prokuratura xarajatlari kiradi.
- **4. Boshqarish xarajatlari.** Bular jumlasiga markaziy va mahalliy hokimiyat organlari ishini ta'minlash sarflari kiradi.
- **5. Tashqi qarzni uzish xarajatlari.** Bu toʻlash muhlati kelgan qarzning oʻzini qaytarish, qarz yuzasidan beriladigan foizlarni toʻlash xarajatlari. Bu xarajat qarzning miqdoriga, qaysi paytda qaytarilishiga va foizning miqdoriga qarab oʻzgarib turadi va budjetda koʻrsatiladi.

5.2. Mustaqillik yillarida Oʻzbekistonning bank-moliya sohasida asosiy koʻrsatkichlari

1995-yilda qabul qilingan «Oʻzbekiston Respublikasi Markaziy banki toʻgʻrisida»gi qonun nafaqat bank tizimining huquqiy asoslarini mustahkamladi, balki Markaziy bankning alohida maqomi, maqsad va

vazifalari hamda vakolatlarini aniq belgilab berdi. 1996-yilda qabul qilingan Oʻzbekiston Respublikasining «Bank va bank faoliyati toʻgʻrisida»gi qonuni bank tizimidagi ikkinchi bosqich institutlari – tijorat banklari faoliyatining huquqiy jihatlarini belgilab berdi. 1997-yilda Oʻzbekiston Respublikasi Prezidentining «Xususiy tijorat banklarini tashkil qilishni ragʻbatlantirish chora-tadbirlari toʻgʻrisida»gi farmoni bilan bank faoliyati uchun bir qator imtiyoz va ragʻbatlantirishlar berildi va shu asosda yurtimizda jismoniy shaxslarning ulushi 50 foizdan kam boʻlmagan xususiy banklar ochila boshladi.

2011-yilning 1-yanvariga qadar Oʻzbekistonda 31 ta tijorat banki faoliyat koʻrsatmoqda, ulardan 3 tasi davlat, 13 tasi tijorat-aksiyadorlik banki, 10 tasi xususiy va 5 tasi chet el kapitali ishtirokidagi banklar boʻlib, ular 9,3 mingta filialga, minibank va chakana ofislariga ega.

4-jadval

Bank muassasalarining rivojlanish dinamikasi (1990–2011-yillar)

Koʻrsatkichlar	1990-yil	1995-yil	2000-yil	2005-yil	2010-yil
Tijorat banklari soni	16	32	35	29	31
Tijorat banklari	2389	3171	4234	7028	9293
muassasalari soni					

Mamlakatimiz tijorat banklari yalpi kapitalining barqaror oʻsishi va bank aktivlari portfelini boshqarish sohasida yuritilayotgan mutanosib siyosat natijasida, bank tizimida bank nazorati boʻyicha Bazel qoʻmitasi tomonidan belgilangan xalqaro standartlardan uch barobar koʻp boʻlgan kapitalning yetarlilik darajasi koʻrsatkichini ta'minladi. Yurtimizda 1995—2010-yillar davomida yalpi kapitalning real oʻsishi 12,5 barobarni tashkil etdi, bu esa banklarning kapital bazasi mustahkamlanganidan dalolat beradi. Bu, oʻz navbatida, ularning toʻlov qobiliyatiga ijobiy ta'sir koʻrsatadi.

Bank tizimida 1995-yildan 2010-yilgacha boʻlgan davrda depozitlar bazasi solishtirma koʻrsatkichlarda 13 barobar oshdi. Tijorat banklari yalpi depozitlarining yuqori darajada oʻsishi aholi omonatlarini jalb qilishning yuqori sur'atlari bilan izohlanadi, bu shubhasiz, aholining bank tizimiga boʻlgan ishonchi yanada ortib borayotganidan dalolatdir. 2010-yilning oxirida aholining mamlakatimiz tijorat banklariga qoʻygan

omonatlari hajmi 4447 milliard soʻmni tashkil etdi va bu solishtirma narxlarda 1995-yil koʻrsatkichlaridan 52 barobar koʻpdir. Jismoniy shaxslar tomonidan bank muassasalarida ochilgan bank hisob raqamlari soni 1995–2010-yillarda 16 barobar koʻpaydi va 2010-yil yakunlariga koʻra, katta yoshdagi har 1000 kishiga 1012 tani tashkil etdi, bu xalqaro amaliyotda yuqori koʻrsatkich hisoblanadi. 2000-yilda banklar kredit portfelining 54 foizi tashqi qarzlar hisobidan shakllangan boʻlsa, 2010-yilda kredit portfelining 85,1 foizi ichki manbalar hisobidan shakllantirildi. Shu bilan birga, banklar kredit portfelining 75,2 foizini uch yildan koʻp boʻlgan uzoq muddatli investitsiya kreditlari tashkil etadi.

Ta'kidlash joizki, tijorat banklarining moliyaviy ko'rsatkichlari va O'zbekiston Respublikasi bank tizimining asosiy parametrlari xalqaro reyting kompaniyalarining talab va mezonlariga mos keladi. Bu esa, 2010-yilda umumiy aktivlari bank tizimi jami aktivlarining 90 foizidan ziyodini tashkil etadigan 15 ta tijorat banki uchun «Fitch Reytings», «Mudis» va «Standart end Purs» kabi yetakchi xalqaro reyting agentliklarining «barqaror» reyting bahosini olishga erishish imkonini berdi.

Mustaqillik yillarida mamlakatimizda eng yuqori xalqaro standartlarga javob beradigan toʻlovlarni amalga oshirish tizimi yaratildi. Agar 1990-yilda toʻlovlarni amalga oshirish uchun bir kun, ba'zan hatto haftalar ketgan boʻlsa, 1997-yildan boshlab bir necha daqiqalarda barcha hisob-kitoblarni toʻliq avtomatlashtirilgan tartibda amalga oshirish imkonini beradigan yangi toʻlov tizimi faoliyat koʻrsatmoqda. Bugungi kunda Oʻzbekiston toʻlov tizimi dunyodagi eng zamonaviy tizimlardan biri boʻlib, u barcha toʻlovlarni real vaqt rejimida amalga oshiradi.

Mamlakatimizda naqd pulsiz hisob-kitoblar tizimining rivojlanishida toʻlovlarni plastik kartochkalar vositasida amalga oshirish tizimining yaratilgani muhim oʻrin tutmoqda. Soʻmdagi plastik kartochkalar dastlab 1996-yilda paydo boʻldi va bankdagi hisob raqamlari boʻyicha qoʻshimcha daromad olish imkoniyatiga ega boʻlgan bank mijozlari uchun qulayligi sababli keng qoʻllana boshlandi. Hozirgi vaqtda muomaladagi bank plastik kartochkalari soni qariyb 8 million donani tashkil etmoqda. Bugungi kunda savdo va xizmat koʻrsatish shoxobchalarida oʻrnatilgan, plastik kartochkalarga xizmat koʻrsatadigan terminallar soni 86 mingtaga yetdi.

Ayni paytda tijorat banklari tomonidan bank xizmatlari koʻlami muntazam kengaytirib borilmoqda va mijozlar uchun qulay yangi xizmat shakllari joriy etilmoqda. Ular bank hisob raqamlari egalariga real vaqt tartibida oʻz hisob raqamlari haqidagi ma'lumotlarni mobil va elektron aloqa vositalari orqali olish imkonini bermoqda. Banklar tomonidan aholi punktlarida mingdan ortiq infokiosklar oʻrnatilgan, ular orqali mijozlar toʻlovlar, jumladan, kommunal xizmat toʻlovlarini mustaqil tarzda amalga oshirishlari mumkin. Bundan tashqari, bank mijozlariga qulayliklar yaratish maqsadida «Bank-mijoz» dasturi joriy qilingan. Ushbu dastur har kuni bankda katta hajmdagi hisob-kitoblarni amalga oshiradigan 5 mingdan ziyod yirik korxonalarga bankdagi oʻz hisob raqamlarini ish joyidan turib boshqarish va ular haqida zarur ma'lumotlar olish imkonini bermoqda.

Bank tizimining mustaqillik yillarida faol rivojlanishi natijasida tijorat banklarining mijozlari soni 18,5 barobar koʻpaydi va 18,8 millionni tashkil etdi. Jumladan, jismoniy shaxs maqomidagi mijozlar 19,2 barobar koʻpayib, 17,5 million kishiga yetdi. Keyingi vaqtda mamlakatimizda bank kredit muassasalari bilan bir qatorda bankdan tashqari kredit muassasalari (kredit uyushmalari, lombardlar va mikrokredit tashkilotlari) tizimi ham rivojlanmoqda.

Bankdan tashqari, kredit tashkilotlari tizimining shakllanishi, Oʻzbekiston Respublikasining «Kredit uyushmalari toʻgʻrisida», «Mikrokredit tashkilotlari toʻgʻrisida»gi qonunlarining qabul qilinishi bilan boshlandi. Bugungi kunda Oʻzbekistonda jami aktivlari hajmi 351 milliard soʻmni tashkil etadigan 209 ta bankdan tashqari, kredit instituti ham faoliyat koʻrsatmoqda.

Tayanch tushunchalar:

Moliya sektori, daromadlar va xarajatlar, moliya tizimi, moliyaning vazifalari, mikromoliya, makromoliya, meta (xalqaro) moliya, aksiya, obligatsiya, dividend, kredit, kreditning vazifalari, kredit mexanizmi, kredit turlari, kredit institutlari.

Bank, bank turlari, budjet, budjet kamomadi, budjet koeffitsineti, budjet balansi, ichki va tashqi qarz, davlat qarzi.

Savol va topshiriqlar:

- 1. Iqtisodiyotning real sektori va moliya sektori oʻrtasidagi farq qanaqa?
- 2. Moliyaning mamlakat taraqqiyotidagi oʻrnini tushuntiring.
- 3. Moliya va kredit qanday vazifalarni bajaradi, ular oʻrtasidagi farq qanaqa?
 - 4. Moliyaning turlarini sanab oʻting.

- 5. Prezident Islom Karimov 2005-yilning 27–28-yanvarida Oʻzbekiston Respublikasi Oliy Majlisi Qonunchilik palatasining birinchi yigʻilishida, 28-yanvarida esa Oʻzbekiston Respublikasi Oliy Majlisi Qonunchilik palatasi va Senatining qoʻshma majlisida bank va moliya tizimlaridagi islohotlarni chuqurlashtirishning ustuvor vazifalarini belgilagan edi. Bunda asosiy gap nimalar toʻgʻrisida edi?
 - 6. Bank va uning vazifalarini tushuntirib bering.
 - 7. Markaziy bankning vazifalari qanday?
- 8. Tanilgan xalqaro reyting agentliklari («Mudis, Fitch») 2008-yilda Oʻzbekistonning qaysi banklariga «barqaror» reytingini berdi?
- 9. 2009–2012-yillarga moʻljallangan Inqirozga qarshi choralar dasturi samaradorligini baholashning ahamiyatini tushuntiring.
- 10. Mamlakatimizda moliya-bank tizimini mustahkamlash masalasiga nima uchun alohida e'tibor qaratilmoqda?
- 11. Respublikamiz bank tizimining mustahkam himoyasi yaratilganligi nimalarda namoyon boʻladi?
- 12. Yetakchi xalqaro reyting kompaniyalarining mamlakatimiz bank tizimiga bergan bahosini izohlang.
- 13. Banklar kredit portfeli tarkibidagi ijobiy oʻzgarishlar iqtisodiyotimizning taraqqiyoti uchun qanday ahamiyatga egaligini izohlang.

Mavzuni chuqur o'rganish instrumentariysi

Moliyaviy globallashuv – bu jahon xoʻjaligining barcha hududlaridagi moliyaviy munosabatlarni qamrab oluvchi jarayondir. Global moliyaviy inqiroz ortiqcha likvidlik va yuqori darajada integratsiyalashgan xalqaro moliya tizimining yetarli tartibga solinmasligi natijasida yuzaga keladi va jahon iqtisodiyotining retsessiyaga uchrashiga olib keladi.

Iqtisodiy globallashuv – bu jahon xoʻjaligining barcha hududlaridagi iqtisodiy munosabatlarni qamrab oluvchi jarayondir. Buni tashkil topayotgan transmilliy kompaniyalar misolida koʻrishimiz mumkin.

Ipoteka (yunoncha Hypothekc – garov ma'nosida) – ssuda olish maqsadida koʻchmas mulk (yer, imorat)ni garovga qoʻyish. Rivojlangan mamlakatlar qishloq xoʻjaligida keng tarqalgan boʻlib, maxsus ipoteka banklari bor.

Likvidlik (lotincha Liquidus – suyuq, oquvchi ma'nolarida) – turli korxonalar, birlashmalar, firmalar va banklarning oʻz majburiyatlarini vaqtida bajara olishi (qarzni toʻlash imkoniyati, barqaror talabga ega boʻlgan pul vositalari, bank depozitlari, qimmatli qogʻozlar, moddiy aylanma vositalar, xaridorgir va pulga tez aylantiriladigan aktivlar likvid vositalar deb yuritiladi. Likvidlik mablagʻlar aylanishining me'yoriga erishini yoʻli bilan ta'minlanadi.

Ssuda – moddiy boyliklar garovi hisobiga joiz olish sharti bilan muayyan muddatga beriladigan qarz. Ssuda muddatida qaytarilmasa bank garov mulkni avaxta qilishi va uni sotib, ssuda boʻyicha uzilmagan qarzni qoplashi mumkin. Qimmatli qogʻozlarni ham garovga qoʻyib, ular evaziga ssuda olish uchraydi.

Investitsiya (nemischa investition, lotincha investere – oʻrash ma'nosida) – iqtisodni rivojlantirish maqsadida mamlakat yoki chet ellarda turli tarmoqlarga uzoq muddatli kapital kiritish (qoʻyish). Moliyaviy investitsiya – aksiya, obligatsiya va boshqa qimmatli qogʻozlarni sotib olish; real investitsiya mamlakati ichkarisida va chet ellarda ishlab chiqarish (sanoat, qishloq xoʻjaligi, qurilish va boshq.)ga kapital qoʻyish, shuningdek, yosh suveren davlatlarga qarz va subsidiya berish shakllarida amalga oshiriladi. Investitsiyani davlat, banklar yoki xususiy tadbirkorlar berishi mumkin.

Investor (inglizcha investor) – pul qoʻygan kishi, omonatchi; investorlarni amalga oshiradigan shaxs, tashkilot, davlat.

Fond bozori – bu qimmatli qogʻozlar oldi-sotdi qilinadigan birja; bozor infratuzilmasining muhim boʻgʻini, qimmatli qogʻozlar (davlat obligatsiyalari, korxonalar aksiyalari va obligatsiyalari, bank kredit biletlari va boshq.) valuta oldi-sotdi boʻyicha muntazam va tashkiliy faoliyat koʻrsatadi.

Moliya bozori – jamiyatda moliya xizmatlari bozori; moliya mablagʻlarini vaqtincha haq toʻlab ishlatish yoki ularni sotib olish yuzasidan boʻlgan munosabatlar. Banklar, fond birjasida va auksionlarda oʻtkaziladi. Moliya bozori tarkibi murakkab, unga qimmatli qogʻozlar bozori, ssuda kapitali, investitsiya bozori kabilar kiradi.

Retsessiya – bu iqtisodiy oʻsishning choʻqqi nuqtasidan keyingi pasayish fazasi boʻlib, olti oy davomida ketma-ket ishlab chiqarish sur'atlarining keskin, birja indekslarining esa ommaviy pasayishi jarayonidir.

Depressiya – bu iqtisodiy oʻsishning keskin pasayishi.

Korporatsiya (lotincha Corporation – birlashma, hamjamiyat ma'nolarida) – rivojlangan yirik aksionerlar jamiyati va trestlar; biron-bir faoliyat uchun uyushgan huquqiy va jismoniy shaxslar majmui. XIX asrlarda paydo bo'lgan.

Moliyaviy derivativ – bu chet el valutasi bilan bogʻliq boʻlgan hosilaviy moliyaviy vositalar (valuta derivativlari) chet el valutasi oldi-sotdisi boʻyicha shartnomalar boʻlib, ularda belgilangan majburiyatlar muayyan muddat oʻtgach yoki uning kursi oʻzgarishiga bogʻliq ravishda bajarilishi mumkin.

Sekyuritizatsiya deganda, moliyaviy aktivlarni qimmatli qogʻozlarga almashtirish tushuniladi.

Diskont (inglizcha discount, italyancha sconto – hisoblamoq ma'nosida): 1) banklar tomonidan vekselni muddatidan ilgari qaytarib sotib olish (veksel hisobi); 2) vekselni qayta sotib olganlik uchun bankdan undiriladigan protsent; 3) tovar narxi (masyu, sifati standartga toʻgʻri kelmaganda), birja va valuta bitimlarida valuta narxidan tashlama.

Stagflyatsiya (lotincha Stagno – koʻlmak va inflation – shishmoq ma'nolarida) – puflangan iqtisodiyotning turgʻunlik, inflatsiya bilan xarakterlanuvchi holati. Stagflyatsiya belgilari: iqtisodiy oʻsish gʻoyat sust boradi yoki yuz bermaydi, ishsizlik koʻpayadi, tirikchilik qiymati oʻsadi, inflatsiya kuchayadi, ishlab chiqarish quvvatlari toʻla ishlatilmaydi, investitsiya jarayoni sustlashadi, ijtimoiy barqarorlik ortadi.

Defolt – bu toʻlov qobiliyati va muddati likvidlik ta'minlanmaganligi holatidan kelib chiqib, korxonalar majburiyatlarini toʻlashni rad etishdir.

Proteksionizm (lotincha protection – himoya ma'nosida) – davlatning milliy iqtisodiyotini himoya qilish va uni rivojlantirishni har tomonlama ragʻbatlantirish, soliq imtiyozlari berish, importni cheklash hamda import mollardan boj haqlarini oshirish va shunga oʻxshash boshqa tadbirlarda oʻz ifodasini topadi.

Offshor hududlar – bu iqtisodiy erkin hududlar boʻlib, ular odatda soliqqa eng koʻpi bilan besh foizdan oshmaydi yoki umuman soliq undirilmaydi. U hududlarda pul oqimi sust nazorat qilinadi.

Jamiyatning moliyasi ma'lum tizimni hosil etib, bunga moliya obyekti, moliya subyekti, moliya munosabatlari, moliya mexanizmi, moliya siyosati va nihoyat, moliya institutlari kiradi. Bularning har birini alohida sharhlaymiz.

Pul bazasi – pul massasining mustaqil tarkibiy qismi boʻlib, unga muomaladagi naqd pul, banklarning kassalaridagi pul mablagʻlari, tijorat banklarining Markaziy bankdagi majburiy zaxiralari.

Pul massasi – xususiy shaxslar, firmalar va davlatga tegishli hamda tovar va xizmatlarning milliy xoʻjalik miqyosida muomalada boʻlishini ta'minlaydigan naqd va naqd boʻlmagan xarid va toʻlov mablagʻlari majmui.

Pulli multiplikator – muomaladagi pul massasining oʻsishi miqdorini aniqlash uchun oshiqcha pul bazasini kamaytirish kerak boʻladigan son.

Pul bozori – iqtisodiy subyektlar oʻrtasida pul oldi-sotdisi borasida yuzaga keladigan munosabatlarning ijtimoiy shakli.

Kapital moliyalashtirish – qarz oluvchi u yoki bu korxonaning mulkdori sifatida oʻz ulushi bilan ishtirok etish uchun shartnoma huquqiga ega boʻlishi evaziga investitsiyalar kiritish uchun pul mablagʻlari olishiga imkon beradigan bitim.

Aksiyalar (obligatsiyalar) kursi – ularga boʻlgan talab va taklifning oʻzaro ta'siri bilan belgilanadigan bozor narxi.

Majburiy zaxiralar normasi – tijorat banklarining Markaziy bankda shartsiz tartibda joylashtirilgan aktivlari.

Obligatsiya – muayyan vaqt mobaynida pulda olingan qarzni kelishilgan foizi bilan toʻlash majburiyatini ifodalovchi sertifikat, aniq qayd etilgan daromadli aktiv.

Oddiy aksiya – firma mulkida oʻz ulushi bilan ishtirok etayotganlikni koʻrsatuvchi sertifikat boʻlib, u ayni vaqtda egasiga ushbu korporatsiyalar

oladigan foydaning ulushiga huquqni ham bildiradi; oʻzgaruvchan daromadli aktiv.

Operatsion talab – ayirboshlash transaksiyalariga xizmat koʻrsatish uchun zarur pulga boʻlgan talab.

Real aktivlar – koʻchmas mulk, yer, nodir metallar, san'at asarlari kabilarda oʻz ifodasini topgan qiymatlar.

Qimmatbaho qogʻozlar bozori — moliyaviy aktivlar oldi-sotdisiga oid institutsionallashgan iqtisodiy munosabatlar.

Spekulyativ talab – odamlarning oʻz pul jamgʻarmalarini eng koʻp foyda beradigan tarzda joylashtirishga intilishlari bilan bogʻliq naqd pulga boʻlgan talab; «ertaga» pul bozorida joylashtirish foydali boʻladigan «bugungi» naqd pulga boʻlgan talab.

Hisob stavkasi – Markaziy bank tijorat banklariga beradigan kredit uchun olinadigan foiz.

Qarz olish orqali moliyalashtirish – qarz oluvchi ushbu mablagʻni kelajakda kelishilgan foizi bilan toʻlash majburiyatini olishi evaziga investitsiyalar kiritish uchun pul mablagʻlari olishiga imkon beradigan bitim, bunda kreditor korxona mulkining ulushiga ega boʻlish huquqini olmaydi.

Moliyaviy aktivlar yoki **qimmatbaho qogʻozlar** — shartnomada kelishilgan shartlar asosida kelgusida toʻlovlar olish uchun shartnomaviy huquq.

Moliyaviy vositachilar – aholining pul mablagʻlarini keyinchalik tijorat asosida investorlar ixtiyoriga berish uchun jamlovchi turli moliyaviy institutlar (banklar, oʻzaro va pensiya jamgʻarmalari, sugʻurta kompaniyalari).

Fond birjasi – qimmatbaho qogʻozlarning bozor narxlari (kurslari) oʻrnatiladigan va oldi-sotdi yuz beradigan joy.

Budjet taqchilligi – davlat xarajatlari uning daromadlaridan ortiq boʻlgan vaziyat. Budjet profitsiti yoki ortiqchasi, davlatning bir yil mobaynida kelib tushadigan soliq tushumlari va boshqa daromadlari yigʻindisi uning xarajatlaridan ortiq boʻlgan holda yuzaga keladi. Muayyan davr mobaynida davlatning daromadi va xarajatlari teng boʻlsa, budjet muvozanati yuzaga keladi.

Budjet muvozanati – muayyan davr mobaynida davlatning daromadi va xarajatlari tengligi.

Budjet taqchilligi – davlat xarajatlari uning daromadlaridan ortiq boʻlgan vaziyat.

Budjet profitsiti – davlatning bir yil mobaynida kelib tushadigan soliq tushumlari va boshqa daromadlari yigʻindisi uning xarajatlaridan ortiq boʻlgan holda yuzaga keladi.

Davlat budjeti – bu umumjamiyat miqyosida markazlashgan va davlat ishtirokida hosil boʻluvchi va sarflanuvchi moliyaviy resurslar.

Subvensiya — davlat budjetidan muhim xoʻjalik va ijtimoiy-madaniy tadbirlarni amalga oshirish uchun mahalliy hokimiyat organlariga ajratilgan pul mablagʻlari.

Subsidiya – davlat budjeti hisobidan korxonalar, tashkilotlar va xorijiy davlatlarga beriladigan mablagʻ. Subsidiya bozor iqtisodiyotini tartibga solish vositasi hisoblanadi.

Davlat moliyasi – davlatning pul mablagʻlari jamgʻarmasini yaratish va ishlatish borasida milliy xoʻjalik doirasida yuzaga keladigan ijtimoiy-iqtisodiy munosabatlarning ijtimoiy shakli.

Davlat qarzi – hukumatning oʻtmishdagi budjet taqchilligini moliyalashtirish uchun qarzga pul olish natijasida toʻplangan qarzi.

Diskretsion fiskal siyosat – hukumatning ish bilan bandlik darajasini oʻzgartirish, inflatsiyani nazorat qilish va iqtisodiy oʻsishning yangi sifatini tezlashtirish maqsadida davlat xarajatlari va soliqlarini bila turib manipulatsiya qilish.

Diskretsion taqchillik – resurslar toʻliq band boʻlgan va iqtisodiyot ishlab chiqarishning potensial hajmiga erishgan sharoitdagi budjet taqchilligi.

Pul-kredit siyosatining oliy maqsadi – toʻliq bandlik, narx barqarorligi va ishlab chiqarish real hajmining oʻsishini ta'minlash.

Pul-kredit konstitutsiyasi – iqtisodiyotni davlat tomonidan boshqarishning monetar sohasidagi muayyan oʻzgarmas qoidalar majmui.

Pul-kredit siyosati – narxlar barqarorligi va resurslarning toʻliq bandligi sharoitida iqtisodiy oʻsishni ta'minlash maqsadida pul taklifini oʻzgartirishga qaratilgan davlat faoliyati.

Pul-kredit siyosatining uzoq muddatli maqsadi – uzoq (bir yil va undan ortiq) vaqt mobaynida eng muhim makroiqtisodiy oʻzgaruvchilarni tartibga solish.

Iqtisodiyotni monetar tartibga solishga Keynscha yondashuv – pulkredit siyosatining asosiy yakuni foiz stavkasining istalayotgan darajasidir degan qoidaga asoslanadi.

Pul-kredit siyosatining qisqa muddatli maqsadi — muomiladagi pul miqdorini bir darajada saqlash yoxud foiz normasini barqarorlashtirish.

Iqtisodiyotni monetar tartibga solishga monetar yondashuv – ishlab chiqarish, ish bilan bandlik va narx darajasini belgilovchi asosiy omil foiz stavkasining dinamikasi emas, balki pul taklifidan iborat degan qoidaga asoslanadi.

Asosiy monetar qoida — pul hajmining koʻpayish sur'atlari uzoq muddatli vaqt davomida ishlab chiqarishning haqiqiy hajmi tabiiy darajasini oʻsish sur'atlariga muvofiqligini doimiy ravishda ta'minlash zarurligiga asoslangan qoida.

«Sof» fiskal siyosat – davlatning soliq-budjet va pul-kredit sohalaridagi iqtisodiyotga oʻzgarmas pul taklifi bilan bogʻliq faoliyati.

Mavzu yuzasidan asosiy xulosalar:

- 1. Iqtisodiyotning moliya sektori undagi turli pul oqimi boʻlib, real sektorga xizmat qiladi. Pul oqimidagi harakatda iqtisodiyotning barcha ishtirokchilari qatnashadi. Pul oqimi daromad-xarajat shakliga kiradi va moliyani yuzaga keltiradi. Moliya iqtisodiy tizim boʻlib, moliya obyekti, subyekti, moliya munosabatlari, moliya mexanizmi, moliya institutlari va nihoyat, moliya siyosatini qamrab oladi. Real iqtisodiyotning darajalariga muvofiq, mikro, makro va metamoliya mavjud.
- 2. Moliya iqtisodiyotda taqsimlash, ragʻbatlantirish, axborot berish, ijtimoiy va nazorat funksiyalarini bajaradi. *Mikromoliya* firmalar, xonadonlar, nodavlat va jamoat tashkilotlari moliyasidan iborat. Mikromoliyaning resurslari firmalar, xonadonlar va turli tashkilotlarning oʻz mablagʻi, qarz koʻtargan puli, davlat bergan yordam va turli xayr-ehson mablagʻlaridan tashkil topadi. Resurslarning asosiy qismi (2/3) xonadonlar moliyasida jamlanadi. Mikromoliya ishtirokchilarining resurslari ular xarajatini qoplash yoʻlida ishlatiladi.
- 3. *Makromoliya* bu umumdavlat, umumjamiyat moliyasi boʻlib, davlat daromadlari va xarajatlaridan iborat. Davlat daromadlari soliqlar, davlat mulki bergan daromad va davlat olgan ichki va tashqi qarzdan iborat. Davlatning xarajatlari bu ijtimoiy soha, investitsiya, milliy xavfsizlik, boshqarish va qarzni uzishga ketadigan xarajatlardir. Davlat moliyasining asosini budjet tashkil etadi.
- 4. Iqtisodiyot subyektlari faoliyatini pul bilan ta'minlash moliyalashtirish boʻlib, bu oʻzini oʻzi moliyalashtirish, budjetdan moliyalashtirish va homiylar tomonidan moliyalashtirish shaklida yuz beradi. Moliyalashtirish resurslarni ma'lum maqsad yoʻlida qaytarib olmaslik sharti bilan sarflanishini bildiradi.
- 5. Moliya tizimining muhim boʻgʻini moliya bozori boʻlib, bu turli subyektlar oʻrtasida moliyaviy aktivlarning oldi-sotdi qilinishini bildiradi, tarkiban fond bozori va pul bozoridan iborat. Moliya bozorining obyekti qimmatli qogʻozlar va pul mablagʻlaridir, uning subyekti firmalar, xonadonlar, davlat hamda nodavlat tashkilotlari va turli vositachilardir. Bu bozor kapitali hosil etish, kapitalni demokratlashtirish, puldan pul chiqarib olish, pulni kerakli sohalarga joylashtirishdek funksiyalarni bajaradi.
- 6. Moliyaga xos pul bozorining bir qismi kredit bozori boʻlib, bunda uning obyekti kredit resursi, uning subyekti qarz beruvchi, qarz oluvchi va ular oʻrtasidagi vositachilar hisoblanadi. Kredit mexanizmi uning vositalari va shartlaridan iborat. Buni kreditning maqsadli va muddatli boʻlishi, kredit uchun foiz undirilishi, kreditning qaytarilishi va buning kafolatlanishi tashkil etadi. Kreditning bozor narxi foizdir. Biroq foiz kreditga berilgan pulning bozor qiymati emas, balki uni vaqtincha ishlatishning haqidir. Foizning manbai kreditni ishlatishdan topilgan foydadir. Foiz darajasini kredit bozorida talab va

taklif, kreditning nafliligi, qarz pulini muqobil ishlatish imkoni, kredit sharti, tavakkal qilinishi, uning qanday valutaga berilishi va nihoyat, inflatsiya darajasi belgilaydi.

- 7. Kreditning obyekti har qanday pul emas, balki o'z egalari qo'lidagi bo'sh qolgan pullaridir. Kredit takror ishlab chiqarishga xizmat qilishi kerak. Kredit iqtisodiy o'sishning shartidir. Iqtisodiy o'sish ommaviy farovonlikni ta'minlashga xizmat qiladi. Shu bois ham, moliya-kredit sohasidagi jinoyatchilikka yoʻl qoʻymaslik huquqni muhofaza qiluvchi organlar xodimlarining vazifalaridan biri hisoblanadi. Faqat yuksak ma'naviyatli xodimlar bank-kredit sohasidagi moliyaviy resurslarni suiiste'mol qilishga yo'l Huquqni muhofaza qiluvchi organlar mutaxassislarining qoʻymaydilar. koʻra, 2002–2007-yillarda ayrim ma'lumotlariga shaxslar tomonidan respublikamiz iqtisodiyotidan 530,7 milliard soʻm mablagʻni oʻzlashtirib yuborganlar. Prokuratura organlari aralashuvi bilan aybdorlar tomonidan yetkazilgan zararning 435 milliard so'mi, ya'ni 78 foizi qoplangan. Ko'rinib turibdiki, bu summa iqtisodiy oʻsishga emas, balki ayrim shaxslar manfaatlariga xizmat qilgan. Aybdorlarning aksariyati rahbar xodimlardir. Bunday insonlar respublikamizda amalga oshirilayotgan islohotlar g'oyasini obro'sizlantiradi. Shu bois, bu borada joylarda tegishli tushuntirish ishlarini olib borish maqsadga muvofiqdir.
- 8. Kredit turlari koʻp, bular tijorat krediti, lizing krediti, bank krediti, davlat krediti, nomoliyaviy kompaniyalar kreditidan iborat. Tadbirkorlik va iste'molchilik krediti ham bor. Aytilgan kreditlar kredit institutlari vositasida amalga oshadi. Bular banklar, parobank kredit tashkilotlari va har xil moliya kompaniyalardan iborat. Asosiy kredit instituti banklar hisoblanadi, ular markaziy va tijorat banklaridan iborat. Banklar oʻz faoliyatida mijozlar manfaatini himoya qilish, daromadli ishlash, raqobatda ishtirok etish, tavakkal qilish va likvidlikni ta'minlash kabi tamoyillarga amal qiladilar. Ular pul oborotiga xizmat qilish, kredit resurslarini kerakli sohalarga yuborish orqali iqtisodiy oʻsishga hissa qoʻshadilar.
- 9. Kredit olishdagi xatar qarzning nisbiy miqdorida emas, balki uning samarasiz ishlatilishidadir. Chet el krediti uni qaytarish imkonini beruvchi samarali ishlarga sarflaganda, qarz miqdori katta boʻlsa-da, xatar kamayadi. Aksincha, qarz miqdori kichik boʻlib, u behuda sarflansa, xatar katta boʻladi. Masalan, Braziliya uzoq yillar mobaynida eng qarzdor mamlakatlar qatoridan oʻrin olgan. Biroq kreditdan samarali foydalanish mamlakatning jadal rivojlanishini, binobarin qarzni qaytarish imkoniyatini kengaytirdi. Ayni paytda qator Afrika mamlakatlarining qarzdorlik darajasi Braziliyanikidan yuqori boʻlmasa-da, uning xatari kuchli boʻldi, chunki kredit samarasiz ishlatildi. Xulosa qilsak, chet el qarzi xatarining chegaraviy miqdori boʻlsa-da (bu YAIM nisbatan 60 foiz dan olingan), buni mutlaqlashtirish mumkin emas,

unga real sharoitga qarab baho berish lozim. Shundan kelib chiqqan holda chet el qarzining monitoringini oʻtkazish talab qilinadi.

Shuni aytish kerakki, koʻplab davlatlarning tashqi qarz masalasidagi puxta oʻylanmagan siyosati ularning iqtisodiyotini zaif, tashqi omillarga qaram, xatarli vaziyatlar oldida himoyasiz va nochor ahvolga solib qoʻyganini koʻrish, kuzatish qiyin emas.

Oʻzbekiston oʻzining mustaqil taraqqiyoti davrida qisqa muddatli spekulyativ kreditlardan voz kechib, chet el investitsiyalarini uzoq muddatli va imtiyozli foiz stavkalari boʻyicha jalb etish tamoyiliga doimo amal qilib kelmoqda. Davlatimiz rahbari qayd etganidek, qarzni oʻz vaqtida qaytara olishga qat'iy ishonchimiz va kafolatimiz boʻlmagan paytlarda, muayyan loyihalarni kreditlash boʻyicha ayrim takliflardan voz kechgan holatlarimiz ham boʻlgan.

Tijorat banklarimizning tashqi majburiyatlar boʻyicha toʻlovlarining holati va hajmi masalasi boʻyicha soʻz yuritganda, hech qanday xavotirga oʻrin yoʻq. Bu ham respublikamiz bank tizimi jahon moliyaviy inqirozining salbiy ta'siri va oqibatlaridan ishonchli tarzda himoyalanganini koʻrsatadi. Oʻzbekiston oʻzining ishonchli va toʻlov qobiliyatiga ega hamkor ekanini, mamlakatimizda chet el sarmoyasini jalb etish boʻyicha har tomonlama qulay shart-sharoitlar yaratilganini amalda isbotlamoqda. 2007–2008-yillar davomida oʻzlashtirilgan chet el investitsiyalari hajmi 2,5 barobardan koʻproq oshganining oʻzi ham buni tasdiqlab turibdi.

Umuman, 2009-yilda mamlakat iqtisodiyotiga kiritiladigan xorijiy va ichki investitsiyalarni hisobga olganda, kapital qoʻyilmalarning umumiy hajmi mamlakatimiz yalpi ichki mahsulotining kamida 25 foizini tashkil etadi. Jahon iqtisodiy inqirozi kuchayib borayotgan hozirgi sharoitda bank-moliya tizimi faoliyatini mustahkamlash va sifat jihatidan yaxshilash alohida muhim ahamiyat kasb etadi. Davlatimiz rahbari Islom Karimov 2005-yilning 27–28-yanvarida Oʻzbekiston Respublikasi Oliy Majlisi Qonunchilik palatasining birinchi yigʻilishida, 28-yanvarida esa Oʻzbekiston Respublikasi Oliy Majlisi Qonunchilik palatasi va Senatining qoʻshma majlisida bank va moliya tizimlaridagi islohotlarni chuqurlashtirishdek ustuvor vazifani belgilagan edi. Bular:

- moliya va bank tuzilmalarining qat'iy pul-kredit siyosatini o'tkazish;
- inflatsiya darajasining barqarorligini ta'minlash;
- milliy valutamiz va uning almashuv kursi mustahkamligini saqlashdagi mas'uliyatini oshirish;
- banklarni kapitallashtirish, ularning nizom va aylanma fondlarini koʻpaytirish va mablagʻlarini investitsiya maqsadlariga, birinchi navbatda, real iqtisodiyotga yoʻnaltirishga qaratilgan aniq chora-tadbirlar koʻrish.

Oʻz vaqtida oqilona belgilangan yuqoridagi vazifalar banklarimizning kapitallashuvini mustahkamlaganini hayotning oʻzi tasdiqladi.

10. Globallashuv sharoitidagi xavfsizlik chetdan kapitalning kirib kelishi bilan ham bogʻliqdir. Kapital kredit shaklida kirib kelganda, u qarzdorlik xavfini tugʻdiradi. Kredit investitsiya miqdorini iqtisodiy imkoniyat darajasida yuqori qilib, iqtisodiy oʻsishga hissa qoʻshadi, biroq uni kelajakda toʻplanishi yalpi ichki mahsulotdan chegirma olish hisobidan yuz beradi. Qarzning toʻplanib qolishi investitsiyaning kelajagini cheklaydi. Bundan farqli oʻlaroq, bevosita xorij investitsiyalari mamlakatni investitsiya xavfidan xoli qiladi, biroq ulardan kelgan foydani repatriatsiya (chetga olib ketish) qilish xavfi saqlanadi. Bu investitsiyalar resurslarning ayovsiz ishlatilishiga va ularning zaxirasi qisqarishiga olib keladi. Albatta, chet el kapitalining xavfsizlikka ta'siri jiddiy boʻlganidan bulardan ijobiylarini saqlagan holda salbiylarining ta'sirini kamaytirish davlatning vazifasiga aylanadi.

Mamlakatimizda mustaqil taraqqiyot yoʻliga oʻtilgan davrdan boshlab Prezidentimiz tomonidan har bir yil yakuniga koʻra erishilgan yutuq va natijalarni sarhisob qilib, kelgusi yilda bajarilishi lozim boʻlgan vazifalarni belgilab olish an'anaviy tarzda amalga oshirilib kelmoqda. Bu tadbirning oʻziga xos ijobiy jihatlari sifatida quyidagilarni sanab oʻtish mumkin:

- birinchidan, mamlakatimizda olib borilayotgan iqtisodiy siyosatning samaradorligi, amalga oshirilayotgan ijtimoiy-iqtisodiy rivojlanish choratadbirlari hamda dasturlarining izchil va puxta asoslanganligini baholash;
- ikkinchidan, xalqimizning yil davomidagi fidokorona mehnati natijalarini e'tirof etish;
- uchinchidan, kelgusi yilda ustuvor e'tibor qaratish lozim bo'lgan vazifa va yo'nalishlarni belgilash, yetarli darajada foydalanilmayotgan imkoniyatlarni aniqlash;
- toʻrtinchidan, iqtisodiyotimizning turli soha va tarmoqlari, mamlakatimizning barcha hududlaridagi iqtisodiy salohiyatni oʻzaro muvofiqlashtirilgan holda yanada toʻlaroq safarbar etish va boshqalar.

Mamlakatimizda 2009–2012-yillarga moʻljallangan inqirozga qarshi choralar dasturi samaradorligini xolisona baholash muhim prinsipial ahamiyat kasb etadi. Bu 2010-yilda va undan keyingi yillarda ushbu dasturni amalga oshirish jarayonida, zarurat tugʻilishiga qarab, unga tegishli oʻzgartirishlar kiritishda ana shu tahlil xulosalariga tayanishimiz mumkinligi orqali namoyon boʻlishi izohlandi.

Jahon moliyaviy-iqtisodiy inqirozi oʻzining salbiy oqibatlari bilan dunyoning aksariyat mamlakatlari iqtisodiyotiga jiddiy ta'sir koʻrsatgan 2009-yil bizning mamlakatimiz uchun ham gʻoyat qiyin boʻldi. Shunga qaramay, hukumatimiz tomonidan 2009–2012-yillarga moʻljallab qabul qilingan inqirozga qarshi dasturning inqiroz ta'sirini yumshatish va bartaraf etishdagi roli va ahamiyati katta boʻldi.

Inqirozga qarshi choralar dasturi doirasida amalga oshirgan tadbirlarimiz qatorida moliya-bank tizimini mustahkamlash masalasiga alohida e'tibor qaratilib, bu borada ta'sirchan tadbirlar amalga oshirildi. Jumladan:

- Oʻzbekiston Respublikasi Prezidentining 2009-yil 28-iyuldagi 1166-sonli qaroriga asosan pul massasining maqsadli parametrlaridan kelib chiqqan holda va tijorat banklari tomonidan uzoq muddatli depozitlar jalb qilishni ragʻbatlantirish maqsadida 2009-yilning 1-sentabridan boshlab tabaqalashtirilgan majburiy zaxiralar normasi joriy etildi;
- Oʻzbekiston Respublikasi Prezidentining 2008-yil 28-noyabrdagi 4057-sonli farmoniga muvofiq, fuqarolarning tijorat banklari depozit hisobvaraqlaridagi omonatlari ularning miqdoridan qat'i nazar, toʻliq qaytarilishining davlat tomonidan kafolatlanganligi aholining bank tizimiga boʻlgan ishonchi yanada mustahkamlanishiga xizmat qildi va bu jismoniy shaxslarning banklardagi omonatlari hajmining oshishiga ijobiy ta'sir koʻrsatdi;
- Vazirlar Mahkamasining 2009-yil 13-fevraldagi 1-sonli majlis bayoni talablaridan kelib chiqqan holda, aholining boʻsh pul mablagʻlarining banklardagi omonatlarga jalb qilinishida hamda omonatdagi mablagʻlarni ularning birinchi talabiga koʻra berilishida qonun buzilishiga yoʻl qoʻymaslik, omonatchilarning haq-huquqlari himoya qilinishini ta'minlash borasida tizimli chora-tadbirlarning amalga oshirilishi va banklarning mazkur faoliyatlari ustidan nazoratning yanada kuchaytirilganligi ham aholi boʻsh pul mablagʻlarini bank omonatlariga jalb qilishni yanada jadallashtirdi;
- Oʻzbekiston Respublikasi Prezidentining 2009-yil 6-apreldagi 1090-sonli «Tijorat banklari depozitlariga aholi va xoʻjalik subyektlari boʻsh pul mablagʻlarini jalb etishni yanada ragʻbatlantirish qoʻshimcha chora-tadbirlari toʻgʻrisida»gi qarori hamda mazkur qaror bilan tasdiqlangan «Tijorat banklari depozitlariga aholi va xoʻjalik subyektlari boʻsh pul mablagʻlarini jalb etishni yanada ragʻbatlantirish qoʻshimcha chora-tadbirlari kompleksi» doirasida bank tizimida bu borada olib borilayotgan ishlar yanada faollashdi;
- Respublika bank Kengashining 2009-yil 15-apreldagi 2-sonli qaroriga muvofiq, foiz stavkalarini yuridik shaxslarning banklardagi 6 oydan ortiq muddatga joylashtirilgan depozitlari uchun moliyalash stavkasining 75 foizidan kam boʻlmagan miqdorda, aholining 1-yildan ortiq muddatga joylashtirilgan depozitlari uchun Markaziy bank qayta moliyalash stavkasining 150 foizidan kam boʻlmagan miqdorda hamda jismoniy shaxslarning plastik kartochkalardagi mablagʻlari uchun Markaziy bank qayta moliyalash stavkasidan kam boʻlmagan miqdorda belgilash yuzasidan tavsiyalar berildi.

Bunday ta'sirchan chora-tadbirlarning amalga oshirilishi natijasida so'nggi ikki yilda tijorat banklarining umumiy kapitali ikki barobar ko'paydi. 2009-yilning o'zida yetakchi banklarning nizom jamg'armalarini oshirish uchun qo'shimcha ravishda 500 milliard so'mdan ortiq davlat mablag'lari ajratildi.

Banklarning umumiy kapitali – banklarning oʻz faoliyatlarini (bank operatsiyalarini) amalga oshirish uchun moʻljallangan moliyaviy resurslari boʻlib, u banklar tomonidan turli manbalar orqali jalb etilgan pul kapitalidan iborat. Banklarning umumiy kapitali xususiy kapital bilan bir qatorda undan bir necha barobar koʻproq boʻlgan, jalb etilgan kapitalni ham oʻz ichiga oladi.

Banklarning nizom jamgʻarmalari – banklarning doimiy tasarrufida boʻlgan moddiy va pul mablagʻlari yigʻindisi boʻlib, ularning miqdori banklar tashkil topgan chogʻda nizomda qat'iy belgilab qoʻyiladi.

Bugungi kunda mamlakatimizda 30 ta bank faoliyat koʻrsatib, shundan uchtasi davlat banklari, 13 tasi aksiyadorlik tijorat banklari, 9 tasi xususiy banklar, 5 tasi xorijiy kapital ishtirokidagi banklar hisoblanadi. Banklarimiz kapitalining yetarlilik darajasi 23 foizdan oshadi. Bu esa banklar monitoringi bilan shugʻullanadigan xalqaro Bazel qoʻmitasi tomonidan belgilangan xalqaro standartlardan qariyb 3 barobar koʻpdir. *Bank kapitalining yetarlilik darajasi* – bu jami kapitalning riskka tortilgan aktivlarga nisbati boʻlib, u xalqaro Bazel kelishuviga koʻra, kamida 8 foizni tashkil etishi kerak.

Xalqaro Bazel qoʻmitasi – rivojlangan mamlakatlar markaziy banklari rahbarlari tomonidan 1974-yilda tashkil etilgan tashkilot. Uning doirasida xalqaro bank faoliyatini tartibga solish muammolari muhokama qilinadi. 1975-yilda qoʻmita tomonidan Bazel kelishuvi ishlab chiqilgan. Keyinchalik Bazel qoʻmitasi bank faoliyati me'yorlari boʻyicha xalqaro tavsiyalar ishlab chiqa boshladi.

Bank depozitlari – jismoniy va yuridik shaxslarning bank muassasalariga ma'lum muddatga va muddatsiz omonat shaklida qoʻyilgan boʻsh pul mablagʻlari.

Umumiy aktivlari mamlakatimiz bank tizimining 90 foizdan ortigʻini tashkil qiladigan 14 ta tijorat banki «Fitch Reytings», «Mudis» va «Standart end Purs» kabi yetakchi xalqaro reyting kompaniyalarining «barqaror» degan yuqori reyting bahosini olishga muvaffaq boʻldi. *Bank-moliya tizimining barqarorligi* – banklarning va boshqa moliya muassasalarining oʻz majburiyatlari yuzasidan talablarga toʻla javob bera olishi. Bu likvidlilik, kapitalning yetarliligi, aktivlar sifati, rentabellik koʻrsatkichlari orqali aniqlanadi.

«Fitch Reytings», «Mudis», «Standart end Purs» xalqaro reyting kompaniyasi – faoliyati banklar, moliyaviy institutlar, investitsiya va aksionerlik kompaniyalarining kredit layoqatini oʻz vaqtida va aniq baholashga yoʻnaltirilgan xalqaro reyting agentliklari.

Hozirgi kunda banklarning umumiy aktivlari aholi va yuridik shaxslar hisobraqamlaridagi mablagʻlar miqdoridan ikki barobardan ham ortiq boʻlib, bu ularning toʻliq himoyasini va toʻlovlarning oʻz vaqtida amalga oshirilishini kafolatlaydi.

Bank aktivlari — banklarning asosiy faoliyatini amalga oshirishda foydalanuvchi turli moddiy va moliyaviy resurslar majmui. Ular asosan bank kreditlari, asosiy vositalari, sotib olgan qimmatli qogʻozlari, investitsiyalari, valuta boyliklari koʻrinishida boʻladi.

Bank tizimining umumiy joriy likvidligi banklarning tashqi toʻlovlar boʻyicha joriy majburiyatlaridan 10 barobar koʻpdir. Boshqacha aytganda, respublikamiz bank tizimining mustahkam himoyasi yaratilgan. Bank tizimining mustahkamlanishi va unga nisbatan aholi ishonchining ortishi natijasida omonatlar hajmi sezilarli ravishda ortib bormoqda.

Bank tizimining likvidligi – bankning oʻz majburiyatlarini vaqtida va soʻzsiz bajara olish imkoniyati.

Banklar likvidligi – banklar aktivlarining qisqa muddat ichida pulga aylanish qobiliyati. Likvidlik bank majburiyatlarini bajarish va aktivlar oʻsishini moliyalash bilan birgalikda depozitlar va qarz mablagʻlari darajasining pasayishini samarali boshqarishni ham bildiradi.

5-jadval

Banklardagi aholi omonatlarining oʻsishi dinamikasi, 1-yanvar holatiga, mlrd. soʻm

yillar	2003	2004	2005	2006	2007	2008	2009	2010
	170,0	245,0	323,0	450,0	678,3	994,6	1644,0	2750,0

Jadvaldan koʻrinadiki, 2003–2011-yillar mobaynida aholi daromadlari hajmi 16 barobardan koʻproq oshgan. Bu aholining bank tizimiga ishonchi ortib borayotgani banklar faoliyati samaradorligining muhim koʻrsatkichi hisoblanadi.

Keyingi yillarda banklarning kredit portfeli tarkibi tubdan oʻzgarib bormoqda. Agar 2000-yilda kredit portfelining qariyb 54 foizi tashqi qarzlar evaziga shakllangan boʻlsa, 2011-yilda banklarimiz jami kredit portfelining 85,3 foizi ichki manbalar — yuridik va jismoniy shaxslar depozitlari hisobidan shakllantirildi. Bu esa, oʻz navbatida, iqtisodiyotimiz tarmoqlariga investitsiya kiritish va shuning hisobidan taraqqiyotimizning ta'minlashda ichki imkoniyatlarimiz tobora ortib borayotganining dalilidir.

Banklarning kredit portfeli – tijorat banklari tomonidan berilgan kreditlarning umumiy jamlanmasi boʻlib, ular quyidagicha tasniflanadi: a) yaxshi; b) standart; c) substandart; d) shubhali; e) umidsiz. Tijorat banklarining ma'lum muddatga ssuda hisobvaraqlarida qolgan pul mablagʻlari majmui (qoldigʻi).

Bugungi sharoitda esa bunday ijobiy oʻzgarish iqtisodiyotimizning istiqboldagi taraqqiyoti uchun gʻoyat muhim ahamiyatga ega. Aytish kerakki, tashqi qarzlar aksariyat hollarda uzoq muddatga, faqat iqtisodiyotning strategik tarmoqlarini modernizatsiya qilish, kichik biznes va xususiy tadbirkorlik subyektlarini qoʻllab-quvvatlash boʻyicha investitsiya loyihalarini moliyalash uchun jalb qilinmoqda.

Tijorat banklari tomonidan kichik biznes va xususiy tadbirkorlik subyektlarini qoʻllab-quvvatlash borasida e'tiborli jihatlardan biri Oʻzbekiston Respublikasi Prezidentining 2008-yil 10-noyabrdagi 4051-sonli «Mikrokreditbank» aksiyadorlik tijorat bankining tadbirkorlik subyektlarini qoʻllab-quvvatlash borasidagi faoliyatini yanada kengaytirish chora-tadbirlari toʻgʻrisida»gi farmoniga muvofiq:

- tadbirkorlik faoliyatini boshlash uchun 18 oygacha muddatga beriladigan eng kam ish haqining 200 barobari miqdoridagi imtiyozli mikrokreditlar boʻyicha maksimal stavkani yillik 5 фоиздан 3 фоизга;
- kichik biznes subyektlari faoliyatini kengaytirish va aylanma mablagʻlarini toʻldirish uchun 24 oygacha muddatga beriladigan eng kam ish haqining 500 barobari miqdoridagi mikrokreditlar boʻyicha – Markaziy bank tomonidan qayta moliyalashtirish stavkasining 100 foizidan 50 foiziga;
- kichik biznes subyektlari uchun 3 yilgacha muddatga beriladigan eng kam ish haqining 2000 barobari miqdoridagi imtiyozli mikrolizing xizmatlari boʻyicha maksimal stavkani yillik 7 foizdan 5 foizga tushirildi.

Kreditlashda bunday ahamiyatli imtiyozlarning belgilanishi mazkur soha vakillari tomonidan kreditga boʻlgan talabning va ayni paytda ularga berilayotgan kredit hajmining yildan yilga oshib borishiga olib kelmoqda. Jumladan, 2005–2009-yillar davomida tijorat banklari tomonidan kichik biznes subyektlariga berilgan jami kreditlar miqdori 4,4 barobar, mikrokreditlar miqdori esa 7,1 barobar oshgan. Shu oʻrinda tijorat banklari kreditlari toʻgʻrisida soʻz borganda, ularning maqsad yoʻnalishlari jihatidan tarkibi ham takomillashib borayotganligini ta'kidlash lozim.

Banklarning investitsiya maqsadlariga yoʻnaltirilgan kreditlarining umumiy kredit portfelidagi ulushi qariyb 70 foizni tashkil etdi, iqtisodiyotimizning real sektoriga yoʻnaltirilgan kreditlarining umumiy hajmi esa 2009-yilda 2000-yilga nisbatan 14 barobar oshdi.

Investitsion kreditlar – ishlab chiqarishni kengaytirish, texnik va texnologik jihatdan yangilash, modernizatsiyalash va rekonstruksiya qilish, yangi bino va inshootlarni qurish uchun zarur boʻlgan vositalarni sotib olish maqsadida olingan kreditlar. Soʻnggi oʻn yilda iqtisodiyotning real sektorlarini kreditlashga yoʻnaltirilgan ichki manbalar 25 barobardan ziyodroq koʻpaydi.

2009-yilda jami bank kreditlari tarkibida uzoq muddatli kreditlarning ulushi 78,3 foizni tashkil etgan.

Yuqoridagi fikr-mulohazalardan koʻrinadiki, mamlakatimizdagi bank-moliya sohasining tobora mustahkamlanib borishi amalga oshirilayotgan iqtisodiy islohotlar moliyaviy ta'minotining kuchayishiga, iqtisodiyot real sektorining har tomonlama qoʻllab-quvvatlanishiga hamda barqaror iqtisodiy oʻsish sur'atlarining ta'minlanishiga zamin yaratmoqda.

«Agrobank» aksiyadorlik tijorat banki – iqtisodiyotning agrar sektorini yanada barqaror rivojlantirish, qishloq xoʻjaligida iqtisodiy islohotlarni izchillik bilan chuqurlashtirib borish, fermerlik harakatini qoʻllab-quvvatlash, uning moddiy va moliyaviy bazasini mustahkamlash, qishloq xoʻjalik ishlab chiqaruvchilariga qishloq xoʻjalik mahsulotlarini chuqur qayta ishlovchi zamonaviy korxonalarni jadal barpo etish, yuqori sifatli, raqobatbardosh mahsulotlarni ishlab chiqarish boʻyicha zamonaviy texnologiyalar va uskunalarni tatbiq qilish hamda ichki bozorni mahalliy oziq-ovqat tovarlari bilan toʻldirishga yoʻnaltirilgan keng turdagi bank xizmatlarini koʻrsatish maqsadida 2009-yil 30-martda Oʻzbekiston Respublikasi Prezidentining «Agrobank» aksiyadorlik tijorat bankini tashkil etish toʻgʻrisida»gi qarori asosida «Paxtabank» aksiyadorlik tijorat bankin negizida tashkil etilgan.

«Qishloq qurilish invest» ixtisoslashtirilgan shoʻ'ba injiniring kompaniyasi — «Qishloq taraqqiyoti va farovonligi yili» Davlat dasturini ijro etish hamda aholi punktlarining bosh rejalar va arxitekturaviy rejalashtirishni tashkil etish loyihalariga muvofiq tasdiqlangan namunaviy loyihalar boʻyicha yakka tartibdagi uy-joy qurilishi koʻlamini kengaytirish asosida qishloq aholisining turar joy sharoitlarini tubdan yaxshilash maqsadida 2009-yil 3-avgustdagi Oʻzbekiston Respublikasi Prezidentining «Qishloq joylarda uy-joy qurilishi koʻlamini kengaytirishga oid qoʻshimcha chora-tadbirlar toʻgʻrisida»gi qaroriga muvofiq tashkil etilgan.

«Qishloq qurilish bank» aksiyadorlik tijorat banki – qishloq qiyofasini va qishloq aholisining uy-joy sharoitlarini sifatli yaxshilash, qishloq joylarda ishlab chiqarish va ijtimoiy infratuzilmani jadal rivojlantirish, uy-joy qurilishini uzoq muddatli imtiyozli kreditlash tizimini keng joriy etish maqsadida hamda «Qishloq taraqqiyoti va farovonligi yili» Davlat dasturiga muvofiq, 2009-yil 30-martda Oʻzbekiston Respublikasi Prezidentining «Qishloq qurilish bank» aksiyadorlik tijorat bankini tashkil etish toʻgʻrisida»gi qaroriga muvofiq «Gʻalla bank» aksiyadorlik tijorat binki negizida «Qishloq qurilish bank» aksiyadorlik tijorat bankil etildi. «Qishloq qurilish bank» Aksiyadorlik tijorat bankining ustav kapitali 150 milliard soʻm miqdorida shakllantirilgan.

15-MAVZU. DAVLATNING SOLIQ SIYOSATI

1. Soliqlarning iqtisodiy va huquqiy mazmuni hamda ularning zarurligi, vazifalari

Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirishda soliqlarning roli yanada oshib bormoqda. Oʻzbekiston mustaqillikning ilk yillaridanoq iqtisodiyotni tartibga solishda oqilona soliq siyosatini yuritib kelmoqda.

Xo'sh soliqlar qanday paydo bo'lgan?

Iqtisodiy adabiyotlarni oʻrganish soliqlarning davlat paydo boʻlishi bilan shakllanganligini koʻrsatadi. Shuning uchun ham soliqlarning obyektiv zarurligi eng avvalo davlatning mavjudligi, uning vazifalarini moliyaviy resurslar bilan ta'minlashning zarurligidan kelib chiqadi. Mamlakatimizda bozor iqtisodiyotiga asoslangan huquqiy demokratik davlat barpo etish va fuqarolik jamiyatini qurishda soliqlarning oʻrni beqiyos. Chunki davlat budjetining asosini soliqlar tashkil etadi. Bu haqda darslikning 14-mavzusida davlat budjetining shakllanishiga oid masalani koʻrib chiqayotganimizda toʻxtalganmiz. Darhaqiqat, soliqlar orqali davlat bozor infratuzilmasini rivojlantiradi, teng huquqli, daxlsiz, davlat himoyasidagi xilma-xil mulk shaklidagi iqtisodiy subyektlarni rivojlantirishga erishiladi.

Soliqlar uzoq davr mobaynida jamiyat tomonidan yaratilgan mahsulotning bir qismini davlat xazinasini toʻldirish uchun undiriladigan asosiy manba sifatida ma'lum. Shu bilan birga, soliqqa tortish esa iqtisodiy madaniyatning bir elementi sifatida davlatlarning bozor iqtisodiyotiga oʻtgan yoki oʻtmaganligiga qaramasdan, ularning hammasiga xosdir. Shuning uchun soliqqa tortishni insoniyatning rivojlanishidan ajratmagan holda koʻrib, uning noyob bir ixtirosi sifatida tan olish lozim. Shveysariyalik iqtisodchi S. Fisherning fikricha, soliqlar – bu jamiyatning sivilizatsiya uchun toʻlovidir.

Soliqlar – qadimgi moliyaviy turkumlardan biridir. «Soliq» tushunchasi oʻzining ildizlari bilan qadimga borib taqaladi. Davlat xazinasiga undiriladigan har xil (magʻlub boʻlgan davlatning toʻlovlari, kontributsiya, domenlar, ya'ni foyda keltiruvchi davlat mulki, yer va oʻrmonlar, davlat hududiga olib kirish va olib chiqib ketishdagi boj toʻlovlari va boshqalar) tushumlar koʻrinishida boʻlgan. Qadimda davlatni moliyalashtirish mexanizmlari paydo boʻlayotgan bir davrda, soliqlar davlatning paydo boʻlishi va undagi jamiyatning sinflarga boʻlinishida

muhim iqtisodiy munosabat sifatida yuzaga kelgan. Ingliz iqtisodchisi S. Parkinsonning fikricha, «soliqqa tortish dunyo kabi qadimiy boʻlib, uning boshlangʻich shakllari mahalliy qabila boshliqlarining daryo boshlarini, ikki daryoning kesishgan yoki togʻdan oʻtish joylarini toʻsib, undan foydalanganlik yoki savdogar va sayyohlardan ushbu yerdan oʻtganlik uchun toʻlovlar undirgan davrlarda paydo boʻlgan».

Soliqlarning hozirgi kundagi oʻrni esa huquqiy ong, iqtisod, davlat nazorat tuzilmaning yuqori darajadagi rivojlanishi natijasida paydo boʻlgan. Volterning soʻzlariga koʻra, «soliq toʻlash bu – oʻz mulkining bir qismini qolgan qismini saqlash uchun berish demakdir». Ushbu ta'rifda soliqning milliy xavfsizlikni ta'minlashdagi roliga urgʻu berilgan. Ikki yuz yil avval yashab oʻtgan ingliz iqtisodchisi A.Smit soliqqa quyidagicha ta'rif bergan: «Soliq – bu davlat tomonidan qiymati va toʻlash tartibi qonuniy qilib oʻrnatilgan yuk demakdir». 1819-yil ingliz iqtisodchisi D. Rikardoning Jamoalar palatasidagi mashhur nutqida: «Eng yaxshi soliq – bu kam toʻlanadigan soliqdir», – degani hammaga ma'lum.

XIX asrning birinchi yarmida shveysariyalik iqtisodchi J. Sismondi soliq nazariyasini «rohatlanish nazariyasi» deb atagan. Soliq bu jabrlanish va shu bilan birga rohatdir, agarda shu qilingan jabr hisobiga davlat tomonidan koʻrsatilgan xizmat natijasida foyda olinsa. Fuqarolar soliqlarga davlat tomonidan ularning oʻzlari va mulklarini himoyalashda koʻrsatayotgan xizmati uchun toʻlanayotgan mukofot puli deb qarashlari lozim.

XX asrning boshlarida italiyalik iqtisodchi F. Nitti davlatning soliqlar ta'sirida milliy bozorini rivojlanishdagi roliga ta'rif berdi. Jamoadan ajratib boʻlmaydigan xizmatlar borki, ular, masalan, ichki xotirjamlik va tashqi himoya, huquqni himoya qilish, jamoat gigiyenasi, hudud himoyasi boʻlishi mumkin. Bunday boʻlinmaydigan maxsus koʻrsatilgan xizmatlarga alohida-alohida boj undirishning iloji boʻlmaganligi uchun, bunday xarajatlarni qoplash uchun soliqlar undiriladi. Shunday qilib: «Soliq bu fuqarolar boyligining ular tomonidan davlatga va mahalliy organlarga oʻzlarining jamoa talablarini qondirish uchun toʻlaydigan bir qismidir».

Hozirgi kundagi soliqning ta'rifini berishda soliqqa tortishning majburiy xarakterga ega ekanligini, fuqaroning undan oladigan foydasi bilan soliq oʻrtasida hech qanday bogʻlanish yoʻqligiga urgʻu berib ta'rif berilmoqda. Demak, soliqlar qaytib bermaslik sharti bilan majburiy ravishda daromadlarni davlat budjetiga oʻtkazish bilan bogʻliq pul munosabatlaridir. Soliqlarning iqtisodiy mohiyatini yoritganda, uni faqat majburiy toʻlov deb kifoyalanmaslik kerak. Chunki, hozir xilma-xil

fondlar, ya'ni pensiya fondi, ish bilan band etish fondi, sug'urta fondi ham majburiydir. Soliqlarning muhim xususiyatidan biri shuki, ular faqat davlatniki bo'lib, u umumdavlat budjetiga tushadi. Vaholanki, boshqa fondlar ya'ni pensiya fondi, sug'urta fondlari, faqat belgilangan yo'nalishlar bo'yicha ishlatiladi (Masalan, pensiya fondini ish haqi fondiga o'tkazib bo'lmaydi).

Soliq undirishni huquqiy tomondan koʻrib chiqadigan boʻlsak, u soliq to lovchining xususiy mulkining bir qismini davlat xazinasiga berish, demakdir. Ya'ni, bu degani soliq faqat iqtisodiy tushuncha bo'lib qolmay, shu bilan birga huquqiy kategoriyadir, shuning uchun soliq tabiatini tushunishning qiyin tomoni ham, uni bir vaqtning oʻzida borliqning igtisodiy, xoʻjalik va siyosiy tomonlarini o'z ichiga O'zbekiston Respublikasi olganligidadir. Soliq kodeksining moddasiga muvofiq, «Soliglar deganda, ushbu kodeksda belgilangan, muayyan miqdorlarda undiriladigan, muntazam, qaytarib berilmaydigan va begʻaraz xususiyatga ega boʻlgan, budjetga yoʻnaltiriladigan majburiy pul to'lovlari tushuniladi.

Boshqa majburiy toʻlovlar deganda, ushbu kodeksda belgilangan davlat maqsadli jamgʻarmalariga majburiy pul toʻlovlari, bojxona toʻlovlari, shuningdek vakolatli organlar hamda mansabdor shaxslar tomonidan yuridik ahamiyatga molik harakatlarni toʻlovchilarga nisbatan amalga oshirish uchun, shu jumladan muayyan huquqlarni yoki litsenziyalar va boshqa ruxsat beruvchi hujjatlarni berish uchun toʻlanishi lozim boʻlgan yigʻimlar, davlat boji tushuniladi».

Oʻzbekiston Respublikasi Konstitutsiyasining 123-moddasiga muvofiq, «Oʻzbekiston Respublikasi hududida yagona soliq tizimi amal qiladi. Soliqlar joriy qilishga faqat Oʻzbekiston Respublikasining Oliy Majlisi haqli». Demak, har bir shaxs ushbu kodeksda belgilangan soliqlar va yigʻimlarni toʻlashi shart. Bu degani soliqlar majburiy toʻlovlar boʻlib, qonun asosida belgilanishiga iqror boʻldik.

Soliq solish – yuridik shaxslarga nisbatan mulkchilik shaklidan, qonun oldida tenglik, jismoniy shaxslarga nisbatan esa jinsi, irqi, millati, tili, dini, ijtimoiy kelib chiqishi, e'tiqodi, shaxsiy va ijtimoiy mavqeidan qat'i nazar, qonun oldida tenglik asosida amalga oshiriladi.

Iqtisodiyot demokratiyani taqozo etadi. Shuning uchun ham, soliqlar mohiyatini ochishda uning eng demokratik toʻlov ekanligiga e'tiborni qaratish lozim. Chunki bozor iqtisodiyoti sharoitida turli shakldagi korxonalar, birlashma va tashkilotlardan hamda aholidan ularning mulkini davlat toʻgʻridan-toʻgʻri soliqsiz majburiy toʻlov qilib ololmaydi.

Belgilanayotgan soliqlar va yigʻimlar tovarlarning (ishlar, xizmatlarning) yoki pul mablagʻlarining Oʻzbekiston Respublikasi hududida erkin muomalada boʻlishini bevosita yoki bilvosita cheklab quyishi yoxud soliq toʻlovchining iqtisodiy faoliyatini boshqacha tarzda cheklab qoʻyishi yoki unga toʻsqin boʻlishi mumkin emas. Olingan manbalardan qat'i nazar, barcha daromadlarga soliq solinishi shart.

Soliqlarning asosiy mohiyatini ularning vazifalari, ya'ni soliqlarning jamiyat va davlatning rivojlanishiga ta'sir etuvchi asosiy yo'naltiruvchi kuch ekanligi ochib beradi. Soliqlar bozor iqtisodiyotiga o'tgan har bir davlatda to'g'ridan-to'g'ri budjet munosabatlariga va shu bilan birgalikda imtiyoz, jarima tizimlari orqali esa tovar (xizmat) ishlab chiqaruvchilarga ta'sir etuvchi asosiy kuch sifatida ishlatiladi.

Soliqlar orqali davlat oʻzining bir necha muammolarini hal qiladi, jumladan:

- jamiyatning mavjud ehtiyojlari va uni qondirish uchun zarur boʻlgan resurslar oʻrtasidagi tenglikka erishiladi;
- tabiat boyliklaridan unumli foydalanish uchun jarimalar va boshqa turdagi chegaralar qoʻyish yoʻli bilan tabiatga zararli boʻlgan ishlab chiqarishlarning tarqalmasligiga erishiladi;
- iqtisodiy, ijtimoiy va boshqa koʻpgina turdagi jamiyatning muammolari hal qilinadi.

Soliqlar quyidagi vazifalarni bajaradi:

- 1) fiskal budjetni mablagʻ bilan toʻldirish;
- 2) ijtimoiy daromadni qayta taqsimlash;
- 3) izga solib turuvchi *iqtisodiy munosabatlarni izga soladi*;
- 4) nazorat qiluvchi soliq tizimida oʻzgarishlar kiritishni aniqlaydi;
- 5) jamlovchi yagona iqtisodiy maydonni tashkil etishga imkon yaratadi.

Tarixiy jihatdan soliqlarning birinchi boʻlib **fiskal vazifasi** koʻriladi, chunki soliqlar yordamida davlat budjetiga mablagʻ tushishi ta'minlanadi. Bu asosiy vazifalardan biri boʻlib, uning hisobiga davlat budjetining daromad qismi shakllantiriladi. Ushbu vazifa tovar-pul muomalalari va ishlab chiqarishning rivojlanishi natijasida davlat daromadlari oshishini aniqlab beradi. Soliqning boshqa vazifalarini fiskal vazifasining hosilasi, deb atash mumkin.

Soliqlarning *ijtimoiy* (*qayta taqsimlash*) *vazifasi* har xil daromadga ega boʻlgan aholini soliqqa tortish natijasida hosil boʻlgan jamiyat daromadlarini har xil toifadagi aholi oʻrtasida qayta taqsimlashni oʻz ichiga oladi. Ushbu vazifa yordamida jamiyatning boy qatlamiga soliq yukini oshirish hisobiga

aholining iqtisodiy zaif va himoyalanmagan qatlamlari mablagʻ bilan ta'minlanadi. Soliqlarning ijtimoiy vazifasiga jismoniy shaxslarning daromadlarini progressiv shkalada soliqqa tortish, jamiyatning ijtimoiy zaif qatlamlariga daromad soligʻidan berilgan imtiyoz, qimmatbaho buyumlarga aksiz soligʻini qoʻllash va boshqalar misol boʻla oladi. Koʻpgina davlatlarda jismoniy shaxslarning daromadlarini soliqqa tortishda Oʻzbekiston kabi yondashiladi va koʻp daromad olganlarga nisbatan yuqori stavkada soliqqa tortish qoʻllaniladi. Ba'zi bir ijtimoiy yoʻnalishdagi davlatlarda (Shvetsiya, Norvegiya, Shveysariya) rasmiy darajada soliqlar bu yuqori daromad oladigan aholi qatlamlarining kamroq daromad oluvchi qismiga ijtimoiy moʻtadillik (ijtimoiy xavfsizlik) uchun toʻlaydigan toʻlovlari, deb tan oladilar.

Buyuk ingliz iqtisodchisi D.Keynsning fikricha, jamiyatda soliqlar faqat iqtisodiy munosabatlarni izga solib turish uchun mavjud. Soliqlarning keyingi – izga solib turuvchi vazifasi davlatning iqtisodiy faoliyatini rivojlantirish davrida kelib chiqadi. U maqsadli ravishda hukumatning dasturlari asosida xalq xoʻjaligining rivojlanishiga ta'sir etadi. Bunda davlat soliqlarning shakli, soliq stavkalarining oʻzgarishi, undirish usullari, imtiyozlar va chegirmalardan foydalanib, tadbirkorlikni rivojlantirishning ustuvor yoʻnalishlarini ajratib oladi. Ushbu soliqlarning izga solib turuvchi vazifasi yordamida davlat ishlab chiqarishga, uning natijasida hosil bo'ladigan mahsulotga ta'sir etadi, bundan tashqari, faoliyat turlari va ishlab chiqarishning jamiyat uchun foydali bo'lganlarini rag'batlantiradi. Ko'pgina davlatlar uchun bular quyidagi sohalarni, ya'ni kichik biznes va xususiy tadbirkorlikni rivojlantirish, yoʻnaltirilgan va import oʻrnini bosa oladigan tovarlar ishlab chiqarish, ilmiy rivoilanishini rag'batlantirish, texnika transport boshqalarni va rivojlantirishdan iboratdir.

Izga solib turuvchi vazifaning asosiy ma'nosi bu iste'mol uchun yo'naltirilgan resurslarini soliqqa tortib, ishlab chiqarishni rivojlantirish uchun yo'naltiriladigan resurslarni soliqdan ozod qilishdir.

Navbatdagi vazifa — *nazorat qilish vazifasi* boʻlib, u budjetga undirilayotgan soliq toʻlovlarini oʻz vaqtida va toʻliq tushishini nazorat qilish bilan birga, ularni moliyaviy resurslarga boʻlgan talablar bilan taqqoslaydi. Ushbu vazifa orqali soliq siyosatini budjet siyosatiga moslab olib borish zaruriyati aniqlanadi.

XX asrning oxirlarida bozor iqtisodiyotining davlat mexanizmlarini tartibga solishda soliqning yana bir yangi xususiyatiga, ya'ni tashqi savdo va tashqi iqtisodiyotni tartibga solish bilan bogʻliq boʻlgan *integrallashtiruvchi*

(**jamlovchi**) vazifasiga ega boʻldi. Bu vazifa davlatlar xoʻjaliklarining rivojlanishi natijasida milliy iqtisodiyotning oʻzaro munosabati va dunyo xoʻjalik hayotida har tomonlama integratsiya jarayonlarini kuchayishida namoyon boʻladi. Soliqlar oʻzaro qoʻshni, xoʻjalik va siyosiy manfaatlari bilan bogʻliq boʻlgan davlat uchun yagona iqtisodiy maydonni tashkil etishda asosiy vosita sifatida xizmat qilmoqda.

2. Soliq tizimi va amal qilishining huquqiy asoslari

Davlat soliq tizimini davlat tomonidan oʻrnatilgan barcha soliqlar, yigʻimlar va boshqa budjetga undiriladigan majburiy toʻlovlar majmui, ularning shakli va tuzilish metodlari tashkil etadi. Shuningdek, soliq tizimi – davlat soliq modelining asosiy unsuri – soliq siyosati, mexanizmi va imtiyozlaridan foydalanish jarayoni; soliq unsurlarining davlat miqyosida oʻzaro bogʻliqlikda va uygʻunlikda harakat qilishi. Soliq tizimi soliq modelining asosiy koʻrsatkichlaridan boʻlib, olimlar tomonidan liberallashgan, markazlashgan va insonparvarlashgan guruhlarga boʻlib tahlil qilinadi. Ular soliq mexanizmlari, soliq olish va toʻplash tartiblari bilan farqlanadi. Har bir davlatning oʻz soliq tizimi mavjud boʻlib, mezonlarining oʻziga xosligi bilan boshqa davlatnikidan farq qiladi.

Soliq tizimining samaradorligi – shu tizimni tashkil qiluvchi barcha kuch, vosita, omillar, ish uslublarining uygʻun harakati tufayli soliq va toʻlovlar oʻz vaqtida, toʻliq hajmda yigʻilib, jamiyat taraqqiyotiga xizmat qildirilishi, soliqning barcha funksiyalari muvaffaqiyatli amalga oshirilishining asosiy koʻrsatkichi. Bu umumiy koʻrsatkich soliq tushumining oʻsishi, uning iqtisodiy yuksalishiga ta'siri va soliq organlarining mehnat unumdorligi bilan oʻlchanishi mumkin. Soliq tizimining tushunarli, sodda, aniq va hayotga moslashuvchan boʻlishini taqozo etadi. Soliq tizimi soliq toʻlovchilar bilan adolatli qonun talablari asosida ish olib borish yoʻli orqali mamlakatda ijtimoiy-iqtisodiy rivojlanish, har tomonlama yuksak taraqqiyot darajasi ta'minlanishida oʻz ifodasini topadi.

Soliq tizimi yetarli darajada murakkab boʻlib, u koʻpgina soliq turlari, har xil soliq toʻlovchilar, soliqni undirishni tashkil etish usullari va soliq imtiyozlaridan iborat. Ammo, soliqlar har xil boʻlishiga qaramasdan, ularning bogʻlab turuvchi elementlari mavjud. Soliq elementlariga quyidagilar kiradi:

- soliqqa tortish subyekti;
- soliq obyekti;

- soliq qonunchiligi;
- soliq siyosati;
- soliq bazasini hisobga olish usuli;
- soliq stavkasi;
- soliqni hisoblash tartibi va toʻlash muddatlari;
- undirish usullari;
- hisobot topshirish davri;
- soliq boʻyicha imtiyozlar va h.k.

Soliqqa tortish subyekti (*soliq toʻlovchi*) – qonunga koʻra soliqlar, yigʻimlar va toʻlovlarni huquqiy jihatdan toʻlash majburiyati yuklatilgan *yuridik va jismoniy shaxslardir*.

Oʻz mulkiga, xoʻjalik yuritishida yoki operativ boshqaruvida alohida mol-mulkka ega boʻlgan hamda oʻz majburiyatlari yuzasidan ushbu mol-mulki bilan javob beradigan, oʻz nomidan mulkiy yoki shaxsiy nomulkiy huquqlarga ega boʻla oladigan va ularni amalga oshira oladigan, majburiyatlarni bajara oladigan, sudda da'vogar va javobgar boʻla oladigan tashkilot **yuridik shaxs** hisoblanadi, undan tashqari ular mustaqil balans yoki smetaga ega boʻlishlari kerak.

Jismoniy shaxslar deganda, soliqqa tortish obyektiga ega boʻlgan Oʻzbekiston Respublikasining fuqarolari, boshqa davlatlarning fuqarolari, shuningdek fuqaroligi boʻlmagan shaxslar tushuniladi. Soliq toʻlovchi va davlat oʻrtasidagi iqtisodiy munosabatlar *doimiy turar joyi (rezidentlik)* prinsipiga qarab aniqlanadi.

Oʻzbekiston Respublikasida doimiy yashab turgan yoki moliya yilida boshlanadigan yoki tugaydigan oʻn ikki oygacha boʻlgan istalgan davr mobaynida 183 kun yoki undan koʻproq muddatda Oʻzbekistonda turgan jismoniy shaxs *Oʻzbekiston Respublikasining rezidenti* hisoblanadi.

Oʻzbekistonda *ta'sis etilgan yoki roʻyxatdan oʻtkazilgan* yuridik shaxs, shuningdek Oʻzbekiston Respublikasidan tashqarida roʻyxatdan oʻtgan, bosh korxonasi Oʻzbekistonda joylashgan yuridik shaxs Oʻzbekiston Respublikasining *rezidenti* hisoblanadi.

Soliqqa tortish obyekti yoki soliqqa tortish bilan bogʻliq obyekt deganda, soliq toʻlovchining soliq hisoblanadigan va soliqqa tortish uchun asos boʻlib xizmat qiladigan *daromadi va mol-mulki* tushuniladi. Nazariy jihatdan soliqqa tortish obyektlarini quyidagi koʻrinishlarga boʻlish mumkin:

- mulkiy egalik (mol-mulkka egalik huquqi) va mulkka ega boʻlmaslik (mulkdan foydalanish huquqi);
 - subyektning (oldi-sotdi, tovar olib kirish) harakati (faoliyati);

— xoʻjalik faoliyatining natijasi (daromad, foyda).

Soliqqa tortish obyekti va soliqqa tortish bilan bogʻliq obyekt har bir soliq va boshqa budjetga undiriladigan majburiy toʻlovlar boʻyicha Soliq kodeksiga asosan aniqlanadi. Masalan, qoʻshimcha qiymat soligʻining soliq solish obyekti boʻlib, soliq solish oboroti va soliq solish importi hisoblanadi.

Soliq majburiyatining paydo boʻlish vaqtini toʻgʻri aniqlash uchun **soliq bazasini tashkil etish usuli** katta ahamiyatga ega boʻladi. Bunda asosan ikki usul qoʻllaniladi – kassa va hisoblash usullari.

Kassa usulida daromad soliq toʻlovchiga aniq davr ichida tushgan summaga toʻgʻri keladi, xarajat deganda esa, real toʻlangan summalar hisobga olinadi. Daromad hisoblashning kassa usuli odatda chakana savdoda qoʻllaniladi, chunki u yerda sotish vaqti toʻlash vaqtiga mos keladi.

Hisoblash usulida ushbu soliq davrida olish huquqi mavjud boʻlgan barcha daromadlar, ularning haqiqatda olingan yoki olinmaganligidan qat'i nazar, hisobga olinadi, xarajatlar esa joriy davrda mulkiy majburiyatlar summasi paydo boʻlishi bilan hosil boʻladi. Bunda majburiyatlar boʻyicha toʻlovlar amalga oshirilganligi ahamiyatga ega boʻlmaydi.

Soliq stavkasi – bu soliq hisoblanadigan soliq bazasining birlik hisobiga toʻgʻri keladigan soliq me'yorini ifodalaydi. Boshqacha qilib aytganda, soliq stavkasi bu soliqqa tortish me'yoridir.

Soliq stavkasi *qat'iy* yoki *foiz* koʻrinishida boʻlishi mumkin. Masalan, qoʻshimcha qiymat soligʻining soliq stavkasi — soliq solish oboroti va import oborotining 20 foiz qismini tashkil etadi (bu foiz stavkasi). Qat'iy soliq stavkasiga yer soligʻining stavkasi misol boʻla oladi. Bunda soliq solish birligiga (yer uchastkasining maydoni) qat'iy soliq summasi toʻgʻri keladi.

«Soliqqa tortish usuli» tushunchasi ham mavjud boʻlib, u soliq bazasining oʻzgarishiga qarab soliq stavkasining oʻzgarish tartibini belgilaydi. Odatda, tajribada soliq stavkasini belgilashda quyidagi toʻrtta usuldan foydalaniladi:

- *teng* hamma soliq toʻlovchilarga teng soliq summasi belgilanadi (ushbu soliq turi odatda yigʻimga tegishli);
- *proporsional* hamma soliq toʻlovchilar uchun teng soliq stavkasi qoʻllaniladi (QQS, aksiz, daromad (foyda) soligʻi);
- *progressiv* soliq bazasining ortishi bilan soliq stavkasi ham ortadi (jismoniy shaxslardan undiriladigan daromad soligʻi);

— *regressiv* – soliq bazasining ortishi bilan soliq stavkasi kamayadi (eksporterlarning daromadlaridan undiriladigan soliq eksportning umumiy sotilgan mahsulotga nisbatan ortishi daromad soligʻi stavkasining kamayishiga olib keladi).

Soliqqa tortishning *progressiv* va *proporsional* usullarining oʻzaro munosabatidan soliqning *ijtimoiy-siyosiy* tabiati kelib chiqadi. Buni shunday tushuntirish mumkin, soliq har doim soliq toʻlovchining huquqini poymol qilish va xususiy mulkini olish bilan amalga oshirilganligi uchun har qanday soliq tizimi aholining ma'lum qatlamlarining jamiyatda tutgan oʻrnidan kelib chiqqan holda, ularning manfaatlarini hisobga oladi. Soliq toʻlagan odam jamiyatda erkin hisoblanadi, chunki u davlat oldidagi oʻz majburiyatini bajarganligi bilan qadrlanadi.

Proporsional soliqqa tortish, odatda jamiyatning boy qatlamlari tomonidan ilgari surilib, buni ular tenglik va odillik tamoyillariga asoslanish deb tushuntiradilar. Progressiv soliq nazariyasini esa jamiyatni ijtimoiy tomonga yon bosganlar qoʻllab-quvvatlaydilar. Ularning fikricha, bunday soliqqa tortish eng odil boʻlib, tengsizlikni kamaytirish bilan birga, u daromadning qayta taqsimlanishiga ta'sir etadi.

Regressiv soliqqa tortish, odatda davlatlar tomonidan iqtisodiyotning ustuvor yoʻnalishini rivojlantirish maqsadida qoʻllaniladi. Bunda **soliqni toʻlash tartibiga** rioya qilish, ya'ni soliqni budjetga undirilishida me'yoriy belgilangan usullar va tartiblardan foydalanish katta ahamiyatga ega boʻladi.

Soliq to 'lashning uch asosiy usullari mavjud:

- deklaratsiya asosida soliq toʻlash (daromad olingandan soʻng soliq toʻlash), ya'ni soliq toʻlovchiga belgilangan muddatlarda soliq organiga oʻzining soliq majburiyatlari boʻyicha rasmiy ravishda ariza berishi lozim. Bunday holatlarda soliqni toʻlash majburiyati soliq toʻlovchining oʻziga yuklatiladi;
- soliq undirishning daromadni toʻlov manbaida undirish usuli (daromad olgunga qadar soliq undirish), ya'ni toʻlov manbaida soliq avtomatik ravishda ushlanadi va budjetga oʻtkazib beriladi. Soliqni ushlash va budjetga oʻtkazish boʻyicha javobgarlik toʻlov manbaiga yuklatiladi (masalan, dividend va foizlarni toʻlanayotgan vaqtda);
- *soliq undirishning kadastr usuli* soliq summasi mulkdan olinishi mumkin boʻlgan oʻrtacha daromadning tashqi belgilaridan kelib chiqib aniqlanadi. Bunda qat'iy hisoblangan soliq summasi belgilanadi (masalan, mol-mulk soligʻi).

Odatda, soliq majburiyatlarini bajarish (barcha yuqorida keltirilgan harakatlar) soliq toʻlovchi tomonidan, agarda Soliq kodeksida boshqa tartib oʻrnatilmagan boʻlsa, mustaqil ravishda amalga oshiriladi. Soliqning asosiy elementlari boʻlgan soliq imtiyozlariga toʻxtalsak. **Soliq imtiyozlardan** asosiy maqsad soliq toʻlovchining soliq boʻyicha majburiyatlarini qisqartirishdir (kamdan kam holatlarda ularga toʻlash muddatlarini kechiktirish yoki boʻlib-boʻlib toʻlash imkoniyati beriladi).

Imtiyoz deganda, soliq toʻlovchilarning ayrim toifalariga boshqa soliq toʻlovchilar bilan qiyoslaganda soliqlar toʻgʻrisidagi qonun hujjatlarida nazarda tutilgan afzalliklar berilishi, shu jumladan soliq (yigʻim) toʻlamaslik yoxud kam hajmda toʻlash imkoniyati tushuniladi.

Prezident Islom Karimov «Jahon moliyaviy-iqtisodiy inqirozi, Oʻzbekiston sharoitida uni bartaraf etishning yoʻllari va choralari» asarida: «2009-yilning 1-yanvaridan sanoat sohasida faoliyat koʻrsatayotgan kichik korxonalar uchun yagona soliq toʻlov stavkasi 8 foizdan 7 foizga kamaytirildi, moliyaviy, maishiy va boshqa xizmatlar koʻrsatayotgan mikrofirmalar va kichik korxonalar yagona soliq toʻlovidan 3 yil muddatga ozod etildi. Bunda mikrofirmalar va kichik korxonalar, nodavlat xoʻjalik yurituvchi subyektlar oladigan dividendlarining investitsiyalarga, avval olingan kreditlar uchun hisob-kitob qilishga yoʻnaltiriladigan qismi 5 yil muddatga soliqdan ozod etildi. Shuningdek, Inqirozga qarshi choralar dasturida 2009-yilda xoʻjalik yurituvchi subyektlarni tekshirishlar sonini kamida yana 30 foizga kamaytirish koʻzda tutilgan», – deb ta'kidlab oʻtgan¹.

Har xil soliqlar boʻyicha imtiyozlar avvaldan iqtisodiyotning ustuvor yoʻnalishlarini qoʻllab-quvvatlash maqsadida qoʻllanilgan. Misol uchun, XIV asr — Amir Temur davrida imtiyozlar yangi yer uchastkalarini oʻzlashtirish maqsadida qoʻllanilgan. Amir Temur tomonidan quyidagi tizim ishlab chiqilgan: sugʻorilmaydigan yangi yerlarga ekin ekib, u yerlarni ekishga moslashtirgan dehqonga birinchi yili olgan daromadini soliqlardan toʻliq ozod qilingan, ikkinchi yili oʻzi qancha toʻlay olsa, shunchasini toʻlagan, uchinchi yildan boshlab esa umumiy belgilangan tartibda soliq toʻlay boshlagan.

Oʻzbekistonda soliq siyosatini ishlab chiqishda mustaqillikning ilk yillaridanoq Prezident Islom Karimovning: «Biz mehnatkashlarni ijtimoiy

¹ *Каримов И. А.* Жахон молиявий-иқтисодий инқирози, Ўзбекистон шароитида уни бартараф этишнинг йўллари ва чоралари. – Т.: «Ўзбекистон», 2009. – Б. 47.

himoya qilish yoʻli bilan bozor iqtisodiyotiga kirib boramiz», — degan koʻrsatmasiga qat'iy amal qilindi.¹

Imtiyozlarni belgilash bilan hukumat davlat rivojlanishi nuqtai nazaridan lozim boʻlgan ishlab chiqarish va ustuvor yoʻnalishdagi tarmoqlarni belgilab beradi. Ammo, bir tarmoq ichida individual korxona yoki tashkilotga imtiyoz berish esa bozor munosabatlari va soliq siyosatiga qarama-qarshidir. Imtiyoz berishning bunday usuli soliq toʻlashning majburiyligi tushunchasiga teskari boʻlib, soliq tizimining yemirilishiga olib keladi.

Soliqlarni har xil belgisiga qarab bir necha xil koʻrinishda tasniflash mumkin. Soliqqa tortish obyektining toʻlovchi bilan davlatning oʻzaro munosabatlariga qarab **bevosita** va **bilvosita** soliqlarga boʻlinadi. Bulardan birinchisi, moddiy boylikni sotib olish va toʻplash jarayonida undirilsa, ikkinchisi — uni sarf qilish jarayonida undiriladi. Bevosita soliqlar jismoniy va yuridik shaxslarning daromadlaridan undirilsa, bilvosita soliqlar esa soliq tizimining boʻgʻiniga koʻchirilgan boʻlib, unda soliq yuki oxirgi foydalanuvchiga — xaridorga koʻchirilgan.

Bevosita soliqlar toʻgʻridan-toʻgʻri soliq subyekti tomonidan toʻlanib, koʻpgina holatlarda uning toʻlov qobiliyatiga qarab undiriladi. Bunga misol sifatida daromad soligʻini, mol-mulk soligʻini, ya'ni soliq toʻlovchining daromadidan yoki mulkidan undiriladigan soliqlarni olish mumkin. Bevosita soliqlar **shaxsiy** va **real** soliqlarga boʻlinadi.

Shaxsiy soliqlar soliq toʻlovchining moliyaviy holatini va toʻlov qobiliyatini hisobga olgan holda, uning haqiqatda topgan daromadidan undiriladi.

Real soliqlar toʻlovchining moliyaviy holatini hisobga olmagan holda, uning faoliyatini yoki tovarlarini, ya'ni mol-mulkni sotish, sotib olish yoki foydalanishni (egalik qilishni) soliqqa tortadi. Shu bilan birgalikda, real soliqlar toʻlovchining toʻlov holatini hisobga olmaydi. Bularga asosan mulk soliqlari (mol-mulk va yer soliqlari) kiradi.

Bilvosita soliqlar *yakka bilvosita*, bunda odatda qat'iy, ma'lum guruhdagi tovarlar soliqqa tortiladi (ma'lum bir turdagi aksiz tovarlari), *universal bilvosita*, bunda imtiyozi borlaridan tashqari hamma tovarlar, ishlar va xizmatlarga qoʻyilgan soliqlarga (QQS) va *bojxona bojlariga* boʻlinadi.

 $^{^1}$ *Каримов И. А.* Ўзбекистон бозор муносабатларига ўтишнинг ўзига хос йўли. – Т.: «Ўзбекистон», 1993. – Б. 67.

Agarda bevosita soliqlarning oxirgi toʻlovchisi sifatida daromad oluvchi boʻlsa, bilvosita soliqlarning toʻlovchisi boʻlib tovar iste'molchilari hisoblanadi. Bunda bilvosita soliq tovarning narxiga ustama sifatida qoʻyiladi. Soliqlarni oʻrnatish va yangilarini kiritish darajasiga va ularning foydalanishiga qarab, umumdavlat va mahalliy soliqlarga boʻlinadi.

Oʻzbekiston Respublikasi Soliq kodeksining 23-moddasida belgilanganidek, Oʻzbekiston Respublikasi hududida *umumdavlat* soliqlari, *majburiy* toʻlovlar va yigʻimlar amal qiladi.

Umumdavlat soliqlari va boshqa majburiy toʻlovlarga quyidagilar kiradi:

- 1) yuridik shaxslardan olinadigan foyda soligʻi;
- 2) jismoniy shaxslardan olinadigan daromad soligʻi;
- 3) qoʻshilgan qiymat soligʻi;
- 4) aksiz soligʻi;
- 5) yer qa'ridan foydalanuvchilar uchun soliqlar va maxsus to'lovlar;
- 6) suv resurslaridan foydalanganlik uchun soliq.

Boshqa majburiy toʻlovlar:

- 7) ijtimoiy jamgʻarmalarga majburiy toʻlovlar: yagona ijtimoiy toʻlov, fuqarolarning budjetdan tashqari Pensiya jamgʻarmasiga majburiy ajratmalar, budjetdan tashqari Pensiya jamgʻarmasiga majburiy ajratmalar;
- 8) Respublika yoʻl jamgʻarmasiga majburiy toʻlovlar: Respublika yoʻl jamgʻarmasiga majburiy ajratmalar, Respublika yoʻl jamgʻarmasiga majburiy yigʻimlar;
 - 9) davlat boji;
 - 10) bojxona toʻlovlari.

Umumdavlat soliqlari har yili qonuniy tartibda belgilanadigan me'yorlar boʻyicha tegishli budjetlar oʻrtasida taqsimlanadi.

Mahalliy soliqlar va boshqa majburiy toʻlovlarga quyidagilar kiradi:

- 1) mol-mulk soligʻi;
- 2) yer soligʻi;
- 3) obodonlashtirish va ijtimoiy infratuzilmani rivojlantirish soligʻi;
- 4) jismoniy shaxslardan transport vositalariga benzin, dizel yoqilgʻisi va gaz ishlatganlik uchun olinadigan soliq.

Boshqa majburiy toʻlovlar:

5) ayrim turdagi tovarlar bilan chakana savdo qilish va ayrim turdagi xizmatlarni koʻrsatish huquqi uchun yigʻim.

Moliya yilida soliq solinadigan daromadga (foydaga) ega boʻlgan yuridik shaxslar daromad (foyda) soligʻi toʻlovchilar hisoblanadi. Yuridik shaxslar daromad (foyda) soligʻi boʻyicha budjet bilan hisob-kitoblarni mustaqil ravishda amalga oshiradilar. Ayrim tarmoqlar yuridik shaxslarning birlashmalari budjet bilan hisob-kitoblarni Oʻzbekiston Respublikasi Vazirlar Mahkamasining qaroriga binoan markazlashtirilgan tartibda amalga oshirishlari mumkin.

Jami daromad bilan ushbu kodeksga muvofiq, belgilanadigan chegirmalar oʻrtasidagi farq sifatida hisoblangan daromad (foyda) soliq solish obyektidir. Jami daromadga yoʻnaltirilgan tovar, bajarilgan ishlar, koʻrsatilgan xizmatlar va boshqa operatsiyalar uchun yuridik shaxs olishi lozim boʻlgan (olgan) yoki tekinga olgan pul yoxud boshqa mablagʻlar kiritiladi.

Bunday daromadlar jumlasiga quyidagilar kiradi:

- 1) tovarlarni (ishlarni, xizmatlarni) realizatsiya qilishdan keladigan tushumlar;
- 2) asosiy vositalar, nomoddiy aktivlar, qimmatli qogʻozlar, intellektual mulk obyektlari, materiallar va boshqa aktivlarni realizatsiya qilishdan keladigan daromadlar;
 - 3) foizlar koʻrinishidagi daromadlar;
 - 4) dividendlar;
 - 5) tekinga olingan mol-mulklar;
 - 6) mol-mulkni ijaraga berishdan keladigan daromadlar;
 - 7) royalti;
- 8) tekin moliyaviy yordamlar (davlat budjetidan berilgan subsidiyalar bundan mustasno);
- 9) da'vo muddati o'tkazib yuborilgan kreditorlik va deponent qarzdorlikni hisobdan chiqarishdan olingan daromadlar;
- 10) ilgari chegirib tashlangan xarajatlar, zararlar yoki shubhali qarzlarning oʻrnini qoplash tariqasida olingan daromadlar;
 - 11) valuta hisobvaraqlaridagi kurs boʻyicha musbiy farqlar;
 - 12) favqulodda daromadlar;
 - 13) boshqa daromadlar.

Soliq solinadigan daromadlarni (foydalarni) belgilashda jami daromaddan quyidagi chegirmalar ajratiladi:

– qoʻshilgan qiymat soligʻi, aksiz soligʻi, mol-mulk soligʻi, yer soligʻi, yer osti boyliklaridan foydalanganlik uchun soliq, ekologiya soligʻi, suv resurslaridan foydalanganlik uchun soliq, shuningdek bojxona bojlari summalari. Moliya yilida soliq solinadigan daromadga ega boʻlgan jismoniy shaxslar jismoniy daromadiga solinadigan soliqlarni toʻlashlari shart. Jismoniy shaxslarning jami yillik daromadiga soliq toʻlovchi olishi lozim boʻlgan (olgan) yoki tekinga olgan pul yoxud boshqa mablagʻlar, shu jumladan:

- mehnatga haq toʻlash shaklida olinadigan daromadlar;
- jismoniy shaxslarning mulkiy daromadlari;
- jismoniy shaxslarning tadbirkorlik faoliyatidan keladigan yalpi daromadlari kiradi.

Jismoniy shaxslarning tadbirkorlik faoliyatidan keladigan yalpi daromaddan soliq solinadigan daromadlarni aniqlash vaqtida mazkur yalpi daromadni olish (topish) uchun qilingan xarajatlar, majburiy toʻlovlar, chiqimlar va ajratmalar chegirib tashlanadi.

Jismoniy shaxslarning tadbirkorlik faoliyatidan keladigan yalpi daromadidan chegirib tashlanishi lozim boʻlgan xarajatlar, majburiy toʻlovlar, chiqimlar va ajratmalarni aniqlash tartibi Oʻzbekiston Respublikasining Vazirlar Mahkamasi tomonidan belgilanadi. Qoʻshilgan qiymat soligʻi tovarlar ishlab chiqarish (ishlar bajarish, xizmatlar koʻrsatish), ularni realizatsiya qilish hamda Oʻzbekiston Respublikasining hududiga tovarlar (ishlar, xizmatlar) import qilish jarayonida qoʻshilgan qiymatning bir qismini budjetga ajratishdir.

Tadbirkorlik faoliyati bilan shugʻullanuvchi yuridik shaxslar qoʻshilgan qiymat soligʻi toʻlovchilardir. Tovarlarni (ishlarni, xizmatlarni) import qiluvchi yuridik va jismoniy shaxslar import qilinayotgan ana shu tovarlar (ishlar, xizmatlar) boʻyicha qoʻshilgan qiymat soligʻi toʻlovchilardir.

Oʻzbekiston Respublikasi hududida chiqarilgan tovarlarga va import qilingan aksiz toʻlanadigan tovarlarga aksiz soligʻi solinadi. Oʻzbekiston Respublikasida aksiz toʻlanadigan tovarlar ishlab chiqarayotgan yoki bunday tovarlarni import qilayotgan yuridik va jismoniy shaxslar budjetga aksiz soligʻi toʻlaydilar.

Soliq solinadigan mol-mulkka ega boʻlgan yuridik va jismoniy shaxslar mol-mulk soligʻi toʻlovchilardir. Yuridik shaxslar uchun asosiy vositalar va nomoddiy aktivlarning oʻrtacha yillik balans qiymati soliq solish obyekti hisoblanadi.

Jismoniy shaxslar uchun:

— ularning mulki boʻlgan uy-joylar, kvartiralar, chorbogʻ va bogʻ uylari, garajlar va boshqa imoratlar, binolar va inshootlar qiymati;

— ularning mulki boʻlgan avtomobillar, motorli qayiqlar, vertolyotlar, samolyotlar va boshqa transport vositalari dvigatellarining quvvati soliq solish obyekti hisoblanadi.

O'z mulkida, egaligida yoki foydalanishida yer uchastkalariga ega bo'lgan yuridik va jismoniy shaxslar yer solig'i to'lovchilardir.

Yuridik shaxslar uchun quyidagi yer uchastkalari soliq solinadigan obyekt hisoblanadi:

- 1) qonun hujjatlarida belgilangan tartibda mulk qilib olingan yer uchastkalari;
- 2) qishloq yoki oʻrmon xoʻjaligini yuritish uchun egalik qilishga berilgan yer uchastkalari;
- 3) korxonalar, binolar va inshootlar qurish yoki qishloq xoʻjaligiga taalluqli boʻlmagan boshqa maqsadlarda foydalanish uchun berilgan yer uchastkalari;
- 4) korxonalar, binolar yoki inshootlarga boʻlgan mulk huquqi oʻtishi bilan birga egalik qilish va foydalanish huquqi ham oʻtgan yer uchastkalari.

Jismoniy shaxslar uchun quyidagi yer uchastkalari soliq solinadigan obyekt hisoblanadi:

- 1) turar joylar etagida va jamoat yerlarida shaxsiy yordamchi xoʻjalik yuritish uchun meros qilib qoldiriladigan, umrbod egalik qilishga berilgan yer uchastkalari;
- 2) yakka tartibda uy-joy qurish uchun meros qilib qoldiriladigan, umrbod egalik qilishga berilgan yer uchastkalari;
- 3) jamoa bogʻdorchiligi, uzumchiligi va polizchiligini yuritish uchun berilgan yer uchastkalari;
 - 4) xizmat yuzasidan qonun hujjatlariga muvofiq berilgan chek yerlar;
- 5) meros boʻyicha, hadya qilinishi yoki sotib olinishi natijasida uyjoy, dala hovli bilan birgalikda egalik qilish huquqi ham oʻtgan yer uchastkalari;
- 6) qonun hujjatlarida belgilangan tartibda mulk qilib olingan yer uchastkalari;
- 7) tadbirkorlik faoliyatini yuritish uchun doimiy foydalanishga yoki ijaraga berilgan yer uchastkalari.

Yer osti boyliklaridan foydalanganlik uchun soliqni Oʻzbekiston Respublikasi hududida foydali qazilmalar qazib olishni, shuningdek foydali qazilmalar qazib olish bilan bogʻliq boʻlmagan yer osti inshootlari qurish va ulardan foydalanishni amalga oshiruvchi yuridik va jismoniy shaxslar toʻlaydilar. Yer osti boyliklaridan foydalanganlik uchun soliq solish obyektlari quyidagilardan iboratdir:

- foydali qazilmalar (shu jumladan, qoʻshilib chiqadigan foydali qazilmalar va qimmatli komponentlar) qazib olish hajmi;
- texnogen hosilalarning (mineral xom ashyo qazib olish va ularni qayta ishlash chiqindilarining) hajmi;
- foydali qazilmalar qazib olish bilan bogʻliq boʻlmagan yer osti inshootlari hajmi;
- rangli toshlar xom ashyosi, paleontologiya qoldiqlari va boshqa geologik kolleksiya materiallari namunalarini toʻplash uchun berib qoʻyilgan yer qa'ri uchastkasi maydoni.

Tovarlar ishlab chiqaruvchi, ishlar bajaruvchi, xizmatlar koʻrsatuvchi yuridik shaxslar ekologiya soligʻi toʻlaydilar.

Tovarlar ishlab chiqarish (ishlar bajarish, xizmatlar koʻrsatish) tannarxi (muomala xarajatlari) soliq solish obyektidir.

Oʻz faoliyatida bevosita suvdan foydalanuvchi yuridik shaxslar suv resurslaridan foydalanganlik uchun soliq toʻlaydilar. Ishlab chiqarish va texnika ehtiyojlari uchun yer usti va yer osti manbalaridan foydalanilgan suv resurslarining hajmi suv resurslaridan foydalanganlik uchun soliq solish obyekti hisoblanadi.

Oʻzbekiston Respublikasi Soliq kodeksining 162-moddasida «Soliq davri. Hisobot davri» qayd etilgan boʻlib, kalendar yil soliq davri, yilning choragi hisobot davridir deb yozilgan. Darhaqiqat, soliq haqidagi qonun hujjatlarida belgilangan muddatlar kalendar sana yoki yillar, yil choraklari, oylar, oʻn kunliklar va kunlar bilan hisoblanadigan davr oʻtishi bilan belgilanadi.

Soliqlar va yigʻimlarni toʻlash yuridik shaxslar tomonidan naqd pulsiz tartibda tegishli summani budjet tasnifining tegishli boʻlimi va paragrafiga oʻtkazish yoʻli bilan, jismoniy shaxslar tomonidan esa, naqd pul va pul oʻtkazish yoʻli bilan amalga oshiriladi.

Oʻzbekiston Respublikasi soliq qonunchiligi har bir shaxsning belgilangan soliqlar va yigʻimlarni budjetga toʻlashi shartligi, adolatli soliqqa tortish, soliq tizimining yagonaligi va soliq qonunchiligining oshkoralik prinsiplariga asoslanadi. Soliq qonunchiligidagi prinsiplarning ahamiyati shundan iboratki, Oʻzbekiston Respublikasi soliq qonunchiligidagi tartib, Soliq kodeksida keltirilgan soliqqa tortish prinsiplariga qarama-qarshi chiqa olmaydi.

Soliq kodeksi – davlat soliq tizimining huquqiy asoslarini, soliq toʻlovchilarning huquqlari hamda majburiyatlarini, soliq ishlarini yuritish, qonun buzilgan hollarda tegishli javobgarlikka tortish tartib-qoidalarini belgilab beruvchi qonun. Yangi tahrirdagi «Oʻzbekiston Respublikasining

Soliq kodeksi Oʻzbekiston Respublikasi Oliy Majlisi palatalari tomonidan 2007-yil dekabr oyida qabul qilinib, 2008-yil 1-yanvardan amalga kiritilgan. Soliq toʻlamaslik, soliq toʻlashdan qochish va boshqa jinoyatlar, shuningdek, Oʻzbekiston Respublikasining Bojxona kodeksida (7-modda), Ma'muriy javobgarlik toʻgʻrisidagi kodeks (174, 167-moddalarda) hamda Jinoyat kodeksida (184-modda) koʻzda tutilgan javobgarliklar orqali tartibga solinadi.

3. Soliqlarning budjet shakllanishida ahamiyati va davlatning fiskal siyosati

Soliqlar davlatning barcha yoʻnalishdagi faoliyati uchun zarur boʻlgan asosiy moliya manbalaridan biri boʻlib, u hukumatning ustuvor yoʻnalishlarini rivojlantirish boʻyicha amalga oshirishda asosiy qurolidir. Davlat iqtisodiyotini soliqlar orqali tartibga solish bu davlat budjetini tashkil etishning usuli boʻlsa, soliqqa tortish yoʻli bilan esa jamiyatdagi u yoki bu jarayonlarining rivojlanishiga ta'sir etishi mumkin boʻladi. Shunday qilib, davlatning mavjudligi bu soliqlar bilan chambarchas bogʻliq boʻladi, chunki soliq tushumlari davlatning iqtisodiy mustaqilligining asosiy manbai boʻlib xizmat qiladi.

Fiskal siyosat bu davlatning soliq – budjet siyosatidir, unga binoan soliqlar belgilanadi, budjet mablagʻlari aniq maqsadlar yoʻlida ishlatiladi. Davlatning soliq siyosati soliqlar vositasida budjetga pul toʻlashga qaratiladi. Unga muvofiq, soliq turlari aniqlanadi, soliq stavkalari, soliq solinadigan obyektlar, soliq imtiyozlari, soliq undirish tartibi belgilanadi.

Soliqlar davlatning iqtisodiyotiga ta'sir etishida qoʻllaniladigan asosiy vositadir. Soliq tizimi nafaqat soliqlarni undirish, balki, birinchi galda, ragʻbatlantirish xususiyatiga ega boʻlishi lozim.

Soliqlar zayomlar bilan birgalikda har qanday davlatning mavjudligini hal qiluvchi asosiy manbadir. Davlat budjetidagi soliqlar va zayomlarning yuki orasidagi oʻzaro munosabat uning toʻlay olish qobiliyati va dunyo hamjamiyatidagi oʻrnini belgilab beradi. Soliq tushumlari yetarli darajada boʻlmaganda, davlat boshqa davlatlarga kredit berishlarini soʻrab murojaat etadi yoki aholi oʻrtasida davlat zayomlarini (ichki qarz olish) tarqatadi yoki chet ellik investorlarga maxsus qimmatbaho qogʻozlar (tashqi qarz olish) chiqarib sotadi.

Soliq munosabatlari umumdavlat darajasida daromadlar tizimini yaratish munosabati bilan vujudga keladigan obyektiv holatdir. Soliqlarsiz davlatning oʻzi ham boʻlmaydi. Ba'zi davlatlarda esa soliqlar umuman

yoʻq. Masalan, Shimoliy Koreyaning Konstitutsiyasida quyidagilar yozilgan: «Davlat soliqlar tizimini eski jamiyatning vorisi sifatida butunlay chiqarib tashlaydi».

Davlatning soliq siyosati ilmiy asosga, iqtisodiy oʻsish maqsadiga asoslangan, hukumat va boshqaruv organlarining ishlab chiqarishni ta'minlash va jamiyat boyligini oshirishga qaratilgan taktik va strategik huquqiy harakatidir. Soliq siyosatini yuritishdan maqsad faqat soliq toʻlovchilardan soliq toʻlovlarini toʻgʻri tartibda undirish boʻlib qolmay, balki soliqqa tortish natijasida ulardagi har tomonlama xoʻjalik-iqtisodiy munosabatlarini baholash hamdir. Demak, soliq siyosati bu qonunni avtomatik ravishda bajarish boʻlib qolmasdan, balki uni takomillashtirish hamdir.

Iqtisodchi olimlar davlat soliq siyosatini uch turga boʻladilar:

birinchisi — maksimal soliq undiruvchilar siyosati, ular «mumkin boʻlgan barchasini ol» prinsipiga asoslanganlar. Bunday holatda davlat uchun «soliq qopqoni» oʻrnatilgan, ya'ni soliqlarni koʻtarish bilan davlat daromadlari baribir ortmaydi;

ikkinchisi – aqlli soliqlar siyosati, bunday siyosatdan yaxshi soliq iqlimi ta'minlanadi va natijada tadbirkorlikning rivojlanishiga olib keladi;

uchinchisi – shunday soliq siyosati boʻlib, unda soliq undirish darajasi yuqori boʻlishi bilan birga ijtimoiy himoya ham yuqori boʻladi.

Iqtisodi rivojlangan davlatlarda yuqorida keltirilgan soliq siyosatlaridan bir vaqtning oʻzida bir nechtasi qoʻllanilishi mumkin.

Koʻpgina davlatlarda budjetning asosiy qismini soliqlar tashkil etadi. Masalan, Fransiyada davlat budjetining 95 foiz, AQShda 90 foiz, Germaniyada 80 foiz, Rossiyada 93 foiz va Oʻzbekistonda oʻrtacha 96 foizini soliqlar tashkil etadi¹.

villarida soliq siyosati. Mustaqillik O'zbekistonda soliq yukini qonunchiligini takomillashtirish, soliq bosqichma-bosqich kamaytirib borish, soliq to'lovchilarni ularning xo'jalik faoliyatiga asossiz aralashuvlardan himoya qilishni kuchaytirish bo'yicha chora-tadbirlar koʻrish bilan bir vaqtda, soliqqa tortish tizimini takomillashtirish va soddalashtirish borasida tizimli ishlar olib borilmoqda. Mustaqillik yillarida yurtimizda keng miqyosdagi soliq islohotlari amalga oshirildi. Buning natijasida bozor iqtisodiyoti talablariga javob beradigan, davlat budjetini to'ldirishni va zarur davlat xarajatlarini moliyalashtirishni ta'minlaydigan va shuningdek, aholi daromadlari o'sishini, iqtisodiyotni


449

¹ Qarang: Завалишина И. А. Соликлар: назария ва амалиёт. – Т., 2005. – Б. 36.

modernizatsiya qilish, uning yangi tarmoqlari, kichik biznes va xususiy tadbirkorlikni rivojlantirishni ragʻbatlantiradigan zamonaviy soliq tizimi yaratildi.

1-жадвал

Jismoniy shaxslardan olinadigan daromad soligʻi maksimal stavkasining pasayishi va shkalaning oʻzgarishi




Iqtisodiyotda soliq yukining bosqichma-bosqich kamaytirilishi olib borilayotgan soliq islohotlarining eng muhim natijasi, yuqori iqtisodiy oʻsish sur'atlarini ta'minlashning eng muhim omillaridan biri boʻldi. Misol uchun, agar 1994-yili korxonalarning daromad soligʻi stavkasi 45 foizni tashkil etgan boʻlsa, 2010-yilga kelib, u 9 foizga tushdi.

Bu borada takroriy soliqqa tortishga yoʻl qoʻymaslik hamda xoʻjalik subyektlari uchun soliq bojini kamaytirish maqsadida ilgari daromad soligʻi toʻlashda soliqqa tortiladigan bazaga kiritilgan ish haqi xarajatlari va boshqa bir qator xarajatlar daromad soligʻi boʻyicha soliqqa tortish bazasidan chiqarildi.


Ayni vaqtda ichki talabning kengayishi, aholi real daromadlarining koʻpayishi va turmush darajasining yanada oshishini ragʻbatlantirish maqsadida soliqqa tortish tizimini soddalashtirish va jismoniy shaxslarning daromad soligʻi stavkasini sezilarli darajada pasaytirish chora-tadbirlari amalga oshirildi.

Mustaqillik yillarida yagona ijtimoiy toʻlov stavkasining pasayishi (foizda)



Masalan, agar mustaqillikning dastlabki yillarida jismoniy shaxslardan olinadigan daromad soligʻi eng yuqori – 60 foizli stavka bilan 7-shkala boʻyicha hisoblangan va undirilgan boʻlsa, hozirgi paytda 3-shkala asosida undirilmoqda, bunda eng yuqori soliq stavkasi 22 foizni tashkil etmoqda. Shu bilan birga, xoʻjalik subyektlari uchun xodimlarni yollash xarajatlari kamaytirildi: agar ishga yollovchilarning majburiy ijtimoiy sugʻurta tizimiga (Pensiya jamgʻarmasi, Bandlik jamgʻarmasi va Kasaba uyushmalari federatsiyasi kengashi) toʻlovlari 1994-yilda ish haqi fondining 40 foizini tashkil etgan boʻlsa, keyingi yillarda bosqichmabosqich 24 foizga tushirildi.

Soliq yukining kamayishi va YAIMning o'sishi



Iste'mol talabi va tovar (ish, xizmat)larni ishlab chiqarishni kengaytirishni ragʻbatlantirish maqsadida qoʻshilgan qiymat soligʻi stavkasi 30 foizdan 20 foizga tushirildi. Bu jarayonda iqtisodiy oʻsishni ta'minlash va xoʻjalik faoliyatini jadallashtirish hisobidan budjetning yalpi daromadlarida qoʻshilgan qiymat soligʻi tushumi barqaror ravishda oshib bordi.

Bundan tashqari, 1991-yildan bugungi kungacha stavkalarni pasaytirish bilan bir qatorda soliqlar unifikatsiya qilindi, ya'ni birxillashtirildi hamda bir qator bir-birini takrorlaydigan va kam samara beradigan soliq hamda majburiy to'lovlar bekor qilindi. Natijada hozirgi vaqtda O'zbekiston asosiy soliq stavkalari miqdori bo'yicha soliqqa tortish darajasi yuqori bo'lmagan davlatlardan biri hisoblanadi, jami soliq yuki esa bizda yalpi ichki mahsulotga nisbatan 21,9 foizdan oshmaydi.

Sanoatning eksportga yoʻnaltirilgan yangi tarmoqlarini jadal rivojlantirish, ishlab chiqarishni modernizatsiya qilish, texnik va texnologik yangilash maqsadida mamlakatimizning amaldagi qonunchiligi xoʻjalik subyektlariga daromad soligʻi, mol-mulk soligʻi va bojxona toʻlovlari boʻyicha keng miqyosda imtiyozlar yaratib bermoqda.

Kichik tadbirkorlik subyektlarining yagona soliq toʻlovi soliqlar, budjetdan tashqari (Pensiya jamgʻarmasiga, Respublika yoʻl jamgʻarmasiga va Maktab ta'limi jamgʻarmasiga majburiy toʻlovlar oʻrniga) koʻrinishidagi soddalashtirilgan soliqqa tortish tizimi joriy etilishi kichik biznes va xususiy tadbirkorlikni rivojlantirishni ragʻbatlantiradigan qoʻshimcha omil boʻldi.

2-jadval

Kichik biznes va xususiy tadbirkorlik subyektlari uchun soliq stavkalarining pasayish tendensiyasi (foizda1)

Ī	1996-y.	2000-у.	2005-у.	2009-у.	2010-у.	2011-у.	2012-y.
Ī	38,0	31,0	15,0	8,0	7,0	6,0	5,0

Jadvalga muvofiq, ushbu soliqning jami stavkasi yalpi tushumning 1996-yildagi 38,0 foizidan 2012-yilda 5 foizga tushirildi.

1992-yildan 2010-yilgacha boʻlgan davrda soliq toʻlovi stavkalarining oʻzgarishi

Soliq turlari	1992–2009-yillardagi eng yuqori soliq stavkalari	2010-yilda oʻrnatilgan stavkalar	Pasayish
Qoʻshimcha qiymat soligʻi	30 foiz	20foiz	1,5 barobar
Yuridik shaxslarning daromad (foyda) soligʻi	45 foiz	9 foiz	5 barobar
Yuridik shaxslar uchun mulk soligʻi	5 foiz	3,5 foiz	1,4 barobar
Kichik korxonalar uchun yagona soliq toʻlovi	15,2 foiz	7,0 foiz	2,2 barobar
Jismoniy shaxslarning daromad soligʻi	60 foizgacha	22 foizgacha	2,7 barobar
Yagona ijtimoiy toʻlov	40 foiz	25 foiz	1,6 barobar


Ayni vaqtda, kichik tadbirkorlik subyektlarining soliq hisobotlarini taqdim etish tizimi ham takomillashtirilib, 2005-yilning 1-iyulidan kichik korxona va kichik tadbirkorlik subyektlarining davlat soliq idoralariga taqdim etadigan barcha soliq toʻlovlarining taqdim etish davrlari oylikdan choraklikka oʻzgartirildi.

Davlat budjeti daromadlarining yagona va uygʻun tizimini shakllantirishda 2008-yildan boshlab amalga joriy etilgan yangi tahrirdagi Soliq kodeksi muhim rol oʻynadi. Ushbu kodeks soliq toʻlovchilarning qonuniy huquqlarini ta'minlashni yanada kuchaytirish, ularni nazorat organlarining qonunga xilof xatti-harakatlaridan himoyalanishini oshirish va shuningdek, soliq hamda majburiy toʻlovlarni hisoblash mexanizmi va toʻlash tartibini takomillashtirishni koʻzda tutadi.

Oʻtgan davr mobaynida soliq stavkalarining pasayishi va optimallashtirilishi xalqaro andozalarga binoan daromad (foyda) soligʻini hisoblash tizimining takomillashtirilishi hisobidan toʻgʻridan-toʻgʻri soliqlarning yalpi ichki mahsulotdagi ulushi 1995-yildagi 11,5 foizdan 2010-yilda 5,7 foizga tushirildi. Soliq islohotlari amalga oshirilgan yillar mobaynida soliq yukining kamaytirilishiga qaramasdan, soliq va boshqa majburiy toʻlovlar tushumining barqaror oʻsishini ta'minlashga erishildi.

Mustaqillik yillarida soliq tizimini isloh qilish boʻyicha amalga oshirilgan chora-tadbirlar natijasida toʻlanayotgan soliqlar tarkibida ijobiy oʻzgarishlar roʻy berdi. Jumladan:

- tabiiy resurslardan, birinchi navbatda, yer osti boyliklaridan foydalanish bilan bogʻliq soliqlar ulushi sezilarli darajada oshdi;
- umumiy soliq tushumlari hajmida jismoniy shaxslarning daromad soligʻi ulushi koʻpaydi;
- daromad (foyda) soligʻi ulushi qariyb ikki barobar pasaydi va bu soliq stavkasining 5 barobaridan ortiq pasayishi hamda soliqqa tortish bazasidan chiqarib tashlanadigan xarajatlar roʻyxatining kengayishi bilan bogʻliq;
- yagona ijtimoiy to'lov ulushi sezilarli darajada kamaydi, bu uning stavkalari bir yarim barobardan ortiq pasayishi bilan bog'liq;
- soliq stavkalari ikki barobar pasaytirilgan bir paytda, kichik biznes subyektlari tomonidan toʻlanayotgan soliqlar ulushi koʻpaydi.



Oʻzbekiston Respublikasi Prezidentining 2010-yil 24-dekabrda «Oʻzbekistonning asosiy makroiqtisodiy koʻrsatkichlari va davlat budjeti parametrlari toʻgʻrisida»gi qaroriga muvofiq, «Davlat budjeti parametrlari va asosiy makroiqtisodiy koʻrsatkichlari prognozlari» tasdiqlandi. Ushbu hujjatga muvofiq, YAIMning oʻsishi 2011-yilda 8,3 foiz, sanoat ishlab chiqarishi 9,3 foiz, qishloq xoʻjaligi mahsulotlari ishlab chiqarish 5,8

foiz, kapital qoʻyilmalar 12,4 foiz, chakana savdo aylanmasi 15,4 foiz, inflatsiya 7–9 foiz darajasida rejalashtirilgan.

Budjet daromadlari (davlatning maqsadli fondlari daromadlari hisobisiz) 16,178 trln. soʻmdan yuqori hajmda rejalashtirilgan (2010-yilda – 13,116 trln.):

- 2011-yilda toʻgʻri soliqlarni qoʻshgan holda 4,238 trln. soʻm boʻlishi kutilgan. 2010-yilda bu koʻrsatkich 3,42 trln. soʻmni tashkil etgan;
- 2011-yilda egri soliqlar 8,656 trln soʻmni tashkil etishi kutilgan.
 2010-yilda 6,973 trln. soʻmni tashkil etgan;
- 2011-yilda resurs toʻlovlari va mulk soligʻi 2,308 trln soʻmni tashkil etishi kutilgan. 2010-yilda 1,974 trln. soʻmni tashkil etgan;
- 2011-yilda yuqori foyda soligʻi 142,314 mlrd soʻmni tashkil etishi kutilgan. 2010-yilda 25,695 mlrd. soʻmni tashkil etgan;
- 2011-yilda boshqa daromadlar 831,754 mlrd. soʻmni tashkil etishi kutilgan. 2010-yilda 722,145 mlrd. soʻmni tashkil etgan;

Davlat budjeti xarajatlari (maqsadli fondlar hisobisiz) 16,991 trln. soʻmdan yuqori hajmda rejalashtirilgan (2010-yilda 13,732 trln.).

- 2011-yilda ijtimoiy sohalar va aholini ijtimoiy qoʻllab-quvvatlashga sarflanayotgan xarajatlar barcha xarajatlarning uchdan ikki qismi, 10,112 trln. soʻmni tashkil etdi. 2010-yilda 8,113 trln. soʻmni tashkil etgan;
- 2011-yilda NNT, NPO va fuqarolik jamiyati institutlari uchun 5 mlrd. soʻm sarflandi. 2010-yilda 4,5 mlrd. soʻmni tashkil etgan;
- 2011-yilda iqtisodiyot uchun xarajatlar 1,952 trln. soʻmni tashkil etdi. 2010-yilda 1, 573 trln. soʻmni tashkil etgan;
- 2011-yilda markazlashgan investitsiyalarni moliyalashtirish 950 mlrd. soʻmni tashkil etdi, 2010-yilda 825 mlrd. soʻmni tashkil etgan.

Davlat hokimiyati organlari, boshqaruvi va sudlarni moliyalashtirishga budjetning xarajatlar qismidan 472,304 mlrd. soʻm (2010yilda 352 mlrd. soʻm), fuqarolarning oʻzini oʻzi boshqarish organlariga, Vazirlar Mahkamasining zaxira fondi uchun 57 mlrd. soʻm, boshqa xarajatlar uchun 3,29 trln. soʻm ajratilgan.

2011-yilda davlat budjeti defitsitining chegaraviy hajmi YAIMga nisbatan 1 foiz hisobida yoki 812,536 mlrd. soʻmni (2010-yilda 616,105 mlrd. soʻm) tashkil etdi, budjet taqchilligini moliyalashtirish davlat budjetining yil boshiga erkin qoldiq vositalaridan va noinflyatsion manbalari hisobidan amalga oshiriladi.

Oʻzbekiston Respublikasi Prezidentining 2010-yil 24-dekabrda «Oʻzbekistonning asosiy makroiqtisodiy koʻrsatkichlari va Davlat budjeti

parametrlari toʻgʻrisida»gi qaroriga muvofiq, 2011-yilda birqancha soliq va yigʻim stavkalari yangilandi. Hujjatga asosan 2011-yil 1-yanvardan jismoniy shaxslar daromadlariga soliqlarning minimal stavkasi 1 foizga, ya'ni 11 foizdan 10 foizga va oʻrtacha stavkasi 17 foizdan 16 foizga kamaytirildi. Shu bilan birga soliqqa tortish shkalasining quyi plankasi eng kam ish haqining olti barobaridan besh barobarigacha pasaytirildi. Stavka yuqori shkalasi oʻzgarmasdan (22 foiz) qoldi.

Jismoniy shaxslardan olinadigan mulk soligʻi (turar joylar va kvartiralar, dala hovlilar, garaj va boshqa qurilmalar, bino va inshootlar) 0,5 foizdan 0,75 foizgacha oshdi. Shu oʻrinda shaharlardagi turar joylar va kvartiralarning maydoni (200 kv.m.dan yuqori) boʻlganda oshiruvchi koeffitsiyent belgilangan. Jismoniy shaxslarning transport vositasi uchun 1 litr benzin va dizel yoqilgʻisi hamda 1 kg quyuq (siqilgan) gazga olinadigan soliq 145 soʻmdan 175 soʻmgacha, transport vositalari uchun iste'mol qilinadigan suyuq gaz uchun 140 soʻm qilib belgilandi.

Mikrofirma va kichik korxonalar uchun yagona soliq toʻlovi stavkasi bazasi 7 foizdan 6 foizga tushirildi. Hisob-kitoblarga koʻra mazkur tadbir xoʻjalik subyektlari uchun 2011-yilda 50 mlrd. soʻmni tejash imkonini beradi va bu mablagʻ korxonalarni ishlab chiqarishini kengaytirishga sarflanadi. Yagona ijtimoiy toʻlov stavkasi oʻzgarmagan holda – mehnat haqi fondining 25 foiz darajasida qoldi.

Mikrofirmalar va kichik korxonalardan tashqari xoʻjalik subyektlarini zamonaviy texnikalarni joriy etishni ragʻbatlantirish maqsadida 2011-yildan boshlab jismonan va ma'naviy eskirgan, xizmat muddati oʻtgan uskunalar uchun ularning dastlabki (qayta tiklangan) qiymatidan 0,25 foiz toʻlov undiriladi.

4. Soliq qonunchiligi buzilishining ijtimoiy-iqtisodiy oqibatlari

Ta'kidlash joizki, o'tgan yil iqtisodiy islohotlarni yanada chuqurlashtirishning muhim bosqichi bo'ldi. Davom etayotgan jahon moliyaviyiqtisodiy inqirozi sharoitida O'zbekiston iqtisodiyoti barqaror sur'atlar bilan o'sib borayotgani taraqqiyotning milliy modeli samarasini namoyon qildi.

Ushbu yoʻnalishda turli xil iqtisodiy faoliyat turlarini, erkin tadbirkorlikni rivojlantirishga yoʻnaltirilgan qator qonun hujjatlari qabul qilindi. Xususan, iste'molchilarning va xoʻjalik yurituvchi subyektlarning huquqlarini himoya qilish, shuningdek, bozorlar va savdo majmualarining faoliyatini tartibga solish maqsadida «Davlat soliq xizmati organlari tizimi yanada modernizatsiya qilinishi munosabati bilan Oʻzbekiston Respub-

likasining ayrim qonun hujjatlariga oʻzgartish va qoʻshimchalar kiritish toʻgʻrisida»gi qonun qabul qilindi.

Unda «Davlat soliq xizmati toʻgʻrisida»gi qonun bilan mustah-kamlangan davlat soliq xizmati organlarining vazifalari yangi tahrirda bayon etilgan. Ularga endi xoʻjalik yurituvchi subyektlar faoliyatini tekshirish masalalari boʻyicha nazorat qiluvchi organlar faoliyati muvofiqlashtirilishini ta'minlash, ushbu ishni amalga oshirishda bir-birini takrorlash va suiiste'molliklarga yoʻl qoʻymaslik, xoʻjalik yurituvchi subyektlarning faoliyatini ragʻbatlantirishga, ularga zarur imtiyozlar va preferensiyalar berishga doir qonun hujjatlarini takomillashtirish boʻyicha takliflar kiritish; bozorlar va savdo majmualarining moliya-xoʻjalik faoliyati ustidan nazoratni amalga oshirish; pul mablagʻlarining gʻayriqonuniy aylanishi manbalariga barham berish va boshqalar ham kiradi.

Bundan tashqari, bu qonun bilan Oʻzbekiston Respublikasi Jinoyat-protsessual kodeksiga qoʻshimcha kiritilib, unga koʻra, Oʻzbekiston Respublikasi Davlat Soliq qoʻmitasining Bozorlar va savdo majmualari faoliyatini nazorat qilish bosh boshqarmasi va uning hududiy boʻlimlariga bozorlar, savdo komplekslari hududlarida va ularga tutash boʻlgan avtotransport vositalarini vaqtincha saqlash joylarida aniqlangan moliyaviyiqtisodiy va soliq sohalaridagi huquqbuzarliklarga doir ishlar boʻyicha surishtiruv organi maqomi berilgan. Demak, ular moliyaviy-iqtisodiy va soliq sohalaridagi huquqbuzarliklar yuzasidan tergovga qadar tekshiruv oʻtkazish, jinoyat ishi qoʻzgʻatish va surishtiruv oʻtkazish huquqiga ega boʻldilar.

Shu munosabat bilan bozorlar, savdo majmualari hududlarida va ularga tutash boʻlgan avtotransport vositalarini vaqtincha saqlash joylarida bir martalik yigʻimlar, ijara haqi toʻliq tushishi va ularning topshirilishi hisobga olinishiga, fiskal xotirali nazorat-kassa mashinalaridan, toʻlovlarni plastik kartochkalar asosida qabul qilish boʻyicha hisob-kitob terminallaridan foydalanilishiga, shuningdek, savdo va xizmat koʻrsatish qoidalariga rioya etilishiga oid qisqa muddatli tekshiruvlar oʻtkazish huquqi ushbu bosh boshqarma va uning hududiy boʻlimlarining mansabdor shaxslariga berildi.

Oʻzbekiston Respublikasi Konstitutsiyasining 51-moddasiga muvofiq, fuqarolar qonunda belgilangan soliq va boshqa majburiy toʻlovlarni oʻz vaqtida toʻlashga majburdirlar. Yuridik va jismoniy shaxslarning davlat tomonidan belgilangan soliq, yigʻim, boj va boshqa majburiy toʻlovlarni toʻlamasligi, foyda (daromad)ni yoki soliq solinadigan boshqa obyektlarni qasddan yashirishi, kamaytirib koʻrsatishi,

shuningdek, soliq yoki boshqa majburiy toʻlovlarni toʻlashdan oʻzga tarzda, jumladan, nazorat-kassa mashinalarining fiskal xotirasi xizmati dasturini noqonuniy oʻzgartirish yoʻli bilan qasddan boʻyin tovlashi budjet siyosati barqarorligiga putur yetkazadi. Soliqdan yashirilgan mablagʻlardan, aksariyat hollarda, jamiyat manfaatlariga zid ravishda foydalanilishi soliq qonunchiligi sohasida sodir etiladigan huquqbuzarliklarning ijtimoiy xavfliligini oshiradi.

Sud amaliyoti tahlili shuni koʻrsatadiki, sudlar soliq va boshqa majburiy toʻlovlarni toʻlashdan boʻyin tovlaganlik uchun javobgarlik belgilovchi qonunlarni asosan toʻgʻri qoʻllamoqda. Shu bilan bir qatorda, ushbu toifadagi ishlar boʻyicha huquqbuzarlik faktini va soliqdan yashirilgan daromad (foyda) miqdorini aniqlashda, aybdor shaxslar harakatini kvalifikatsiya qilish va ularga qilmishiga yarasha jazo tayinlash kabi masalalarda ayrim xato va kamchiliklarga yoʻl qoʻyish amaliyoti ham mavjud.

Ma'muriy javobgarlik toʻgʻrisidagi kodeksning 174-moddasi va Jinoyat kodeksining 184-moddasi boʻyicha javobgarlik kelib chiqishining zarur sharti — soliq yoki boshqa toʻlovlarni toʻlashdan boʻyin tovlashga nisbatan qasdning mavjudligi boʻlib, u ham harakat, ham harakatsizlikda namoyon boʻlishi mumkin. Foyda (daromad)ni qasddan yashirishning belgilari:

- hujjatlarni soxtalashtirish (oʻchirish, gʻayriqonuniy tuzatish);
- qalbaki boshlangʻich buxgalteriya hujjatlaridan foydalanish;
- foydalanilmagan moddiy xarajatlarni ishlab chiqarish hisobiga qoʻshib hisobdan chiqarish;
- korxonada ishlamaydigan, lekin hisobda turadigan xodimlarga ish haqi yozish yoʻli bilan mehnatga haq toʻlash xarajatlarini oshirish;
- sotishdan olingan tushumni hisobot davridan keyingi davrga oʻtkazish (sotish hajmini va daromad (foyda)ni qasddan kamaytirish);
- moddiy, yoqilgʻi-energetika resurslari xarajatlarini va amortizatsiya (eskirish) miqdorini sun'iy ravishda oshirish yoki normativ (limit)larni notoʻgʻri qoʻllash;
 - hujjatlarni yoʻq qilish yoki ularni taqdim etishni rad etish;
- buxgalteriya hujjatlari va boshqa hujjatlar bilan tegishli ravishda rasmiylashtirilmagan mahsulot (tovar)larni sotish;
- davlat roʻyxatidan oʻtmasdan va soliq organlarida hisobda turmasdan xoʻjalik faoliyatini yuritish;
- davlat soliq xizmati organining yozma bildirishnomasi mavjud boʻlgani holda, ikki va undan ortiq manbalardan daromad oluvchi

jismoniy shaxslar tomonidan barcha daromadlari haqida deklaratsiya taqdim etmaslik va boshqalardir.

Ma'muriy javobgarlik toʻgʻrisidagi kodeksning 174-moddasi va Jinoyat kodeksining 184-moddasida nazarda tutilgan huquqbuzarliklarga doir ishlar boʻyicha aybdorning qilmishida soliq yoki boshqa majburiy toʻlovlarni toʻlashdan qasddan boʻyin tovlashning yuqorida qayd etilgan yoxud boshqa biror-bir belgisi mavjudligi isbotlangan boʻlishi shart.

Hozirgi kunda nazorat-kassa mashinalari fiskal xotirasi xizmati dasturining noqonuniy oʻzgartirilishi, daromad (foyda)ning haqiqiy miqdorini yashirishga sharoit yaratganligi tufayli soliq toʻlashdan qasddan boʻyin tovlashning bir usuli hisoblanadi. Bu toifadagi ishlar boʻyicha surishtiruv, tergov organlari hamda sudlar javobgarlikning muqarrarligi prinsipiga amal qilinishini ta'minlashga alohida e'tibor qaratilib kelinmoqda.

5. Huquqni muhofaza qilish organlari xodimlarining davlatning soliq siyosatini qoʻllab-quvvatlash va himoya qilishda roli

«Huquqbuzarlik» tushunchasi huquq nazariyasi tomonidan chuqur oʻrganilgan. Soliq sohasidagi huquqbuzarlikni ham shu asosda gʻayriqonuniy aybli qilmish, harakat yoki harakatsizlik oqibatida oʻz majburiyatlarini qisman yoki toʻla bajarmaslik yuzasidan vujudga keladigan huquqiy majburiyat, soliq sohasidagi huquqbuzarlik subyekti huquqlarining buzilishi deb qabul qilinsa, maqsadga muvofiq boʻlar edi.

Soliq huquqbuzarligining yuridik tarkibi quyidagilarni oʻz ichiga oladi: huquqbuzarlikning obyektiv tomoni, obyekti, huquqbuzarlikning subyektiv tomoni, subyekti. Shuningdek, yuridik tarkib soliq borasida huquqbuzarlikni sodir etganlik uchun sanksiya (jarima) koʻrinishidagi yuridik mas'uliyatni ham oʻz ichiga oladi.

Huquqbuzarlikning obyektiv tomoni qonunga xilof xatti-harakatlarni (masalan, belgilangan tartibni buzgan holda soliq toʻlash obyektlari hisobini olib borish, bu, oʻz navbatida, tekshirilayotgan muddat ichida daromadlarni yashirishga olib keladi) yoki harakatsizlikni (masalan, soliq organlariga berilishi kerak boʻlgan soliqlarni hisoblash hamda toʻlash uchun zarur hujjatlarni taqdim etmaslikni) oʻz ichiga oladi.

Soliq huquqbuzarligining obyekti sifatida soliq huquqbuzari sodir etgan huquqbuzarlik tan olinadi, ya'ni soliq undirish, boj, turli yig'imlar va soliq tizimiga birlashgan boshqa majburiy to'lovlarni belgilash va undirish bo'yicha yuzaga keladigan ijtimoiy munosabatlar hisoblanadi.

Bu munosabatlar soliq huquqi normalari bilan boshqariladi va ularning mazmunini ifodalaydi.

Soliq huquqbuzarligining subyektiv tomoni ayblilikda ifodalanadi. Muayyan huquqbuzarlikka nisbatan olinganda qasddan yoki ehtiyotsizlik kabi ayb koʻrinishlari qoʻllaniladi. Soliq huquqbuzarligining subyekti soliq toʻlovchi, uchinchi shaxslar va soliq organlari boʻlishlari mumkin.

Huquq nazariyasidan ma'lumki, soliq sohasida yuridik javobgarlik, koʻzda tutilgan xatti-harakat soliq huquqbuzarligi deyiladi. Soliq huquqbuzarliklari uchun turli sanksiyalar koʻzda tutilgan. Shu bilan birga, ijtimoiy xavfli soliq huquqbuzarliklariga soliq jinoyatlari kabi jinoiy javobgarlik qoʻllaniladi (Oʻzbekiston Respublikasi JKning 168, 179, 180, 181, 184-moddalari).

O'zbekiston Respublikasi Soliq kodeksining 41-bobi «Yakunlovchi qonunlar»ida soliq munosabatlari subyektlarining javobgarligi (132modda) xususida, lekin bu kodeksda «soliq huquqbuzarligi» tushunchasining ta'rifi, tavsifi berilmagan. Bizning fikrimizcha, agarda «soliq huquqbuzarligi» kodeksida tushunchasining ta'rifi Soliq bunday xatti-harakatga jarimalarni berilganda, belgilashda uning ahamiyati katta bo'lur edi.

Yuqorida keltirilgan fikrlar asosida soliqqa oid huquqbuzarliklar quyidagi guruhlarini ta'kidlash mumkin:

to 'lovchilarning Solia hugug va erkinliklariga aarshi huquqbuzarliklar. Bu guruh soliq to'lovchining xo'jalik faoliyatida qonunlarga xilof ravishda qarshilik koʻrsatishini oʻz ichiga oladi. Bu quyidagilarda, ya'ni soliq organlari mansabdor shaxslarining tadbirkorlarni soliq hisob-kitobiga qoʻyishga gʻayriqonuniy e'tirozi mavjudligida, soliq to'lovchining bankdagi hisob raqamlari orqali o'tkaziladigan yoki soliq operatsivalarni to'xtatib qoʻyishida to'lovchi g'ayriqonuniy «hisobga» olishda, hisob-kitob harakatlarini, hisobot hujjatlarini o'zgartirish, kengaytirish, ko'paytirish bo'yicha asossiz talablari borligida va boshqalarda oʻz ifodasini topadi.

Soliq toʻlovchining huquq va erkinliklariga qarshi qaratilgan huquqbuzarliklarga soliq sohasidagi sirlarni oshkor etish, ya'ni qonun yoʻli bilan soliq sirlarini tashkil qilgan soliq organining lavozim egasi yoki oʻz kasbiy yoki lavozimiga oid majburiyatlarni bajarish chogʻida oʻziga ma'lum boʻlib qolgan axborotlarni gʻayriqonuniy ishlatish yoki oʻzga shaxsga berish kiradi.

2. Budjetning daromad qismini toʻldirishga qarshi huquqbuzarliklar. Ushbu huquqbuzarlikning asosiy subyekti sifatida uchinchi shaxslar

yuzaga chiqadi. Amaliyotda soliq munosabatlarining bu ishtirokchilari qonun talablariga toʻla rioya qilmaydilar. Ular tomonidan sodir etilgan huquqbuzarliklarga soliq va jarimalar boʻyicha toʻlanmagan qoldiq summalarini olish talablarining buzilishi, ya'ni bank yoki kredit tashkiloti tomonidan soliq organlari yoxud sud qarori orqali toʻlanadigan summalarning umuman oʻtkazilmaganligi yoki oʻz vaqtida oʻtkazilmaganligi kiradi.

Budjetning daromad qismini toʻldirmaslikka qaratilgan huquqbuzarliklar ichida eng koʻp tarqalgani soliq toʻlashga moʻljallangan mablagʻlarni noqonuniy ishlatishdir. Bu huquqbuzarlik bank yoki kredit tashkilotlarning soliq toʻlovchilardan tushgan soliq miqdorlarini oʻtkazmaslik yoki muddati buzilib oʻtkazishlarda ifodalanadi.

- 3. Soliq tizimiga qarshi huquqbuzarliklarga quyidagilar kiradi:
- asossiz ravishda qonunlarda koʻzda tutilmagan hollarda soliq toʻlashdan ozod qilish (imtiyozlar tizimini yaratish yoki qonunlarda belgilanmagan yoki boshqa hollarda mansabdor shaxslarga berilgan vakolatlardan notoʻgʻri foydalanish);
 - noqonuniy soliqni kiritish yoki belgilash;
- noqonuniy soliqlarni undirish (toʻgʻridan-toʻgʻri yoki bilvosita majburlov yoʻli bilan soliq undirish, ya'ni qonunlar bilan belgilanmagan yoki kiritilmagan soliqlarni toʻlashga undash hamda gʻayriqonuniy katta hajmdagi soliqlarni toʻlashga majbur qilish. Shu bilan birga, qonunlarda belgilangan muddatlardan oldin soliq toʻlashga majbur qilish ham ushbu guruhga mansubdir).
- 4. Soliq toʻlash majburiyatlariga qarshi huquqbuzarliklarda quyidagi turlarni, xususan, soliqni toʻlamaslik yoki oʻz vaqtida toʻlamaslik hamda soliqlar boʻyicha imtiyozlardan gʻayriqonuniy foydalanishni ta'kidlash mumkin. Imtiyozlarni notoʻgʻri belgilash, soliq organlariga imtiyozli soliqlar toʻlash uchun tegishli hujjatlarni, asoslanmagan ma'lumotlarni soliq organlariga topshirishlar gʻayriqonuniy imtiyozlar hisoblanadi.
- 5. Soliq toʻlovchining majburiyatlarini bajarish kafolatlari tizimiga qarshi huquqbuzarliklar quyidagilardan iborat:
 - soliq to 'lovchining g'ayriqonuniy hisob-kitobni ochishi;
 - soliq to 'lovchiga g'ayriqonuniy ravishda hisob-kitobni ochish;
- kassa intizomining buzilishi (qonunda belgilangan tartibdan chetga chiqib naqd pullarni qabul qilish, saqlash va ulardan foydalanish qoidalarining buzilishi);

- gʻayriqonuniy hisob-kitoblar (naqd pullar boʻyicha operatsiyalarning qonunlarda belgilangan miqdorlarini buzib amalga oshirish);
- soliq toʻlovchi haqidagi axborotlarni soliq organlariga berishdan boʻyin tovlash.
- 6. Buxgalteriya hisobi, buxgalterlik hamda soliq hisobotlarini tuzish, buxgalteriya hisobini olib borish borasida sodir etilgan huquqbuzar-liklarga:
- buxgalteriya hisobini yuritish tartibiga rioya qilmaslik bilan bogʻliq jinoyat (xoʻjalik operatsiyalarini hujjatlashtirish hamda ularning buxgalterlik registrlarida ifodalanish qoidalarini buzish);
- buxgalteriya hisobi ma'lumotlarining aniqligi va haqqoniyligini ta'minlamaslik;
- buxgalteriya hisobi va soliq hisobotini tuzish tartibini buzish (soliq organlariga buxgalteriya va soliq hisobini belgilangan koʻrinishda va normativ hujjatlarda koʻrsatilgan ma'lumotlarni taqdim etmaslik);
- buxgalteriya va soliq hisobotlarini taqdim etishdan boʻyin tovlash (belgilangan muddatlarda yoki soliq organlari talabi boʻyicha buxgalteriya va soliq hisobotini taqdim etishdan qasddan bir necha marotaba boʻyin tovlash) kiradi.
- 7. Soliq organlarining nazorat funksiyalari buzilishi bilan bogʻliq huquqbuzarliklar quyidagilardir:
- soliq organlaridan roʻyxatdan oʻtishdan boʻyin tovlash (qasddan uzoq vaqt soliq organlariga murojaat qilish majburiyatidan boʻyin tovlash);
- soliq organlarida oʻz vaqtida roʻyxatga qoʻyilmaslik (soliq toʻlovchi sifatida qonunlarda belgilangan muddatlarda soliq organlaridan roʻyxatdan oʻtmaslik);
- soliq organlarining lavozimdagi shaxsi tomonidan qoʻyilgan qonuniy talab va koʻrsatmalarga boʻysunmaslik (soliq organida lavozimda ishlaydigan xodimning soliq qonunchiligining buzilishini toʻgʻrilash yoki uning oldini olishga oid talab va koʻrsatmalari uzoq muddat davomida bajarilmasa yoki tegishli ravishda bajarilmasa, agarda ularning bu xattiharakatlari soliq qonunchiligining buzilishidan boshqacha tasniflanmasa);
- soliq organlarining lavozimdagi shaxsini haqoratlash (soliq organining lavozimdagi shaxsini oʻz funksiyasini ado etayotgan vaqtda jamoatchilik oldida haqoratlasa, agar bu xatti-harakat jinoiy javobgarlikni taqozo etmasa);
- soliq organining lavozimdagi shaxsiga zoʻrlik ishlatish yoxud uning mulkiga ziyon yetkazish bilan qoʻrqitish, ya'ni soliq organining

lavozimdagi shaxsiga qonun tomonidan yuklatilgan funksiyalarni bajarish davrida uning qonuniy faoliyatiga toʻsqinlik qilish yoki funksiyasining xususiyatini oʻzgartirishga majbur etish yoki qasd olish maqsadida soliq organining lavozimdagi shaxsiga va uning yaqinlariga zoʻrlik ishlatish yoxud uning mulkiga ziyon yetkazish bilan qoʻrqitish, agar bu harakatlar jinoiy javobgarlikka tortishni taqozo etmasa;

- gʻayriqonuniy ta'sir koʻrsatish yoki faoliyatiga aralashish (ta'sir koʻrsatish qanday koʻrinishda boʻlishidan qat'i nazar, soliq organining lavozimdagi shaxsiga, uning nazorat funksiyasini bajarishiga yoki qaror qabul qilishiga toʻsiq boʻladigan darajadagi gʻayriqonuniy ta'sir oʻtkazish, agar bu xatti-harakatlar jinoiy javobgarlikni taqozo etmasa);
- nazorat funksiyasini bajarishga qarshilik koʻrsatish (soliq organining qarori asosida oʻtkaziladigan hujjatli yoki faktik nazoratni amalga oshirishga qasddan sharoit yaratmaslik).

Soliq huquqbuzarliklarini tasniflashning yana bir necha mezonlari ham mavjud, masalan, muayyan soliqlar bilan bogʻliq huquqbuzarliklar va boshqalar. Shu bilan birga, soliq huquqbuzarliklari boʻyicha tasniflashga ham alohida e'tibor qaratish lozim.

Soliq huquqbuzarligi subyektlari:

- soliq organlari;
- uchinchi shaxslar;
- soliq toʻlovchilar boʻlishlari mumkin.

Soliq organlari, odatda, notoʻgʻri soliq undirish, moliyaviy sanksiyalarni asossiz qoʻllash, protsedura talablariga (hujjatlarni oʻrganishga olishda, sanksiyalar qoʻllashda va h.k.) rioya qilmaslik va boshqa huquqbuzarliklarni sodir etadilar.

Soliq borasidagi huquq munosabatlarining subyekti boʻlgan uchinchi shaxslarga soliqni hisoblash uchun zarur boʻlgan soliq toʻlovchi toʻgʻrisidagi axborotga ega boʻlgan jismoniy, huquqiy va boshqa subyektlar kiradilar. Bu shaxslarning tegishli faoliyatlari, xatti-harakatlari soliq borasidagi majburiyatlarni bajarish, soliq toʻlovchilarning, vakolatli organlarning oʻz huquqlarini bajarishlari bilan bogʻliqdir. Bular kredit tashkilotlari, notariuslar, xoʻjalik munosabatlari subyektlaridir. Uchinchi shaxslar quyidagi huquqbuzarliklarga yoʻl qoʻyishlari mumkin, xususan, soliq organlariga tegishli hujjatlarni taqdim etmasdan yuridik shaxslarga hisob raqamlari ochish, pul miqdorlarini undirish toʻgʻrisidagi soliq organlari talablarini bajarmaslik va boshqalar.

Soliq to'lovchilar uni chetlab o'tish bilan soliq huquqbuzarliklarini sodir etadilar. Soliqni chetlash qonuniy xatti-harakat bo'lib, qonunchilik

va mavjud soliq tizimi tomonidan ruxsat etiladi. Soliqni chetlashda soliq toʻlovchi bilib turib undan qochadi, lekin qonunchilikni buzmaydi. Soliq borasidagi ayrim kamchilik va noaniqliklar muayyan oʻtkinchi xususiyatga ega. Bu muayyan qonunlarni qabul qilish texnikasining mukammal emasligidan. Ba'zi hollarda ularning shoshilinch qabul qilinishi natijasidir. Bunday hollar aniqlanganda, ularning matniga oʻzgartishlar kiritilib, yangilari qabul qilinadi va mavjud muammo yechiladi.

Subyektlarning xoʻjalik faoliyatida soliqni chetlab oʻtishning turli usullari mavjud. Ulardan ayrimlari xususida toʻxtalib oʻtamiz.

Soliq toʻlovchining uni toʻlashdan boʻyin tovlashi milliy moliya tizimidagi qiyinchiliklardan foydalanishga asoslanadi. Bu holatda soliq toʻlashdan boʻyin tovlashning vositasi — oʻzini tiyishdir, ya'ni soliq toʻlovchi soliq toʻlashdan oʻzini tiyadi, soliq toʻlash obyektiga aylanishdan xoli boʻlishga harakat qiladi. Masalan, ba'zi kinoteatrlarning direktorlari tomoshabinlarni zalga bepul kiritib, chiptalardan soliq toʻlamaydilar. Buning natijasida davlat xazinasiga soliq tushmaydi. Yaxshiki, bunday usul amaliyotda keng tarqalmagan.

Soliq qonunchiligining mukammal emasligi sababli soliq toʻlashdan boʻyin tovlash imkoniyatlari bilan birga, yana shunday holat yuzaga keladiki, qonunshunosning oʻzi soliq olishning yoʻlini qilmaydi. Bunday holat qachon yuzaga kelishi mumkin? Qonunshunos soliq toʻlovchiga soliqni belgilayotganida uning holatini bilvosita belgilar orqali baholaydi va oʻz soliq obyektidan soliq olishni koʻzda tutmaydi.

Amaliyotda xalqaro munosabatlar bilan bogʻliq soliqni toʻlamaslik koʻrinishlari uchrab turadi. Soliq toʻlovchi davlatlarning hududiy soliq suverenitetidan foydalanadi. Bunday koʻrinishdagi soliq toʻlashdan boʻyin tovlash soliq to'lovchining xorijiy mamlakat hududiga ko'chishi yoki o'z mulkini koʻchirishi bilan amalga oshiriladi. Soliq undirish obyekti milliy soliq qonunchiligi ta'sir etuvchi hududdan, o'zga «yengil» qonunchiligi mavjud hududlarga koʻchadilar. Shunday yoʻl-yoʻriq va Liberiya, foydalanuvchilar, masalan, vositalardan Gretsiya mamlakatlarga yoki ularning bayroqlari ostida suzayotgan kemalarda yuk tashishga oʻtib oladilar. Bu mamlakatlarda soliq miqdorlari sezilarli belgilangan. Koʻpchilik darajada auvi stavkalarda umummilliv kompaniyalar o'z foydalarini «yengil» soliq summalari belgilangan mamlakatda roʻyxatdan oʻtkazadilar.

Yuqorida ta'kidlanganidek, soliq to'lashdan bo'yin tovlash o'zga mamlakatlarga ketish orqali ham amalga oshiriladi. Bunday holatda soliq

toʻlovchi subyektlar shaxsiy va moddiy javobgarlikdan qutulib qoladilar. Murakkab va «qattiq» soliq tartibidan qochib koʻpgina kompaniyalar oʻzlarining rasmiy joylarini boshqa mamlakatlarga (Lyuksemburg, Shveysariya va boshq.) almashtiradilar yoki ofshor hududlarga koʻchib oʻtadilar.

Hozirgi kunda Rossiya Federatsiyasida bir nechta (Ingushetiya, Kalmikiya) ofshor hududlar yaratilgan va ularda faqat bir-ikki turdagi soliqlar toʻlanadi, xolos.

Endi soliq to'lovchilar sodir etadigan soliq huquqbuzarliklariga to'xtalib o'tamiz.

Birinchidan, soliq summasini toʻlash oʻz muddatida amalga oshirilmaydi. Ushbu huquqbuzarlik uchun Oʻzbekiston Respublikasi qonunchiligida soliqlar va yigʻimlar boʻyicha toʻlov muddati oʻtkazib yuborilgan har bir kun uchun (toʻlov kuni ham shunga kiradi) 0,15 foiz miqdorida penya undiriladi. Rossiya qonunchiligida esa 0,7 foiz penya toʻlash koʻzda tutilgan.

Ikkinchidan, oʻz vaqtida toʻlanmagan soliq summalari va yigʻimlar boʻyicha boqimandalarning yigʻilib qolishi. Bunday hollarda yigʻilgan summalar budjet hisobiga undiriladi. Rossiya Federatsiyasida ham shunday choralar koʻzda tutilgan: yuridik shaxslardan bunday soliqlar toʻgʻridan-toʻgʻri, bahssiz, jismoniy shaxslardan esa sud orqali undiriladi.

Uchinchidan, daromad (foyda) miqdorini kamaytirish yoki yashirish. Xoʻjaliklar oʻz faoliyatlarida soliqni yashirishning turli koʻrinishlaridan foydalanadilar. Ularning ba'zilarini koʻrib chiqamiz:

- soliq organlari va banklarni oldindan ogohlantirmay, bir necha hisob-kitob schotlarini ochish;
 - naqd pul aylanmasi hajmini koʻpaytirish;
- litsenziyasiz va roʻyxatdan oʻtmasdan turib, faoliyatni amalga oshirish;
 - tannarx tarkibiga kiruvchi xarajatlarni koʻpaytirish;
 - toʻlov hujjatlarining yoʻqotilishi;
 - hisobni soxtalashtirish.

Soliq organlari va ayniqsa, soliq sohasidagi huquqbuzarliklarga qarshi kurash departamenti xodimlari korxonalarda olib borilayotgan «ikkilamchi buxgalteriya»ga alohida e'tibor qilishlari lozim. Ularda tayyorlanadigan vasiylik qaroriga soliq summasini belgilash uchun beriladigan soliq balansi bilan bir qatorda korxona faoliyatini haqqoniy ifodalovchi tijorat hisoboti olib boriladi. Mana shu hisobot alohida e'tibordan chetda qolmasligi kerak.

Mulkka tajovuz qiladigan va xizmatga oid jinoyatlardan farqli boʻlgan soliq sohasidagi huquqbuzarliklar huquqni qoʻllovchilar oldiga tamoman yangi mazmundagi kvalifikatsion tartibdagi muammolarni qoʻymoqda. Bu, albatta, tushunarli, chunki soliq huquqbuzarliklari qisqa davr ichida hayotimizga kirib keldi. Shu munosabat bilan tergov, sud faoliyatida, jinoyat huquqi nazariyasida bu muammo toʻliq oʻrganilmagan.

Oʻzbekiston Respublikasi Vazirlar Mahkamasining 1999-yildagi qarori bilan Respublika Soliq qoʻmitasi qoshida Soliqqa oid jinoyatlarga qarshi kurashish departamenti tashkil etildi.

Oʻzbekiston Respublikasi Jinoyat kodeksi 184-moddasining oʻziga xosligi unda soliq va boshqa toʻlovlarni toʻlashdan boʻyin tovlash va bu jinoyat uchun belgilangan jazo choralari aks etgan. Shu oʻrinda mualliflar uchun moddani talqin yoki tavsif qilish emas, balki uning mazmunidagi iqtisodiy belgi va xususiyatlarni aniqlash muhim hamda prinsipial ahamiyatga egadir. Shu nuqtai nazardan kelib chiqib, «jinoyat-soliq» normalarini qoʻllash borasidagi dolzarb muammolarning ayrimlarini tahlil qilib chiqamiz.

Birinchidan, Soliq kodeksining 16, 67, 83, 97, 117-moddalarida soliq undirish obyektlari koʻrsatilgan. Unda jami daromad bilan Soliq kodeksiga muvofiq belgilanadigan chegirmalar oʻrtasidagi farq sifatida (foyda), hisoblangan daromad tovarlarni (ishlarni, realizatsiya va import qilish oboroti qoʻshilgan qiymat, aksiz toʻlanadigan tovarlar uchun ularning qoʻshilgan qiymat soligʻi hisobga olinmagan holdagi qiymati yoki tovarning fizik hajmi, yuridik shaxslar uchun yer uchastkalari, suv resurslarining hajmi ham soliq undirish obyekti sifatida qabul qilingan. Ushbu ro'yxatdan ko'rinib turibdiki, unda keltirilgan obyektlar toʻliq emas, «soliq solish obyekti» iborasi mazmunini yana bir bor aniqlash hamda ularning hajmlarini belgilash muammosini hal etishni bugungi kun taqozo etmoqda.

Oʻzbekiston Respublikasi Moliya vazirligining 1997-yil 10-noyabrdagi «Yuridik shaxslar daromadi (foydasi)ga soliq solish va budjetga toʻlash tartibi» yoʻriqnomasida birinchi soliqqa tortish obyekti jami daromad (foyda) deb koʻrsatilgan.

Soliq huquqbuzarliklariga qarshi kurash vositalari orasida umumiy xususiyatga ega boʻlgan quyidagilarni alohida ta'kidlash mumkin:

- axloq xarakteriga ega vositalar;
- soliq toʻlovchilarning qonunga itoatkorligini keng targʻib-tashviq qilish;

- jamoatchilik fikridan, ommaviy axborot vositalaridan huquqbuzarliklarga, xususan, soliq huquqbuzarliklariga qarshi kurash ishida foydalanish;
- eng koʻp oborot vositalariga ega boʻlgan soliq toʻlovchilarning xarajatlarini oshkor etish;
- jamoat tashkilotlari (birinchi navbatda, kasaba uyushmalar, iste'molchilar tashkiloti va boshqalar)ning soliq nazoratida qatnashishi.

Masalan, iste'molchilar tashkiloti narxlar nazoratini oʻtkazish jarayonida ulgurji savdodagi narxlarni tekshirish bilan bir qatorda, savdo tashkilotlari oladigan daromadni ham oʻrganadilar, oʻzgarishlar xususida xabar beradilar.

Soliq toʻlashdan boʻyin tovlashga qarshi kurashish vositalariga quyidagilar kiradi:

- soliq tizimini takomillashtirish;
- bir butun soliq stavkalarini belgilash;
- asoslanmagan soliq imtiyozlarini rad etish;
- soliq texnikasini takomillashtirish;
- soliq huquqbuzarliklariga qarshi kurash borasida xalqaro hamkorlikni amalga oshirish.

Soliq huquqbuzarliklariga qarshi kurash vositalari ichida soliq huquqbuzarliklarining oldini olish, toʻsiq qoʻyish vositalarini hamda bu huquqbuzarlik uchun jazolash vositalarini alohida ajratish lozim.

Huquqbuzarlikning oldini olishda muhim vosita – soliq nazorati boʻlib, uni samarali amalga oshirish soliq jinoyatlarining oldini olish va shu orqali soliq toʻlovchiga katta ta'sir koʻrsatish mumkin. Soliq nazoratini amalga oshirishda maxsus tuzilgan organlarning zimmasiga muhim funksiya yuklatiladi.

Tayanch tushunchalar:

Soliq, yigʻimlar, soliq stavkalari, soliq qonunchiligi, soliq tizimi, soliq turlari, toʻgʻri soliqlar, egri soliqlar, davlatning soliq siyosati, soliq ayovchanligi, qulay soliq imtiyozlari, soliq muhiti, soliq toʻlovchilar intizomi.

Savol va topshiriqlar:

- 1. Soliqlarning iqtisodiy va huquqiy mazmunini tushuntirib bering.
- 2. Iqtisodchi olimlarning soliqlarga oid qarashlarini (Fisher, Volter) yozma sharhlab bering.

- 3. Soliqlar nima uchun zaruriyat hisoblanadi?
- 4. Soliqlar qanday vazifalarni bajaradi?
- 5. Soliqlarning milliy xavfsizlikni ta'minlashdagi rolini tushuntiring.
- 6. Toʻgʻri va egri soliqlarning mohiyatini yoritib bering.
- 7. Oʻzbekiston Respublikasining Soliq kodeksi qachon qabul qilingan?
- 8. Soliq yuki nima?
- 9. Soliqlar qanday undiriladi?
- 10. Soliq organlarining huquq va majburiyatlari nimalardan iboratligini tushuntirib bering.
 - 11. Soliq ayovchanligi nima?
- 12. Jahon moliyaviy iqtisodiy inqirozi sharoitida Oʻzbekistonda soliq tendensiyalari qanday?

Mavzuni chuqur o'rganish instrumentariysi

Soliq – xoʻjalik yurituvchi subyekt qonunga muvofiq amalga oshiradigan majburiy toʻlov.

Soliqqa tortishning bazaviy muammosi – adolat va samaradorlikning ziddiyatli birligi.

Soliq (ijtimoiy-iqtisodiy jihatdan) — xoʻjalik yurituvchi subyektlar oʻrtasida daromadni ayni vaqtda individga, ya'ni inson va jamiyat a'zosi boʻlgan, inson manfaatlari yoʻlida qayta taqsimlash borasida yuzaga keladigan ijtimoiy munosabatlar shakli.

Soliqlar – davlat budjeti yoki mahalliy budjetlarga jismoniy yoki yuridik shaxslar tomonidan tovar va xizmatlarni ishlab chiqarganlari yoki ishlab chiqarish omillaridan foydalanganliklari uchun majburiy toʻlovlar.

Soliq huquqi – huquqiy normalarning majmui boʻlib, u davlat soliq tuzilmasini aniqlaydi, soliq tizimini belgilab beradi, shuningdek soliq majburiyatlarini bajarish jarayonida hosil boʻladigan munosabatlarni tartibga solib turadi.

Soliqqa tortishning huquqiy prinsiplari:

- barobar soliq yuki prinsipi;
- soliqlarni qonunlar orqali belgilash prinsipi;
- soliq qonunlarining orqaga qaytish kuchiga ega emasligi toʻgʻrisidagi prinsip;
- soliq qonunlarining soliq sohasiga kirmagan qonunlaridan ustunlik prinsipi;
 - soliq qonunchiligida barcha soliq elementlarining mavjudlik prinsipi;

- soliq qonunchiligini talqin qilishda xususiy mulk egasining prezumpsiya prinsipi;
 - xalqaro huquq me'yorlarining ustuvorligi prinsipi.

Soliq bazasi – soliq olinadigan pul miqdori.

Soliq tizimi – mamlakatda mavjud boʻlgan soliqlar, ularni undirish shakl va usullari, shuningdek tegishli davlat tashkilotlari va muassasalarining oʻzaro aloqador birligi.

Soliq stavkasi – soliq bazasining soliq toʻlovchi shaxs u yoki bu soliq tarzida toʻlashi lozim boʻlgan qismi.

Soliq to'lovchi – qonunda soliq majburiyatlari yuklatilgan iqtisodiy agent. **Soliqning o'rtacha stavkasi (AT)** – soliqqa tortiladigan daromad miqdoriga bo'lingan umumiy soliq.

Fiskal siyosat – hukumatning toʻliq ish bilan bandlik va narx darajasining barqarorligi sharoitida iqtisodiy oʻsishning yangi sifati barqaror sur'atlarda oshib borishi uchun qoʻllaydigan davlat xarajatlarini va soliqqa tortish tartibini oʻzgartirish borasidagi choralari tizimi.

Ekspansionistik fiskal siyosat – davlat xarajatlarini koʻpaytirish, soliqlarni kamaytirish yoxud ushbu choralarni birgalikda qoʻllash.

Restruktiv fiskal siyosat – davlat xarajatlarining qisqartirilishi, soliqlarning koʻpaytirilishi yoxud ushbu choralarning birgalikda qoʻllanishi.

Soliqning eng katta stavkasi (MT) – daromadning har bir qoʻshimcha soʻmi uchun toʻlanadigan qoʻshimcha soliq kattaligi.

Hukumat xaridlari – ijtimoiy tovarlar ishlab chiqarish bilan bogʻliq boʻlgan hamda budjetning bir qator xarajatga oid moddalarini – fundamental fan, milliy mudofaa, tashqi siyosatni moddiy ta'minlash, ma'muriy-boshqaruv xarajatlari kabilarni qamrab olgan xaridlar.

Davlat soliq tizimini davlat tomonidan oʻrnatilgan barcha soliqlar, yigʻimlar va boshqa budjetga undiriladigan majburiy toʻlovlar majmui, ularning tuzilish shakli va metodlari tashkil etadi.

Soliqqa tortish subyekti (soliq toʻlovchi) — qonunga koʻra soliqlar, yigʻimlar va toʻlovlarni huquqiy jihatdan toʻlash majburiyati yuklatilgan yuridik va jismoniy shaxslar.

Soliqqa tortish obyekti yoki soliqqa tortish bilan bogʻliq obyekt deganda, soliq toʻlovchining soliq hisoblanadigan va soliqqa tortish uchun asos boʻlib xizmat qiladigan daromadi va mol-mulkiga aytiladi.

Soliq bazasi soliq solish obyektining qiymatiga oid, moddiy yoki boshqa tavsifidan iborat boʻlib, unga asoslangan holda budjetga toʻlanishi lozim boʻlgan soliq va boshqa toʻlovlarning summalari aniqlanadi.

Soliq davri deganda, Soliq kodeksiga asosan budjetga toʻlanishi lozim boʻlgan ayrim soliq va boshqa majburiy toʻlovlarga nisbatan qoʻllaniladigan, tugashi bilan soliq bazasi belgilanadigan va toʻlanishi kerak boʻlgan soliq va majburiy toʻlovlarning summasi hisoblanadigan davrga aytiladi.

Boshqacha aytganda, soliq stavkasi bu soliqqa tortish me'yoridir.

Unifikatsiya – turli xildagi mahsulotlar, detallar, uzellar va boshqa qoʻllaniladigan materiallar va texnologik jarayonlarning ratsional jihatdan birxilligini ta'minlash.

Soliqlarni unifikatsiya qilish – soliq mexanizmini soddalashtirish maqsadida iqtisodiy mohiyati, soliqqa tortish obyekti oʻxshash boʻlgan soliq turlarini birxillashtirish.

Preferensiya – iqtisodiyotni maqsadga muvofiq rivojlantirish va tartibga solishda ayrim soha va tarmoqlar, korxona va ishlab chiqarish turlariga nisbatan beriluvchi imtiyoz, afzallik va ustuvorliklar.

Soliq krediti – budjetga toʻlanishi lozim boʻlgan soliq summasini ma'lum muddatga kamaytirish, kechiktirish, boʻlib-boʻlib toʻlash yoki soliqni qaytarish shakli.

Soliq solishning soddalashtirilgan tartibi – soliq solishning ayrim toifadagi soliq toʻlovchilar uchun belgilanadigan hamda ayrim turdagi soliqlarni hisoblab chiqarish va toʻlash, shuningdek ular yuzasidan soliq hisobotini taqdim etishning maxsus qoidalari qoʻllanilishini nazarda tutuvchi alohida tartibi.

Soliq stavkasi – soliqlarni hisoblashda soliq bazasining har bir birligi hisobiga toʻgʻri keladigan soliq me'yorini ifodalaydi.

Soliq yukini yengillashtirish — soliqlarning foiz stavkalarini kamaytirish va imtiyozlar yaratish.

Soliq imtiyozi deganda, soliq toʻlovchilarning ayrim toifalariga boshqa soliq toʻlovchilar bilan qiyoslaganda, soliqlar toʻgʻrisidagi qonun hujjatlarida nazarda tutilgan afzalliklar berilishi, shu jumladan soliq (yigʻim) toʻlamaslik yoxud kam hajmda toʻlash imkoniyati tushuniladi.

Soliqqa tortish obyektining toʻlovchi bilan davlatning oʻzaro munosabatlariga qarab **bevosita** (shaxsiy daromad soligʻi, real mol-mulk soligʻi) va **bilvosita** (individual soliq, universal QQS, import-bojxona bojlari) soliqlarga boʻlinadi.

Hamma soliqlar iqtisodiy mohiyatiga qarab toʻrt guruhga boʻlinadi:

- iste'molga qo'llaniladigan soliqlar;
- daromadga qoʻllaniladigan soliqlar;
- mulkka qoʻllaniladigan soliqlar;

• boshqa soliqlar.

Soliqlar quyidagi funksiyalarni bajaradi:

- fiskal budjetni mablagʻ bilan toʻldiradi;
- ijtimoiy (qayta taqsimlash) daromadni qayta taqsimlaydi;
- izga solib turuvchi *iqtisodiy munosabatlarni izga soladi*;
- nazorat qiluvchi soliq tizimida oʻzgarishlar kiritishni aniqlaydi;
- jamlovchi yagona iqtisodiy maydonni tashkil etishga imkon yaratadi.

Soliq majburiyati – soliq toʻlovchi tomonidan soliq toʻlovlarini toʻlash boʻyicha bir tomonlama majburiyat.

Soliq qonunchiligi – normativ-huquqiy hujjatlar majmui boʻlib, ular soliq sohasidagi ijtimoiy munosabatlarni tartibga soladi.

Oʻzbekiston Respublikasi hududida umumiy soliqqa tortish tartibi, ba'zi bir guruh soliq toʻlovchilarga alohida (maxsus) soliq tartibi qoʻllaniladi. Qoraqalpogʻiston Respublikasida mahalliy soliqlar va yigʻimlar Soliq kodeksi, Oʻzbekiston Respublikasining boshqa qonun hujjatlari, shuningdek Qoraqalpogʻiston Respublikasining qonun hujjatlari bilan tartibga solinadi.

Mol-mulk va yer soliqlari Oʻzbekiston Respublikasi qonun hujjatlari bilan joriy etiladi va respublikaning butun hududida undiriladi. Bu soliqlar va yigʻimlar stavkalarining miqdorlari Oʻzbekiston Respublikasi Vazirlar Mahkamasi tomonidan belgilanadi. Qolgan mahalliy soliqlar va yigʻimlar Qoraqalpogʻiston Respublikasi, viloyatlar va Toshkent shahar davlat hokimiyati organlari tomonidan joriy etiladi. Bu mahalliy soliqlar va yigʻimlar stavkalarining eng yuqori miqdorlari Oʻzbekiston Respublikasi Vazirlar Mahkamasi tomonidan belgilanadi.

Mahalliy soliqlar va yigʻimlar mahalliy budjetga oʻtkaziladi.

184-modda. Soliq va boshqa toʻlovlarni toʻlashdan boʻyin tovlash. Foyda (daromad) yoki soliq solinadigan boshqa obyektlarni qasddan yashirish, kamaytirib koʻrsatish, shuningdek davlat tomonidan belgilangan soliqlarni, yigʻimlarni, boj yoki boshqa toʻlovlarni toʻlashdan qasddan boʻyin tovlash, shunday qilmishlar uchun ma'muriy jazo qoʻllanilgandan keyin ancha miqdorda sodir etilgan boʻlsa, — eng kam oylik ish haqining bir yuz ellik baravarigacha miqdorda jarima yoki ikki yilgacha axloq tuzatish ishlari yoxud olti oygacha qamoq bilan jazolanadi.

Soliq yoki boshqa toʻlovlarni toʻlashdan boʻyin tovlash: a) takroran; b) koʻp miqdorda sodir etilgan boʻlsa, eng kam oylik ish haqining bir yuz ellik baravaridan uch yuz baravarigacha miqdorda jarima yoki ikki yildan uch yilgacha axloq tuzatish ishlari yoxud uch yilgacha ozodlikdan mahrum qilish bilan jazolanadi.

Soliq yoki boshqa toʻlovlarni toʻlashdan boʻyin tovlash juda koʻp miqdorda sodir etilgan boʻlsa, eng kam oylik ish haqining uch yuz baravaridan olti yuz baravarigacha miqdorda jarima yoki uch yildan besh yilgacha ozodlikdan mahrum qilish bilan jazolanadi.

Qasddan yashirilgan, kamaytirib koʻrsatilgan foyda (daromad) boʻyicha soliqlar va boshqa toʻlovlar toʻliq toʻlangan taqdirda, ozodlikdan mahrum qilish tariqasidagi jazo qoʻllanilmaydi (Oʻzbekiston Respublikasining Jinoyat kodeksi, 184-modda).

Mavzu yuzasidan asosiy xulosalar:

- 1. Soliqlar milliy daromadni taqsimlash va qayta taqsimlash jarayonida uning bir qismini davlat ixtiyoriga olish shartidir.
- 2. Soliqqa tortish iqtisodiy madaniyatning bir elementi boʻlib, davlatlarning bozor iqtisodiyotiga oʻtgan yoki oʻtmaganligiga qaramay, ularning hammasiga xosdir. Soliqlarning hozirgi kundagi oʻrni esa huquqiy ong, iqtisod, davlat nazorat tizimining yuqori darajadagi rivojlanishi natijasida paydo boʻlgan.
- 3. Mustaqillik yillarida Oʻzbekistonda keng miqyosdagi soliq islohotlari amalga oshirildi. Natijada bozor iqtisodiyoti talablariga javob beradigan, davlat budjetini toʻldirishni va davlatning zarur xarajatlarini moliyalashtirishni ta'minlaydigan, shuningdek aholi daromadlarining oʻsishini, iqtisodiyotni modernizatsiya qilish, uning yangi tarmoqlari, kichik biznes va xususiy tadbirkorlikni rivojlantirishni ragʻbatlantiradigan zamonaviy soliq tizimi yaratildi.
- 4. Soliq qonunchiligi bu soliq toʻlovchilar va soliqchi oʻrtasidagi majburiyat, ma'lum huquqiy munosabatlarni aks ettiradi. Soliq qonunlari soliqlarning turlari, soliq obyekti, soliq stavkasi, soliqni hisoblash va toʻlash tartibi, soliqqa tortish boʻyicha imtiyozlarni aniqlab beradi. Oʻzbekistonda soliq qonunchiligini takomillashtirish, soliq huquqini bosqichma-bosqich kamaytirib borish, soliq toʻlovchilarni ularning xoʻjalik faoliyatiga asossiz aralashuvlardan himoya qilishni kuchaytirish boʻyicha chora-tadbirlar koʻrish bilan bir vaqtda, soliqqa tortish tizimini takomillashtirish va soddalashtirish borasida tizimli ishlar amalga oshirilayotir.

16-MAVZU. AGRAR SOHADAGI IQTISODIY MUNOSABATLAR

1. Qishloq xoʻjaligining respublika iqtisodiyotidagi oʻrni va ahamiyati

Qishloq xoʻjaligi Oʻzbekiston milliy iqtisodiyotining muhim tarmogʻidir. U aholining qishloq xoʻjalik mahsulotlariga, sanoatning esa xom ashyoga boʻlgan talabini qondiradi. Qishloq xoʻjaligining xususiyati shundan iboratki, u koʻproq ob-havo va iqlim sharoitiga bogʻliq boʻladi. Albatta, unda suv resurslari muhim rol oʻynaydi.

Hozirgi davrda aholi iste'mol qilayotgan oziq-ovqat mahsulotlarining 95–97 foizga yaqini shu tarmoqda yetishtiriladi. Kelajakda boshqa tarmoqlar izchil rivojlanishi natijasida qishloq xoʻjaligining yalpi ichki mahsulotdagi ulushi bir oz kamayishi mumkin. Lekin shunga qaramay, tarmoqning iqtisodiy salohiyati respublika iqtisodiyotida sezilarli darajada boʻlaveradi. Chunki, respublikamiz agrar industrlashgan davlatdir.

Oʻzbekiston aholisining uchdan ikki qismi qishloqlarda yashamoqda. Jami mehnat resurslarining 40 foizga yaqini qishloq xoʻjaligi ishlab chiqarishida qatnashmoqda. Tarmoqda mahsulot yetishtirish uchun 25,8 mln. *ga* qishloq xoʻjalik yerlaridan foydalanilmoqda. Bu qishloq xoʻjaligida foydalanilayotgan umumiy yer maydonining 74,6 foizini tashkil etadi. Ma'lumki, eng unumdor yerlar sugʻoriladigan yerlardir. Ularning 95,1 foizidan qishloq xoʻjaligida foydalanilmoqda.

Oʻzbekiston qishloq xoʻjaligining mustaqillik yillari arafasidagi vaziyati. Prezident Islom Karimov Vatanimiz poytaxti Toshkent shahrining 2200 yilligiga bagʻishlangan tantanali marosimdagi nutqida «Qishloq xoʻjalik sohasini, qishloq taraqqiyotini mamlakatimiz rivojining yetakchi kuchi sifatida davlat siyosatining ustuvor yoʻnalishi darajasini koʻtarishga alohida ahamiyat berilganligi jahon moliyaviy-iqtisodiy inqirozi sharoitida iqtisodiyotimiz negizlarini mustahkamlashda muhim omil boʻlganligini» ta'kidlagan edi.

Oʻzbekistonning oʻziga xos milliy taraqqiyot modeli va mashhur besh tamoyil asosida amalga oshirilayotgan islohotlar, jumladan, qishloq taraqqiyoti va farovonligini ta'minlashga qaratilgan tub oʻzgarishlar siyosati oʻtgan asrning 80-yillari oxiridan boshlangan yangilanish va bunyodkorlik jarayonining tarkibiy qismidir. Shu oʻrinda oʻsha davrlarda qishloqlarimizning ahvoli, u yerda istiqomat qiluvchi aholining turmush tarzi qanday edi, degan savol tugʻiladi.

Ta'kidlash joizki, o'sha davrda respublikamizni sobiq ittifoqning xom ashyo bazasiga aylantirish maqsadi mustabid tuzum manfaatlaridan kelib chiqib amalga oshirilar edi. Mamlakat iqtisodiyoti asosan bir soha paxtachilikdan iborat boʻlib, boshqa sohalarga ham shu nuqtai nazardan munosabat bildirilar edi. Barcha ekin maydonlarining bor-yo'g'i 8–10 foiziga bug'doy ekilgani ham mash'um paxta yakkahokimligining og'ir oqibatlari natijasi edi, xolos. Shuning uchun ham mamlakat hayoti uchun eng zarur mahsulotlar – don, go'sht, sut, kartoshkaning katta qismi chetdan olib kelina boshlandi. 1989-yil 1-yanvar holatiga koʻra, Oʻzbekistonda umumiy ekin maydonlarining 95 foizdan ortigʻi kolxoz va sovxozlar, demak, davlat ixtiyorida edi. XX asr boshida «Yer dehqonlarniki» shiori ostida o'z hokimiyatini o'rnatishga muvaffaq bo'lganlar hech qancha o'tmay kollektivlashtirish siyosatini o'ylab topgan edilar. Natijada, barcha ekin maydonlari aholidan tortib olindi. Pirovardida 1960-1980-yillar davomida Oʻzbekistonda tomorqa ajratish deyarli to'xtab qolgan edi. Hatto qishloqlarda ham 8 yoki 10 sotix hovlida 3–4 oila yashashga majbur bo'ldi. O'sha davrda mavjud ekin maydonlarining 4 foizga yaqini shaxsiy tomorqa xoʻjaliklari ixtiyorida edi, xolos. Paxta yakkahokimligi, qishloq bilan shaharni sun'iy tarzda yaqinlashtirish 1989-yilning 29-iyuniga, ya'ni O'zbekistonda mamlakat rahbariyati almashganiga qadar davom etdi. Qishloq dardini, muammolarini yaxshi tushungan, yurakdan his etgan Yurtboshimiz Islom Karimov tashabbusi bilan 1989-yil 15-avgustda «Kolxozchilar, sovxoz ishchilari, fuqarolar shaxsiy tomorqa xoʻjaliklari va individual uy-joy qurilishini yanada rivojlantirish toʻgʻrisida» maxsus qaror qabul qilindi. Natijada o'ta qisqa fursatda millionlab oilalarning tomorqa uchastkalari kengaytirildi, yuz minglab oilalar tomorqaga ega bo'ldilar. Bu esa qishloq, aholisini ijtimoiy xavfsizligini ta'minlash hamda turmush darajasini oshirishda muhim ahamiyat kasb etdi. Shuningdek, 1990-yil 28-iyulda Prezidentimizning «Qishloq aholisini ichimlik suv va tabiiy gaz bilan ta'minlashni yaxshilash to'g'risida»gi farmoni e'lon qilindi. Mazkur farmonning qabul qilinishi qishloq qiyofasini tubdan o'zgartirish, u yerda yashovchi fuqarolarning turmush tarzini yaxshilash borasida tashlangan yana bir muhim qadam edi. Xullas, oʻsha davrda xalqimizning asrlar davomidagi orzu-istaklari amalga oshishi uchun katta imkoniyatlar eshigi ochila boshlangan edi.

Binobarin, jamiyat hayotini modernizatsiyalash davrida boshqa sohalar qatori qishloq joylarida ham ijtimoiy infratuzilmani takomillashtirish, aholi turmush darajasini yaxshilash muhim ahamiyat kasb etadi. Milliy iqtisodiyotni rivojlantirish, qishloqda ijtimoiy-siyosiy, iqtisodiy, ma'naviy islohotlarni amalga oshirish jarayonida aholi turmush tarzini yuksaltirish, fuqarolarni ijtimoiy himoyalash dolzarb masalalardan hisoblanadi.

Oʻzbekiston Respublikasi Qishloq va suv xoʻjaligi vazirligining ma'lumotlariga qaraganda, 1990-yilda respublikamiz aholisi iste'moli uchun zarur boʻlgan gʻallaning 82 foizi, goʻsht mahsulotlarining 50 foizi, sut va sut mahsulotlarining 60 foizga yaqini, kartoshkaning 50 foizi, shakar va quruq sutning barchasi chetdan keltirilgan boʻlsa, hozirda mamlakatimizda oziq-ovqat mahsulotlari yetishtirishning barqarorligi hisobidan aholining asosiy iste'mol mahsulotlariga boʻlgan ehtiyoji deyarli yuz foiz oʻz ishlab chiqarishimiz hisobidan ta'minlanmoqda.

1-jadval

Oʻzbekistonda aholi jon boshiga asosiy turdagi qishloq xoʻjaligi mahsulotlari ishlab chiqarish dinamikasi, kg

Mahsulotlar	1991-yil	2011-yil	2011-yil 1991-
turlari			yilga nisbatan,
			barobar
Meva	24,0	60,1	2,5 barobar
Uzum	24,0	35,1	1,4 barobar
Sabzavot	138,6	225,0	1,6 barobar
Kartoshka	15,1	60,5	4,0 barobar
Poliz mahsulotlari	39,0	42,0	1,07 barobar

Manba: Oʻzbekiston Respublikasining Qishloq va suv xoʻjaligi vazirligi.

Mustaqillik yillarida agrar sohada bosqichma-bosqich olib borilgan izchil islohotlar tufayli respublikamizda asosiy turdagi oziq-ovqat mahsulotlarini iste'mol qilish miqdori barqaror oʻsib bordi. Jumladan, 2011-yilda 1991-yilga nisbatan aholi jon boshiga goʻsht mahsulotlari iste'mol qilish 31 kilogrammdan 38 *kilogrammga* yoki 122,6 foizga, sut mahsulotlari 183 *kilogrammdan* 239 *kilogrammga* yoki 130,3 foizga, tuxum 97 donadan 138 donaga yoki 142,3 foizga oshgan.

Oʻzbekiston Respublikasi mustaqilligining dastlabki kunlaridan boshlab qishloq xoʻjaligini rivojlantirish strategiyasi aniq-ravshan belgilab olindi. Mazkur strategiya zamirida qishloq xoʻjaligini diversifikatsiya qilish, paxta yakkahokimligiga barham berish, yurtimiz

aholisini oziq-ovqat mahsulotlari, birinchi navbatda, gʻalla bilan ta'minlash, bir soʻz bilan aytganda, oziq-ovqat mustaqilligiga erishish vazifasi mujassam edi. 1998-yilda qishloqda faol institutsional oʻzgarishlar bosqichi boshlandi. Agrar islohotlar hamma joyda bozor munosabatlarini joriy qilish va xususiy mulk shaklini rivojlantirishga qaratildi.

Zarar koʻrib ishlayotgan hamda samarasi past jamoa va kooperativ xoʻjaliklari tugatilib, ularning yerlari uzoq muddatli ijaraga xususiy fermer xoʻjaliklariga yoki umrbod meros huquqi bilan dehqon xoʻjaliklariga berildi. Fermerlik harakatini rivojlantirish uchun davlat tomonidan katta imtiyozlar berildi, xususiy fermer xoʻjaliklarining ekin maydonlarini maqbullashtirish, yerlarning meliorativ holatini yaxshilash, paxtaning tezpishar va serhosil navlarini yaratish, shuningdek, paxta navlarini har bir hududning tuproq-iqlim sharoiti va suv bilan ta'minlanish darajasini inobatga olgan holda, rayonlashtirish boʻyicha keng miqyosdagi ishlar amalga oshirildi.

Agrar sohadagi islohotlar natijasida xususiy fermer xoʻjaliklarining toʻliq iqtisodiy va moliyaviy mustaqilligini ta'minlaydigan va ularga meros huquqi bilan uzoq muddatga ijaraga berilgan qishloq xoʻjaligi yer resurslaridan maqsadli, oqilona va samarali foydalanishni ragʻbatlantiradigan huquqiy shart-sharoit va kafolatlar yaratildi. Shuningdek, Oʻzbekiston Respublikasi Yer kodeksida fermer xoʻjaliklariga yer maydonlarini 50 yil muddatga ijaraga berish mustahkamlab qoʻyilgan.

Hozirgi vaqtda qishloq xoʻjalik mahsulotlari ishlab chiqarishni moliyalashning bozor prinsiplariga toʻliq javob beradigan va fermer xoʻjaliklari uchun qishloq xoʻjalik mahsulotlarini sotishdan tushgan oʻz daromadlari hisobidan barcha xarajatlarni qoplashda moliyaviy mablagʻlardan foydalanish usuli va shaklini tanlashda ularning mustaqilligini ta'minlaydigan ishonchli tizim yaratildi. Agrar sohadagi islohotlar qishloq xoʻjaligi ishlab chiqarishida sezilarli ijobiy oʻzgarishlarga erishish ishlab chiqarish hajmining oʻsishi, qishloq xoʻjaligi ekinlari hosildorligi va chorva mahsuldorligining oshishi uchun zamin boʻlmoqda.

Mustaqillik yillarida muhtaram Prezident Islom Karimovning tashabbusi va bevosita rahnamoligida qishloq xoʻjaligini isloh qilish boʻyicha juda katta ishlar amalga oshirildi. Ishlab chiqarishga fan-texnika yutuqlarini, yangi texnika va ilgʻor texnologiyalarni joriy etish ishlari yildan-yilga jadallashib bormoqda. Cheklangan yer va suv resurslaridan, kapital va mehnat resurslaridan foydalanish samaradorligi yuksalmoqda. Respublikamiz agrar tarmogʻida amalga oshirilayotgan tub iqtisodiy

islohotlar va tarkibiy oʻzgarishlar natijasida qishloq xoʻjaligining asosiy iqtisodiy koʻrsatkichlari barqaror oʻsib bormoqda (Quyidagi jadvallarga qarang).

2-jadval

Modernizatsiya strategiyasini amalga oshirish yillarida qishloq xoʻjaligi yalpi mahsulotining oʻrtacha yillik oʻsish sur'atlari, foizda

Yillar	2005	2006	2007	2008	2009	2010	2011
Foiz	105,4	106,7	106,1	104,5	105,7	106,8	106,6

3-jadval

Mustaqillik yillarida yalpi ichki mahsulotda qishloq xoʻjaligining ulushi, foizda

Yillar	1990	2000	2005	2006	2007	2008	2009	2010	2011
Foiz	33,4	30,1	26,3	25,1	21,7	19,4	18,2	17,5	17,1

Oʻtgan 2005–2011-yillar davomida qishloq xoʻjaligi yalpi mahsulotining oʻrtacha yillik barqaror oʻsish sur'atlari dinamikasi ta'minlandi. Xususan, bu koʻrsatkich 2005-yilda 105,4 foizni tashkil etgan boʻlsa, 2011-yilda 106,6 foizga teng boʻldi. Mamlakat yalpi ichki mahsulotida qishloq xoʻjaligi yalpi mahsuloti salmogʻining 1990-yildagi 33,4 foizdan 2011-yilda 17,1 foizga pasayishi ijobiy holdir. Bu, avvalo, mamlakatimiz iqtisodiyotida industrial sanoat tarmoqlari va xizmatlarning jadal rivojlanib borayotgani bilan izohlanadi.

Istiqlol yillaridagi tub oʻzgarishlar koʻp ukladli, ya'ni teng huquqli, daxlsiz, davlat himoyasidagi turli xil mulk shakllarini mustahkam qaror toptirish jamiyat iqtisodiy asoslarini yaratishga qaratilgan boʻlib, bu islohotlarni amalga oshirishning asosiy masalalaridan biridir. Ushbu jarayon qishloq xoʻjaligida mulkdorlar sinfi manfaatlarini himoya qilishga alohida e'tibor qaratish zarurligini anglatadi. Ana shu sababdan ham Prezident Islom Karimov: «Qishloq xoʻjaligidagi islohotlarni chuqurlashtirish, fermerlik harakatini qoʻllab-quvvatlash, moddiy va moliyaviy bazasini mustahkamlash, ularga yanada keng yoʻl ochib berish, bu borada yangi imtiyoz va imkoniyatlarni tugʻdirish, qisqacha aytganda, qishloqda paydo boʻlayotgan mulkiy munosabatlarni, yangi oʻrta sinf vakillari — mulkdorlar, tadbirkorlar va ishbilarmonlarning manfaatlarini himoyalash

bugungi kunda eng katta ahamiyatga ega», — deb alohida ta'kidlangani bejiz emas. Albatta, yuqoridagi masalalarning hal qilinishi bu sohada oʻzining ichki samarali rivojlanish tuzilmasiga ega boʻlgan, shu bilan birga, davlat tomonidan qoʻllab-quvvatlanib boriladigan yagona ishlab chiqarish tizimini yanada takomillashtirishga olib keladi.

Qishloq xo'jaligi asosiy maqsadiga erishishi uchun turli xildagi mahsulotlar yetishtiriladi, ishlar, xizmatlar bajariladi, ular talabni qondirish maqsadida taqsimlanadi, sotiladi. Ma'muriy buyruqbozlikka asoslangan, markazdan rejali boshqarilgan iqtisodiyotdan erkin bozor iqtisodiyotiga bosqichma-bosqich oʻtish sharoitida davlat ustuvorligida qishloq xoʻjaligida talabga javob beradigan, samarali huquqiy, tashkiliy iqtisodiy va ijtimoiy munosabatlar tizimi yaratilmoqda, mulkchilikning turli shakllari barpo etilmoqda, natijada erkin mulkiy munosabat vujudga kelmoqda, tadbirkorlikning har xil turlarini yaratish, ularni rivojlantirish yoʻlidan borilmoqda, yer-suv islohotlari amalga oshirilmoqda, tarmoqning ishlab chiqarish resurslari (yer-suv, kapital, mehnat, cheklangan tadbirkorlik qobiliyati)dan samarali foydalanish, ishlab chiqarilgan mahsulotlarni sotish, daromad, foyda va ularning taqsimlanishi, investitsiyalarni jalb etish, ulardan samarali foydalanish, tarmoq ishlab chiqarishini maqsadga muvofiq joylashtirish, ixtisoslashtirish hamda agrosanoat integratsiyasini xalqaro munosabatlar asosida tashkil etish va rivojlantirish bilan bogʻliq boʻlgan iqtisodiy munosabatlar tizimi yaratilib, ular takomillashtirilmoqda, rivojlantirilmoqda.

Yuqorida ta'kidlangan iqtisodiy munosabatlar tizimini yaratishda xalqimiz hamda qishloq xoʻjaligining oʻziga xos xususiyatlarini e'tiborga olgan holda tabiiy, ijtimoiy, iqtisodiy qonunlar, iqtisodiy kategoriyalar talablaridan oqilona foydalanish taqozo etiladi. Demak, qishloq xoʻjaligining barqaror iqtisodiy asosini, takror ishlab chiqarish jarayoni rivojlantirilishini ta'minlaydigan iqtisodiy munosabatlar tizimini yaratish va ularni hayotga joriy etish masalalarini, yoʻllarini oʻrgatish «iqtisodiyot nazariyasi»hamda «Qishloq xoʻjaligi iqtisodiyoti» fanining ham predmeti, ham maqsadi hisoblanadi. Iqtisodiyot nazariyasi predmeti (maqsadi)ni hal etish uchun quyidagi asosiy vazifalar yechimining nazariy, uslubiy asoslarini oʻrgatish lozim:

- •qishloq xoʻjaligining bosqichma-bosqich rivojlanishini, uning respublika iqtisodiyotidagi oʻrni, ahamiyati hamda oʻzgarish qonuniyatlarini aniqlashni;
- •qishloq xoʻjaligiga davlat rahbarligini, unda amalga oshirilayotgan agrar-iqtisodiy islohotlar mazmuni va mohiyatining holatini, ularning rivojlantirish yoʻllarini, masalalarini koʻrsatish;

- qishloq xoʻjaligida faoliyat koʻrsatayotgan tadbirkorlik turlari, ularning faoliyatiga baho berish va takomillashtirish yoʻllari;
- qishloq xoʻjaligining cheklangan yer-suv, mehnat resurslari, investitsiyalar va ulardan tadbirkorlik bilan samarali foydalanish darajasiga iqtisodiy baho berish tartibini oʻrganish, ularni takomillashtirish va rivojlantirish yoʻllarini asoslab berish;
- qishloq xoʻjaligida amalga oshirilayotgan doimiy va oʻzgaruvchan, oʻrtacha xarajatlarni, ularning tarkibi va kamaytirish yoʻllarini, yetishtirilgan mahsulotning hajmini, sifatini, samarali taqsimlanishini hamda pul oqimlarini oʻrgatish;
- qishloq xoʻjaligida iqtisodiy munosabatlarni amalga oshirishda foydalanilayotgan baholarning tizimini, tarkibini, mazmunini, daromad va foydani aniqlash, ularni oqilona taqsimlash yoʻllarini koʻrsatish;
- qishloq xoʻjaligi ishlab chiqarishining qay darajada ixtisoslashganligini, joylashganligini hamda ichki va tashqi integratsiyalashganligini va boshqa masalalarini oʻrganish.

Bozor iqtisodiga oʻtishda qishloq xoʻjaligiga davlat rahbarligi va amalga oshirilayotgan agrar-iqtisodiy islohotlar. Qishloq xoʻjaligi respublika xalq xoʻjaligining eng muhim va yirik tarmogʻi. Shuning uchun ham bu tarmoqda oʻtish davrida bozor iqtisodi talablariga javob beradigan munosabatlar tizimini barpo etish obyektiv zaruriyat hisoblanadi. Chunki ma'muriy-buyruqbozlik asosida markazdan rejali boshqarilgan iqtisodiyot sharoitida qishloq xoʻjaligidagi davlat yakka hokimligi (qancha maydonga qanday ekinlar ekilishi, qanday mahsulotlarni, qancha miqdorda ishlab chiqarish zarurligi, ularni qat'iy belgilangan baholarda sotib olish, ishlab chiqarish vositalari bilan ta'minlash, daromadni taqsimlash, mulkiy munosabatlarda va boshqalarigtisodi munosabatlarini tarmoqda bozor talab daraiasida da) shakllantirish imkoniyatini bermaydi. Darhaqiqat, bozor iqtisodi avvalgi iqtisoddan tubdan, shaklan va mazmunan farq qiladi. Bozor iqtisodiga oʻtishda, shuningdek, bozor iqtisodi sharoitida qishloq xoʻjaligida ma'lum munosabatlarni qonunlar doirasida hal etishda davlatning rahbarligi bo'lishi lozim. Lekin u qishloq xo'jaligidagi korxonalarning to'liq erkinligi bilan bogʻliq holda amalga oshirilishi zarur. Qishloq xoʻjaligiga davlat rahbarligini asosan davlat bosh islohotchi sifatida muttasil amalga oshirishi maqsadga muvofiqdir. Oʻzbekiston Respublikasi Prezidenti Islom Karimov: «Agrar sektorni tubdan isloh qilish va jadal rivojlantirish muammolari islohotlarning dastlabki bosqichida hamda Oʻzbekistonning bozorga o'tish strategiyasida hal qiluvchi ahamiyat kasb etadi. Biz

qishloqning ustun darajada rivojlanishini ta'minlashni, qishloq xo'jaligini sifat jihatidan yangi asoslarda qayta tiklashni oʻz oldimizga vazifa qilib qoʻydik», – deb ta'kidlagan edi. Shunga asoslangan holda davlat qishloq xoʻjaligida bozor iqtisodi munosabatlarini barpo etish maqsadida islohotlar majmuini ishlab chiqdi va ularning huquqiy asoslarini ham yaratmoqda. Bunga Respublika Oliy Majlisi tomonidan qabul qilingan qonunlar, Prezidentning farmonlari hamda Vazirlar Mahkamasining qarorlari yaqqol misol bo'ladi. Masalan, O'zbekiston Respublikasining to'g'risida», «Mulk to'g'risida», «Ijara to'g'risida», «Tadbirkorlik toʻgʻrisida», «Davlat tasarrufidan chiqarish va xususiylashtirish to'g'risida», «Investitsiyalar to'g'risida», «Chet el investitsiyalari to'g'risida», «Aholini ish bilan ta'minlash to'g'risida», «Suv va suvdan foydalanish toʻgʻrisida», «Qishloq xoʻjalik korxonalarini sanatsiya qilish to'g'risida», «Qishloq xo'jalik kooperativlari (shirkatlar) to'g'risida», «Fermer xoʻjaligi toʻgʻrisida»gi qonunlari, shuningdek, «Yer kodeksi», «Mehnat kodeksi».

Vazirlar Mahkamasining «Qishloq xoʻjalik mahsulotlari kontraktatsiya shartnomalarini tuzish va bajarish toʻgʻrisidagi Nizomni tasdiqlash toʻgʻrisida»gi qarori.

Respublika Prezidentining «Iqtisodiy islohotlarni yanada chuqurlashtirish, xususiy mulk manfaatlarini himoya qilish va tadbirkorlikni rivojlantirish chora-tadbirlari toʻgʻrisida»gi va boshqa farmonlari shular jumlasidan.

Mamlakatimizda davlat rahbarligida qishloq xoʻjaligini moliyalash, kreditlash hamda soliq tizimlari ishlab chiqilib, ular hayotga bosqichmabosqich tatbiq qilinmoqda. Davlat, shuningdek, fan, texnika, ilg'or va samarali texnologiyalar tizimlarini tarmoq miqyosida ishlab chiqishga ham, qishloq aholisini ijtimoiy-iqtisodiy himoya qilishga ham rahbarlikni amalga oshirmoqda. Qishloq xoʻjaligida davlatning bevosita rahbarligida agrar islohotlarning negizi hisoblangan yer va mulk islohotlari amalga oshirilmoqda, davlat va jamoa xoʻjaliklari negizida shakllangan va mazmunan yangi jamoa, shirkat, fermer, dehqon xoʻjaliklari, qoʻshma korxonalar tashkil etilmoqda. Qishloq xoʻjaligidagi davlat korxonalariga davlatning rahbarlik koʻlami nodavlat xoʻjaliklarga nisbatan koʻproq. Shu bilan birgalikda oʻtish davrida davlat talabini e'tiborga olgan holda jamoa va shirkat, fermer xoʻjaliklariga ham qancha paxta, gʻalla va sholi mahsulotlari yetishtirish davlat buyurtmasi shaklida belgilab qo'yilgan. Bu hol keyinchalik kamayib, uni erkin bozor qonunlari asosida shartnomalar bo'yicha amalga oshirish ta'minlanadi. Demak, kelajakda

qishloq xoʻjaligiga davlatning rahbarligi yanada takomillashtiriladi. Buning uchun davlatning uzoq muddatga moʻljallangan dasturlari ishlab chiqiladi. Ularda tomonlarning manfaatlariga alohida e'tibor berish maqsadga muvofiqdir. Darhaqiqat, ishlab chiqarishning ravnaqini faqat manfaat ta'minlaydi. U moddiy, ma'naviy va boshqa shakllarda amalga oshiriladi.

Davlat bu tarmoq bilan aloqador bo'lgan tarmoqlarni ham (xizmat koʻrsatuvchi, qayta ishlovchi, sotuvchi) isloh qilishga alohida e'tibor berdi. Natijada bu tarmoqlardagi davlat korxonalari davlat aksiyadorlik korxonalariga, tashkilotlariga aylantirildi. Masalan, paxta zavodlari, un, non, yogʻ-moy, goʻsht kombinatlari, konserva zavodlaridir. Natijada shu tarmoqlarda bozor munosabatlarini erkin amalga oshirish imkoniyatiga ega boʻlgan turli shakldagi mustaqil korxonalar, birlashmalar, uyushmalar tashkil etildi. Ularning sergirrali faoliyatlarini samarali boshqarishni ta'minlash qobiliyatiga ega bo'lgan tarmoq tashkilotlari ham davlatning bevosita rahbarligida tashkil etilib, takomillashtirilmoqda. Chunonchi, Qishloq xoʻjaligi vazirligi Melioratsiya va suv xoʻjaligi vazirligi bilan uygʻunlashtirilib, yagona Qishloq va suv xoʻjaligi vazirligiga aylantirildi. Unga 2001-yilda Oʻrmon xoʻjaligi davlat qoʻmitasi ham qoʻshib yuborildi. 2003-yilda shu vazirlik tarkibiga «Oʻzgoʻshtsutsanoati», «O'zparrandasanoat» aksionerlik tarmoqlari ham qo'shib yuborildi. Natijada bu yirik vazirlikning maqsadi va vazifasi tubdan oʻzgartirildi. U hozirgi davrda qishloq, suv hamda oʻrmon xoʻjaliklarida iqtisodiy islohotlarning samarali tizimlarini ishlab chiqish va ularni amaliyotga tatbiq etish bilan shugʻullanmoqda.

Yer islohoti. Respublikamiz qishloq xoʻjaligini barqaror rivojlantirishda Chunki ahamiyati begivos. resurslarining ular mamlakatimiz ichki yalpi mahsulotining toʻrtdan uch qismi, xalqimiz iste'mol qilayotgan mahsulotlarning 95 foizi yetishtirilmoqda. Shunday ekan, ulardan kelajakda yanada toʻliqroq, samaraliroq foydalanish dolzarb muammo hisoblanadi. Uni hal etish maqsadida respublika hukumati tomonidan siyosiy, huquqiy, tashkiliy, iqtisodiy hamda ijtimoiy ahamiyatga ega boʻlgan choratadbirlar amalga oshirilmoqda. Chunonchi, yer, suv, mulk toʻgʻrisidagi qonunlar, kodekslar qabul qilindi. Ularda respublikamizda yerlarga, suvlarga egalik qilish, ulardan maqsadga muvofiq hamda samarali foydalanish borasidagi munosabatlar tizimi va ularni amalga oshirish tartibi koʻrsatilgan. Yer-suv resurslariga egalik qilishning huquqiy asosi - Oʻzbekiston Konstitutsiyasining 55-moddasida: «Yer ... suv ... umummilliy boylikdir,

ulardan oqilona foydalanish zarur va ular davlat muhofazasidadir», – deb alohida ta'kidlangan.

Respublikamiz jami yer maydoni umummilliy boylik, davlat mulki sifatida egalik qilish Oʻzbekiston Oliy Majlisi zimmasiga yuklatilgan. Oliy Majlis oʻz vakolatidagi yer munosabatlarining ayrim masalalarini xalq deputatlari qishloq, shahar, posyolka, tuman hamda viloyat kengashlari va ularning ijroiya qoʻmitalari zimmasiga yuklagan. Ular yuqorida keltirilgan qonun talablaridan kelib chiqqan holda yerlarni ulardan oqilona, samarali foydalanish maqsadida foydalanuvchilarga ma'lum muddatga haq toʻlash evaziga foydalanishga bermoqdalar. Demak, ular yer islohotini amalga oshirishga mas'uldirlar. Chunki ular yerlarni samarali foydalanish uchun haqiqiy egasiga berish bilan bogʻliq masalalarni hal etadilar.

2. Qishloq xoʻjaligida takror ishlab chiqarishning xususiyatlari

«Respublika sanoatining koʻpgina tarmoqlarini, jumladan, paxta tozalash, toʻqimachilik, kimyo sanoatini, qishloq xoʻjaligi mashinasozligini va boshqalarni rivojlantirish istiqbollari, ularning murakkab oʻtish davridagi iqtisodiy ahvoli bevosita qishloq xoʻjaligiga bogʻliqdir»¹.

Agrar munosabatlar va qishloq xoʻjaligida takror ishlab chiqarishning xususiyatlari. Qishloq xoʻjaligida yerdan foydalanish jarayonida asosiy ishlab chiqarish vositasi (mehnat vositasi va mehnat predmeti) namoyon boʻladi. Qishloq xoʻjaligida ishlab chiqarishning natijalari yerning hosil berish qobiliyatiga, ya'ni tuproq unumdorligiga bogʻliq. Qishloq xoʻjaligida ishlab chiqarish jarayoni tirik organizmlar (oʻsimlik va hayvonot dunyosi)ning oʻsishi va rivojlanishi bilan bevosita bogʻliq. Agrar munosabatlar va qishloq xoʻjaligidagi takror ishlab chiqarish jarayoni iqtisodiy qonunlar bilan birga, tabiat qonunlari ta'siri ostida roʻy beradi.

Agrar sohada koʻpchilik ishlab chiqarish vositalari (chorva mollari, koʻp yillik mevali daraxtlar, urugʻlik va h.k.) tarmoqning oʻzida vujudga keltirilib, yana ishlab chiqarish jarayoniga kiritiladi. Qishloq xoʻjaligida ishlab chiqarish mavsumiy xususiyatga ega. Bu tarmoqdagi mehnat vositalaridan foydalanish davrini ham cheklaydi. Masalan, seyalkalar ekish davrida, gʻalla oʻrish va paxta terish kombaynlari faqat yigʻim-terim paytida qisqa davr (bir–ikki oy) ishlatiladi. Qishloq xoʻjaligida ishlab

¹ Каримов И. А. Ўзбекистон буюк келажак сари. – Т.: «Ўзбекистон», 1998. – Б. 225–226.

chiqarish mavsumiyligi sababli aylanma kapital va mablagʻlar sarfi hamda mahsulot sotishdan olinadigan pul tushumlari yil davomida bir me'yorda bormaydi. Qishloq xoʻjalik ekinlari oʻsishining vegetatsiya davri va tabiiy omillari ta'sirida ishlab chiqarish vaqti va ish davri oʻrtasida katta farq mavjud boʻladi.

Bozor munosabatlari iqtisodiyotning hamma jabhalarini, jumladan, qishloq xoʻjaligini ham oʻz ichiga oladi. Mazkur tizimda agrar munosabatlar alohida oʻrin tutadi. Yer bilan bogʻliq iqtisodiy munosabatlar agrar munosabatlar deyiladi. Bu munosabatlarning obyekti yer boʻlsa, uning subyektlari yer egalari, yerda xoʻjalik yurituvchilar, nihoyat, yerga mehnat sarf qiluvchi kishilar hisoblanadi.

Bozor tizimi agrar munosabatlarga yangicha mazmun beradi:

- yerning tovarga aylanishi;
- yerga xilma-xil mulkchilikning paydo boʻlishi;
- yerning tadbirkorlik obyekti boʻlishi;
- yerning garovga qoʻyilishi;
- yer uchun pul shaklida renta undirilishi;
- agrobiznesning maxsus faoliyat turiga aylanishi.

Agrar munosabatlarning obyekti boʻlgan yer maxsus resurs boʻlganidan, u bilan bogʻliq oʻziga xos iqtisodiy aloqalar ham kelib chiqadi. Yer har qanday ishlab chiqarishning umumiy sharti. Yerdan tashqarida ishlab chiqarishning boʻlishi mumkin emas. Qishloq xoʻjaligi uchun yer asosiy ishlab chiqarish omili vazifasini oʻtaydi. Ma'lumki, qishloq xoʻjaligidagi ishlab chiqarish ikki yoqlama xarakterga ega, birinchidan, u iqtisodiy jarayon boʻlsa, ya'ni inson mehnati natijasida yuz bersa, ikkinchidan, u tabiiy-biologik jarayon boʻlib, mahsulot yetishtirish tabiiy omillarga, masalan, oʻsimlik yoki hayvonlarda kechadigan biologik oʻzgarishlarga, iqlim sharoitiga, ob-havoning qanday kelishiga, tuproqning tabiiy xossalariga bogʻliq.

Yerning oʻrnini esa hech bir resurs bosa olmaydi, shu jihatdan u oʻta noyob va asosiy resurs hisoblanadi. Uning asosiyligi shundaki, yer boshqa resurslarga qoʻshimcha sifatida amal qilmaydi. Masalan, sanoatda stanoklarga qoʻshimcha resurs sifatida kompyuter va uning dasturlari qoʻllaniladi. Yerni esa boshqa resurs bilan almashtirib boʻlmaydi, uning muqobil ishlatish usullari oʻta koʻpdir. Shu sababli yerga talab muttasil oshib boradi. Bu talab yer bilan bogʻliq boʻlgan ishlab chiqarishning kengayishi va yerning unumdorligiga qarab oʻzgaradi.

Yerga ikki xil monopoliya mavjud. Birinchidan, yer qadr-qiymati baland resurs sifatida mulkdor monopoliyasida turadi, ya'ni egasi yo'q

yer boʻlmaydi. Yer cheklangan miqdorda boʻlganidan uni mulk sifatida ham koʻpaytirib boʻlmaydi. Bunday hodisa yerga mablagʻ sarflashni uning egasiga bogʻliq qilib qoʻyadi. Yer egasining mulkdor sifatida manfaati bor, ya'ni u oʻz yeridan naf koʻrishi kerak. Shu sababli yer ishlatish uchun tekinga berilmaydi, egasiga undan foydalanish haqini toʻlash zarur. *Ikkinchidan*, yer xoʻjalik yuritish obyekti sifatida egallab olinadi, ya'ni yerda turli xoʻjaliklar tashkil topadi, yaroqli yer boʻsh turmaydi.

Fermer xoʻjaligi — ijaraga berilgan yer uchastkalaridan foydalangan holda, qishloq xoʻjaligi tovar ishlab chiqarishi bilan shugʻullanuvchi, mustaqil xoʻjalik yurituvchi subyekt.

Fermer xoʻjaligining yashovchanligi uning afzalligida. Bu xoʻjalikning samaradorligi, binobarin afzalligi quyidagilar bilan izohlanadi:

- fermer xoʻjaligida mehnat va mulk bevosita qoʻshiladi, fermer oʻz mulkida oʻz mehnati bilan ishlaydi. Yollanma mehnat qoʻshimcha ahamiyatga ega. Fermer oʻzi uchun ishlaydi;
- fermer xoʻjaligi mutlaqo mustaqil, biron-bir tarzda monopollashmagan xoʻjalik, uning faoliyatini bozor qonunlari boshqaradi;
- fermer xoʻjaligida tadbirkorlik va mehnat funksiyasi uzviy qoʻshiladi. Bu yerda ishbilarmonlik va mehnatsevarlik birgalikda amal qilganidan, iqtisodiy manfaat va mas'uliyat yagona faoliyatning ikki tomonini tashkil etadi;
- fermer xoʻjaligi sohibkor dehqon xoʻjaligi boʻlganidan, bu yerda kam foyda bilan ham қаноатланиш mumkin, chunki u davlatning yordamiga tayanadi;
- fermer uchun uning xoʻjaligi faqat daromad manbai emas, balki uning uyi, oilasi istiqomat qiladigan joy, uning ishongan tayanchi. U oʻz xoʻjaligini oʻta qadrlaydi, shu sababli uning rivoji uchun oʻz mehnatini ayamaydi.

Respublikamiz qishloq xoʻjaligida bosqichma-bosqich amalga oshirib borilayotgan iqtisodiy islohotlarning borishini tahlil etish asosida ularning quyidagi asosiy yoʻnalishlarini ajratib koʻrsatish mumkin:

- mulkiy va tarkibiy islohotlar;
- yerdan foydalanish borasidagi islohotlar;
- suv va suvdan foydalanish munosabatlaridagi islohotlar;
- moliya-kredit, soliq va sugʻurta sohasidagi islohotlar;
- narx-navo tizimidagi islohotlar.

Agrar sohada amalga oshirilayotgan mulkiy-tarkibiy islohotlarda, birinchi navbatda, mulkni davlat tasarrufidan chiqarish va xususiylashtirish, turli mulk shakllariga, eng avvalo, xususiy mulkchilikka asoslangan xoʻjalik yuritish shakllarini joriy etishga muhim e'tibor qaratildi.

Qishloq xoʻjaligini isloh qilishning asosiy yoʻnalishlari quyidagilardan iborat boʻldi:

Yerga mulkchilik masalasining hal etilishi. Oʻzbekiston Respublikasining «Yer toʻgʻrisida»gi qonuni qabul qilinib, yerga qanday munosabatda boʻlish zarurligi koʻrsatib berildi. Oʻzbekiston Respublikasining Konstitutsiyasida yer xususiy mulk qilib sotilmasligi, balki uni uzoq muddatli ijara shartlari bilan topshirish mumkinligi ta'kidlandi.

Yerga munosabat masalasini hal etishda dehqonda yerga xoʻjayinlik tuygʻusini qayta tiklash muhim ahamiyat kasb etadi. Shu bois Oʻzbekistonda yerni meros qilib qoldirish huquqi bilan uzoq muddatga (49–50 yilga, bu masala 1999–2000-yillardan boshlab, shu tarzda hal qilina boshlandi) ijaraga berish yoʻli bilan erishiladi.

Davlatning yerning meliorativ holatini yaxshilashga yordam koʻrsatishini saqlab qolish. Oʻzbekistonda 4,2 mln. gektar sugʻoriladigan yer boʻlib, shuning 50 foizidan sal koʻprogʻi yaxshi holatda, qolgan yerlar yaxshilash va melioratsiya ishlari olib borishni talab qiladi. Buning uchun katta xarajat kerak. Hozir biror fermer irrigatsiya va melioratsiya ishlarini mustaqil amalga oshira olmaydi. Shu bois davlat melioratsiya tarmogʻini loyihalash, qurish, yerlarning shoʻr bosishi, botqoqlanishining oldini olish masalalarini hal qiladi.

Qishloq xoʻjaligi ishlab chiqarishini yanada barqaror rivojlantirish, yerlarning meliorativ holatini yaxshilash, ularning unumdorligini oshirish va shu asosda qishloq xoʻjaligi ekinlari hosildorligini koʻpaytirish uchun zarur shart-sharoitlarni yaratish maqsadida melioratsiya tizimlarini qurish va ta'mirlash qilish chora-tadbirlarini amalga oshirishga kompleks yondashuvni ta'minlashga qaratilgan 2008–2012-yillarda «Sugʻoriladigan yerlarning meliorativ holatini yaxshilash davlat dasturi» qabul qilindi. Melioratsiya ishlarini moliyalashning ishonchli mexanizmini ta'minlash maqsadida «Sugʻoriladigan yerlarning meliorativ holatini yaxshilash jamgʻarmasi» tashkil etildi. Yerlarning unumdorligini oshirish borasidagi ishlarni moliyalashtirish yoʻli bilan qishloq xoʻjaligi ishlab chiqaruvchilariga davlat yordamini koʻrsatish mazkur jamgʻarmaning asosiy vazifasidir.

Quyidagilar qishloq xoʻjaligida olib borilayotgan islohotlarning sifat natijasi tariqasida namoyon boʻldi:

- ishlab chiqarish samaradorligi oshdi, natijada asosiy qishloq xoʻjaligi ekinlari hosildorligi va chorva mahsuldorligi oʻsdi;
- xususiy fermer xoʻjaliklarida rentabellik ortdi va oziq-ovqat mahsulotlarini barqaror tarzda ishlab chiqarish borasida mamlakatimizda oziq-ovqat xavfsizligini ta'minlaydigan darajada ijobiy oʻzgarishlar yuz berdi.

4-jadval

Asosiy turdagi qishloq xoʻjaligi ekinlari hosildorligi (gektariga sentner hisobida)

	1990-yil	2000-yil	2010-yil
Paxta xom ashyosi	22,6	22,8	25,6
Don ekinlari	20,2	28,2	44,2
Kartoshka	80,0	129,3	194,9
Sabzavot	192,0	183,8	252,5
Poliz	115,0	132,4	192,6

Manba: Oʻzbekiston Respublikasi Davlat statistika qoʻmitasi.

Shu bilan birga, oʻtgan davr mobaynida orttirgan tajribamiz fermerlikni yanada rivojlantirish uchun bir qator juda muhim muammolarni, xususan, fermer xoʻjaliklarining barqarorligi, eng muhimi, ularning samaradorligini oshirish bilan bogʻliq masalalarni hal qilishni qat'iy talab etmoqda. Faoliyat yuritayotgan aksariyat fermer xoʻjaliklarining ish tajribasi shundan dalolat beradiki, ularni shakllantirishning dastlabki bosqichida ajratib berilgan yer maydonlarining kamligi mahsulot ishlab chiqarish rentabelligining oʻsishiga koʻp jihatdan toʻsqinlik qilmoqda.

Imkoniyati, kuch-quvvati kam boʻlgan fermer xoʻjaliklari oʻzini zarur texnika, aylanma mablagʻ bilan ta'minlash, kredit qobiliyatiga ega boʻlish, eng asosiysi, oʻz xarajatlarini qoplash va foyda koʻrib ishlash, daromadni oshirishning ishonchli asosiga aylana olmasligini bugun hayotning oʻzi koʻrsatmoqda. Shu bois, yer maydonlarini toʻliq inventarizatsiyadan oʻtkazish va fermer xoʻjaliklari faoliyatini tanqidiy baholash asosida ularning yer maydonlarini optimallashtirish borasida keng koʻlamli, shu bilan birga, puxta oʻylangan ishlar amalga oshirildi. Bunda fermer xoʻjaliklarining qaysi sohaga ixtisoslashgani va

mamlakatimizning turli hududlaridagi aholi zichligi alohida e'tiborga olindi.

Ana shu ishlar natijasida fermer xoʻjaliklari uchun ajratilgan yer maydonlari bugungi kunda paxtachilik va gʻallachilikda oʻrtacha 37 gektardan 93,7 gektargacha koʻpaydi yoki 2,5 barobardan ziyod oshdi. Bu koʻrsatkich sabzavotchilikda 10 gektardan 24,7 gektargacha yoki 2,5 barobar, chorvachilikda esa 154 gektardan 164,5 gektargacha koʻpaydi.

Fermer xoʻjaliklari texnika vositalarini imtiyozli shartlar boʻyicha lizing asosida xarid qilishi uchun texnika boshlangʻich narxining 15 foizini toʻlab, qolgan 85 foizini 10 yil muddat ichida toʻlash imkoniyatiga ega boʻldi. Bunda lizingdan foydalangani uchun yillik foiz toʻlovlari Markaziy bank qayta moliyalash stavkasining 50 foizidan oshmaydigan qilib belgilandi. Agrar sohada amalga oshirilayotgan narx islohoti qishloq xoʻjaligi mahsulotlariga narx belgilashda erkin bozor munosabatlarini bosqichma-bosqich joriy etishga yoʻnaltirildi.

O'zbekiston Respublikasi Prezidentining 2002-yil 20-avgustdagi «Paxta narxini shakllantirish mexanizmi toʻgʻrisida»gi PF-3114-sonli farmoniga asosan, davlat tomonidan sotib olinayotgan paxta xom ashyosining narxini jahon bozoridagi narxlar darajasidan kelib chiqqan holda belgilash tizimi joriy etildi. Bundan tashqari, Oʻzbekiston Respublikasi Prezidentining 2008-yil 29-dekabrdagi PQ-1024-sonli qaroriga muvofiq, 2009-yilda davlat budjeti parametrlarida eksportga sotiladigan paxta tolasi bo'yicha 20 foizlik qo'shilgan qiymat solig'i (QQS) to'lashdan paxta tozalash korxonalari ozod etildi, natijada shu miqdorda fermerlarga paxta uchun toʻlanadigan xarid narxlari oshirildi. Shu orqali davlatimiz tomonidan paxta yetishtiruvchi fermer xoʻjaliklarini va tayyorlov korxonalarini ragʻbatlantirish koʻzda tutilgan boʻlib, paxta tolasining ichki narxlarini jahon bozoridagi narxlarga tenglashtirish choralari koʻrilmoqda. Shu bilan birga, bugungi kunda jahon bozorida paxta tolasi narxlarining birmuncha yuqori ekanini inobatga olgan holda, narx bo'yicha yuzaga kelgan ijobiy farqning 25 foizini to'lab berish bo'yicha tegishli tadbirlar xoʻjaliklariga Jumladan, 2011-yil davomida fermer xoʻjaliklariga oshirilmoqda. yoʻnaltirilgan ijobiy farq summasi 403 315 million soʻmni tashkil etdi. Bu holat jahon bozorida qulay konyunktura vujudga kelgan yillarda fermer xoʻjaliklarining barqaror daromad olishi uchun yangi imkoniyatlar ochadi.

Davlat tomonidan sotib olinayotgan gʻalla narxlarini esa mintaqaviy bozorlardagi narxlardan kelib chiqqan holda belgilash tizimi joriy etildi.

Boshqa qishloq xoʻjaligi mahsulotlarining narxlari bozordagi talab va taklifdan kelib chiqqan holda, shartnoma asosida belgilanmoqda. Keyingi yillarda fermer xo'jaliklarini barqaror rivojlantirish uchun qulay shartsharoitlar yaratish maqsadida hosildorligi past bo'lgan yerlarda davlat ehtiyojlari uchun qishloq xoʻjaligi mahsulotlari yetishtiruvchi fermer xoʻjaliklarini davlat tomonidan moliyaviy qoʻllab-quvvatlash uchun mablag'lar ajratish amaliyotda qo'llanmoqda. O'zbekiston Respublikasi Prezidentining 2007-yil 5-noyabrdagi «Hosildorligi past yerlarda davlat ehtiyoji uchun qishloq xo'jaligi mahsulotlari yetishtirayotgan fermer xoʻjaliklarini qoʻllab-quvvatlash chora-tadbirlari toʻgʻrisida» PQ-725sonli qarorida fermer xoʻjaliklarini barqaror rivojlantirish uchun qulay shart-sharoitlar yaratish, ularga samarali va amaliy davlat madadini magsadida Oʻzbekiston Respublikasi koʻrsatish davlat hosildorligi past bo'lgan yerlarda davlat ehtiyojlari uchun qishloq xoʻjaligi mahsulotlari yetishtiruvchi fermer xoʻjaliklarini moliyaviy qo'llab-quvvatlash uchun maqsadli mablag'lar ajratish, Moliya vazirligiga har yili davlat budjeti loyihasini shakllantirishda mazkur maqsadlarga yer solig'i bo'yicha tushumlar hisobidan mablag'lar ajratish vazifasi yuklatildi.

Mazkur qarorga muvofiq, ball boniteti past yerlarda davlat ehtiyojlari uchun paxta xom ashyosi yetishtirish bilan shugʻullanayotgan fermer xoʻjaliklarini moliyaviy qoʻllab-quvvatlashga davlat budjetidan ajratilayotgan mablagʻlar qiymati 2008-yildagi 60 milliard soʻmdan 2012-yilda 160 milliard soʻmga oshdi.

5-jadval

Hosildorligi past yerlarda davlat ehtiyojlari uchun qishloq xoʻjaligi mahsulotlari yetishtiruvchi fermer xoʻjaliklariga davlat budjetidan ajratilayotgan subsidiyalar qiymati, milliard soʻmda

Yillar	2008	2009	2010	2011	2012
Milliard	60	120	130	140	160
so'm					

Ushbu mablagʻlar fermerlarning xizmat koʻrsatuvchi va ta'minotchi tashkilotlar oldidagi qarzlarini qisqartirishda salmoqli manba boʻlmoqda.

Respublikamizda oziq-ovqat mahsulotlari ishlab chiqarishni kengaytirish va agrar ishlab chiqarishni modernizatsiya qilish yuzasidan jami 575 gektar yer maydonlarida intensiv bogʻlar barpo etildi. Bu bogʻlarda yuqori iste'mol xususiyatiga ega va serhosil boʻlgan mevali daraxt koʻchatlari ekilmoqda. Bunday bogʻlarning yaratilishi mamla-katimiz aholisini sifatli meva mahsulotlari bilan barqaror ta'minlash imkonini yaratadi. Birgina 2011-yilning kuzi va 2012-yilning bahorida jami 7661 gektar maydonda yangi mevali bogʻlar, shundan 2110 gektar yer maydoniga intensiv bogʻlar barpo etish, 8518,8 gektar maydondagi bogʻlarni qayta ekish uchun rekonstruksiya qilish belgilangan.

Mamlakatimiz aholisini meva va sabzavotlar bilan yil davomida bir me'yorda ta'minlab borish uchun keng tarmoqli sovitish kameralariga ega bo'lgan omborlar tizimini yaratish muhim ahamiyat kasb etadi. O'zbekiston Respublikasi Vazirlar Mahkamasining 2011-yil 7-apreldagi 105-sonli qaroriga muvofiq, aholi va tashqi bozorlarga yil davomida muntazam meva-sabzavotlarni sof holda yetkazib berish maqsadida 2011–2015-yillarda 120,8 ming tonna sig'imga ega yangi sovitish kameralarini qurish va 49,1 ming tonna sig'imga ega mavjud sovitish kameralarini modernizatsiya qilish ko'zda tutilgan.

Qishloq xoʻjaligida ekinlar hosildorligini muttasil yuksaltirish vazifasi, birinchi navbatda, sugʻoriladigan yerlarning unumdorligi va irrigatsiya-melioratsiya holatiga bogʻliq. Ilmiy tadqiqot ishlarining natijalariga koʻra, oʻrtacha shoʻrlangan yerlarda ekinlarning hosildorligi shoʻrlanmagan yerlarga nisbatan 50–60 foizga, oʻta shoʻrlangan yerlarda esa 90–100 foizga past boʻlishi aniqlangan.

Hozirgi vaqtda yurtimizda jami sugʻoriladigan yerlarning qariyb 49 foizi turli darajada shoʻrlangan boʻlib, buning qariyb 18 foizi kuchli va oʻrta darajada shoʻrlangan yerlardir, 23 foizdan ortigʻi boniteti past yerlar toifasiga kiradi. Oʻtgan yillar davomida sugʻoriladigan yerlarning meliorativ holatini yaxshilash tadbirlari hukumatimizning doimiy e'tiborida boʻlib keldi. Oʻzbekiston Respublikasi Prezidentining 2007-yil 29-oktabrdagi «Yerlarning meliorativ holatini yaxshilashning tizimlarini tubdan takomillashtirish chora-tadbirlari toʻgʻrisida»gi PF-3932-sonli farmoniga muvofiq, «Sugʻoriladigan yerlarning meliorativ holatini 2008–2012-yillarda yaxshilash boʻyicha chora-tadbirlar dasturi» ishlab chiqildi. Dasturda meliorativ tizimlarni rivojlantirish va takomillashtirish hamda yerlarning meliorativ holatini yaxshilashga yoʻnaltirilgan quyidagi tadbirlar majmuini amalga oshirish moʻljallandi:

1) magistral va xoʻjaliklararo zovurlar, meliorativ tik quduqlarni, meliorativ nasos stansiyalarini qurish va qayta tiklash, yopiq-yotiq drenajlarni tiklash;

- 2) meliorativ nasos stansiyalarini, gidrotexnika va suv oʻtkazuvchi meliorativ obyektlarni ta'mirlash – tiklash inshootlarni va boshqa ishlarini amalga oshirish;
- 3) suv xoʻjaligi qurilishi va suvdan foydalanish tashkilotlarining moddiy-texnik bazasini mustahkamlash.

6-jadval

90,3

130,8

150,2

178,6

Tadbirlar nomi	Jami	Shu jumladan			
	2008–2011-	2008-y.	2009-y.	2010-у.	2011-
	yillarda			-	y.
Meliorativ obyektlarni	225,1	22,4	57,3	63,8	81,6
rekonstruksiya qilish va					
qurish ishlariga					
Meliorativ obyektlarni	222,9	38,6	48,1	59,2	77,0
ta'mirlash va tiklash ishla-					
riga					
Lizing asosida meliorativ	101,9	29,3	25,4	27,2	20,0
texnikalar yetkazib berishga					

550,0

Jami:

Mamlakatimiz boʻyicha meliorativ tadbirlarga ajratilgan mablag'lar, milliard so'mda

Qishloqda boshqaruv tuzilmalarini qayta tashkil etish. Prezidentimizning qishloq hayotiga oid ma'ruzalarini sinchiklab o'rganar ekanmiz, eng muhim yutuq sifatida mustaqillik yillarida fuqarolarimizda mulkka bo'lgan munosabatni o'zgartirish, dehqonlarimizda yerga egalik hissini shakllantirishga garatilgan iqtisodiy islohotlarning izchil oshirilishi natijasi sifatida qishloq xoʻjaligida tub burilishlar roʻy berganini kuzatish mumkin. Qishloq mehnatkashlarining dunyoqarashi oʻzgarib, ularda tashabbuskorlik, tadbirkorlik, yer hamda suv resurslariga mas'uliyat va tejamkorlik bilan munosabatda bo'lish fazilatlari yanada yaqqol namoyon boʻlmoqda.

Bugungi kunda fermer xoʻjaliklari amalda qishloq xoʻjaligi ishlab chiqarishining asosiy shakliga, uni barqaror rivojlantirishni ta'minlashda yetakchi harakatlantiruvchi kuchga aylanganligini ta'kidlash joiz. 2008yilda respublikamizda 215 mingdan ortiq fermer xoʻjaligi faoliyat yuritgan, ularda 1,6 million kishi yoki sohada band bo'lgan aholining qariyb 90 foizi mehnat qilgan, qishloq xoʻjaligi ekin maydonlarining qariyb 85 foizi ana shu xo'jaliklar hissasiga to'g'ri kelgan. Qishloqda bozor infratuzilmasi amalda yangidan barpo etildi, qishloq xoʻjaligida ishlab chiqarishni tashkil etish va ragʻbatlantirish, sohani boshqarish tizimi sifat jihatdan mutlaqo yangicha tamoyillar asosida yoʻlga qoʻyildi.

Joylarda qishloq xoʻjaligi ishlab chiqaruvchilariga xizmat koʻrsatadigan bozor infratuzilmasi subyektlarining keng tarmogʻi yaratildi. Qishloq xoʻjaligi xom ashyosini kompleks qayta ishlashga ixtisoslashgan 200 dan ziyod agrofirma faoliyat koʻrsatmoqda. Eng muhimi, qishloqda haqiqiy mulkdor – yer egasi paydo boʻldi, uning mehnatga munosabati, oʻz ishining natijalaridan manfaatdorligi butunlay oʻzgarmoqda.

Shaxsiy yordamchi, dehqon va fermer xoʻjaliklarida chorva mollarini koʻpaytirishni ragʻbatlantirish dasturini amalga oshirish yuzasidan bajarilayotgan chora-tadbirlar bugungi kunda sezilarli natijalar bermoqda. Faqat 2007-yilning oʻzida qoramol boqish bilan shugʻullanadigan 350 mingdan ziyod fuqaroga mehnat daftarchasi ochilgan boʻlsa, 2009-yilning 1-yanvarigacha shaxsiy yordamchi va dehqon xoʻjaliklarida qoramol boquvchi sifatida roʻyxatga olingan fuqarolarning umumiy soni 1 million 100 mingdan koʻproqni tashkil etdi. Shulardan 54 ming kishiga yangi mehnat daftarchasi berildi, 111 ming fuqaroning esa mavjud mehnat daftarchasiga ish staji tegishli tartibda qayd etildi. Bu esa ularning ijtimoiy va huquqiy himoyasini ta'minlash imkonini berdi. Shaxsiy yordamchi va dehqon xoʻjaliklarida qoramol boqish bilan band boʻlganlar sifatida roʻyxatga olingan fuqarolarning umumiy soni esa bir million nafardan oshib ketdi.

3. Qishloq xoʻjaligining mamlakat oziq-ovqat xavfsizligini ta'minlashdagi oʻrni

Odamlar uchun oziq-ovqat mahsulotlari ishlab chiqarish dunyoda abadiy muammo boʻlgan va doimo dolzarb boʻladi. Oziq-ovqat mahsulotlari ishlab chiqarish hayotning birinchi sharti hisoblanadi. Shu bois, u doimo va oʻsib boruvchi hajmlarda amalga oshirilishi kerak, chunki sayyoramiz aholisi ortib bormoqda.

Oziq-ovqat xavfsizligi bozordagi oziq-ovqat mahsulotlarining taklifi bilan aholi uchun maqbul narxlardagi joriy iste'mol talabi oʻrtasida yetarlicha assortimentda muvozanat boʻladigan, shuningdek mahsulotlarning zarur zaxirasi yaratiladigan holati.

Inson va jamiyatning oziq-ovqat xavfsizligi ular hayotidagi asosiy muammodir. Shu bois, 1996-yil oxirida Rimda Butunjahon oziq-ovqat anjumani boʻlib oʻtgani bejiz emas, unda 130 ta mamlakat ishtirok etdi va

«Yer aholisini qanday qilib boqish mumkin?» degan masala muhokama qilindi. Anjumanda gap asosan odamlar ochlikdan oʻlayotgan, kam rivojlangan mamlakatlarga oziq-ovqatlar bilan yordam koʻrsatish haqida bordi.

Ana shu maqsadda 2015-yilga borib dunyoda toʻyib ovqat yemayotgan odamlar sonini 2 baravar kamaytirish vazifasi qoʻyildi. Biroq 2002-yilning iyulida BMTning Oziq-ovqat va qishloq xoʻjalik tashkiloti (FAO) oʻtkazgan anjuman jahon hamjamiyati qoʻyilgan vazifalarni bajarmayotganini tan oldi. Statistik ma'lumotlarga qaraganda, dunyoda har kuni 360 ta odam ochlikdan oʻlmoqda. Shu bois, oziq-ovqat xavfsizligi XXI asrda ham dolzarbligicha qolmoqda.

Oziq-ovqat xavfsizligiga tahdid deganda, oziq-ovqat bozorida oxirgi iste'molchilar uchun noqulay vaziyat oʻzgarishlariga olib keladigan shartsharoit va omillar majmui tushuniladi. Oziq-ovqat xavfsizligiga tashqi va ichki tahdidlar ta'sir koʻrsatadi. Oziq-ovqat xavfsizligiga tahdidlarning tashqi shart-sharoitlari iqtisodiyotning ochiqligi omili bilan bogʻliq. Ichki tahdidlar mamlakat iqtisodiyoti doirasida hosil boʻladigan ommaviy talab va ommaviy taklif oʻzgarishlarini nazarda tutuvchi ichki omillar ta'sirida yuzaga keladi. Qishloq xoʻjalik mahsulotlari taklifi nuqtai nazaridan bozor vaziyatiga ta'sir koʻrsatuvchi muhim omillardan biri iqtisodiyot agrar sektorining beqaror faoliyat koʻrsatishi va buning oziq-ovqat xavfsizligiga salbiy ta'sir etishidir.

Oʻzbekistonning oziq-ovqat xavfsizligi. Oʻzbekistonning Konstitutsiyasini atroflicha oʻrgangan inson Oʻzbekiston siyosati insonning munosib hayoti va erkin rivojlanishini ta'minlaydigan sharoitlarni yaratishga qaratilgan davlat ekanligiga iqror boʻladi. Bundan kelib chiqadiki, oziq-ovqat xavfsizligi odamlar hayotini ta'minlashda asosiy oʻrin tutadi, u birinchi navbatda, insonning asosiy huquqi uning mavjudligini ta'minlashga boʻlgan huquqini amalga oshirishga qaratilgan ijtimoiy yoʻnalishni aks ettiradi.

Oziq-ovqat xavfsizligi milliy xavfsizlikning muhim tarkibiy qismidir, chunki u asosiy oziq-ovqat mahsulotlarining barqaror ishlab chiqarilishi va aholining undan foydalana olishini ta'minlaydi.

Ma'lumki, mustaqil O'zbekistonda hozirgi zamon qishloq xo'jaligini isloh qilishning muhim siyosiy xususiyati mavjud. Ana shu xususiyatni ko'zda tutgan holda davlatimiz rahbari shunday deb ta'kidlagan: «Bugun shuni chuqurroq anglamoqdamizki, umuman jamiyatimizning yangilanishi samaradorligi, mamlakatimizdagi demokratik jarayonlarning rivojlanishi darajasi qishloq xo'jaligini isloh qilishning qanchalik muvaffaqiyatli kechayotganligiga, bu jarayon qishloq hayotining barcha

jabhalariga qanchalik chuqurroq singib borayotganligiga bogʻliq»¹. Qishloq xoʻjaligini isloh qilishning fuqarolik jamiyati shakllantirishga ta'sir koʻrsatuvchi aytib oʻtilgan siyosiy omili tarkibida oziq-ovqat xavfsizligini ta'minlash va xalq farovonligini oshirish masalalarini ajratib koʻrsatish mumkin. Ushbu masalalar davlatimiz rahbari Islom Karimov tomonidan «Qishloq taraqqiyoti va farovonligi yili» davlat dasturini ishlab chiqish, uni amalga oshirishda koʻp sonli jamoat institutlari ishtiroki borasida: «2009-yilning «Qishloq taraqqiyoti va farovonligi yili» deb e'lon qilinishidan kelib chiqqan holda amalga oshirilishi zarur boʻlgan keng koʻlamli va chuqur islohotlar mohiyatini barchamizga ma'lum oddiy bir haqiqat bilan ifodalash mumkin: qishloq rivoj topsa dasturxonimiz noz-ne'matlarga to'ladi, turmushimiz sifati ortadi. Oqibat natijada oziq-ovqat xavfsizligi va xalqimizning farovonligi oʻsishi uchun ishonchli va barqaror zamin yaratiladi, mamlakatimizning qiyofasi tubdan oʻzgaradi»², – deb ta'kidlaganida taraqqiyotning bardavomligini sezmaslik, koʻrmaslik mumkin emas.

Ma'lumki, «oziq-ovqat xavfsizligi» zamonaviy iqtisodiy, huquqiy va siyosiy fanlarning fundamental tushunchalaridan biridir. Ushbu tushuncha «oziq-ovqat bilan ta'minlanganlik» tushunchasining sinonimi boʻlib, ayni paytda BMTning rasmiy terminologiyasiga muvofiq «oziq-ovqat siyosati», «oziq-ovqat rejalashtirilishi», «oziq-ovqat ta'minoti», «oziq-ovqat ehtiyojlari», «oziq-ovqat rezervlari», «oziq-ovqat resurslari» kabi turdosh atamalar bilan uzviy bogʻliq. Bundan koʻrinadiki, oziq-ovqat xavfsizligini ta'minlashning doirasi birmuncha keng.

Oziq-ovqat xavfsizligi muammolari umuman butun dunyoda va xususan, ayrim hududlarda bugun nihoyatda muhim ahamiyat kasb etmoqda. Bu borada misol sifatida shuni qayd etish mumkinki, gʻallaning jahon narxi 2006-yilga nisbatan oʻrta hisobda ikki baravar, sabzavotlarning narxi ikki baravardan ziyod oshgan³. Bunday sharoitda anglanadiki, ichki iste'mol bozorini mamlakatimizdagi yetishtiriladigan

¹ *Каримов И. А.* Қишлоқ хўжалигини ривожлантириш – халқ фаровонлиги манбаидир // Ўзбекистон Республикаси Президенти матбуот хизматининг Вебсайти – www/press-service.uz;

² *Каримов И. А.* Ўзбекистон халқига янги-йил табриги // Ўзбекистон Республикаси Президенти матбуот хизматининг Веб-сайти — <u>www.press-service.uz</u>.

³ Ўзбекистон Республикаси Президентининг «Озиқ-овқат экинлари экиладиган майдонларни оптималлаштириш ва уларни етиштиришни кўпайтириш чора-тадбирлари тўғрисида» ги 2008-йил 20-октябрь ПФ-4041-фармонига шарх // Ўзбекистон Миллий ахборот агентлигининг веб-сайти – www.uza.uz;

oziq-ovqat mollari bilan uzluksiz va ishonchli ta'minlash, ularning hajmini va turlarini koʻpaytirish, sifatini oshirish masalalari dolzarb ahamiyatga ega boʻlmoqda.

Fuqarolik jamiyati institutlarining oziq-ovqat ta'minotidagi ishtiroki nimalarda ifodalanadi? Bir necha misol keltiramiz.

Oʻzbekistonda qadimdan sugʻorish tizimi mavjud boʻlgan. Sugʻoriladigan dehqonchilik respublikamiz oziq-ovqat mustaqilligining asosi hamda asosiy eksport mahsulotlari manbaidir. Mamlakatimizda, ayniqsa, mustaqillik yillarida yerlarning meliorativ holatini yaxshilash, ularning unumdorligini oshirish, moliyalash mexanizmlarini takomillashtirishga boqichma-bosqich e'tibor qaratib kelinmoqda. izchil va Davlatimiz rahbarining 2007-yil 29-oktabrdagi «Yerlarning meliorativ holatini yaxshilash tizimini tubdan takomillashtirish chora-tadbirlari to'g'risida»gi farmoni bu borada muhim dasturilamaldir. Uni amalga oshirish doirasida jamoat tashkilotlari (O'zbekiston Fermer xo'jaliklari ijtimoiy harakati assotsiatsivasi, «Kamolot» voshlar tashkilotlar) tomonidan irrigatsiya, melioratsiya, agrosanoat sohalari mutaxassislarining malakasini oshirish boʻyicha keng koʻlamli ishlar bajarilmoqda.

Bu boradagi faoliyat suv resurslari taqchilligi kabi muammoni yengib oʻtishda muhim ahamiyat kasb etmoqda. Suv resurslarini boshqarishni takomillashtirish, ulardan oqilona foydalanish qishloq xo'jaligining izchil xavfsizligini rivojlanishi oziq-ovqat ta'minlash va salomatligini, atrof-muhit muhofazasini odamlarning yaxshilashga, ekologik barqarorlikni saqlashga ko'maklashadi. Mazkur taqchillikni yengib oʻtishda, fuqarolik jamiyatini ushbu jarayonga jalb etishda koʻrib chiqilayotgan mavzuga bevosita aloqador boʻlgan qonunlarni, masalan, Oʻzbekiston Respublikasining «Suv va suvdan foydalanish toʻgʻrisida»gi qonunini amalga oshirish jarayoni boʻyicha jamoatchilik tinglovi muhim ahamiyatga ega. Bunday tinglovlar Oliy Majlis Senati, davlat va jamoatchilik tuzilmalari rahbarlari, olimlar, ekologlar, suv muammolari boʻyicha mutaxassislar ishtirokida oʻtkaziladi.

Ma'lumki, suv resurslarini barqaror boshqarishni ta'minlash bevosita yerdan foydalanish, atrof-muhitni muhofaza qilish borasidagi muammolarning hal qilinishi bilan bogʻliq. Shu sababli yuqorida koʻrsatib oʻtilgan sohalarga oid qonunchilikning yanada takomillashtirilishi, yangi qonun loyihalarining jamoatchilik ekspertizasi, agromadaniyatni yanada oshirish bugungi kunning muhim talabidir. Ushbu ishlarda nafaqat davlat tashkilotlari, balki jamoat tashkilotlari, iqtisodiy tuzilmalar va fuqarolar

ham ishtirok etishi zarur. Fuqarolik jamiyati institutlari va xoʻjalik boshqaruvi organlarining amaliy hamkorligiga, Ijtimoiy tashabbuslarni qoʻllab-quvvatlash jamgʻarmasi va «Oʻzbekneftgaz» milliy xolding kompaniyasining «Qoraqalpogʻiston Respublikasi Moʻynoq tumani Uchsoy qoʻrgʻoni aholisini ichimlik suvi bilan ta'minlash» qoʻshma loyihasi yaqqol misol boʻla oladi. Loyiha Moʻynoq–Uchquduq suv quvuri qurilishini yakunlashga yoʻnaltirilgan boʻlib, shu maqsadda temirbeton rezervuarlar oʻrnatiladi, nasos stansiyasi, markaziy suv quvuri va xoʻjaliklararo suv quvurlari quriladi.

Ma'lumki, Iqtisodiyotning real sektori korxonalarini koʻllab-quvvatlash boʻyicha chora-tadbirlar dasturida ularning barqaror faoliyatini ta'minlash, eksport salohiyatini oshirish, oʻz mahsulotlarini ishlab chiqarish koʻlamini kengaytirish boʻyicha koʻzda tutilgan qoʻshimcha choralar ichki manbalar hisobidan mamlakatimiz oziq-ovqat xavfsizligini ta'minlash uchun ishonchli zaxiralarni shakllantirish imkonini beradi. Bu esa jahon bozorlarida asosiy oziq-ovqat mahsulotlari narxi oshishi sharoitida alohida muhim ahamiyat kasb etadi. Oʻz navbatida, bular vatanparvarlik tarbiyasini kuchaytirish va aholining, ayniqsa, yoshlarning iqtisodiy madaniyatini oshirish boʻyicha yangi, qoʻshimcha majburiyatlarni keltirib chiqaradi.

2007-yilning fevralida Toshkent shahrida bir qator jamoat tashkilotlari tomonidan uyushtirilgan «Qishloq xoʻjaligi tadqiqotlarini ming yillik rivojlanish maqsadlariga erishishga qayta yoʻnaltirish: xalqaro va mintaqaviy tajriba» mavzuidagi xalqaro ekoforumda deklaratsiya qabul qilindi. Undan oziq-ovqat xavfsizligi, oʻrimdan keyingi ishlov berish texnologiyasi, foydani oshirish uchun qoʻshimcha qiymatni yaratish, ekinlarning hosildorligini oshirish, kompleks dehqonchilik yondashuvlarini ishlab chiqish, qishloq xoʻjaligi aylanmasida Orol dengizining qurigan oʻzanidan foydalanish maqsadida tadqiqotlar olib borish kabi yoʻnalishlar boʻyicha tavsiyalar oʻrin olgan. Bunga, shuningdek, qimmatli genetik resurslarni saqlash, tabiiy resurslardan ekologik samarali foydalanish, mintaqaviy va xalqaro miqyoslarda ijtimoiy-iqtisodiy ilmiy tadqiqotlar olib borish va hamkorlik kabi masalalar kiritilgan. Bular Oʻzbekistonda yaratilgan ekologik harakat vazifalari hisoblanadi.

«Qishloq xoʻjaligida islohotlarni oʻtkazishdan koʻzlangan bosh maqsad odamlarda yerga egalik, mulkchilik hissini shakllantirish orqali xalqimizning farovonligini yanada oshirishdan iborat», — deb ta'kidladi davlatimiz rahbari «Uzbekistan Agriminitech Expo» koʻrgazmasiga tashrif buyurgan chogʻda. — Zero, moddiy manfaatdorlik odamlarni yangi tashabbuslarga va yutuqlarga ragʻbatlantiradi. Koʻrgazma savdo davomida

zamonaviy texnika va texnologiyalarni xarid qiluvchi fermerlarimiz shuni nazarda tutishlari zarurki, ular sarflagan har bir soʻm ertaga oʻn baravar foyda keltirishi zarur».

Qishloq xo'jaligi ishlab chiqarishini modernizatsiya qilish borasida amalga oshirilayotgan chora-tadbirlar. Keyingi yillarda mamlakatimiz iqtisodiyotining real tarmoqlarida ishlab chiqarishni modernizatsiya qilish, texnik va texnologik yangilash tadbirlariga alohida e'tibor qaratilmoqda. Bu borada Prezident Islom Karimovning quyidagi fikrlarini keltirish oʻrinli: «Ming afsuski, biz modernizatsiya deganda, koʻpincha sanoat tarmoqlarini modernizatsiya qilishni tushunishga oʻrganib qolganmiz. Holbuki, sanoat bilan bir qatorda iqtisodiyotimizning qishloq xo'jaligi kabi yetakchi sohasini ham modernizatsiya qilish, uning tarkibiga kiradigan deyarli barcha tarmoq va ishlab chiqarish sohalarining butun kompleksida texnik va texnologik ishlarini amalga oshirishga katta ehtiyoj sezilmoqda». Demak, agrar ishlab chiqarishni modernizatsiya qilish va yangi bosqichga koʻtarish masalalari shu kunning dolzarb vazifalaridan biriga aylantirmoqda. Shu munosabat bilan Prezident Islom Karimov tomonidan chorvachilik, g'allachilik, kartoshkachilik kabi sohalarda ilg'or mamlakatlar tajribalarini o'rganish va amalda qo'llash, bizning iqlim sharoitimizda g'oyat muhim ahamiyat kasb etadigan zamonaviy sug'orish tizimlari, energiyani tejaydigan texnologiya va agrotexnologiyalarni o'rganish, urug'chilik-seleksiya ishlarini yanada takomillashtirish va qishloq xoʻjaligi ishlab chiqarishining mahsuldorligini oshirish boʻyicha aniq chora-tadbirlar kompleksini ishlab chiqish vazifasi qoʻyilgan edi.

Mamlakatimizda qishloq xoʻjaligini modernizatsiya qilish orqali tarmoqni rivojlantirishning istiqbolli yoʻnalishlari Oʻzbekiston Respublikasi Prezidenti tomonidan ishlab chiqilgan «Demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi»da bayon etilgan. Ushbu konsepsiyada belgilab berilgan ustuvor vazifalar asosida Oʻzbekiston Respublikasi Qishloq va suv xoʻjaligi vazirligi tomonidan ishlab chiqilgan dasturda 2011–2015-yillar mobaynida:

- qishloq xoʻjaligi mahsulotlari ishlab chiqarish hajmini 1,3 -marta oshirish, uning mamlakat yalpi ichki mahsulotidagi ulushini 17,5 foizdan 13,5 foizga pasaytirish;
- qishloq xoʻjaligida ilgʻor agrotexnologiyalar, resurslarni tejaydigan usullarni joriy etish, seleksiya va urugʻchilik tizimini rivojlantirish hisobidan ekinlar hosildorligini oshirish koʻzda tutilgan. Bunda mineral

oʻgʻitlardan foydalanish samaradorligini 15 foizga oshirish, suv sarfini 12 foizga kamaytirish;

- meva-sabzavot tayyorlashni 1,5 barobar, kartoshka yetishtirishni 1,4 barobar, poliz va uzumni 1,3 barobar koʻpaytirish;
- naslchilik ishlarini takomillashtirish, ozuqa bazasini mustahkamlash, zamonaviy texnologiyalar va modernizatsiya natijasida naslchilik xoʻjaliklari sonini 2,5 barobar, ozuqa ekinlari maydonini 1,3 barobar oshirish;
- zooveterinariya punktlarini zamonaviy jihozlash, xizmatlar sifatini oshirish hisobidan chorva mollari sonini 1,3 barobar, goʻsht va sut mahsulotlari ishlab chiqarish hajmini 1,3 marta oshirish;
- parrandachilik va baliqchilik tarmoqlari rivojiga alohida ahamiyat qaratib, parrandalar sonini 1,8 marta oshirib, 670 ta baliqchilik xoʻjaligi tashkil etish;
- qishloq xoʻjaligi mahsulotlarini saqlash quvvatlarini va qayta ishlash hajmini kengaytirish tadbirlari doirasida qishloqlarda zamonaviy minitexnologiyalar negizida qayta ishlash korxonalarini ishga tushirish orqali meva-sabzavot konservalari ishlab chiqarishni 1,7 barobar, goʻsht konservalarini 2,2 barobar, kolbasa mahsulotlarini 1,8 barobar, sut mahsulotlarini 1,9 barobar oshirish;
- sugʻoriladigan yerlarning meliorativ holatini yaxshilash jamgʻarmasi mablagʻlari hisobidan meliorativ inshootlarni qurish, rekonstruksiya qilish va ta'mirlash, tomchilatib sugʻorish tizimini yoʻlga qoʻyish va melioratsiya texnikalarini xarid qilish boʻyicha qariyb 500 million dollarga teng boʻlgan loyihalar hisobidan 1,4 million gektar yer maydonining meliorativ holatini yaxshilash;
- qishloq xoʻjaligi texnikasi parklarini kengaytirish, ularni sifat jihatdan yangilash, fermerlarni unumli qishloq xoʻjaligi texnikalari bilan ta'minlash, xizmat sifatini yaxshilash kabi strategik ahamiyatga ega boʻlgan muhim prognoz vazifalari belgilangan.

3. Oʻzbekiston agrosanoat kompleksining mohiyati. Uning mamlakat iqtisodiy xavfsizligini ta'minlashdagi oʻrni

Agrosanoat kompleksi – oziq-ovqat mahsulotlari (va boshqa qishloq xoʻjalik tovarlari) ishlab chiqarish hamda ular bilan aholini ta'minlash, qishloq xoʻjaligi uchun ishlab chiqarish vositalarini ishlab chiqarish va qishloq xoʻjaligiga xizmat koʻrsatish bilan shugʻullanuvchi xalq xoʻjaligi

tarmoqlarining majmui. Agrosanoat kompleksi (ASK)ning shakllanishi hozirgi fan-texnika inqilobining rivojlanishi bilan bogʻliq. ASKning tuzilishi ixtisoslashuv, kooperatsiya, modernizatsiya va diversifikatsiya zamonaviy fan-texnika inqilobiga xos jarayonlarni uygʻunlashtirishga asoslangan.

ASKning ishlab chiqarish va iqtisodiy tizimi uchta asosiy sohaga boʻlinadi.

Birinchi soha – ASKni ishlab chiqarish vositalari bilan ta'minlovchi sanoat tarmoqlari. U qishloq xo'jaligi va ASKning boshqa tarmoqlarida ishlab chiqarishni industrlashtirish va jadallashtirish (intensivlashtirish)ni belgilab beradi.

Ikkinchi soha – ASKning markaziy boʻgʻini boʻlgan qishloq xoʻjaligi. *Uchinchi soha* – qishloq xoʻjaligi xom ashyosining tayyorlanishi, tashilishi, saqlanishi, qayta ishlanishi va tayyor mahsulotning sotilishini ta'minlaydigan oziq-ovqat, sut, goʻsht tarmoqlari hamda omixta yem sanoatini qamrab oladi.

muhim rivojlantirishning **ASKni** sharti uchala sohaning mutanosibligi, muvozanatlashganidir. Ta'kidlash lozimki, igtisodiy jihatdan rivojlangan mamlakatlarda oxirgi mahsulot qiymatining asosiy qismi uchinchi sohada yaratiladi. Masalan, AQShda uning ulushi mahsulot chakana qiymatining 80 foiziga yetadi. Oxirgi mahsulotning eng katta qismi oziq-ovqat kompleksida yaratiladi. Uning hissasiga qishloq xoʻjaligida yetishtiriladigan butun mahsulotning 75 foizidan ortig'i, asosiy ishlab chiqarish fondlarining 80 foizidan ortig'i va xodimlarning 80 foiziga yaqini toʻgʻri keladi.

Takror ishlab chiqarish jarayonida qishloq xoʻjaligi va sanoat oʻrtasidagi oʻzaro aloqadorlik alohida rol oʻynaydi. Qishloq xoʻjaligining bosh vazifasi aholining oziq-ovqatga, sanoatning esa xom ashyoga boʻlgan ehtiyojini qondirishdir. Qishloq xoʻjaligining xususiyati, uning yuritilishi yerdan, ya'ni ishlab chiqarishning bosh vositasi va tabiiy muhitdan foydalanish bilan bogʻliq. U biologik omillar, oʻsimlik va hayvonlardan foydalanishga asoslanadi. Qishloq xoʻjaligida takror ishlab chiqarish fondlari oʻz mahsuloti hisobidan shakllantiriladi (urugʻlar ziroatchilikda, yem-xashak chorvachilikda). Yengil sanoat, oziq-ovqat sanoati, omixta yem ishlab chiqarish va boshqa tarmoqlardagi xom ashyoning yarmi qishloq xoʻjalik mahsulotlariga toʻgʻri keladi, qishloq

xoʻjaligi xarajatlarida sanoat mahsulotlarining ulushi esa 40 foizni tashkil qiladi.

Jahon Savdo tashkilotining qishloq xoʻjaligi boʻyicha asosiy hujjati «*Urugvay raundi*» hisoblanadi. Unda ushbu tashkilot a'zolarining ASKni davlat ichida qoʻllab-quvvatlash boʻyicha majburiyatlari tartibga solingan, davlat siyosati yoʻnalishlari tasniflangan.

Davlatning iqtisodiy roli hatto liberal xoʻjalik tizimlarida (AQSh, Avstriya, Yangi Zelandiyada) YAIMning 30–35 foiziga yetadi, ijtimoiy bozor xoʻjaligiga asoslangan davlatlarda (GFR, Fransiya, Shvetsiyada) esa YAIMning 50–60 foiziga teng keladi. Rossiyada qishloq xoʻjaligini qoʻllab-quvvatlash YAIMning 0,8 foiz ini tashkil qiladi. Mutlaq raqamlarda Rossiyada bir gektar qishloq xoʻjalik maydoniga davlat yordami 9,5, Yevropa Ittifoqida esa 801 dollarga teng.

MDH mamlakatlarida va yetakchi G'arb mamlakatlarida qishloq xoʻjaligini davlat tomonidan qoʻllab-quvvatlashda keskin farq kuzatiladi. Masalan, AQShda davlat yoʻllar, meliorativ infratuzilma, elektr uzatish simlari va telefon tarmoqlari qurilishiga koʻp milliard dollar sarflaydi, uning yutuqlarini amaliyotga fanni va ioriy agrar subsidiyalashtiradi. Tuproqni himoya qilish tadbirlarini zimmasiga oladi, ishlab chiqariladigan mahsulotning deyarli yarmiga narxlarni kafolatlaydi, bu bilan fermerlarning jamgʻarmalari va daromadlarini saqlab qoladi. AQShda 70 yil mobaynida erkin fermerlar davlat boshqaruvi sharoitida ishlamoqdalar. Davlat boshqaruviga asos solgan birinchi qishloq xoʻjalik qonuni 1933-yilda (Buyuk depressiya davrida) paydo boʻlgan. 2009-yilda davlatimiz rahbarining tashabbusi bilan «Qishloq taraqqiyoti va farovonligi yili» davlat dasturi qabul qilindi. Ushbu dastur mamlakatimiz qishloq xo'jaligining davlat tomonidan qo'llab-quvvatlanishini kuchaytiradi.

Boshqa rivojlangan mamlakatlarda qishloq xoʻjaligiga ajratiladigan dotatsiyalar hajmi yanada katta. Kanadada 2004-yilda dotatsiyalar qishloq xoʻjaligida band boʻlganlar umumiy daromadining 33 foizini, Yevropa Ittifoqi mamlakatlarida 35, Yaponiyada 39, Shveysariyada 60 foizni tashkil qildi. Yevropa mamlakatlarida dehqon xoʻjaliklarini qoʻllabquvvatlash uchun texnika sotib olishga sarflanadigan imtiyozli davlat kreditlari va ssudalari beriladi.

O'zbekistonda agrosanoat kompleksi.

Xoʻsh, hozirgi Oʻzbekistonda ASK muammolari nimalardan iborat? Ma'lumki, qishloq xoʻjaligining asosini quyidagilar tashkil qiladi:

- yer;
- moddiy-texnik baza;
- kadrlar.

Ta'kidlash muhimki, ushbu tarkibiy qismlarning barchasiga Oʻzbekistonda alohida e'tibor qaratilmoqda. Mamlakatimiz hududining asosiy qismida «paxta yakkahokimligi» natijasida ekin ekiladigan yerlarning haydaladigan qatlamida gumus muvozanati salbiydir. Qishloq xoʻjalik yerlarining agroekologik holati yomonlashdi, tuproq unumdorligi pasaydi, tuproqlarning boniteti qisqardi. Davlatning agrar ishlab chiqarishni tartibga solish bilan shugʻullangani bois, ASKni budjetdan moliyalashtirish soʻnggi yillarda oshib bormoqda.

«Qishloq taraqqiyoti va farovonligi yili» Davlat dasturi doirasida amalga oshirilgan ishlar va erishilgan natijalar. 2009-yilda tasdiqlangan «Qishloq taraqqiyoti va farovonligi yili» Davlat dasturi qishloqda turmush darajasini yuksaltirishga, qishloqlarimiz qiyofasini oʻzgartirishga qaratilgan uzoq muddatli va bir-biri bilan chambarchas bogʻliq keng koʻlamli chora-tadbirlarni amalga oshirish, ijtimoiy soha va ishlab chiqarish infratuzilmasini rivojlantirishni jadallashtirish, mulkdorning, tadbirkorlik va kichik biznesning maqomi, oʻrni va ahamiyatini tubdan qayta koʻrib chiqish, fermer xoʻjaliklari rivojini har tomonlama qoʻllabquvvatlashga qaratilgan.

Darhaqiqat, mamlakatimizda qishloqlarimiz qiyofasini oʻzgartirish, agrosanoat majmuida olib borilayotgan islohotlarni chuqurlashtirish, qishloq aholisining hayot darajasi, ijtimoiy-siyosiy va madaniy saviyasini oshirish mustaqillikning birinchi yillaridan boshlab e'tiborimiz markazida boʻlib kelayotgan ustuvor masala hisoblanadi. Shunga koʻra, 2009-yil yurtimizda «Qishloq taraqqiyoti va farovonligi yili» deb nomlanib, bu borada maxsus davlat dasturi qabul qilingan edi. Prezident Islom Karimov 2009-yilning 5-dekabridagi Oʻzbekiston Respublikasi Konstitutsiyasi qabul qilinganligining 17 yilligiga bagʻishlangan tantanali marosimdagi ma'ruzasida mazkur dastur doirasida amalga oshirilgan ishlar va erishilgan natijalar toʻgʻrisida batafsil toʻxtab oʻtdi.

Ma'lumki, «Qishloq taraqqiyoti va farovonligi yili» Davlat dasturi 105 ta bandni oʻz ichiga oluvchi 9 ta boʻlimdan iborat (7-jadval).

«Qishloq taraqqiyoti va farovonligi yili» Davlat dasturining asosiy yoʻnalishlari

Boʻlimlar	Dasturning asosiy yoʻnalishlari
I	Qishloqda yashovchilarning manfaatlarini yanada to'liqroq
	ta'minlash uchun qonunchilik va me'yoriy-huquqiy bazani yanada
	takomillashtirish va mustahkamlash.
II	Qishloqda uy-joy va ijtimoiy soha obyektlarini qurishni
	loyihalashtirish, qishloq aholi punktlarini me'moriy rejalashtirishni
	tashkil qilish tizimini tubdan takomillashtirish.
III	Qishloq joylarda ijtimoiy va ishlab chiqarish infratuzilmasini
	rivojlantirish asosida qishloqda turmush sifatini oshirish.
IV	Mahalliy qurilish materiallarini ishlab chiqarishni kengaytirish,
	mahalliy materiallardan yigʻma konstruksiyalardan foydalangan
	holda qishloqda industrial va yigʻma texnologiyaga qurilishini joriy
	qilish.
V	Elektr energiyasi bilan ta'minlovchi mavjud korxonalarni
	rekonstruksiya qilish va yangilarini qurish hisobidan qishloqni
	kafolatlangan elektr energiyasi bilan toʻxtovsiz ta'minlash uchun
	sharoitlar yaratish.
VI	Qishloq xoʻjaligida iqtisodiy islohotlarni bosqichma-bosqich
	chuqurlashtirish, fermer xoʻjaliklarini qoʻllab-quvvatlash, ularning
	moddiy-texnika bazasini mustahkamlash, imtiyozlar berish,
	qishloqda shakllanadigan yangi mulkiy munosabatlarni, oʻrta tabaqa
	– mulkdorlarning, tadbirkorlarning va ishbilarmonlarning
	manfaatlarini ishonchli himoya qilish.

Dasturning prinsipial ahamiyatga ega bo'lgan quyidagi yo'nalish-lariga:

birinchidan, mazkur dastur ijrosi bilan bogʻliq qonunchilik va normativ-huquqiy bazani yanada takomillashtirish va mustahkamlash, yangi qonunlar qabul qilish, tegishli qonun hujjatlariga, Yer kodeksiga oʻzgartirish va qoʻshimchalar kiritish zarur. Qishloqda ijtimoiy va ishlab chiqarish infratuzilmasini rivojlantirish, suv resurslaridan oqilona foydalanishni tartibga solish va sugʻoriladigan yerlarning meliorativ holatini yaxshilash masalalariga alohida e'tibor qaratish lozim.

Ikkinchidan, dasturda belgilangan vazifalar orasida qishloqlarimizda turmush sharoitini, uning sifatini tubdan yuksaltirish boʻyicha kompleks chora-tadbirlarni amalga oshirish prinsipial muhim va hal qiluvchi ahamiyat kasb etadi. Buning uchun qishloq aholi punktlarini me'moriy

jihatdan loyihalashtirish va qurish ishlarini tashkil etish tizimini tubdan qayta koʻrib chiqish lozim. Hududlarning me'moriy-loyihaviy qurilishi bosh rejalari ishlab chiqilishini ta'minlash, mintaqalarning iqlimi, demografik holati va boshqa shart-sharoitlarini hisobga olgan holda, qishloq uylari va ijtimoiy inshootlarning unifikatsiya qilingan namunaviy loyihalarini tayyorlash darkor.

Bu vazifalarni bajarish uchun maxsus «Qishloq qurilish loyiha» tadqiqot instituti tashkil etildi.

Uchinchidan, dasturning asosiy vazifasi — qishloqda sanoat ishlab chiqarishi va qurilishni jadal rivojlantirish, meva-sabzavot va chorva mahsulotlarini qayta ishlash boʻyicha zamonaviy texnika hamda texnologiyalar bilan jihozlangan ixcham korxonalarni tashkil etish choratadbirlarini amalga oshirishdan iborat.


sug'oriladigan To'rtinchidan, 2008–2012-yillarda yerlarning meliorativ holatini yaxshilash davlat dasturida koʻzda tutilgan choratadbirlar tizimining izchil amalga oshirilishiga, ya'ni ekin maydonlarining meliorativ ahvolini yaxshilash, faoliyat koʻrsatayotgan irrigatsiyaobyektlarining tegishli texnik melioratsiya holatini ta'minlash, ixtisoslashgan suv xoʻjaligi, qurilish va ekspluatatsiya tashkilotlarining moddiy-texnik bazasini mustahkamlash, ularni zamonaviy texnika bilan jihozlash masalalariga alohida e'tibor qaratish darkor.

Qishloq xoʻjaligidagi islohotlarni chuqurlashtirish, sohaning moddiyeng bazasini mustahkamlash, muhimi, gishlog iqtisodiyotini yuksaltirish, yurtimizni obod etish yoʻlida tobora hal qiluvchi kuchga aylanib borayotgan fermerlik harakatining samarasini yanada oshirish maqsadida yirik koʻlamdagi ishlar amalga oshirilmoqda. Ayniqsa, «Qishloq taraqqiyoti va farovonligi yili» dasturi doirasida erning unumdorligini oshirish, uning meliorativ holatini yaxshilash boʻyicha ham salmoqli natijalarga erishildi. Jumladan, dastur doirasida 10 ming kilometrdan ortiq zovurlar, salkam 1000 kilometrlik drenaj tarmoqlarini ta'mirlash va tiklash ishlari bajarildi, 250 ta drenaj quduqlar, 15 ta melioratsiya nasos stansiyalari va inshootlari qurildi hamda koʻplab suv inshootlari rekonstruksiya qilindi, 50 kilometr uzunlikdagi yangi kanallar va boshqa ob'ektlar qurilishi yakuniga etkazildi. O'tgan yili yerlarning meliorativ holatini yaxshilashga qaratilgan loyihalarni amalga oshirish uchun 130 milliard so'm mablag' yo'naltirildi.

Natijada 240 ming gektardan ortiq sugʻoriladigan yerlarning meliorativ holati yaxshilandi va bu qishloq xoʻjalik ekinlari hosildorligini, fermer xoʻjaliklarining daromadini oshirish imkonini beradi. Shuni

ta'kidlash kerakki, mamlakatimizda ushbu yoʻnalishdagi ulkan loyihalarni amalga oshirishda Osiyo Taraqqiyot banki va Jahon banki, Islom taraqqiyot banki, Xitoy Xalq Respublikasi, Janubiy Koreya va bir qator arab mamlakatlarining moliya institutlari tomonidan ajratilgan sarmoyalar katta hissa boʻlib qoʻshildi.

Qishloq joylarda xizmat koʻrsatish shoxobchalari va muassa-salarining faoliyati, servis xizmati tobora rivojlanib bormoqda. E'tiborli jihati, an'anaviy maishiy xizmatlar bilan bir qatorda zamonaviy telekommunikasiya tizimlari, xususan, internet, uyali aloqa, kompyuterda turli xizmatlar koʻrsatishni oʻz ichiga oladigan yangi servis shoxobchalari jadal rivojlanmoqda va aholiga xizmat qilmoqda.



Yuqoridagi chizmadan koʻrinadiki, bu masalalarning barchasi inson salomatligi bilan bogʻliq. Bu borada 2009-yilda respublikamizdagi barcha tumanlarning markaziy shifoxonalari umumiy qiymati 12 million dollar boʻlgan tibbiy anjomlar, 44 ta «UAZ» sanitariya mashinasi, 280 ta «Damas-ambulans» tez yordam mashinasi bilan ta'minlandi, qishloq vrachlik punktlariga 1 million dollar miqdorida tibbiy laboratoriya anjomlari etkazib berildi.

Yil davomida 3 million 750 ming nafar qishloq aholisi malakali tibbiy koʻrikdan, 22 ming nafardan ziyod homilador ayol maxsus skrining tekshiruvidan oʻtkazildi, 400 ming nafar bemor shifoxonalarda davolanib, oʻz salomatligini mustahkamladi.

Kadrlar tayyorlash Milliy dasturi va Maktab ta'limini rivojlantirish umummilliy davlat dasturi doirasida olis qishloq va ovullarda ham yagona namunaviy loyiha va mezonlar asosida lisey va kollejlar, maktablar qurildi. Buning natijasida barcha qishloq bolalarining zamonaviy bilim va kasb-hunarlarga ega boʻlishi, eng muhimi, ularning mamlakatimizdagi oliy oʻquv yurtlariga kirib ta'lim olishiga munosib sharoitlar yaratildi.

2009-yilda bu boradagi ishlar yangi bosqichga koʻtarilib, yurtimiz boʻyicha jami 1 ming 957 ta maktab qurilgan va rekonstruksiya qilingan boʻlsa, ularning 1 ming 622 tasi aynan qishloq joylarda ekani diqqatga sazovordir. Shular qatorida 2009-yilda barpo etilgan 214 ta akademik lisey va kasb-hunar kollejining 170 tasi qishloq tumanlarimizda bunyod etilgani va rekonstruksiya qilinganini ta'kidlash lozim. Aynan qishloq joylardagi ana shu bilim dargohlarini qurish, rekonstruksiya qilish, ta'mirlash va jihozlash uchun jami 895 milliard soʻm mablagʻ sarflandi.

«Qishloq taraqqiyoti va farovonligi yili» dasturi oʻz koʻlami, ahamiyati va mohiyati bilan bugungi kunimiz va ertangi kelajagimizning nafaqat moddiy tomonlarini, ayni paytda madaniy va ma'naviy saviyamizni oshirish, muxtasar aytganda, butun hayotimizni yuksaltirishga qaratilgan boʻlib, hech shubhasiz, mamlakatimiz tarixida munosib oʻrin egallashi muqarrar.

Tayanch tushunchalar:

Agar munosabatlar, qishloq xoʻjaligi, yerga egalik qilish, yerdan foydalanish huquqi, fermer, fermer xoʻjaligi, fermerlik harakati, agrobiznes, yer islohoti, renta, diferensial renta, absolut renta, agrosanoat intergatsiyasi.

Savol va topshiriqlar:

- 1. Bozor munosabatlari agrar tizimga nimalarni kiritadi?
- 2. Yerning boshqa resurslardan qanday farqi bor?
- 3. Renta munosabati deganda nimani tushunasiz?
- 4. Absolut rentaning differensial rentadan farqini tushuntiring.
- 5. Differensial rentaning hosil bo'lish mexanizmi qanday?
- 6. Nima sababdan monopol renta yoʻqolib ketishi mumkin?
- 7. Ijara haqining tarkibi qanday?
- 8. Qishloqlarning qiyofasi deganda nimani tushunasiz? Uni oʻzgartirish nimalarni taqozo etadi?
- 9. Mamlakatimizda qishloq aholisining turmush sharoitini zamon talablariga moslashtirish borasida qanday ishlar amalga oshirilmoqda?
- 10. Qishloq infratuzilmasi nima? 2012-yilda uni rivojlantirish borasida qanday natijalarga erishildi?
- 11. Yer unumdorligini oshirish, uning meliorativ holatini yaxshilash borasida erishilgan natijalarni izohlang.
- 12. Qishloq joylarda xizmat koʻrsatish va servis shoxobchalari faoliyatining ahamiyati qanday?
- 13. Qishloqda turmush madaniyati va sifatini oshirish borasida qanday ishlar amalga oshirilayotgani toʻgʻrisida gapiring.

Mavzuni chuqur o'rganish instrumentariysi

Agrar munosabatlar – bu yerga egalik qilish, uni tasarruf etish va undan foydalanish bilan bogʻliq ravishda vujudga keladigan iqtisodiy munosabatlardir. Agrar munosabatlar qishloq xoʻjaligida takror ishlab chiqarishning oʻziga xos xususiyatlarini ifodalaydi.

Yerga egalik qilish – tarixan tarkib topgan an'analar yoki qonuniy asosda belgilangan tartibda yerga egalik huquqining tan olinishini bildiradi.

Yerdan foydalanish huquqi – bu oʻrnatilgan urf-odatlar, udumlarga koʻra yoki qonuniy tartibda ularning doimiy va muddatli foydalanish uchun berilishini bildiradi.

Ijara munosabatlari – yerdan haq toʻlash sharti bilan ma'lum muddatda foydalanish yuzasidan kelib chiqadigan iqtisodiy aloqalar.

Renta – yerdan foydalanganlik uchun uning egasiga toʻlanadigan haq.

Renta – yerga boʻlgan mulkning iqtisodiy sivilizatsiyasi, ya'ni amalga oshishi.

Absolut renta – yer uchastkalarining sifatidan qat'i nazar, yer mulk bo'lgani uchun uning egalari oladigan renta.

Differensial (tabaqalashgan) renta – yerning sifatiga qarab olinadigan va rentaning absolut rentadan ortiqcha boʻlgan qismi.

Differensial renta I – tuproqning tabiiy hosildorligiga va yer uchastkasining joylashuviga qarab olinadigan renta.

Differensial renta II – tuproqning iqtisodiy hosildorligi natijasi boʻlib, yerga qoʻshimcha mablagʻ sarflab, unga ishlov berish orqali hosildorlikni oshirish natijasida olingan renta.

Monopol renta – alohida tabiiy-iqlim sharoitiga ega boʻlgan, oʻta noyob mahsulot yetishtiradigan yer uchun uning egasiga toʻlanadigan renta. Faqat ana shunday yerlarda kamyob mahsulotlar (masalan, choy, kofe, sitrus oʻsimliklari mevasi, maxsus yogʻoch – qizil yogʻoch) yetishtiriladi.

Agrobiznes deganda, qishloq xoʻjaligi sohasidagi biznes (tadbirkorlik) tushuniladi va u bozor tizimining tarkibiy qismlaridan birini tashkil etadi.

Melioratsiya – yerning unumdorligini tubdan yaxshilashga qaratilgan tashkiliy-xoʻjalik, muhandislik va agrotexnik tadbirlar turkumi.

Mavzu yuzasidan asosiy xulosalar:

1. Oʻzbekistonda mustaqillikning dastlabki yillaridan boshlab qishloq xoʻjaligini rivojlantirish strategiyasi aniq va ravshan belgilab olindi. Mazkur strategiya zamirida qishloq xoʻjaligini diversifikatsiya qilish, paxta yakkahokimligiga barham berish, yurtimiz aholisini oziq-ovqat mahsulotlari,

birinchi navbatda, gʻalla bilan ta'minlash, oziq-ovqat mustaqilligiga erishish vazifalari belgilandi.

- 2. Agrar islohotlar hamma joyda bozor munosabatlarini joriy qilish va xususiy mulk shaklini rivojlantirishga qaratildi.
- 3. Oʻzbekistonda agrar sohadagi islohotlar natijasida xususiy fermer xoʻjaliklari shakllandi. Zarar koʻrib ishlayotgan va samarasi past xoʻjaliklar tugatildi. Ularning yerlari uzoq muddatli ijaraga, xususiy fermer xoʻjaliklariga umrbod meros huquqi bilan berildi.
- 4. Agrar sohadagi islohotlar qishloq xoʻjaligi ishlab chiqarishida sezilarli ijobiy oʻzgarishlarga olib keldi. Ishlab chiqarish hajmi oʻsdi. Qishloq xoʻjaligi ekinlari hosildorligi va chorva mahsuldorligining oshishiga erishildi. Yerlarning meliorativ holati yaxshilandi.

17-MAVZU. AHOLI DAROMADLARI VA DAVLATNING IJTIMOIY SIYOSATI

1. Daromadlarning iqtisodiy mazmuni

Prezidentimiz Islom Karimovning ta'kidlashicha, «odamlarning dasturxonida, oilaviy ahvolida, ro'zg'or tebratishida, umuman, kundalik hayotida ijobiy o'zgarishlar ko'zga tashlanmasa, bu aholining haqli e'tirozi va noroziligiga olib kelishi tabiiy hol»¹. Buni hal etish zarurati bozor iqtisodiyotining ijtimoiy jihatlarini o'rganish, daromadlar va turmush darajasini atroflicha tahlil etishni talab qiladi. Davlatimiz rahbarining yangi hayotni eskicha qarash bilan qurib bo'lmaydi, degan fikridan kelib chiqqan holda mustaqillikning dastlabki yillaridanoq eskicha qarashlardan xoli bo'lgan ijtimoiy yo'nalishni rivojlantirishga qaratilgan konsepsiya ishlab chiqildi va uning asosida turmush darajasini yanada yuksaltirishga e'tibor qaratildi.

Bozor iqtisodiyoti sharoitida ishlab chiqarish birlamchi ahamiyat kasb etsa-da, uning natijasi daromad foyda shaklida bozorda yuzaga chiqadi, chunki bozor qoidalari resurslar sarfi samarasiga koʻra daromadlarga ega boʻlishni ta'minlaydi. Demak, aholi turmush

 $^{^1}$ *Каримов И. А.* Янги ҳаётни эскича ҳараш ва ёндашувлар билан ҳуриб бўлмайди // Халҳ сўзи. -2005. -17 февр.

darajasining yuksalishi bozor qoidalari orqali topiladigan daromadlarga bogʻliq boʻlib qoladi. Shuning uchun bozor tizimining ijtimoiy moʻljali, daromadlar, ularga ta'sir etuvchi omillar va turmush darajasining tabaqalanishi masalalari dolzarb ahamiyat kasb etadi.

Daromadlar cheklangan resurslarni naqadar samarali ishlatish darajasiga bogʻliq boʻlsa-da, daromadning oʻzi mazmunan iqtisodiy manfaatni anglatadi. Darhaqiqat, iqtisodiy subyektlarning manfaati daromadlarda mujassamlanadi. Shu bois daromadga ega boʻlish uchun mamlakatimizda kichik biznes va xususiy tadbirkorlik bugungi kunda davlat siyosati darajasiga koʻtarildi. Chunki mulk egalari iqtisodiy munosabatlarga kirishib, oʻz manfaatlarini himoya qilishga intiladi. Iqtisodiy adabiyotlarda daromad ragʻbatlantiruvchi iqtisodiy mazmunga ega boʻladi. Daromad boylik manbai, boylik esa oʻrtacha mulkdorlar sinfining shakllanishida moddiy zamin tayyorlaydi. Mulk insonlarni iqtisodiy faollikka undaydi.

Aholi daromadlari deyilganda, ularning ma'lum vaqt oraligʻida (masalan, bir yilda) pul va natural shakllarida olgan daromadlari miqdori tushuniladi. Aholi iste'mol darajasi toʻgʻridan-toʻgʻri ularning daromadlari darajasiga bogʻliq boʻladiki, bu daromadlarning aholi turmush darajasidagi rolini belgilab beradi.

Aholi pul daromadlari ish haqi, tadbirkorlik faoliyatidan olinadigan daromad, nafaqa, stipendiya shaklidagi barcha pul tushumlarini, mulkdan foiz, dividend, renta shaklda olinadigan daromadlarni, qimmatli qogʻozlar, koʻchmas mulk, qishloq xoʻjalik mahsulotlari, hunarmandchilik buyumlarini sotishdan va har xil xizmatlar koʻrsatishdan kelib tushadigan daromadlarni oʻz ichiga oladi.

Natural daromad mehnat haqi hisobiga olinadigan va uy xoʻjaliklarining oʻz iste'mollari uchun ishlab chiqargan mahsulotlardan iborat boʻladi. Jamiyat a'zolari daromadlari darajasi ular turmush farovonligining muhim koʻrsatkichi hisoblanib, shu bilan birga alohida shaxslarning dam olishi, bilim olishi, sogʻligini saqlashi, eng zarur ehtiyojlarini qondirishi imkoniyatlarini belgilab beradi. Aholi daromadlari darajasiga bevosita ta'sir koʻrsatuvchi omillar orasida ish haqidan tashqari chakana narx dinamikasi, iste'molchilik bozorining tovarlar bilan toʻyinganlik darajasi kabilar muhim oʻrin tutadi.

Aholi daromadlari darajasiga baho berish uchun nominal, ixtiyorida boʻlgan va real daromad tushunchalaridan foydalaniladi.

Nominal daromad – aholi tomonidan ma'lum vaqt oraligʻida olingan pul daromadlari miqdori hisoblanadi.

Ixtiyorida bo'lgan daromad — shaxsiy iste'mol va jamg'arma maqsadlarida foydalanish mumkin bo'lgan daromad. Bu daromad nominal daromaddan soliqlar va majburiy to'lov summasiga kam bo'ladi.

Real daromad – narx darajasi oʻzgarishini hisobga olib, aholining ixtiyorida boʻlgan daromadga sotib olish mumkin boʻlgan tovar va xizmatlar miqdorini koʻrsatadi.

Aholining nominal pul daromadlari turli manbalar hisobiga shakllanib, ulardan asosiylari quyidagilar hisoblanadi:

- a) ishlab chiqarish omillari hisobiga olinadigan daromad;
- b) davlat yordam dasturlari boʻyicha toʻlov va imtiyozlar shaklidagi pul tushumlari;
 - c) moliya-kredit tizimi orqali olinadigan pud daromadlari.

Davlatimiz rahbari Islom Karimov «qariyb yigirma yillik mustaqil taraqqiyotimiz mobaynida Oʻzbekistonda yalpi ichki mahsulotning oʻsishi 3,5 barobarni, aholi jon boshiga hisoblaganda esa 2,5 barobarni, aholining real daromadlari 3,8 barobarni tashkil etgani e'tiborga sazovordir. Ayniqsa, ijtimoiy-gumanitar sohada erishilgan marralar – aholini ijtimoiy himoya qilish uchun yoʻnaltirilgan davlat xarajatlarining 5 barobar koʻpaygani» 1ni alohida ta'kidladi.

Aholining yollanib ishlovchi qismi oladigan daromadlarning asosiy qismini ish haqi tashkil qiladi. Daromadning bu turi istiqbolda ham, pul daromadlari umumiy hajmining shakllanishida ham oʻzining yetakchi rolini saqlab qoladi.

Aholi pul daromadlari darajasiga davlat yordam dasturlari boʻyicha toʻlovlar sezilarli ta'sir koʻrsatadi. Bu manbalar hisobiga pensiya ta'minoti amalga oshiriladi va turli xil nafaqalar toʻlanadi. Aholining moliya-kredit tizimi orqali oladigan pul daromadlari quyidagilardan iborat: davlat sugʻurtasi boʻyicha toʻlovlar; shaxsiy uy qurilishiga va matlubot jamiyati a'zolariga bank ssudalari; jamgʻarma bankiga qoʻyilmalar boʻyicha foizlar; aksiya, obligatsiya bahosining

¹ *Каримов И. А.* Мамлакатимизда демократик ислохотларни янада чукурлаштириш ва фукаролик жамиятини ривожлантириш концепцияси. – Т.: «Ўзбекистон», 2010. – Б. 4–5.

koʻpayishidan olinadigan daromad va zayom boʻyicha toʻlovlar; lotereya boʻyicha yutuqlar; tovarlarni kreditga sotib olish natijasida tashkil topadigan, vaqtincha boʻsh mablagʻlar; har xil turdagi kompensatsiya toʻlovlari va h.k.

Aholi guruhlari boʻyicha daromadlar taqsimlanishi dinamikasini taqqoslash, iste'molchilik budjeti asosida amalga oshiriladi. Iste'molchilik budjetlari quyidagicha koʻrsatish mumkin: oʻrtacha oila uchun, yuqori darajada moʻl-koʻl budjet, minimal moddiy ta'minlanganlar budjeti, nafaqaxoʻrlar va aholining boshqa ijtimoiy guruhlari budjeti, shular jumlasidandir.


Farovonlikning eng quyi chegarasini oila daromadining shunday chegarasi bilan belgilash mumkinki, undan keyin ishchi kuchini takror hosil qilishni ta'minlab bo'lmaydi. Bu daraja moddiy ta'minlanganlik minimumi yoki kun kechirish darajasi (qashshoqlikning boshlanishi) sifatida ifoda etiladi.

Bozor iqtisodiyoti sharoitida oʻrtacha daromad «oʻrtacha sinf» deb ataladigan tabaqalar daromadlari boʻyicha aniqlanadi. Bunday guruh iste'molchilik savati toʻplamiga uy, avtomashina, dala hovli, zamonaviy uy jihozlari, sayr qilish va bolalarini oʻqitish imkoniyati, qimmatli qogʻozlar va zebu ziynatlar kiradi.

2. Daromadlar tizimi

Daromadlar davlat, korxona (firma), xonadon (oila) darajasida mavjud boʻladi. Daromadlar ishlab chiqarish darajasiga bogʻliq boʻladi. Shuningdek, daromadlarning shakllanishida iqtisodiy subyektlar iqtisodiy va noiqtisodiy omillar ta'siriga uchrashi mumkinligini ham inobatga olish kerak. Daromadlar taqsimot munosabatlarining yakuni deb hisoblanadi. Bozor iqtisodiyoti daromadlarning tabaqalashuvini obyektiv voqelikka aylantiradi. Daromadlar shakllanishida tengsizlik yuz beradi, lekin ushbu tengsizlik adolatli boʻlishi kerak.

Daromadlar tizimi bozor tizimining bir qismi hisoblanadi. Daromadlar takror ishlab chiqarish yoki iqtisodiy aylanishi jihatidan qaralganda taqsimlash jarayonining nihoyasidir. Daromad munosabat obyekti sifatida pul yoki moddiy shaklga ega boʻladi. Daromadlarni oʻzlashtirishda nafaqat xonadon, firma va davlat ishtirok etadi, bulardan tashqari iqtisodiy faol boʻlmagan aholi guruhlari ham subyekt sifatida ishtirok etadi. Daromadlar tizimi quyidagi elementlarni oʻz ichiga oladi (1-chizmaga qarang):



Daromadlar taqsimot qonuniga koʻra shakllanadi. U daromad tizimiga kiradi. Daromadlarni shakllantirishda ma'lum iqtisodiy institutlar qatnashadi, ular ham davlat, ham nodavlat institutlari hisoblanadi, ular faoliyati daromadlarni tartiblaydi va bu ijtimoiy adolat boʻlishini ta'minlashga qaratilgan boʻladi. Bular ham daromad tizimiga kiradi.

Daromadlar tizimiga daromad siyosati ham kiradi, bu daromadlarni hosil etish va sarflashga taalluqli sa'y-harakatlar va amaliy choratadbirlardan iborat. Bu siyosatni faqat davlat emas, balki firma va xonadonlar ham qo'llaydi.

Hozirgi iqtisodiyot nazariyasida tizimli yondashuv metodologiyasi ustuvorlikka ega. Bu iqtisodiyotni yirik va kichik tizimlarga, tizimlarni esa turli elementlarga ajratish, ularning oʻzaro aloqalarini aniqlash, tizim hosil etuvchi xususiyatlarni belgilashni talab qiladi. Shu jihatdan qaraganda daromadlarni taqsimot hosilasi sifatida kichik tizimga ajratib oʻrganish maqsadga muvofiqligini ayrim olimlar ta'kidlagan¹.

 $^{^{1}}$ Qarang: *Хасанов Р. Р.* Ахоли даромадлари ва турмуш даражаси: Ўқувуслубий қўлланма. — Т., 2008. — Б. 12.

3. Bozor va nobozor daromadlar

Daromadlarning ijtimoiy-iqtisodiy tabiati, shakllanishi mexanizmi va oʻzlashtirish usullari ularni turkumlashning muhim mezonlari hisoblanadi. Oʻtish davrida daromadlar tabiati jihatidan bozor va nobozor turlariga ajralib, iqtisodiy va huquqiy jihatdan qonuniy va noqonuniy tus oladi.

Bozor iqtisodiyoti xoʻjalik subyektlarining turli omillar ta'sirida tabaqalanishini yuzaga chiqaradi va bu daromadlarning kam turkumlanishiga olib keladi. Bunday turkumlanish bozor talablaridan kelib chiqqan holda har xil yondashuvlar orqali, ya'ni mavjud iqtisodiy resurslarning qay darajada samarali ishlatilishiga nisbatan pirovard natijaning ham farqlanishiga olib keladi.

Bozor iqtisodiyoti sharoitida daromadlar tarkibi daromad manbaiga, ya'ni uning qayerdan kelishiga qarab ham shakllanadi. Shu jihatdan mehnat natijasidan, tadbirkorlikdan, mulkdan kelgan daromad va transfert (nochorlarga budjetdan beriladigan nafaqa va yordam puli) kabi daromadlar ma'lum nisbatda bo'ladi. Daromadlarning turlariga nisbatan turkumlanishi 2-chizmada aks engan.


Daromadlar turkumlanishida bozor daromadlari asos sifatida yuzaga chiqadi. Chunki bozor daromadlari subyektlarning bozor orqali ishlab topgan daromadlari yigʻindisidan tashkil topadi. Daromadning bu turi bozor uchun ishlash, resurslarni samarali ishlatish va tan olingan natijaga toʻlanadigan haq sifatida namoyon boʻladi.

Bozor daromadlari – bu iqtisodiyot subyektlarining oʻz resurslarini bozor qonun-qoidalariga binoan ishlatib topgan pul tushumlaridir.

Daromad keltiruvchi resurs – bu tovar va xizmatlarni yaratish uchun umuman zarur boʻlgan barcha moddiy va mehnat vositalaridir. Ishlab chiqarish omillari – bu tovar va xizmatlarni yaratishda bevosita ishtirok etuvchi barcha moddiy va mehnat vositalaridir.

Bizningcha, daromadga bozor tavsifini berish uchun nafaqat uni topish usullari, balki buning qanday shaklda boʻlishini ham nazarda tutish darkor. Natural moddiy shakldagi daromadlar ishlab topilgan boʻlsa-da, ularni bozor daromadi deb hisoblash mumkin emas, chunki bozor daromadlari tovar-pul munosabatlarini ifoda etganidan, ular albatta pul shaklida olinishi kerak. Nobozor daromadlari bozor daromadlaridan farqliroq ham natural, ham pul shakliga ega.

Binobarin, bozor va nobozor daromadlarini tavsiflashda ikki mezon asos boʻlishi kerak. Birinchisi – daromadni olish usuli, ikkinchisi – uning shakli.



Nobozor daromadlari – bu subyektlarning ijtimoiy maqomiga koʻra va muhtojlik darajasiga nisbatan beriladigan pul yoki moddiy tushumlardir.

Bozor daromadlari oʻz mohiyatiga koʻra bir qancha vazifalarni bajaradi. *Birinchidan*, bozor daromadlari kishilarning tirikchiligini ta'minlaydi va ish kuchini takroran hosil etadi. *Ikkinchidan*, inson

salohiyatini takomillashib borishga undaydi, u qoʻshimcha daromad topib, boshqalardan farovonroq yashash ishtiyoqini uygʻotadi va moliyaviy resurs sifatida iqtisodiy oʻsishga xizmat qiladi, ahamiyati doimo kuchayib boradi. *Uchinchidan*, bozor daromadlari daromadlarning kuchli, lekin adolatli tabaqalanishiga hamda turmush darajasining jiddiy farqlanishiga olib keladi. *Toʻrtinchidan*, bozor daromadlaridagi tengsizlik aholini ijtimoiy himoya qilishni zarur qiladi.

Ishlab chiqarish omillari bozor daromadi turlarini keltirib chiqarar ekan, bu daromad turlarining shakllanishi oʻziga xos xususiyat kasb etadi. Bozor daromadi turlari quyidagi koʻrinishlarda mavjud boʻladi:

- 1) mehnat natijasidan kelgan daromad yoki ish haqi;
- 2) mulkdan tushadigan daromadlar;
- 3) tadbirkorlik daromadi.

4. Aholi daromadlarining tabaqalanishi va ijtimoiy chegarasi

Bozor tizimi teng imkoniyatlar beradi, lekin u kishilarning ishlab pul topish qobiliyatlarini ijtimoiy maqomini tenglashtira olmaydi. Bu qobiliyat tabiiy, chunki kishilarning aql-idroki va kuch-quvvati har xil bo'ladi. Biroq ozmi-ko'pmi bir xildagi tug'ma qobiliyatlarning yuzaga chiqishi ijtimoiy muhitga, kishilarning ijtimoiy holatiga ham bogʻliq bo'ladi. Shu jihatdan olganda, inson kapitaliga investitsiyalar ko'p kiritilgan yerda (masalan, rivojlangan mamlakatda) tug'ma qobiliyat to'laroq yuzaga chiqadi. Aksincha, bunday investitsiya qilishga moliyaviy resurslari yetishmagan mamlakatlarda qobiliyatni rivojlantirish imkoniyati cheklanadi. Albatta, ijtimoiy tabaqalashuvga kishilarning qaysi ijtimoiy guruhga mansubligi ham ta'sir qiladi. Odatda dehqon xonadonlarida ish kuchi sifatini oshirish uchun mablagʻ hamma vaqt ham yetishmaydi, aksincha, tadbirkorlar yoki xizmatchilar xonadonida buning imkoni koʻproq boʻladi. Boy xonadonlarda yuqori sifatli, lekin pulli ta'lim-tarbiya xizmatlarini xarid etishga pul topiladi, kambag'al xonadonlarda esa buning iloji boʻlmaydi. Qobiliyatlarni yuzaga chiqarish darajasi mamlakatlarning rivojlanish modeliga ham bogʻliq. Agar rivojlanish modeliga koʻra ijtimoiy xizmatlarning aksariyat qismini davlat moliyalashtirib, aholiga bepul yetkazib bersa, shu yerda ish kuchi rivoj topadi, u yuqori unumdorlik beradi va shu bois daromad topish ham koʻpayadi. Jahon moliyaviy-iqtisodiy inqirozi sharoitida rivojlangan mamlakatlarda ham davlatning ijtimoiy xarajatlari borasida ancha murakkabliklar tugʻilmoqda.

Oʻzbekistonda davlat budjetdan ijtimoiy ne'matlarning yaratilishini moliyalashtiradi, ulardan esa xalq bepul foydalanadi. Bu ne'matlardan hamma bahramand boʻlgani bois, ish kuchining sifati ortadi. Davlat yordamida aholining keng tabaqalari oʻz qobiliyatlarini rivojlantirish imkoniga mustaqillik bois ega boʻladi.

Ijtimoiy tabaqalanishning yana bir omili oilaning demografik tarkibidir. Oilada pul topuvchilar qanchalik koʻp boʻlib, boqimandalar oz boʻlsa, bu yerda jon boshiga toʻgʻri keladigan daromad shunchalik koʻp boʻladi. Bunday bogʻliqlik Oʻzbekistonda yaqqol kuzatiladi.

Demografik rivojlanish. Oʻzbekistonda doimiy istiqomat qilayotgan aholi soni 2012-yilning nihoyasida 29,6 million kishini tashkil etdi. Bu koʻrsatkich 1990–2010-yillar mobaynida 8,2 million kishiga koʻpaydi yoki 1,4 barobar oshdi. Yurtimizda jismoniy va ma'naviy barkamol avlodni tarbiyalashga qaratilgan, puxta oʻylangan demografik siyosat natijasida aholining yillik oʻrtacha oʻsishi keyingi yillarda barqarorlashib, oʻtgan asrning 80 yillaridagi 2 foizdan ziyod koʻrsatkich oʻrniga 1,4 foiz darajasida qayd etilmoqda.

Davlatimiz rahbari Islom Karimov: «Sir emaski, biz mustaqil taraqqiyotimizning dastlabki yillaridan boshlab ijtimoiy adolat tamoyillarini mustahkamlash, aholining daromadlari va turmush sharoitida keskin tafovut boʻlishiga yoʻl qoʻymaslikka katta e'tibor qaratmoqdamiz.

Keyingi oʻn yilda yurtimizda aholi daromadlari hajmi 8,1 barobar ortgan bir paytda, ish haqi, ijtimoiy koʻmakka muhtoj toifalarning daromadlari miqdorini jadal oshirish, ularni qoʻllab-quvvatlash va soliq imtiyozlari berish hisobidan aholining eng past va eng yuqori daromadga ega boʻlgan guruhlari oʻrtasidagi tafovut, boshqacha aytganda, daromadlardagi farq koeffitsiyenti 21,1 barobardan 8,3 barobarga qisqardi. Aytish kerakki, Mustaqil Davlatlar Hamdoʻstligi mamlakatlari va bir qator iqtisodiy rivojlangan davlatlar oʻrtasida bu koeffitsiyent eng past koʻrsatkichlardan biri hisoblanadi.

Yurtimizda oʻtgan yillar davomida ish haqi va pensiyalarning xarid qobiliyati izchil va barqaror oʻsgani aholining hayot darajasi va sifati ortib borayotganining yaqqol tasdigʻidir. Buning isboti tariqasida quyidagi misol va raqamlarni keltirmoqchiman.


Agar 1991-yilda eng kam ish haqiga Xalqaro mehnat tashkiloti va Jahon sogʻliqni saqlash tashkilotining tavsiyalariga qat'iy muvofiq tarzda hisoblab chiqilgan iste'mol savati qiymatining faqat 8 foizini tashkil etadigan tovar va xizmatlarni xarid qilish mumkin boʻlgan boʻlsa, 2011-

yilda bu koʻrsatkich iste'mol savatining 120 foizini tashkil etdi yoki 15 barobar oʻsdi, eng kam pensiyaning xarid qobiliyati esa 9 karra oshdi»¹, – deb ta'kidladi.

Davlatimiz tomonidan sogʻliqni saqlash, onalik va bolalikni himoya qilish boʻyicha koʻrilayotgan chora-tadbirlar tufayli onalar va bolalar oʻrtasida oʻlim darajasining izchil pasayishiga erishildi: mustaqillik yillarida bolalar oʻlimining umumiy koeffitsiyenti 1990-yildagi 34,6 promilledan 2010-yilda 11,0 promillega, onalar oʻlimi esa 100 ming tirik tugʻilgan chaqaloqqa nisbatan tegishlicha 65,3 dan 21 ga tushdi. Natijada aholining oʻrtacha umr koʻrish darajasi 1990-yildagi 67,2 yoshdan 2010-yilda 73,1 yoshga yetdi yoki 9 foizdan koʻproq oʻsdi (3-chizmaga qarang).

3-chizma

Aholining o'rtacha umr ko'rishi, yosh



Mamlakatimizda ijobiy demografik jarayonlar aholining yosh tarkibini ham optimallashtirishni taqozo etdi. Bu jarayonda Oʻzbekiston yoshlar mamlakati sifatidagi maqomini saqlab qolmoqda, aholining oʻrtacha yoshi 26,9 yoshni tashkil etmoqda.


 $^{^{1}}$ *Каримов И. А.* 2012 йил Ватанимиз тараққиётини янги босқичга кутарадиган йил булади. – Т., 2012. – Б. 14–15.

1-jadval

Koʻrsatkichlar		Yillar					2011-yilda 1995-		
						yilga nisbatan			
						oʻzgarish			
	1995	2008	2009	2010	2011	+, -	foiz		
Tugʻilganlar soni	678,0	608,9	646,1	651,3	669,6	-8,4	87,7		
Ўлганлар сони	145,4	137,4	138,8	133,6	138,4	- 7,0	95,2		
Nikohdan	168,9	254,2	250,2	272,0	292,3	123,4	173,0		
o'tganlar									
soni									
Ajralishlar soni	28,5	19,4	18,3	17,8	17,6	- 10,9	61,7		

Manba: Oʻzbekiston Respublikasi Davlat statistika qoʻmitasi.


Oila institutini mustahkamlash, xususan, kam ta'minlangan va yosh oilalarni aniq yoʻnaltirilgan tarzda ijtimoiy qoʻllab-quvvatlash va uy-joy sharoitini yaxshilash imkoniyatlarini kengaytirishga qaratilgan choratadbirlar barqaror demografik rivojlanishni ta'minlash imkonini berdi. Natijada 1990–2011-yillarda yosh oilalar oʻrtasida ajrashishlar koeffitsiyenti ikki barobardan koʻproq pasaydi, oila qurishning oʻrtacha yoshi oshdi va oilada bolalar soni oʻrtacha boʻlishiga e'tibor qaratadigan oilalar ulushi ortdi. Ayni vaqtda aholining barqaror koʻpayishi ta'minlanmoqda.



Manba: O'zbekiston Respublikasi Davlat statistika qo'mitasi.

Aholi bandligi. Mamlakatimizda 1990-yildan 2012-yilga qadar ish bilan band boʻlgan aholi soni qariyb 4,0 million nafarga oshdi va 2011-yilning oxirida qariyb 12,0 million kishini tashkil etdi. Yangi ish oʻrinlarini tashkil etish, iqtisodiyot tarmoqlari tarkibini diversifikatsiya qilish, malakali mutaxassislar tayyorlash va shuningdek, 12 yillik majburiy ta'lim tizimiga oʻtish borasida koʻrilgan chora-tadbirlar aholining bandlik darajasini yanada oshirish imkonini berdi. 2011-yil yakunlariga koʻra, mamlakatimizda Xalqaro mehnat tashkiloti uslubi asosida aniqlangan ishsizlik darajasi maqbul darajada boʻlib, iqtisodiy faol aholining qariyb 5 foizini tashkil etadi.

Aholi bandligi tarkibida muhim ijobiy oʻzgarishlar ta'minlandi. Agar mustaqillikning dastlabki yillarida ish bilan band boʻlganlarning 60 foizi davlat sektori hissasiga toʻgʻri kelgan boʻlsa, 2000-yilda bu koʻrsatkich 24 foizga tushdi. Bugungi kunda esa mazkur sektorda umumiy ish bilan band aholining 20 foizdan koʻprogʻi mehnat qilmoqda. Bandlikning sohalar boʻyicha tarkibida ham ijobiy tendensiyalar kuzatilmoqda: qishloq xoʻjaligida band boʻlgan aholi soni sezilarli darajada kamaydi. Agar 1990-yillarning boshida mazkur sohada ishlovchilar soni jami ish bilan band boʻlganlarning 40 foizini tashkil etgan boʻlsa, bugungi kunda bu raqam 25 foizga tushdi. Xizmat koʻrsatish, transport va qurilish sohalarida esa ish bilan band boʻlganlar soni oʻsib, 36 foizdan 52 foizga yetdi.



Manba: Oʻzbekiston Respublikasi Davlat statistika qoʻmitasi.

Bandlikni ta'minlashga qaratilgan hududiy dasturlarning amalga oshirilishi, tadbirkorlikni qo'llab-quvvatlash va rivojlantirish natijasida,

faqat soʻnggi 5 yilning oʻzida iqtisodiyotning barcha tarmoqlarida 3,8 millionga yangi ish oʻrni yaratildi. Ularning 76,0 foizdan ziyodi kichik biznes va xususiy tadbirkorlik sohasiga toʻgʻri keladi. Qayd etish joizki, hozirgi kunda yangi ish oʻrinlarini yaratish va aholi bandligini oshirish maqsadida kichik biznes va xususiy tadbirkorlik sohasi uchun har yili tijorat banklari tomonidan 1 trillion soʻmdan ortiq miqdorda kredit mablagʻlari berilmoqda.

Aholining bandlik darajasi va daromadlari, uning hayot darajasini oshirish, shuningdek, mehnat bozorida ishchi kuchiga boʻlgan talabni yanada toʻlaroq qondirish boʻyicha yurtimiz hududlari va iqtisodiyot tarmoqlaridagi mavjud salohiyatdan samarali foydalanish maqsadida, 2012-yilda Oʻzbekiston Respublikasi Oliy Majlisi Senatining qarori bilan 2013-yilda ish oʻrinlarini tashkil etish va aholi bandligini ta'minlash dasturi ishlab chiqildi va qabul qilindi. Unga koʻra 2013-yilda 972700 ta ish oʻrinlari yaratiladi.

Soʻnggi yillarda kasanachilik va oilaviy tadbirkorlik kabi aholi bandligini ta'minlashning yangi shakllari faol rivojlandi. Faqat 2006–2010-yillarda mamlakatimiz korxonalari bilan fuqarolar oʻrtasida tuzilgan kasanachilik va ijara shartnomalari asosida 674 mingta ish oʻrni tashkil etildi. Bundan tashqari, aholining iqtisodiy faolligi oshishi, oʻzini oʻzi bandligini ta'minlashi uchun qulay shart-sharoitlar yaratilishi natijasida milliy hunarmandlik va oilaviy tadbirkorlik sohalarida 302,1 mingta ish oʻrinlari ochildi.

Dehqon va shaxsiy yordamchi xoʻjaliklar bazasida chorvachilik va parrandachilikni rivojlantirish boʻyicha koʻrilgan chora-tadbirlar aholi bandligini ta'minlashga sezilarli hissa boʻlib qoʻshildi. Xususan, kam ta'minlangan va koʻp bolali oilalarga bepul qoramol berilishi natijasida 1,4 million nafar qishloq aholisi dehqon xoʻjaliklarida qoramollar boqish bilan shugʻullanish imkoniyatiga, ushbu faoliyat turi bilan shugʻullangan davri pensiya tayinlash uchun mehnat stajiga kiritilishi huquqiga ega boʻldi.

Mamlakatimizning barcha tuman hamda shaharlarida ish bilan band boʻlmagan aholiga ishga joylashish masalasida yordam beradigan maxsus markazlar tashkil etildi va samarali faoliyat koʻrsatmoqda. Soʻnggi 5 yil ichida ushbu markazlar tomonidan 2,4 million kishi boʻsh va yangi oʻrinlarga ishga joylashtirildi, 96 ming nafardan ziyod aholi mehnat bozorida talab katta boʻlgan kasb-hunarlarga oʻqitildi va malakasini oshirdi. Ba'zi ma'lumotlarga koʻra, bu yerda ish bilan bandlik darajasi past boʻlganidan bir ishlovchiga toʻgʻri keladigan va uning qaramogʻidagi

boʻlgan kishilar soni ancha koʻp. Buning natijasida bir oilaga hisoblangan daromadlar koʻp boʻlgani holda, jon boshiga tegadigan daromadlarning kamligi kuzatiladi. Aholining daromad jihatidan tabaqalanishi, oila tarkibidan tashqari, ishlab topilgan daromad miqdoriga ham bogʻliq. Buni esa mehnat unumdorligi darajasi belgilaydi.

Aholini daromadi va turmush darajasi jihatidan bo'lish ma'lum iyerarxiyani hosil etadiki, buni daromadlar piramidasida koʻrish mumkin. Bu piramida besh pogʻonali (oʻta boylar, boylar, oʻrta hollar, kambagʻallar va oʻta kambagʻallar – qashshoqlar) yoki uch pogʻonali (boylar, o'rta hollar va kambag'allar) bo'lishi mumkin. Bunday tabaqalashuvni bozor qonunlarining oʻzi taqozo etadi. Bozor iqtisodiyoti tanlov qoidasiga asoslanar ekan, u muqarrar ravishda daromadlarning farqlanishiga olib keladi. Buning subyektiv tomoni shundaki, ishning uddasidan chiqqanlar boy, uncha uddasidan chiqmaganlar o'rta hol, o'nglay olmaganlar kambag'al o'zini umuman boʻladi. tabaqalanishning insonga bogʻliq tomoni. Ammo buning obyektiv tomoni ham borki, bu iqtisodiyotning shart-sharoiti yoki umumiy vaziyatga bogʻliq. Vaziyat qulay kelganida boy boʻlish, tanglik hosil boʻlganida kambagʻalga aylanish kishilarning xohish-irodasiga bogʻliq emas.

Tabaqalanish tengsizlikni yuzaga chiqaradi, biroq oldin qayd etganimizdek bu adolatli tengsizlikdir, chunki bozor qoidalariga binoan muqarrar yuzaga keladi. Uning salbiy tomoni ijtimoiy toʻqnashuv ehtimoli boʻlsa, ijobiyligi boylar iste'molining oshkora samarasidir. Ya'ni boylar iste'moli namuna sifatida boshqalarni faol boʻlishga undaydi, natijada iqtisodiy oʻsish yuz berib, iste'moldagi tafovutlar qisqarishga moyil boʻladi. Iste'moldagi farqlar saqlansa-da, ular miqdorda emas, balki sifatda qoladi. Boylar boshqalardan oʻz iste'moliga qaraganda boʻsh vaqtini koʻproq dam olib oʻtkazishi va oʻz qoʻlida toʻplangan aktivlarining miqdori, aniqrogʻi, bankdagi puli, aksiyasi va obligatsiyasi, biznesda ishlayotgan kapitalning miqdori bilan farqlanadi.

Bozor sharoitida daromadlarning yuqori chegarasi boʻlmaydi: ishning koʻzini bilgan shaxs qancha yaxshi ishlasa, shuncha koʻp topishi, topganining asosiy qismini jamgʻarib borishi mumkin. Qonuniy boy boʻlishning taqiqlanmasligi unga intilishni hosil qiladi. «Intilganga tole yor» deganlaridek, harakat qilish natijasida kambagʻal oʻrta holga, oʻrta hol esa boyga aylanishi mumkin. Ish yurishmaganida buning aksi ham boʻlishi mumkin. Iqtisod yuksalgan sari kambagʻallar kamayib, oʻrta hollar asosiy toifaga aylanadi, boylar soni ham oʻsadi. Ammo boylarning ichki tabaqalanishi ham yuz beradi. Ular orasida oʻta boylar ajralib

chiqadi. Ular ham, sekin boʻlsa-da, koʻpayib boradi. Ilgarilari oʻta boylar Gʻarb mamlakatlariga xos boʻlgan, endi esa ular Sharqda va hatto oʻtish davridagi mamlakatlarda ham shakllangan. Oʻtish davridagi oʻta boylar bozor munosabatlarining rivojlanishi mahsuli emas, balki boylikni taqsimlash va qayta taqsimlash jarayonida uni qonuniy va noqonuniy yoʻl bilan oʻzlashtirib olgan kishilardir. Quyida e'tiboringizga dunyo va Rossiya Federatsiyasi milliarderlari, asosiy faoliyat turlarini keltiramiz.

2-jadval **Dunyo milliarderlari**¹

№	Ism-familiyalari	2009-yil mart oyi holatiga koʻra (mlrd. \$)	Asosiy faoliyat turi
1.	Bill Geyts (AQSh)	40,0	yuksak texnologiya
2.	Uorren Baffet (AQSh)	37	investitsiya
3.	Karlos Slim Xelu (Meksika)	36	turli xil savdo,
			koʻchmas mulk
4.	Lorens Ellison (AQSh)	22,5	yuksak texnologiya
5.	Ingvar Komprad (AQSh)	22,0	turli savdo
6.	Karl Albrext (Germaniya)	21,5	neftni qayta ishlash
7.	Mukesh Ambani (Hindiston)	19,5	metallurgiya
8.	Lakshmi Mittal (Hindiston)	19,3	turli savdo
9.	Ter Albrext (Germaniya)	18,8	to'qimachilik
			sanoati
10.	Amanseo Ortega (Ispaniya)	18,3	turli savdo

3-jadval **Rossiya milliarderlari**²

T/p	Ism-familiyalari	2009-yil mart oyi holatiga koʻra (mlrd. \$)	Asosiy faoliyat turi
1.	Mixail Proxorov	9,5	investitsiya
2.	Roman Abramovich	8,5	neft va gaz, metallurgiya

¹ Qarang: Аргументы и факты. – 2009. – №13.

² O'sha manba.

3.	Vagit Alekperov	7,8	neft va gaz
			neft va gaz,
4.	Mixail Fridman	6,3	investitsiya,
			telekommunikatsiya
5.	Vladimir Lisin	5,2	metallurgiya
6.	Aleksey Abramov	4,4	metallurgiya
7.	Aleksey Mordashev	4,3	metallurgiya
			neft va gaz,
8.	German Xan	4,0	investitsiya,
			telekommunikatsiya
9.	Oleg Deripaska	3,5	metallurgiya
10.	Iskander Maxmudov	3,3	metallurgiya

Oʻzbekistonda davlat mulkini xususiylashtirish pulli boʻlib, qattiq nazorat ostiga olinganligi va katta daromad beruvchi tabiiy resurslarning davlat qoʻlida saqlanishi ularni xususiy tarzda va suvtekin oʻzlashtirish yoʻlini toʻsib qoʻydi. Natijada oʻta boylar — oligarxlar guruhining shakllanishiga yoʻl berilmadi. Bu islohotlar oʻtkazilishida ijtimoiy adolat prinsiplariga izchil rioya etilganining natijasidir.

Aholining tabaqalashuvi uning boy va kambagʻallarga ajralishi bilan cheklanmaydi, balki o'rta hol sinfni ham yuzaga keltiradi. Bu sinf iqtisodiy transformatsiya sharoitida shakllanadi. Bu transformatsiya fuqarolik jamiyatiga olib kelganida oʻrta sinfning shakllanishini shu jamiyatning talabi deb talqin etish mumkin. Oʻrta sinf iqtisodi rivojlangan jamiyatning tayanchi iitimoiy bo'lsa-da, uning shakllanishi transformatsiya bosqichida boshlanadi. Bu sinf o'z mavqei jihatidan boylar va kambagʻallar oraligʻida turadi. Oʻrta sinf aholining oʻziga toʻq, kelajakka ishonchi bo'lgan sinfi hisoblanadi. O'rta sinfning soni va jamiyatdagi mavqei iqtisodiyotning oʻsishiga bogʻliq, shu sababli Oʻzbekistonda ham bu sinf safi kengayishiga moyillik katta. Bu jarayonga iqtisodiy o'sishdan tashqari biznesning rivoji, mulkni xususiylashtirish ham hissa qoʻshadi. Oʻzbekiston qishloqlarida boshlangan oilaviy ommaviy fermerlashtirish, ya'ni shirkatlar o'rniga fermer xo'jaliklarining tashkil etilishi oʻrta sinf safining kengayishini ta'minlaydi. Davlatimiz rahbari Islom Karimov O'zbekiston Respublikasi Konstitutsiyasining 18 bagʻishlangan tantanali marosimda «Mamlakatimizni villigiga modernizatsiya qilish yoʻlini izchil davom ettirish – taraqqiyotimizning muhim omilidir» mavzuidagi ma'ruzasida 2011-yilni «Kichik biznes va xususiy tadbirkorlik yili» deb e'lon qildi. Bu yurtimizning qiyofasi va hayotimizning ma'no-mazmunini butunlay o'zgartirayotgan oqilona siyosatni davom ettirish va mamlakatimiz koʻzlagan maqsadlarga yetish, taraqqiy topgan demokratik davlatlar qatoridan joy olishda manzilimiz masofasini qisqartirish yoʻlidagi muhim strategik qadamdir. Prezident Islom Karimov tadbirkorlikning qirralari haqida: «Men bu oʻrinda sohibqiron Amir Temur bobomizning barchamizga yaxshi ma'lum boʻlgan «Azmi qat'iy, tadbirkor, hushyor, mard va shijoatli bir kishi mingta tadbirsiz va loqayd kishidan afzaldir» deb aytgan chuqur ma'noli so'zlarini yana bir bor eslatmoqchiman»¹, – deb ta'kidladi. Davlatimiz mustaqillikka erishgan dastlabki yillardanoq mamlakatimiz kelajagi, davlatimiz va jamiyatimizning siyosiy-ijtimoiy qurilishini belgilashda birinchi navbatda Konstitutsiyamizni ishlab chiqish va tasdiqlashda mulk va mulkiy munosabatlar haqidagi prinsipial masala davlatimiz rahbari Islom Karimovning diqqat markazida boʻlganini 1992yilda chop etilgan «O'zbekistonning o'z istiqlol va taraqqiyot yo'li» asaridagi: «Mulkchilik masalasini hal qilish bozorni vujudga keltirishga qaratilgan butun tadbirlar tizimining tamal toshi bo'lib xizmat qiladi» yoki 1993-yilda nashr etilgan «Oʻzbekiston bozor munosabatlariga oʻtishning oʻziga xos yoʻli» asaridagi: «Iqtisodiy islohotlarning bugungi bosqichida eng muhim dolzarb vazifa – mulkiy munosabatlarni tubdan oʻzgartirmoqdir. Uning tub mohiyati - mulkni haqiqiy egalari qoʻliga berishni tezlashtirish, tadbirkorlik uchun keng yo'l ochib berish va mulkdorda yangi mulk egasi hissiyotini tarbiyalashdan iborat», – degan ilmiy qarashlaridan anglash mumkin. Shuningdek, Prezident Islom Karimovning dunyoning oʻnlab mamlakatlari tillarida chop etilgan «O'zbekiston XXI asr bo'sag'asida: xavfsizlikka tahdid, barqarorlik shartlari va taraqqiyot kafolatlari» asaridagi: «Mamlakatda chinakam oʻrta mulkdorlar sinfi shakllangan taqdirdagina islohotlar sezilarli samara beradi, mulkchilik masalalari hal bo'ladi» yoki: «Chinakam mulkdorlar sinfi ham mulkni davlat tasarrufidan chiqarish va xususiylashtirishni izchil amalga oshirish hisobiga, ham kichik va xususiy tadbirkorlikni rivojlantirishni rag'batlantirish hisobiga ko'p ukladli iqtisodiyotni vujudga keltirish yoʻli bilan shakllantiriladi. Strategik jihatdan olganda, biz koʻp ukladli iqtisodiyotni vujudga keltirish vazifasini qoʻymoqdamiz. Bunda ustuvorlik xususiy mulkka, kichik biznesga beriladi» yoxud: «Kichik

¹ Мамлакатимизни модернизация қилиш йўлини изчил давом эттириш — тарақкиётимизнинг мухим омилидир: Президент Ислом Каримовнинг Ўзбекистон Республикаси Конституциясининг 18 йиллигига бағишланган тантанали маросимдаги нутқи // Халқ сўзи. — 2010. — 8 дек.

biznes – jamiyatda ham iqtisodiy, ham siyosiy vaziyatni moʻtadillashtirishga yordam beradigan oʻrta tadbirkorlar sinfining paydo boʻlishi demakdir. Bu – respublika bozorini zarur iste'mol tovarlari va xizmatlar bilan boyitishdir. Bu yangi ish oʻrinlaridir» kabi istiqbolni belgilovchi ilmiy qoida va xulosalarga asoslangan bashorati boʻlib, bugungi jahon moliyaviy-iqtisodiy inqirozi sharoitida O'zbekistonda uning yengil kechishining tamal toshi bundan 21 yil oldin qoʻyilganligini anglamaslik, sezmaslik mumkin emas. Muhimi, mazkur asarda Oʻzbekiston davlatchiligining iqtisodiy negizini daxlsiz, himoyasidagi, teng huquqli mulk shakllari tashkil etishi, bunda ustuvorlik xususiy mulkka berilishi hamda Oʻzbekiston davlatchiligining siyosiy negizini oʻrtacha mulkdorlar sinfi tashkil etishi haqidagi ilmiy qoidalar mamlakatimizni modernizatsiya qilish yoʻlini izchil davom ettirishning nazariy asoslarini tashkil etadi. «2011-yil – Kichik biznes va xususiy tadbirkorlik yili», «2012-yil – Mustahkam oila yili», «2013-yil – Obod turmush yili» deb e'lon qilinishi mamlakatimizda demokratik islohotlarni chuqurlashtirish va fuqarolik jamiyatini rivojlantirishda muhim qadamlardir. Kichik biznes va xususiy tadbirkorlikni Vatanimiz taraqqiyotini va xalq farovonligini yanada yuksaltirishda belgilovchi yetakchi kuch ekanligini inobatga olib, davlatimiz rahbari uni rivojlantirishni siyosat darajasiga koʻtarganligi oʻta muhim hodisadir. Buning boisi shuki, ijtimoiy yo'naltirilgan zamonaviy bozor iqtisodiyotida kichik biznes nihoyatda muhim oʻrin egallaydi. Eng avvalo, kichik biznes bozor konyunkturasi o'zgarishlariga tez moslashishga, iste'molchilarning talabehtiyojlari oʻzgarishiga qarab ish tutishga qodirdir. Kichik biznes raqobatchilik muhitini shakllantiradi, busiz bozor iqtisodiyotini tasavvur qilib bo'lmaydi. Ikkinchidan, kichik biznes yangi ish o'rinlari jadallik bilan barpo etilishini, aholining bandligi o'sishini va daromadlari oshib borishini ta'minlaydi. Uchinchidan, kichik biznes ichki bozorni tovarlar va xizmatlar bilan boyitishning muhim manbai hisoblanadi hamda yalpi talabni o'stiradi.

Barchamizga ayonki, aynan ana shu ijtimoiy qatlam, ya'ni o'rta sinf yurtimizda amalga oshirayotgan islohotlarni yanada chuqurlashtirishdan, mamlakatimizning izchil va barqaror rivojlanishidan eng ko'p manfaatdordir. Shu bois kichik biznes va xususiy tadbirkorlik bugungi kunda jamiyatimizdagi ijtimoiy va siyosiy barqarorlikning kafolati va tayanchiga, yurtimizni taraqqiyot yo'lidan faol harakatlantiradigan kuchga aylanib borayotgani qayd etildi¹.

 $^{^1}$ *Каримов И. А.* Мамлакатимизни модернизация қилиш йўлини изчил давом эттириш — тараққиётимизнинг мухим омилидир // Халқ сўзи. — 2010.-8 дек.

«Kichik biznes va xususiy tadbirkorlik sohasining mamlakatimizni modernizatsiya qilish va yangilashning ishonchli tayanchi boʻlgan mulkdorlar sinfini, ya'ni oʻrta sinfni shakllantirishdagi ulkan ahamiyatini hech narsa bilan qiyoslab boʻlmaydi. Iqtisodiyotning ushbu sohasi yurtimizda qanday katta sur'atlar bilan rivojlanib borayotganini yuqorida qayd etib oʻtdik. Bu oʻrinda 2012-yilda mazkur sohaning yalpi ichki mahsulotdagi ulushi 54 foizga yetdi. Bu iqtisodiy jihatdan mustaqil boʻlgan ijtimoiy subyekt, u yuksak mehnat unumini ta'minlaydi, uning bilim va malakasi yuqori, siyosiy erkinliklarni kafolatlovchi kuch hisoblanadi, asosiy soliq toʻlovchi vazifasini oʻtaydi, uning iste'moli bozor hajmini belgilaydi, jamiyatdagi iqtisodiy oʻsishni va xalq farovonligining yanada yuksak boʻlishini ta'minlaydi.

Tabagalanish jarayonida kambag'allar qatlami hosil bo'lar ekan, uning o'lchami ham bo'lishi kerak. Kambag'allik chegarasini tirikchilik minimumining qiymati belgilaydiki, daromadi shundan kam bo'lganlar kambagʻallarni tashkil etadi. Daromadlar taqsimlanishidagi тафовутлар aniqlanishi koeffitsiyenti yordamida ham mumkin. Jini Jini koeffitsiyentidan ayrim mamlakat doiralarida shaxslar yoki uy xo'jaliklari o'rtasida daromadlarning (yoki ayrim hollarda xarajatlarning) mutlaq teng taqsimlanishidan ularni real taqsimlanishida yuz beradigan farqlanish darajalarini koʻrsatish uchun foydalaniladi. Nolga teng Jinni koeffitsiyenti mutlaq tenglikni, 100 foizga teng bo'lgan koeffitsiyent esa mutlaq tengsizlikni anglatadi. Boshqacha aytganda, Jinni koeffitsiyentining maksimal mazmuni (mohiyati) 100 foiz bo'lib, bu barcha daromadlarning qandaydir birgina shaxs yoki xonadon tomonidan olinishini anglatsa, minimal mazmuni – nol esa mutlaq tenglikni koʻrsatadi. Jinni koeffitsiyenti tengsizlikni aniqlashda eng koʻp tarqalgan oʻlchovdir.

Jahon banki Jinni indeksining turli yillar boʻyicha hisoblangan koʻrsatkichlarini beradi. Ular oʻzgarib turganidan har xil chiqadi. Daromadlarning ozchilik qoʻlida toʻplanishi har xil kechadi, lekin bu koʻrsatkich iqtisodi uncha rivojlanmagan mamlakatlarda yuqori boʻladi. Boylar va kambagʻallarni daromadlardagi hissasi ham mamlakatlar boʻyicha farqlanadi.

Tabaqalanishni tahlil etganda, iqtisodiyotning tuzilishini ham nazarda tutish kerak. Shu sababli daromadlardagi farqlarni taqqoslash bilan kifoyalanib boʻlmaydi. Bunda iste'moldagi farqlarni ham nazarda tutish kerak boʻladi. Bu, ayniqsa, oʻtish davridagi mamlakatlar uchun muhim. Oʻzbekistonda, masalan, daromad haqidagi rasmiy ma'lumotlar iste'mol hajmini aniq belgilamaydi, chunki amalda hisobga kirmagan, yashirin

yoʻl bilan topilgan daromadlar ham borki, ular iste'molda ishtirok etadi. Buning ustiga natural iste'mol ham boʻlib, u pul daromadlarining iste'mol buyumlariga aylanishini bildirmaydi. Bu daromad oldi-sotdini chetlagan holda xonadon iste'moliga toʻgʻridan-toʻgʻri kelib tushadi. Soʻnggi ma'lumotlarga qaraganda, Oʻzbekistonda shaharliklar jami iste'mol etiladigan oziq-ovqatning 7,2 foizni xarid etmaydilar. Qishloqda esa xarid etilmay turib, oʻz xoʻjaligidan olib iste'mol qilingan oziq-ovqat 26,0 foizni tashkil etgan.

Aholi kambagʻal qatlamlarining muammolari keskin ijtimoiy muammolar boʻlib, u yoki bu darajada barcha mamlakatlarda mavjud. Kambagʻallikning umumsayyoraviy, umumbashariy xarakterga ega ekanligi uning sabablari umumiyligidan dalolat beradi.

dunyo xilma-xil mamlakatlar majmuidir. Dunyodagi Hozirgi mamlakatlar iqtisodi rivojlangan, darajasi oʻrtacha va kam rivojlangan mamlakatlardan iborat. Ulardan har birining oʻzi turli guruhlarga mansubdir. tafovutlar Rivoilangan mamlakatlarda kuchli mamlakatlarning iqtisodiy daraja boʻyicha farqi ikki baravarga yaqin. Iqtisodi rivoj topgan mamlakatlarda moddiy to'kinchilik bo'lib, mahsulot va xizmatlar farovon yashash uchun yetarli boʻladi. Gap shundaki, ularni qayta taqsimlash jarayonida boylar daromadining bir qismining soliq vositasida olinib, kambagʻallarga berilishi mumkin. Shu sababli kambagʻallik darajasi yuqori boʻlmaydi. Ayni chogʻda boylik katta bo'lganidan uning bir qismi egasidan olinib, kambag'allarga berilishi boylardagi iqtisodiy faollik ragʻbatlarini soʻndirmaydi, iqtisodiy oʻsish uchun zarur investitsiyalarni ham cheklamaydi.

Rivojlangan mamlakatlarda insoniylik prinsiplari ham kuchli boʻladi. Jahon tajribasi shuni koʻrsatadiki, nochorlarga muruvvat qilish, muhtojlarga yordam sifatida qilinadigan xayr-ehson uchun sarflanadigan pulning miqdori boylikka toʻgʻri mutanosiblikda boʻladi. Shu bois, rivojlangan mamlakatlarda kam ta'minlanganlar uchun yoʻnaltiriladigan davlat mablagʻidan tashqaridagi xayr-ehson fondlarining miqdori oʻsib boradi. Boy mamlakatlarda daromaddagi ijtimoiy tafovutlarning kichik boʻlishi, kambagʻallikning cheklanganligini keltirib chiqaradi.

Kambagʻallik darajasini faqat ishlab chiqarish darajasi bilan emas, balki aholining oʻsishi bilan ham izohlash zarur. Iqtisodiyotda shunday qonuniyat mavjudki, aholi jon boshiga olinadigan daromadlarning oʻsishi ishlab chiqarish hajmiga va aholining soniga bogʻliq boʻladi. Jon boshiga toʻgʻri keladigan daromadlar koʻpayishi uchun ishlab chiqarishning oʻsishi aholi soni oʻsishidan, koʻpayishidan tez borishi talab qilinadi.

Rivojlangan mamlakatlarda aholining oʻsish sur'atlari pasayishga moyil boʻlgani holda ishlab chiqarish tez oʻsadi, natijada jon boshiga hisoblangan daromad ortib boradi. Kam rivojlangan mamlakatlarda boshqacha hodisa yuz beradi. Bu yerda ishlab chiqarishning umumiy darajasi past boʻladi.

Ammo XXI asrga kelib kambagʻallikning yashovchan ekanligi namoyon boʻlmoqda. Hatto jadal iqtisodiy oʻsish ham kambagʻallikning darhol tugatilishini kafolatlay olmayapti. Kambagʻallik dunyoda global hodisaga aylanib, narkotik moddalar va yuqumli kasalliklar kabi jahon jamoatchiligini tashvishga solmoqda. Qit'alar, davlatlar oʻrtasida va davlatlar ichida, odamlarning yashash sharoitlarida katta tafovut mavjud boʻlsa, shubhasizki, butun dunyo mamlakatlarida barqaror rivojlanish boʻlmaydi.

Jahon moliyaviy-iqtisodiy inqirozi sharoitida kambagʻallik va tengsizlik koʻlamining ortishi insoniyatga tahdid solayotganligini anglagan dunyo jamoatchiligi uning oldini olish usullarini izlashmoqda. 2000-yilda dunyodagi 160 ta mamlakat yetakchilari BMTning Ming yillik deklaratsiyasini qabul qilib, insoniyat taraqqiyotining global maqsadlarini ma'qulladilar va bu bilan jahon jamoatchiligi 2015-yilga kelib kambagʻallikni ikki baravar qisqartirish maqsadini yana bir bor tasdiqladi.

Mustaqil O'zbekiston mazkur deklaratsiyani imzolagan davlat sifatida faol ijtimoiy siyosat yoʻlini davom ettirmoqda. Oʻzbekistonning o'z yangilanish va taraqqiyot yo'liga asos bo'lgan eng muhim qoidalardan biri bozor iqtisodiyotiga oʻtishning barcha bosqichlarida oldindan kuchli ijtimoiy siyosatni o'tkazishdir. Qolgan barcha qoidalar ijtimoiy vazifalarni hal etishga, aholini ijtimoiy himoyalash sohasida qat'iy kafolatni vujudga keltirishga bo'ysundirilgan. O'zbekiston islohotlarni bosqichma-bosqich amalga oshira borib, mustaqillikning dastlabki yillaridagi ogʻir larzalardan soʻng daromad va iste'mol darajasini qayta tiklashga hamda talabning iqtisodiy oʻsish omiliga aylanishiga erishdi. O'zbekiston BMTning Ming yillik rivojlanish maqsadlari dasturi parametrlarini bosqichma-bosqich amalga oshirmoqda. Bugungi kunda davlat budjetining qariyb 60 foizi ijtimoiy sohaga yo'naltirilmoqda. Ayni paytda aholini toza ichimlik suvi bilan ta'minlash darajasi 82,5, tabiiy gaz bilan ta'minlash 83,5 foizga yetdi, sogʻliqni saqlash tizimini tubdan isloh qilish va rivojlantirish, o'ta og'ir yuqumli kasalliklarga barham berish hamda ularni kamaytirish borasida qat'iy choralar ko'rildi. Bularning xalqaro hamjamiyat qabul qilgan dastur barchasi parametrlarini

bosqichma-bosqich qoʻlga kiritish imkonini berdi. Internet ma'lumotlariga koʻra ming yillik rivojlanish maqsadlari ijrosi dunyo xaritasida aks ettirilgan. Dastur ijrosi qariyb roʻyobga chiqarilgan sanoqli davlatlar qatorida Oʻzbekistonning ham borligini quvonch bilan ta'kidlash lozim. Natijada ijtimoiy-gumanitar sohada erishilgan marralar — aholini ijtimoiy himoya qilish uchun yoʻnaltirilgan davlat xarajatlarining 5 barobar koʻpaygani, turmush darajasining sezilarli ravishda yaxshilangani va buning natijasida onalar oʻlimi ikki barobardan koʻproq, bolalar oʻlimi uch barobar kamaygani, odamlarning oʻrtacha umr koʻrishi 67 yoshdan 73 yoshga, jumladan, ayollarning oʻrtacha umr koʻrishi 75 yoshga yetdi¹.

Islohotlarning hozirgi bosqichida davlat iqtisodiy oʻsish siyosati samarasini barcha insonlar uchun daromadlarni oshirishning keng imkoniyatlarini yaratishga qaratmoqda. 2004-yilda xalqaro moliya institutlari bilan hamkorlikda ishlab chiqilgan 2004–2006 va 2010-yillarga moʻljallangan Oʻzbekiston Respublikasining Yashash darajasini oshirish strategiyasida jamiyatning turli qatlamlari daromadlaridagi tengsizlikning dolzarb muammolari ifodalangan. Bu tajribadan bosh xulosa – turmush darajasini oshirish vazifasiga atroflicha (kompleks) yondashuvning muhimligidir.

Barcha rivojlanayotgan mamlakatlar va iqtisodi oʻtish davriga xos mamlakatlarda iqtisodiy oʻsish sifatini oshirish vazifasi ustuvor deb tan olinadi. Kam ta'minlanganlarga ijtimoiy nafaqa, subvensiyalar, mintaqalar hamda tarmoqlar boʻyicha dotatsiya va soliq imtiyozlari, shahar va qishloq oʻrtasida, bandlik sohasida va ijtimoiy guruhlar oʻrtasida daromadlarni tenglashtirish uchun yetarli chora-tadbirlar majmui boʻla olmaydi. Samarali dastur chuqur va muvofiqlashtiruvchi yondashuvni taqozo etadiki, unda iqtisodiy oʻsish bandlik va turmushning barcha sohalarini qamrab olishi, kam ta'minlanganlar, ayollar va yoshlarning daromad olishi va turush darajasini oshirish imkonini yaratishi kerak.

Kambagʻallikka qarshi kurash va turmush darajasini oshirish gʻoyasini yangicha tushunish boshlanganini Birlashgan Millatlar Tashkilotining 2005-yilni «Mikromoliyalashtirish yili» deb e'lon qilganligi ham dalolat beradi.

 $^{^1}$ *Каримов И. А.* Мамлакатимизда демократик ислохотларни янада чукурлаштириш ва фукаролик жамиятини ривожлантириш концепцияси. — Т.: «Ўзбекистон», 2010. — Б. 5.

BMTning kambagʻallikni qisqartirish yoʻllari haqidagi bahslarida rivojlanayotgan mamlakatlar hukumatlariga mamlakatlarining eng zarur ehtiyojlaridan kelib chiquvchi milliy siyosatini ishlab chiqishga keng imkoniyatlar yaratishga chaqirdi. Kambagʻallik mamlakatlarning milliy xavfsizligiga tahdid solayotganligini e'tiborga olib, xalqaro tashkilotlar kambagʻallikni qisqartirishning rivojlanayotgan mamlakatlar uchun koʻproq ijtimoiy samara beradigan, milliy xususiyatga ega boʻlgan ijtimoiy-iqtisodiy dasturlarini ishlab chiqish zarurligini yanada koʻproq qayd etmoqdalar.

Kambagʻallikni qisqartirish XX asrning 90-yillari oʻrtalaridan boshlab rivojlanayotgan mamlakatlarga xalqaro yordam koʻrsatish dasturining bosh maqsadiga aylandi. Bunga qator muhim hodisalar sabab boʻldi. Jumladan, 1995-yilda Ijtimoiy taraqqiyot boʻyicha xalqaro forum oʻtkazilib, unda 186 ta davlat vakillari kambagʻallikni qisqartirish yuzasidan hamkorlik qilishga qaror qildilar. Shundan soʻng 1997–2006-yillar «BMTning kambagʻallikni yoʻq qilishning birinchi oʻn yilligi» deb e'lon qilindi. 1998-yilda esa rivojlanishning xalqaro maqsadlari aniqlanib, 2015-yilga kelib kambagʻallikni ikki marotaba qisqartirish asos sifatida belgilandi.

Xalqaro tashkilotlar, imtiyozli kreditlar berish va qarz yukini bekor qilish yoʻlidan bormoqda. Xalqaro hujjatlar Kambagʻallikni qisqartirish strategiyasi (KQS) nomini oldi. XVF va Jahon banki rivojlanayotgan mamlakatlar KQS borasida iqtisodiy, ijtimoiy va siyosiy hayotidagi islohotlarni faol oʻtkazishni tavsiya etadi. KQS rivojlanayotgan mamlakatlarga xalqaro moliya institutlari tomonidan imtiyozli kreditlar berishning asosiy hujjati hisoblanib, aniq mamlakatda yuz berayotgan siyosiy va institutsional oʻzgarishlarni inobatga olgan holda yordamning hajmi va tarkibini aniqlaydi.

Biroq KQSni rivojlanayotgan mamlakatlarda qoʻllash tajribasi shuni koʻrsatmoqdaki, bu kambagʻallikni qisqartirishning ijobiy natijalari haqida yagona xulosa chiqarish imkonini bermaydi. Xalqaro ekspertlar bu borada yangi, oʻta samarali yondashuvlar zarurligi haqida gapirmoqdalar. Jumladan, BMTning Taraqqiyot dasturi rivojlantirish siyosati byurosi iqtisodchisi Terri Makkinli¹ soʻnggi yillarda KQSni tayyorlash uchun yetarli shart-sharoitlar shakllanganini va shu bilan birga rivojlanayotgan mamlakatlarda neoliberalizmning ortodoksal tavsiyalari (masalan, qattiq fiskal va monetar siyosat oʻtkazish keng koʻlamdagi

 $^{^{1}}$ Экологическое обозрение $^{-}$ 2004. $^{-}$ № 12.

xususiylashtirish va liberallashtirish) qoʻllanilayotganligi qator salbiy oqibatlarga olib kelganini koʻrsatadi.

Shuningdek, XVF va Jahon banki ekspertlari ham qarama-qarshi fikrlarini bildirmoqdalar¹. Bir tomondan, KQS gʻoyasini keng qoʻllab-quvvatlashni taklif qilmoqdalar. Ikkinchi tomondan, «donor mamlakatlar KQS va uni muvaffaqiyatli amalga oshirish kabi yondashuvlarini yaxshilashga oʻtkir ehtiyoj mavjudligini» tan oladilar. Jumladan, donorlarning milliy yerda faqat moliyaviy emas, balki texnikaviy yordamni kuchaytirish zarurligi ta'kidlamoqdalar.

Ammo asosiy sabab sifatida rivojlanayotgan mamlakatlarning institutsional zaifligidan kelib chiqqan holda, XVF va Jahon banki quyidagilarni koʻrsatadi:

- milliy hukumatlarning bayon qilingan maqsadlarga yetarli ahamiyat bermaganligi;
 - davlat xarajatlarini boshqaruv zaif ekanligi;
- KQS mahalliy institutlarning ma'muriy qobiliyati bilan bog'lashning murakkabligi;
- milliy hukumatlar tomonidan maqsad va vazifalar ustuvorligining aniqlanmaganligi;
- maqsadlar va real imkoniyatlar oʻrtasidagi muvofiqlik (balans)ni topa olmaslik.

Ayni paytda kambagʻallikni qisqartirish strategiyasi (KQS) 5 ta prinsipga asoslanishi talab qilinadi:

birinchi prinsip – strategiya milliy xarakterga ega boʻlishi zarur va barcha manfaatdor shaxslar ishtirokida ifodalanishi va tatbiq etilishi hamda soʻnggi natijalar monitoringini ishlab chiqish zarur boʻladi;

ikkinchi prinsip – strategiya Anin natijalariga asoslanishi va kambagʻallarga naf keltirishi kerak. Jahon tajribasiga koʻra, KQSni qoʻllash ayrim mamlakatlarda kambagʻallik holatini biroz yaxshilashga olib keldi;

uchinchi prinsip – KQS kompleksliligi. KQS kambagʻallikning kelib chiqishi sabablarini toʻgʻri aniqlash, uni tugatish choralarini tan olishi zarur. Shuningdek, ushbu hujjat qanday qilib makroiqtisodiy, tuzilmaviy va ijtimoiy siyosatni oʻzgartirish kerakki, bu kambagʻallikni qisqartirsin, degan savolga javob bersin;

¹ «Poverty Reduction Strategy Papers-Progress in Implementation, by staffs of IMF and World Bank, September 12, 2003.

toʻrtinchi prinsip – koʻrilayotgan tadbirlar, koʻp tomonlama, ya'ni davlat va nodavlat yoʻli bilan koʻrilayotgan choralarni muvofiqlashtirish zarur. Donorlar KQS ishlab chiqish va tatbiq etishda rivojlanayotgan davlatlarga makroiqtisodiy siyosat korrupsiyaga qarshi kurash va fuqarolik jamiyati qurish masalasi yuzasidan maslahatlar berish yoʻli bilan ham qatnashishi kerak boʻladi;

beshinchi prinsip – KQS uzoq muddatli boʻlganidan, unga kiradigan rejalar istiqbolga moʻljallab ishlab chiqilgan boʻlishi kerak.

Soʻnggi yillardagi tadqiqotlarga koʻra, KQS sohasidagi turli mamlakatlar siyosati doirasida sezilarli tafovutlar mavjudligini aniqlangan. Jumladan, BMT Taraqqiyot dasturining rivojlanish Konsepsiyasida: «Kambagʻallikni qisqartirish strategiyasi ichki oʻsish «import qilingandan koʻra afzalroq»¹, – deyilgan. KQS esa ichki milliy ehtiyojlardan emas, xalqaro kreditorlar manfaati asosida shakllanishi ta'kidlangan.

Shuning uchun ham Konsepsiyada milliy, jumladan iqtisodiy xavfsizlikni samarali ta'minlash uchun kambag'allikni qisqartirish strategiyasining milliy xarakterini kuchaytirish zarurligi uqtirildi.

Konsepsiyaga muvofiq, donor mamlakatlarning rivojlanayotgan mamlakatlarga qoʻyilayotgan shartlarini yengillashtirish ma'qul, deb topilgan. Xalqaro tashkilotlar KQSda milliy manfaatlarni himoya qilishga amaliy yordam berishiga da'vat etadilar.

Kambagʻallikni qisqartirish strategiyasida milliy xarakter hisobga olinar ekan, mutaxassislar fikriga koʻra koʻplab rivojlanayotgan mamlakatlarda amal qilinayotgan soliq tizimini adolatli va samarali deb boʻlmaydi. Soliq yuki daromadi past xonadon xoʻjaliklari sohiblariga tushishi, boylar esa qonunchilikdagi kamchiliklardan foydalanishiga yoʻl beriladi.

Jahon xoʻjaligining soʻnggi oʻn yilliklari rivojlanish jarayoni dunyoda kambagʻallikni qisqartirishga turtki boʻldi. Jahon bankining «2004-yilda jahon taraqqiyoti koʻrsatkichlari» statistik ma'ruzasiga koʻra, yer shari aholisining oʻta kambagʻal yashayotganlari hissasi 1981-yildan 2001-yilga qadar 40 foizdan 21 foizga qisqargan. Shuningdek, ma'ruzada rivojlanayotgan mamlakatlarda aholi jon boshiga YAIM soʻnggi 20 yil ichida 30 foizga oshganligi ma'lum qilingan. Ma'ruzada kambagʻallik yuqori sur'atlarda 1980-yillarda jadal qisqargan, 1990-yillarda esa

¹ UNDP Devolopment Viewpoint «Poverty Rediction Strategies: Home Drowth Rather Than Imported», Draft Development Viewpoint, March, Bureau for Development Policy, UNDP, New York.

² World Development Indicutors 2004.

aksincha, buning sur'ati pasaygan. O'ta kambag'allar bor-yo'g'i 120 mln. kishiga qisqargan xolos. Kambag'allikning qisqarishi dunyo mamlakatlarida notekis xarakter kasb etganligi, kuzatilgan kambag'allikning qisqarishi Xitoy va Hindistondagi iqtisodiy o'sish sur'atlarining tezligi hisobiga yuz berganligi ma'ruzada qayd etilgan.

BMTning «Tadbirkorlikni rivojlantirishga yordam. Kambagʻallikka ishlovchi biznes» (2004-yil) nomli ma'ruzasida koʻrsatilishicha, yirik korxonalar — TMK va davlat monopolistlar yetarli darajadagi ish joylari yaratishi vazifasini uddalay olmayotganligi koʻrsatilgan. Ba'zi bir huquqni himoya etuvchi va tabiatni muhofaza qiluvchi tashkilotlar YUNKTADning San-Paulidagi sessiyasida korporatsiyalar dunyo jamoatchiligi oldida uchinchi dunyo mamlakatlaridagi faoliyatlari uchun javobgar ekanligini bayon etishi, bejiz emas.

Ushbu ma'ruzada, shuningdek kambagʻallikni qisqartirish borasida samarali iqtisodiy siyosat yuritgan davlatlar sifatida Xitoy, Hindiston, Uganda ta'kidlandi. 1980–2005-yillarda samarali iqtisodiy oʻsishni ta'minlagani uchun 400 mln. xitoyliklar kambagʻallik toifasidan oʻrta toifaga chiqqan. Kambagʻallik hamma yerda bor, lekin bu mamlakatlarning iqtisodiy salohiyatiga qarab farqlanadi. Rivojlangan mamlakatlarda kambagʻallik nisbiy mazmunga ega. Bu yerda umumiy aholi iste'moli gʻoyat yuqori boʻlgani holda, kambagʻallar iste'moli past boʻladi. Ular odatda sifatli tovarlarni kamroq iste'mol qiladilar, xizmatlardan kamroq foydalanadilar, biroq ular uchun ovqatlanish va kiyinish muammosi yoʻq. Rivojlangan mamlakatlarda kambagʻallik keng tarqalgan hodisa boʻlib, bu hatto ocharchilikni ham yuzaga keltirishi mumkin.

Kambagʻallik miqyosi iqtisodiy darajadan tashqari davlat ijtimoiy siyosatining naqadar faol boʻlishiga, ya'ni davlat aholining kam ta'minlangan qatlamini qoʻllab-quvvatlab turishiga ham bogʻliq boʻldi. Shu sababli kambagʻallarning aholi tarkibidagi hissasi har doim ham iqtisodiy holatga qarab shakllanavermaydi. Kuchli ijtimoiy siyosat tufayli Oʻzbekistonda kambagʻallik miqyosi mamlakatning iqtisodiy darajasiga nisbatan kichik boʻlishini ta'minlaydi. Oʻzbekistonda ham kambagʻallikning asosiy sababi iqtisodiyotning yetarlicha rivojlanmaganidir. Prezident Islom Karimovning ta'kidlashicha, «mamlakatdagi kambagʻallik va qoloqlik muammolarini hal etish mumkin va zarur»¹. Buning uchun iqtisodiyotni modernizatsiya qilib, uning oʻsishini jadallashtirish talab

¹ *Каримов И. А.* Бизнинг бош мақсадимиз – жамиятни демократлаштириш ва янгилаш, мамлакатни модернизация ва ислох этишдир. – Т., 2005. – Б. 36.

etiladi. Biroq Oʻzbekistondagi kambagʻallik miqyosi mamlakatning iqtisodiy darajasiga nisbatan yuqori emas, chunki davlatning faol ijtimoiy siyosati vositasida muhtojlarga yordam beriladi, kishilarning kambagʻallikdan chiqib ketishlari uchun sharoit yaratiladi.

Ta'kidlash joizki, bepul ijtimoiy ne'matlar va xizmatlar iste'moli bilan bir vaqtda pulli bilim olish va tibbiy xizmatdan foydalanish parallel ravishda mavjud. Odatda ko'proq yuqori sifatli xizmatlar pulli ravishda ko'rsatiladi. Yaqin kelajakda pulli ma'lumot olish va tibbiy xizmatdan foydalanish ro'yxatining kengayib borishini taxmin qilish mumkin. Buni bozor qoidalari talab qiladi. Hozirning o'zidayoq aholining ma'lum qatlamlari pulli ijtimoiy xizmatlardan foydalanadilar. Shu bois, 1994—2000-yillarda o'qish xizmatlariga haq to'lashning aholi xarajatidagi hissasi oshayotganligi kuzatilmoqda. Pirovardida, ijtimoiy xizmatlarning u yoki bu turini faqat pulli asosda olish holati yuzaga kelishi ehtimoldan holi emas. Shu sababli pulli xizmatlarning eng kam miqdoriga qarab kambag'allikni tahlil etish o'rinli bo'ladi.

Kambagʻallik global muammo boʻlgani bois, uni tugatish umumbashariy tus olgan. Buning uchun eng avval kambagʻallik sabablarini aniqlash, soʻngra uni chegaralash chora-tadbirlarini ishlab chiqish talab qilinadi. Nazariy jihatdan qaralganda kambagʻallik sabablarini har xil deb baholash mumkin. Bulardan biri oʻtkinchi boʻlsa, boshqasi doimiy boʻladi. Xalqaro tashkilotlar tadqiqotlarining koʻrsatishicha, kambagʻal boʻlib qolish xavfining yuzaga chiqish sabablariga qarab, uning oldini olish choralari koʻrilishi mumkin. Kambagʻallik xavfini har xil sabablar yuzaga keltiradi.

Kambagʻallik xavfining sabablari orasida muhimlari mavjud. Oʻzbekistonga misolida xavfni yuzaga keltiruvchi sabablar quyidagicha:

- 1) ishsizlik;
- 2) oʻtmishda kambagʻallarning koʻp boʻlganligi;
- 3) iqtisodning agrar strukturasi;
- 4) ekologik holat;
- 5) aholining tez koʻpayib borishi.

Bu sabablar obyektiv boʻlganligi bois, ularni birdaniga yoʻqotib boʻlmaydi. Biroq, bu muammoning kuchayishiga yoʻl bermaslik uchun eng avval bandlikni oshirish talab qilinadi. Oʻzbekistonda aholi turmush darajasining ortib borishi va kambagʻallik miqyosini qisqartirish eng avvalo umumiqtisodiy oʻsishni taqozo etadi. Ma'lumki, Pareto prinsipiga binoan iqtisodiyot quyi darajadan yuqori darajaga ortgani sari

daromaddagi tafovutlar kamroq seziladi. Demak, kambagʻallik miqyosi va darajasi taraqqiyot darajasiga teskari mutanosiblikda oʻzgarib boradi.

Kambagʻallik dunyo mamlakatlari kabi Oʻzbekiston uchun ham ijtimoiy muammolardan biri sanaladi. Bu muammoni tamomila hal etib boʻlmaydi, chunki aholining tabaqalanishi obyektiv va iqtisodiyot uchun tabiiy bir hol. Lekin kambagʻallik ijtimoiy toʻqnashuvlarni yuzaga keltirishi mumkin, bu esa ijtimoiy beqarorlikni yuzaga keltiradi, jamiyatning iqtisodiy yangilanishiga toʻsqinlik qiladi, unga xavf solishi ehtimoldan xoli emas. Shuni hisobga olib, kambagʻallik muammosini yumshatish zarur boʻladi. Shu oʻrinda Oʻzbekistonda keng qamrovli tadbirlar amalga oshirilib kelinmoqda. Bular bandlik va daromadlar siyosatidir.

Hozirgi bosqichda kambagʻallik miqyosini qisqartirishning asosiy yoʻnalishi bu investitsiya, shu jumladan xorijiy investitsiyani topish va eng arzon ish oʻrinlarini yaratish hisoblanadi. Bu kambagʻal qatlamlarga mehnati hisobidan o'z ahvolini yaxshilash imkonini beradi. Ish kuchi aholining eksportini uyushtirish va o'sish sur'atlari tendensiyasini saqlash, an'anaviy eksportni saqlagan holda ilg'or xorijiy texnologiyalarga tayanib, mahalliy arzon xom ashyolarni qayta ishlashga asoslangan eksportni kengaytirish, eksport qiluvchi subyektlarning jahon bozorining yangi segmentlarida mustahkam oʻrnashuvi, milliy bozor hajmini hisobga olgan holda, kichik biznes jumladan oilaviy tadbirkorlikni rivojlantirish kabilar katta ahamiyat kasb etadi. Oʻtish davr iqtisodida kambagʻallik miqyosining qisqarishi mehnatdagi faollikni oshirish uchun shart-sharoit yaratilishi bilan yuz berishi mumkin. Shuning uchun ishlab topiladigan daromadni va, birinchi navbatda, mehnat daromadini o'stirish uchun imkoniyat yaratilishi juda muhimdir. Bu hol kambagʻallarning oʻrtacha toifaga oʻtishiga imkon beradi.

5. Turmush darajasi va uni belgilovchi omillar

Turmush darajasi aholi iste'molining miqdori va sifati bilan oʻlchanadi. Turmush darajasi – kishilarning hayotiy muhim ehtiyojlarini iqtisodiyot rivojining muayyan holatida naqadar qondirilishidir.

Sobiq Ittifoq davrida Oʻzbekiston xalqining yashash darajasi boshqa ittifoqdosh respublikalarnikidan taxminan ikki barobar past edi. 1990-yilda Oʻzbekiston boʻyicha aholi jon boshiga toʻgʻri kelgan iste'mol fondi oʻrtacha sobiq Ittifoqdagi darajaning 53,4 foizini tashkil etgan. Mana shunday sharoitda respublika oldida turgan asosiy masala bir tizimdan ikkinchi tizimga oʻtishda odamlarning yashash darajasini ogʻirlashtirmaslik edi.

5.1. Aholi jon boshiga toʻgʻri keladigan oʻrtacha iqtisodiy koʻrsatkichlar

Bozor iqtisodiyoti munosabatlariga tadrijiy yoʻl bilan izchil va bosqichma-bosqich oʻtish, mamlakatda siyosiy va makroiqtisodiy barqarorlik, Oʻzbekiston uchun oʻtish davri iqtisodiyoti qiyinchiliklarini boshidan kechirayotgan boshqa barcha sobiq Ittifoq davlatlaridan koʻra ishlab chiqarishning halokatli tarzda orqaga ketishi oqibatlarini tezroq bartaraf etish va 90-yillarning oʻrtalaridayoq iqtisodiy oʻsish hamda aholi turmush darajasini oshirishni qayta tiklash imkonini berdi.

Yirik ishlab chiqaruvchilarning barqaror faoliyat koʻrsatishi uchun qulay iqtisodiy sharoitlarning yaratilishi, hukumat tomonidan kichik biznes va xususiy tadbirkorlikni rivojlantirish uchun ishchanlik muhitini kuchaytirish boʻyicha aniq maqsadga qaratilgan chora-tadbirlarning koʻrilishi iqtisodiyot tarmoqlarining jadal oʻsishiga asos boʻldi. Oʻzbekistonda bosqichma-bosqich va ijtimoiy yoʻnaltirilgan tarzda amalga oshirilayotgan iqtisodiy oʻzgarishlarning samarasi, avvalo, aholi jon boshiga oʻrtacha toʻgʻri keladigan koʻrsatkichlar va xalq turmush darajasining muntazam oshib borayotganida yaqqol namoyon boʻlmoqda.

Aholi jon boshiga oʻrtacha toʻgʻri keladigan YAIM, xarid qobiliyati pariteti (XQP) asosida hisoblaganda, 1990-yilda 1328 dollarni, 2000-yilda 14312 dollarni, 2010-yilda esa 3271 dollarni tashkil etdi. Shunday qilib, Oʻzbekistonda oʻtgan asrning 90 yillaridayoq bu muhim koʻrsatkich boʻyicha islohotlargacha boʻlgan darajadan ham yuqori natijaga erishildi. 2010-yilda esa bu boradagi oʻsish 1990-yilga nisbatan 2,5 barobar oshdi.

4-jadval

Aholi jon boshiga toʻgʻri keladigan asosiy iqtisodiy
koʻrsatkichlar

	1000	1990- 2000-	2010-	1990-yilda (foiz)		
	yil			2000-	2010-	
	yıı	yil	yil	yil	yil	
Aholi jon boshiga toʻgʻri	1328	1431	3271	107,9	2,5	
keladigan YAIM (XQP –					marta	
xarid qobiliyati pariteti						
bo'yicha), AQSh						
dollarida						

Iqtisodiyotda band	3412	39	7940	115,1	2,3
boʻlgan har bir kishiga					marta
toʻgʻri keladigan YAIM					
(XQP bo'yicha), AQSh					
dollarida					
Sanoatda band boʻlgan					
har bir kishiga toʻgʻri					
keladigan sanoat					
mahsuloti ulushi,					
ming soʻmda	22,1	1649,7	22407,8	129,7	2,3
					marta
AQSh dollarida	3159,6	6963,1	14124,1	2,2	4,5
				marta	marta
Aholi jon boshiga toʻgʻri	40,8	127,5	344,1	3,1	8,4
keladigan investitsiya				marta	marta
miqdori, AQSh dollarida					
Aholi jon boshiga toʻgʻri					
keladigan chet el					
investitsiyalari:					
ming so'm	_	7,0	156,6	X	X
AQSh dollarida	_	29,5	100,1	X	X
Aholi jon boshiga toʻgʻri	21,7	132,4	462,1	6,1	21,3
keladigan mahsulot va				marta	marta
xizmatlar eksporti: AQSh					
dollarida					

Oʻzbekiston iqtisodiyotining samarali rivojlanishini yaqqol ifoda etadigan muhim sifat koʻrsatkichi, iqtisodiyotda band boʻlgan har bir kishiga toʻgʻri keladigan yalpi ichki mahsulot hajmida namoyon boʻlmoqda. Agar 1990-yilda iqtisodiyotda band boʻlgan har bir kishiga ishlab chiqarilgan yalpi ichki mahsulotning 3412 AQSh dollari hajmidagi qismi toʻgʻri kelgan boʻlsa, 2010-yilda bu raqam oʻrtacha 7940 AQSh dollari yoki 1990-yilga nisbatan 2,3 barobardan ziyodni tashkil etdi.

Sanoatning negizini tashkil etadigan tarmoqlarni modernizatsiya qilish, texnik va texnologik yangilash hamda ularning raqobatdoshligini tubdan oshirishga qaratilgan ustuvor ahamiyatga molik loyihalarning amalga oshirilishi mahsulot ishlab chiqarish hajmini jadal koʻpaytirish

uchun zarur sharoit yaratdi. Natijada, ushbu tarmoqda band boʻlgan har bir kishiga toʻgʻri keladigan sanoat mahsulotlari 2010-yilda 1990-yilga nisbatan 4,5 barobar oshdi.

Mamlakatimiz va chet el investorlari uchun yaratilgan qulay investitsiya muhiti tufayli aholi jon boshiga toʻgʻri keladigan investitsiya miqdori 1990-yildagi 40,8 dollardan 2010-yilda 344,1 dollarga yetishi ta'minlandi. Agar 1993-yilda jalb etilgan chet el investitsiyalarining aholi jon boshiga toʻgʻri keladigan miqdori 0,05 dollarni tashkil etgan boʻlsa, 2010-yilda bu koʻrsatkich 100,1 dollarga yetdi. Aholi jon boshiga oʻrtacha toʻgʻri keladigan mahsulot va xizmatlar eksporti 2010-yilda 462,1 AQSh dollarini tashkil etdi. Bu 1990-yildagi koʻrsatkichdan 21,3 barobar ortiqdir.

5. 2. Aholi turmush darajasining oʻrtacha jon boshiga toʻgʻri keladigan koʻrsatkichlari

Oʻzbekistonda mehnatga haq toʻlash tizimini takomillashtirish boʻyicha uzoq muddatga moʻljallangan, oʻzaro bogʻlangan choratadbirlarning amalga oshirilishi, yalpi ichki mahsulot, mahsulot va xizmatlar ishlab chiqarishning yuqori sur'atlarda barqaror oʻsib borishi, budjet sohasi xodimlari ish haqi, pensiya, stipendiya va nafaqalar miqdorining muntazam qayta koʻrib chiqilishi, ta'lim, sogʻliqni saqlash va ilm-fan sohalari xizmatchilarining mehnatini ragʻbatlantirish, aholi turmush darajasini tubdan yaxshilashga qaratilgan boshqa chora-tadbirlar, ayniqsa, oxirgi yillarda xalqimizning hayot sifati izchil yuksalib borishini ta'minladi.

Yurtimizda kechayotgan oʻzgarishlar aholi jon boshiga toʻgʻri keladigan real pul mablagʻlari, oʻrtacha nominal va real ish haqi miqdori belgilangan eng kam ish haqi, pensiya, stipendiya va nafaqalar koʻrsatkichlarini yaqqol namoyon etmoqda. Aholi jon boshiga toʻgʻri keladigan pul daromadlari, xarid qobiliyati pariteti asosida hisoblaganda, 2010-yil oxirida 2016,8 dollarni tashkil etdi. Oʻrtacha oylik nominal ish haqi esa, xarid qobiliyati pariteti asosida hisoblaganda, 2010-yilning dekabr oyida 1162,6 dollarga yetdi.

Mamlakatimizda kuchli ijtimoiy siyosatning bosqichma-bosqich amalga oshirilishi, aholi daromadlari va hayot darajasini muntazam oshirib borish, xalqimizni ijtimoiy qoʻllab-quvvatlashni kuchaytirishga qaratilgan aniq maqsadli chora-tadbirlar oʻrtacha oylik ish haqi miqdorining sezilarli ravishda, ya'ni 2010-yilda 1990-yilga nisbatan

AQSh dollari ekvivalentida 2,7 barobar, oʻrtacha pensiya hajmining esa 5,9 barobar oshishini ta'minladi. Pul daromadlarining oshishi va aniq yoʻnaltirilgan ijtimoiy qoʻllab-quvvatlash boʻyicha amalga oshirilayotgan chora-tadbirlar aholi barcha qatlamlari oʻrtacha daromadlarining izchil oʻsib borishida muhim omil boʻldi. Bunda aholining turli guruhlari daromadlari darajasidagi tafovutni (differensiyalashuvni) aks ettiradigan Jinni koeffitsiyenti 1990–2010-yillarda 0,40 dan 0,30 ga pasaydi, bu esa iqtisodiy jihatdan taraqqiy topgan davlatlardagi oʻrtacha koʻrsatkichga mos keladi.

Aholi farovonligi oʻsishining muhim tarkibiy qismi xizmat koʻrsatish va xizmat turlariga nisbatan oshib borayotgan talabning ta'minlanishi bilan bogʻliqdir. Xizmatlar sohasini rivojlantirish dasturi ijrosi davri – 2006–2010-yillarda aholi jon boshiga toʻgʻri keladigan iste'mol hajmi 1,8 barobar koʻpaydi.

2006–2010-yillarda xizmat bozori tarkibini takomillashtirish borasida qabul qilingan izchil chora-tadbirlar aholi jon boshiga oʻrtacha toʻgʻri keladigan bank, moliya va sugʻurta xizmatining yangi istiqbolli turlari jadal rivojlanishini ta'minladi va ular ushbu davr mobaynida 3,0 barobar oʻsdi. Aholi toʻlov qobiliyatining ortishi koʻrsatilayotgan pulli xizmatlar hajmining aholi jon boshiga nisbatan 1992-yil bilan qiyoslaganda 2,2 barobar, maishiy xizmatlar boʻyicha esa 8,3 barobar oʻsishni taqozo etdi. Shu davrda aholi jon boshiga toʻgʻri keladigan chakana tovar aylanmasi, birinchi navbatda, nooziq-ovqat mahsulotlari savdosining oʻsishi hisobidan 4,3 barobar oshdi.

Iste'mol budjeti. Aholi farovonligini oʻzida yaqqol mujassam etadigan eng muhim koʻrsatkich bu — *oila iste'mol budjetining hajmi va tarkibidir*. Ushbu koʻrsatkich oila yalpi daromadlari hajmi va tarkibiga, iste'mol bozorining zarur tovar va xizmatlar bilan toʻldirilishi hamda oila daromadlarining ana shu iste'mol mahsulotlari va xizmatlarni xarid qilish imkoniyatlariga bogʻliq.

Iste'mol budjetida yalpi daromadlar hajmi va tarkibini tahlil qilish muhim o'rin tutadi.

Mamlakatimizda amalga oshirilayotgan iqtisodiy islohotlarning asosiy tamoyillaridan biri sifatida Oʻzbekiston Respublikasi Prezidenti Islom Karimov tomonidan chuqur asoslab berilgan kuchli ijtimoiy siyosat aholi yalpi daromadlarining oʻsishi uchun zarur shart-sharoitlar yaratdi. Mazkur islohotlar natijasida 1990–2010-yillar davomida Oʻzbekiston aholisining yalpi daromadlari aniq hisob-kitoblar boʻyicha 8,6 barobar oshdi.

Yalpi daromadlar tarkibida shu davr mobaynida mulk daromadlari, tadbirkorlik faoliyatini amalga oshirishdan olingan daromadlar koʻrinishidagi yangi daromad turlari paydo boʻldi. Tabiiyki, sobiq mustabid tuzum davridagi markazlashtirilgan rejali iqtisodiyot sharoitida aholining bunday daromad manbalari shakllanishiga mutlaqo yoʻl qoʻyilmas edi.

5-jadval

Mulkdan va tadbirkorlik faoliyatini amalga oshirishdan olingan daromadlarning oʻsishi

	1990-yil	2012-yil
Mulkdan va tadbirkorlik faoliyatidan,		
mahsulot sotish hamda xizmat koʻrsatishdan	10,6	51,0
olingan daromadlarning yalpi daromaddagi		
ulushi		

Yangi turdagi bunday daromadlar hissasiga 2012-yilda yalpi daromadlarning 51,0 foizi toʻgʻri keldi. Yangi turdagi ushbu daromadlarning afzalligi shundaki, aholining tadbirkorlik sohasidagi faollashuvi oila yalpi daromadlarining jadal ravishda oshib borishi uchun ragʻbatlantiruvchi bozor omillarini yaratadi, markazlashtirilgan iqtisodiyot sharoitida keng tarqalgan boqimandalik va daromadlarning bir xilda boʻlishi darajasini pasaytiradi.

Oʻrtacha oylik ish haqi miqdorining bosqichma-bosqich oshirib borilishi yalpi daromadlar tarkibidagi, oʻtish davrining dastlabki yillarida boʻlgani kabi, ulushi yanada pasayib ketishining oldini oldi. Hozirgi paytda aholining yalpi daromadlarida oylik ish haqining ulushi barqaror holat, ya'ni 30–32,1 foiz darajasida saqlab qolinmoqda. Mamlakatimizda aholi daromadlarini oshirishga qaratilgan chora-tadbirlarning qabul qilinishi, hayotimizda tobora hal qiluvchi kuchga aylanib borayotgan oʻrta sinfni shakllantirish imkonini berdi. Ekspert xulosalariga koʻra, oʻrtacha daromadga ega boʻlganlar, agar 1990-yilda aholining 18 foizini tashkil etgan boʻlsa, 2000-yilda uy xoʻjaliklarini tadqiq etish natijalariga koʻra bu koʻrsatkich 24 foizga yetgani ayon boʻldi. 2010-yilda esa 60 foiz uy xoʻjaliklari oʻrtacha darajadan kam boʻlmagan barqaror daromadga ega boʻlgan.

Yalpi iste'mol xarajatlari. Oilaning yalpi daromadlari oshib borishi bilan bir vaqtda yurtimizda iste'mol mahsulotlari ishlab chiqarish hajmini oshirish va aholiga koʻrsatilayotgan xizmat turlarini kengaytirish hisobidan ushbu daromadlardan samarali foydalanish uchun sharoit yaratildi.

6-jadval

1990-2010-yillarda aholi yalpi xarajatlarining tarkibi (foizda)

	1990-	2000-	2009-	2010-
	yil	yil	yil	yil
1. Jami xarajatlar tarkibi	100,0	100,0	100,0	100,0
Ulardan:				
iste'mol xarajatlari	81,1	84,3	78,5	78,4
iste'moldan tashqari xarajatlar	7,1	6,9	6,3	6,2
(soliqlar, chiqimlar (badallar) va				
boshqa toʻlovlar)				
pul omonatlari va jamgʻarmalar	11,8	8,8	15,2	15,4
2. Jami iste'mol xarajatlari	100,0	100,0	100,0	100,0
Shu jumladan:				
oziq-ovqat mahsulotlari uchun	58,3	59,8	51,9	49,8
nooziq-ovqat mahsulotlari uchun	31,5	26,8	31,9	33,7
xizmatlar uchun toʻlovlar	10,2	13,4	16,2	16,5

Agar 1990-yilda aholi daromadlarining bor-yoʻgʻi 46–48 foizi mamlakatimizda ishlab chiqarilgan tovar resurslari bilan ta'minlangan boʻlsa, 2010-yilda bu koʻrsatkich 75 foizdan oshdi. 2010-yilda iste'mol mahsulotlarini ishlab chiqarish hajmi 1990-yilga nisbatan 6,7 barobar, aholiga pullik xizmat koʻrsatish hajmi esa 1,4 barobar oʻsdi.

Yuqorida qayd etilgan omillar aholi yalpi daromadlarining oʻsishi bilan birga, uning pul omonatlari va jamgʻarma mablagʻlari barqaror oʻsib borishini ham ta'minladi. Bu mablagʻlarning xarajatlar tarkibidagi ulushi oʻsib, 1990-yildagi 11,8 foizdan 2010-yilda 15,4 foizga yetdi.

Oilalarning iste'mol xarajatlari makrotarkibi ham optimallashib bormoqda, oziq-ovqat mahsulotlari uchun xarajatlar ulushi barqarorlashib, xizmatlar uchun xarajatlar ulushi ortib bormoqda. Bunday holat iqtisodiy rivojlanib borayotgan davlatlar uchun xosligini qayd etishimiz joiz.

Oziq-ovqat mahsulotlarini iste'mol qilish. Iste'mol xarajatlarining hajmi va tarkibi koʻp jihatdan aholining asosiy oziq-ovqat mahsulotlarini xarid qilish imkoniyatlari va mazkur mahsulotlarning narxi bilan chambarchas bogʻliq. 1990-yilda eng muhim oziq-ovqat mahsulotlarining chakana savdo tarmoqlaridagi taqchilligi aholining bu mahsulotlarni sotib olish imkoniyatlarini cheklab qoʻygan edi. 1989-yilda oʻtkazilgan statistik tadqiqotlar natijalariga koʻra, iste'mol bozorida aholi uchun zarur boʻlgan barcha mahsulotlarning qariyb 95 foizi boʻyicha uzilishlar boʻlib turgan va bu sobiq Ittifoq hududida kundalik asosiy oziq-ovqat mahsulotlarini aholiga kartochkalar orqali sotish tizimini joriy etishga sabab boʻlgan edi.

Oʻzbekistonda aholi soni 1990–2010-yillar mobaynida 38,2 foiz oshganiga qaramasdan, jon boshiga goʻsht va goʻsht mahsulotlari iste'mol qilish 22,6 foizga ortdi, jumladan, sut va sut mahsulotlari 30,3 foiz, tuxum 42,3 foiz, sabzavot 2,2 barobar, kartoshka 1,5 barobar, meva 3,6 barobar va shakar 1,37 barobar oʻsdi. Ayni vaqtda iste'mol tarkibi ancha sifatli oziq-ovqat mahsulotlarini koʻproq iste'mol qilish hisobidan oʻzgarmoqda. Bunda uglevodlarga boy oziq-ovqatlarni (birinchi navbatda, non va non mahsulotlarini) iste'mol qilishning barqarorlashgani muhim ahamiyat kasb etmoqda. Mustaqillik yillarida aholi tomonidan iste'mol qilinayotgan oziq-ovqat mahsulotlarining soni, turi oʻnlab barobar oshdi.

7-jadval
Oʻzbekiston Respublikasida aholi jon boshiga asosiy iste'mol
mahsulotlarining iste'mol qilinishi, kg. hisobida

	1990-	2000-	2009-	2010-	2011	2010-yil,
	yil	yil	yil	yil	yil	1990-
						yilga
						nisbatan
						foizda
Non va non	170	167	165	160	158	94,1
mahsulotlari						
Go'sht va go'sht	31	34	36	38	39	122,6
mahsulotlari						
Sut mahsulotlari	183	162	212	239	242	130,3
Tuxum (dona)	97	47	130	138	240	142,3
Sabzavot,	107	128	237	238	241	222,1
jumladan, poliz						

Kartoshka	29	36	41	45	47	155,2
Oʻsimlik yogʻi va	12	12	13	13	13	103,2
boshqa						
moylar						
Shakar	12	16	16	17	18	137,5
Meva, jumladan,	23	42	74	83	85	360,0
uzum						

Agar 1990-yilda iste'mol uchun zarur bo'lgan g'allaning 82 foizi, go'sht va go'sht mahsulotlarining 50 foizi, sut mahsulotlarining qariyb 60 foizi, kartoshkaning 50 foizi, shakar, quruq sut va bolalar ozuqasi 100 foiz chetdan keltirilgan bo'lsa, hozirgi vaqtda yurtimiz ishlab chiqarishni rivojlantirish hisobidan aholining barcha asosiy iste'mol mahsulotlari bo'yicha (shakardan tashqari) ehtiyojini deyarli to'liq ta'minlamoqda.

Nooziq-ovqat mahsulotlari iste'moli. 1990-yili respublikamizda nooziq-ovqat mahsulotlarining iste'mol bozorida oʻta taqchillik vujudga keldi. Aholining sifatli kiyim-bosh, poyafzal, uzoq muddat foydalanishga moʻljallangan tovarlarni xarid qilish imkoniyatlari cheklangan edi. Odamlarga mebel, gilam, muzlatgich, televizor va yengil avtomobillarni sotish koʻpincha korxonalar orqali oldindan tuzilgan roʻyxatlar asosida amalga oshirilar, bunday tovarlarni xarid qilish uchun esa bir necha yillab navbat кутишга toʻgʻri kelar edi. Barcha turdagi nooziq-ovqat mahsulotlarining qariyb 88 foizi chakana savdo tarmoqlarida katta uzilishlar bilan sotilardi. Koʻplab taqchil mahsulotlar qonunga xilof ravishda ustiga qoʻshimcha narx qoʻyib sotilardi.

Aholi ehtiyojlarini ta'minlash uchun zarur bo'lgan nooziq-ovqat mahsulotlarning katta qismi respublikamizda ishlab chiqarilmas, balki chetdan keltirilar edi. Jumladan, televizorlar, kir yuvish mashinalari, gazmollarning qariyb 40 foizi, barcha turdagi oyoq kiyim va boshqa shunga o'xshash mahsulotlarning 30 foizi chetdan olib kelinardi.

ishlab Mustaqillik yillarida yurtimizda iste'mol mahsulotlari ancha o'sishi chigarishning faol 2000-yildan so'ng, asosan mamlakatimizda ularni ishlab chiqarishni rag'batlantiradigan shartsharoitlar bosqichma-bosqich yaratila boshlangandan keyin kuzatildi. Hozirgi vaqtda mamlakatimiz sanoati aholining sifatli mebel, gilam mahsulotlari, yengil avtomobillarga bo'lgan ehtiyojini to'liq ta'minlay oladi. Mamlakatimizda televizorlar, konditsionerlar va ekologik xavfsiz muzlatkichlar ishlab chiqarish hajmi sezilarli darajada o'sdi. Trikotaj mahsulotlari, oyoq kiyimlar tayyorlash va yengil sanoatning boshqa tarmoqlarida ham ishlab chiqarish yuqori sur'atlar bilan rivojlanib bormoqda.

Agar 2000-yilga qadar oʻtish davrining obyektiv shart-sharoitlari tufayli aholining asosiy nooziq-ovqat mahsulotlariga boʻlgan talabi va ta'minoti pasaygan boʻlsa, soʻnggi oʻn yillikda bu boradagi koʻrsatkichlarda barqaror oʻsish tendensiyasi kuzatilmoqda. Bu jarayonda uy xoʻjaliklari eskirgan va noqulay maishiy va elektrotexnika buyumlaridan voz kechib, yangi, zamonaviy, sifat jihatdan eski buyumlardan keskin farq qiladigan mahsulotlarni tez sotib olmoqda.

Qayd etilgan davrda mutlaqo yangi mahsulotlar paydo boʻldi. Bugun ularni xonadon egalari katta qiziqish bilan sotib olmoqda: raqamli televizor va fotoapparatlar, sun'iy yoʻldosh antennalari va mobil telefonlar, DVD pleyerlar, kompyuter va unga qoʻshimcha qurilmalar, noutbuklar va boshqa elektron texnikalar, qurilish materiallarining yangi turlari, qadoqlash buyumlari va boshqa roʻzgʻor ashyolari shular jumlasidan. Shunisi e'tiborliki, xonadonlarning zamonaviy maishiy va elektrotexnika bilan ta'minlanish sur'atlari yurtimizning barcha hududlarida bir maromda, mutanosib tarzda oʻsib bormoqda.

Aholining xarid qobiliyati, ya'ni uning oylik maosh va pensiya hisobidan eng zarur iste'mol mahsulotlarini sotib olish va xizmatlardan foydalanish imkoniyatlari aholining iste'mol tovarlariga bo'lgan talab va ehtiyojlarining ta'minlanishi sezilarli darajada yaxshilanib borayotganini aks ettiradi. O'rtacha oylik maosh xarid qobiliyatining o'sish dinamikasi, minimal iste'mol savati bilan qiyoslanganda, hozirgi paytda 7,2 barobar oshdi.

Aholining jamgʻarma mablagʻlari. Aholining jamgʻarma mablagʻlari iste'mol budjetining muhim tarkibiy qismi hisoblanadi. Yurtimizda 1995–2010-yillarda aholi omonatlari hajmi barqaror oshib bordi. Ayniqsa, yuqori oʻsish sur'atlari 2000–2010-yillarga toʻgʻri keladi, bu davrda mazkur koʻrsatkich 28,6 barobar oshgan. Hozirgi vaqtda, soʻrov natijalariga koʻra, mamlakatimizdagi qariyb barcha xonadon sohiblari banklarda oʻz jamgʻarma mablagʻlari – omonatlariga ega.

Bozor munosabatlari chuqurlashib, kichik biznes va xususiy tadbirkorlik rivojlanib borgani sayin aholining yalpi xarajatlari tarkibida yangi yoʻnalish – tadbirkorlik faoliyati uchun xarajatlar yoʻnalishi paydo boʻldi. Ularning ulushi hozirgi paytda 8,5 foizni tashkil etmoqda. Oʻz mohiyatiga koʻra, bu usul oila xoʻjaligining asosiy kapital uchun mablagʻ jamgʻarishning samarali shakli boʻlib, xususiy mulk asosida oʻz daromadlarini shakllantirish va koʻpaytirish imkonini beradi.

6. Davlatning ijtimoiy siyosati. Oʻzbekistonda ijtimoiy siyosatning asosiy yoʻnalishlari

Ijtimoiy siyosiy davlat siyosatining muhim boʻgʻinidir. Xalqaro Mehnat Tashkiloti (XMT)ning «Ijtimoiy siyosatning asosiy maqsadlari va me'yorlari toʻgʻrisida»gi 117-sonli konvensiyasida insonning oʻzi, oilasi salomatligi va farovonligini ta'minlash uchun zarur boʻlgan turmush darajasiga, shuningdek ishsizlik, nogironlik, bevalik va unga bogʻliq boʻlmagan boshqa sabablarga koʻra yashash uchun zarur mablagʻlardan mahrum boʻlgan hollarda ijtimoiy ta'minotga ega boʻlish huquqi belgilangan.

XMT tomonidan qabul qilingan «Ijtimoiy ta'minotning minimal me'yorlari toʻgʻrisida»gi 102-sonli konvensiyani ijtimoiy himoyalash boʻyicha asosiy hujjat deb qarash mumkin. Ushbu konvensiya ijtimoiy himoyaning quyidagi 9 turini oʻz ichiga oladi: tibbiy xizmat, ishsizlik va keksalik nafaqasi, ishlab chiqarishda olgan jarohatlar tufayli nogironlik nafaqasi, boquvchisini yoʻqotganlik boʻyicha nafaqa, homiladorlik va farzand tugʻilishi boʻyicha nafaqa, kasallik nafaqasi va oilaviy nafaqa.

Iqtisodiy va ijtimoiy xavfsizlikning oʻzaro aloqasini iqtisodiy manfaatlar yuzaga chiqaradi. Iqtisodiy manfaatlar — bu kishilarning hayotiy ehtiyoji, lekin bu anglangan va ma'lum xatti-harakatni yuzaga keltirganda, iqtisodiy manfaatga aylanadi. Manfaatlar oʻzining homiy subyektiga qarab har xil boʻladi. Ayrim kishining manfaati individual, jamoaning manfaati guruhiy-korporativ va nihoyat davlatning manfaati umummilliy boʻladi. Bozor tizimida individual manfaat ustuvorlikka ega, chunki bu yerda xususiy mulk yetakchi boʻladi. Individual manfaat bu ish kuchi egasi boʻlgan yollanib ishlovchi manfaatiga, tadbirkorlar, mulk sohiblari va menejerlar manfaatiga ajraladi. Har bir individ oʻz qoʻlidagi resurslardan koʻproq daromad topishga intiladiki, bu bilan u oʻz manfaatini roʻyobga chiqarishga oshiqadi. Ish kuchi egasi koʻproq ish haqi olsam, tadbirkor foydani koʻp topsam, pul egasi koʻp foizga ega boʻlsam, deydi.

Hozirgi iqtisodiyot faqat bozor qonunlari boshqarib turadigan iqtisodiyot emas. Uning muhim jihati davlat tomonidan tartibga solinishidir. Bozor kuchlari muqobil tanlovni yuzaga keltiradi. Bunga koʻra, iqtisodiyotda saralanish yuzaga kelib, tabaqalanish chuqurlashadi. Iqtisodiy ishtirokchilarning mavqei tez-tez oʻzgarib turadi. Bozor mexanizmi oʻz-oʻzidan ijtimoiy tengsizlikni yaratadi. Binobarin, unda ijtimoiy kelishmovchilik yaratish salohiyati ham yoʻq emas. Demak,

bozor kuchlarida iqtisodiyotni rivojlantira olishga layoqat bor. Biroq ular ijtimoiy muvozanatni ta'minlashda layoqatsiz boʻladi. Ijtimoiy barqarorlikni ta'minlashda davlat faollik qilishi kerak, bunga ta'sirchan ijtimoiy siyosat orqali erishiladi. Davlat iqtisodiyot ishtirokchisi sifatida boshqa subyektlardan siyosiy hokimiyat sohibi ekanligi bilan farqlanadi. Shu hokimiyatga tayanib, ham iqtisodiy, ham ijtimoiy hayotni tartibga solib turadi.

Shu jihatdan davlatni jamiyat manfaatini himoya qiluvchi eng oliy toifadagi ijtimoiy institut deb ham atash mumkin. Shu sababli uning ijtimoiy funksiyalari ham kuchayib boradi. Ijtimoiy tanlov nazariyasiga koʻra, hozirgi davlatda himoya qilish, homiylik va unumli ishlab chiqarish funksiyalari mavjud. Himoya qilish funksiyasi ijtimoiy xavfsizlik va tartibni ta'minlashdan iborat. Bu vazifani bajarish yo'lida davlat kuch ishlatishi mumkin va jamiyat davlatga shunday monopol huquq beradi. Davlat kishilarni tinch-totuvlikda va hamkorlikda yashab, bir-biriga zarar yetkazmasligini ta'minlaydi. Davlatning unumli ishlab funksiyasi fuqarolarga ijtimoiy ne'matlar yetkazib berishdan iborat. Bu shunday ne'matlarki, davlat fuqarolarga tekinga beradi, ulardan hamma bahramand bo'ladi. Bu ne'matlarni hamma keragicha oladi, ularni taqsimlashda tenglik qoidasiga amal qilinadi. Bu yerda ijtimoiy ne'matni bir odam olgani holda boshqasi olmasligi mumkin emas. Masalan, davlat huquq-tartibot organlari xizmatidan bir guruh yoki shaxs foydalangani holda boshqasi bundan istisno etilmaydi. Shu tariqa bepul ta'lim, tibbiy, obodonchilik va ekologik xizmatlardan ham foydalaniladi. Shu bois, O'zbekiston Respublikasi Konstitutsiyasining 40-moddasida: «Har bir inson malakali tibbiy xizmatdan foydalanish huquqiga ega», 41moddasida: «Har kim bilim olish huquqiga ega. Bepul umumiy ta'lim olish davlat tomonidan kafolatlanadi», – deb mustahkamlab qoʻyilgan. Agar bozor qonun-qoidalariga binoan, kishilarning iqtisodiy farovonligi jiddiy farqlansa, davlat bergan ijtimoiy ne'matlaridan foydalanish tafovutlarni qisqartiradi.

Demak, davlat bozor mexanizmi hal eta olmaydigan ijtimoiy muammolarni yechishda jamiyat nomidan qatnashadi. Fuqarolik jamiyatida davlat kishilarning uygʻunlashgan irodasini ifoda etadi, umummilliy manfaatlarni himoya qiladi. Bozor mexanizmi iqtisodiy oʻsish muammosini hal etgani holda, ijtimoiy tengsizlik muammosini keltirib chiqaradi. Bu esa beqarorlikni oziqlantiradi. Shu sababli davlat ijtimoiy tengsizlikni yumshatish choralarini izlaydi, u jamiyatning oʻzini ijtimoiy larzalardan saqlab turadi. Davlat jamiyatdagi barqarorlikni faqat

siyosiy kuch bilan emas, balki oʻzining ixtiyoridagi moliya resurslariga tayangan holda ta'minlaydi. Hozirgi davlat ijtimoiy davlat boʻlar ekan, uning ixtiyorida iqtisodiyotning ijtimoiy sektori saqlanadi, ijtimoiy sektor davlat korxonalari bilan cheklanmaydi, balki ijtimoiy ne'matlarni yaratuvchi va xalqqa yetkazib beruvchi turli davlat tashkilotlarini ham oʻz ichiga oladi. Mazkur sektorga budjet tizimi ham kiradiki, bu uning bosh va yetakchi boʻgʻini vazifasini oʻtaydi, chunki budjet ijtimoiy ne'matlarni yaratishni moliyalashtiradi.

Jamiyat davlatga zoʻrlik qoʻllash vakolatini beradi va u shundan foydalanib, budjetga majburiy to'lovlar, soliqlar undiradi, ya'ni o'z moliyaviy resurslarini hosil qiladi. Ular hisobidan ijtimoiy ne'matlarni yaratadi. Ijtimoiy ne'matlar tovarlashgan xizmatlar emas, chunki ular chiqarilmaydi, binobarin, bozorga bozor qiymatiga ayirboshlanmaydi, ular bepul taqsimlanadi. Shularni e'tiborga olib, ijtimoiy ne'matlarning yaratilishini nobozor ishlab chiqarish deb aytish mumkin va bu vazifani davlat bajarishini qayd etish zarur. Ijtimoiy ne'matlarning nobozor usullar bilan taqsimlanishi bir qator ijtimoiy xizmatlarni aholining kambagʻal qatlamlariga ham yetkazib beradi, bu bilan ularning ijtimoiy farovonligi ma'lum darajada ta'minlanadi. Davlat aytilgan xizmatlarni yaratar ekan, bularni resurslar bilan ta'minlash uchun boshqa subyektlar daromadining bir qismini budjetga olib taqsimlaydi. Bu bilan bozor mexanizmi bajara olmaydigan, firmalar va xonadonlar qoʻlidan kelmaydigan ishni bajaradi, ya'ni hammabop ne'matlarni elga yetkazadi. Bu yerda davlat ekstrenal, ya'ni iqtisodiyotga nisbatan tashqi kuch vazifasini o'taydi, ammo bu iqtisodiyot uchun zarurat hisoblanadi, chunki, birinchidan, ijtimoiy farovonlikka xizmat qiladi, ikkinchidan, ish kuchining takroran yaratilishiga hissa qo'shadi. Davlat bozor mexanizmi hal etishga qodir bo'lmagan vazifalarni o'zining ijtimoiy siyosati orqali bajaradi. Bu ijtimoiy ne'matlardan hammani bahramand etish, ijtimoiy himoya, bandlik va daromad siyosatidir. O'zbekiston avvaldan faol ijtimoiy siyosat yoʻlini tutdi va mustaqillik yillarida bunga izchil amal qildi. Bu yerda davlat o'z zimmasiga g'oyat katta ijtimoiy majburiyatlarni oldi, bu bilan ijtimoiy sohalarni uzluksiz ishlab turishini ta'minlashga, va hatto ijtimoiy ne'matlar ko'lamini oshirishga erishildi. Bu o'z navbatida, davlat iste'molining yalpi ichki mahsuloti hissasining katta bo'lishiga olib keldi. Yuqorida ta'kidlanganidek, davlatning ijtimoiy tadbirlarga xarajati yil ichida besh barobardan ziyod koʻpaydi. Davlat ijtimoiyligining kuchayishi uning iste'molini igtisodiy salohiyat darajasiga nisbatan ancha yuqori boʻlishiga olib keldi, aks holda katta ijtimoiy majburiyatlarni bajarib boʻlmas edi. Jahon moliyaviy-iqtisodiy inqirozi sharoitida Oʻzbekiston davlati ijtimoiy sohaga katta resurslarni safarbar etib, uning rivojini ta'minladi. Bu bilan aholining kambagʻal qatlamlariga eng zarur ijtimoiy ne'matlar yetkazib berildi. Bu ne'matlar iste'moli jihatidan aholining aytilgan qatlami oʻrtacha darajaga yaqinlashdi.

Davlatning ijtimoiy siyosati — bu insonning tobora yuksalib borayotgan eng muhim hayotiy manfaatlarini yuzaga chiqarish, insonni himoya qilish va kamol topishiga qaratilgan siyosatdir. Oʻzbekistonda davlatning ijtimoiy himoya siyosati ham ijtimoiy tafovutlarni cheklashga qaratildi. Shu maqsad yoʻlida katta resurslar ajratildiki, ular hisobidan aholining yordamga muhtoj qatlamlariga pul va natural transfetlar shaklida yordam koʻrsatildi, maqsadli pul toʻlovlari va ijtimoiy imtiyozlar beriladi, kompensatsion ijtimoiy toʻlovlar ajratiladi. Ijtimoiy yordam siyosati kambagʻallar sonini qisqartirishni koʻzda tutadi. Biroq bu ishda muhtojlarga beriladigan yordam, asosan, ish qobiliyatini yoʻqotganlarga koʻrsatiladi, ish qobiliyatini saqlagan kishilarga ishlab, daromad topish uchun sharoit yaratiladi. Bu bilan mehnatdan foydalanish hisobiga muhtojlikdan ozod boʻlish koʻzda tutiladi.

Ijtimoiy barqarorlikka davlatning bandlik siyosati yordamida ham erishiladi. Bu siyosat uch yoʻnalishda olib boriladi:

- a) mavjud ish joylaridan toʻliq foydalanish asosida bandlikni oshirish;
 - b) davlat tomonidan yangi ish joylari yaratilishini ragʻbatlantirish;
- c) ish kuchi eksportini tashkil etish va ragʻbatlantirish. Bu usul ish kuchi taklifini qisqartirish orqali bandlikka koʻmaklashadi.

Bandlikning oshirilishi daromad topish hisobidan ham doimiy, ham juz'iy kambagʻallikni qisqartiradi. Oʻzbekiston sharoitida bandlikni oshirishning ikkinchi usuli ustunlikka ega. Bu yerda yangi ish oʻrinlari, ayniqsa, arzon ish oʻrinlarining yaratilishi hamma choralar bilan ragʻbatlantiriladi. Shu oʻrinda imtiyozli mikrokreditlar alohida ahamiyat kasb etadi, chunki ular kichik biznes, dehqon-fermer xoʻjaliklarida kapital sigʻimi kichik boʻlgani uchun nisbatan arzonga tushadigan, yaratilishi qiyin boʻlmagan ish oʻrinlarini hosil etadi. Oʻzbekistonda 2013-yilda jami 970 mingdan ortiq ish oʻrinlari tashkil etilishi koʻzda tutilmoqda. Bu yangi tashkil qilingan umumiy ish oʻrinlarining 600 mingdan ziyodi yoki 65 foizi kichik biznes sohasi va fermer xoʻjaliklariga toʻgʻri keladi.

Davlatimiz rahbari Islom Karimov aholi bandligini ta'minlash va yangi ish o'rinlarini tashkil qilish muammosini hal etish 2013-yil va yaqin

istiqbolda ham mamlakatimizni muvaffaqiyatli va barqaror rivojlantirishning alohida ustuvor yoʻnalishi va hech mubolagʻasiz eng muhim sharti ekanligini ta'kidladi.

«Oliy va oʻrta maxsus ta'lim vazirligi, ayniqsa, Qoraqalpogʻiston Respublikasi rahbariyati, viloyatlar, shahar va tumanlar hokimlari e'tiborini ushbu mas'uliyatli vazifa boʻyicha ularning shaxsan javobgar ekanligini» Yurtboshimiz qat'iy vazifa etib qoʻydi.

Topshirilgan vazifalarning bajarilishi joylarda ijtimoiy adolatni ta'minlashga xizmat qiladi. Ma'lumki, ijtimoiy tengsizlik bozor tizimi uchun muqarrar bo'lsa-da, uning ma'lum me'yori bo'lib, bundan chiqib ketish ijtimoiy beqarorlikni yuzaga keltiradi. Bu, birinchi navbatda, eng eng yuqori daromadni, ya'ni boylar va kambag'allar daromadlarining farqlanishiga taalluqli bo'ladi. Bu farq katta joyda ijtimoiy xatar imkoni mavjud. Aksincha, bu farq kam joyda ijtimoiy muvozanatga moyillik hukmron bo'ladi. Tengsizlikni aniqlashda odatda 10 foiz boylar va 10 foiz kambag'allar daromadining nisbati asos qilib olinadi. Xalqaro standartlarga binoan bu (13–15):1 bo'lishi mumkin. Tengsizlik darajasi bundan oshib ketganda, ijtimoiy xatar tugʻiladi, deb qilingan. Keltirilgan nisbatning me'yoridan chiqib ketishi koʻpincha iqtisodiyoti yaxshi rivojlanmagan mamlakatlarda kuzatiladi. Biroq bu me'yorni saqlab qolish ijtimoiy siyosatga ham bog'liq bo'ladi. Iqtisodiyot baquvvat joyda ommaviy farovonlik mavjud, chunki ishlab chiqarilgan tovarlar va xizmatlar toʻkinchilikni ta'minlab, hayotni farovon qilishga yetadi. Buning dalili sifatida qoloq davlatlarga berilgan begʻaraz yordam miqdorining ortib borishi, ularga berilgan qarzlardan kechib yuborilishini koʻrsatish mumkin. Oʻzbekistonda ijtimoiy tengsizlik mavjud bo'lsa-da, uning miqyosi kattalashib borishiga yo'l berilmaydi, aksincha, faol ijtimoiy siyosat amalga oshirilib, kambagʻallarga har taraflama yordam beriladi. Oʻzbekiston iqtisodi rivojlangan mamlakatlar safiga kirmasa-da, bu yerda kambagʻallarning daromaddagi salmogʻining koʻrsatkichi aytilgan mamlakatlardagidan ancha yuqori, ya'ni 9,2 foizni tashkil etadi. Bu koʻrsatkich boʻyicha Oʻzbekiston faqat Yaponiya, Vengriya, Norvegiya, Chexiya va Finlyandiyadan orqada, qolgan boshqa hamma mamlakatlardan oldinda yuradi. Bu faol ijtimoiy siyosat natijasidir.

Oʻzbekistonda aholining tabaqalashuvi oʻz holiga tashlab qoʻyilmasdan, doimo me'yorida saqlanib kelingan. Bu yerda 10 foiz kambagʻallar bilan 10 foiz boylar daromadi oʻrtasidagi farq keyingi paytda 9,5–13,5-martadan oshmagan. Demak, tabaqalashuv xalqaro

standartlar darajasida yuz bergan. Tahlillarning koʻrsatishicha, Oʻzbekistonda daromadlarni boy tabaqa qoʻlida konsentratsiyalashuv (toʻplanuv) koeffitsiyenti ham me'yorida. Bu me'yor koeffitsiyenti 0,250 – 0,360 hisoblanadi. Oʻzbekistonda bu koʻrsatkich 1995-yilda – 0,310, 1996-yilda – 0,350, 1997-yilda – 0,421, 1998-yilda – 0,405, 2000-yilda – 0,389, nihoyat 2003-yilda – 0,320 boʻlgan.

Aholining daromadlar boʻyicha tabaqalashuvining me'yorida saqlab turilishi ijtimoiy hamjihatlikni kafolatlaydi. Ijtimoiy barqarorlik kambagʻallar sonining qisqarib borishi bilan ham bogʻliq. Dunyoda qabul qilingan kambagʻallik me'yori 10 foizni tashkil etadi, ya'ni kambagʻallar butun aholining oʻndan bir qismini tashkil etishi maqsadga muvofiqdir. Dunyoning mutlaq koʻpchilik mamlakatlarida bu me'yor ta'minlanmagan. Shu sababli kambagʻallarga yordam koʻrsatish ijtimoiy hamjihatlikni ta'minlovchi vosita sifatida oʻz ahamiyatini saqlab qoladi.

Ijtimoiy xavfsizlik iste'mol darajasi va tarkibini ham me'yorida bo'lishini talab qiladi.

Ijtimoiy xavfsizlik deganda jamiyat barcha ahlining zaruriy moddiy va ijtimoiy mavqeini ta'minlash bo'yicha davlatning choratadbirlari majmui tushuniladi. U, birinchidan, malakali ish kuchini takror ishlab chiqarishni, ikkinchidan, jamiyatning mehnatga qobiliyatli a'zolari salohiyatini amalga oshirish uchun sharoitning mavjudligini, uchinchidan, ishsizlarni qo'llab-quvvatlash va yangi ish o'rinlarini yaratish, to'rtinchidan, ijtimoiy kafolatlarni bildiradi.

Iste'mol eng kam deganda tirikchilik minimumini, koʻp deganda ijtimoiy minimumni ta'minlashi talab qilinadi. Tirikchilik minimumi inson sogʻ-salomat yashab, ish qobiliyatini saqlab qolishi uchun zarur boʻlgan darajada iste'mol qilinishini bildiradi.

Ijtimoiy minimum normal turmush kechirish va ish qobiliyatini rivojlantirishga imkon beruvchi iste'molni bildiradi. Ijtimoiy barqarorlik boʻlishi uchun iste'mol tirikchilik minimumidan ijtimoiy minimum tomon oʻsib borishi talab qilinadi. Ijtimoiy xavfsizlik nuqtai nazaridan iste'mol mehnat salohiyatining vayron boʻlishiga yoʻl bermay, uning saqlanib qolishini ta'minlashi kerak boʻladi. Ammo mehnat salohiyatini saqlash xarajatlari mamlakatlar boʻyicha jiddiy farqlanadi, chunki ish kuchini qaytadan yaratish sarflari hamma yerda bir xil boʻlishi mumkin emas. Rivojlangan mamlakatlarda bu sarf bir kun hisobida eng kamida 18 dollar, AQShda esa 33 dollar qilib belgilangan. Bunday farqlanish iste'mol minimumining miqdoran va tarkiban har xil boʻlishidan va narxlar darajasidan kelib chiqqan.

Inson sogʻlom yashashi uchun ovqatlanishi miqdoran va tarkiban yetarli boʻlishi zarur. Kundalik ovqatlanish me'yori 2150 kilokaloriya energiya quvvati bera olishi lozim. Bu ham ijtimoiy zarurat hisoblanadi. Biroq oziq-ovqat tarkibida kishi organizmiga zarur boʻlgan moddalar minimal darajada boʻlishi talab qilinadi. Masalan, kundalik ovqatlanishda har bir kishi uchun kamida 30–32 g. goʻsht, baliq, tuxum va sut kabi mahsulotlar beradigan oqsil moddasi boʻlishi kerakligi mutaxassislar tomonidan ta'kidlanadi. Binobarin, xavfsizlik darajasi boʻlishi uchun oziq-ovqat tarkibida uglevodlarlardan tashqari, oqsil, yogʻ va vitaminlar ham boʻlishi kerak. Buning uchun uglevodli non, makaron, kartoshka va guruchdan tashqari, oqsilga boy sut, goʻsht, tuxum, baliq ham iste'mol qilinishi zarur boʻladi. Inson uchun oziq-ovqat xavfsizligi darajasini aniqlashda kundalik ovqatlanish beradigan energiya quvvati uning me'yori bilan taqqoslanadi.

Ijtimoiy xavfsizlik nooziq-ovqat tovarlarini, jumladan xizmatlarni ham minimal darajada bo'lsa-da, iste'mol etilishini bildiradi. Biroq o'tish davrini boshdan kechirayotgan mamlakatlarda aholi iste'moli tarkibida buzilishlar yuz beradi. Bu jami iste'molda oziq-ovqat hissasining ortib ketishidan iborat bo'lib, daromadlarning umuman kamayishi va aholi tarkibida kam ta'minlanganlar hissasining ortishi bilan izohlanadi. Bunday hodisa o'tish davrining dastlabki yillarida ko'pchilik MDH mamlakatlarida kuzatildi. Oʻzbekistonning bozor iqtisodiyotiga oʻtish konsepsiyasi real iqtisodiy sharoitdan kelib chiqqanini hayotning oʻzi isbotladi. Gap shundaki, Oʻzbekiston, birinchidan, sotsialistik iqtisodiy tizim sharoitida, ikkinchidan, esa Sovet imperiyasi tarkibida rivojlandi. Bu esa uni qoloqlikka mahkum etdi. Oʻzbekiston resurslarga boy koʻpgina iqtisodiy taraqqiyotda mamlakat boʻla turib, mamlakatlaridan orqada qolib ketdi. 1990-yili aholi jon boshiga ishlab chiqarish bo'yicha dunyoda 75–80 o'rinni egalladi, ishlab chiqarishning uning strukturasi, tarkibining yangilanishi, sur'ati, diversifikatsiyasi jihatidan dunyo talablaridan ancha orqada qoldi.

Dastlab, jon boshiga hisoblangan nooziq-ovqat tovarlari iste'moli qisqardi, demak, ularning yetishmovchiligi yuzaga keldi. Bu, ayniqsa, turli xizmatlar iste'molida yaqqol ko'zga tashlandi. Xizmat ko'rsatishning pulli bo'lishi va daromadning yetishmasligi iste'mol darajasining qisqarishiga olib keldi. Natijada ijtimoiy xizmatlarni iste'mol qilish uchun ketgan sarflarning oilaning jami xarajatlaridagi hissasi kichik bo'ldi, lekin uning o'sishga moyilligi kuzatildi.

Xavfsizlikka erishishda ijtimoiy farovonlikning ahamiyati katta. Bu iqtisodiy farovonlikdan farqliroq turmush kechirishning shart-sharoiti qandayligi bilan tavsiflanadi. Bunga hayot kechirishning xavfsizligi, kommunal xizmatlar iste'moli, ijtimoiy ne'matlar, oʻrtacha umr koʻrish kabilar kiradi. Xalqaro miqyosda ijtimoiy farovonlik darajasini aniqlash uchun bolalarning qanchasi maktablarda oʻqishi, oʻqituvchilar soni, ta'lim olishdagi teng huquqlilik darajasi, davlatning jon boshiga hisoblangan ta'lim uchun sarflari kabilar hisobga olinadi.

Sogʻliqni saqlash xizmati darajasi aniqlanganda, bolalar orasidagi oʻlim, bola tugʻish paytida onalarga koʻrsatiladigan tibbiy xizmat sifati, bolalarning emlanishi, har ming nafar aholiga hisoblangan vrachlar soni, kasalxonalarda oʻrinlar soni va davolanish darajasi kabilar inobatga olinadi. Ijtimoiy farovonlikni aholining toza ichimlik suvi va zamonaviy kanalizatsiyadan foydalanishi ham belgilaydi. Ona va bola salomatligini himoyalash boʻyicha bajarilayotgan tadbirlar natijasida oʻtgan oʻn yil (2000–2010) davomida mamlakatimizda onalar oʻlimi har ming kishi uchun 33,1 nafardan 19,7 nafarga, bolalarning nobud boʻlishi esa 18,9 nafardan 10,1 nafarga tushdi. Tugʻma va irsiy kasalliklar bilan tugʻiladigan bolalar soni qariyb ikki barobar kamaydi. Yaponiya parlamenti a'zolari Oʻzbekistonda aholi savodxonligi darajasini qariyb 100 foiz, deb ta'kidladi¹.

Iqtisodiy va ijtimoiy farovonlikning asosiy koʻrsatkichlari (jon boshiga daromad miqdori, savodxonlik darajasi, oʻrtacha umr koʻrishi) asosini inson kamoloti indeksi orqali aniqlanadi. Bu koʻrsatkich qanchalik yuqori boʻlsa, shunchalik ijtimoiy barqarorlik ta'minlanadi. Barqarorlik sharoitida ijtimoiy konfrontatsiya (qarshi turish) oʻrniga ijtimoiy konsolidatsiya (hamkorlik) yuzaga keladi. Ijtimoiy hamkorlik bor joyda inson kapitali rivoj topadi va bu milliy xavfsizlikning asosini belgilovchi iqtisodiy va ijtimoiy xavfsizlikka xizmat qiladi.

Tayanch tushunchalar:

Daromad, bozor daromadlari, nobozor daromadlari, real daromad, tadbirkorlik daromadi, qonuniy daromadlar, noqonuniy daromadlar, turmush darajasi, minimal iste'mol budjeti, kambag'allik ko'rsatkichi, ijtimoiy himoya, ijtimoiy siyosat.

¹ Қаранг: Халқ сўзи. – 2011. – 3 фев.

Savol va topshiriqlar:

- 1. «Daromad» tushunchasining mohiyatini yoriting.
- 2. Daromadga ega boʻlishning belgilari qanday?
- 3. Oʻzbekiston Respublikasining aholining ijtimoiy himoyasi toʻgʻrisidagi amaldagi qonunlarini yozing va mohiyatini izohlang.
 - 4. Daromadlar tizimi va uning elementlarini tushuntiring.
 - 5. Daromadlar nima uchun bozor tizimining bir qismi hisoblanadi?
 - 6. Daromadlarning subyektlarini tushuntiring.
 - 7. Daromadlar qanday shakllanadi?
 - 8. Qonuniy va noqonuniy daromadlarni tushuntirib bering.
 - 9. Bozor va nobozor daromadlarini ta'riflang.
 - 10. Tadbirkorlik daromadining mohiyatini sharhlang.
 - 11. Ijtimoiy himoyaning maqsadi qanday?
 - 12. Real daromadlar nima?
- 13. Aholi ehtiyojlari va turmush darajasiga ta'sir etuvchi omillarni sanab oʻting.
 - 14. Daromadlar farqlanishining uch darajasini izohlang.
- 15. Oʻzbekiston Respublikasining ijtimoiy siyosati va uning hayotiyligini tushuntirib bering.
 - 16. Turmush darajasining jinoyatchilikka qanday bogʻliqligi bor?
- 17. Amaldagi qonunlarning aholi ijtimoiy xavfsizligini ta'minlashdagi o'rni va ahamiyatini izohlang.
 - 18. Aholi turmush darajasini belgilovchi indikatorlarni koʻrsating.
- 19. Huquqni muhofaza qiluvchi organlar xodimlarining noqonuniy daromadlarni aniqlashda roli qanday?
 - 20. Ijtimoiy sohaning mohiyatini tushuntiring.
- 21. Mamlakatimizda yangi ish oʻrinlarini yaratish va aholining turmush darajasini yanada yuksaltirish borasida qanday chora-tadbirlar amalga oshirilmoqda?

Mavzuni chuqur o'rganish instrumentariysi

Mutlaq qashshoqlik – shaxs yoki uy xoʻjaligining real daromadning yashash uchun zarur boʻlgan eng kam mablagʻ hajmiga mos keladigan holati.

Detsil koeffitsiyent – xonadon xoʻjaliklarining eng koʻp daromadli 10 foizning oʻrtacha daromadi bilan eng kam ta'minlangan 10 foizning oʻrtacha daromadi oʻrtasidagi nisbatni ifodalovchi koeffitsiyent.

Daromadni qayta taqsimlashda davlatning ishtirok etish indeksi – daromadlarni qayta taqsimlashga davlat aralashuvining darajasini ifodalovchi koʻrsatkich.

Daromadlarning konsentratsiyasi indeksi – jamiyatning daromadlar boʻyicha qutblashuv darajasini koʻrsatuvchi indeks.

Nominal daromad – tovar va xizmatlarning joriy yoki nominal baholari doirasidagi pul daromadlari darajasi.

Nisbiy qashshoqlik – uy xoʻjaligining oʻrtacha uy xoʻjaligi daromadiga qaraganda ikki marta kam darajadagi real daromadiga mos keluvchi ahvoli.

Daromadlarni shaxsiy taqsimlash — davlatning daromadlarni uy xoʻjaliklari oʻrtasida keyinchalik qayta taqsimlashi yoki shaxslar boʻyicha pirovard taqsimlashi.

Daromadlarni indekslash – iste'mol buyumlari narxlar indeksining oshishiga muvofiq ravishda aholiga toʻlanadigan ish haqi, nafaqa, stipendiya, pensiya va boshqa toʻlovlar miqdorining oshirilishi.

Daromadlarni muzlatish — aholi pul daromadlarining oʻsishini sekinlashtirish yoki toʻxtatib qoʻyishga qaratilgan siyosat hamda qoʻllaniladigan chora-tadbirlar tizimi.

Real daromad – narx oʻzgarishini inobatga oluvchi va narxlarni qandaydir bazaviy davrga keltirish orqali hisoblanadigan daromad.

Iqtisodiyot sohasidagi ijtimoiy adolat — muayyan jamiyatda shakllangan iqtisodiy munosabatlar tizimining ushbu adolat haqidagi, ya'ni iqtisodiy transaksiyalar va xoʻjalik yuritish sohasidagi oqibatlarning toʻgʻriligi, halolligi, tartibliligi, ziyoliligi haqidagi tasavvurlarga muvofiqligi.

Ijtimoiy transfertlar – asosan aholining kambagʻal qatlamlariga ularning xoʻjalik faoliyatidagi ishtiroki bilan bogʻliq boʻlmagan holda beriladigan pul toʻlovlari.

Iste'mol savati – muayyan oziq-ovqat, sanoat mollari va xizmatlarning tirikchilikni ta'minlashga yetarli bo'lgan miqdori. Bozor iqtisodiyoti sharoitida narx-navo ko'tarilib, baholar o'zgaradi. Aholining ko'radigan zararini qoplash uchun hukumat tomonidan mamlakatda «iste'mol savati» tarkibi aniqlanadi va uni qo'llash taklif etiladi.

Fiziologik minimum – iste'mol qilinishi faqat jismoniy ehtiyojlarni qondiradigan tovar va xizmatlar majmui.

Daromadlarni funksional taqsimlash – ne'matlarni ishlab chiqarish omillariga bo'lgan bozor narxlarining hosil qilinishi orqali birlamchi taqsimlanishi.

Ijtimoiy minimum – insonning muloqoti, turli ijtimoiy guruhlar va uyushmalarga jalb etilganligi, jamiyatning ma'naviy qadriyatlarni iste'mol qilishi bilan bogʻliq eng zarur ijtimoiy talablarni amalga oshirish uchun sarflanadigan xarajatlar.

Oila budjeti – oila daromadlari va xarajatlarining pul bilan ifodalangan yillik majmui.

Ijtimoiy soha – aholi turmush tarzi, uning farovonligi, iste'mol darajasiga bevosita bog'liq bo'lgan va ularni belgilab beruvchi tarmoqlar, korxonalar va tashkilotlar majmui. Ijtimoiy sohaga eng avvalo xizmat ko'rsatish sohasi (maorif, madaniyat, sog'liqni saqlash, ijtimoiy ta'minot, jismoniy tarbiya, umumiy ovqatlanish, kommunal xizmat ko'rsatish, yo'lovchi transporti, aloqa va boshqalar) kiradi.

Ijtimoiy soha obyektlari — aholining munosib turmush sharoiti va farovonligini ta'minlashga xizmat qiluvchi soha va tarmoqlar majmui. Bular qatoriga uy-joy fondlari, sogʻliqni saqlash, maorif, sport, madaniyat muassasalari va boshqalarni kiritish mumkin.

Ijtimoiy dasturlar – aholining bevosita turmush sharoiti va farovonligini ta'minlashga xizmat qiluvchi soha va tarmoqlarni rivojlantirishga oid choratadbirlarni o'z ichiga olgan rejaviy hujjatlar.

Kapital mablagʻlar – muayyan maqsadga yoʻnaltirilgan chora-tadbirlarni moliyalashtirish maqsadida shakllantirilgan va yoʻnaltirilgan mablagʻlar.

Mavzu yuzasidan asosiy xulosalar:

- 1. «Odamlarning dasturxonida, oilaviy ahvolida, umuman kundalik hayotimizda ijobiy oʻzgarishlar koʻzga tashlanmasa, bu aholining haqli e'tirozi va noroziligiga olib kelishi tabiiy»¹.
- 2. Bozor iqtisodiyoti sharoitida ishlab chiqarish birlamchi ahamiyat kasb etsa-da, uning natijasi daromad, foyda shaklida yuzaga chiqadi, chunki bozor qoidalari resurslar sarfi samarasiga koʻra daromadlarga ega boʻlishni ta'minlaydi. Demak, aholi turmush darajasining yuksalishi bozor qoidalari orqali topiladigan daromadlarga bogʻliq boʻlib qoladi.
- 3. Daromadga ega boʻlish uchun resurs egalari iqtisodiy munosabatlarga kirishib, oʻz manfaatini himoya qilishi kerak, aks holda, daromadning ragʻbatlantiruvchi iqtisodiy mazmuni realizatsiya etilmay qoladi.
- 4. Daromad bu iqtisodiyot subyektlarining faoliyati natijasida ular ixtiyoriga kelgan hamda mulkiga aylangan pul va moddiy shakldagi tushumlar.
- 5. Bozor daromadlari bu iqtisodiyot subyektlarining oʻz qonuniy resurslarini bozor qonun-qoidalariga muvofiq amalda ishlab topgan pul tushumlaridir.
- 6. Nobozor daromadlari bu subyektlarning ijtimoiy maqomiga koʻra va muhtojlik darajasiga nisbatan beriladigan pul va moddiy tushumlar.
- 7. Daromadlarni shakllantirishda iqtisodiy institutlar qatnashib, ular ham davlat, ham nodavlat institutlari hisoblanadi. Ularning faoliyati daromadlarni tartibga soladi va bu ijtimoiy adolatni ta'minlashga qaratiladi.

 $^{^{1}}$ Қаранг: *Каримов И. А.* Янги ҳаётни эскича қараш ва ёндашувлар билан қуриб бўлмайди // Халқ сўзи. — 2005. - 17 фев.

- 8. Oʻtish davrida daromadlar tabiati jihatidan bozor va nobozor tiplarga ajralib, iqtisodiy va huquqiy jihatdan qonuniy va noqonuniy tus oladi.
 - 9. Bozor daromadlari oʻz mohiyatiga koʻra, quyidagi vazifalarni bajaradi:
- a) kishilarning tirikchiligini ta'minlaydi va ishchi kuchini takroran hosil etadi;
- b) inson salohiyatini takomillashtirib borishga undaydi, u qoʻshimcha daromad topib, boshqalardan farovonroq yashash ishtiyoqini uygʻotadi va moliyaviy resurs sifatida iqtisodiyotning oʻsishiga xizmat qiladi hamda ahamiyati kuchayib boradi;
- c) daromadlarning kuchli, lekin adolatli tabaqalanishiga olib keladi, hayot darajasida jiddiy tafovut yuzaga keladi. Tengsizlik boʻlishi mumkin, faqat u adolatli boʻlishi lozim;
- d) bozor daromadlaridagi tengsizlik aholini ijtimoiy himoya etishni shart qilib qoʻyadi.
- 10. Turmush darajasi aholining zaruriy moddiy va ma'naviy ne'matlar va xizmatlar bilan ta'minlanganlik va ularni iste'mol qilish darajasi.
 - 11. Turmush darajasining past boʻlishi jinoyatchilikni keltirib chiqaradi.

18-MAVZU. IQTISODIYOTNI TARTIBGA SOLISHDA DAVLATNING ROLI

1. Davlatning bozor iqtisodiyoti sharoitidagi funksiyalari

Koʻplab masalalar mavjudki, uni bozor mexanizmi yechishga qurbi yetmaydi. Bunga davlatning bozor tizimida faol ishtirok etishi asos boʻladi. Davlat, eng avvalo, mamlakatning milliy manfaatlarini ifodalaydi va bozor mexanizmining samarali ishlashiga qulay sharoitlar hozirlaydi.

Bozor iqtisodiyotida davlatning tag-zaminli funksiyasi jamiyat miqyosida ijtimoiy-iqtisodiy barqarorlikni ta'minlashdan iborat. Faqat davlat jamiyatning sa'y-harakatlarini tartibga soluvchi oliy muassasa boʻla oladi. Faqatgina davlat jamiyatning turli manfaatlarini uygʻunlashtiradi, ularni yagona umummilliy manfaatga birlashtiruvchi kuch hisoblanadi.

Davlat jamiyatning ijtimoiy-iqtisodiy barqarorligini ta'minlashda qanday chora-tadbirlarni amalga oshiradi?

Bunda davlat, soliq-budjet siyosatini yuritadi. Davlat budjet orqali daromadlarni jamiyatning turli toifadagi fuqarolari oʻrtasida ularning ajralmas huquqlarini, ya'ni farovonlikning ma'lum standartiga erishish maqsadida amalga oshirish siyosatini qoʻllaydi.

Davlatning daromadlarni qayta taqsimlashdagi faoliyati jamiyatda band boʻlgan, fiksirlangan daromadlarga ega fuqarolar (davlat boshqaruvi sohasidagi xizmatchilar, olimlar, harbiy xizmatchilar va h.k.)ning mavjudligidan ham kelib chiqadi.

Ma'lumki, jamiyatda nogironlar, mehnatga layoqatsiz fuqarolar ham istiqomat qiladi. Oʻzbekiston Respublikasining Mehnat kodeksiga muvofiq, davlat ish bilan ta'minlashga muhtoj boʻlgan aholiga quyidagilarni kafolatlaydi:

- ishsizlik nafaqasini toʻlash;
- mehnat organlarining yoʻllanmasi boʻyicha kasbga tayyorlash,
 qayta tayyorlash yoki malaka oshirish davrida stipendiya toʻlanishi hamda
 shu davrni umumiy mehnat stajiga qoʻshish;
- ishsiz shaxsga qaramogʻidagilarni hisobga olgan holda, moddiy yordam berish;
 - haq toʻlanadigan jamoat ishlarida qatnashish imkoniyati;
- mehnat organlarining taklifiga binoan, ishlash uchun ixtiyoriy ravishda boshqa yerga koʻchish bilan bogʻliq xarajatlarini qoplash.

O'zbekiston Respublikasida aholining ishsizlik darajasi, foiz

2007-yil	2008-yil	2009-yil	2010-yil	2011-yil	2012-yil
5,0	4,9	5,3	5,1	5,0	4,9

Davlat ijtimoiy transfertlar orqali jamiyatda ijtimoiy barqarorlikni ta'minlaydi.

Ijtimoiy transfertlar — bu aholining kam ta'minlangan toifasiga pul toʻlovlari boʻlib, ularning xoʻjalik faoliyatidagi ishtiroki bilan bogʻliq emas. Ijtimoiy transfertlar natural shaklda ham amalga oshiriladi (bepul tibbiy yordam, uy-joy bilan va bepul oziq-ovqat bilan ta'minlash va boshqalar). Transfert toʻlovlarning maqsadi jamiyatda ijtimoiy barqarorlikni ta'minlash va tovar hamda xizmatlarga boʻlgan ichki talabni ushlab turishdan iboratdir.

Daromadlarni bilvosita taqsimlash usuliga soliqqa tortishning turli imtiyozli shakllari, bepul xizmatlarning tabaqalashgan taqsimoti kiradi. Jumladan, sogʻliqni saqlash va ta'lim sohasida, ayrim bozorlarda narxlar ustidan davlat nazorati.

Biroq davlatning daromadlarni qayta taqsimlashda ishtirokining obyektiv iqtisodiy chegarasini aniqlash zarur boʻladi. Quyida bunday

qayta taqsimlashning chegarasini belgilaydigan muayyan moʻljallar mavjud. Bular:

- 1) ijtimoiy toʻlovlar miqdori davlatning umumiy moliyaviy imkoniyatlaridan oshmasligi lozim. Aks holda, ijtimoiy dasturlarni amalga oshirish nafaqat budjet taqchilligi, balki aholi real turmush darajasining pasayishiga olib keladi;
- 2) qayta taqsimlashda davlat soliq stavkalarining keskin oshishiga yoʻl qoʻymaslik kerak. Soliqlarning keskin oʻsishi iqtisodiy subyektlarning investitsion faolligini pasaytiradi;
- 3) davlatning kam ta'minlanganlarga yordam berishini haddan ziyod kuchaytirgani mehnat kapitali bozorini va bozor mexanizmini izdan chiqarishga olib keladi. Davlat tomonidan aholining kam ta'minlangan qatlamini qo'llab-quvvatlash qat'iy manzilli, jamoat nazorati negizida tanlovli bo'lishi kerak.

Davlat inson kapitali bozorini tartibga solish yoʻli bilan jamiyatda ijtimoiy barqarorlikni ta'minlaydi. Bunda davlat ish bilan band etish masalasini hal etadi. Bozor mexanizmi oʻz-oʻzidan insonni yaratuv-chanlik va mehnat qilish huquqini ta'minlashga qodir emas. Shu bois ham davlat jamiyatda ijtimoiy keskinlikka yoʻl qoʻymaslik maqsadida aholini samarali ish bilan band etishga faol aralashadi.

Davlatning navbatdagi funksiyasi milliy iqtisodiyot darajasida yuqori samarali xoʻjalik yuritishni ta'minlash funksiyasidir. Agar bozor mexanizmi samarali ishlab chiqarishni alohida korxona doirasida ta'minlasa, davlat bu muammoni butun milliy xoʻjalik doirasida hal etadi.

Bular:

1. Davlat ilmiy texnika taraqqiyoti, innovatsion texnologiyalarni joriy etishni ragʻbatlantiradi. Tajriba koʻrsatmoqdaki, bozor mexanizmi bunga qodir emas.

Bozor iqtisodiyotining asosiy samarasi:

- bozorning oʻta monopollashuvi xavfi ijtimoiy infratuzilmani,
 transport, jamoat tartibini rivojlantirish stimuli (ragʻbati)ning yoʻqligi;
- atrof-muhitni ifloslantirish xavfi va tabiiy resurslardan foydalanishning samarasizligi;
- aholi daromadlari tabaqalanishining yuqori darajasi va ijtimoiy tengsizlik;
- iqtisodiyotning siklik (notekis) rivojlanishi, iqtisodiy-moliyaviy
 inqirozlarning buzgʻunchi xarakteri.

Bozor iqtisodiyotida davlatning asosiy vazifalari:

1) qonunchilik – qonunchilik bazasi;

- 2) samaradorlik raqobat muhitini yaratish va qoʻllab-quvvatlash, ijtimoiy tovarlar bilan ta'minlash uchun resurslarni qayta taqsimlash;
 - 3) adolatlilik boylik va daromadlarni qayta taqsimlash;
 - 4) barqarorlik makroiqtisodiy stabilizatsion siyosat.

Davlat boshqaruvining metodlari:

- 1. Davlat boshqaruvining ma'muriy metodlari antimonopol choralar, ma'muriy standartlar o'rnatish, biznes va tadbirkorlik sohasida ro'yxatga oluvchi protseduralar, tadbirkorlik faoliyatini litsenziyalashtirish, biznes va tadbirkorlikni yuritish borasida to'g'ridan-to'g'ri man etuvchi va ruxsat beruvchi tamoyillar.
- **2. Davlat boshqaruvining iqtisodiy metodlari** toʻgʻridan-toʻgʻri tartibga solish, budjet orqali moliyalashtirish, davlat xaridlari, davlat sektorining faoliyati, makroiqtisodiy siyosatning barcha shakllari.
- **3. Davlat boshqaruvining ijtimoiy metodlari** davlatning ijtimoiy ta'minoti, ish haqining kafolatlangan minimumini o'rnatish, ishsizlik uchun to'lovlar.

Iqtisodiyotda davlat sektorini tashkil etish shakllari:

- markazlashgan iqtisodiyotdan meros qolgan davlat korxonalari;
- davlat budjeti vositalari hisobidan davlat qurilishi;
- davlat vositalari hisobidan xoʻjalik subyektlarini sotib olish;
- korxonalarni natsionalizatsiya qilish.

Ijtimoiy ne'matlar tovarlar yoki xizmatlar bo'lib, ulardan bir iste'molchining foydalanishi boshqalarning iste'moli imkoniyati va ulardan foydalanishi huquqini kamaytirmaydi.

Ijtimoiy yo'naltirilgan bozor iqtisodiyoti sharoitida davlatning iqtisodiy vazifalari:

- tartibga solinadigan bozor sharoitida asosiy maqsad ustuvor yoʻnalishlarni ishlab chiqish, ijtimoiy-iqtisodiy islohotlarni izchil amalga oshirishning strategik yoʻlini belgilaydi va shunga muvofiq maqbul taktik xatti-harakatlarni amalga oshiradi;
- bozor iqtisodiyotiga oʻtish davrida iqtisodiy erkinliklarning kafolati vazifasini oʻtaydi;
 - bozor institutlarini yaratish uchun qulay sharoit tugʻdiradi;
- vujudga kelayotgan ishbilarmonlik tuzilmalarining qaror topishi va rivojlanishiga koʻmaklashadi;
- aniq maqsadga qaratilgan tuzilma siyosatini amalga oshiradi (ustuvor yoʻnalishlarni aniqlaydi);
- hamma ma'lum iqtisodiy vositalar moliya, kredit, soliq, valuta siyosati, narx-navoni nazorat qilish va bevosita ta'sir o'tkazishning choralari orqali iqtisodiy va ijtimoiy jarayonlarni tartibga soladi;

– iqtisodiyotni sogʻlomlashtirish muammolarini birinchi navbatda hal etadi.

Bozor tizimida davlatning ijtimoiy-iqtisodiy funksiyasi. Jahon amaliyoti koʻrsatmoqdaki, raqobatli bozor an'analari rivojlangan yuqori, mamlakatlarda turmush darajasi igtisodiyoti yoʻnaltirilgan tuzilishga ega boʻlib, iqtisodiy oʻsish sur'atlari va farovonlik darajasi yuqoridir. Biroq, haqiqatni aytish lozimki, shunday muhim vazifalar borki, ularni yechish yoki bajarishga bozor mexanizmi godir emas. Bu borada davlatimiz rahbari Islom Karimov: «Ushbu asoslangan ilmiy qoida davlatning bozor xoʻjaligida ishtirokini obyektiv zaruriyatga aylantiradi. Bundan tashqari, davlatning raqobatli bozor iqtisodiyotidagi roli, birinchidan, eng dolzarb muammolarni raqobatli bozor yecholmaydi. Ikkinchidan, davlat bozor mexanizmining yuqori samarada ishlashi uchun qulay sharoitlar yaratib beradi».

Davlatning raqobatli bozor iqtisodiyotidagi vazifasi jamiyat miqyosida ijtimoiy-iqtisodiy barqarorlikni ta'minlashdir. Gap shundaki, bozor iqtisodiyoti jarayonida kimdir boyga, kimdir kambagʻalga aylanadi. Kimdir ish oʻrniga ega boʻladi, kimdir ish oʻrnidan ajraladi. Qaysidir firma gullab yashaydi, qaysidir firma bankrotga (kasodga) uchraydi.

Bozor axloqi nuqtai nazaridan erkin raqobat natijasida olingan har qanday daromad adolatli hisoblanadi. Biroq umuminsoniy axloq nuqtai nazaridan erkin jamiyat va huquqiy demokratik davlatda har bir insonning ijtimoiy va iqtisodiy xavfsizligi kafolatlanishi lozim. Bunday kafolatni faqat fuqarolik jamiyatining umummilliy siyosiy instituti boʻlgan davlat ta'minlaydi.

Davlat jamiyat barqarorligini ta'minlashda quyidagi tadbirlarni amalga oshiradi:

davlat soliq siyosati orqali oʻz budjeti vositasida inson farovonligining ma'lum standartiga oid ajralmas huquqini roʻyobga chiqarish maqsadida turli toifadagi insonlar daromadlarini qayta taqsimlaydi. Davlatning daromadlarini taqsimlash borasidagi faoliyati xalq xoʻjaligining ayrim tarmoqlarida band boʻlganlarning belgilangan daromadlarga egaligidan kelib chiqadi (davlat boshqaruvi xodimlari, olimlar, harbiy xizmatchilar, ichki ishlar idoralari xodimlari, ta'lim va sogʻliqni saqlash xodimlari va h.k.). Shuningdek, bozorda iste'molchi sifatida ishtirok etuvchilar – nogironlar, mehnatga layoqatsiz insonlar hisoblanadi. Shuningdek, davlat inson kapitali orqali bozorni tartibga solib, jamiyatdagi ijtimoiy barqarorlikni ta'minlaydi. Davlat bandlik siyosati aholini, ayniqsa, yoshlarni ish bilan ta'minlaydi. Bozor

mexanizmi insonni mehnatga boʻlgan huquqini toʻgʻridan-toʻgʻri ta'minlay olmaydi. Shu bois ham davlat bandlik muammosini hal etish yoʻlini topishga aralashadi;

 davlatning navbatdagi funksiyasi milliy iqtisodiyot koʻlamida xoʻjalik yuritishning yuqori samarasini ta'minlash. Agar bozor mexanizmi ishlab chiqarish samaradorligini alohida firma, tarmoq doirasida ta'minlasa, davlat bu muammoning yechimini milliy iqtisodiyot darajasida hal etadi.

Davlat fan-texnika taraqqiyotini (FTT) ragʻbatlantiradi. Ragʻbatli bozor mexanizmi FTT tijorat asnosida oʻzlashtiradi. Bozor fan va texnika sohasidagi strategik yorib oʻtishni hamda chuqur tarkibiy oʻzgarishlarni ta'minlashga ojiz. Bundan tashqari raqobatli bozor yirik kapital sarflaydigan loyihalarni moliyalashtirishga qodir emas.

Davlat ilmiy asoslangan pul-kredit va soliq budjet siyosatini yuritgan holda iqtisodiyotni zarur pul miqdori bilan ta'minlaydi. Ishlab chiqarish omillari mulkdorlarining investitsion faoliyatini soliqdagi ayovchanlik va davlat xarajatlari orqali ragʻbatlantiradi. Soʻnggi yillarda bu tendensiya Oʻzbekistonga xos.

Davlat ilmiy asoslangan mintaqaviy siyosat yuritadi. Davlat hududlar oʻrtasidagi farqlarni yaqinlashtirishga (tenglashtirish)ga moddiy sharoit yaratadi. Shuningdek, hududlarning geografik tarixini, milliy-madaniy xususiyatlarini ham inobatga oladi.

Davlat antimonopol va antiinflyatsion siyosat yuritadi. Usiz iqtisodiyot samarali rivojlana olmaydi. Inflatsiya va monopoliya raqobatli bozor iqtisodiyotining doimiy kasalidir. Bozor mexanizmi davlat aralashuvisiz uni davolay olmaydi.

Davlat tashqi iqtisodiy faoliyatni amalga oshirishga rahbarlik qiladi. Bozor bunday vazifani bajara olmaydi. Bu tashqi savdo siyosati, toʻlov balansi, valuta kursiga ta'sir kabilardir. Bozor mexanizmi ish kuchining xalqaro oqimini, tovar va pul kapitalini nazorat eta olmaydi.

Davlatning aholini ijtimoiy tovarlar bilan ta'minlash funksiyasi, bozor mexanizmi inson ehtiyojlarini to'la ta'minlay olishga ojiz. Shunday ehtiyojlar borki, ularni pul bilan ta'minlab bo'lmaydi. Bular — yurt tinchligini saqlash. Bu ne'matlar iste'molida jamiyatning a'zosi sifatida har bir inson qatnashadi. Bular mudofaa ishlari xizmati, huquqni muhofaza qiluvchi organlar xizmati, davlat boshqaruvi, ekologik xavfsizlikni ta'minlash, bepul umumiy ta'lim, sog'liqni saqlash va boshqalar.

Ijtimoiy tovarlar shunday ne'matlarki, ularning iste'molida jamiyatning a'zosi sifatida har bir insonning ehtiyojlari qondiriladi. Bunda har bir inson mavjud ne'matdan teng miqdorda iste'mol etadi.

Davlatning yana boshqa bir muhim vazifasi borki, u iqtisodiyotning tashqi ta'sirida yuz beradigan oqibatlarni bartaraf etish faoliyatidir.

Davlat oʻzining vazifasini iqtisodiy asosga tayanib davlat sektori orqali ham amalga oshiradi. Davlat sektori milliy iqtisodiyotning tarkibiy qismi boʻlib, davlat mulkining obyekti hisoblanadi va insonlarni umumiy vazifalarni bajarishga yoʻnaltiradi. Davlat sektoriga suyangan holda, fantexnika taraqqiyoti, ijtimoiy tovar ishlab chiqarish va daromadlarni qayta taqsimlashni ragʻbatlantiradi.

Davlat xonadonlarga beradigan pul transfertlari ularning xarid qobiliyatini oshiradi, bu esa, oʻz navbatida, talabni oshirib, firmalar bozorini kengaytiradi. Davlat sektori hamma uchun zarur, lekin rentabelligi pastligidan firmalar qoʻl urmaydigan tovar va xizmatlarni yaratadi. Aksariyat hollarda davlat sektori ishlab chiqarish infratuzilmasi, chunonchi, yoqilgʻi, energetika, transport, yoʻl xoʻjaligi, suv xoʻjaligi, aloqa kabi sohalarni qamrab oladi. Ularning tovar va xizmatlari esa milliy iqtisodiyot rivoji uchun suvdek zarur boʻladiki, shu sababli bu sohalar xarajatini davlat oʻz zimmasiga oladi va iqtisodiy oʻsishga hissa qoʻshadi.

Davlat koʻrsatadigan ijtimoiy xizmatlar bepul boʻlganda, ulardan barcha bahramand boʻladi. Koʻrinib turibdiki, davlat ham iqtisodiyot subyekti, lekin bu oddiy subyekt emas, balki butun iqtisodiyotni tartibga solib turuvchi subyektdir.

Hozirgi bozor iqtisodiyotini davlat tartibga solib turishini faqat bozorning layoqatsiz boʻlib qolishi bilangina izohlash mumkin emas, chunki iqtisodiy aloqalar gʻoyat keng miqyosli va murakkab boʻlib, bozor kuchlari hatto mukammal ishlagan taqdirda ham ularni tartibga toʻlatoʻkis sola olmaydi.

Ayniqsa, globallashuv jarayonlarida korxonalarning tashqi iqtisodiy aloqalari ahamiyati gʻoyat oshadi va bularni oʻrnatishda davlatning ishtiroki talab qilinadi.

Davlatning bozor mexanizmiga aralashuvi me'yori. Zamonaviy jamiyatning ijtimoiy-iqtisodiy muammolarini oqilona hal etish davlatning iqtisodiyotni tartibga solishi va bozor mexanizmining uzluksiz ishlashi samarali uygʻunlashtirish orqali ta'minlanadi. Agar davlat haddan tashqari bozor iqtisodiyotiga aralashsa ham bozor mexanizmining deformatsiyasiga olib keladi. Bu ishlab chiqarish samaradorligining keskin pasayishiga olib keladi va iqtisodiyotning iste'mol talabiga

moʻljalini izdan chiqaradi. Shunday qilib, davlatning bozor iqtisodiyotiga aralashuvi chegarasi bozor mexanizmining funksionalligidan kelib chiqadi.

Quyida raqobatli bozorning davlat tomonidagi bozorga aralashuvi chegarasi borasidagi talablarining qisqacha tafsilotini keltiramiz.

1. Bozor mexanizmi (talab va taklif, raqobat, narx) ichki aloqalarni buzuvchi bozor mexanizmini, davlat harakatlarini rad etadi. Gap bunda erkin bozorning amal qilish shart-sharoitlari haqida bormoqda. Agar davlat o'z sektorining haddan ziyod iqtisodiyotdagi ulushini ko'paytirsa, bu xo'jalik faoliyati erkinligini cheklaydi, bu esa iqtisodiyot nodavlat sektorlarining qisqarishiga olib keladi. Agar davlat narx-navoga ma'muriy nazoratni kuchaytirsa, bozor mexanizmining narx-navo buzilishiga olib keladi. Chunki raqobatli rag'batlantiruvchi signal hisoblanadi. Bu davlat narxlar ustidan nazoratni olib tashlaydi, degani emas. Davlat narx darajasi dinamikasi borasidagi mas'ulligini saqlab turadi.

Bozor mexanizmi oʻziga nisbatan ta'sir etishning bevosita yoki iqtisodiy usullarini qoʻllashga ham yoʻl qoʻyadi. Raqobatli bozor xoʻjaligida ma'muriy metodlar mavjud boʻlish huquqiga ega. Iqtisodi rivojlangan mamlakatlar tajribasi shuni koʻrsatmoqdaki, iqtisodiyotni iqtisodiy dastaklar bilan boshqarish samarali ekan.

Raqobatli bozor iqtisodiy dastaklardan ehtiyotlik bilan foydalanishni talab etadi. Agar davlat ilmiy asoslanmagan, puxta oʻylanmagan iqtisodiy dastaklarni qoʻllasa, bozor mexanizmining maromi izdan chiqadi. Jumladan, puxta oʻylanmagan soliq yoki pul-kredit siyosati. Yoki davlatning inflatsiyaga qarshi siyosati. Davlat inflatsiyani bostirish uchun ma'muriy yoʻl bilan muomalaga chiqariladigan pul miqdorini cheklaydi. Pul massasini muomalada cheklash kredit foizini oshiradi. Bu pulga boʻlgan talabni kamaytiradi. Oqibatda investitsiya qisqaradi. Demak, iqtisodiy oʻsish darz ketadi. Bugungi kunda Oʻzbekistonda davlat iqtisodiy oʻsishni ta'minlash maqsadida, shuningdek bozor mexanizmini mustahkamlash borasida kuchli siyosat olib bormoqda. Bular kichik biznes va xususiy tadbirkorlikni qoʻllab-quvvatlash, oilaviy biznesni rivojlantirish, xususiylashtirish, inflatsiyani jilovlash, bandlik siyosati, daromadlar siyosati, soliq ayovchanligi va h.k.).

Xullas, davlatning rolini ziddiy omillar belgilaydi. Iqtisodiy aloqalarning global tus olishi davlatning rolini kuchaytirsa, oʻzini oʻzi tartibga solish imkoni bu rolni cheklab turadi. Shu sababli davlatning iqtisodiyotga aralashuvi me'yorida boʻlishi talab qilinadi.

Davlatning iqtisodiyotga aralashuvi me'yori shundan iboratki, davlatning faoliyati bozor mexanizmining ishlashiga xalaqit bermasligi, zarur bo'lganda, bu mexanizm ishini to'ldirib turishi ham talab qilinadi¹.

Hozirgi bozor iqtisodiyotida tartiblashning bozor mexanizmi bilan davlat mexanizmi amal qiladi.

Sobiq Ittifoq davrida total davlatlashtirish kuchli boʻlgan. Total davlatlashtirish iqtisodiy sohada, jumladan siyosiy va ma'naviy hayotda, iqtisodiyotni tashkil etishning barcha nodavlat shakllarini bostirishda davlat monopoliyasining qaror topishidir.

Totalitar iqtisodiyotda tobelik gʻoyasi kuchli boʻlgan. Davlat oʻziga haddan tashqari ziyod vazifalarni olganki, bu iqtisodiyotni siyosiylashtirishga olib kelgan.

Iqtisodiyotni siyosiylashtirish deganda iqtisodiy rivojlanishni siyosiy-gʻoyaviy maqsad va vazifalarni bajarishga boʻysundirish jarayoni tushuniladi.

Davlatlashtirish – bu hamma vaqt iqtisodiyotni siyosiylashtirish boʻlib, u hukmron siyosat va gʻoyaga boʻysunib keladi. Bu quyidagi oqibatlarga olib keladi:

birinchidan, davlatlashtirilgan firmalar samarasiz iqtisodiy strategiya ishlab chiqadi, sababi davlat firmalarga bozor qoidalari bilan emas, siyosiy motivlar bilan rahbarlik qilishga majbur etadi. Qayd etish lozimki, siyosiy motivlar doimo iqtisodiyotning davlat sektorida ishtirok etadi;

ikkinchidan, davlat sektori korxonalarida ishlab chiqarishning past samarali tartibida faoliyat koʻrsatadi. Davlat firmalari «imtiyozli, qulay» iqtisodiy sharoitda bo'ladi va ular o'zlaridan ham ko'proq davlatga ishonadi. Chunki davlat ularga imtiyozli soliq va kredit rejasini belgilaydi, dotatsiya to'laydi, subsidiyalar beradi, qarzini kechib yuboradi. Bu davlat sektorini bankrotlikdan qutqaradi. Ularga boqimandalik kayfiyati ustuvordir. Shu sababli yangilikka intilmaydi, mehnat unumdorligi va sifatni oshirish qaygʻusi yetishmaydi.

2. Davlat iqtisodiy siyosatining asosiy yoʻnalishlari

Iqtisodiyotning qonun-qoidalariga amal qilish iqtisodiy siyosat orqali yuz beradi, chunki bularni anglagan holda iqtisodiyot rivojiga oid chora-

 $^{^1}$ Qarang: *Ўлмасов А.*, *Вахобов А.В.* Иктисодиёт назарияси. – Т.: «Шарк», 2006. – Б. 461.

tadbirlar ishlab chiqiladi va bular iqtisodiyotga ta'sir etmay qolmaydi. Iqtisodiy siyosat oʻzi nima?

Iqtisodiy siyosat – bu iqtisodiyot subyektlarining o'z faoliyatiga oid yoʻl-yoʻriqlari va sa'y-harakatlarining majmuidir. Har bir iqtisodiyot ishtirokchisining, bu xonadonmi, firmami yoki davlatmi buning farqi yoʻq, oʻz manfaatlari bor. Bu manfaatlar amaliyotda aniq maqsad shakliga igtisodiy siyosat esa kiradi, uni amalga oshirishga qaratiladi. Xonadonning maqsadi o'z iste'molini maksimumlashtirish va kelajakni ta'minlash uchun jamg'arma hosil etishdir. Firmaning maqsadi esa maksimumlashtirish va iqtisodiy jihatdan barqarorligini ta'minlashdir. Davlatning maqsadi esa, milliy iqtisodiyotning barqaror o'sishini va shu asosda xalq farovonligini ta'minlashdan iborat.

Iqtisodiy siyosat uch darajada boʻladi, ular: mikro, makro va meta (xalqaro) siyosatdir.

Biz ushbu mavzuimizga oid davlatning iqtisodiy siyosatiga e'tibor qaratamiz.

Davlatning siyosati – bu makroiqtisodiy siyosat boʻlib, uning muayyan mamlakatning milliy iqtisodiga taalluqli yoʻl-yoʻriqlari va ulardan kelib chiqadigan sa'y-harakatlaridan iboratdir. Davlatning siyosati har doim milliy boʻladi, mamlakat rivojining ichki va tashqi sharoitini hisobga oladi. Siyosatda eng avval mamlakat iqtisodiyotining holati, xalqaro iqtisodiy konyunkturaning milliy iqtisodiyotga nechogʻlik ta'sir etishi, unda kutilayotgan oʻzgarishlar mamlakat zimmasiga olgan xalqaro majburiyatning qandayligi, mamlakat iqtisodiyotining resurslar bilan ta'minlanish darajasidan kelib chiqadi, ilgari amalga oshirilgan chora-tadbirlar bergan natija ham hisobga olinadi. Davlat siyosati davlat rahbarlarining irodasi va qat'iyatligiga va yetilgan iqtisodiy muammolarni naqadar idrok etishlariga ham bogʻliq boʻladi.

Davlatning siyosati milliy manfaatlardan kelib chiqqan holda ma'lum maqsadlarni koʻzlaydi. Bulardan asosiylari quyidagilar:

- **1. Barqaror iqtisodiy oʻsishni ta'minlash.** Bu yalpi ichki mahsulotning bir maromda va yetarli sur'atlar bilan oʻsishiga sharoit hozirlashni bildiradi, chunki YAIM qanchalik tez oʻsa, mamlakat iqtisodiy qudrati shunchalik oshadi.
- 2. Milliy iqtisodiyotning mustaqilligini ta'minlash, uning chet elga qaram boʻlishiga yoʻl qoʻymaslik. Iqtisodiyot qanchalik mustaqil boʻlsa, shunchalik milliy manfaatlarga koʻproq xizmat qiladi.

- **3. Iqtisodiy xavfsizlikni ta'minlash.** Bu iqtisodiy aylanmaning uzluksizligini, ya'ni takror ishlab chiqarishning to'xtovsiz davom etishini, iqtisodiy falajlikka yo'l qo'yilmasligini bildiradi.
- **4.** Milliy pul qadr-qiymatining barqarorligini ta'minlash mamlakatdagi pul muomalasining me'yorida borishiga erishish, pulni iqtisodiy aloqalarning muntazam ishlab turuvchi vositasiga aylantirish.
- **5.** Aholi turmush farovonligini mustaqil oshirib, iqtisodiyotning ijtimoiyligini toʻlaroq yuzaga chiqarishga koʻmaklashish.
- 6. Milliy iqtisodiyotni xalqaro integratsion jarayonlar va globalizatsiyada faol ishtirok etib, xalqaro iqtisodiyotda oʻz oʻrnini topishi, baynalminal iqtisodiy munosabatlarning teng huquqli ishtirokchisiga aylanishiga erishish.
- 7. Milliy iqtisodiyotning istiqbolini ta'minlash, ya'ni uni uzoq kelajakda o'sib borishiga sharoit hozirlash.

Bular iqtisodiy siyosatning strategik, ya'ni uzoq davrga mo'ljallangan maqsadi hisoblanadi. Biroq uning qisqa vaqtdagi taktik, ya'ni juz'iy maqsadlari ham bor. Bular jumlasiga iqtisodiy tanglikdan chiqib ketish, narxlarning barqarorligini ta'minlash, investitsion faollikni rag'batlantirish, eksport salohiyatini oshirish, novatsiyalarni ta'minlash, yangi tashqi bozorlarga kirib borish kabilar kiradi. Juz'iy maqsadlar strategik maqsadlardan kelib chiqadi va ularga xizmat qiladi.

Davlat siyosati belgilagan maqsadlarga quyidagi vositalar bilan erishadi: *birinchisi*, iqtisodiy vositalar boʻlib, bular jumlasiga soliqlar, subsidiyalar, litsenziyalar, eksport kvotalari, uchot stavkalari, davlat buyurtmalari, davlat investitsiyalari, transfertlar, turli iqtisodiy sanksiyalar (jazolash vositalari) kabilar kiradi. *Ikkinchisi*, yuridik vositalar. Bu iqtisodiy faoliyat tartibi va qoidalarini, uning davlat tomonidan ragʻbatlantirilishini belgilab beruvchi qonunlarni, ularga mos ravishdagi qonun osti hujjatlarini ishlab chiqish, ularni qabul qilish va joriy etishdan iboratdir.

Qonunchilik iqtisodiyotning huquqiy asoslarini belgilab beradi, bular esa bozor iqtisodiyotining obyektiv iqtisodiy qonunlari talabidan kelib chiqishi zarur. Iqtisodiyotga oid yuridik qonunlarni parlament qabul qiladi. Hukumat esa ularning amalga oshirilishini ta'minlaydigan qarorlar va farmoyishlarni ishlab chiqadi. Tegishli davlat idoralari qonunlarning amalga oshirilishini nazoratga oladi. *Uchinchisi*, siyosiy-ma'muriy vositalar. Davlat hokimiyat sohibi boʻlganidan oʻz siyosatiga rioya etilishini oʻz organlari kuchi bilan ta'minlaydi. Davlat oliy siyosiy institut hisoblanar ekan, uning qarorlari va buyruqlariga hamma itoat etishi kerak

boʻladi. Ma'muriy usul yordamchi usul hisoblanadi, u bozor tizimida yaxshi natija bermaganidan cheklangan holda qoʻllaniladi.

3. Davlat iqtisodiy siyosatining asosiy yoʻnalishlari

Iqtisodiyot yaxlit boʻlar ekan, iqtisodiy siyosat ham yagonadir. Davlatning iqtisodiy siyosati — bu makroiqtisodiy siyosat boʻlib, uning muayyan mamlakatning milliy iqtisodiga oid puxta oʻylangan va ishlab chiqilgan yoʻl-yoʻriqlari va ulardan kelib chiqadigan sa'y-harakatlaridir. Lekin davlat siyosatining aniq yoʻnalishlari bor.

Monetar siyosat — bu davlatning pul-kredit siyosati boʻlib, pul muomalasini tartiblash, tovar va pul massasi oʻrtasidagi muvozanatni ta'minlash, iqtisodiyotdagi pul oqimlarini boshqarib turish siyosati hisoblanadi. Uning maqsadi narxlarni va shunga koʻra milliy pul birligi xarid qurbini, uning valuta kursini barqarorlashtirish, oxir-oqibatda pulga talab bilan uning taklifini muvozanatlashtirishdan iborat boʻladi.

Monetar siyosatning uchta asosiy jihati bor:

- 1. Qayta moliyalashtirish yoki uchot siyosati. Bunda davlat nomidan markaziy banklar uchot stavkasini oʻzgartiradi. Stavka oshganda pul qimmatlashib, unga talab qisqaradi. U pasaytirilganda pul arzonlashib, unga talab oshadi. Bu ayni paytda kreditning arzon yoki qimmat boʻlishini bildiradi. Bu esa iqtisodiyotga kredit hisobidan yuboriladigan investitsiyalarni oʻzgartirib, uning oʻsishiga ta'sir etadi.
- 2. Ochiq bozorda operatsiyalar oʻtkazish siyosati. Bu davlat obligatsiyalarini chiqarib, firmalar, banklar va aholiga sotish va vaqti kelganda ularni qaytadan sotib olishni bildiradi. Bu obligatsiyalarni olish qulay boʻladi, chunki ularga qat'iy belgilangan foizni davlat toʻlaydi, bu bilan ularning daromadliligi kafolatlanadi. Davlat obligatsiyalari sotilganda pul ularga bogʻlanib qoladi, natijada uning muomaladagi miqdori qisqaradi. Aksincha, ular qaytadan sotib olinganda pul ulardan boʻshab, muomalaga keladi, u yerdagi pul miqdori koʻpayadi. Demak, bu usul bilan ham pul miqdori tartiblanadi.
- 3. Majburiy rezerv siyosati. Bu siyosatga binoan markaziy banklar boshqa banklar uchun kredit resursining majburiy rezervini kiritadi. Bu tartibga koʻra banklar kreditga beriladigan pulning bir qismini markaziy banklar ixtiyoriga beradi. Bu rezerv oshsa, kredit puli qisqaradi, agar u kamaysa, bu pul koʻpayadi. Masalan, mamlakatda jami kredit resurslari 80 mlrd. dollar. Shundan 10 foiz zaxira oʻtkazilsa, kredit uchun 72 mlrd. dollar qoladi. Bordi-yu bu zaxira 15 foizga chiqarilsa, kreditga 68 mlrd.

dollar qoladi. Bu bilan kreditga moʻljallangan pulning taklifi oshadi yoki qisqaradi. Shunga qarab, kredit olish goh oshib, goh qisqarib turadi. Monetar siyosatning aytilgan yoʻnalishlari shuni koʻrsatadiki, unda turli iqtisodiy vositalar qoʻllaniladi.

Monetar siyosat ikki xil bo'ladi:

- 1) qattiq siyosat. Bunda pul massasi qisqartiriladi, uning emissiya (pul chiqarish) hisobidan oʻsishi qat'iy chegaralanadi. Natijada pul massasi qisqarib, tovar massasiga tenglashadi. Pulning qisqarishi talabni kamaytiradi, narxlar esa oʻsmaydi, pul birligining xarid qurbi barqarorlashadi. Pul topishga intilish iqtisodiyotning jonlanishiga olib keladi. Bunday siyosat ilgari ta'kidlaganimizdek, odatda iqtisodiyotni tanglikdan chiqarish yoki inflatsiyani keskin susaytirish uchun qoʻllaniladi;
- 2) yumshoq monetar siyosat. Bunda davlat pul massasining ortishiga toʻsqinlik qilmaydi, pul emissiyasi hadeb cheklanavermaydi, natijada pul koʻpayib, uning arzonlashuvi yuz beradi. Yumshoq siyosat iqtisodiyot oʻsish pallada boʻlganda koʻproq qoʻllaniladi, chunki pul massasining oʻsishiga qarab tovarlar massasi ham oʻsadi. Bunda tovar-pul muvozanati pulni qisqartirish hisobidan emas, balki tovarlarning koʻpayishi tufayli ta'minlanib turadi.

Fiskal siyosat. Bu davlatning soliq-budjet siyosatidir, unga binoan soliqlar belgilanadi, budjet mablagʻlari aniq maqsadlar yoʻlida ishlatiladi. Soliq siyosati soliqlar vositasida budjetga pul toʻplashga qaratiladi. Unga binoan soliq turlari aniqlanadi, soliq stavkalari, soliq solinadigan obyektlar, soliq imtiyozlari, soliq undirish tartibi belgilanadi. Soliqlar davlatning iqtisodiyotga ta'sir etishida qoʻllaniladigan asosiy vositadir. Soliq tizimi nafaqat soliqlarni undirish, balki ragʻbatlantirish xususiyatiga ega boʻlishi lozim.

Iqtisodiyotni ragʻbatlantirish zarur boʻlganda, soliqlardan imtiyozlar beriladi. Bunda soliq kamaytiriladi, soliqni undirish muhlati choʻziladi yoki umuman soliq undirilmaydi. Natijada firmalarga tegadigan foyda koʻpayadi, ular foydani reinvestitsiya qiladi, ya'ni qaytadan ishlab chiqarishni oʻstirishga yuboradi. Ishlab chiqarishni ragʻbatlantirish maqsadida Oʻzbekistonda foydadan toʻlanadigan soliq stavkasi 2004-yildan boshlab muntazam tushirilib borilmoqda. Ishlab chiqarish qizib ketganda, uning oʻsishini sekinlashtirish zarur boʻlsa, soliqlar oshiriladi. Bu usul kapitalning eski tarmoqlardan chiqib, yangi istiqbolli tarmoqlarga koʻchib oʻtishiga ham yordam beradi, chunki eski joydagi yuqori soliq xarajatni oshirib, foydani kamaytirib yuboradi, yangi joydagi soliqning kamligi foydani oshiradi.

Fiskal siyosatda iqtisodiyotni barqarorlashtirish va oʻstirish uchun ikki xil yoʻldan boriladi:

- 1) ilgari kiritilgan va hozir amalda boʻlgan iqtisodiy stabilizatorlarni vositalarni qoʻllashni davom ettirish. Davlat qonun yoʻli bilan shunday tartibni oʻrnatadiki, unga binoan moliya normativlari (me'yorlari) joriy etiladi. Bular sharoit oʻzgarishiga qarab, toʻgʻridan-toʻgʻri amal qilaveradi. Bular jumlasiga soliq stavkalarini, ishsizlik nafaqasi miqdori, daromadlarning inflatsiyaga qarab indeksatsiya qilinishi, ijtimoiy yordam koʻrsatish normativlarini kiritish mumkin. Masalan, daromad soligʻi daromad miqdoriga nisbatan 15 foiz qilib belgilansa, daromad koʻpayishi bilan uning miqdori ham toʻgʻridan-toʻgʻri oshadi. Daromadlarni 80 foiz indeksatsiyalash tartibi oʻrnatilgan boʻlsa, narx oshgan taqdirda, shu 80 foiz darajada daromad ham koʻpaytiriladi;
- 2) sharoitga qarab yangi normativlarni kiritish yoʻlidan borish, bu diskretsion fiskal siyosat deb yuritiladi. Bu siyosatga asosan yangi soliq stavkalari joriy etiladi, yangi soliqlar kiritiladi, budjet mablagʻlarini sarflash normativlari oʻzgartiriladi. Diskretsion siyosat oʻzgargan sharoitga moslashish siyosatidir. Iqtisodiyot bir maromda oʻsib borayotganda, birinchi yoʻl, u tanglikka yoʻliqib, undan chiqish kerak boʻlganda, ikkinchi, ya'ni diskretsion yoʻl ustuvor boʻladi.

Fiskal siyosat budjet orqali ham iqtisodiyotga ta'sir etadi. Budjet hisobidan davlat ishlab chiqarish infratuzilmasiga katta investitsiyalarni yuboradi, milliy iqtisodiyot uchun ahamiyatli ish (masalan, yangi texnologiyani yaratish) bilan shugʻullanuvchi korxonalarga subsidiya beriladi. Subsidiya moliyaviy yordam sifatida qaytarib olinmaydi, uning hisobidan xarajatlar qoplanib, foyda koʻpayadi, bu bilan korxonalar ragʻbatlantiriladi.

Budjet siyosati ijtimoiy ne'matlarning yaratilishini kanda qilmay va kerakli miqdorda pul bilan ta'minlab turishga qaratiladi. Davlat budjeti balanslashgan bo'lishi, ya'ni daromadlarga qarab xarajatlar qilinishi zarur bo'ladi. Budjet siyosati shundan kelib chiqqan holda budjet defitsitiga yo'l bermaslikni, defitsit yuz bergan taqdirda ham, bu me'yorida bo'lishiga qaratiladi. Budjet siyosati davlatning ichki va tashqi qarzining ham me'yorida bo'lishini ta'minlashi zarur.

Fiskal siyosat ikki xil bo'ladi:

1. Faol fiskal siyosat. Bu qoʻllanilganda diskretsion vositalar ishga solinadi, masalan, soliqlar kamaytiriladi, ulardan saylangan tarzda boʻlsa-da siylovlar beriladi, budjetdan transfertlar berish koʻpaytiriladi, firmalar subsidiyalar oladi. Bularning hammasi iqtisodiy faollikka olib

keladi. Firmalar xarajati qisqarib foydasi ortadi, aholining transfertlar hisobidan xarid qobiliyati oshadi. Xullas, bu siyosat firmalar va xonadonlar talabini oshiradi. Mana shunday yoʻl koʻp hollarda iqtisodiyot qiyinchilikdan chiqib, oʻzini oʻnglab olishi uchun qoʻllaniladi.

2. Nofaol fiskal siyosat. Bu siyosat moliyaviy stabilizatorlarni oʻzgartirmay, ularning erkin ishlashiga yoʻl berishga qaratiladi, chunki bozor mexanizmi yaxshi ishlab turgan boʻladi. Iqtisodiyotning uzilishlarsiz yuksalib borishi tufayli moliya vositalarini oʻzgartirishga hojat qolmaydi. Demak, bu siyosat iqtisodiy oʻsish toʻxtovsiz borayotgan kezlarda ish beradi.

Investitsiya siyosati. Bu investitsiya resurslarini shakllantirish va ta'minlashga yuborilishini kerakli sohalarga siyosatdir. Bu siyosat investitsion faollikni oshirishga yoki kamaytirishga qaratiladi. Bu davlatning struktura (ishlab chiqarish tarkibini oʻzgartirish) siyosati bilan bogʻliq, bu esa ishlab chiqarishning eski sohalarini cheklab, yangi, masalan, eksportga moʻljallangan sohalarini oʻstirishni bildiradi. Investitsiya siyosatiga koʻra yangi istiqbolli sohalarga investitsiya qilingan foydadan umuman soliq olinmaydi yoki qisqartirilgan miqdorda oshadi. Yangi sohalardagi mol-mulkdan soliq olinmagan holda, eski sohalardagi mol-mulkdan soliq koʻproq olinadi. Bu bilan yangi sohalarning jadal o'sishi rag'batlantiriladi, eski sohalar esa rag'batlantirilmaydi. Investitsiya siyosati texnika taraqqiyotini ham jadallashtiradi. Yangi texnologiyalarga pulni investitsiyalayotgan firmalarga subsidiyalar ajratmadi, soliqdan yengilliklar beriladi. Bu siyosat firmalarga tushadigan investitsiya yukini kamaytirishni ham koʻzlaydi. Shu maqsadda bir qator serkapital, binobarin katta investitsiyalarni talab qiluvchi investitsiyalar o'zini tezda oqlamaydigan sohalarni moliyalashtirishni davlat o'z zimmasiga oladi. Bu bilan firmalar investitsiyasini serfoyda ishlarga yuborilishiga koʻmak beriladi. Bozor qoidalariga binoan investitsiyalarning serfoyda sohalarga yuborilishi davom etadi. Biroq davlat xususiy investitsiyalarni umumiqtisodiy ahamiyatga sohalarga yuborilishini oʻz qoʻlidagi moliya-kredit vositalari bilan rag'batlantiradi.

Agrar siyosat. Bu davlatning qishloq xoʻjaligini qoʻllab-quvvatlashga qaratilgan siyosatidir. Mazkur siyosat qishloq xoʻjaligining barqaror oʻsishini, oziq-ovqat mustaqilligi va xavfsizligini ta'minlashni koʻzlaydi. Uning doirasida davlat qishloqdagi ishlab chiqarish infratuzilmasining (suv xoʻjaligi, yoʻl qurilishi, gaz va elektr energiyasi ta'minotining) xarajatlarini qisman oʻz zimmasiga oladi, davlat yerni ijaraga olib

ishlatilishini, yerni garovga qoʻyib, kredit olishni huquqiy jihatdan ta'minlaydi. Agrar siyosatda (yer davlatniki boʻlgan joyda) davlatning xarid narxlari, davlat subsidiyalari kabi vositalar qoʻllaniladi. Dehqonlarni qoʻllab turish uchun yer soligʻi yengil qilib belgilanadi. Masalan, 2002-yili Oʻzbekistondagi yagona yer soligʻi qishloq xoʻjaligi mahsulotlari uchun bozor qiymatining 3–5 foizidan oshmadi. Bu soliq dehqonlarga ogʻirlik qilmadi.

Qishloq xoʻjaligida rentabellik past boʻlganidan kapitalning u yerdan chiqib ketishiga yoʻl qoʻymaslik uchun davlat fermerlarga subsidiya berib turadi, uning hisobidan xarajatlar qisman qoplanib, fermerlar me'yordagi daromadga ega boʻlishadi va qishloq xoʻjaligini tark etmaydilar. Fermerlarni ragʻbatlantirish uchun davlat qishloq xoʻjaligi mahsulotini ularga ma'qul narxlarda sotib oladi. Davlat narxlari bozor narxlariga yaqin turadi, ularga binoan mahsulotni davlatga sotish fermerlar uchun qulay boʻladi, chunki davlat xaridi mahsulotlarning sotilishini va kanda qilmay daromad olinishini kafolatlaydi.

Tashqi iqtisodiy siyosat. Bu davlatning oʻzaro foydali tashqi aloqalarni rivojlantirish, mamlakat iqtisodiyotini jahon xoʻjaligi bilan integratsiyalashuvini ta'minlashga qaratilgan siyosatidir. Tashqi iqtisodiy faoliyat tashqi iqtisodiy aloqalarni roʻyobga chiqarish jarayonidir. Bu siyosatning asosiy maqsadi milliy iqtisodiyotning jahon xoʻjaligidagi mavqeini mustahkamlashdir. Unga binoan eksport va import, chetga kapital chiqarish va chetdan kapital kiritish, ish kuchi migratsiyasiga doir tadbirlar amalga oshiriladi. Bu siyosatda bojxona toʻlovlari, eksportimport litsenziyalari va kvotalari kabi vositalar qoʻllaniladi. Aytilgan vositalar iqtisodiy chegara hosil etib, milliy iqtisodiyotni himoya qiladi. Eksportni kuchaytirish zarur boʻlsa, unga litsenziyalar (ruxsatnoma) beriladi, eksport kvotasi oshiriladi. Bordi-yu importni qisqartirish ma'qul boʻlsa, uning kvotasi kamaytiriladi, import uchun boj toʻlovi oshiriladi, importga litsenziya berish chegaralanadi.

Davlat siyosati kapital chiqarish va kapital kiritish tartibini ham belgilaydi. Kapital kiritish zarur boʻlsa, bu ish ragʻbatlantiriladi. Kapital chiqishi ma'qul boʻlsa, davlat bunga sharoit yaratib beradi. Chet elga ish kuchini chiqarish uchun ham yordam beriladi. Bordi-yu mamlakatga arzon ish kuchi kerak boʻlsa, uning chetdan oqib kelishi uchun migratsiya qoidalari (chegaradan oʻtish, yashash va ishlash uchun ruxsat olish va h.k.) yengillashtiriladi. Davlat siyosati xalqaro iqtisodiy tashkilotlar bilan hamkorlik qilishni ham moʻljallaydi. Davlat iqtisodiy siyosatining samaradorligi uning monitoringi orqali aniqlanadi. Bunda iqtisodiy oʻsish

sur'atlari, inflatsiya darajasi, eksport va import holati, tashqi qarz miqdori, budjet defitsiti kabi koʻrsatkichlarga qarab, iqtisodiy siyosat natijasi baholanadi.

Iqtisodiy siyosat doirasida davlatning turli dasturlari ishlab chiqiladi va amalga oshiriladi. Dasturlarda koʻzlangan maqsad, amalga oshiriladigan chora-tadbirlar, ulardan kutiladigan natijalar, ularni moliyalashtirish manbalari aniqlanadi. Dasturlar milliy iqtisodiyot uchun ustuvor boʻlgan muammolarni hal etishga qaratiladi. Bular jumlasiga tanglikdan chiqish, oziq-ovqat, energiya ta'minoti, texnologiyalarni yangilash, infratuzilmalarni rivojlantirish, eksport salohiyatini oshirish, qoloq hududlarni rivojlantirish kabi dasturlar kiradi. Dasturlarda belgilangan muammolarning hal etishishi iqtisodiy-ijtimoiy rivojlanishga turtki beradi.

Tayanch tushunchalar:

Davlat, davlat mexanizmi, davlatning vazifalari, davlatning iqtisodiyotni tartibga solishi, davlatning qarz siyosati, davlatning iqtisodiy siyosati, davlatning ijtimoiy siyosati, davlatning iqtisodiy va ijtimoiy xavfsizlikni ta'minlashi.

Savol va topshiriqlar:

- 1. Davlat nima?
- 2. Davlatning bozor iqtisodiyoti sharoitidagi funksiyalarini tushuntirib bering.
 - 3. Davlatning modernizatsiya strategiyasi nima?
- 4. Ishlab chiqarishni diversifikatsiya etish, texnik va texnologik yangilashda davlatning qanday chora-tadbirlari mavjud?
 - 5. Iqtisodiy siyosat nima?
 - 6. Ijtimoiy siyosat nima?
 - 7. Davlatning iqtisodiyotni tartibga solish usullari qanday?
 - 8. «Davlat bosh islohotchi» gʻoyasining mohiyatini izohlang.
 - 9. Davlatning iqtisodiy maydoni qanday himoyalanadi?
- 10. Davlat ruxsat berish funksiyasini nima uchun minimal darajaga tushirmoqda?

Mavzuni chuqur o'rganish instrumentariysi

Davlat — jamiyatdagi turli manfaatlarni uygʻunlashtiradi va yagona umummilliy manfaatga birlashtiruvchi siyosiy institutlar, partiyalar, jamoat tashkilotlari va uyushmalaridan tashkil topadi.

Davlatning siyosati – bu makroiqtisodiy siyosat boʻlib, uning muayyan mamlakatning milliy iqtisodiga taalluqli yoʻl-yoʻriqlari va ulardan kelib chiqadigan sa'y-harakatlaridan iborat.

Davlatning iqtisodiy siyosati — iqtisodiyot ishtirokchilarining yoʻlyoʻriqlari va qoʻllagan chora-tadbirlari sifatida namoyon boʻladi. Bu siyosat milliy iqtisodiyotga oid siyosatdir. Davlat iqtisodiyotning oddiy ishtirokchisi emas, balki uni tartibga solib turuvchi kuch hisoblanadi. Iqtisodiyotga bozor qonun-qoidalariga toʻsqinlik qilmaydigan, balki ularga sharoit yaratib beradigan darajada aralashadi.

Davlatning ijtimoiy siyosati – bu insonning hayotiy muhim manfaatlarini yuzaga chiqarish, himoya qilish va uning kamol topishiga qaratilgan siyosatdir.

Davlatning iqtisodiyotga aralashuvi — unda davlat umummilliy manfaatlarni ifodalovchi kuch sifatida milliy iqtisodiyotni tartibga solishi tushuniladi. Bunda birlashgan kishilar manfaatlari ifoda etilib, bu guruhiy, ya'ni korporativ manfaatlarni ham nazarda tutadi.

Davlatning iqtisodiyotga aralashuv me'yori — davlatning faoliyati bozor mexanizmining ishlashiga xalaqit bermasligi, aksincha, davlat bunga sharoit yaratib berishi, zarur boʻlganda, bozor mexanizmi ishini toʻldirib turishi talab qilinadi. Davlat siyosati milliy manfaatlar va maqsadlarni koʻzlaydi.

Mavzu yuzasidan asosiy xulosalar:

- 1. Davlat iqtisodiy siyosatining maqsadi umummilliy manfaatlarga asoslanib, barqaror iqtisodiy oʻsishni, iqtisodiy mustaqillikni, iqtisodiy va ijtimoiy xavfsizlikni, milliy pul qadr-qimmatining barqarorligini, xalq farovonligini ta'minlashga xizmat qiladi.
- 2. Davlat oʻz siyosatini iqtisodiy, huquqiy va siyosiy-ma'muriy vositalar yordamida amalga oshiradi.
- 3. Davlat milliy iqtisodiyotning integrallashuvini, uning kelajagini ta'minlash maqsadini koʻzlaydi.
- 4. Davlat iqtisodiyotda sogʻlom raqobat muhitini ta'minlaydi. Monopol faoliyatni cheklash ustidan nazorat oʻrnatadi. Monopoliyaga qarshi qonunlar qabul qiladi. Iste'molchilar huquqi va tadbirkorlar manfaatlarini himoya qiladi.
- 5. Bozorni tartibga soluvchi asosiy kuch «koʻrinmas qoʻl» deb atalib, talab, taklif va raqobatni tashkil etadi.

19-MAVZU. XUFIYONA IQTISODIYOT: MOHIYATI VA KELIB CHIQISH SABABLARI VA BARTARAF ETISH YOʻLLARI

1. «Xufiyona» iqtisodiyot tushunchasi va tuzilishi

Oʻzbekiston Respublikasi iqtisodiy xavfsizligi davlat strategiyasidan kelib chiqib, amaldagi qonunlar iqtisodiyot ahvolining Oʻzbekiston iqtisodiy xavfsizligi talablariga javob beradigan mezonlari orasida quyidagilarni keltirish mumkin:

- jamiyat hamda xoʻjalik va moliya faoliyatining barcha sohalari jinoiylashuviga yoʻl qoʻymaydigan iqtisodiy va huquqiy shart-sharoitlarning yaratilishi;
- jinoiy tuzilmalarning ishlab chiqarish va moliya institutlarini egallab olishi, hokimiyatning turli institutlariga kirib borishi va h.k.

Mamlakatimiz milliy boyligi davlat budjetining daromadlarini taqsimlash va qayta taqsimlashda ishtirok etish iqtisodiy agentlarga har qanday xoʻjalik faoliyatiga qaraganda, ancha koʻp foyda kelishini ta'minlaydi. Bunday faoliyat «xufiyona» iqtisodiyot nomini oldi. Xufiyona iqtisodiyot toʻgʻrisidagi adabiyotlarda ushbu kategoriyani ta'riflash uchun quyidagi asosiy yondashuvlar mavjud:

- 1) «xufiyona» iqtisodiyot faoliyatning taqiqlangan turlari sifatida baholanadi;
- 2) «xufiyona» iqtisodiyot iqtisodiy faoliyatning aytilmagan va yashirilgan turlari sifatida ta'riflanadi;
- 3) «xufiyona» iqtisodiyot u yoki bu sabablarga koʻra rasmiy statistikada inobatga olinmaydigan, yalpi ichki mahsulotga kiritilmaydigan, soliqqa tortishdan «tushib» qoladigan har qanday iqtisodiy faoliyat sifatida talqin etiladi.

Shuningdek, nemis adabiyotlarida ham xufiyona iqtisodiyotga oid turlicha yondashuvlar mavjud. Ularning ayrim tariflarida xufiyona iqtisodiyot moliyaviy sirli bitimlar sifatida talqin etilsa, yana bir boshqa ta'rifda xufiyona iqtisodiyot jinoiy faoliyat sifatida qaraladi. Uchinchi bir yondashuvda xufiyona iqtisodiyot barcha subyektlarning soliq toʻlashdan boʻyin tovlashini qamrab oladi, deyiladi. Toʻrtinchi hodisada xufiyona iqtisodiyot natijalari YAIMda inobatga olinadigan ham moliyaviy operatsiyalar, ham iqtisodiy faoliyat tushuniladi. Nemis mutaxassislari xufiyona iqtisodiyotni YAIM tarkibiga kiritish tarafdori ekanligini qayd etish lozim.

Xufiyona iqtisodiyotning yuqoridagi ta'riflari bilan birgalikda uning kengroq ma'nodagi talqinlarini keltiramiz.

Rasmiy sektor doirasidan tashqarida, ya'ni uy xo'jaligidagi mehnatdan va jamoa ishlab chiqarishidagi o'z-o'zini ta'minlash maqsadida yashirin tadbirkorlik bilan shug'ullanuvchi turli faoliyat kabi xufiyona iqtisodiyotning ta'rifi ham mavjud.

Xufiyona iqtisodiyot — qonunlar, huquqiy normalar, xoʻjalik hayotining rasmiy qoidalarini chetlab oʻtib, ya'ni huquqiy maydon doirasidan tashqarida yuz beradigan iqtisodiy munosabatlarning ma'lum turidir, deb baholaymiz.

«Xufiyona» iqtisodiyot milliy xavfsizlikka tahdid sifatida ayrim individlar, ularning guruhlari, institutsional subyektlar oʻrtasida moddiy ne'matlar va xizmatlarni ishlab chiqarish, taqsimlash, ayirboshlash va iste'mol qilish borasida yuzaga keladigan hamda natijalari u yoki bu sabablarga koʻra rasmiy statistikada inobatga olinmaydigan va soliqqa tortilmaydigan munosabatlar majmuidir.

«Xufiyona» iqtisodiyotning faoliyat koʻrsatishida davlatning iqtisodiy xavfsizligiga imkoniyatdagi va aniq tahdid mavjud. «Xufiyona» iqtisodiyot aksariyat odatdagi, «normal» iqtisodiy jarayonlarning kechishiga — daromadning taqsimlanishi va shakllanishiga, xalqaro savdoga, investitsiya kiritish va umuman iqtisodiy rivojlanishga salbiy ta'sir koʻrsatadi. «Xufiyona» iqtisodiyotning xususiyatlarini aniqlashda ushbu muammo tadqiqotchilarini turli ta'riflarni muomalaga kiritishga undovchi har xil omillar inobatga olinadi. Bunday mezonlarga quyidagilar kiritiladi:

- davlatning fiskal (soliq) manfaatlari;
- YAMM miqdorining haqiqiy bahosi;
- xoʻjalik yurituvchi subyektlar hamkorligi yoki xatti-harakatining xususiyati;
 - yuridik koʻrsatkichlar.

Mazkur mezonlarga koʻra, «jinoiy», «nojinoiy», «norasmiy», «soxta», «norasmiy» iqtisodiyot ajratiladi.

Soliqlarni kamaytirib toʻlash oʻz-oʻzicha firibgarlik operatsiyasi hisoblanmaydi va har doim ham xufiyona biznes sohasiga kirmaydi. Hammasi qoʻllaniladigan usullarga bogʻliq. Soliqqa tortish boʻyicha har qanday tizimda ungagina xos boʻlgan koʻplab soliqlarni qonuniy kamaytirish imkoniyatlari mavjud. Buning ustiga soliqlarni kamaytirishning ushbu oʻziga xos usullarini soliqqa tortishning boshqa tizimlarida koʻpincha amalga oshirib boʻlmaydi. Soliq qonunchiligi

barcha mamlakatlarda takomillashib boradi. Takomillashuv deganda, avvalo soliqlarni toʻlashdan boʻyin tovlash imkoniyatlarini bartaraf etish tushuniladi.

Soliq inspeksiyalariga daromadlarni yashirishning bir qator usullari ma'lum:

- turli banklarda bir necha hisobvaraq ochish hamda buxgalteriya hisobida toʻliq aks etmagan hisob-kitob va pul operatsiyalarini ular orqali oʻtkazish;
 - trast, veksel va boshqa hisobvaraqlardan foydalanish;
- «ikki tomonlama buxgalteriya» yuritish, naqd pullar bilan ishlash va shu tariqa tushum va daromadlarni toʻlashdan yashirish;
- korxonani bir tumanda (shaharda) roʻyxatdan oʻtkazish, hisobvaraqlarni esa boshqa tuman yoki shaharlardagi banklarda ochish, roʻyxatdan oʻtgan joyda ham, xoʻjalik faoliyati yuritiladigan joyda ham soliq toʻlashdan boʻyin tovlash;
- mahsulot (xizmat, ish) realizatsiyasining qiymatini xarajatlarga kiritilmaydigan xarajatlar evaziga oshirib koʻrsatish;
- tomonlarning shartlashuviga koʻra, rasmiy hisob va toʻlov hujjatlarida bajarilgan ishlar (koʻrsatilgan xizmatlar) qiymatini kamaytirib koʻrsatish hamda haqiqiy hisob-kitobni (hisob hujjatlarida aks ettirmagan holda) naqd pullar bilan oʻtkazish.
- «Xufiyona» iqtisodiyot doirasida operatsiyalarning quyidagi turlarini ajratish mumkin:
- buxgalteriya hisobiga butunlay kiritilmaydigan (jumladan, ham oshkora, ham roʻyxatdan oʻtmagan xoʻjalik yurituvchi subyektlar tomonidan oʻtkaziladigan) operatsiyalar;
- boshqa operatsiyalar niqobi ostida oʻtkaziladigan muomalaning bir qismini yashirishga qaratilgan operatsiyalar. Bu yerda xoʻjalik faoliyati koʻpincha daromadni yashirish yoki soliq, boj va boshqa toʻlovlarni amalga oshirishdan qochish bilan kechadi.

Shu yerda xulosa oʻrnida soliqlar toʻlashda intizomning buzilishi jamiyatning iqtisodiy negizlariga putur yetkazadi, deb aytish lozim. Soliq qonunchiligining buzilishi mamlakatda amalga oshiriladigan ijtimoiy tadbirlarning me'yorda ishlashiga raxna soladi. Budjet kamomadini keltirib chiqaradi. Natijada egri soliqlar miqdori koʻpayadi. Mamlakatning ijtimoiy xavfsizligiga tahdid solinadi. Iqtisodiyotning notekis ishlashiga sabab boʻladi.

2. Xufiyona iqtisodiyotning turlari

Xufiyona iqtisodiyotni yuridik koʻrsatkichlar boʻyicha uning qonuniyligi, huquqiy normalarga munosabati nuqtai nazaridan tahlil qilish «jinoiy» va «jinoiy boʻlmagan» iqtisodiyotni ajratish imkonini beradi. «Jinoiy» iqtisodiyotda iqtisodiy faoliyatning oʻzi yashirilsa, «jinoiy boʻlmagan» iqtisodiyotda daromad yoki xarajatlar yashiriladi.

Jinoiy iqtisodiyotni gʻayriqonuniy ishlab chiqarish, xufiyona ishlab chiqarish va gʻarazli jinoyatlar tashkil qiladi. Gʻayriqonuniy ishlab chiqarishga qonunda toʻgʻridan-toʻgʻri taqiqlangan, biznes tarzida tashkil qilingan faoliyat turlari kiradi. «Xufiyona» (nooshkora) korxonalar ishlab chiqarish jarayonini nazarda tutadi, chunki ularning mahsulot va xizmatlari bozorda samarali talabga ega. Iqtisodiy faoliyatning bu turiga quyidagilar kiradi:

- qurol ishlab chiqarish va sotish;
- narkobiznes;
- odam savdosi;
- kontrabanda;
- qimor oʻyinlari;
- fohishalik va h.k.

Jinoiy iqtisodiyotni tadqiq etishda muayyan prinsiplar boʻyicha tashkil etilgan jinoiy biznes iqtisodiyoti va oshkora (legal) firmalar tarzida tashkil qilingan jinoiy korxonalarni farqlash maqsadga muvofiq. Uyushgan jinoyatchilikning faoliyati koʻp jihatdan taqiqlangan tovar va xizmatlar, asosan iste'mol xususiyatiga ega boʻlganlarni sotishga asoslangan. Ular ishlab chiqarishning nolegalligi sababi soliq toʻlashni istamasliklari, transaksiyalarning qimmatligi, xavfsizlik texnikasiga rioya etish xarajatlarining kattaligidir. Ayrim qora bozorlar «uyushgan» boshqalari esa uyushmagan hisoblanadi. Jinoiy biznes shakllaridan biri reket boʻlib, u qoʻrqitishga asoslangan hamda tovlamachilik va jinoiy monopoliya koʻrinishlarida namoyon boʻladigan biznes sifatida baholanadi. Tovlamachilik kimgadir kuch ishlatish yoki jinoiy raqobat bilan tahdid solib, uning biznesidan foydalanishni anglatadi. Jinoiy monopoliya raqobatni tugatish (raqobatchilarni yoʻq qilish yoki qoʻrqitish) uchun jinoiy vositalardan foydalanishdir.

Jinoiy korxonalar tashkil qilish va ularning faoliyat yuritishiga kelganda, ushbu jarayonlarning eng koʻp tarqalgan sabablari quyidagilardan iborat: kichik biznes yuritishga imkon bermaydigan texnologik xarajatlarning kattaligi; monopol narxlarni nihoyatda oshirish imkoniyati-

ning borligi (nooshkora tovar va xizmatlarga talab elastik emas, shu bois ishlab chiqarish kamaysa ham, narx oshirilganida foyda koʻpayadi); firma va ayniqsa, uning bozordagi ulushi qanchalik katta boʻlsa, uning «tashqi xarajatlari» (lobbilash, huquqni muhofaza qilish organlari bilan aloqalar oʻrnatish va sh.k.) shunchalik katta boʻladi.

Xufiyona ishlab chiqarish odatda qonunda ruxsat etilgan, ammo huquqi boʻlmagan ishlab chiqaruvchilar tomonidan amalga oshirilganida, noqonuniy boʻladigan faoliyat turlarini (diplomi boʻlmagan shifokorlar, oʻqituvchilarning xizmatlari) qamrab oladi yoxud qonuniy boʻladi va bunga huquqi boʻlgan, lekin soliq, ijtimoiy jamgʻarmalarga badallar va shu kabilarni toʻlashdan boʻyin tovlash maqsadida davlat organlaridan yashirinib yurgan ishlab chiqaruvchilar tomonidan amalga oshiriladi.

Iqtisodiyotning «norasmiy» sektori odatda qonuniy asosda faoliyat koʻrsatuvchi tarqoq korxonalar (masalan, oʻz kuchi bilan amalga oshiriladigan yakka tartibdagi qurilish ishlari) hamda «norasmiy bandlik» korxonalari, ya'ni ish beruvchi bilan yollangan xodim oʻrtasidagi munosabatlar biror shartnoma yoki boshqa yuridik hujjatlar bilan mustahkamlanmagan korxonalarni birlashtiradi. Bunda gap, birinchi navbatda, fuqarolarga ular uchun qiyin boʻlgan iqtisodiy sharoitlarda yashab qolishlariga imkon beruvchi ikkilamchi bandlik sohasi haqida boradi. Koʻpchilik rasmiylashtirmagan holda bir qancha joylarda oʻrindoshlik asosida ishlaydilar. Bunda qoʻshimcha ish haqidan soliq toʻlanmaydi. Ushbu holda «norasmiy» iqtisodiyot subyektlar oʻrtasidagi norasmiy aloqalar majmui sifatida ham talqin etiladi.

Iqtisodiy faoliyat natijalarining xususiyatiga koʻra, ham an'anaviy tovar va xizmatlar ishlab chiqarishni, ham shaxsning tanazzuliga olib keladigan buzgʻunchi ehtiyojlarni qondiruvchi tovar va xizmatlarni ishlab chiqarishni oʻz ichiga oladigan mahsuldor xufiyona iqtisodiyot hamda rasmiy iqtisodiyot doirasida daromadlar yoki aktivlarni noqonuniy taqsimlashda ifodalanadigan nomahsuldor (soxta) iqtisodiyot ajratiladi. «Soxta» iqtisodiyot doirasida daromadlar qoʻshib yozish, talon-torojlik, poraxoʻrlik, firibgarlik, xaridorlarni aldash, sifatsiz mahsulot chiqarish kabilar natijasida ortib boradi. «Soxta» iqtisodiyot subyektlarning shakllanayotgan iqtisodiy norasmiy aloqalari tizimidagi alohida mavqei bilan bogʻliq foyda izlashi, «renta» olishi bilan chambarchas bogʻliq. Har qanday iqtisodiyotda boʻladigan tabiiy renta bilan bir qatorda quyidagi omillar bilan bogʻliq boʻlgan sun'iy tashkil qilingan rentalarning koʻplab guruhlari paydo boʻladi:

- korxonalarning muayyan guruhi uchun asossiz ravishda alohida (imtiyozli) faoliyat rejimini ta'minlash;
- turli xoʻjalik yurituvchi subyektlarning xususiylashtirish jarayonida noqonuniy shartlar asosida ishtirok etishi;
- mulkchilik munosabatlarining huquqiy va iqtisodiy jihatdan tartibga solinmaganligi;
- siyosiy va byurokratik tuzilmalarning moddiy ne'matlar, daromadlar, mulkni taqsimlashga doir qarorlarning qabul qilinishiga ta'sir koʻrsatish huquqi.

Xoʻjalik yuritish subyektlari oʻzaro munosabatlarining xususiyatiga koʻra, xufiyona iqtisodiy munosabatlarning bir necha guruhi ajratiladi: individ – tashkilot, individ – davlat, tashkilot – tashkilot, tashkilot – davlat, individ – individ.

Rasmiy iqtisodiyotga munosabati boʻyicha «xufiyona» iqtisodiyotni quyidagi mezonlar boʻyicha tahlil qilish mumkin:

1-jadval **Xufiyona iqtisodiyotni tiplashtirish mezonlari**

Asosiy belgilari	«Ikkilamchi xufiyona» iqtisodiyot	«Jinoiy boʻlmagan» iqtisodiyot	«Jinoiy» iqtisodiyot
Subyektlar	Iqtisodiyotning rasmiy sektoridagi menejerlar	Norasmiy ravishda ish bilan band	Professional jinoyatchilar
Obyektlar	Ishlab chiqarmay turib daromadlarni qayta taqsimlash	Odatdagi tovar va xizmatlarni ishlab chiqarish	Taqiqlangan va taqchil tovar va xizmatlar ishlab chiqarish
«Oq» iqtisodiyot bilan aloqasi	Rasmiy iqtisodiyotdan ajralmagan	Nisbiy mustaqillik	Rasmiy iqtisodiyotga nisbatan mustaqil

Xufiyona iqtisodiyotni tahlil qilishda ijtimoiy ishlab chiqarish bosqichlaridek mezonni kiritish maqsadga muvofiq boʻladi. Odatda, xufiyona ishlab chiqarish (noqonuniy, hisobga olinmagan, yashirin, mayda ishlab chiqaruvchilarning ishlab chiqarishi, sifatsiz mahsulot chiqarish, ishlab chiqarish resurslaridan notoʻgʻri foydalanish va boshqalar); xufiyona taqsimot (daromadlarni noqonuniy taqsimlash, maxsus taqsimot, davlat mulkini talon-toroj qilish, fuqarolarning shaxsiy

mulkiga qarshi jinoyatlar va h.k.); xufiyona ayirboshlash (gʻayriqonuniy savdo, xaridorlarni aldash, noqonuniy ishlab chiqarilgan mahsulotni sotish va boshqalar); xufiyona iste'mol (gʻayriijtimoiy ehtiyojlarni qondirish, noqonuniy yoʻl bilan topilgan mulkni iste'mol qilish, xizmatlardan noqonuniy foydalanish kabilar) ajratiladi.

Bozorlar turlariga koʻra, xufiyona jarayonlar iste'mol buyumlari, ishlab chiqarish vositalari, ish kuchi va ish joylari, axborot va texnologiyalar, kapital kabilar bozorida amalga oshiriladi. Tarmoq belgisiga koʻra, xufiyona iqtisodiyot sanoat, qishloq xoʻjaligi, qurilish, savdo iqtisodiyoti kabilarga ajratiladi. Masalan, savdo sohasida — qalbaki (kontrafakt) mahsulot sotish, kontrabanda, bojxona organlari bilan til biriktirish kabilar ajratiladi; moliya-kredit sohasida — moliyaviy piramidalar, «iflos» pullarni yuvish, turli xil notijorat jamgʻarmalari homiyligidagi moliyaviy nayranglar va shu kabilar; xizmat koʻrsatish sohasida — bir kunlik firmalar faoliyati, ta'lim sohasidagi poraxoʻrlik, kurs va diplom ishlarini pulga yozib berish va boshqalar.

Yana bir mezon — yuridik maqom boʻlib, u iqtisodiy subyektlarni roʻyxatdan oʻtgan, ya'ni rasmiy roʻyxatga kirgan, ammo xufiyona korxonasi boʻlgan hamda roʻyxatdan oʻtmagan iqtisodiy subyektlarni ajratishga imkon beradi. Roʻyxatdan oʻtmagan iqtisodiy subyektlarga quyidagilar kiradi: tovar ishlab chiqaradigan yoki uy xoʻjaliklari va korxonalarga naqd pul yoki natura evaziga xizmat koʻrsatadigan, ammo tadbirkorlar sifatida roʻyxatdan oʻtmagan jismoniy shaxslar; aholiga pulli uy va boshqa (uy yigʻishtirish, kir yuvish, repetitorlik qilish kabi) xizmatlar koʻrsatadigan shaxslar; qonuniy tovar va xizmatlar ishlab chiqaradigan, biroq hisobdan oʻtmagan va aslida bevosita statistik kuzatuvni amalga oshirib boʻlmaydigan xufiyona korxonalar.

Xufiyona iqtisodiyotni mikro (korxona, muassasa, tashkilotda), *mezo* (tarmoq boʻyicha), *makro* (milliy iqtisodiyot doirasida) va *mega* (xalqaro, jahon iqtisodiyoti) darajalarida koʻrib chiqish mumkin.

Jahon xufiyona iqtisodiyotida bank va korporativ sohalardagi moliyaviy iqtisodiy jinoyatlar, narkobiznes, fohishalik, «tirik tovar bilan» savdo qilish, pornobiznes, noqonuniy qurol savdosi, «iflos pullarni yuvish», korrupsiya yetakchilik qiladi. Masalan, XX asr oxirida xalqaro hamjamiyat «global muammo» deb atagan korrupsiyadek murakkab va jiddiy muammo xalqaro uchrashuvlarda muhokama mavzuini tashkil qildi.

Korrupsiya: 1) davlat tuzilmalarining iqtisodiyot sohasidagi jinoiy dunyo tuzilmalari bilan qoʻshilib ketishi, shuningdek jamoat arboblari va siyosiy arboblarning sotilishi; 2) mansabdor shaxslar, siyosiy va jamoat arboblarining xizmat faoliyati bilan bogʻliq huquqlaridan davlat va jamiyatga, shuningdek alohida shaxslarga ziyon yetkazgan holda shaxsiy boyish maqsadida foydalanishlaridan iborat jinoyatlarning umumiy nomi.

Poraxoʻrlik xalqaro amaliyotda odatda yashirin xususiyatga ega boʻladi. Pora olganlik faktini isbotlash nihoyatda qiyin. Poraxoʻrlik usullaridan biri – turli maslahatchilar, agentlar, vositachilar, shuningdek xorijdagi rasmiy shaxslar xizmatlari uchun haq toʻlash. Ayrim mamlakatlar pora beruvchi uchun daromad yoki foyda olish maqsadiga ega boʻlgan har qanday pora berish hollarini, boshqalari esa – xoʻrak vazifasini faqat pul yoki mulk bajargan hollarni poraxoʻrlikka kiritadilar.

«Xalqaro savdo va investitsiyalar boʻyicha ishlab chiqilayotgan standartlar» (AQSh) — tadqiqotlarga koʻra, poralarning har xil turlari quyidagicha tasniflanadi:

- mansabdor shaxslar tovlamachilar xizmati uchun haq toʻlash;
- hukumat, davlatning oliy mansabdor shaxslarining «koʻnglini topish» va kelajakda qulay sharoit yaratish haqidagi va'dasini olish maqsadida ularga toʻlovlar berish;
- amaldorlarga (milliy yoki xorijiy) firma uchun zarur boʻlgan qaror qabul qilinishiga koʻmaklashishi, bitim yoki buyurtmaning ma'qullashiga erishish maqsadida pul berish.

Pora har xil shakllarda beriladi: naqd pul bilan, bilvosita toʻlovlar, partiyalar jamgʻarmalariga badallar toʻlash tarzida va h.k.

Poraxoʻrlikning asosiy motivlariga quyidagilar kiradi:

- aks holda boshlanishi mumkin boʻlmagan biznesning boshlanishini ta'minlash;
 - boʻlgʻusi korxonaning raqobatchilarini tugatish;
- firmalar olishga haqli boʻlgan, ammo amaldorning injiqligi tufayli oʻz vaqtida ololmagan davlat xizmatlaridan foydalanishni osonlashtirish;
 - soliq toʻlovlari boʻyicha qarzlarni kamaytirish;
 - tartibga solinadigan narxlarni oshirishga ruxsat olish;
- majburiy tarzda pora berish (masalan, oʻz xodimlarining xavfsizligini ta'minlash uchun).

Korrupsiyaning rivojlanishiga sharoit yaratuvchi sabablar sifatida odatda quyidagilar keltiriladi:

- qonunlarning nomukammalligi;
- jamoat hayotining byurokratlashuvi, amaldorlarning koʻpayib ketishi;

- tadbirkorlikning tashkiliy jihatdan qiyinlashuvi, vositachilarning koʻpayishi;
 - tadbirkorlarda bozor madaniyatining yoʻqligi;
- xoʻjalik yuritish usullariga qoʻyiladigan qonuniy talablar standartlarining oʻzgarishi;
- eng oddiy axloqiy qoidalarning yoʻqligi yoki ularga amal qilinmasligi.

Har qanday tadbirkorlik faoliyati muntazam ravishda foyda olish maqsadini koʻzlaydi. Noqonuniy tadbirkorlik faoliyati sohasida daromadlarni legallashtirish, ya'ni aksariyat mamlakatlarda oʻz-oʻzicha jinoyat hisoblanadigan qilmish muhim hisoblanadi. «Iflos» pullarni yuvish yoki, ba'zan huquqshunoslar aytganlaridek, «jinoiy yoʻl bilan olingan daromadlarni oshkoralashtirish» — noqonuniy biznes (fohishalik, qurol yoki narkotiklar savdosi)dan keladigan daromadni yoki oddiygina soliq toʻlanmagan daromadlarni «pok pullarga», ya'ni halol yoʻl bilan topilgan deb tasavvur qilish mumkin boʻlgan pullarga aylantirish — dunyodagi biznesning eng yirik turlaridan biri hisoblanadi. Yuridik adabiyotlarda «pullarni yuvish» quyidagicha ta'riflanadi:

- manbai jiddiy jinoyat ekanligini bila turib, mulkning noqonuniy kelib chiqqanligini yashirish yoki niqoblash maqsadida uni tashqi tomondan oʻzgartirish yoki transformatsiya qilish (shaklini oʻzgartirish);
- jinoyat yoki jinoyatlar sodir etilishiga aloqador boʻlgan har qanday shaxsga faoliyatining qonuniy oqibatlaridan boʻyin tovlashida koʻmaklashish;
- jiddiy jinoyat obyekti ekanligi ma'lum bo'lgan qandaydir mulkning haqiqiy tabiati, manbai, joylashgan yeri, xususiyati, mulkka yoki unga egalikka aloqasi bo'lgan huquqlarning ko'chishini yashirish yoki niqoblash.

«Iflos» pullarni yuvish amaliyotini tahlil qilishning koʻrsatishicha, oxirgi vaqtlarda haqiqatan yangi usullar paydo boʻlmadi, yangi usullar yoʻq boʻlgani holda, mavjudlarida nisbiy oʻzgarishlar boʻlishda davom etmoqda. Shu jihatdan bank sohasi eng katta xavf zonasi boʻlib qolmoqda, chunki pullarni yuvishning eng aniq usullari u bilan bogʻliq:

- keyinchalik xorijdagi boshqa shaxsga oʻtkazish maqsadida katta miqdordagi pul summalarini bankdagi hisobvaraqlarda deponentlashtirish;
- qarindoshlar, yordamchilar va boshqa shaxslarga hisobvaraqlar ochish;
- pullarni hisobvaraqdan hisobvaraqqa ketma-ket koʻchirish zanjiridan foydalanish;

– boshqa yurisdiksiyada (masalan, ofshor zonalarda) inkorporatsiyalangan soxta kompaniyalardan foydalanish va boshqa koʻplab usullar.

Yuridik taqiqning oʻziga xos sharoitlarida narkobiznes — notibbiy maqsadda ishlatiladigan psixofaol vositalarni ishlab chiqarish va tarqatish turadi. Narkobiznesning jahondagi miqyosi allaqachon u haqda iqtisodiyotning alohida tarmogʻi sifatida soʻz yuritishga imkon beradi. Unda mulkchilik munosabatlari, talab va taklifni shakllantirish mexanizmi, narx hosil boʻlishi va foyda, transaksiyaviy xarajatlar, institutsiyaviy tashkilot kabilar mavjud.

Narkobiznesda qonunga qarshi doimiy urush olib borish strategiyasi ancha yaqin integratsiyani, shuningdek katta miqdordagi resurslar jamlanadigan hamda ulardan rejali va muvofiqlashgan tarzda (ayniqsa, katta operatsiyalar amalga oshirilganda) foydalanish imkoniyati paydo boʻladigan korporatsiya va kartellardan iborat yirik iqtisodiy birlashmalar tashkil qilishni talab etadi. Bunday birlashmalar narkotik ishlab chiqarish uchun emas, balki yuridik jihatdan taqiqlangan sharoitda narkotiklarni ishlab chiqarish, sotish va iste'mol qilish imkoniyatining o'zini ishlab kerak. Narkobiznesning umumtarmoq chigarish uchun narkotiklar ishlab chiqarishning oʻzi uncha katta oʻrin egallamasligi bozor narxlarining tarkibini koʻrib chiqishda yaxshi koʻrinadi: narkotiklar ishlab chiqarishga bevosita jalb etilgan omillar (yer, mehnat, kapital, tadbirkorlik harakatlari) juda arzon, uni ishlab chiqaruvchi mamlakatning ulgurji narxlari uncha qimmat bo'lmagan dorilar narxi darajasidadir. Iste'molchi mamlakatdagi chakana narxlar esa o'nlab -marta yuqoridir. Narkotiklarning chakana narxi taqiqlangan tovar harakatining har bir bosqichidagi operatorlar sarflaydigan yoki sarflash tavakkali boʻlgan haqiqiy xarajatlarni qoplaydi. Xatar qanchalik yuqori bo'lsa, bozor operatsiyalarining xavfsizligini ta'minlash xarajatlari, operatorlarning mulkchilik huquqini saqlab qolish xarajatlari (transaksiyaviy xarajatlar) shunchalik katta boʻladi.

Narkobiznes tarmoq tuzilishining tipiga koʻra tabiiy monopoliyani eslatadi. Taqiqlangan sharoitda narkotiklarni barqaror va ishonchli tarzda yetkazib berish keng tarmoq otgan infratuzilmani yaratish va faoliyatini ta'minlashga doimiy ravishda katta xarajatlar sarflashni talab qiladi. Yoʻlga qoʻyilgan kanallar boʻyicha narkotiklarning qoʻshimcha birliklarini yetkazib berish bilan bogʻliq eng katta xarajatlar nisbatan kam. Nihoyatda katta doimiy xarajatlar boʻlayotganida nisbatan kichik chegaraviy xarajatlar tarmoqning raqobat qiluvchi kompaniyalarga boʻlinishi iqtisodiy jihatdan samarasiz ekanligini aniq koʻrsatib turadi.

«Narkopullarni» eng koʻp miqyosda iqtisodiyotning katta daromad keltiruvchi legal sohalariga, masalan, qurilish biznesi yoki neft qazib olish va tashishga, birja spekulyatsiyalariga investitsiya tarzida kiritish maqsadga muvofiq hisoblanadi.

Shunday qilib, koʻrib chiqilgan tasnifiy mezonlar xufiyona iqtisodiyotni kompleks oʻrganish imkonini beradi. Bunda xufiyona iqtisodiyot umumiy holda ham, alohida tarkibiy qismlari boʻyicha ham tahlil qilinishi mumkin. Bu esa aniq tadqiqotning maqsadlariga bogʻliq.

Huquqni muhofaza qiluvchi organlar xodimlari xufiyona iqtisodiyotning murakkab, koʻp bosqichli hodisa ekanligini bilishlari shart. Uning tur va shakllari xilma-xil. Xufiyona iqtisodiyotning maqsadi, faoliyati va iqtisodiy-ijtimoiy oqibatlariga koʻra, yuqoridagilardan kelib chiqib quyidagi bir necha turlarining ta'rifini keltiramiz:

Jinoiy-iqtisodiy faoliyat. Bu mutlaqo man etilgan, qonun yoʻli bilan taqiqlangan ishlar bilan shugʻullanish. Masalan, narkobiznes, pornobiznes, qurol-yarogʻ biznesi va h.k.

Gʻayriqonuniy, gʻayriiqtisodiy usullar bilan daromadlarni qayta taqsimlab, oʻzlashtirib olish, masalan, oʻgʻrilik, bosqinchilik, reket, poraxoʻrlik.

Ikkilamchi iqtisodiyot – kishilarga zarar keltirmaydigan, ular uchun naf beradigan, lekin rasman ruxsat berilmagan va davlat roʻyxatidan oʻtmagan iqtisodiy faoliyat. Ular yashirin tadbirkorlik hisoblanadi.

Rasman ruxsat etilgan faoliyat bilan birga, qoʻshimcha ravishda yashirin ishlab chiqarishga qoʻl urish, ochiq ishlaydigan korxonalarda qoʻshimcha ravishda hisobga kirmagan mahsulot chiqarib, uni yashirin sotish.

Mansabni suiiste'mol qilish va korrupsiyaga asoslangan iqtisodiy xatti-harakatlar. Bular jumlasiga davlat idoralaridagi yashirin poraxoʻrlik, yashirin lobbizm, mansabdan foydalanib subsidiyalar olishni kiritish mumkin.

Qalbakilashtirilgan iqtisodiy faoliyat. Bu iqtisodiyot davlat sektoriga xos boʻlib, davlatni aldashga qaratiladi. Buning eng yaqqol namunasi davlat sektoridagi qoʻshib yozishlar, qilinmagan ishlar uchun davlatdan haq olish va boshqalar.

3. Xufiyona iqtisodiyot oqibatlarining statistikasi

«Xufiyona» jarayonlar dinamikasining omillari, ularning miqyosi va ularni oʻlchash usullari. Xufiyona iqtisodiyot rivojlanishining tamoyillari milliy iqtisodiyotda uning rivojlanishi va faoliyat koʻrsatishining har bir aniq tarixiy davrida yuz beradigan jarayonlar bilan bogʻliq. Xufiyona iqtisodiyot miqyosi va dinamikasini belgilovchi omillarning quyidagi guruhlarini ajratib koʻrsatish mumkin.

Antropologik omillar: insonning ziddiyatli tabiati, ezgulik va yovuzlikning doimiy kurashi, insonning kam kuch sarflab koʻproq foyda olishga intilishi va sh.k.

Iqtisodiy omillar: tadbirkorlik faoliyatining yuqori darajadagi transaksiyaviy xarajatlari («qonunga boʻysunish bahosi»), bozor xoʻjaligi doirasidagi raqobat, iqtisodiyotning turli sektorlarining notekis rivojlanishi, inflatsiya, almashuv kurslarining keskin oʻzgarib turishi, soliqqa tortish tizimi va boshqalar.

Ijtimoiy omillar: jamiyatning ijtimoiy tabaqalashuvi, «xavf guruhla-ri»ning mavjudligi, mehnat qonunchiligining buzilishi, muhojir ishchilar, ayollar va oʻsmirlar mehnatidan foydalanishda ijtimoiy adolat prinsiplariga rioya etilmasligi va h.k.

Huquqiy omillar: tadbirkorlikning huquqiy asosi nomukammalligi, bozor xoʻjaligining oʻzgarib boruvchi shart-sharoitlari bilan mavjud qonunchilik bazasi oʻrtasida ziddiyat mavjudligi, uy xoʻjaligining tartibga solinmasligi va sh.k.

Axloqiy omillar: qonunchilik hamda tadbirkorlikning axloqiy asoslari oʻrtasidagi ziddiyatlar, davlat va jamiyat, davlat va individ manfaatlari oʻrtasidagi ziddiyatlar; milliy an'analarning hisobga olinmasligi, diniy qoidalarning ta'siri va boshqalar.

Siyosiy omillar: hokimiyat va yirik kapital oʻrtasidagi oʻzaro munosabatlar, oligarxiyaning shakllanishi, hokimiyat kuchi hamda iqtisodiy faoliyatga ta'sir koʻrsatishning kuchga asoslangan usullari oʻrtasidagi nisbat. Iqtisodiyotni rivojlantirishning obyektiv ehtiyojlari va davlat siyosati oʻrtasidagi ziddiyat va sh.k.

YAIMga oʻxshatma tarzda yalpi jinoiy mahsulot (YaJM) termini ham paydo boʻldi. XVFning bahosiga koʻra, 2004-yilda uning miqdori taxminan 800 mlrd. dollarni tashkil qildi. Mutaxassislarning fikriga koʻra, «yuvilgan» kapitalning miqdori bugun shunchalik kattaki, nafaqat koʻplab mamlakatlar iqtisodiyotiga, balki xalqaro moliyaviy tizimning barqarorligiga ham xavf solmoqda.

«Xufiyona» iqtisodiy faoliyat u yoki bu daraja va shaklda har qanday mamlakatda ham mavjud, ammo uning YAIMdagi ulushi har bir mamlakatda oʻzgacha boʻlib, bu bir qator iqtisodiy, siyosiy, ijtimoiy va boshqa omillar bilan bogʻliqdir. Mamlakat YAIMda «xufiyona» iqtisodiyotning ulushini aniqlash maqsadidagi yondashuvlar ham mavjud. Bunda «xufiyona» iqtisodiyot miqyosi quyidagi tartibda baholanadi:

- a) turli iqtisodiy tizimlarga mansub mamlakatlarda (rivojlangan mamlakatlar, rivojlanayotgan mamlakatlar va oʻtish davri iqtisodiyotidagi mamlakatlar);
- b) turli qit'alardagi rivojlanayotgan mamlakatlarda (Afrika, Osiyo va Lotin Amerikasi);
- c) mamlakatlarning mazkur guruhlarida turli davrlardagi ma'lumotlar boʻyicha (masalan, 1990–1995-y., 1995–2000-y., 2000–2005-y., 2005–2010-y).

Rivojlangan mamlakatlarda xufiyona iqtisodiyot miqyoslarini baholash uchun an'anaga koʻra usullarning quyidagi guruhlaridan foydalaniladi:

- 1) oʻziga xos koʻrsatkichlar usuli, ular orasida bevosita usullar (soliq toʻlovchilarning ayrim guruhlari daromadlari va xarajatlari oʻrtasidagi farqni aniqlash maqsadida oʻtkaziladigan maxsus tadqiqotlar, soʻrovlar, tekshiruvlar va ularni tahlil qilish va boshqalar) hamda bilvosita usullar (farqlash usuli, bandlik koʻrsatkichi boʻyicha usul, monetar usullar);
- 2) «yumshoq» modellashtirish (determinantlarni baholash) usuli «xufiyona» iqtisodiyotni belgilovchi omillar majmuini ajratish hamda uning nisbiy hajmlarini hisoblash;
- 3) tarkibiy usul ishlab chiqarishning turli tarmoqlaridagi «xufiyona» iqtisodiyot miqdoriga doir ma'lumotlardan foydalanish;
- 4) aralash usullar «xufiyona» iqtisodiyot determinantlarining ham, koʻrsatkichlarining, ya'ni uning hajmiga bogʻliq kattaliklarning ham katta miqdorini inobatga oluvchi modelini yasash;
- 5) makroiqtisodiy koʻrsatkichlarni integral baholash xufiyona iqtisodiyotni noaniq koʻrinishda baholash;
- 6) «xufiyona» iqtisodiyotning oʻzini va ayrim unsurlarini rasmiy statistika koʻrsatkichlariga qoʻshimcha turli hisob-kitoblar koʻrinishida baholash.

Sharqiy Yevropa mamlakatlarida aksariyat hollarda hisobga olinmaydigan xususiy va yakka tartibdagi faoliyat sifatida baholanadigan «xufiyona» iqtisodiyot hajmini aniqlash uchun quyidagi usullar qoʻllaniladi:

- matbuot, jinoyatlarga oid statistika, sud materiallari va shu kabilarni sinchiklab oʻrganishga asoslanadigan ikkilamchi axborot manbalarini oʻrganish;
 - bevosita usullar (tekshiruvlar, soliq auditi va boshqalar);

- umumlashgan bilvosita usullar (statistik farqlash usuli, monetar usullar va sh.k.);
- tarkibiy usul (ishlab chiqarilgan va iste'mol qilingan milliy daromad, eksport va import o'rtasidagi statistik farqlarni aniqlash usuli va boshq.);
 - aralash usullar.

Xufiyona faoliyatni baholashda Rossiyada qoʻllangan quyidagi usullar majmuidan foydalanilganini keltirish mumkin:

- 1) bevosita usullar;
- 2) farqlash usuli;
- 3) bandlik koʻrsatkichi boʻyicha aniqlash usuli;
- 4) makroiqtisodiy koʻrsatkichlarni hisoblash;
- 5) monetar usullarning ayrim unsurlari.

«Xufiyona» iqtisodiyotni bevosita usullar bilan baholash uchun taklif etiladigan koʻrsatkichlar umumlashtiruvchi va juz'iy (xususiy) koʻrsatkichlarni oʻz ichiga oladi. Umumlashtiruvchi koʻrsatkichlar guruhiga umuman milliy iqtisodiyot xufiyona sektorining turli usullar bilan hisoblangan mutlaq va nisbiy hajmini aks ettiruvchi koʻrsatkichlar kiradi. Juz'iy usullariga xufiyona faoliyatning ayrim tomonlarini ifodalovchi koʻrsatkichlar kiritiladi: daromadlarni yashirish; resurslardan nooqilona foydalanish; kamomadlar, talon-torojliklar va boyliklarni buzishning umumiy summasi; davlat nazorati organlari tomonidan oʻtkaziladigan tekshiruv va tadqiqotlar davomida aniqlangan zararning umumiy qiymati; soliq tekshiruvlari boʻyicha boqimandalar; tuzatishlar kiritilgan boj qiymati boʻyicha bojlar va boshqalar.

Farqlash usuli ikki yoki undan ortiq ma'lumotlar manbalari yoki statistik hujjatlarni qiyoslashga asoslanadi. Ma'lumotlar manbalari ham, statistik hujjatlar ham ayni bir iqtisodiy koʻrsatkichlar haqidagi axborotdan iborat yoki ayni bir ma'lumotlardan axborot olish uchun turli usullar qoʻllaniladi, deb hisoblanadi. Masalan, xufiyona iqtisodiyot aylanmasi quyidagi usullar bilan hisoblanishi mumkin: 1) aholining iste'mol xarajatlari bilan rasman inobatga olinadigan tovar va xizmatlar aylanmasi (muomalasi) oʻrtasidagi farq; 2) aholining iste'mol xarajatlari bilan tovar va xizmatlar, jumladan sotishning barcha kanallari orqali amalga oshiriladigan tovar aylanmasi (muomalasi) oʻrtasidagi farq.

Bandlik koʻrsatkichi boʻyicha aniqlash usuli quyidagicha tadqiqot oʻtkazish imkonini beradi:

 hisob-kitob asosida bandlikning amaldagi va rasman qayd etilgan darajasi oʻrtasidagi farq yotadi; hisob-kitob asosida amalda ishlangan va rasman qayd etilgan vaqt oʻrtasidagi farq yotadi.

Birinchi holda bandlikning haqiqiy darajasi oʻzini ish bilan ta'minlash qoʻshimcha bandlikni inobatga olgan holda uy xoʻjaliklarini tanlab tekshirish ma'lumotlari boʻyicha baholanadi, bu esa amalda ish bilan band boʻlganlar, jumladan oʻrindoshlar sonini aniqlashga imkon beradi. Bandlarning rasman aniqlangan miqdori bilan tanlab oʻtkazilgan tekshiruvlar natijasida olingan koʻrsatkichlar, muayyan xatolar bilan «xufiyona» iqtisodiyotda band boʻlganlar sonini koʻrsatadi. «Xufiyona» iqtisodiyotda band boʻlganlar hamda iqtisodiyot boʻyicha oʻrtacha mehnat unumdorligining koʻpaytmasi norasmiy iqtisodiyotdagi xufiyona iqtisodiy faoliyat miqdorini aks ettiradi.

Makroiqtisodiy koʻrsatkichlarni (batamom) hisoblash bilvosita ma'lumotlar va ekspertlar baholarini qoʻllashga asoslanadi. Hisob-kitoblarni xufiyona faoliyatning ta'siri kuchli boʻlishi taxmin qilinadigan koʻrsatkichlar boʻyicha oʻtkazish maqsadga muvofiq: kichik korxonalar, tovar aylanishi, yakka tartibdagi qurilish, yakka ishlab chiqaruvchilar koʻrsatadigan bozor xizmatlari boʻyicha ma'lumotlarning toʻliq doirasiga-cha hisoblashlar. Masalan, yakka ishlab chiqaruvchilar koʻrsatadigan bozor xizmatlari boʻyicha batamom hisoblash soliq inspeksiyasining ma'lumotlari va quyidagi bilvosita koʻrsatkichlar boʻyicha amalga oshiriladi: xususiy taksi sifatida foydalaniladigan avtomobillar soni; xususiy amaliyot bilan shugʻullanuvchi shifokorlar, huquqshunoslar soni va h.k.

Monetar usuldan foydalanish quyidagi taxminlarga asoslanadi: 1) xufiyona bitimlar asosan naqd pullar yordamida amalga oshiriladi; 2) pulning muomala tezligi rasmiy va «xufiyona» iqtisodiyotda taxminan bir xil; 3) naqd pul mablagʻlarining miqdori daromadlar, soliqlar, foiz stavkalari o'zgarishi natijasida ham «xufiyona» iqtisodiyotning amal qilishi oqibati ham oʻzgarib turadi. U (xufiyona iqtisodiyot boʻlsa kerak) hisobga olinmagan omillar hisoblanadi. Shu bois, umumiy pul massasida naqd mablag'lar ulushining korrelyatsion-regressiv modellarini qurish koʻrsatkichining oʻzgarishida «xufiyona» natijalar igtisodiyotning ulushini aniqlashga imkon beradi. «Xufiyona» iqtisodiyotning mutlaq hajmini monetar usul bo'yicha aniqlash naqd pullar va omonatlar nisbati «normal» boʻlgan, ya'ni «xufiyona» iqtisodiyot boʻlmagan bazaviy davrni aniqlashning qiyinligi tufayli murakkablashadi; turli vaqt oraliqlarida (hatto bazaviy davr shartli aniqlanganida ham) iqtisodiyotning ahvoli haqidagi ma'lumotlarni qiyoslab bo'lmasligi.

Qoʻllaniladigan usullarning xilma-xilligi xufiyona iqtisodiy tuzilmalar o'lchamlarini miqdoriy baholashning yagona usuli, ma'lumotlarning ishonchlilik mezonlari yoʻqligidan dalolat beradi. Bir qator mamlakatlarda «xufiyona» iqtisodiyotning oʻlchamlariga doir turli usullar bilan olingan ma'lumotlar nihoyatda ziddiyatli bo'lib, YAIMning 1 foizdan 33 foizgacha o'zgarib turadi. Hisob-kitoblar natijasining ko'rsatishicha, bevosita usullar past koʻrsatkichlar beradi; bilvosita usullar, shuningdek yashirin oʻzgaruvchilar, «yumshoq» modellashtirish usullari, tarkibiy usul esa yuqori koʻrsatkichlarni beradi. Bevosita usullarning asosiy kamchiligi – ma'lumotlarni to'plashning qiyinligi va aholi oʻrtasida soʻrov oʻtkazish natijasida olingan axborotning atayin buzilishi. Bilvosita usullar nihoyatda xilma-xildir; ularning asosida yotgan gipotezalar shartli bo'ladi; statistik axborot yetishmovchiligi sababli qo'llash qiyin kechadi. Shunday qilib, «xufiyona» iqtisodiyotni tadqiq etishdan koʻzlangan maqsad har bir aniq vaziyatda aynan shu vaziyatga mos keladigan usul yoki bir qancha usullar majmuini tanlashni taqozo etadi.

Xufiyona iqtisodiyot miqyosi yashirin iqtisodiy aylanmani, ya'ni ruxsat etilmagan tovar va xizmatlarni yaratish va ularni sotish hajmi bilan belgilanadi, uning aniq hisob-kitobi boʻlmaydi. Buning oʻrniga uni taxminan baholash usuli qoʻllaniladi. Ayrim hisob-kitoblarga koʻra, oʻtgan asrning oxirlarida Yer yuzidagi yashirin iqtisodiy aylanma 8 trln. dollarga yoki jahon yalpi mahsulotining 27,5 foizga teng boʻlgan, biroq xufiyona iqtisodiyot miqyosi turli mamlakatlarda farqlanadi. Xufiyona iqtisodiyot eng rivojlangan mamlakatlarga Lotin Amerikasi va Afrika mamlakatlari kiradi.

Oʻzbekiston Respublikasi Bosh prokuraturasi huzuridagi Soliq va valutaga oid jinoyatlarga va jinoiy daromadlarni legallashtirishga qarshi kurashish departamenti tomonidan 2008-yilda oʻtkazilgan tezkor tahliliy tadbirlar natijasida 4430 ta jinoiy va 1109 ta ma'muriy huquqbuzarlik holatlari aniqlandi. Natijada budjetga 191 mlrd. soʻm qoʻshimcha mablagʻning hisoblanishi va 79,6 mlrd. soʻm undirilishi ta'minlandi. Jumladan, «xufiyona» iqtisodiyotga qarshi kurashish natijasida 669 ta yashirish ishlab chiqarish faoliyati toʻxtatildi. Huquqbuzarlardan 701,4 mln. soʻmlik mahsulot, xom ashyo va uskunalar olib qoʻyildi. Naqd pullarning bankdan tashqari noqonuniy aylanmasiga barham berish boʻyicha 1250 ta jinoyat ishi qoʻzgʻatilib, 361 mlrd. noqonuniy pul aylanmasi aniqlandi. Tovarlarning noqonuniy importi yuzasidan 893 ta qonun buzilishi holatlari aniqlanib, 9 mlrd. soʻmlik tovarlar olib qoʻyildi. Etil spirti, alkogolli va tamaki mahsulotlarini noqonuniy muomalaga

kiritish boʻyicha esa 1027 ta jinoyat ishi qoʻzgʻatilib, 889,8 mln. soʻmlik mahsulotlar olib qoʻyildi.

Ta'kidlash joizki, barcha tezkor qidiruv va tahliliy operatsiyalarda tadbirkorlarning huquqiy va qonuniy manfaatlarini himoya qilish, ular faoliyatiga noqonuniy aralashuvlarning oldini olishga qaratilgan qonunchilik talablariga qat'iy rioya etilishini ta'minlashga alohida e'tibor qaratildi.

«2011-yil – Kichik biznes va xususiy tadbirkorlik yili» deb e'lon qilinishi mamlakatimizda demokratik islohotlarni chuqurlashtirish va fuqarolik jamiyatini rivojlantirishda muhim qadam boʻladi. Kichik biznes va xususiy tadbirkorlik Vatanimiz taraqqiyotini va xalq farovonligini yanada yuksaltirishda belgilovchi yetakchi kuch ekanligini inobatga olib, davlatimiz rahbari uni rivojlantirishni siyosat darajasiga koʻtarganligi oʻta muhim hodisadir. Buning boisi shuki, ijtimoiy yo'naltirilgan zamonaviy bozor iqtisodiyotida kichik biznes nihoyatda muhim oʻrin egallaydi. Eng konyunkturasi oʻzgarishlariga kichik biznes bozor moslashishga, iste'molchilarning talab-ehtiyojlari o'zgarishiga qarab ish tutishga qodirdir. Kichik biznes raqobatchilik muhitini shakllantiradi, busiz bozor iqtisodiyotini tasavvur qilib boʻlmaydi. Ikkinchidan, kichik biznes yangi ish oʻrinlari jadallik bilan barpo etilishini, aholining bandligi oʻsishini va daromadlari oshib borishini ta'minlaydi. Uchinchidan, kichik biznes ichki bozorni tovarlar va xizmatlar bilan boyitishning muhim manbai hisoblanadi hamda yalpi talabni oʻstiradi.

Ma'lumki, davlatning iqtisodiyotga ta'siri iqtisodiy, huquqiy va ma'muriy usullar orqali yuz beradi. Soʻnggi yillarda iqtisodiyotimizni isloh qilishning eng muhim yoʻnalishlari sifatida davlat va nazorat tuzilmalarining korxonalar, moliya xoʻjalik subyektlari hamda kichik biznes va xususiy tadbirkorlikning iqtisodiy erkinligi va huquqlarini sezilarli darajada kengaytirish boʻyicha salmoqli ishlar amalga oshirildi. Noqonuniy tekshiruvlar soni kamaydi. Ruxsat berish bilan bogʻliq 20 ga yaqin tartib-taomil bekor qilindi, hisobot ma'lumotlarini noqonuniy talab qilganligi uchun javobgarlik kuchaytirildi.

Yaratilgan huquqiy zaminlar, qabul qilingan kafolatlar, imtiyoz va preferensiyalar hayot, najot, saodat yoʻli boʻlgan kichik biznesning jadal rivojlanishiga imkoniyat yaratdi, buning natijasida uning yalpi ichki mahsulotdagi ulushi 2000-yildagi 30,0 foizdan 2011-yil yakuniga kelib qariyb 54,0 foizni tashkil etdi. Bugungi kunda jami band aholining 75 foizga yaqini mazkur sohada mehnat qilmoqda.

Tadbirkorlar huquqlarining himoya qilinishini ta'minlash borasidagi huquqiy normalar mustahkamlandi, tadbirkorlik subyektlarining xoʻjalik faoliyatiga nazorat qiluvchi idoralarning aralashuvini keskin qisqartirish choralari koʻrildi. Ustuvor yoʻnalishlardan yana biri — kichik biznes va xususiy tadbirkorlik faoliyati uchun yanada qulay muhit yaratish boʻlib, unda oxirgi-yillarda tadbirkorlik sohasida oʻz ishini ochish uchun ruxsat olish, soliq, moliya va statistika organlariga hisobot topshirish masalalarini tartibga solish boʻyicha ishlar davom ettirilmoqda.

Ayni paytda, kichik biznes subyektlarining energiya, gaz, suv va kanalizatsiya, issiqlik ta'minoti va boshqa shu kabi muhandislik-kommunikatsiya tarmoqlariga ulanishi yoki ularni qurishda ishtirok etishi uchun ruxsat olish tartib-qoidalarini soddalashtirish masalasi bugungi kunda amaliy ahamiyat kasb etmoqda. Bundan tashqari, davlatimiz rahbari kichik biznes va xususiy tadbirkorlik subyektlarining huquq va manfaatlarini himoya qilish, ushbu soha rivoji uchun yanada keng yoʻl ochib berish maqsadida mavjud normativ-huquqiy bazani tanqidiy nuqtai nazardan qayta koʻrib chiqish, yangi qonun hujjatlarini qabul qilish masalasiga toʻxtaldi.

Bu haqda Islom Karimov joylarda kichik boʻlsa ham oʻz ishini, oʻz biznesini ochishga intilayotgan xususiy tadbirkorlarni qoʻllab-quvvatlash oʻrniga, mahalliy amaldorlar tomonidan ularni koʻrolmaslik, qoʻlidan ish keladigan odamlarning yoʻliga turli-tuman gʻov-toʻsiqlar qoʻyilayotganiga aslo toqat qilib boʻlmasligini aytib oʻtib, keyingi yillarda bunday salbiy holatlarni bartaraf etish maqsadida tegishli ishlar olib borilayotganligi, jumladan, korxonalarning moliya-xoʻjalik faoliyatiga davlat va nazorat tuzilmalarining aralashuvini keskin kamaytirish, shuningdek, xoʻjalik va tadbirkorlik subyektlarining iqtisodiy huquq va erkinliklarini sezilarli darajada kengaytirish boʻyicha katta ishlar amalga oshirilganligini ta'kidladi. Lekin nazorat organlariga mansub ayrim mansabdorlar malakasining pastligi hanuz oʻtkir muammo boʻlib qolayotganligi va ishimizga salbiy ta'sir oʻtkazayotganligini kuyinib gapirdi.

Shular qatorida koʻpgina viloyat va tumanlarda korrupsiya degan balo, ya'ni poraxoʻrlik, tamagirlik, xizmat vazifasini suiiste'mol qilish kabi illatlar uchrab turayotganini inkor etib boʻlmasligini, qonunga zid boʻlgan bunday xunuk holatlar bilan murosa qilishga chek qoʻyishning vaqti kelganligi, yoshi va vazifasidan qat'i nazar, bizningcha, keng jamoatchilik ongiga korrupsiyaning iqtisodiy, siyosiy, ijtimoiy va ma'naviy sohalardagi, mamlakatning barqarorligi va iqtisodiy oʻsishiga gʻov ekanligi, oxir-oqibatda aholi farovonligini oʻstirishga salbiy ta'sir

koʻrsatuvchi illat ekanligini singdirish zarur. Bu borada Prezidentimiz Islom Karimov ta'kidlaganidek, «mamlakatimizning kelajagini va obro'e'tiborini qadrlaydigan har bir vijdonli fuqaro bu tahdidni esda tutmog'i darkor. Halol mehnat qilish, o'z bilimi, kuch-g'ayrati va ijodiy qobiliyatini sarflash uchun barqaror shart-sharoit bo'lishini istaydigan, farzandlari va yaqin kishilari kelajakda ham demokratik, fuqarolik jamiyatida sivilizatsiyalashgan bozor munosabatlarining samaralaridan to'la-to'kis foydalanishini orzu qiladigan har bir fuqaro, jinoyatchilik va korrupsiya yoʻliga oʻz vaqtida zarur toʻsiq qoʻyilmasa, bu illatlar qanday ayanchli oqibatlarga olib kelishi mumkinligini yaxshi anglab yetmogʻi lozim»¹. Chunki biz mamlakatimizni isloh etish va modernizatsiya qilishning yangi davri – milliy taraqqiyotimizning navbatdagi mantiqiy bosqichi davom etayotgan davrda yashayapmiz. Zero, davlatimiz rahbari Islom Karimovning «oʻz mehnati, aql-zakovati va salohiyati bilan oʻzini oʻzi boqadigan, oʻzini himoya qilishga, kelajagini oʻz qoʻli bilan qurishga qodir bo'lgan xalqni jahon ahli e'tirof etadi. Barchamiz, avvalo, yoshlarimiz bu oddiy haqiqatni hech qachon unutmasligimiz zarur»²ligi toʻgʻrisidagi da'vati kundalik shiorimizga aylanmogʻi lozim.

4. Korrupsiya – xufiyona iqtisodiyotning asosiy koʻrinishi

Korrupsiya xavfsizlikka tahlika soluvchi hodisa va yashirin iqtisodiyotning koʻrinishi ekanligi ayon narsa, shu sababli korrupsiyani iqtisodiy hodisa sifatida talqin etishda bahs-munozaralar deyarli yoʻq. Uni davlat amaldorlarining poraxoʻrlik faoliyatidan iborat boʻlishi va jamiyatga katta putur yetkazishini koʻpchilik tadqiqotchilar e'tirof etishadi. Korrupsiya bir qator iqtisodiy muammolar yechimining davlatga bogʻliq boʻlishidan kelib chiqadi. Poraxoʻrlik munosabatlarini uch subyektli deb aytish mumkin, bular pora oluvchilar, pora beruvchilar va ular oʻrtasidagi vositachilardir. Pora oluvchilar davlat amaldorlari boʻlsa, uni beruvchilar amaldorlar xizmatiga muhtojlar hisoblanadi. Vositachilar ayrim shaxslardan va yashirin tashkilotlardan iboratdir. Korrupsiyaning iqtisodiy mohiyati va huquqiy baholanishini farqlash zarur. Iqtisodiy jihatdan bu erkin bozor qonun-qoidalariga mos kelmaganidan yashirin yuz beradigan munosabatdir. Bu munosabatda barcha korrupsiyalashgan

 $^{^1}$ *Каримов И. А.* Хавфсизлик ва барқарор тараққиёт йўлида. Т. 6. – Т.: «Ўзбекистон», 1998. – Б. 429.

² *Каримов И. А.* Мамлакатни модернизация қилиш ва иқтисодиётимизни барқарор ривожлантириш йўлида. Т. 16. – Т.: «Ўзбекистон», 2008. – Б. 98.

manfaati uygʻunlashadi. Amaldor unsurlarning xizmatiga bo'lganidan, uni taklif etishadi, ya'ni sotishadi. Bu yerda pora yashirin xizmat haqi shakliga kiradi. Poraxoʻrlikda ham bozor munosabati bor, lekin bu tor egoistik manfaatga bo'ysunuvchi munosabat bo'lganidan, buni jamiyat tan olmaydi, chunki bu yerda ayrim shaxslar yoxud guruhlar manfaatining amalga oshishi boshqalar manfaatiga yo'l bermaslik hisobidan bo'ladi, shu vajdan buni jamiyat qabul qilmaydi, u yashirin tus oladi. Jamiyatga ma'qul hodisalarni yuridik qonunlar tartiblaydi. Shuni nazarda tutib, korrupsiyani huquqiy jihatdan gʻayriqonuniy, qonunlar man etadigan iqtisodiy faoliyat deb aytish mumkin. Korrupsiya – global hodisa, undan zarar koʻrmagan mamlakat yoʻq, lekin korrupsiyalashuv darajasi har xil. Bu korrupsiya ildizlari chuqur boʻlishidan guvohlik beradi. Korrupsiya sabablari har xil talqin etiladi. Ular obyektiv va subyektiv bo'lishiga e'tibor beriladi. Ular orasida qonunchilikning nomukammalligi, demokratiya tamoyillari va uning institutlari rivojlanmaganligi, davlatning kuchsizligi ajratiladi. Bizningcha, korrupsiyaning mavjudligini iqtisodiy tizimning oʻzidan qidirish kerak. Korrupsiya iqtisodiy hodisa bo'lar ekan, uning iqtisodiy ildizlarini topish kerak. Bu ildizlar pul munosabatlarining oʻzida joylashgan, pul universal toʻlov vositasi, uni hamma operatsiyalar uchun qabul qilishadi, pul boylikning timsoli, boylik toʻplashning eng qulay shakli. Puldagi eng yuksak likvidlik xususiyati uni koʻproq topishga intilishdir, pulni saqlash xavfsiz, uni xohlaganicha jamg'arish mumkin. Pul likvidligi eng yuqori bo'lgan aktivdir, likvidlikni esa pulning qadr-qiymati ta'minlaydi. Pul ko'zdan yashiringan moliyaviy aloqalar o'rnatish imkonini beradi. Pulning likvidligi muhim boʻlganidan, pora berish va qattiq valutalar ishlatiladi, chunki bularning qadri-qiymati barqaror bo'lganidan jamg'arish vositasi bo'la oladi. Pul bozor munosabatlarining mahsuli, shu sababli uning rivojlanishi korrupsiyani oziqlantiradi.

Natural ishlab chiqarish sharoitida poraxoʻrlik moddiy shaklda boʻlishi mumkin, uni koʻzdan yashirib boʻlmaydi. Pul munosabatlari esa yashirin munosabat oʻrnatishda qoʻl keladi. Xullas, korrupsiyaning obyektiv sababi pulni yuksak likvidlik xususiyatidadir. Bu pul fetishizmini, uni ilohiylashtirishni, unga sigʻinishni yuzaga keltiradi, pul hamma narsani hal etuvchi kuchga ega boʻladi. Bu esa pulga ochkoʻzlikni uygʻotadi. Uni gʻayriqonuniy yoʻl bilan tan olish imkoniyati bor kishilarni korrupsiyalangan shaxslarga aylantiradi, bular, odatda davlat amaldorlari boʻladi. Bunda bozor mexanizmining kam layoqatli boʻlishi kuzatiladi, uning ojizligini davlat mexanizmi toʻldirib boradi. Davlat mexanizmi

layoqatli boʻlib qolganda, uning amaldorlari xizmatiga talab oshadi, chunki shunday yoʻl bilan ish bitadi. Bu poraxoʻrlikni ta'minlaydi, albatta. Bozor tizimi hozirchalik toʻla mukammal emas, uning mexanizmlarida uzilishlar boʻlib turadi va bu korrupsiyaga qulay sharoit hozirlaydi. Demak, korrupsiyaga qarshi kurashning eng ma'qul yoʻli bu bozor munosabatlarining oʻzini takomillashtirishdir.

Iqtisodiyotda shunday jiddiy holat kuzatiladi. U o'sgan sari uning ijtimoiy yo'nalishi kuchayadi, bu esa davlatning ijtimoiy dasturlarini moliyalashtirish uchun katta mablagʻ talab qiladi va bu budjetda to'planadi. Budjet mablag'larining taqsimlanishi amaldorlarga bog'liq va bu ularni pora orqali sotib olishga ishtiyoqini kuchaytiradi. Davlat iste'molining YAIM hissasi kamayishga moyil bo'lsa-da, uning mutlaq miqdori o'sadi, chunki YAIM ko'payib boradi. Davlat iste'molini qondirish xarajatlari budjetdan moliyalashtiriladi. Davlat iste'moli uning xaridini yuzaga keltiradi. Davlat buyurtmasini olish firmalar tovarining sotilishini, shunga qarab foydaning tushishini kafolatlaydi. Shu sababli buyurtma uchun raqobatlashuv kelib chiqadi. Bu raqobatda pora berish ham qo'llaniladi. Ayniqsa, bu davlatning investitsiyalari ko'paygan kezlarda yuz beradi, chunki davlat iste'molini ortishi yuz beradi. Davlat iste'moli jamiyat rivoji uchun zarur, biroq bu korrupsiyaga sharoit hozirlaydi. Natijada jamiyat oʻziga ma'qul va noma'qul hodisalarga duch keladi. Demak, korrupsiyani bozor tizimidagi ichki ziddiylik yuzaga keltiradi, deb aytish mumkin.

Korrupsiyaning obyektiv sabablaridan biri — bu davlatning iqtisodiyotga aralashuvi va shunga bogʻliq holda biznesni rivojlantirish muammolari hal qilinishining davlat amaldorlariga bogʻliq boʻlishidir. Davlatni iqtisodiyotga ta'siri iqtisodiy, huquqiy va ma'muriy usullar orqali yuz beradi. Bu usullarning qoʻllanilishi amaldorlar faoliyatiga bogʻliq. Davlat qoʻlidagi subsidiyalar, soliqlar, imtiyozli litsenziyalar, kvotalar, preferensiyalar va buyurtmalar kabi vositalar biznesni tartiblab turishda qoʻllaniladi. Ulardan kimning bahramand boʻlishi amaldorlarning munosabatiga bogʻliq boʻladi. Iqtisodiy faoliyatdan yaxshi natijaga erishish uchun tadbirkorlar pora berish yoʻli bilan amaldorlarni sotib olish va ular orqali imtiyozlarga ega boʻlishiga intiladilar. Davlatning iqtisodiyotiga aralashuvini zarurligi va shuning oʻzi korrupsiyani yuzaga keltirishi ham iqtisodiyotdagi ziddiy holatdir.

Korrupsiya sabablari aniqlanganda, koʻpgina tadqiqotchilar davlat qonunlarining nomukammalligiga urgʻu berishadi. Bu toʻgʻri, lekin hech qachon va hech qayerda abadiy mukammallashgan qonunlar boʻlmagan.

Qonunlar odatda real hayotdagi oʻzgarishlardan orqada qoladi, shu sababli ular tez oʻzgarib, toʻldirilib turadi. Mukammal hisoblangan qonunlar vaqt oʻtishi bilan nomukammal boʻlib qoladi, chunki real hayot ilgarilab ketadi. Nomukammal qonun bu real hayot talabidan orqada qolgan va kelajakni toʻla aks ettirmaydigan qonunlar. Bunday qonunlar yaxshi ishlamaydi, natijada korrupsiyaga yoʻl ochiladi. Koʻpchilik oʻtish davri mamlakatlaridagi qonunlar nomukammalligi bilan ajralib turadi, chunki bular chetdan andoza olgan holda yaratilgan qonunlar boʻlib, ular yaxshi ishlamagan va bu korrupsionerlarga qoʻl kelgan bir qator MDH mamlakatlarida qonunlarning nomukammalligidan ustalik bilan foydalangan guruhlar amaldorlarga pora berish vositasida kapital jamgʻarishni tezlashtirganligi ma'lum voqeadir. Korrupsiyani qonunlar sifatiga bogʻliqligi shuni koʻrsatadiki, unga qarshi kurashish vositasidan biri qonunlarni oʻz vaqtida qayta koʻrish hisoblanadi.

Korrupsiyaning sababi aniqlanganda, bir qator olimlar va siyosiy arboblar davlat amaldorlari ish haqining kamligiga urgʻu berishadi. Bu ham poraxoʻrlikka intilishni kuchaytiradi, lekin uning birdan-bir sababi emas. Ish haqining ozligi quyi tabaqadagi amaldorlarni poraxoʻrlikka undaydi. Ammo katta pora olish yuqori, mansabli amaldorlarga xos. Poraxoʻrlik huquq-tartibot organlarida tez-tez uchrab turadi, vaholanki bu yerdagi ish haqi va pensiyalar yuqori hisoblanadi. Demak, poraxoʻrlik ish haqidan koʻra pora olish imkoniyatlariga koʻproq bogʻliqdir.

Korrupsiyani lobbizm ham keltirib chiqaradi, biroq har qanday lobbizm bunga olib kelmaydi. Ruxsat berilgan, jamiyat tan oladigan lobbizm borki, bu ochiq bozor aloqalariga tayanadi. Bunda u yoki bu guruh shaxslar yoki firmalar manfaatiga mos keladigan, lekin jamiyat uchun zararsiz boʻlgan qarorlarni davlat idoralari tomonidan qabul qilish zarurligini asoslash va bunga koʻmaklashish bilan bogʻliq lobbizm korrupsiyani tavsiflamaydi, chunki bu yerda bozor qoidalariga binoan lobbistik xizmatlardan ochiqchasiga ularni haqini toʻlagan holda foydalanish yuz beradi. Ammo shu bilan birga xufiyona lobbistik xizmatlar borki, ular individual va korporativ manfaatlarni himoya qilgan holda boshqalar manfaatiga zid ishlarni amalga oshirilishini bildiradi. Shunday boʻlganda gʻayriqonuniy lobbizm paydo boʻladi, uning xizmat haqi poradan oʻzga narsa boʻlmaydi. Iqtisodi va demokratiya rivojlangan mamlakatlarda oshkora lobbizm koʻproq uchrasa, iqtisodi qoloq va demokratiya rivojlanmagan joyda lobbizm korrupsion faoliyat shakliga kiradi.

Yuksak likvidli aktivlarning mavjudligi va davlatning iqtisodiyotiga aralashuvi, demokratiya darajasi korrupsiyaning obyektiv sabablari

boʻlsa, kishilarning ma'naviy darajasi va axloq-odobi, demokratiya tamoyillariga sodiqligi korrupsiyaning subyektiv sabablariga kiradi. Subyektiv munosabat korrupsiyani kuchaytirish yoki zaiflashtirishi mumkin. Biroq bu korrupsiyani tag-tomiri bilan yoʻqota olmaydi, chunki uning ildizlari iqtisodiy munosabatlarning naqadar rivojlanganligiga borib taqaladi.

Korrupsiyaning negativ hodisa sifatida xavfsizlikka tahdid solishi hech kimda shubha tugʻdirmaydi, shu sababli unga qarshi davlat idoralari va jamoatchilik tashkilotlari kurashib keladi. Biroq dunyoning hech bir mamlakatida, hatto hamma tomondan yuksak rivojlangan mamlakatlarda ham korrupsiya tugatilmagan. Jamiyat korrupsiyani cheklab turishi, uni katta xavf tugʻdirmaydigan darajaga keltirishi mumkin. Unga qarshi kurashish tadbirlarini ishlab chiqish va qoʻllash uchun qaysi sohani qanday darajada korrupsiyalanganini bilish talab qilinadi, bunga korrupsiyaning miqdoriy tahlili vositasida erishiladi.

Jahon banki va Yevropa Tiklanish va taraqqiyot banki tomonidan 1998-yilda oʻtish iqtisodiyotidagi 22 ta mamlakatda olib borilgan tadqiqotlari aholi jon boshiga toʻgʻri keluvchi bevosita xorijiy investitsiyalar hajmi bilan hukumatning yuqori darajalaridagi korrupsiya darajasi hamda yirik hukumat shartnomalarini tuzish davrida olinuvchi poralar oʻrtasida teskari bogʻliqlik mavjud ekanligini koʻrsatdi. Jumladan, 1994 va 1999-yillarda aholi jon boshiga toʻgʻri keluvchi bevosita xorijiy investitsiyalar hajmi Belorus, Qirgʻiziston, Moldova, Rossiya, Ukrainada yiliga 20 dollarni tashkil etgan boʻlsa, Polsha va Sloveniyada bu koʻrsatkich 100 dollar, Vengriya va Chexiyada 200 dollarga yetganligi toʻgʻrisidagi ma'lumotlarni keltirish mumkin.

Korrupsiyani idrok etish indeksi

2-jadval

Davlat	Mamlakatlar	Indeks bali	Tadqiqot-	Standart	Min.
o'rni			lar soni	deviatsiya**	/maks.
				·	ball
1	Finlyandiya	9,7	8	0,4	8,9–10,0
2	Daniya	9,5	8	0,3	8,9–9,9
3	Yangi Zelandiya	9,5	8	0,2	8,9–9,6
4	Islandiya	9,4	6	0,4	8,8–10,0

^{*} Манбаларни бахолашдаги фарк.

* Transparency International, Corruption Index 2002, Germany, 2002

5	Singapur	9,3	13	0,2	8,9–9,6
6	Shvetsiya	9,3	10	0,2	8,9–9,6
7	Kanada	9,0	10	0,2	8,7–9,3
8	Lyuksemburg	9,0	5	0,5	8,5–9,9
9	Niderlandiya	9,0	9	0,3	8,5–9,3
10	Buyuk Britaniya	8,7	11	0,5	7,8–9,4
11	Avstraliya	8,6	11	1,0	6,1–9,3
12	Norvegiya	8,5	8	0,9	6,9–9,3
13	Shveysariya	8,5	9	0,9	6,8–9,4
14	Gonkong	8,2	11	0,8	6,6–9,4
15	Avstraliya	7,8	8	0,5	7,2–8,7
16	AQSh	7,7	12	0,8	5,5–8,7

Korrupsiya darajasi va uning shakllarini iqtisodiy salohiyat bilan izohlab bo'lmaydi. Sof iqtisodiy yondashuv XIX asrdagi iqtisodiy nazariya oqimlariga xos boʻlgan. XX asrning boshlariga kelib, institutsionalizm oqimi paydo boʻlishi bilan sof iqtisodiy yondashuvdan chekinish paydo bo'ldi. Iqtisodiyotdagi o'zgarishlarni faqat uning o'zini rivoji bilangina tushuntirib boʻlmaydi. Shu jihatdan qaralganda korrupsiya ildizlarini gʻayriiqtisodiy shart-sharoitlar mavjudligi bilan ham izohlashga keladi. Bu sharoitlarni faqat demokratiyaning to'g'ri rivojlanganligi bilan chegaralab boʻlmaydi, chunki korrupsiya ildizlari milliy va mahalliy an'analarga ham borib taqaladi. Umuman Sharqda, xususan Markaziy Osiyoda korrupsiyani oziqlantiruvchi manba Osiyocha ishlab chiqarish usuli sarqitlarining uzoq saqlanishidir. Osiyocha ishlab chiqarishda asosiy resurslar oliy hukmdorlar qoʻlida boʻlganidan ulardan foydalanish hukmdorlarga soʻzsiz tobelik qilish, ular xizmatida boʻlish yoki amaldorlarga pora berish bilan bogʻliq boʻlgan. Bunday munosabat asrlar mobaynida doimo takrorlanib turganidan an'analar tusiga kirgan. Amaldorlik va pora olish o'zaro chirmashib, chuqur ildiz otgan. Osiyocha an'analar hozir ham saqlanib qolgan, bu korrupsiyaga moyillik hosil etadi. Oʻzbekistondagi korrupsiyani ham qisman boʻlsa-da, an'analar yuzaga keltiradi. Biroq, bu iqtisodiy erkinlik, demokratiya holati va kambagʻallik oʻrtasida aloqalar mavjudligini yoʻqqa chiqarmaydi.

Soʻzsiz, korrupsiya tayanchli kadrlarsiz rivojlana olmaydi, chunki ular jinoiy pullarni nazoratdan olib qochish, ularni legallashtirish, xufiyona pullarning rasmiy bozorda bemalol ishlashi uchun sharoit yaratadilar. Bunday mutaxassislar doirasi juda keng, bular jumlasiga korrupsiyani huquqiy jihatdan himoya qiluvchi huquqshunoslar, moliyaviy firibgarlikni amalga oshiruvchi iqtisodchilar, bu qonunbu-

zarliklarni koʻrsa-da, koʻrmaslikka olgan tergov-jazo xodimlari, soliqchilar, hukumatda ularning shaxsiy manfaatlarini himoya qiluvchi siyosatchilar kiradi.

Korrupsiya shunisi bilan xavfliki, u ijtimoiy tengsizlikni yuzaga keltiradi, biznes yuritish xarajatlarini oshiradi, demak, milliy iqtisodiyotni raqobatga bardoshsiz qiladi, muayyan darajada siyosiy beqarorlik keltirib chiqaradi. Jahon tajribasi koʻrsatishicha, 80-yillar boshida korrupsiya, iqtisodiyotni uquvsiz boshqarish bilan birga, Venesueladek neftga boy mamlakatning toʻlovga qobiliyatsiz boʻlishiga olib keldi.

2003-yil 31-oktabrda qabul qilingan «Birlashgan Millatlar tashkilotining korrupsiyaga qarshi konvensiyasi» muqaddimasida aytilganidek, «korrupsiya endilikda cheklangan doiradagi (lokal) muammo emas, balki barcha mamlakatlar jamiyati va iqtisodiyotiga daxldor boʻlgan transmilliy muammoga aylandi. Bu esa korrupsiyaning oldini olish va unga qarshi kurash sohasida xalqaro hamkorlikning nihoyatda katta ahamiyatga ega boʻlishiga sabab boʻladi».

«Davlatni egallab olish» deganda, davlat yoki xususiy sektor vakillari bo'lgan ayrim shaxslar, guruhlar yoki kompaniyalarning o'z manfaatlari yoʻlida qonunlar, nizomlar, farmonlar hamda davlat siyosatining boshqa vositalari shakllanishiga ta'sir koʻrsatish maqsadida amalga oshiriladigan harakatlari tushuniladi. Bunday xatti-harakatlarning o'lchovi sifatida «davlatni sotilish indeksi» qoʻllaniladi. Mazkur koʻrsatkich parlament qabul qilgan qonunlar, hukumat qarorlari, davlat rahbarining farmonlari, hukumat tuzgan dasturlar naqadar ayrim shaxslar va ijtimoiy guruhlarning egoistik-korporativ manfaatiga qaratilishini bildiradi. Bu ko'rsatkich qanchalik past boʻlsa, shunchalik davlat toza hisoblanadi. Ayrim xalqaro tadqiqotlarga koʻra, MDH mamlakatlari orasida Oʻzbekiston davlati eng toza hisoblanadi. Masalan, 2000-yilga kelib davlatning sotilish indeksi 1,0 ga teng bo'lib, bu eng past, ya'ni eng yaxshi ko'rsatkich hisoblanadi, chunki boshqa bir mamlakatlarda bu indeks 5,5 ga teng bo'lgan. Korrupsiyani jilovlashda davlatning tozaligining oʻzi yetarli emas. Buning uchun qonunlar yaxshi ishlashi kerak, buni qonunlarni samaradorligi belgilaydi. Bu koʻrsatkich Oʻzbekistonda 2001-yil 2,0 ga teng bo'lib, bu boshqa mamlakatlar bilan qiyoslaganda o'rtacha bo'lib chiqadi. Bu koʻrsatkich eng yuqori, ya'ni 4,0 ga teng boʻlgan mamlakatlar jumlasiga Vengriya, Ruminiya, Polsha, Bolgariya, Chexiya va Estoniya kirgan. Qonunlar samaradorligini ularning oʻzining mukammalligidan, ya'ni real sharoitga mosligidan tashqari aholining huquqiy madaniyati

ham belgilaydi. Oʻzbekistonda bu koʻrsatkichning yuqori boʻlmasligi huquqiy madaniyatning yetishmasligidan kelib chiqadi.

Ma'muriy korrupsiya qonunlar va qoidalarni bajarish jarayoniga atayin buzilishlar kiritishni bildiradi. Korrupsiyaning ushbu turi firmalar va kompaniyalar daromadining pora berish uchun sarflaydigan hissasi bilan o'lchanadi. Ba'zi bir ma'lumotlarga ko'ra, O'zbekistonda bu ko'rsatkich 5 foiz bo'lgan. Xususan, Sharqiy Yevropa mamlakatlarda bu ko'rsatkich o'rtacha – 2,2 foiz (Vengriyada – 1,7 foiz, Polshada – 1,6 foiz), MDHda – 3,7 foiz (Rossiyada – 2,8 foiz)ni tashkil etgan.

Korrupsiya shakllari xilma-xil boʻlib, ularga pora olishdan tortib, amaldor xizmat burchiga koʻra foydalanishi mumkin boʻlgan jamiyat mablagʻlarini noqonuniy oʻzlashtirishgacha kiradi. Biznes eng koʻp duch keladigan va eng koʻp tarqalgan korrupsiya shakli – import va eksport litsenziyalari, valuta nazorati, soliqlarni baholash, imtiyozlar berish, kreditlar olish bilan bogʻliq ravishda gʻayriqonuniy toʻlovlar va pora talab qilishdir.

Hozirgi vaqtda korrupsiya boʻyicha turli xil qiyosiy tadqiqotlar oʻtkazilmoqda. Ushbu sohadagi eng mashhur ishlanmalardan biri — «Korrupsiyani idrok etish indeksi» boʻlib, uni 1995-yildan boshlab ish olib borayotgan Transparency International (TI) mutaxassislari ishlab chiqqanlar. Ushbu tor ixtisoslashgan integral indeks davlatlarning umumiy korrupsiyalashganlik darajasi boʻyicha, ya'ni korrupsiyaning turlari va shakllarini inobatga olgan holda ajratadi. Korrupsiya iqtisodiyotning quyidagi sohalarida eng chuqur ildiz otgan deb hisoblanadi:

- davlat mulkini xususiylashtirish;
- budjetni bajarish va budjet mablagʻlarini sarflash;
- eksklyuziv huquqlar, imtiyozlar, davlat transfertlarini taqdim etish va sh.k.;
 - bank sohasi;
 - uy-joy va kommunal soha;
 - soliq va boj toʻlovlari.

Korrupsiya hodisasini oʻrganayotgan koʻpchilik tadqiqotchilarning ta'kidlashlaricha, korrupsiya davlatning yuqori darajadagi soliq solishlar va davlatlar xarajatlari orqali iqtisodiyotga faol aralashuvning, iqtisodiy faoliyatni nazorat qilish va boshqarish funksiyalari kattaligining oqibatidir. Ushbu roʻyxatga raqobat muhitining sustligi hamda iqtisodiyotda monopoliyaning mavjudligi ham qoʻshiladi. Korrupsiya asosan demokratik institutlarning noadekvatligi va ojizligi tufayli yuzaga keladi

degan, fikr ham mavjud. Mamlakat qanchalik koʻp darajada demokratik matbuot ganchalik erkin bo'lsa, davlatning mexanizmlari oshkora bo'lsa, matbuot qanchalik erkin bo'lsa, korrupsiya shunchalik ojiz bo'ladi. Hokimiyat barcha tarmoqlarining bir-birini nazorat qilishi, hukumat faoliyatiga oid axborotdan erkin foydalanish ushbu salbiy hodisaning rivojlanishiga imkon bermaydi. Koʻpchilik mamlakatlar demokratiya va fuqarolik jamiyati barpo etish borasida siyosiy islohotlarni amalga oshirib korrupsiyaga qarshi kurashda jiddiy qoʻlga kiritdilar. Yurtboshimiz Islom muvaffaqiyatlarni aytishicha, «shuni unutmaylikki, biz davlatning nazorat funksiyalarini qanchalik kuchaytirsak, nazorat bilan shugʻullanuvchi davlat tuzilmalari va organlarini qancha koʻpaytirsak, amaldorlarning zoʻravonligi va korrupsiya shuncha avj olaveradi. Shuning uchun biz jamoatchilik nazoratini uning kuch ishlatuvchi tuzilmalari faoliyati ustidan ham har tomonlama kuchaytirishga alohida e'tibor qaratishimiz lozim. Bu masalada bundan boshqa muqobil yoʻl yoʻq»¹.

Ba'zi olimlar korrupsiya mavjudligining asosiy sababi xizmat mavqeini suiiste'mol qilish uchun imkon qoldiruvchi qonunlardagi nomukammallik deb hisoblaydilar. Xususan, oʻtish davri iqtisodiyoti mavjud boʻlgan mamlakatlarda xususiy tadbirkorlik va bozor infratuzilmasi faoliyat koʻrsatishi bilan bogʻliq yangi faoliyat sohalari paydo boʻldi. Ushbu sohalarning qonunda qat'iy tartibga solinmaganligi korrupsiya uchun qulay zamin hozirlaydi. Qonunlarning nomukammalligi ularning yomon sifatida ham, ijro tizimining yoʻlga qoʻyilmaganligida ham namoyon boʻlishi mumkin. Amalda bu koʻpincha bevosita amal qilmaydigan va koʻplab oʻzaro zid keluvchi qonun osti hujjatlari bilan tartibga solinadigan normalarga havola etadigan blanket qonunchilikning mavjudligida oʻz ifodasini topadi.

Biroq barcha tadqiqotchilar korrupsiya iqtisodiyotga ulkan zarar keltirishi masalasida hamfikrdirlar. Korrupsiya xususiy sektor daromadlarining kattagina qismini soliqqa tortishdan yashirib qolishga imkon beradi. Ayrim korxonalarning (soliq, kredit va boshqalar boʻyicha) imtiyozlardan foydalanishi raqobat muhitini buzadi. Korrupsiya oʻziga xos soliq boʻlganligi sababli bu hol tadbirkorlarning iqtisodiy xarajatlarini oshiradi va investitsiya kiritish uchun ragʻbatni kamaytiradi.

 $^{^1}$ *Каримов И. А.* Биз келажагимизни ўз қўлимиз билан қурамиз. Т. 7. – Т.: «Ўзбекистон», 1999. – Б. 32–33.

Pora amalda tovar sotish hisobidan qoplanmaydigan xarajatni, ya'ni zararga o'tadigan xarajatni hosil etadi. Bu doimiy yoki o'zgaruvchan, aniq yoki muqobil xarajatni hosil etmaydi. Bu ishlab chiqarish va tijorat ishlari bilan bevosita bogʻliq boʻlmagan, binobarin, biznes uchun ustama tavsifidagi xarajatni hosil etadi, bu foyda hisobidan qoplanadi. Pora tabiatan norasmiy soliqdir. Firma foydasi taqsimlanganda, uning bir qismini porani qoplash uchun yuborilishi, taqsimlanmagan foydani qisqartiradi, shunga binoan kengaytirilgan takror ishlab chiqarishni ta'minlovchi investitsion resursni qisqartiradi. Bu bilan o'zini o'zi moliyalashtirishdan iborat bozor tamoyiliga putur yetkaziladi. Hozirgi paytda korxonalar investitsiyalarining 40 foiz kredit, 40 foiz amortizatsiya va 20 foiz foyda hisobidan moliyalashtiriladi. Foydaning bir ajratilishi korxonaning rivojlanish imkoniyatlari poraga gismini kamaytiradi, albatta.

Garvard universtiteti mutaxassislarining hisob-kitoblariga qaraganda, davlat buyurtmalari va xaridlari sohasidagi korrupsiyadan keladigan yoʻqotishlar ushbu sohadagi barcha budjet xarajatlarining taxminan 30 foiz tashkil qiladi. Sanoatning ayrim tarmoqlarida (neft, gaz, nodir metallar) mansabdor shaxslarni sotib olishi uchun foydaning deyarli 50 foiz sarflanadi. Korrupsiyadan hammadan ham koʻra koʻproq kichik va oʻrta biznes zarar koʻradi. Korrupsiyaning tarqalishi va xufiyona iqtisodiyotning rivojlanishi oʻrtasida chambarchas aloqa mavjud. Bir tomondan, ushbu ikki hodisa ma'muriy to'siqlardan iborat umumiy ildizlarga ega. Boshqa tomondan – ular bir-birini keltirib chiqaradi: tijorat sektori oldida ma'muriy to'siqlar qanchalik ko'p bo'lsa, ularni aylanib oʻtishga, jumladan, amaldorlarning «ogʻzini moylash» orqali chetlab oʻtishga intilishlar shunchalik kuchli boʻladi. Ayrim hisob-kitoblarga qaraganda, xoʻjalik faoliyatidagi hisobotlarni, jumladan, soliq hisoblash boʻyicha hujjatlarni soddalashtirish, liberallashtirish (xususan, litsenziya olish talab etiladigan va haddan tashqari sertifikatlashtirish o'tkazilayotgan yo'nalishlarda) yashirin ish ko'rayotgan korxonalarning kamida uchdan bir qismini xufiyona iqtisodiyotdan chiqarib olishga imkon berishi mumkin. Ayni vaqtda bugun yashirin iqtisodiyot, masalan, Rossiyada YAIMning 42 foizni, Ukrainada – 49 foizni ishlab chiqarmoqda.

Korrupsiya daromadlarni ochiq bozor qoidalarini chetlagan holda yashirin taqsimlanishini bildiradi va bu ijtimoiy adolatsizlikka olib keladi. Garchi daromadlar miqdori oʻzgarmasa-da, ular qayta taqsimlanib bir qoʻldan boshqasiga oʻtadi. Adolatsizlikning qaror topishi kishilarning axloqiy buzilishiga, ularda ishonchsizlikning paydo boʻlishiga olib keladi.

Hozir korrupsiya iqtisodiy rivojlanishga putur yetkazishi, demokratik institut va qonunning ustunligi prinsipini susaytirishi, jamoat tartibini buzishi va jamiyat ishonchini yoʻqotishi, bu bilan uyushgan jinoyatchilik, terrorizm va insoniyat xavfsizligiga nisbatan boshqa tahdidlar gullabyashnashiga imkon berishini barcha tan olgan.

Hech bir mamlakat – u xoh boy boʻlsin, xoh kambagʻal – ushbu salbiy hodisadan umuman saqlana olmaydi. Korrupsiya davlat sektorida, xususiy sektorda ham oʻzini koʻrsatishi mumkin. Ammo undan doimo faqat bir taraf – jamiyat zarar koʻradi. Lekin korrupsiya rivojlanayotgan mamlakatlarda kambagʻal odamlarga yetkazadigan zarar nihoyatda katta. U har xil shakllarda ularning kundalik hayotiga ta'sir etadi va ularning yanada qashshoqlashuviga olib boradi, u ularni iqtisodiy resurslardagi qonuniy ulushidan yoki hayot uchun zarur yordamdan mahrum etadi.

Korrupsiya asosiy ijtimoiy xizmatlarni pora berish imkoni boʻlmagan shaxslar uchun yetishib boʻlmas narsaga aylantiradi. Korrupsiya rivojlanish uchun moʻljallangan ozgina mablagʻlarni boshqa maqsadlarga sarflab, asosiy ehtiyojlar — oziq-ovqat, sogʻliqni saqlash va ta'lim sohasidagi ehtiyojlarning ta'minlanishini qiyinlashtiradi. U har xil ijtimoiy guruhlar oʻrtasida kamsitishni, tengsizlik va adolatsizlikni keltirib chiqaradi, xorijiy investitsiyalar va yordamlarni qochiradi, rivojlanishni sekinlashtiradi. Shu bois u siyosiy barqarorlik va ijtimoiy-iqtisodiy taraqqiyot yoʻlidagi jiddiy gʻov hisoblanadi.

Biroq korrupsiya oʻtish davrida adolatsiz daromadlar hosil etsa-da, kapitalning dastlabki jamgʻarilishiga xizmat qiladi. Korrupsiyalashgan unsurlar gʻayriqonuniy yoʻl bilan toʻplagan puli biznesga kirib borib, u yerda kapitalga aylanadi. Natijada bu unsurlar pora hisobidan kapital hosil etadi. Shu sababli davlat amaldorlarini yashirin yoʻl bilan tadbirkorlarga aylanishi yuz beradi. Korrupsiyaning yana bir negativ tomoni shundaki, u raqobatda tengsizlik hosil etadi, chunki pora berish hisobidan ayrim toifa tadbirkorlar raqobatda sun'iy ustunlikka erishadilar. Bu korrupsiya erkin raqobatga zid hodisa boʻlishini bildiradi.

Korrupsiya davlat xarajatlarining tuzilishini oʻzgartiradi. Bunda mablagʻlar sogʻliqni saqlash, ta'lim, yoʻl qurilishi, aloqa singari ijtimoiy muhim dasturlardan uncha muhim boʻlmagan sohalarga koʻchiriladi. Qurib bitkazilgan obyektlarni saqlash haqida bosh qotirmagan holda yangi investitsiya loyihalarini amalga oshirish kuchaygan kapital qurilish sohasi buning yorqin misoli boʻladi.

Islohotlar amalga oshirilayotgan hamda oʻtish davri iqtisodiga oid mamlakatlarda mavjud iqtisodiy salohiyatni iqtisodiy oʻsish va aholi farovonligini oshirishga yoʻnaltirishga korrupsiya oʻta xavfli ta'sir oʻtkazayotganligi tadqiqotchilar va siyosiy arboblar tomonidan bildirilmoqda¹.

Shu sababli ham Prezident Islom Karimov korrupsiyaga qarshi kurashni kuchaytirish haqida: «Bugungi kunda faqat iqtisodiyotga emas, balki, eng avvalo, respublikaning siyosiy va xalqaro nufuziga, jamiyatimizning ma'naviy-axloqiy nufuziga katta zarar yetkazayotgan eng xavfli illat — korrupsiyadir. U ayrim hollarda oʻta xavfli tusga kirmoqda. Ushbu masala boʻyicha keyingi yillarda bajarilgan ilmiy tahlil shuni koʻrsatmoqdaki, iqtisodiyot sohasida sodir etilayotgan jinoyatlarni tadqiq etishga e'tibor koʻpaytirilmoqda. Bank-moliya sohasida, davlat mulkini xususiylashtirishda, qimmatli qogʻozlar muomalasida, kichik va xususiy korxonalar tizimida, tadbirkorlik faoliyatini tashkil etish jarayonlarida uyushgan jinoyatchi guruhlar sodir etayotgan qonunbuzarliklar sonining oshishi, ayniqsa, tashvishlidir.

Iqtisodiyot sohasida qonunchilikka va axloq qoidalariga amal qilish borasidagi ishlarning ahvoli, aniq dalillar tahlili shundan xabar beradiki, biz korrupsiya bilan kurash masalasiga alohida e'tibor berishimiz kerak. Chunki korrupsiya amalga oshirilayotgan islohotlarni toʻgʻridan-toʻgʻri obroʻsizlantirib, uning ma'no-mohiyatiga dogʻ tushirmoqda. Ayniqsa, qonun posboni boʻla turib, tadbirkorlar manfaatlarini muhofaza etish lozim boʻlgan, majozini aytganda, qoʻli pok boʻlishi zarur boʻlgan huquqtartibot organlarining oʻzida manfaatparastlik, poraxoʻrlik, korrupsiya, aybdorlarga homiylik qilish, oʻz ishiga jinoyatkorona sovuqqonlik munosabatida boʻlish kabi hollarga qat'iyan chek qoʻyish zarur»², — deb ta'kidlagan.

Hozirgi davrga kelib korrupsiyaga qarshi kurash barcha mamlakatlar jamoatchiligining diqqat markaziga qoʻyilmoqda, chunki jamiyatdagi nolegal munosabatlar oʻta xavfli sohaga aylanib bormoqda. Koʻpgina olimlarning fikricha, korrupsiya yashirin iqtisodiyotning koʻrinishi.

¹ Qarang: *Беккре А., Каика 3.* Кремль: взялся за реформу госслужбы // «Ведомости». – 2002. – 1 июля; *Григорьев Е.* Глобализация взяточничества // Независимая газета. – 2002. – 24 июня; *Джонс Д., Кауфман Д., Хеллман Р.* Способствуют ли иностранные компании процветанию коррупции в переходных экономиках // Трансформация. – 2000. – № 3–4; *Исмоилов И.* Жиноятчиликда уюшганлик: назария ва амалиёт муаммолари. – Т., 2005. – Б. 107–121.

 $^{^2}$ *Каримов И. А.* Биз келажагимизни ўз қўлимиз билан қурамиз. Т. 7. – Т., «Ўзбекистон», 1999. – Б. 32–33.

Uilyam Devidson institutida oʻtkazilgan tadqiqotlarga koʻra, korrupsiyaning keng tarqalishi korxonalarni yashirin iqtisodiyot tomon yuz oʻgirishiga sabab boʻladi, deb koʻrsatiladi. Jahon banki tomonidan tayyorlangan «World Development Report» ma'ruzasida korrupsiya iqtisodiy oʻsish sur'atlarining pasayishi va aholi jon boshiga daromadlarning past darajasi bilan xarakterlanishi ta'kidlanadi. Shu sababli xalqaro moliyaviy tashkilotlar rivojlanayotgan mamlakatlarga kreditlar ajratayotganda, shu davlatlar hukumati korrupsiya bilan kurashishning maxsus tuzilmasini yaratish kerakligini talab qilinmoqda. Biroq Transparency International tadqiqotlariga koʻra, bundan kam natija chiqayotganligi ta'kidlanmoqda. Transparency raisi Djon Gitongo ushbu tuzilmalarning koʻpchiligi parlament yoki sud tizimi bilan korrupsiya masalasida toʻqnashuvlarga (konflikt) duch kelib, «yetim»larga aylanib qolayotganligi hamda ushbu tuzilmaning tarafini olmaslik hollari uchrab turishini ta'kidlaydi.

Korrupsiyaga qarshi kurash davlat tuzilmalari oʻz vazifalarini toʻliq bajarishlari uchun fuqarolik jamiyati tomonidan qoʻllab-quvvatlanishi kerak. «Biroq, — deydi Djon Gitongo, — rivojlanayotgan mamlakatlarda fuqarolik jamiyati hali yaxshi taraqqiy etmagan». Korrupsiya va jinoyatchilikning xavfsizlikka soladigan tahdidlari majmui Prezident Islom Karimov ta'kidlashicha, quyidagilardan iborat:

- amalga oshirilayotgan islohotlarga qarshilik koʻrsatish;
- davlatning konstitutsiyaviy asoslarini yemirish;
- jamiyatning ma'naviy-axloqiy asoslarini yemirish;
- jamiyat a'zolarining fuqarolik mavqeini yoʻqqa chiqarish, islohotlar gʻoyasini obroʻsizlantirish;
 - pul orqali hokimiyatni qoʻlga olish uchun intilish;
- nopok yoʻllar bilan boylik orttirish. Bunday kimsalar adolatli jazodan qoʻrqib, hamma ishni qilishga, hatto vaziyatni beqarorlashtirishga, ommaviy tartibsizliklarni keltirib chiqarishga shay turuvchilardir;
- jinoiy usullar bilan boylik orttirgan kimsalarni «demokratiya» uchun jafo chekkan kurashchilar deb koʻrsatish. Bunday shaxslar, avvaliga oʻz xalqini aldab, kapital toʻplaydi, keyingi gal demokratiya va adolatli roʻkach qilgan holda jamoatchilik fikrini aldab, siyosiy obroʻorttiradi. Sir emaski, bunday shaxslar oʻz manfaatlari yoʻlida respublikadagi vaziyatga ta'sir koʻrsatishga urinayotgan tashqi kuchlarga xizmat qilishga hamisha tayyor turuvchilardir;
- jahon xoʻjalik aloqalariga faol integratsiyalashuv, chet el investitsiyalari va tadbirkorlarini iqtisodiy oʻzgarishlar jarayoniga tortishga

qarshilik koʻrsatish. Bu holat chet ellik sheriklarda ishonchsizlik uygʻotishi natijasida mamlakat gʻoyat muhim kapital mablagʻlar manbaidan, texnologiyalar va tajribalardan, jahon iqtisodiy tizimining sogʻlom, «sof» qismiga qoʻshilish imkoniyatidan mahrum boʻladi.

Yuqorida Prezident Islom Karimov ta'kidlagan korrupsiyaning iqtisodiy xavfsizlikka soladigan tahdidi xorijiy investisiyalarni jalb etish jarayoniga ham salbiy ta'sir ko'rsatadi. Korrupsiya mavjud ekan, uning domini kesish uchun antikorrupsion tadbirlar zarur bo'ladi. Bir guruh mutaxassislar ular jumlasiga ish haqini tartiblashni kiritadi. Amaldorlar mehnatiga to'lanadigan haqning yetarlicha yuqori emasligi korrupsiya keng tarqalishining sababidir, degan fikr ancha keng yoyilgan. Davlat hokimiyati organlari mansabdor shaxslari va davlat xizmatchilarining ish haqi davlatga eng malakali mutaxassislarga ega boʻlish uchun kurashda iqtisodiyotning xususiy sektori bilan raqobat qilishga imkon berishi kerak. Amaldor mehnatiga yuqori darajada haq toʻlansa, u ishini yoʻqotish xavfi bilan bogʻliq muqobil xarajatlar xizmat mavqeidagi gʻayriqonuniy foydalanish orqali oladigan foydasidan ortiq boʻladi. Ya'ni «biznes»ning ushbu turi salbiy foyda keltirib, oʻzining jozibadorligini yoʻqotgan boʻlar edi. Ammo koʻpchilik korrupsiyani eng quyi darajaga yetkazish uchun amaldorlar ish haqini ancha oshirishga toʻgʻri keladi, deb hisoblaydilar. Boshqacha aytganda, korrupsiyaga qarshi kurashning faqat shu yoʻlidan foydalanadigan bo'lsa, bu mamlakat budjetiga qimmatiga tushishi va qoʻyilgan maqsadga erishilmasligi mumkin. Hatto ish haqi yuqori boʻlgan taqdirda ham, barcha amaldorlar korrupsiya evaziga uni koʻpaytirishdan voz kechmagan hollar mavjud.

2003-yil 31-oktabrda Vena shahrida BMT Bosh Assambleyasi BMTning korrupsiyaga qarshi xalqaro konvensiyasini ma'qulladi, dekabr boshida esa imzoladilar. Yangi xalqaro bitim 30 ta mamlakat uni ratifikatsiya qilganidan soʻng kuchga kiradi va 2005-yil 9-dekabrgacha davlatlar hamda iqtisodiy hamkorlik boʻyicha mintaqaviy tashkilotlar imzolashlari uchun ochiq qoladi. Korrupsiyaning qabul qilinishini jahon hamjamiyati «chuqur qoniqish hissi bilan» kutib oldi. Aftidan, bu globallashuv sharoitida korrupsiya dunyoning deyarli barcha davlatlari farovonligiga tahdid solayotganligi bilan bogʻliq. Masalan, Jahon bankining ma'lumotlariga qaraganda, butun dunyoda YAIMning taxminan 5 foiz korrupsiya, moliyaviy mablagʻlardan notoʻgʻri foydalanish va ortiqcha xarajatlar (rastratalar) tufayli yoʻqotiladi. Control Risks Group konsalting firmasining xabar berishicha, xalqaro kompaniyalarning deyarli yarmi raqobatchilari pora berish yordamida ularning biznesini

singdirganligi tufayli oxirgi besh yil ichida boshqa mamlakatlarga investitsiya kiritishdan voz kechishlariga toʻgʻri kelgan. Korrupsiyaning yuqori darajadaligi investorlarga solinadigan qoʻshimcha soliqqa tenglashtiriladi. BMTning huquqiy maslahatchisi Xans Korell korrupsiya – universal hodisa, ammo u rivojlanayotgan mamlakatlar uchun ayniqsa, halokatlidir, deb hisoblaydi: «Korrupsiya huquqiy jamiyat qurish, investitsiyalarni jalb qilish va aholining, ayniqsa, uning kambagʻal qatlamlarining farovonligini oshirish borasida barcha harakatlarini yoʻqqa chiqaradi». «Transparency International» firmasining bosh direktori Piter Aygen fikricha, «odamlar ushbu muammoning qanchalik muhimligi va unga qarshi kurash qanchalik qiyinligini tushuna boshladilar. Xalqaro aksilkorrupsiyaviy koalitsiyaga oʻxshash nimadir paydo boʻldi».

birga, konvensiya qabul gilinishining korrupsiyaga qarshi kurash uchun katta ahamiyatga egaligini ta'kidlagan bir qator qashshoq mamlakatlar vakillari har holda Konvensiyada nazarda tutilgan maqsadlardan biri bo'lgan avvalgi davlat boshliqlari xorijga olib ketgan pul mablag'larini qaytarish mumkinligiga chiqib bildirmoqdalar. Shunchalik koʻp yuridik toʻsiqlar mavjudki, qashshoq mamlakatlarda ularni yengish uchun mablag'lari yetmaydi. Ayni vaqtda konvensiya qabul qilinganligi sababli mansabdor shaxslar, birinchi navbatda, korrupsiya keng yoyilgan mamlakatlarning mansabdor shaxslariga ta'sir ko'rsatishining yangi siyosiy dastagi paydo bo'layotganligini tan olmaslik mumkin emas. Endilikda jahon jamoatchiligining fikrini birlashtirish va harakatlarni dunyoning bunday mamlakatlari hukumatlariga qarshi muvofiqlashtirish mumkin boʻladi. oldilarida faqat bitta yoʻl – korrupsiyaga qarshi kurashni iloji boricha kuchaytirish yoʻli turibdi. Shu jihatdan qaraganda Xitoyning «Jenmin Jibao» gazetasida bildirgan fikr e'tiborga loyiq. Unda mamlakat BMTning korrupsiyaga qarshi konvensiyasini imzolagani haqida xabar e'lon qilingan bo'lib, odil sudlov organlarida ishlayotgan korrupsionerlarga qarshi kurashda erishilgan katta yutuqlar haqida ma'lumotlar keltirilgan. Endi koʻp davlatlar, birinchi navbatda, Konvensiyani imzolagan, ratifikatsiya qilgan davlatlar xalqaro hamjamiyat oldida korrupsiya bilan bogʻliq vaziyat haqida oshkora hisobot berishiga toʻgʻri keladi.

BMT Bosh kotibining korrupsiyaga qarshi konvensiyaning imzolanishiga bagʻishlangan yuqori darajadagi siyosiy konferensiya ochilishi munosabati bilan yuborgan maktubida aytilishicha, korrupsiya koʻpchilik mamlakatlarda qashshoqlikning chuqurlashtirishga olib keladigan va hammamizga daxldor boʻlgan va kutilmagan oqibatlarga

olib keladigan ofat. Ushbu Konvensiyaning imzolanishi bu zulmga qarshi kurashimizda erishilgan yirik gʻalabadir. Har yili bu kun BMTning korrupsiyaga qarshi kurashga bagʻishlangan kuni sifatida nishonlanadi. Konvensiyada korrupsiyani yoʻq qilish uchun davlatlarning oʻzlari mas'ul ekanligi aniq belgilangan. Konvensiyada ularga barcha mamlakatlar oʻzlarining davlat boshqaruvi rejimlarini va korrupsiyaga qarshi kurash sohasidagi institutlarini mustahkamlashlarda foydalanishlari mumkin boʻlgan keng qamrovli standartlar paketi taklif qilingan.

Unga koʻra, hukumatlar oʻzlarining tasarrufida (yurisdiksiyasida) boʻlib qolgan va korrupsiya yoʻli bilan qonunga xilof tarzda olingan mablagʻlarni ular oʻgʻirlangan mamlakatlarga qaytarishga majburdirlar. Ushbu qoida jiddiy gʻalabadir. U korrupsiyalashgan elitasi yangi hukumatlar oʻz mamlakatlariga yetkazilgan ijtimoiy-iqtisodiy zararni tiklash uchun nihoyatda muhtoj boʻlgan milliardlab dollarni gʻayriqonuniy ravishda oʻzlashtirgan koʻplab rivojlanayotgan mamlakatlar oldida turgan dolzarb muammolarni hal qilishga imkon beradi.

BMTnng sobiq Bosh kotibi Kofi Anan barcha mamlakatlarni ushbu Konvensiyani tezroq ratifikatsiya qilishga chaqiradi. Chunki uning har tomonlama bajarilishi kambagʻallar va himoyalanmaganlar uchun korrupsiyalashgan amaldorlarning va oʻz manfaatlari yoʻlida har qanday vositalardan qaytmaydigan chayqovchilarning ochkoʻzligidan himoyani ta'minlashga yordam beradi. U bugungi jadal oʻzgarayotgan dunyoda kambagʻallar yanada qashshoqlashmasligiga yordam beradi va rivojlanish sohasidagi muhim toʻsiqlarni bartaraf etib, bu Ming yillik deklaratsiyasida qoʻyilgan maqsadlarga erishish va butun dunyodagi millionlab odamlarning hayotini yaxshilashga yordam berishi mumkin.

Prezident Islom Karimov ta'kidlaganidek, «mamlakatimizning kelajagini va obro'-e'tiborini qadrlaydigan har bir vijdonli fuqaro bu tahdidni esda tutmog'i darkor. Halol mehnat qilish, o'z bilimi, kuch-g'ayrati va ijodiy qobiliyatini sarflash uchun barqaror shart-sharoit bo'lishini istaydigan, farzandlari va yaqin kishilari kelajakda ham demokratik, fuqarolik jamiyatida sivilizatsiyalashgan bozor munosabatlarining samaralaridan to'la-to'kis foydalanishni orzu qiladigan har bir fuqaro, jinoyatchilik va korrupsiya yo'liga o'z vaqtida zarur to'siq qo'yilmasa, bu illatlar qanday ayanchli oqibatlarga olib kelishi mumkinligini yaxshi anglab yetmog'i lozim»¹.

 $^{^1}$ *Каримов И. А.* Хавфсизлик ва барқарор тараққиёт йўлида. Т. 6. – Т.: «Ўзбекистон», 1998. – Б. 429.

5. Xufiyona iqtisodiyotga qarshi kurashda davlatning chora-tadbirlari

Bugun «xufiyona» iqtisodiyot muammosini hal qilishning quyidagi variantlari haqida soʻz yuritish mumkin:

- dastlabki kapital jamgʻarishning nihoyatda yuqori sur'atlari haqidagi maqsadli yoʻnalishlar bilan bogʻliq boʻlgan radikal-liberal variant;
- radikal-liberal variantga qarshi usul sifatida yuzaga kelgan hamda kuchga asoslangan va boshqa tuzilmalarning tegishli boʻlinmalari faoliyatini kengaytirish va kuchaytirishni taqozo etuvchi repressiv variant;
- kichik biznes va tadbirkorlikni rivojlantirish uchun zarur shartsharoitlarni ta'minlashga doir qonunchilikni takomillashtirish bilan bogʻliq kompleks-huquqiy variant.
- «Xufiyona» iqtisodiyotga nisbatan oxirgi modelni amalga oshirish quyidagi siyosatni yuritishni taqozo etadi:
- a) jinoyatchi unsurlar va «xufiyona» xoʻjalik yurituvchilar kapitallarini aniq ajratish hamda bunday ajratishni yangi qonun hujjatlarida qayd etish;
- b) biznes uchun qulay huquqiy va xoʻjalik muhiti, birinchi navbatda, soliq rejimini yaratish va qoʻllab-quvvatlash;
- c) davlat tomonidan aholini moliyaviy firibgarliklardan himoya qilish choralarini ishlab chiqish va amalga oshirish, jamgʻarilgan omonatlar va kapitallarning himoyalanganligi kafolatlarini ta'minlash;
- d) iqtisodiyotning real sektoriga investitsiya kiritish uchun qaratilgan pul mablagʻlarining legallashtirilishini tasdiqlovchi yuridik institutlar mexanizmini ishga tushirish.

jumladan korrupsiyaga, Mamlakatimizda davlat boshqaruvi sohasidagi korrupsiyaga qarshi kurashish borasida muayyan ishlar amalga oshirilmoqda. Bundan tashqari, 2006–2008-yillarda Rossiya Federatsiyasida ma'muriy islohotlar konsepsiyasida (Rossiya Federatsiyasi hukumati tomonidan 2005-yil 25-oktabrda ma'qullangan) korrupsiya yuzaga kelishining institutsional omillarini bartaraf etishga qaratilgan bir qator tizimli aksilkorrupsiyaviy tadbirlar belgilangan. Erkin bozorga kirish yoʻlidagi toʻsiqlarni kamaytirish, iqtisodiyotdagi xarajatlarning umumiy darajasini pasaytirish, yangi korxonalar tashkil etilishini shuningdek faol investitsiya muhitini yaxshilash rag'batlantirish, maqsadida quyidagi tadbirlarni amalga oshirish zarur:

- ijroiya hokimiyat organlarida davlat xizmatlari koʻrsatishning ma'muriy tartiblarini ishlab chiqish;
- mamlakatimiz subyektlarining ijroiya hokimiyat organlarining qarorlari va harakatlari ustidan sudgacha boʻlgan bosqichda shikoyat qilish mexanizmlarini joriy etish;
- davlat ehtiyojlari uchun xaridlar tizimining samaradorligini oshirish
 xaridlarning oshkoraligi va ochiqligini oshirish, davlat kontraktlarining ochiq roʻyxatini yuritish, xaridlarni qattiq tartibga solish;
 - idoraviy va mintaqaviy aksilkorrupsiyaviy dasturlarni joriy etish;
- davlat organlari va mahalliy oʻzini oʻzi boshqarish organlarining faoliyatiga doir ma'lumotlarni ochib berish;
- normativ-huquqiy hujjatlarni korrupsiyaga sharoit yaratishyaratmasligi nuqtai nazaridan ekspertizadan oʻtkazish;
- tayyorlanayotgan qarorlarni ommaviy muhokamadan oʻtkazish, ijroiya hokimiyat organlarining jamiyat uchun muhim qarorlarini jamoatchilik ekspertizasidan oʻtkazish;
- fuqarolik jamiyati vakillarini nazorat organlari hay'atlariga, ijroiya hokimiyat organlarining fuqarolar va tashkilotlar huquqlari va qonuniy manfaatlariga doir normativ-huquqiy hujjatlari va boshqa qarorlarini tayyorlash bilan shug'ullanuvchi ishchi guruhlarga, boshqa tuzilmalariga kiritish;
- ijroiya hokimiyat organlari qoshida fuqarolik jamiyati vakillari ishtirokida jamoat kengashlari tuzish.
- «Xufiyona» iqtisodiyot bir qator hollarda nafaqat milliy, balki xalqaro xususiyatga ham ega boʻlganligi sababli (korrupsiya, pullarni «yuvish», terrorizmni moliyalashtirish kabi hollarda), mazkur hodisalarga qarshi kurashning xalqaro huquqiy asoslarini tashkil etuvchi bir qator hujjatlarga e'tibor qaratish lozim. Ularga, birinchi navbatda, BMTning quyidagi hujjatlari kiradi:
- Birlashgan Millatlar Tashkilotining Transmilliy uyushgan jinoyatchilikka qarshi 2000-yil 15-noyabr konvensiyasi;
- Birlashgan Millatlar Tashkilotining Korrupsiyaga qarshi 2003-yil 31-oktabr konvensiyasi;
- Terrorizmni moliyalashtirishga qarshi kurash toʻgʻrisidagi 1999-yil 9-dekabr xalqaro konvensiyasi.

Yevropa Kengashi va Yevropa Ittifoqining hujjatlariga quyidagilar kiradi:

 Yevropa Kengashining Korrupsiyaga qarshi jinoiy javobgarlik toʻgʻrisidagi konvensiyasi (Strasburg, 1999-yil 27-yanvar); – Pullarni «yuvish»ga qarshi Parij deklaratsiyasi (Yevropa Ittifoqining pullarni «yuvish»ga qarshi kurash boʻyicha parlament konferensiyasining Yakuniy deklaratsiyasi, 2002-yil 8-fevral).

MDH hujjatlari orasida «Korrupsiyaga qarshi siyosatga doir qonunchilik asoslari toʻgʻrisida»gi model qonunini ta'kidlab oʻtish lozim (2003-yil 15-noyabrda MDH PAning XXII yalpi majlisida qabul qilingan).

Noqonuniy daromadlarni legallashtirish (oshkoralashtirish)ga qarshi kurash choralarini amalga oshirish uchun pullarni «yuvish» muammolari boʻyicha maxsus moliyaviy komissiya (FATF) tashkil etilgan edi. Uning tarkibiga Yevropa, Shimoliy Amerika va Osiyoning asosiy moliyaviy markazlari vakillari kirgan. Ushbu hukumatlararo tashkilot 1990-yilda «Pullarni yuvish muammolari boʻyicha qirqta tavsiya»ni tayyorlab, jahon jamoatchiligiga taklif etgan. 1996-yilda bu tavsiyalar oʻtgan yillar mobaynida toʻplangan tajribani hamda pullarni «yuvish» sohasida yuz bergan oʻzgarishlarni hisobga olish uchun qayta koʻrib chiqildi. 2002-yilda FATFning tavsiyalari terrorizmni moliyalashtirishga bogʻliq operatsiyalarni aniqlash bilan shugʻullanuvchi moliyaviy muassasalar uchun qabul qilindi.

Oʻzbekiston Respublikasining Konstitutsiyasi, Fuqarolik protsessi, Oʻzbekiston Respublikasining Soliq kodekslarida bozor borasidagi iqtisodiy munosabatlarning prinsiplari qonuniy jihatdan muhrlab qoʻyilgan:

- barcha mulk shakllarining daxlsizligi va teng ravishda davlat himoyasida ekanligi;
 - iqtisodiy faoliyat erkinligi;
 - tovarlar, xizmatlar va moliyaviy resurslarning erkin aylanishi;
 - yagona iqtisodiy makon;
 - sogʻlom raqobatni qoʻllab-quvvatlash;
 - erkin va qonuniy tadbirkorlik.

Oʻzbekiston Respublikasining Fuqarolik kodeksi quyidagilarni tartibga soladi:

- shartnoma va boshqa majburiyatlarni;
- mulkiy va u bilan bogʻliq shaxsiy mulkiy boʻlmagan munosabatlarni.

Oʻzbekiston Respublikasining Soliq kodeksi (yangi tahrirda 2008-yil 1-yanvardan kuchga kirgan) quyidagilarni belgilaydi:

- soliqqa tortishning prinsiplari;
- soliqlarning roʻyxati;

- soliqqa oid huquqiy munosabatlar protseduralari (taomillari) va qoidalari;
- soliqqa oid huquqiy munosabatlar ishtirokchilarining huquq va majburiyatlari.

Oʻzbekiston Respublikasining Jinoyat kodeksi (1994-yil 22-sentabrda tasdiqlangan) uchinchi boʻlimi «Iqtisodiyot sohasidagi jinoyatlar» nomlanadi va oʻz tarkibiga X, XI, XII, XIII boblarni qamrab olgan.

Xalqaro darajada iqtisodiy xavfsizlik sohasidagi eng aniq tahdidlardan biri korrupsiyadir. Shu bois xalqaro tashkilotlar unga qarshi kurashning quyidagi chora-tadbirlarini taklif etadilar:

- milliy darajada bir tomonlama majburiyatlarni qabul qilish;
- ayrim firmalarning ixtiyoriy majburiyatlarini e'lon qilishi,
 korrupsiyaga qarish milliy qonunlarning tegishli modellarini yaratish;
- noqonuniy toʻlovlarning oldini olish maqsadida firmalar va ularning xorijdagi boʻlinmalarini sertifikatlash;
- korrupsiyaga qarshi choralar nazarda tutiladigan xatti-harakat kodekslarini ishlab chiqish;
 - korrupsiyaga qarshi kurash boʻyicha xalqaro bitim tuzish.

Shunday qilib, ushbu mavzuda quyidagi asosiy kategoriya va tushunchalar koʻrib chiqildi: «xufiyona» iqtisodiyot, «xufiyona» iqtisodiyotning sabablari va rivojlanish oqibatlari, «xufiyona» iqtisodiyotning oʻzgarishi va miqyosi, korrupsiya, soliqdan boʻyin tovlash, uyushgan jinoyatchilik iqtisodiyoti, iqtisodiyotning jinoiylashuvi, narkobiznes, terrorizm iqtisodiyoti, jinoyatchilikka qarshi kurashni iqtisodiy jihatdan maqbullashtirishning umumiy prinsiplari.

Davlatimiz rahbarining tashabbusi bilan fuqarolar, ayniqsa, bolalarimizning sogʻligʻini himoya qilish va jamoat xavfsizligini ta'minlash maqsadida 2011-yilning sentabrida «Pirotexnika buyumlari muomalasi tartibga solinishi munosabati bilan Oʻzbekiston Respublikasining ayrim qonun hujjatlariga qoʻshimchalar kiritish toʻgʻrisida»gi qonun qabul qilindi.

Ta'kidlash joizki, oxirgi yillarda pirotexnika vositalari, ayniqsa, maishiy turdagilarining aylanmasi keskin oshdi. Koʻpchilik holatlarda bunday vositalarni Oʻzbekiston Respublikasiga olib kirish, tayyorlash, saqlash, tashish, joʻnatish va ulardan foydalanishda oʻrnatilgan tartib qoʻpol ravishda buzib kelingan.

Huquqni muhofaza qiluvchi organlar tomonidan 2006–2010-yillarda respublika hududida oʻtkazilgan hamkorlikdagi reydlar va boshqa tadbirlar natijasida 4,2 ming nafardan ortiq huquqbuzardan olib qoʻyilgan

pirotexnika vositalari oʻrnatilgan savdo qilish qoidalari va normalariga hamda tashish va yongʻin xavfsizligi qoidalariga zid ravishda saqlanganligi aniqlandi. Qabul qilingan qonun bilan Jinoyat kodeksi (250-moddasi) va Ma'muriy javobgarlik toʻgʻrisidagi kodeksga (185-moddasi) pirotexnika mahsulotlarining noqonuniy aylanmasi uchun javobgarlik kiritildi. Endilikda, pirotexnika buyumlarini qonunga xilof ravishda ishlab chiqarish, tayyorlash, saqlash, oʻtkazish, foydalanish va boshqa harakatlar uchun shaxs sud tomonidan huquqbuzarlik ashyolarini musodara qilib, eng kam ish haqining besh baravaridan yigirma baravarigacha miqdorda jarimaga tortilishi mumkin. Agarda huquqbuzarlik sodir etganidan soʻng, tegishli jazo qoʻllanilganiga qaramasdan, yana shunday harakatlarni sodir etsa, bunday shaxs jinoiy javobgarlikka tortilishi belgilab qoʻyildi.

Shubhasiz, pirotexnika aylanmasini tartibga solishga qaratilgan mazkur qonun hamda hukumat qarori fuqarolarning sogʻligʻini himoyalashga, ushbu vositalardan foydalangan holda madaniy-tomosha va boshqa tadbirlarni oʻtkazishda xavfsizlik choralarini kuchaytirishga hamda iste'molchilarning huquqlarini muhofazalashga xizmat qiladi.

Tayanch tushunchalar:

Xufiyona iqtisodiyot, jinoiy-iqtisodiy faoliyat, xufiyona iqtisodiyotning gʻayriqonuniy iqtisodiy usullari, ikkilamchi iqtisodiyot, rasman ruxsat etilgan faoliyat, korrupsiya, qalbakilashtirilgan iqtisodiy faoliyat.

Savol va topshiriqlar:

- 1. Xufiyona iqtisodiyotni ta'riflang.
- 2. Xufiyona iqtisodiyotga qarshi kurashning qanday xalqaro huquqiy asoslarini bilasiz?
- 3. Davlatimiz rahbari Islom Karimovning «Oʻzbekiston XXI asr boʻsagʻasida: xavfsizlikka tahdid, barqarorlik shartlari va taraqqiyot kafolatlari» asarida korrupsiya va xufiyona iqtisodiyotga oid ta'riflarni, ularning xavfsizlikka soladigan tahdidlarini konspekt qiling va mohiyatini tushuntirib bering.
- 4. Xufiyona iqtisodiyotga qarshi kurashda xalq hokimiyati institutlarining oʻrni va ahamiyati qanday?
- 5. Xufiyona iqtisodiyotning mamlakat real iqtisodiyotiga ta'sirini sharhlab bering.
- 6. Oʻzbekiston Respublikasining Jinoyat kodeksida jamiyatimiz iqtisodiy asoslariga qaratilgan qanday javobgarliklar belgilanganini izohlang.
- 7. Xufiyona iqtisodiyotning iqtisodiy oʻsishga ta'siri va oqibatlari qanday boʻladi?

Mavzuni chuqur o'rganish instrumentariysi

Xufiyona iqtisodiyot – huquqiy maydondan tashqarida amalga oshiriladigan jamiki iqtisodiy munosabatlar yigʻindisidir.

Xufiyona iqtisodiyot – qonunlar, huquqiy normalar, xoʻjalik hayotining rasmiy qoidalarini chetlab oʻtib, ya'ni huquqiy maydon doirasidan tashqarida yuz beradigan iqtisodiy munosabatlarning ma'lum turidir. Xufiyona iqtisodiyot murakkab, koʻp bosqichli hodisa. Uning tur va shakllari xilma-xil. Xufiyona iqtisodiyot maqsadi, faoliyati va iqtisodiy-ijtimoiy oqibatlariga koʻra bir necha turlarga boʻlinadi.

Jinoiy-iqtisodiy faoliyat. Bu mutlaqo man etilgan, qonun yoʻli bilan taqiqlangan ishlar bilan shugʻullanish. Masalan, narko, porno, qurol-yarogʻ bizneslari va h.k. Gʻayriqonuniy, gʻayriiqtisodiy usullar bilan daromadlarni qayta taqsimlab, oʻzlashtirib olish, masalan, oʻgʻrilik, bosqinchilik, reket, poraxoʻrlik.

Ikkilamchi iqtisodiyot – kishilarga zarar keltirmaydigan, ular uchun naf beradigan, lekin rasman ruxsat berilmagan va davlat roʻyxatidan oʻtmagan iqtisodiy faoliyat. Ular yashirin tadbirkorlik hisoblanadi. Rasman ruxsat etilgan faoliyat bilan birga, qoʻshimcha ravishda yashirin ishlab chiqarishga qoʻl urish, ochiq ishlaydigan korxonalarda qoʻshimcha ravishda hisobga kirmagan mahsulot chiqarib, uni yashirin sotish.

Mansabni suiiste'mol qilish va korrupsiyaga asoslangan iqtisodiy xatti-harakatlar. Bular jumlasiga davlat idoralaridagi yashirin poraxoʻrlik, yashirin lobbizm, mansabdan foydalanib, subsidiyalar olishni kiritish mumkin.

Qalbakilashtirilgan iqtisodiy faoliyat. Bu iqtisodiyot davlat sektoriga xos boʻlib, davlatni aldashga qaratiladi. Buning eng yaqqol namunasi davlat sektoridagi qoʻshib yozishlar, qilinmagan ishlar uchun davlatdan haq olish va boshqalar.

Mavzu yuzasidan asosiy xulosalar:

1. Jahon mamlakatlari iqtisodiy xavfsizligi davlat strategiyasi tajribasidan kelib chiqib, amaldagi qonunlar iqtisodiyot ahvolining Oʻzbekiston iqtisodiy xavfsizligi talablariga javob beradigan mezonlari orasida quyidagilarni keltirish mumkin: jamiyat hamda xoʻjalik va moliya faoliyatining barcha sohalari jinoiylashuviga yoʻl qoʻymaydigan iqtisodiy va huquqiy shartsharoitlarning yaratilishi, jinoiy tuzilmalarning ishlab chiqarish va moliya institutlarini egallab olishiga, hokimiyatning turli institutlariga kirib borishiga yoʻl qoʻymaslik kabilar va hokazo.

Mamlakatimiz milliy boyligi davlat budjetining daromadlarini taqsimlash va qayta taqsimlashda ishtirok etish iqtisodiy agentlarga har qanday xoʻjalik faoliyatiga qaraganda, ancha koʻp foyda kelishini ta'minlaydi. Bunday faoliyat «xufiyona» iqtisodiyot nomini oldi.

- 2. Adabiyotlarda «xufiyona iqtisodiyot» kategoriyasini ta'riflashga quyidagi yondashuvlarning ayrimlarini keltiramiz:
- «xufiyona» iqtisodiyot faoliyatning taqiqlangan turlari sifatida
 baholanadi;
- «xufiyona» iqtisodiyot iqtisodiy faoliyatning aytilmagan va yashirilgan turlari sifatida ta'riflanadi;
- «xufiyona» iqtisodiyot u yoki bu sabablarga koʻra, rasmiy statistikada inobatga olinmaydigan, yalpi ichki mahsulotga kiritilmaydigan, soliqqa tortishdan «tushib» qoladigan har qanday iqtisodiy faoliyat sifatida talqin etiladi;
- «xufiyona» iqtisodiyot milliy xavfsizlikka tahdid sifatida ayrim individlar, ularning guruhlari, institutsional subyektlar oʻrtasida moddiy ne'matlar va xizmatlarni ishlab chiqarish, taqsimlash, ayirboshlash va iste'mol qilish borasida yuzaga keladigan hamda natijalari u yoki bu sabablarga koʻra, rasmiy statistikada inobatga olinmaydigan va soliqqa tortilmaydigan munosabatlar majmuidir.
- 3. Xufiyona iqtisodiyot ishtirokchilari tomonidan oshkora olib borilmaydigan, davlat va jamiyat tomonidan nazorat qilinmaydigan, soliq toʻlanmaydigan, rasmiy davlat statistikasida qayd etilmaydigan iqtisodiy faoliyat turlari. Xufiyona iqtisodiyot oshkora payqab boʻlmaydigan tovarlar va xizmatlarni ishlab chiqarish, taqsimlash, iste'mol jarayonlari iqtisodiy munosabatlar boʻlib, uning negizida ayrim kishilar yoki kishilar guruhi manfaatlari yotadi. Xufiyona iqtisodiyot dunyoning deyarli hamma mamlakatlarida mavjud.
- 4. Xufiyona iqtisodiyotdagi ijtimoiy zararli faoliyat davlat tomonidan qat'iyan taqiqlanadi, unga qarshi hamma choralar bilan kurash olib boriladi, ijtimoiy foydali faoliyatning (norasmiy boʻlsa-da, kishilarning talabehtiyojlarini qondiradi) oshkoralikka chiqishi iqtisodiy jihatdan ragʻbatlantiriladi, masalan, soliqlar yengillashtiriladi.
- 5. Xufiyona iqtisodiyot miqyosi yashirin iqtisodiy aylanmani, ya'ni ruxsat etilmagan tovar va xizmatlarni yaratish va ularni sotish hajmi bilan belgilanadi, uning aniq hisob-kitobi boʻlmaydi. Buning oʻrniga uni taxminan baholash usuli qoʻllaniladi. Ayrim hisob-kitoblarga koʻra, oʻtgan asrning oxirlarida Yer yuzidagi yashirin iqtisodiy aylanma 8 trln. dollarga yoki jahon yalpi mahsulotining 27,5 foiziga teng boʻlgan, biroq xufiyona iqtisodiyot miqyosi turli mamlakatlarda farqlanadi. Xufiyona iqtisodiyot eng rivojlangan hududlarga Lotin Amerikasi va Afrika mamlakatlari kiradi.

6. «Xufiyona» iqtisodiyot bir qator hollarda nafaqat milliy, balki xalqaro xususiyatga ham ega boʻlganligi sababli (korrupsiya, pullarni «yuvish», terrorizmni moliyalashtirish kabi hollarda), mazkur hodisalarga qarshi kurashning xalqaro huquqiy asoslarini tashkil etuvchi bir qator hujjatlarga e'tibor qaratish lozim, Ularga, birinchi navbatda, BMTning quyidagi hujjatlari kiradi: Transmilliy uyushgan jinoyatchilikka qarshi 2000-yil 15-noyabr konvensiyasi; Korrupsiyaga qarshi 2003-yil 31-oktabr konvensiyasi; Terrorizmni moliyalashtirishga qarshi kurash toʻgʻrisidagi 1999-yil 9-dekabr xalqaro konvensiyasi.

Yevropa Kengashi va Yevropa Ittifoqining hujjatlariga quyidagilar kiradi: Yevropa Kengashining Korrupsiyaga qarshi jinoiy javobgarlik toʻgʻrisidagi konvensiyasi (Strasburg, 1999-yil 27-yanvar);

Pullarni «yuvish»ga qarshi Parij deklaratsiyasi (Yevropa Ittifoqining pullarni «yuvish»ga qarshi kurash boʻyicha parlament konferensiyasining Yakuniy deklaratsiyasi, 2002-yil 8-fevral) miqyosi, korrupsiya, soliqdan boʻyin tovlash, uyushgan jinoyatchilik iqtisodiyoti, iqtisodiyotning jinoiylashuvi, narkobiznes, terrorizm iqtisodiyoti, jinoyatchilikka qarshi kurashni iqtisodiy jihatdan maqbullashtirishning umumiy prinsiplari.

4-BO'LIM. JAHON IQTISODIYOTI

20-MAVZU. JAHON XOʻJALIGI VA GLOBALLASHUV MUAMMOLARI

1. Hozirgi jahon xoʻjaligi va iqtisodiyotining mohiyati. Jahon xoʻjaligining shakllanishi va xususiyatlari

Jahon xoʻjaligi yoki jahon iqtisodiyoti – bu bir-birini taqozo etuvchi, jadal oʻzaro bogʻliq rivojlanishda boʻlgan va jahon iqtisodiy tizimini tashkil qilgan milliy xoʻjaliklarning majmui boʻlib, iqtisodiy yaxlitlikni tashkil etadi.

XXI asrning dastlabki oʻn yilligida 210 dan ortiq mamlakat iqtisodiyoti birlashgan boʻlib, bular yaratgan tovar va xizmatlar summasi bir necha oʻnlab trillion AQSh dollarini tashkil etadi. Jahon xoʻjaligi yoki iqtisodiyoti uch guruh mamlakatlar, ya'ni iqtisodiyoti yuksak rivojlangan, iqtisodiyoti oʻrtacha rivojlangan va iqtisodiyoti qoloq mamlakatlardan iborat. Jahon iqtisodiyoti tizimining asosiy elementlari quyidagilar: milliy xoʻjaliklar, transmilliy korporatsiyalar, integratsiyaviy birlashmalar, xalqaro iqtisodiy tashkilotlar.

Jahon iqtisodiyoti tizimida davlatlarning tashqi iqtisodiy aloqalari integratsiyalovchi, birlashtiruvchi rol oʻynaydi. Uning asosida moddiy va ma'naviy ne'matlarni xalqaro va milliy miqyosda ishlab chiqarish, ularni taqsimlash, ayirboshlash va iste'mol qilish yotadi. Jahon iqtisodiyoti faoliyatining asosiy maqsadi — resurslar cheklanib borayotgan sharoitda insonning yuksalib borayotgan ehtiyojlarini qondirish.

Jahon xoʻjaligi miloddan avvalgi yillardayoq mamlakatlar oʻrtasida tovar va xizmatlar «harakati orqali» rivojlana boshlagan. Bozor munosabatlarining faol yoyilishiga XV–XVII asrdagi buyuk jugʻrofiy kashfiyotlar, XIX asrda mashina sanoati, transport va aloqa sohasidagi yangi vositalarning paydo boʻlishi sabab boʻldi. XIX asrning oxiriga kelib sanoat ishlab chiqarishi va xalqaro mehnat taqsimoti asosida mamlakatlar oʻrtasidagi savdo-iqtisodiy va moliya-kredit munosabatlari tizimi sifatida tovar va xizmatlarning jahon bozori shakllandi.

XIX–XX asrlar chegarasida ishlab chiqarish omillari, mamlakatlar va mintaqalar oʻrtasidagi iqtisodiy resurslarning xalqaro harakati jadallashdi.

Iqtisodiy manfaatdorlik asosida xalqaro hamkorlikni amalga oshiruvchi milliy xoʻjaliklar majmui sifatida jahon xoʻjaligi shakllandi. Jahon iqtisodiyotining shakllanishiga quyidagi davrlar xosdir:

- Birinchi jahon urushining boshidan 50-yillar boshigacha mamlakatlar oʻrtasidagi xoʻjalik aloqalarining buzilishi, soʻngra astasekin tiklanishi;
- 50-70-yillar davlatlar, transmilliy korporatsiyalarning integratsiyaviy guruhlari yuzaga kelishi, bilimlar (texnologiyalar), tadbirkorlik kapitalining mamlakatlar oʻrtasida koʻchib yurishi;
- 80-90-yillardan XXI asr boshlarigacha rivojlangan mamlakatlarning postindustrial taraqqiyotga, qoloq mamlakatlarning iqtisodiy qoloqlikni faol bartaraf etishga, sobiq sotsialistik mamlakatlarning esa bozor iqtisodiyotiga oʻtishi.

Hozirgi jahon xoʻjaligining mohiyati va xususiyatlari. Hozirgi zamon jahon xoʻjaligining xususiyati — xalqaro iqtisodiy subyektlar sifatining yangi tashqi iqtisodiy strategiyalari hisoblanadi.

Hozirgi zamon jahon xoʻjaligi global xususiyatga ega boʻlib, kichik yoki katta mamlakatlar iqtisodiyotlari majmuidan iborat. Ularning barchasi uzilmas rishtalar bilan bogʻlangan va bir-birini toʻldirib turadi. Jahon xoʻjaligiga integratsiyalashuvning eng istiqbolli va maqbul boʻlgan yoʻnalishini belgilash zarurati ham mavjud. Hozir ochiq milliy iqtisodiyotning jahon xoʻjaligi bilan bogʻlanishi tovarlar, ish kuchi va kapitalning erkin harakati orqali amalga oshiriladi. Bozor tizimiga oʻtishda iqtisodiy oʻsishning tashqi manbalari ichki manbalari bilan bir qatorda turgani uchun yosh mamlakatlar muqarrar ravishda baynalminallashuv jarayoniga kirib borishlari kerak boʻladi.

Ochiq iqtisodiyotning ziddiyligi shundaki, bu milliy iqtisodiyotni tashqi dunyo uchun ochishni va tashqi omillarning salbiy ta'siridan uni himoya qilishni bildiradi. Binobarin, iqtisodiyotning «ochiqligi», bir tomondan, boshqalarga bogʻliqlikni va oʻzgalar ta'siriga berilishni bildiradi. Ayni paytda milliy xoʻjaliklar oʻzaro qoʻshilib ketgan sharoitda iqtisodiy xavfsizlikni ta'minlash muammosini keltirib chiqaradi.

Jahon xoʻjaligi – bu global iqtisodiy organizmdir. Hozirgi jahon xoʻjaligiga ishlab chiqarish kuchlarining baynalminallashuvi va xalqaro iqtisodiy munosabatlarning turli-tuman tizimining yaratilishi xosdir. Hozirgi zamon jahon xoʻjaligiga dunyo mamlakatlarining oʻzaro manfaatdorligi va uzluksiz iqtisodiy hamkorlik xarakterlidir. Shu bois dunyo mamlakatlari oʻz aloqalarida global infratuzilmaga tayanadilar.

Hozirgi zamon jahon xoʻjaligi aloqalari quyidagi shakllarni oʻz ichiga oladi:

- xalqaro savdo;
- ishlab chiqarish kooperatsiyasi;
- axborot ta'minoti;
- ish kuchi migratsiyasi;
- xalqaro kredit;
- chet el investitsiyasi;
- davlatlarning oʻzaro valuta munosabatlari albatta global infratuzilmani taqozo etadi. Bular xalqaro transport tizimi, xalqaro axborot kommunikatsiyasidan iborat.

Hozirgi global iqtisodiyotga dinamizm xos boʻlib, doim oʻzgarib turadi. Bularga muntazam ravishdagi fan-texnika taraqqiyoti yutuqlari, innovatsiyalar (yangiliklar), oʻzaro bogʻliq milliy iqtisodiyotlarning oʻsishi, dunyoning 20 foizga yaqin mamlakatlaridagi ijtimoiy-iqtisodiy munosabatlarda tub islohotlar oʻtkazilayotgani kiradi.

1.2. Jahon iqtisodiyotining tuzilishi

Jahon xoʻjaligining iqtisodiy tuzilishi — tarmoqlar, mintaqalar, korxonalar oʻrtasidagi nisbat, shuningdek yalpi mahsulotning ishlab chiqarilishi va iste'molidagi mutanosibliklar.

Jahon iqtisodiyotining tarkibiga quyidagi elementlar kiradi: tarmoq, takror ishlab chiqarish, hududiy, ijtimoiy-iqtisodiy tuzilmalar (kichik tuzilmalar).

Tarmoq tuzilishi – bu iqtisodiy tarmoqlar oʻrtasidagi oʻzaro nisbat.

Tarmoq – bir xil mahsulot beruvchi korxonalar guruhi. Tarmoqlarning quyidagi guruhlari ajratiladi: qishloq xoʻjaligi; kon sanoati; qayta ishlash sanoati; iqtisodiy infratuzilma; xizmatlar koʻrsatish.

Rivojlangan mamlakatlar iqtisodiyotida xizmat koʻrsatish ustunlik qiladi (xizmatlarning ulushi AQSh iqtisodiyotida – 80 %, Kanadada – 70 %, RFR, Fransiya, Italiyada – 60 % atrofida). AQShda xizmat koʻrsatish sohasida aholining 3/4 qismi, oliy malakali kadrlarning esa 87 % band.

Dunyoda fan yutuqlariga asoslangan texnologiyalarning (robototexnika, EHM va elektroenergiya ishlab chiqarish) hissasi oʻsib bormoqda. Ular rivojlangan mamlakatlar mashinasozlik korxonalari ishlab chiqarish quvvatining 45 % ni tashkil qiladi.

Takror ishlab chiqarish tuzilmasi — bu ishlab chiqarilgan yalpi ichki mahsulot (YAIM)dan foydalanishning har xil turlari oʻrtasidagi nisbat. Takror ishlab chiqarish tuzilmasida iste'mol, jamgʻarish va eksport ajratiladi.

Oddiy takror ishlab chiqarish – ishlab chiqarish sikllarining doimiy ravishda uzluksiz takrorlanishi.

Kengaytirilgan takror ishlab chiqarish – ishlab chiqarish sikllarining doimiy yangilanib, modernizatsiyalashib boruvchi koʻrsatkichlar bilan uzluksiz takrorlanishi.

Noqulay omillar ta'siridagi ishlab chiqarish *toraytirilgan*, ya'ni ishlab chiqarish hajmi pasayib boruvchi ko'rsatkichlarga ega bo'lgan bo'lishi mumkin.

Funksional vazifasiga koʻra, jahon iqtisodiyotining tuzilishi tinch va harbiy ishlab chiqarishga boʻlinadi. Harbiy ishlab chiqarish YAMMning 1–2 % ni tashkil qilsa, ma'qul hisoblanadi.

Hududiy tuzilma – ishlab chiqarishning qaysi tarmoq va turlari ushbu hududda jamlanganini koʻrsatadi. Hududiy tuzilma xomashyo, ish kuchi kabi manbalarning mavjudligi va joylashuvi bilan bogʻliqdir.

Ijtimoiy-iqtisodiy tuzilma ijtimoiy-iqtisodiy uklad va aholi hayotining sifatini aks ettiradi. Mamlakatda hayot sifatining umumlashgan jahon koʻrsatkichi *inson salohiyatining rivojlanish indeksi (ISRI)* hisoblanadi. U uni tashkil etuvchi uchta indeksning oʻrtacha arifmetik koʻrsatkichiga teng: kutilayotgan hayot davomiyligi indeksi, aholining ta'lim sohasiga qamrab olinganligi indeksi, turmush darajasi indeksi.

Rivojlangan mamlakatlarda ISRI 0,1 ga intiladi, qoloq mamlakatlarda esa ISRI 2 ga yaqin. BMT ma'lumotlariga qaraganda, 1990-yildan 2002-yilgacha ISRI atigi 20 ta mamlakatda (Qozogʻiston, Tojikiston, Ukraina, Rossiya, Zambiya va boshqa mamlakatlarda) pasaygan. Jahon iqtisodiyotida rivojlangan industrial mamlakatlar guruhi ajratiladi (Iqtisodiy hamkorlik va taraqqiyot tashkilotiga kiruvchi 30 dan ortiq davlatlar). Ular orasida YAMM hajmi eng katta boʻlgan (dunyo YAMMning 50 %) «sakkizlik»ni AQSh, Yaponiya, Germaniya, Fransiya, Buyuk Britaniya, Italiya, Kanada, Rossiya tashkil qiladi.

Jahon YAMMning 28 % rivojlangan mamlakatlar (130 dan ortiq davlatlar)ga toʻgʻri keladi. Oʻtish davri iqtisodiyoti kechayotgan mamlakatlar (28 ta davlat) dunyo YAMMning taxminan 17–18 % ni ishlab chiqaradilar.

Milliy xoʻjaliklar va jahon iqtisodiyotining makroiqtisodiy aloqalari iqtisodiy faoliyat natijalarini hisobga olishning xalqaro miqyosda tan

olingan qoidalari majmui boʻlgan milliy hisob tizimida (MHTda) aks etadi.

Iqtisodiy faoliyat sektorlarini quyidagilar tashkil qiladi:

- real sektor (xususiy, moliyalashtirilmaydigan); budjet (davlat)
 sektori:
 - pul sektori (markaziy va tijorat banklarining pul oqimlari);
- tashqi sektor (toʻlov balansida oʻz ifodasini topadigan barcha sektorlarning tashqi operatsiyalari.

MHTdan joriy iqtisodiy tahlilni amalga oshirish va iqtisodiy siyosatda strategik qarorlar qabul qilish uchun foydalaniladi.

Aholi jon boshiga toʻgʻri keladigan daromadlar boʻyicha kam daromadli (1000 dollargacha), oʻrta daromadli (7000–10000 dollar) va yuqori daromadli (10000 dollardan ortiq) mamlakatlar ajratiladi.

YAMMda eksportning ulushi bilan oʻlchanadigan jahon bozoriga ochiqlik darajasi boʻyicha nisbatan yopiq (YAMMdagi eksportning ulushi 10 % dan kam) va nisbatan ochiq (YAMMdagi eksportning ulushi 35 % dan koʻp) iqtisodiyotga ega boʻlgan mamlakatlar ajratiladi.

1.3. Jahon taraqqiyoti nazariyalarining konseptual asoslari

Jahon taraqqiyotining eng mashhur nazariyalari iqtisodiy, sotsiologik, shuningdek yagona sivilizatsiya va sivilizatsiyalar toʻqnashuviga oid sotsiomadaniy nazariyalardir.

Rivojlanish bosqichlarining nazariyalari quyidagilardan iborat:

Iqtisodiy oʻsish bosqichlari nazariyasi. U. Rostou (AQSh) 1960-yilda «Iqtisodiy oʻsish bosqichlari: nokommunistik manifest» kitobida oʻsishning beshta asosiy bosqichini tavsiflagan:

- 1) an'anaviy jamiyat;
- 2) koʻtarilish uchun shart-sharoitlar yaratish davri;
- 3) iqtisodiy koʻtarilish;
- 4) yetuklik sari harakat;
- 5) yuksak ommaviy iste'mol asri.

Birinchi bosqich – feodal munosabatlar.

Ikkinchi bosqich – koʻtarilishga oʻtish (qishloq xoʻjaligi, tashqi savdo, transportdagi yaxshilanishlar). Uchinchi bosqich – sanoat inqilobi.Iqtisodiy oʻsishni qoʻllab-quvvatlash uchun milliy daromadda investitsiyalarning ulushini (10 % dan ortiq) oshirish, sanoatni rivojlantirish zarur. Toʻrtinchi bosqich – industrial jamiyat. Beshinchi bosqich – tovar va xizmatlarni ommaviy iste'mol qilish.

Iqtisodchi olim U. Rostou keyinchalik oltinchi bosqich – hayot sifatini izlash bosqichini qoʻshdi. Ushbu nazariyada postindustrial davr tadqiq qilinmaydi va sanoat inqilobi bosqichi mutlaqlashtiriladi.

Yagona industrial va yangi industrial jamiyat nazariyalari. Fransuz sotsiologi R. Aron industrial jamiyatda mulkning yetakchilik roli pasayishi, davlatning boylik va qashshoqlik qutblarini bartaraf etishdagi roli kuchayishini ta'kidlagan. Oʻsib boruvchi korporativ daromadlar jamiyatning ijtimoiy ehtiyojlarini, fan va ta'limni qondirish uchun yoʻnaltiriladi, shu tariqa jamiyatning farovonligiga erishiladi.

J. Gelbreyt (AQSh) 1967-yilda «Yangi industrial jamiyat» kitobida kapitalistik jamiyatni rejali, bozor tizimining mazmuni deb tasvirlagan.

Rejali tizim (yirik korporatsiyalar) jamiyat manfaatlariga bee'tiborligi uchun qoralanadi. Bozor tizimi (mayda firmalar, xizmat ko'rsatish sohasi) haqiqiy iqtisodiy-madaniy, ijtimoiy qadriyatlarga ega. Uning fikricha, davlat kichik biznesni, bozor tizimini rivojlantirishi lozim.

Postindustrial jamiyat nazariyalari. D. Muxtabell (AQSh) postindustrial jamiyatning beshta belgisini ajratgan:

- 1) iqtisodiyotning tovarlar ishlab chiqarishdan xizmatlar ishlab chiqarishga oʻtishi;
 - 2) xodimlar orasida mohir mutaxassislar va texniklarning ustunligi;
 - 3) nazariy bilimlarning yetakchilik qilishi;
- 4) texnik-iqtisodiy muhitning texnologiyalar ustidan nazorat oʻrnatishga qaratilishi;
- 5) yangi «intellektual texnologiya»ning qaror qabul qilish jarayonini ta'minlash.

Ushbu shartlarning amalga oshirilishi postindustrial jamiyatga oʻtilganligini bildiradi.

A. Toffler (AQSh) «Uchinchi toʻlqin» kitobida (1980) «uchinchi toʻlqin»ga «industrial individ»ning yaratuvchi shaxsga oʻtishi deb ta'rif bergan. Pulga sigʻinish, hukmronlik va boʻysunish munosabatlari oʻrniga oʻzaro ishonch va yordam munosabatlari, ulkan tashkilot doirasidagi qat'iy mehnat intizomi oʻrniga kichik tashkilotlar va uydagi ixtiyoriy mehnat, tabiat bilan hamkorlikni kuchaytirishga moʻljallar olish hamda ijtimoiy-iqtisodiy koʻrsatkichlar boʻyicha cheklangan, muvozanatlashgan oʻsishga oʻtish.

Sivilizatsiyalar nazariyalari. **Yagona sivilizatsiya nazariyasi.** F. Fukuyama (AQSh) dunyo umumiy jamiyat – yagona siyosiy, ijtimoiy va iqtisodiy tuzum – liberal demokratiya sari harakatlanayotganligini tadqiq qilgan. Ushbu jarayonning harakatlantiruvchi kuchi: iqtisodiyot-

ning baynalminallashuvi, uning globallashuv va integratsiyalashuvga oʻsib oʻtishi. Bunda mamlakatlarning muhim vazifasi — oʻz milliy qiyofasini, madaniyati va oʻzligini yoʻqotmaslik.

Sivilizatsiyalar to'qnashuvi nazariyasi. Uning muallifi F. Xantington (AQSh) dunyoning siyosiy va madaniy jihatdan koʻp G'arb, Islom, Xitoy, Yapon, Pravoslav, Afrika va Lotin qutbliligini, Amerikasi kabi sivilizatsiyalarga egaligini ta'kidlagan. Osiyo sivilizatsiyalarining roli oshib bormoqda. F. Xantingtonning fikricha, turli sivilizatsiyalar majmuidir. Jahon iqtisodiyotida boʻlajak dunyo Osiyo mamlakatlarining ulushi oshib bormoqda. Integratsiya asosiy mamlakatlarning madaniy, sivilizatsiyaviy asoslariga tayanishi lozim (Provaslav, Islom, Yapon sivilizatsiyasiga qaraganda, koʻproq Gʻarb sivilizatsiyasiga, Induizm, Xitoy sivilizatsiyasiga yaqinroqdir). Ijtimoiymadaniy aloqalarni rivojlantirish muhim.

1.4. Jahon iqtisodiyoti rivojlanishining notekisligi

Iqtisodiy rivojlanish deganda iqtisodiyotdagi taraqqiyparvar, ilgarilama, ya'ni iqtisodiy oʻsishga intilishdagi oʻzgarishlar majmui tushuniladi.

Ilgarilama oʻzgarishlar — iqtisodiy faoliyat natijalari hajmining ortishidir. Jamiyat va har bir alohida inson manfaatlari yoʻlidagi taraqqiyparvar oʻzgarishlarga quyidagilar xos: uzoq vaqt mobaynida *aholi jon boshiga toʻgʻri keladigan daromadning* (yalpi milliy daromadning aholi soniga nisbati) oʻsishi kuzatiladi. Bunda ikki shart bajarilishi kerak:

- 1) kambagʻallik chegarasidan tashqarida yashovchi aholi sonining kamayishi yoki saqlanib qolishi;
- 2) daromadlarning taqsimlanishida tengsizlik darajasining saqlanib qolishi yoki kamayishi.

Quyida jahon iqtisodiyoti rivojlanishining shart-sharoitlari, omillari, harakatlantiruvchi kuchlari va sharoitlarini koʻrib chiqamiz.

Shart-sharoit deganda mavjud boʻlgan passiv va foydalanilmayotgan resurslar tushuniladi. Bunday resurslarning uchta tipi mavjud:

- 1) tabiiy-iqlim tabiiy resurslarning miqdor boʻyicha zaxirasi va sifat tarkibi, ularni olish va ishlatish sharoitlari, aholi hayotining iqlim va ekologik sharoitlari;
- 2) demografik aholining soni, tuzilishi, mehnat resurslari bilan ta'minlanganligi, ijtimoiy infratuzilma;
 - 3) iqtisodiy toʻplangan milliy boylikning hajmi.

Iqtisodiy rivojlanish omillari – bular faol ishlatiladigan iqtisodiyot elementlari: yer, mehnat, kapital, axborot, tadbirkorlik qobiliyati, fantexnika taraqqiyoti (bu oʻz navbatida qolgan mazkur omillar samaradorligining oshishini ta'minlaydi). Ushbu omillarning kerakli joyda va vaqtda zarur jamlanishi iqtisodiyotning rivojlanishini ta'minlaydi.

Iqtisodiy rivojlanishning harakatlantiruvchi kuchlari – bu iqtisodiy rivojlanishda yetakchi oʻrin tutuvchi iqtisodiy subyektlar: tadbirkorlik, kichik biznes, fermerlik harakati.

Iqtisodiy rivojlanish sharoitlari – iqtisodiy taraqqiyotning borishini ta'minlovchi alohida aniq holatlar. Zarur sharoitlarning yaratilishi iqtisodiyotning boshqarilishini, iqtisodiy vaziyatning tahlil qilinishi va bashorat qilinishi, samarali menejmentni ta'minlaydi.

Jahon iqtisodiyoti notekis rivojlanadi. Jahon iqtisodiyotining notekis rivojlanishi uning siklik xususiyatida namoyon boʻladi (qisqa muddatli sikl 2 yil, oʻrta muddatlisi 5–7 yil, uzoq muddatli sikl 40–60 yil). Sekinlashish (pasayish toʻlqini) va tezlashish (yuksalish toʻlqini) davrlari ketma-ket almashinib keladi va bir qator omillarning dinamikasi (fantexnika taraqqiyoti va boshqalar) bilan bogʻliqdir. Katta sikllarning yuksalish toʻlqinlari quyidagilardan iborat:

birinchi (XVIII asr oʻrtalari) – toʻqimachilik sanoati va metallurgiyaning rivojlanishi bilan bogʻliq;

ikkinchi (XIX asr oʻrtalari) – dengiz va temir yoʻl transportining rivojlanishi bilan bogʻliq;

uchinchi (XX asrning boshi) – elektrotexnika, radio, aloqa sohalaridagi ixtirolar bilan bogʻliq;

toʻrtinchi (Ikkinchi jahon urushidan keyin) — sintetik materiallar, plastmassalarning ixtiro qilinishi, elektronika, yangi texnologiyalarning rivojlanishi bilan bogʻliq.

Shuningdek, koʻlami va keltirilgan salbiy oqibatlari jihatidan 1929—1933-yillardagi buyuk depressiyadan keyingi oʻrinda deb baholanayotgan va «bugungi kunning eng dolzarb muammosi — bu 2008-yilda boshlangan jahon moliyaviy iqtisodiy inqirozi» AQSh ipoteka kreditlari bozoridagi tanglikdan boshlanib, butun moliyaviy sektori, soʻngra tez sur'atlarda iqtisodiyotning real sektorini ham qamrab oldi.

Iqtisodiy siklning quyidagi jarayonlari ajraladi:

- 1) inqiroz (ishlab chiqarishning toʻxtab qolishi, ishsizlikning koʻpayishi va hokazo);
 - 2) jonlanish (inqirozdan oldingi iqtisodiy holatning tiklanishi);

- 3) yuksalish (asosiy kapitalning yangilanishi, inflatsiyaning kamayishi va hokazo);
- 4) regressiya (iqtisodiy yuksalish fonida inqiroz alomatlari yuzaga keladi);
- 5) depressiya (ishlab chiqarishning turgʻunligi, narxlarning past darajasi, eskirgan asosiy kapitalning chiqib ketishi).

Iqtisodiy sikl – iqtisodiyotga ta'sir koʻrsatuvchi tashqi va ichki omillarning oʻzaro ta'siri natijasi.

1970–1990-yillarda jahon iqtisodiyotining oʻsishi deyarli dunyoning barcha mamlakatlarini qamrab olgan chuqur oʻrta muddatli siklik inqirozlar bilan uzilib turdi, holbuki ularning ijtimoiy-iqtisodiy rivojlanishi oʻziga xos jihatlarga ega edi. Oʻrtacha darajada rivojlangan mamlakatlar iqtisodiyotining oʻsish sur'atlari XXI asrning boshida atigi 1–2 % ni tashkil qildi. Jahon iqtisodiyotining umumiy oʻsishi 1 % dan ortdi. Ammo uning oʻsish sur'atlari 2008-yilga kelib pasayishga yuz tutdi.

Jahon iqtisodiyoti rivojlanishining asosiy tamoyillari quyidagilardan iborat:

- globallashuv (iqtisodiyot subyektlarining global miqyosdagi oʻzaro aloqadorligining kuchayishi, bularning aholi hayotining huquqiy, ijtimoiy, demografik, diniy va boshqa tomonlariga ta'siri). Bu masalani keyingi paragraflarda atroflicha koʻrib chiqamiz;
- ishlab chiqarish va kapitalning baynalminallashuvi (milliy xoʻjaliklarning ishlab chiqarish va investitsiyalar sohasida jahon bozoriga bogʻliqligining kuchayishi);
- transmilliylashuv (korxonalar va ular filiallarining xorijda joylashtirilishi, buning xalqaro mehnat taqsimoti chuqurlashuviga imkon yaratishi);
- integratsiya (milliy xoʻjaliklarning yaqinlashuvi va oʻzaro moslashuvi);
 - jahon bozorlarida raqobatning kuchayishi.

2. Globallashuvning mohiyati va oqibatlari

2.1. Global muammolarning mohiyati, roli va iqtisodiy jihatlari

Jamiyat rivojlanishining barchaga va har kimga, butun jahon hamjamiyatiga taalluqli, olamshumul xususiyatga ega muammolari *global muammolar* deb ataladi. Ushbu muammolarning sayyoramiz miqyosida yoyilishi va keyinchalik keskinlashib borayotgani ularning global,

davlatlararo darajada hal qilish yoʻllarini izlashni talab qilmoqda, chunki ayrim mamlakatlar, hatto, ayrim davlatlar guruhi buning uchun zarur boʻlgan ulkan kuch va vositalarga ega emas.

Global muammolarning qanday turi boʻlmasin ularni butun jahon hamjamiyatining turli resurslari (moddiy, moliyaviy, mehnat, texnologik, ma'naviy, intellektual, axborot resurslari)ni birlashtirishsiz hal qilib boʻlmasligiga olib keladigan jiddiy iqtisodiy jihatlar mavjud.

Global muammolarning tarkibi, roli va oʻrni jamiyat rivojlanishining ayrim bosqichlarida oʻzgarib turadi. Tabiiy omillar bilan bogʻliq boʻlgan koʻplab global muammolar — tabiiy ofatlar (zilzila, toshqin, toʻfon, boʻron va h.k.), quyosh va oy tutilishlari, meteorit yomgʻirlari, magnit boʻronlari juda qadimdan mavjud.

Hozirgi global muammolar koʻp jihatdan insoniyatning avvalgi butun faoliyati, umuman jamiyat rivojlanishining natijasidir. Global muammolarning insoniyat hayoti va faoliyatining barcha tomonlariga salbiy ta'sirlari kuchayib borayotgani, ularni hozirgi bosqichda va kelajakda hal qilish borasidagi qiyinchiliklar fan-texnika taraqqiyoti asosidagi iqtisodiy oʻsish sur'atlarining kattaligi bilan bogʻliq.

Hozirgi vaqtda qirqqa yaqin global muammolar mavjud boʻlib, ular ichida asosiylarini ekologik, demografik, oziq-ovqat, qurolsizlanish, yadro qurolini tarqatmaslik va yadro urushining oldini olish, xalqaro xavfsizlik tashkil qiladi.

Shunday qilib, jahon iqtisodiyoti shakllanishining alohida bogʻlovchi omili – barchaga taalluqli boʻlgan hamda koʻplab yoki barcha mamlakatlar, xalqaro tashkilotlarning jami mablagʻlarini jalb etish va davlatlararo iqtisodiy hamkorlik orqali hal qilinadigan insoniyatning global muammolaridir. Global muammolarning oʻziga xos jihatini ularning universal xususiyati tashkil qiladi, chunki ular hozirgi zamon sivilizatsiyasining natijasidir.

2.2. Ekologiya va resurslar muammolari

XX asrning ikkinchi yarmida jahon iqtisodiyotida atrof-muhitni muhofaza qilish masalasi koʻtarildi, chunki xoʻjalik faoliyati natijasida uning ifloslanishi bir qator sohalarda juda keskin tus oldi. Biologik olamning xilma-xil turlari va ekologik tizimlar halokat yoqasiga kelib qoldi. Keyinchalik muammoning dolzarbligi, ekologiya masalalarining tadqiq etilishi, ushbu bilimlarning ommalashuvi, nohukumat ekologik tashkilotlar va harakatlarning faollashuvi uning keng doirada muhokama qilinishiga olib keldi.

Ekologik inqiroz keskinlashuvining bosh sabablari quyidagilar:

- 1) kimyoviy oʻgʻitlarning haddan tashqari koʻp ishlatilishi, tuproqning shoʻr bosishi, shamol va suvdan yemirilishi natijasida ishlov beriladigan ulkan yer maydonlarining ishdan chiqishi. XX asrda haydaladigan yerlarning ¼ qismidan ortigʻi yoʻqotilishiga yoʻl qoʻyildi;
- 2) oʻrmonlarning kesilishi va buning natijasida suv toshqinlari, tuproq eroziyasi, koʻchkilarning kelib chiqishi, botqoqliklarning hosil boʻlishi. Katta maydonlarda oʻrmonlarning yoʻqotilishi mintaqaviy va global miqyoslarda ekologik muvozanatning buzilishiga olib keldi. XX asrda oʻrmonlarning taxminan 2/3 qismi yoʻq qilindi (agar 50 yil avval tropik oʻrmonlar quruqlikning 12 % ini qoplagan boʻlsa, bugungi kunda ular atigi 6 % ni tashkil qiladi);
- 3) ziroatchilik va chorvachilik mahsulotlariga, suv, insoniyat yashaydigan muhitga va shu kabilarga kimyoviy ta'sir koʻrsatilishi bu barcha odamlar sogʻligʻi hayotiga ta'sir etadi, tabiiy muhitning oʻzini takror ishlab chiqarish imkoniyati yoʻqolayotganligi haqida gapirmasa ham boʻladi;
- 4) Yer atmosferasiga chiqarilayotgan chiqindilar hajmining oʻsib borayotgani. Atmosferada karbonat angidrid gazining toʻplanishi (issiq xona effekti), ozon qatlamining yupqalashuvi tufayli iqlim oʻzgarishi yuz berishi mumkin. Taxminlarga qaraganda, yer sharidagi oʻrtacha yillik harorat XXI asr oʻrtalariga kelib 1,5–4,5 oS ga, Dunyo ummonining darajasi esa 2010-yildayoq 1,4–2,2 metrga koʻtarildi;
- 5) turli sanoat chiqindilarining toʻplanishi, katta yer maydonlarining axlat uyumi bilan toʻlishi. Buning natijasida foydali yer maydonlari qisqarib, odamlar hayoti uchun katta xavf tugʻdiruvchi oʻchoqlar hududi kengayadi. Sanoat chiqindilarining hajmi 30 yil ichida 2,5 baravar koʻpayib, 10 mlrd. tonnaga yetdi;
- 6) atom elektr stansiyalari sonining koʻpayishi. Ekologiyaga ta'sir etishning oqibatini Chernobil fojiasi koʻrsatdi: odamlarning halok boʻlishi, shaharlar, yerlar, oʻrmonlar va suvning foydalanishga yaroqsizlanishi. Hayot uchun oʻta xavfli radiatsion chiqindilar (ifloslantiruvchilar)ning minglab kilometr masofaga havo orqali tarqashi hamda shahar va qishloqlarga yomgʻir va qor koʻrinishida tushishi.

Bularning bari ekologik muammolar miqyosining nihoyatda kattaligi, jahon sivilizatsiyasining buguni va ertasi uchun ahamiyati, shuningdek uning salbiy oqibatlarini bartaraf etish yoki kamaytirish uchun nihoyatda katta mablagʻ zarurligini tasdiqlaydi. Afsuski, mamlakatlar va xalqaro tashkilotlarning «ekologik budjetlari» hozircha katta emas, hal

qilinadigan muammolarning miqyosiga mos kelmaydi. Insoniyat tabiatni muhofaza qilish tadbirlariga 1979-yilda — 40 mlrd., 1980-yilda — deyarli 75 mlrd., 1990-yilda — taxminan 150 mlrd., XXI asrning boshida esa 250 mlrd. dollardan ortiq mablagʻ sarflagani haqidagi ma'lumotlar barchani oʻylashga majbur etadi.

maqsadlariga muhofaza Tabiatni gilish sanoati rivojlangan mamlakatlar o'z yalpi milliy mahsulotining 1,2 % ini sarflaydilar. Ayni vaqtda rivojlanayotgan mamlakatlarga zarur yordam koʻrsatmaydilar. Har yili atrof-muhitga yetkaziladigan zararning bahosi ular YAMMining 4-6 % ini tashkil qiladi. Kambagʻal va boy mamlakatlar turli xil imkoniyatlarga ega bo'lgani bois, atrof-muhit holati uchun mas'uliyat ham turlicha bo'lishi kerak (masalan, aholining 20 % istiqomat qiladigan va atmosferaga chiqariladigan chiqindilarning deyarli 70 % ini ishlab chiqaradigan va issiq xona effektini yuzaga keltiradigan Shimol mamlakatlari bunga koʻproq mas'ul boʻlishlari lozim). Boy mamlakatlar nafaqat o'z harakatlarida eng mas'uliyatli bo'lishlari, balki Janub davlatlariga atrof-muhitni muhofaza qilish sohasida texnologik va iqtisodiy jihatdan yordam berishlari kerak.

Atrof-muhitni muhofaza qilish sohasidagi boshqa bir muammo – gidroelektr stansiyalari qurish boʻlib, ular, bir tomondan, elektr energiyasini eng toza usulda olishga imkon beradi, boshqa tomondan, katta maydonlarni suvga bostirib va baliqlarning harakatlanishi uchun toʻsiqlar yaratib, daryolar havzalarida ekologik vaziyatni oʻzgartiradi va hokazo. Ayrim korporatsiyalar va davlatlarning iqtisodiy manfaatlari tabiatni asrash manfaatlarini himoya qiluvchi ekologik harakatlar, shuningdek huquqni muhofaza qilish tashkilotlari manfaatlariga zid keladi.

Eng yirik ekologik falokatlar lokal (cheklangan) toʻqnashuvlar yuz berganida ham kelib chiqishi mumkin. 1991-yilda hamda XXI asrda Fors koʻrfazidagi urushlar tufayli neft konlarining yoqib yuborilishi sayyoramiz ekologiyasi uchun ulkan xavf keltirib chiqargani ma'lum. Bu yongʻinlarni oʻchirish, shuningdek yer yuzini neft chiqindilaridan tozalash uchun koʻplab mamlakatlarning harakati zarur boʻldi.

Sayyoramizdagi «resurslar chegaralari» bilan bogʻliq muammolarni muhokama qilishdan «chiqindilarning chegarasi» haqidagi masalalarga oʻtish kuzatilmoqda. Ekologik muammo davlatlar, shuningdek hukumatlararo va nohukumat tashkilotlari, transmilliy korporatsiyalar, havo havzasi, suv muhiti, yer yuzasi va konlarini muhofaza qilish sohasida ishlovchi ekspertlarning birgalikda ishlashini talab qiladi.

Fan-texnika taraqqiyoti ochib berayotgan imkoniyatlarga qaramay, Yer aholisi hamda insoniyat resurslaridan foydalanish muammosi jahon iqtisodiyotidagi eng muhim muammolardan biri boʻlib qolmoqda. Insoniyat soni jihatidan 1 mlrd.li chegaraga XIX asrning birinchi choragida, 2 mlrd.ga esa XX asrning oʻrtasida yetib keldi, shundan soʻng har 11 yilda 1 mlrd. nafarga ortib bormoqda. Hozirgi paytda sayyoramiz aholisi 7 mlrd.ga yetgan. BMT keyingi 50 yil ichida u 9 300 mlrd.ga yetishi haqidagi ma'lumotni keltirgan. Buning aksi, ya'ni uch yovuz kuch: terrorizm, ekstremizm va separatizm, shuningdek mutaxassislarning tadqiqotiga koʻra, urushlar, tabiiy ofatlar, oziq-ovqat yetishmasligi, shahar va qishloqlarning suv ostida qolib ketishi (masalan, Indoneziyadagi bundan besh yil avval sunami oqibatida qariyb 400 ming nafar insonlar qurbon boʻlgan) natijasida yer yuzi aholisi 2050–2060-yillarga kelib, 5 mlrd. nafarga tushib qolishi ehtimoli ham mavjud ekan.

Dunyodagi eng kambagʻal 48 ta mamlakat va Afrikada SPID epidemiyasi tufayli aholi koʻpayishi sekinlashayotganiga qaramay, 2050-yilga borib uch baravar koʻpayadi. 1950–1955-yillarda rivojlanayotgan mamlakatlarga aholi yillik oʻsishining 79 % toʻgʻri kelgan boʻlsa, 1990–1995-yillarda bu koʻrsatkich 95 % ga yetdi. Taxminlarga qaraganda, 2050-yilga borib aholining butun oʻsishi «Janub mamlakatlari» evaziga yuz beradi, bu hol «Shimoliy va Janubiy yarimsharlar oʻrtasidagi demografik uzilish (farq)» nomini oldi.

Rivojlanayotgan mamlakatlarga tugʻilishning yuqori darajasi, koʻp bolali onalar va bolalar oʻlimi darajasining ham yuqoriligi Tugʻilish darajasining yuqoriligi kambagʻallikni yanada koʻpaytiradi xosdir. Biroq aholi jon boshiga toʻgʻri keladigan YAMM koʻpayganida, tugʻilish darajasi bolalar oʻlimi darajasidan ortadi, keyinchalik esa tugʻilish darajasi pasayadi va koʻtarilish yuz bermaydi. Rivojlanayotgan davlatlarda aholining yosharib borishi bu yerda yosh, mehnatga qobiliyatli ish kuchining eng koʻp qismi jamlanishiga olib keladi va uning ish bilan band boʻlishini ta'minlash keskin ijtimoiy muammoga aylanadi.

BMTning taxminlariga koʻra, 2050-yilga borib rivojlangan mamla-katlarda (AQSh bundan mustasno) aholi soni kamayib boradi. Bu vaqtga kelib sayyoramiz aholisi qariydi, chunki inson umri davomiyligi ortadi. 60 yoshlilar hozirgiga qaraganda uch baravar, 80 yoshdan oshganlar besh baravar koʻpayadi (masalan, hozirgi kunda 100 yoshdan oshgan aholi Yaponiyada 1 milliondan ortiq).

Nafaqa yoshidagi odamlarni ta'minlashdan iborat iqtisodiy muammo kuchayib bormoqda. Ularni hal qilish uchun turli variantlar, jumladan pensiyaga chiqish yoshini oshirish Yevropa mamlakatlarida kuzatil-moqda.

Hozirgi dunyoda qishloq aholisining shaharlarga koʻchishi koʻpayib borayotganligi kuzatilmoqda. 2030-yilga kelib, shaharliklar soni XXI asrning boshidagiga nisbatan ikki baravar koʻp boʻlishi kutilmoqda. 10 mln.dan ortiq aholiga ega boʻlgan shaharlar koʻpayib bormoqda, bu esa ta'minot va munitsipal boshqaruv muammosini keltirib chiqarmoqda. Dunyoning aksariyat mamlakatlari samarali natijalarga olib kelayotgan faol demografik (tugʻilishni cheklash va boshqalarga oid) siyosatni ishlab chiqib, amalga oshirmoqdalar.

BMTning Oziq-ovqat va qishloq xoʻjalik tashkiloti (FAO) ma'lumotlariga qaraganda, Yer yuzidagi ochlar soni taxminan 500 mln. nafar. Dunyoda ochlikning turli shakl va bosqichlaridan 1 mlrd.dan ortiq kishilar jabr tortmoqdalar.

Rivojlanayotgan mamlakatlarda an'anaviy ratsionlar yetarli miqdordagi kaloriyalarni ta'minlashi mumkin, biroq ularda zarur miqdorda oqsil, yogʻ va mikroelementlar mavjud emas. Rivojlanayotgan mamlakatlarning jahon xoʻjaligiga jalb etilganligi, ularning tropik va texnik mahsulotlar yetishtirishga ixtisoslashganligi koʻpincha ularning oziq-ovqat bilan ta'minlanish darajasini pasaytiradi. Oziq-ovqat mustaqilligining yoʻqligi bunday mamlakatlarni tropik oʻsimliklar yetkazib berish kvotalarini belgilovchi rivojlangan mamlakatlarning eksporti va savdo borasidagi siyosatiga tobe qilib qoʻyadi.

Oziq-ovqat muammosining global miqyoslari uni hal etishning butun sayyoramizdagi ishlab chiqarish resurslarini oqilona taqsimlash bilan bogʻlamoqda.

XX asrning ikkinchi yarmida jahon ziroatchiligida qishloq xoʻjaligini mashinalar tizimiga oʻtkazish, hosildor, gibrit urugʻlardan foydalanish, agrosanoat integratsiyasini keng rivojlantirish va agrosanoat kompleksining shakllanishi, biotexnologik inqilob kabi sifat oʻzgarishlari yuz berdi. Rivojlanayotgan mamlakatlarning normal turmush uchun zarur oziq-ovqat bilan ta'minlashdagi yutuqlaridan kompleks foydalanish oziq-ovqat muammosini hal qilish imkoniyatini ochmoqda.

2.3. Globallashuvning mohiyati

Xalqaro munosabatlarning globallashuvi muammosi asta-sekin eng yuksak darajalarda oʻtadigan koʻplab ikki tomonlama va koʻp tomonlama uchrashuvlarda eng asosiy (ustun) muammo sifatida baholana boshlandi. Shu jihatdan qaraganda, 1999-yilda «yettilik» mamlakatlari rahbarlarining Germaniyaning Kyoln shahrida boʻlib oʻtgan uchrashuvi Yakuniy kommyunikesining ikkinchi bandi, ayniqsa katta e'tiborga sazovordir. Unda globallashuv jarayoniga rasmiy ta'rif berilgan.

Birinchidan, globallashuv – gʻoyalar, kapital, texnika va tovarlarning butun dunyo boʻylab oqishi jadallashayotgan va keng miqyosga ega boʻlib borayotgan murakkab jarayon sifatida baholangan.

Ikkinchidan, globallashuv ayrim jamiyatlardagi turli xalqlarni nihoyatda yaqinlashtirgan ochiqlik tufayli yuzaga kelgan tub oʻzgarishlar bilan bogʻliq.

Uchinchidan, globallashuv borgan sari kuchayib borayotgan ochiqlik va jadallik natijasi sifatida butun yer yuzida hayot darajasining yuksalib borishiga va qashshoqlik darajasining ancha pasayishiga yordam beruvchi shart-sharoit.

Toʻrtinchidan, globallashuv integratsiyaning ishlab chiqarish samaradorligini ragʻbatlantirish, imkoniyatlarni kengaytirish va iqtisodiyotni oʻstirish evaziga qoʻshimcha ish joylari yaratishga imkon berib ulgurgan va bunga davom etadigan yangi shakl sifatida qaralmoqda.

Beshinchidan, globallashuv axborot sohasidagi inqilob bilan chambarchas bogʻliq. Bu inqilob esa, oʻz navbatida, yangi jamiyatga oʻtishning shart-sharoiti hisoblanadi. Ya'ni jahon sivilizatsiyasi borgan sari koʻproq sanoatlashgan va postindustrial jamiyatdan axborotga asoslangan jamiyatga oʻtish tamoyiliga ega boʻlmoqda.

Oltinchidan, globallashuv turli madaniyatlar va qadriyatlarning borgan sari kuchayib borayotgan oʻzaro ta'siri sifatida demokratik jamiyatlar qurish, inson huquqlari va asosiy erkinliklarining kafolatlarini shakllantirish tamoyilida ifodalanadi.

Yettinchidan, globallashuv ayrim ishchilar, oilalar va elatlar uchun yashash joyini oʻzgartirish va moliyaviy noaniqlik bilan bogʻliq xavf-xatarning ortishida namoyon boʻladigan muayyan tahdidlarga ham ega.

Iqtisodiyotning globallashuvi, jahon iqtisodiyoti subyektlari oʻzaro aloqasining kuchayishi, iqtisodiy jazolar (savdodagi kamsitish, ekspansiya, embargo, qamal)ning noqonuniy yoki nomuvofiq qoʻllanishi xalqaro iqtisodiy xavfsizlik tizimini huquqiy asosda yaratish masalasini qoʻymoqda. Bugun xalqaro javobgarlik taqiqlarning, boshqa davlat huquqlarining buzilishi, oʻz huquqlarini suiiste'mol qilish, shuningdek majburiyatlarini bajarmaslikka ham tatbiq etilmoqda.

Mamlakatning ichki holati uning resurs salohiyatidan foydalanishi hamda davlatlararo munosabatlarda obroʻsini saqlashiga

bogʻliq boʻlmoqda. Mamlakat hayoti va faoliyatini ta'minlashning iqtisodiy asosini xoʻjalik bilan bogʻliq maqsad va niyatlar, moddiy xarajatlar va iqtisodiy faoliyatning natijalari tashkil etadi.

Global iqtisodiy siyosat - bu xalqaro siyosat boʻlib, iqtisodiy resurslar, yaratilgan tovar va xizmatlarni dunyo mamlakatlari oʻrtasida taqsimlab, ulardan samarali foydalanishni maqsad qilib qo'yadi. Bu siyosatda chetga kapitalni investitsiya sifatida chiqarib, uni kerakli serfoyda sohalarga joylashtirish uchun oʻzaro kelishilgan soliqlar, bank foizlari, boj to'lovlari, kvotalar kabi vositalar ishlatiladi. Tovarlarning qimmatlashib ketishiga yoʻl bermaslik uchun ularga eksport etilgan chogʻidagi soliqlar qoʻyish bilan cheklanib, ular importiga soliq belgilanmaydi yoki gʻoyat oz belgilanadi. Bu ikkiyoqlama soliqqa tortishni bartaraf etish, deb yuritiladi. Masalan, qo'shilgan qiymat solig'i yoki aksiz soliqlari tovarlar chiqarilgan joyda undirilib, tovarlar import qilingan yerda olinmaydi. Oʻzaro kelishuvlar asosida import qilingan soliqdan ozod qilinadi. Xalqaro savdo-sotiqda texnologiya ham yengillashtirilgan bojxona toʻlovlari qoʻllaniladi, bu toʻlovlar oʻzaro kelishilgan bo'ladi. Masalan, Xalqaro savdo tashkiloti a'zolari o'zaro savdo qilganda, boj to'lovlari tovar qiymatining 10 foizidan oshmasligi talab qilinadi. Bu tashkilotga a'zo bo'lmagan mamlakatlar bilan savdosotiq qilinganda, oshirilgan boj toʻlovlari qoʻllaniladi. Xalqaro kredit berish tartibi ham birgalikda belgilanadi. Bunga ko'ra kredit kvotalari, kredit muddati va kredit uchun foiz o'rnatiladi. Xalqaro kreditda kelishilgan foiz stavkasi libor deb yuritiladi. Liborni yirik London banklari oʻrnatadi, boshqa xalqaro banklar shunga qarab oʻz foizlarini belgilaydilar. Masalan, 2003-yil uchun libor 1,4 foiz qilib belgilandi. Boshqa banklar bundan bir oz yuqori boʻlgan foizlar bilan kredit ajratadilar. Xalqaro kredit siyosatini yirik kreditor – qarz beruvchi mamlakatlar banklari hukumat ishtirokida amalga oshiradilar. Bular Parij va London qarz beruvchilar klubini tashkil etadi. Bu kredit siyosati kimga va qanchadan qarz berishni, qaysi qarzlarni kechib yuborish, qaysi garzlarning to 'lash muddatini cho 'zishni belgilab beradi.

Yirik xalqaro korporatsiyalar davlat ishtirokida eksport va import kvotalari oʻrnatadilar. Bularga binoan, qayerga qancha tovarni eksport qilish, qayerdan qancha tovarni import qilish, eksport-import tartibi aniqlab beriladi. Integratsion ittifoqlarga kirgan mamlakatlarda, masalan, Yevropa Ittifoqida, davlatlararo eksport va import uchun qulay sharoit yaratib beriladi, bunda ayrim mamlakatlar tovarlarini diskriminatsiya qilish, ya'ni kamsitishga yoʻl berilmaydi.

Global iqtisodiy siyosatni transmilliy, ya'ni millatlararo korporatsiyalar, xalqaro tashkilotlar, yetakchi davlatlar hukumati, davlatlararo hukumat va parlament belgilaydi. Bunga misol qilib, Yevroparlament, Yevropa Ministrlar kengashi qo'llaydigan siyosatni olish mumkin. Bu siyosatda o'zaro va boshqalar bilan bo'ladigan iqtisodiy aloqalarni qaysi yo'nalishda va qanday tartibda bo'lishi ko'rsatiladi. Global siyosat umuman yoki ayrim sohalarga qo'llaniladi. Transmilliy korporatsiyalar faqat o'z faoliyati doirasidagi xalqaro siyosatni belgilaydi. Masalan, OPEK tashkiloti neftni qazib olish va qayta ishlash kvotalarini, uning narxini o'z siyosatiga binoan belgilaydi. Bu yerda qabul qilingan neft narxining yo'lagi o'rnatiladi. Xalqaro savdo birjalari jahon narxlarini o'rnatishga doir siyosatni qo'llaydilar.

Xalqaro Valuta fondi, Jahon banki, Yevropa Tiklanish va Taraqqiyot banki, Osiyo taraqqiyot banki kabi xalqaro institutlar valuta tartibini mustahkamlash, kreditni rivojlantirishga qaratilgan siyosatni qoʻllaydilar. Ular milliy valuta kursini barqarorlashtirish va valuta tahlikasini kamaytirish uchun milliy iqtisodiyotni rivojlantirib, eksport salohiyatini oshirishga qaratilgan kredit siyosatini qoʻllaydilar.

Global iqtisodiy siyosat davlatlararo mehnat migratsiyasiga ham taalluqli boʻladi. Mehnat migratsiyasini tartibga solish uchun unga oid xalqaro qoidalar ishlab chiqiladi. Turli mamlakat hukumati va parlamentlari belgilagan migratsiya qoidalari bir-biriga yaqin turadi. Migratsiya oqimini nazorat qilish usullari ham kelishiladi, migratsiyaga oid axborot oʻzaro almashib turiladi.

Global siyosat tabiiy ravishda globalizatsiyaning afzalliklaridan foydalanish, uning salbiy jihatlarini kamaytirishga qaratiladi.

3. Globallashuv va ochiq iqtisodiyot

Tashqi iqtisodiy siyosat har qanday milliy iqtisodiyot taraqqiyotini ta'minlashning muhim vositasidir. Lekin bir-biridan farq qiladigan ikkita model mavjud.

Birinchi model jahon bozori bilan mustahkam bogʻliq, eksportga ishlaydigan tarmoqlar ustunlik qiladigan ochiq iqtisodiyotni vujudga keltirishga qaratiladi.

Ikkinchi model bojxona toʻlovlari baland va import oʻrnini bosadigan ishlab chiqarishlar ustunlik qiladigan xoʻjaliklarni afzal koʻradi. Oʻzbekistonda xavfsizlik choralari koʻrilgan holda, vujudga keladigan ochiq iqtisodiyot modeli asos qilib olingan.

Umuman olganda, iqtisodiyot *ikki xil* boʻladi. Bular *yopiq* va *ochiq* iqtisodiyot. Yopiq iqtisodiyot tabiatan an'anaviy iqtisodiyot, bu bozor tizimining oʻtmishdoshidir. Yopiq iqtisodiyot shunday iqtisodiyotki, u oʻz qobigʻiga oʻralgan boʻlib, tashqi dunyo bilan aloqaga kirishmaydi, oʻzini oʻzi ta'minlash qoidasiga asoslanadi. Bunday iqtisodiyot konservativ, eskilikni uzoq saqlab qoladi, modernizatsiya (yangilanish)ga moyil boʻlmaydi. Shu sababli u istiqbolsiz hisoblanadi. Yopiq iqtisodiyot tarixiy oʻtmish, lekin hozirgi sivilizatsiyadan ajralib, oʻrmon, chakalakzorlarda yashab qolib ketgan qabilalarda uchraydi. Yopiq iqtisodiyotning aksi ochiq iqtisodiyotdir.

Ochiq iqtisodiyot – bu tashqi iqtisodiy aloqalarga kirishgan, ularning afzalligiga tayanib, rivojlanib boruvchi iqtisodiyotdir. «Ochiq iqtisodiyot» tushunchasi milliy iqtisodiyotga nisbatan qoʻllaniladi. Uning ochiqlik darajasi turli mamlakatlarda har xil, albatta. Bu turli mezonlarga qarab aniqlanadi.

Hozirgi zamon jahon xoʻjaligiga ochiq iqtisodiyot xosdir. Shu bois dunyoda ekstranaliyalar, ya'ni ijobiy yoki salbiy tashqi ta'sirlarga uchramagan mamlakatlar yoʻq. Oʻzbekiston suveren davlat sifatida ochiq iqtisodiyotni shakllantirish yoʻlida faol ish boshlagan. Bunda ochiq turdagi iqtisodiyotni shakllantirishning asosini mamlakatning dunyo xoʻjalik aloqalarida, xalqaro mehnat taqsimotida faol ishtirok etishi tashkil etadi.

Oʻzbekiston ochiq iqtisodiyot sharoitida jahon xoʻjaligi sikllarining bevosita ta'siriga duch keladi. Davlatimiz rahbari Islom Karimov ta'kidlaganidek, Oʻzbekiston bugun xalqaro hamjamiyatning va global moliyaviy-iqtisodiy bozorning ajralmas tarkibiy qismi hisoblanadi. Buning tasdigʻini tashqi dunyo bilan aloqalarimiz tobora kengayib borayotganida, taraqqiy topgan yetakchi davlatlar koʻmagida iqtisodiyot tarmoqlarini rivojlantirish, modernizatsiya qilish, texnik va texnologik qayta jihozlash boʻyicha dasturlarning amalga oshirilayotganida, Oʻzbekistonning xalqaro savdo tizimiga integrasiyalashuvida, mahsulot va tovarlar importi hamda eksportining oʻsib borishida va boshqa misollarda yaqqol koʻrishimiz mumkin.

1. Iqtisodiyotning eksport salohiyati. Agar eksport YAIMga nisbatan qanchalik koʻp boʻlsa, shunchalik ochiqlik darajasi yuqori boʻladi. Masalan, Gollandiyada eksport YAIMning ¾ qismiga teng boʻlganidan, bu yerda ochiqlik darajasi yuqori deb aytish mumkin. Oʻzbekiston iqtisodiyotining ham ochiqlik darajasi yuqori, chunki eksportning YAIMdagi hissasi deyarli 40 foizga yetadi.

- 2. Iste'molda importning hissasi. Agar bu hissa qanchalik yuqori bo'lsa, shunchalik iqtisodiyot ochiq hisoblanadi. Ammo buning uchun import kafolatlanishi kerak. Masalan, Yaponiya va Italiyada oziq-ovqat iste'molining 2/3 qismini import tashkil etadi. Importga qarab ochiqlik darajasiga baho berilganda aytilgan kafolatning bo'lishi nazarda tutiladi, chunki shunda iqtisodiy xavf-xatar yuzaga kelmaydi, aholi ta'minotida uzilishlar bo'lmaydi.
- 3. Iqtisodiyotga yuboriladigan investitsiyalarda xorij investisiyalarining hissasi va chetga chiqarilgan kapitalning jami kapitaldagi hissasi. Agar ichki investitsiyalarda xorijdan kelgan mablagʻlar ulushi qanchalik katta boʻlsa, kapital tashqariga qanchalik koʻp chiqsa, shunchalik iqtisodiyot ochiq hisoblanadi.
- 4. Mehnat resurslari tarkibida xorijdan kirib kelgan va xorijga chiqib ketgan ish kuchi hissasi. Bu koʻrsatkich qanchalik kata boʻlsa, shunchalik mamlakat iqtisodiyoti ochiq hisoblanadi.

Xullas, milliy iqtisodiyotning ochiqligi tovarlar, kapital va ish kuchining naqadar mamlakatga kirib va undan chiqib turishiga qarab belgilanadi. Biroq bular ochiqlikni ta'minlashda har xil oʻrin tutadi. Iqtisodiyoti kuchli mamlakatlarda ular iqtisodiyotining ochiqligini koʻp hollarda kapitalning chetga chiqishi, texnologiyalar eksporti koʻp boʻlgani holda iste'mol tovarlari importining kattaligi belgilaydi. Aksincha, iqtisodiyoti rivojlanib ulgurmagan mamlakatlarda uning ochiqligini belgilashda xomashyo va energiya resursi hamda iste'mol tovarlari eksporti, kapital va texnologiya importining ustuvorligi asosiy hisoblanadi. Iqtisodiyotning ochiqligi ichki ziddiyatlarga ega. Agar ochiqlik iqtisodi baquvvat mamlakatlarga ustuvorlik bersa, iqtisodi zaif mamlakatlarda chet elga qaramlik hosil etadi.

Ochiq iqtisodiyotlarning rivojlanishi jahon xoʻjaligini yuzaga keltirgan (XIX–XX asrlar boʻsagʻasida). Hozirgi zamon jahon xoʻjaligiga ochiq iqtisodiyot xosdir. Shu bois dunyoda ekstranaliyalar, ya'ni ijobiy yoki salbiy tashqi ta'sirlarga uchramagan mamlakatlar yoʻq.

Oʻzbekiston suveren davlat sifatida ochiq iqtisodiyotni shakllantirish yoʻlida faol ish boshlaganini ta'kidladik. Bunda ochiq turdagi iqtisodiyotni shakllantirishning asosini mamlakatning dunyo xoʻjalik aloqalarida, xalqaro mehnat taqsimotida faol ishtirok etishi tashkil etadi. Oʻzbekiston ochiq iqtisodiyot sharoitida jahon xoʻjaligi sikllarining bevosita ta'siriga duch keladi. Davlatimiz rahbari Islom Karimov ta'kidlaganidek, «barchamiz bir haqiqatni anglab yetishimiz lozim – Oʻzbekiston bugun xalqaro hamjamiyatning va global moliyaviyiqtisodiy bozorning ajralmas tarkibiy qismi hisoblanadi».

Buning tasdig'ini tashqi dunyo bilan aloqalarimiz tobora kengayib borayotganida, taraqqiy topgan yetakchi davlatlar koʻmagida iqtisodiyot tarmoqlarini rivojlantirish, modernizatsiya qilish, texnik va jihozlash dasturlarning qayta bo'yicha texnologik amalga oshirilayotganida, O'zbekistonning xalqaro tizimiga savdo integratsiyalashuvida, mahsulot va tovarlar importi va eksportining o'sib borishida hamda boshqa misollarda yaqqol koʻrishimiz mumkin.

Jahon xoʻjaligiga integratsiyalashuvning eng istiqbolli va maqbul boʻlgan yoʻnalishini belgilash zarurati ham mavjud. Hozir ochiq milliy iqtisodiyotning jahon xoʻjaligi bilan bogʻlanishi tovarlar, ish kuchi va kapitalning erkin harakati orqali amalga oshiriladi. Bozor tizimiga oʻtishda iqtisodiy oʻsishning tashqi manbalari ichki manbalari bilan bir qatorda turgani uchun, yosh mamlakatlar muqarrar ravishda baynalminallashuv jarayoniga kirib borishlari kerak boʻladi.

4. Oʻzbekistonning global muammolarni hal qilishdagi ishtiroki

Jahondagi konfrontatsiya qutblari oʻtmishga ketishi bilan va Oʻzbekistonning mustaqillikni mustahkamlashdagi say'-harakatlari 21 yillik taraqqiyot yoʻlida oʻz natijalarini berdi. Oʻzbekiston xalqaro munosabatlarning teng huquqli subyektiga aylandi. Shu bois mamlakatimizning tenglar ichra teng munosabatlarda xalqaro majburiyatlarni Osiyo taraqqiyot banki Prezidenti X. Kurodaning ta'biri bilan aytganda, «halollik bilan bajarayotgan davlatga aylandi». Oʻzbekistonning global muammolarni hal qilishdagi koʻp tomonlama hamkorlik mexanizmida ishtirok etishi darajasi ortib bormoqda. Bu hol unga jahon xoʻjaligining faol va teng huquqli ishtirokchisi oʻrnini mustahkam egallashiga imkon bermoqda.

Oʻzbekistonning xalqaro tashkilotlarda faol ishtiroki ta'minlanmoqda. Oʻzbekiston BMT boshchiligida yangi tahdidlarga, jumladan xalqaro terrorizm, uyushgan jinoyatchilik, narkotrafik, ommaviy qirgʻin qurollarini tarqatish, ekologik xavf va bir qator boshqa tahdidlarga qarshi kurashning global va samarali tizimlarini yaratish boʻyicha tashabbus koʻrsatishda davom etmoqda.

Oʻzbekistonning faol ishtirokida dunyo mamlakatlarining terrorizmga qarshi kurashuvchi tuzilmalari bilan hamkorlik yoʻlga qoʻyildi va chuqurlashmoqda.

Terrorchilar sodir etayotgan inson huquqlarini qoʻpol ravishda buzish hollari xalqaro hamjamiyatning alohida e'tiborini talab qilmoqda.

Oʻzbekiston BMTda inson huquqlarini terrorizmdan himoya qilish borasida mustaqillikning dastlabki yillaridanoq tashabbusini bildirmoqda. Oʻzbekiston BMTning shafeligida, AQSh va Rossiya ishtirokida qoʻshni Afgʻoniston aholisiga yordam koʻrsatishga, uni ijtimoiy-iqtisodiy tiklashga koʻmaklashish etish boʻyicha harakatlarni kuchaytirmoqda. Oʻzbekiston global moliyaviy-iqtisodiy muammolarni tartibga solish zarurligi boʻyicha takliflar bildirib kelmoqda.

Mamlakatimizda tugʻilishni koʻpaytirish va Oʻzbekiston aholisining umrini oshirish muammosini hal qilish birinchi oʻrindagi vazifalardan biriga aylantirildi. Shunday qilib, Oʻzbekiston global muammolarni hal qilishda xalqaro darajada ham, milliy darajada ham faol ishtirok etmoqda.

5. Xalqaro va milliy iqtisodiy xavfsizlik, uning vazifalari va funksiyalari

Xalqaro iqtisodiy xavfsizlik deganda hamjamiyat faoliyatining real va imkoniyatdagi, ichki va tashqi tahdidlar ta'sirida xoʻjalik manfaatlarining zarar koʻrmasligi va mustaqilligini ta'minlaydigan rejimi tushuniladi.

Iqtisodiyotning globallashuvi jahon iqtisodiyoti subyektlari oʻzaro aloqalarining kuchayishi, iqtisodiy sanksiyalar (savdoda kamsitish, ekspansiya, embargo, qamal), huquqiy asosda xalqaro iqtisodiy xavfsizlik tizimini yaratish vazifalarini qoʻyadi.

Bugun xalqaro javobgarlik taqiqlar, boshqa davlat huquqlarini buzish, oʻz huquqlarini suiiste'mol qilish, shuningdek majburiyatlarni bajarmaslikka taalluqlidir.

Mamlakatning ichki holati resurs salohiyatidan foydalanish va xalqaro munosabatlardagi obroʻsini saqlashga bogʻliq. Mamlakat hayoti va faoliyatini bashoratlashning iqtisodiy asosini xoʻjalik maqsadlari va rejalari, moddiy xarajatlar va iqtisodiy faoliyat natijalari tashkil qiladi.

Soʻnggi paytlarda xavfsizlikning umumlashtiruvchi ifodalaridan biri *milliy xavfsizlikdir*. Milliy xavfsizlik – mamlakatning shunday holatiki, unda mamlakat (millat)ning hayotiy muhim siyosiy, iqtisodiy, ijtimoiy, ekologik, ma'naviy, harbiy va boshqa manfaatlari ishonchli himoya qilinadi, real va imkoniyatdagi ichki va tashqi zararli ta'sirlar, inqirozli holatlarning ta'siri eng kam darajagacha pasayadi hamda shaxs, jamiyat va davlatning taraqqiyoti uchun qulay imkoniyatlar ta'minlanadi. Xavfsizlikning mohiyatini anglashda ijtimoiy-iqtisodiy yondashuv asosiy oʻrin tutadi. Ushbu yondashuvni amalga oshirish hodisani obyektivlik va subyektivlik, moddiy va ma'naviy jihatlar dialektikasi, uning jamiyat

ijtimoiy-madaniy makoniga taalluqligi nuqtai nazaridan tekshirishga imkon beradi.

Xavfsizlik iqtisodiy kategoriya sifatida iqtisodiyotni, aholining normal hayoti va faoliyatini, jumladan uning ish bilan bandligi, iqtisodiy jihatdan oʻsish imkoniyatini ta'minlovchi rivojlanish darajasida saqlashni bildiradi.

Global (texnologik, moliyaviy, informatsion) tizimlarning jadal rivojlanishi barcha darajalarda migratsiya oqimlarining keskin koʻpayishi bilan kechadi. Ushbu hol inson resurslarini boshqarishning yangi vazifalarini qoʻyadi. Mamlakatlar, ularning guruhlari, alohida mintaqalar oʻrtasida iqtisodiy rivojlanish darajasidagi farq davlatlar ichida va oʻrtasidagi munosabatlarda ijtimoiy keskinlik boʻlishini istisno etmaydi.

Jahon taraqqiyotiga xalqaro munosabatlar tizimining jadal oʻzgarishi xosdir. Unda ikki tamoyil koʻzga tashlanadi:

- 1) iqtisodiy, siyosiy, ilmiy-texnikaviy, ekologik va axborot omillari asosida xalqaro jarayonlarni koʻp tomonlama boshqarish mexanizmlarini takomillashtirish jarayonida koʻplab davlatlar va ularning integratsiyaviy birlashmalari iqtisodiy va siyosiy pozitsiyalarining mustahkamlanishi;
- 2) xalqaro hamjamiyatda AQSh yetakchiligidagi rivojlangan mamlakatlarning ustunlik qilishiga asoslangan tuzilmasi yaratilishi;
- 3) xalqaro munosabatlarning rivojlanishi tabiiy, texnologik va axborot resurslaridan foydalanishda, iqtisodiy afzalliklarni ta'minlash, tovarlarni sotish va kapitalni kiritish bozorlari uchun kurash raqobat bilan kechmoqda.

Iqtisodiy munosabatlarning globallashuvi iqtisodiy jinoyatchilik – kapitalni noqonuniy olib chiqish va «halollash», soliq va boj manipulatsiyalari, narkotik moddalar va qurol-yarogʻni qonunga xilof tarzda muomalaga chiqarish uchun sharoit yaratadi.

Bugungi jinoiy vaziyat miqyosi boʻyicha ham, davlatning faoliyat koʻrsatishi va xavfsizligiga tahdid solish darajasi boʻyicha ham sifat jihatdan yangicha hodisa. Bu korrupsiya, jinoiy qatlamlar va davlat apparatining birlashib ketishi, transmilliy jinoyatchilik, terrorizm va narkobiznesni oʻz ichiga oladigan hodisadir.

Iqtisodiy xavfsizlik – mamlakatlararo iqtisodiy munosabatlarni aks ettiruvchi hamda milliy xavfsizlikning tarkibiy qismi hisoblanuvchi murakkab iqtisodiy kategoriya. Bu milliy iqtisodiyotning mustaqilligi, barqarorligi, doimiy yangilanish va oʻzini takomillashtirib borishga intilishini ta'minlovchi shart-sharoitlar va omillar majmuidir.

Iqtisodiy xavfsizlikning bosh vazifasi — mamlakatning oliy milliy davlat manfaatlariga javob beradigan va milliy resurslarni nazorat qilishga asoslangan iqtisodiy mustaqil iqtisodiy siyosat olib borilishini ta'minlash. Iqtisodiy xavfsizlik milliy iqtisodiyotning barqarorligi, oʻzini rivojlantirish va taraqqiy toptirishga qodirligini kafolatlashi kerak.

Milliy iqtisodiy xavfsizlikka milliy davlat manfaatlarining amalga oshirilishida izchillikni, xoʻjalik yurituvchi subyektlarning barqaror faoliyatini, aholining hayoti va faoliyati uchun normal sharoitni saqlash qobiliyati sifatida qarash lozim. Milliy iqtisodiy xavfsizlik xavf-xatar hamda iqtisodiy manfaatlarga boʻladigan tahdidlarga qarshilik koʻrsatish tizimini yaratish borasidagi harakatlar majmuidir. Iqtisodiy xavfsizlik — milliy iqtisodiyotning ijtimoiy ehtiyojlarni samarali qondirish va normal iqtisodiy rivojlanishni ta'minlash qobiliyati. Bu tashqi va ichki iqtisodiy, siyosiy, ijtimoiy, harbiy, tabiiy va texnogen beqarorlashtiruvchi ta'sirlar chogʻida yuksak darajadagi barqarorlikni saqlash qobiliyatidir.

Jahon hamjamiyatiga integratsiya qilish (qoʻshilish) jarayonida milliy iqtisodiyotning ochiqlik chegaralari milliy davlat manfaatlarini himoya qilish sohasi hisoblanadi. Bir tomondan, iqtisodiyotning ajralganligi va biqiqligi mamlakatni jahon taraqqiyotining chetiga surib chiqaradi. Boshqa tomondan, toʻliq ochiqlik milliy iqtisodiyotning tanazzuliga va resurslarning tor bir guruh mamlakatlardagi moliyaviy markazlarga oqib ketishiga olib keladi. Iqtisodiyotning ochiqligi hozirgi moliyaviy bozorlarning nomukammalligi, beqarorligi va keskin inqirozli tanazzullar tufayli ham muayyan chegaralarga ega boʻlishi kerak.

Globallashuv sharoitida Oʻzbekistonda makro va korporativ strategik boshqaruv va rejalashtirishning yangi shakllariga e'tibor qaratilmoqda. Oʻzbekiston mamlakat tovar ishlab chiqaruvchilari uchun ichki va tashqi bozorda qulay sharoitni ta'minlash maqsadida bozor xoʻjaligining zamonaviy institutlari, korporativ boshqaruv mexanizmlari, moliya bank tizimini yaratish yoʻlida chora-tadbirlarni amalga oshirmoqda. Bu geosiyosiy strategiya va globallashuv jarayonlari nuqtai nazaridan ichki va tashqi tahdidlarning oldini olishga xizmat qiladi.

Tayanch tushunchalar:

Jahon xoʻjaligi, xalqaro mehnat taqsimoti, xalqaro takror ishlab chiqarish jarayonlari, xalqaro iqtisodiy munosabatlar, yangi xalqaro iqtisodiy tartib, globallashuv, ochiq iqtisodiyot, mamlakatlar raqobatbardoshligi.

Savol va topshiriqlar:

- 1. Jahon xoʻjaligi nima?
- 2. Jahon xoʻjaligi qanday qaror topishini tushuntirib bering.
- 3. Jahon xoʻjaligining rivojlanish bosqichlarini eslang.
- 4. Jahon xoʻjaligi qanday mamlakatlardan tashkil topgan?
- 5. Globallashuv nima?
- 6. Global iqtisodiy siyosatning mohiyati qanday?
- 7. Globallashuvning rasmiy ta'riflarini keltiring.
- 8. Ochiq iqtisodiyot nima?
- 9. Xalqaro munosabatlarimiz Oʻzbekiston Respublikasi Konstitutsiyasining qaysi moddalari bilan tartibga solinadi?
 - 10. Qanday xalqaro iqtisodiy tashkilotlarni bilasiz?
- 11. Yangi xalqaro tartibning mazmuni va u tayanuvchi uch qoidani tushuntiring.
 - 12. Antiglobalistlar harakati haqida gapirib bering.
 - 13. Yopiq iqtisodiyot nima?
- 14. Globallashuv jarayonlarida Oʻzbekistonning tashqi iqtisodiy strategiyasi haqida nimalarni bilasiz?

Mavzuni chuqur o'rganish instrumentariysi

Globallashuv – iqtisodiyot subyektlarining global miqyosdagi oʻzaro aloqadorligining kuchayishi, bularning aholi hayotining huquqiy, ijtimoiy, demografik, diniy va boshqa tomonlariga ta'siri.

Jahon xoʻjaligi — yagona jahon takror ishlab chiqarish jarayoni boʻlib, xalqaro mehnat taqsimotiga asoslanadi hamda institutsionallashgan xalqaro iqtisodiy munosabatlar tizimi orqali amalga oshiriladi.

Jahon takror ishlab chiqarish jarayoni deganda jahon xoʻjaligi doirasidagi ishlab chiqarishning muntazam yangilanib, oʻsib borishi tushuniladi.

Xalqaro iqtisodiy munosabatlar (XIM) mamlakatlar iqtisodiy subyektlarining xoʻjalik aloqalaridir.

Xalqaro mehnat taqsimoti — alohida mamlakatlarning muayyan ne'matlar va xizmatlar yaratishga ixtisoslashuvi va ishlab chiqarilgan tovarlar va xizmatlar muayyan turlarining ayirboshlashuvi tushuniladi.

Yopiq iqtisodiyot deganda ishlab chiqarilgan tovarlar va xizmatlar muayyan mamlakat ichkarisida yaratiladi va oʻsha yerda sotiladi. Barcha ichki daromadlar va xarajatlar shu mamlakatning yalpi ichki mahsulotini tashkil etadi.

Ochiq iqtisodiyot deganda shunday makroiqtisodiyot tushuniladiki, unda yaratilgan mahsulotning bir qismi mamlakat ichki iste'moliga, qolgan qismi

xorijga eksport qilinadi.

Jahon xoʻjaligi yoki jahon iqtisodiyoti — bu oʻzaro bogʻliq hamda jadal rivojlanishda boʻlgan va jahon iqtisodiy tizimini tashkil qilgan milliy xoʻjaliklar majmui.

Jahon iqtisodiyoti tizimining asosiy elementlari quyidagilar: milliy xoʻjaliklar, transmilliy korporatsiyalar, integratsiyaviy birlashmalar, xalqaro iqtisodiy tashkilotlar.

Jahon iqtisodiyoti tizimida davlatlarning tashqi iqtisodiy aloqalari integratsiyalovchi, birlashtiruvchi rol oʻynaydi. Uning asosida moddiy va ma'naviy ne'matlarni xalqaro va milliy miqyosda ishlab chiqarish, ularni taqsimlash, ayirboshlash va iste'mol qilish yotadi.

Jahon iqtisodiyoti faoliyatining asosiy maqsadi — inson ehtiyojlarini qondirish.

Jahon xoʻjaligining iqtisodiy tuzilishi — tarmoqlar, mintaqalar, korxonalar oʻrtasidagi nisbat, shuningdek yalpi mahsulotning ishlab chiqarilishi va iste'molidagi mutanosibliklar.

Jahon iqtisodiyotining tarkibiga quyidagi elementlar kiradi: tarmoq, takror ishlab chiqarish, hududiy, ijtimoiy-iqtisodiy tuzilmalar (kichik tuzilmalar).

Iqtisodiy rivojlanish omillari — bular faol ishlatiladigan iqtisod elementlari: yer, mehnat, kapital, axborot, tadbirkorlik qobiliyati, fan-texnika taraqqiyoti (bu oʻz navbatida qolgan mazkur omillar samaradorligining oshishini ta'minlaydi). Ushbu zarur omillarning kerakli joyda va kerakli vaqtda jamlanishi iqtisodiyotning rivojlanishini ta'minlaydi.

Iqtisodiy rivojlanishning harakatlantiruvchi kuchlari bu iqtisodiy rivojlanishda yetakchi oʻrin tutuvchi iqtisodiy subyektlar: tadbirkorlik, davlat.

Iqtisodiy rivojlanish sharoitlari — iqtisodiy taraqqiyotning borishini ta'minlovchi alohida, aniq holatlar. Zarur sharoitlarning yaratilishi iqtisodiyotning boshqarilishi, iqtisodiy vaziyatning tahlil qilinishi hamda bashorat qilinishi, samarali menejmentni ta'minlaydi.

Jahon iqtisodiyotining notekis rivojlanishi — jahon iqtisodiyotining notekis rivojlanishi uning davomiy xususiyatida namoyon boʻladi (qisqa muddatli davr ikki yil, oʻrta muddatlisi 5–7 yil, uzoq muddatli davr 40–60 yil). Sekinlashish (pasayish toʻlqini) va tezlashish (yuksalish toʻlqini) davrlari ketma-ket almashib keladi hamda bir qator omillarning dinamikasi (fantexnika taraqqiyoti va boshqalar) bilan bogʻliqdir.

Ishlab chiqarish va kapitalning baynalminallashuvi – milliy xoʻjaliklarning ishlab chiqarish va investitsiyalar sohasida jahon bozoriga bogʻliqligining kuchayishi.

Transmilliylashuv – korxonalar va ular filiallarining xorijda joylashtirilishi, uning xalqaro mehnat taqsimoti chuqurlashuviga imkon yaratishi.

Integratsiya – milliy xoʻjaliklarning yaqinlashuvi va oʻzaro moslashuvi.

Xalqaro ixtisoslashuv – bu bir yoki bir qancha mamlakatlarda oʻz ichki ehtiyojlarini va manfaatdor mamlakatlarning ehtiyojlarini qondirish uchun bir turdagi mahsulot ishlab chiqarilishining jamlanishidir.

Ixtisoslashuvning quyidagi shakllari ajratiladi:

- 1) ishlab chiqarishning ixtisoslashuvi tarmoqlararo yoki tarmoq va firma ichidagi;
 - 2) hududiy mamlakatlar va mintaqalar boʻyicha, mintaqalar ichida;
 - 3) predmetli (muayyan mahsulotni ishlab chiqarish);
 - 4) detalli (detallar, qismlar, yarim fabrikatlar ishlab chiqarish);
 - 5) texnologik (ishlab chiqarish texnologiyalarini ishlab chiqarish).

Xalqaro mehnat taqsimoti — oʻzaro bogʻliq ishlab chiqarish tizimi boʻlib, bunda turli mamlakatlarning korxonalari muayyan tovarlar yoki xizmatlar ishlab chiqarishga ixtisoslashadilar va keyinchalik ularni oʻzaro ayirboshlaydilar. Xalqaro mehnat taqsimotida ishlab chiqarish bilan shugʻullanmaydigan korxonalar (sugʻurta, investitsiya kompaniyalari, brokerlik, auditorlik, venchur (tavakkal), lizing korxonalar) ham ishtirok etadi.

Xalqaro kooperatsiya – ikki yoki undan ortiq mamlakat korxonalarining yagona ishlab chiqarish dasturini bajarish yoki mahsulotni texnik jihatdan takomillashtirish manfaatlari yoʻlida birlashtirilishidir.

Mavzu yuzasidan asosiy xulosalar:

1. Jahon xoʻjaligi yoki jahon iqtisodiyoti — bu bir-birini taqozo etuvchi, oʻzaro bogʻliq, jadal rivojlanishda boʻlgan va jahon iqtisodiy tizimini tashkil qilgan milliy xoʻjaliklarning majmui boʻlib, iqtisodiy yaxlitlikni tashkil etadi.

Jahon xoʻjaligi yoki iqtisodiyoti uch guruh mamlakatlar, ya'ni iqtisodiyoti yuksak rivojlangan, iqtisodiyoti oʻrtacha rivojlangan va iqtisodiyoti qoloq mamlakatlardan iborat.

- 2. Hozirgi zamon jahon xoʻjaligiga ochiq iqtisodiyot xosdir. Shu bois dunyoda ekstranaliyalar, ya'ni ijobiy yoki salbiy tashqi ta'sirlarga uchramagan mamlakatlar yoʻq. Oʻzbekiston suveren davlat sifatida ochiq iqtisodiyotni shakllantirish yoʻlida faol ish boshlagan. Bunda ochiq turdagi iqtisodiyotni shakllantirishning asosini mamlakatning dunyo xoʻjaligi aloqalarida, xalqaro mehnat taqsimotida faol ishtirok etishi tashkil etadi. Bu esa xavfsizlik choralarini koʻrishni ham taqozo etadi.
- 3. Jahon xoʻjaligining vujudga kelishida xalqaro mehnat taqsimoti va ixtisoslashishining qaror topishi va rivojlanishi muhim shart-sharoit hisoblanadi. Shuningdek, globallashuv, ya'ni gʻoyalar, kapital, texnika va tovarlarning butun dunyo boʻylab oqishi jadallashayotgan va keng miqyosga ega boʻlib borayotgan murakkab jarayon sifatida baholanmoqda.

- 4. XXI asrda globallashuv ayrim ishchilar, oilalar va elatlar uchun yashash joyini oʻzgartirish va moliyaviy noaniqlik bilan bogʻliq xavf-xatarning ortishida namoyon boʻladigan muayyan tahdidlarga ham egaligini nazarda tutish lozimki, bu har bir mamlakatdan iqtisodiy xavfsizlik choralarini koʻrishni talab etadi.
- 5. Globallashuv har bir mamlakat milliy iqtisodiyoti jahon iqtisodiyotining bir qismiga aylanib, undagi oʻzgarishlarning bevosita ta'siriga berilish jarayonidir. Globallashuvning mazmun-mohiyati iqtisodiyotning umumbashariy tus olishi, milliy iqtisodiyotlar rivojining tashqi iqtisodiy aloqalarga bogʻliq boʻlib qolishidir.

21- MAVZU. XALQARO SAVDO. XALQARO VALUTA VA KREDIT MUNOSABATLARI

1. Jahon bozori va xalqaro savdoning ahamiyati

XIX asrning birinchi yarmida yirik fabrika-zavod sanoatining paydo boʻlishi ularning mahsulotlarini butun dunyoda oʻtkazilishiga olib keldi. Davlatlararo savdoning lokal markazlari yagona (umumiy) jahon bozoriga aylandi. Uning shakllanishi XIX asrning ikkinchi yarmi va XX asrning boshida yakunlandi.

Jahon bozori – bu xalqaro mehnat taqsimoti va ixtisoslashuv asosida shakllangan va iqtisodiy munosabatlar orqali oʻzaro bogʻlangan alohida mamlakatlar milliy bozorlari majmuidan iborat. Mazkur bozor oʻz tarkibiga savdoni, kapital harakatini, valuta munosabatlarini, ishchi kuchi migratsiyasini, ilmiy-texnika hamkorligini va boshqa shu kabi yoʻnalishlarni qamrab oladi. Zero, koʻplab tashkil etilayotgan qoʻshma korxonalar, erkin iqtisodiy zonalar, transmilliy kompaniyalar milliy xoʻjaliklarni jahon bozori atrofida birlashtiradi.

Jahon savdosi xalqaro bozorda amalga oshirilishi hech kimga sir emas. Shu bois xalqaro savdo xalqaro iqtisodiy munosabatlarning yetakchi shakli hisoblanadi. Jahon bozori, shuningdek xalqaro mehnat taqsimotiga asoslangan mamlakatlar oʻrtasidagi barqaror tovar-pul munosabatlari sohasidir.

Jahon bozoriga quyidagilar xosdir:

- 1) davlat doirasidan tashqariga chiqariladigan tovarlar ishlab chiqarish;
 - 2) tovar va xizmatlarning davlatlar oʻrtasida koʻchib yurishi;

- 3) ishlab chiqarish omillaridan foydalanishning maqbullashuvi (optimallashuvi);
 - 4) fanatsiya funksiyasi.

Tovar savdo-sotigʻi ishlab chiqarish omillari narxi (bahosi) ning oʻzgarishiga olib keladi, bu esa ishlab chiqarish omillarining mamla-katlararo koʻchib yurishini keltirib chiqaradi. Ishlab chiqarish omillari koʻchib yurishi bilan jahon savdosining hajmi oʻsadi, chunki ular samaraliroq foydalanishi mumkin boʻlgan mamlakatlarga koʻchadi. Ishlab chiqarish omillari (kapital, mehnat)ning xalqaro mobilligi (koʻchib yurishi) iqtisodiy oʻsish sur'atlarini jadallashtiradi.

Xalqaro savdo – dunyodagi barcha mamlakatlar tashqi savdosining majmuidan iborat xalqaro tovar-pul munosabatlari sohasidir. Xalqaro savdo ikki qarama-qarshi oqim – eksport va importdan iborat. Unga savdo saldosi va savdo aylanmasi xosdir.

Xalqaro savdoning xususiyatlari. Iqtisodiy resurslar harakatchanligining mamlakatlar oʻrtasida ular ichkarisiga qaraganda ancha sust kechishi kuzatiladi. Har bir mamlakat xalqaro savdoda turli valutalardan foydalanadi. Jahon amaliyotida ichki savdoga nisbatan siyosiy aralashuv va nazorat qilish darajasi yuqoriligi kuzatiladi.

A. Smitning «mutlaq ustunlik» nazariyasi. Bunga koʻra qanday tovarlarni eksport, qaysilarini import qilishning afzalliklari toʻgʻrisidagi qarashlarini bayon qilishda milliy hamda jahon narxlari, ularning ishlab chiqarish xarajatlari mutlaq miqdori oʻrtasidagi farqni hisobga oladi.

Boshqacha aytganda, mazkur nazariya xarajatlarning mutlaq miqdoriga asoslanadi. Unga koʻra, har bir mamlakat oʻzida kamroq xarajat sarflanadigan mahsulotlarni ishlab chiqarish, ancha yuqori xarajatlarni taqozo qiladiganlarini esa tashqaridan sotib olishi lozim.

D. Rikardoning «nisbiy ustunlik» nazariyasi. Xalqaro mehnat taqsimoti va ixtisoslashishning umumiy tamoyillariga asoslanish orqali aniqlanadigan xarajatlar nisbatidagi farq (avvalo, tabiiy-geografik sharoitlari tufayli kelib chiqadigan) aynan olingan mamlakatda qaysi tovarlarni ishlab chiqarish, qaysilarini ayirboshlash orqali chetdan olish lozimligini koʻrsatadi.

Konyunktura deganda jahon iqtisodiyotining rivojlanishini, alohida olingan mamlakatning iqtisodiy ahvolini, bozorning biror sohasi rivojlanishini belgilovchi omillar va shart-sharoitlar majmui tushuniladi. Jahon bozorida iqtisodiy vaziyat keskinlashmoqda. XXI asrning dastlabki oʻn yilligida xalqaro savdoda quyidagi oʻzgarishlar roʻy berdi: jahon bozorida AQShning yetakchilik mavqei pasayib, boshqa rivojlangan

mamlakatlar, xususan Xitoy, Yaponiyaning mavqei ortib bormoqda. Jahon eksportida yangi industrial mamlakatlar (Singapur, Janubiy Koreya, Xitoy, Braziliya, Meksika)ning hissasi ortmoqda. Ishlab chiqarish modernizatsiyasi natijasida xalqaro savdoning tovar tarkibi oʻzgarmoqda. Jahon eksportida fan sigʻimi, yuqori murakkab innovatsion ahamiyatli mahsulotlar, elektr-texnika uskunalari, transport vositalarining hissasi ortib bormoqda. Jahon bozori savdo aylanmasi tarkibida qishloq xoʻjalik mahsulotlarining ulushi qisqarib, yengil sanoat mahsulotlari ulushi ortayotgani kuzatilmoqda. Jahon eksportida xizmatlar ulushi toʻxtovsiz oʻsib bormoqda.

Jahon narxlari – bu jahon savdo markazlari (London metallar birjasi, Chikago savdo birjasi kabi)ning baholari. Dunyo narxlarining quyidagi turlari ajratiladi:

- 1) erkin konvertatsiya qilinadigan va qilinmaydigan valutadagi toʻlovlar bilan amalga oshiriladigan bitimlar boʻyicha narxlar;
 - 2) transfert (firma ichidagi) narxlar, bular tijorat siri hisoblanadi;
 - 3) savdoga taalluqli boʻlmagan operatsiyalar boʻyicha narxlar.

Tovarlarga boʻlgan kontrakt (shartnomaviy) narxlarning quyidagi turlari qoʻllaniladi:

- 1) qat'iy narx;
- 2) bitim ijro etilayotgan paytdagi muayyan (aniqlik kiritilgan) narx;
- 3) bozor narxining shartnomaviy narxdan muayyan miqdorga oshganini inobatga oluvchi narx;
- 4) oʻzgaruvchan (sirpanuvchan) narx, u ayrim xarajatlarning oʻzgarishiga bogʻliq;
- 5) aralash narx (narxning muayyan qismi belgilab qoʻyiladi, boshqasi esa oʻzgaruvchan xususiyatga ega boʻladi).

Kontrakt narxlarning xususiyati tovarlarni yetkazib berish muddatini inobatga oladi va sotuvchini inflatsiya tufayli zarar koʻrishdan himoya qiladi. Oʻzgaruvchan narxlarni hisoblaganda e'lon qilinuvchi indekslar qoʻllaniladi, bu esa xaridorni sotuvchining narxlarni oshirib koʻrsatishidan himoya qiladi.

Dunyo narxlarini iqtisodiy va statistik tahlil qilishda ularni ikki guruhga ajratish qabul qilingan: qayta ishlovchi sanoat mahsulotiga boʻlgan narx va xomashyo narxi.

Qayta ishlovchi sanoat mahsulotining eksport narxi uchun asos sifatida ishlab chiqaruvchilarning oʻzlari toʻliq va bevosita xarajatlar usullari bilan shakllantiradigan ichki bozor narxlari xizmat qiladi.

Toʻliq xarajatlar usuli boʻyicha mahsulot ishlab chiqarish xarajatlariga kutilayotgan foyda hajmi qoʻshiladi hamda kutayotgan daromad aniqlanadi. Ushbu daromadning miqdori har oyda ishlab chiqariladigan mahsulotga boʻlinadi. Shu tariqa har bir buyumning narxi aniqlanadi.

Bevosita xarajatlar usuli boʻyicha barcha xarajatlar yuk xati (shartlidoimiy) va bevosita (oʻzgaruvchan) xarajatlarga boʻlinadi. Bevosita xarajatlar usuli boʻyicha baho belgilash asosan bevosita (oʻzgaruvchan) xarajatlarni inobatga oladi. Doimiy xarajatlar sotuv narxlari bilan oʻzgaruvchan xarajatlar oʻrtasidagi farq, ya'ni qoʻshilgan (marginal) foyda bilan qoplanadi.

Firmalar e'lon qilingan (preyskurant) narxlarni o'zgartirmagan holda, ularni oshirishi yoki tushirishi mumkin. Buning uchun yetkazib berish shartlari, sifati, o'rami (qutisi) va shu kabilar uchun ustamalar yoki chegirmalar tizimidan foydalanadilar yoxud tovarlarni shartnomaviy narxlar bo'yicha sotadilar (ular sanoat uskunalari, yarimfabrikatlar va materiallar sotuvining 80–90 foizini qamrab oladi).

Xomashyo (energoresurslar, mineral xomashyo, oʻgʻitlar, qishloq xoʻjalik mahsulotlari, rangli metallar) bozorida baho belgilashning xususiyatlarini asosiy ishlab chiqaruvchilarning narxlarini, eksport qiluvchi va import qiluvchi davlatlarning alohida rolini, talab va taklifni hisobga olish tashkil qiladi. Bir xil tovarlarga boʻlgan dunyo va ichki narxlar koʻpincha oʻzaro mos kelmaydi. Tashqi bozorlarni egallash uchun ichki narxlardan yoki tovar qiymatidan ancha past boʻlgan demping narxlardan foydalaniladi. Demping xarajatlari tovarlarning ichki bozorda sotilishidan kelgan oʻta yuqori foydalar hisobidan qoplanadi.

Baho belgilashga ta'sir etuvchi omillar quyidagilardan iborat:

- 1) eksport qiluvchi mamlakatlar iqtisodiy taraqqiyotining darajasi (progressiv mahsulot, yuqori darajadagi mehnat unumdorligi, malakali ish kuchiga sarflanadigan xarajatlarning kamligi, asosiy kapitalning yuqori sur'atlarda yangilanishi narxlarni pasaytirish va mahsulot raqobatbardoshligini oshirish imkonini beradi);
- 2) narxlarning inflatsiya ta'sirida koʻtarilishi (ishlab chiqarish xarajatlarining ortishi mahsulot narxining oʻsishiga olib keladi);
 - 3) aholi jon boshiga toʻgʻri keladigan yalpi milliy mahsulot hajmi.

Shunday qilib, tovarlar ishlab chiqarishning milliy va baynalminal qiymati oʻrtasidagi farqlarda namoyon boʻladigan qiymat qonuni jahon bozoridagi bitimlar narxiga bevosita ta'sir koʻrsatadi hamda xalqaro mehnat taqsimotining harakatlantiruvchi kuchi hisoblanadi. Mamlakatlar oʻrtasidagi iqtisodiy aloqalar xalqaro hisob-kitoblar asosida olib boriladi.

Xalqaro hisob-kitoblar — bu turli mamlakatlarning hukumatlari, korxonalari, muassasalari va fuqarolari oʻrtasida yuzaga keladigan pul talabnomalari va majburiyatlari boʻyicha toʻlovlarni tartibga solish tizimidir. Xalqaro hisob-kitoblar turli shakllarda — naqd pulga, kreditga, oldindan bajarilgan toʻlov (avans toʻlov) boʻyicha amalga oshiriladi. Jahon savdosida bitim narxining 80–90 foiz toʻlanadigan, qolgan qismi esa shartnoma boʻyicha belgilangan muddatlarda naqd pul bilan toʻlanadigan kreditdan keng foydalaniladi. Xalqaro savdoda xizmatlar muhim oʻrin egallaydi.

Xizmat deganda moddiy mahsulotda o'z ifodasini topmaydigan, balki ega boʻladigan muayyan foydali iste'molchi samarada namoyon boʻladigan pulli faoliyat tushuniladi. Xizmat, shuningdek harakat natijasida va boshqa institutsional birlik bilan oʻzaro kelishuv asosida yuz bergan institutsional birlik holatining o'zgarishida namoyon bo'ladi. Ma'lumot o'rnida keltirsak, jahon savdo tashkilotining tasnifiga ko'ra, 600 dan ortiq turdagi xizmatlar mavjud. Xalqaro valuta fondining toʻlov balansini tuzish bo'yicha yo'riqnomasiga muvofiq, to'lov balansida inobatga olinadigan savdo xizmatlari tarkibiga 11 turdagi xizmatlar (transport, qatnov (sayohat), aloqa, qurilish, sug'urta, moliya, axborot, litsenziyalar, biznes xizmatlar, madaniyat, hukumat tashkilotlariga tovarlar yetkazib berish) kiradi.

Iste'molchiga yetkazib berish usullariga koʻra, xizmatlarning investitsion (bank, mehmonxona va boshqalar), savdo (transport, sugʻurta va boshqalar), savdo-investitsiya (aloqa, qurilish, axborot va boshqa) turlari ajratiladi. Xizmatlar omilli (kapital, mehnat, texnologiyalarning mobilligi bilan bogʻliq toʻlovlar) va omilsiz (xizmatlarning qolgan turlari) boʻlishi mumkin.

Xizmatlar bilan savdo qilish xususiyatini sotuvchi va xaridorning bitim tuzish vaqtidagi aloqasining mavjudligi tashkil qiladi. Xizmatlar savdosida bitimlar tuzishning quyidagi shartlari mavjud:

- 1) xaridorning mobilligi (turizm, tibbiy yordam va boshqalar);
- 2) sotuvchining mobilligi (qurilish, audit va boshqalar);
- 3) bir vaqtning oʻzida sotuvchi va xaridorning mobilligi yoki xizmatning oʻzining mobilligi (xalqaro telefon soʻzlashuvi, uchinchi mamlakatdagi xalqaro konferensiya kabilar).

Jahon xizmatlar tarkibida xususiy sektor, transport xizmatlari yetakchi oʻrin tutadi. Xizmatlar qiymati hajmining 75 foizi rivojlangan mamlakatlar tomonidan eksport qilinadi. Jahon iqtisodiyoti nuqtai

nazaridan xizmatlarning eng muhim turi transport xizmatlaridir (tovar va yoʻlovchilarni xalqaro miqyosda tashish).

Moliyaviy lizing ijaraga beruvchining xarajatlari qoplanishi va unga foyda ta'minlanishini nazarda tutadi. Ijarachi ijara muddati tugaganidan soʻng, ijara predmetini qaytarishi, uni qoldiq qiymati boʻyicha sotib olishi yoki yana ijaraga olishi mumkin.

Ishlab chiqarish (operativ) lizingi ijaraga olinayotgan texnikaning amortizatsiya davridan kamroq muddatga foydalaniladi, shu bois ijara stavkalari yuqoriroq boʻladi. Lizing kompaniyasi uskunani xorijiy firmadan sotib olishi va oʻz mamlakatiga ijaraga berishi (import lizing) yoki aksincha boʻlishi (eksport lizing) mumkin.

Xizmatlar bilan savdo qilishda konsalting xizmatlari (audit, boshqaruv maslahatlari va boshqalar), vositachilik keng tarqalgan.

Jahondagi turli mamlakatlar mahsulot ishlab chiqaruvchilari oʻrtasidagi aloqaning asosiy shakllaridan biri *tashqi savdo faoliyatidir*. Oʻzbekistonning tashqi savdosi tovar, xizmat va kapital bilan mamlakatlararo almashuv (kreditlar olish)ni oʻz ichiga oladi. Oʻzbekiston tashqi savdosining tarkibiga uning quyidagi turlari kiradi: eksport, import, tranzit savdo (tovarni xorijda sotib olish va ayni vaqtda uchinchi mamlakatga sotish), tovarlarni qayta eksport yoki qayta import qilish, litsenziyali savdo kelishuvlari va boshqalar.

Oʻzbekistonning jahon mamlakatlari bilan tashqi savdo munosabatlarini rivojlantirishiga quyidagilar asosiy ta'sir koʻrsatmoqda:

- 1) jahon savdosining liberallashuvi (erkinlashuvi);
- 2) jahon savdo tashkiloti qoidalari boʻyicha jahon savdosining tartibga solinishi;
- 3) xalqaro mehnat taqsimotining chuqurlashuvi, texnika taraqqiyoti ta'sirida ishlab chiqarishning baynalminallashuvi.

Oʻzbekiston jahon iqtisodiyotida sanoati rivojlangan va rivojlanayotgan mamlakatlar oʻrtasidagi oraliq oʻrinni egallaydi. Oʻzbekiston jahon iqtisodiyotida sezilarli oʻrin egallaydi. Dunyoning 210 dan ortiq mamlakatlari orasida Oʻzbekiston oʻzining tabiiy resurs hamda ishlab chiqarish salohiyati boʻyicha oʻta muhim mavqega ega. 2012-yilning 1-yanvar ma'lumotlariga koʻra, hududi boʻyicha 55-oʻrinda, aholi soni boʻyicha dunyoda 39-oʻrinni egallaydi. Kumush, volfram, fosfarit, kaliy tuzi, nodir metallar va boshqa qimmatbaho minerallar, jumladan, oltin zaxirasi boʻyicha 4-oʻrinda, uran zaxirasi boʻyicha 7-oʻrinda, molibden boʻyicha 8-oʻrinda, misning aniqlangan zaxirasi boʻyicha 10-oʻrinda, tabiiy gaz boʻyicha 14-oʻrinni egallab, dunyoning yetakchi davlatlari

sirasiga kiradi. Ekin maydonlari boʻyicha 11-oʻrinda turadi, kadmiy qazib olish boʻyicha 3-oʻrinda, uran qazib olish boʻyicha 6-oʻrinda, oltin va tabiiy gaz boʻyicha 8-oʻrinda, molibden qazib olish boʻyicha kuchli oʻn beshlikka kiradi.

Qorakoʻl ishlab chiqarish boʻyicha 2-oʻrinda, paxta boʻyicha 5-oʻrinda, ipak tola boʻyicha 6-oʻrinda turadi. Oʻzbekiston oltingugurt kislotasi, azotli oʻgʻitlar, mineral moylovchi materiallar va parafin, paxta tolasi va gazlamalar, tomat pastasi, quruq mevalar, bogʻdorchilik va uzumchilik mahsulotlari, jun yetishtirish boʻyicha dunyoning ikkinchi oʻntalik mamlakatlariga kiradi.

Paxta tolasi eksporti boʻyicha ikkinchi, uran eksporti boʻyicha uchinchi oʻrinda turadi. Oʻzbekistonning jahon savdosidagi ishtirokini kengaytirish shartlarini quyidagilar tashkil qiladi:

- 1) Oʻzbekiston tovarlarining dunyo bozorlaridagi raqobatbardoshligi;
- 2) tashqi savdo tuzilishining rivojlanishi;
- 3) milliy iqtisodiyotning jadal rivojlanishi.

Oʻzbekiston savdosining geografik tuzilishi ikki asosiy yoʻnalish bilan ajralib turadi: MDH mamlakatlari va uzoq xorij mamlakatlari.

Uzoq xorij mintaqalarining ulushi mamlakatimizning butun tashqi savdo aylanmasi oʻsib borish tendensiyasiga ega boʻlmoqda.

Oʻzbekistonning asosiy savdo sheriklariga quyidagilar kiradi: Germaniya, Niderlandiya, Italiya, Xitoy, Turkiya, Polsha, Shveysariya, Buyuk Britaniya, AQSh va Finlyandiya. Yevropa Ittifoqiga Oʻzbekiston tovar aylanmasining 52,1 foizi, MDH mamlakatlariga – 15,3 foizi, Osiyo va Tinch okeani mamlakatlariga 16,1 foizi toʻgʻri keladi.

Oʻzbekistonning asosiy savdo hamkori Germaniya boʻlib, uning Oʻzbekiston tashqi savdosidagi ulushi 10 foizdan ortiqdir. Oʻzbekiston Germaniyaning tashqi savdo aylanmasida 14-oʻrinni egallaydi (2 foiz). Oʻzbekistonning eksporti an'anaviy ravishda xomashyo yoʻnalishiga ega. Eksport tarkibidagi qiymati boʻyicha yonilgʻi-energetika tovarlarining ulushi XXI asrning birinchi oʻn yilligida — 46,2 foizni, qora va rangli metallar — 15,5 foizni, mashina, uskunalar, transport vositalari — 10 foizni tashkil etdi.

Oʻzbekistonning importida asosiy oʻrinni mashinasozlik (47,7 foiz), oziq-ovqat va uni ishlab chiqarish uchun xomashyo (17 foiz), kimyo mahsulotlari (18,1 foiz) tashkil qiladi.

Tashqi savdoni davlat tomonidan tartibga solishning maqsadi — Oʻzbekiston tashqi savdo aylanmasini xomashyo eksport qilish va iste'mol tovarlarini import qilishdan fan yutuqlarini oʻz ichiga olgan,

yuqori texnologik tarmoqlarga, dunyoning yetakchi davlatlari, ayniqsa, Osiyo mamlakatlari bilan savdo-sotiqni rivojlantirishga yoʻnaltirish evaziga toʻlov balansining maqbul tuzilishini ta'minlashdir. Bular Oʻzbekiston milliy iqtisodiyotining sanoati rivojlangan mamlakatlar bilan xoʻjalik aloqalarini kengaytirishdek obyektiv ehtiyoji bilan bogʻliq.

Oʻzbekistonning 1990–2010-yillardagi tashqi savdo dinamikasi va tarkibi. Oʻzbekiston Respublikasining iqtisodiyoti mustaqillik qoʻlga kiritilgunga qadar asosan sobiq Ittifoq respublikalarini xomashyo resurslari bilan ta'minlashga yoʻnaltirilgan edi. Iste'mol mahsulotlarining asosiy qismini respublikamizda ishlab chiqarish imkoniyatining mavjudligiga qaramasdan, ular chetdan keltirilar edi.

1990-yilda Oʻzbekiston tashqi savdo aylanmasi 805,6 million dollarni, jumladan, eksport 442,7 million dollarni, import 362,9 million dollarni tashkil etgan. Ijobiy saldo esa 80 million dollar atrofida boʻlgan edi.Oʻtgan 1991–2011-yillarda tashqi savdo aylanmasi 27,1 barobar oʻsdi, shu jumladan, eksport hajmi 29,5 barobar, import 24,2 barobar oshdi. Bu jarayonda tashqi savdoning ijobiy saldosi 53 barobar ortib, oltin-valuta zaxiralarining yuqori darajada oʻsishi va milliy valuta barqarorligini ta'minladi.

Eksport va import tarkibi tubdan oʻzgardi. Oʻzbekiston chetga xomashyo chiqaradigan va tayyor mahsulotlar, asosan iste'mol tovarlarini olib kiradigan mamlakatdan bugungi kunga kelib, qoʻshilgan qiymati yuqori boʻlgan tayyor mahsulotlarni eksport qiladigan va texnik hamda texnologik modernizatsiya qilishga moʻljallangan yuqori texnologiyalar asosidagi uskunalarni import qiladigan mamlakatga aylanib bormoqda.

1-jadval
Oʻzbekistonning tashqi savdo tarkibi

Oʻzbekistonning tashqi	1990-yil	2000-yil	2010-yil
savdo tarkibi			
Tashqi savdo aylanmasi, million	805,6	6212,1	21842,2
dollar			
Eksport, million dollar	442,7	3264,7	13044,5
Import, million dollar	362,9	2947,4	8799,7
Saldo (+, –), million dollar	79,8	317,3	4244,8
Eksport (foiz)	100	100	100
Paxta tolasi	59,7	27,5	11,3
Oziq-ovqat mahsulotlari	3,9	5,4	9,7

Kimyoviy mahsulot va undan	2,3	2,9	5,1
tayyorlangan mahsulotlar			
Energiya va neft mahsulotlari	17,1	10,3	24,8
Qora va rangli metallar	4,6	6,6	6,8
Mashina va uskunalar	1,7	3,4	5,5
Xizmatlar	1,3	13,7	9,1
boshqalar	9,4	30,2	27,7
Import (foiz)	100	100	100
Mashina va uskunalar	12,1	35,4	44,1
Kimyoviy mahsulot va undan	9,7	13,6	14,3
tayyorlangan mahsulotlar			
Energiya va neft mahsulotlari	3,1	3,8	6,0
Qora va rangli metallar	10,2	8,6	8,4
Oziq-ovqat mahsulotlari	48,9	12,3	10,9
Xizmatlar	1,5	8,5	4,7
boshqalar	14,5	17,8	11,6

Manba: Oʻzbekiston Respublikasi Davlat statistika qoʻmitasi.

Eksportning tovar tarkibini diversifikatsiya qilish tufayli mamlakatimiz paxta yakkahokimligi oqibati boʻlgan paxta tolasi eksportiga qaramlikdan xalos boʻldi. Uning eksportdagi ulushi kamayib, 1990-yildagi 59,7 foizdan 2010-yilda 11,3 foizga tushdi. 1990-yilda eksportning umumiy hajmida xomashyo hisoblanmaydigan tovarlar ulushi 30 foizdan kamroq boʻlgan boʻlsa, hozirgi kunda bu koʻrsatkich 70 foizdan ziyoddir.

Yurtimizda keyingi 10 yil mobaynida yengil avtomobillar eksporti 7,6 barobar, paxta kalavasi 4,7 barobar, trikotaj matolar 156 barobar, mineral oʻgʻitlar 11,7 barobar, neft mahsulotlari 6,5 barobar, sement 6,3 barobar, sabzavot va mevalar eksporti 14,1 barobar oʻsdi. Kichik biznes korxonalarining eksport hajmi 10 barobardan koʻproq oshdi.

Mamlakatimiz iste'mol tovarlari ishlab chiqaruvchilarining tezkor rivojlanishi natijasida import tarkibida oziq-ovqat mahsulotlari ulushi 4,5 barobar qisqardi. Masalan, oxirgi 15 yilda bugʻdoy importi nafaqat toʻxtatildi, balki Oʻzbekiston oʻz bugʻdoyi va gʻallasidan tayyorlangan unni eksport qila boshladi. Goʻsht mahsulotlarini import qilish 5 barobar, sut mahsulotlari 2,6 barobar, qayta ishlangan qishloq xoʻjaligi mahsulotlari 3,5 marta, alkogolli va alkogolsiz ichimliklar 16 va boshqa oziq-ovqat mahsulotlari 7 barobardan koʻproq, gilam va yerga toʻshaladigan qoplamalar 10 marta, trikotaj matolar 10 barobar,

toʻqimachilik-trikotaj liboslari 11 marta, poyafzallar importi 11 barobar kamaydi.

2-jadval

Tashqi savdo aylanmasining geografik tarkibi

	1990-yil	2010-yil
Tashqi savdo aylanmasi	100	100
Uzoq xorij mamlakatlari	39,9	56,9
MDH mamlakatlari	60,1	43,1
Eksport	100	100
Uzoq xorij mamlakatlari	37,7	54,8
MDH mamlakatlari	62,3	45,2
Import	100	100
Uzoq xorij mamlakatlari	42,6	59,9
MDH mamlakatlari	57,4	40,1

Mashina va uskunalarning import tarkibidagi ulushi oʻsib, 1990-yildagi 12,1 foizdan 2000-yilda 35,4 foizga, 2010-yilda esa 44,1 foizga yetdi.

Tashqi savdo geografiyasi ham diversifikatsiya qilindi. Tashqi savdoda sobiq Ittifoq respublikalarining emas, balki uzoq xorij mamlakatlarining ulushi orta boshladi.

Milliy iqtisodiyot ochiqligining koʻrsatkichlari quyidagilardan iborat:

- 1) YAMM va ayrim turdagi mahsulotlarni ishlab chiqarishda eksport kvotasi;
 - 2) iste'mol tarkibidagi importning ulushi;
- 3) xorijiy investitsiyalarning barcha investitsiyalar umumiy hajmidagi ulushi.

Oʻzbekistonda mustaqillik yillarida, ayniqsa, 2000-yildan boshlab faol eksport siyosati yuritildi. Natijada Oʻzbekiston eksportining tuzilmasi oʻzgardi. 2-jadvalga qarang.

Koʻplab ishlab chiqarish va noishlab chiqarish tovarlari iste'molida importning ahamiyati oshdi. Oʻzbekiston tashqi iqtisodiy faoliyatining liberallashuvi hamda import tarkibida mashina va uskunalarning hissasi ortib borib, 2011-yilda qariyb 60 foizga yetdi. Bu Oʻzbekistonning ishlab chiqarishni modernizatsiya qilish strategiyasi natijasidir.

Oʻzbekistonga oziq-ovqat mahsulotlari importiga qaramlikni mustaqillik yillarida minimal darajaga tushirish tendensiyasi xos. Hozirda bu koʻrsatkich 6,8–9,0 foizni tashkil etadi.

2010-yilda Oʻzbekistonda import hajmi qariyb 9 mlrd. AQSh dollarini tashkil etdi. Oʻzbekiston oʻz hududiga olib kirilayotgan tovarlarning sifatiga, iste'molchilarining huquqlarini himoya qilishga e'tibor qaratmoqda.

MDH mamlakatlarida orasida Oʻzbekistonning asosiy savdo sheriklari hamon Rossiya, Belarus Respublikasi, Ukraina va Qozogʻiston hisoblanadi.

Oʻzbekistonning tashqi savdo aylanmasining umumiy hajmida Belarus 6,8 foizni, Ukraina 6,6 foizni, Qozogʻiston 3,4 foizni tashkil etadi.

Oʻzbekistonning tashqi savdo siyosati. Tashqi savdo siyosati – ichki bozorni himoyalashga, tashqi savdo hajmining oʻsishini ragʻbatlantirishga, uning tuzilishini va tovar oqimlarining yoʻnalishlarini maqbullashtirishga qaratilgan tadbirlar tizimi.

Oʻzbekistonning tashqi savdo siyosatini himoya qilish va qoʻllabquvvatlashda huquqni muhofaza qiluvchi organlarning oʻrni beqiyos.

Jahonda tashqi savdo siyosati erkin, bojsiz savdo darajasi hamda proteksionizm, ya'ni oʻz bozorini importdan himoya qilish darajasi bilan ajralib turadi. Hozirgi tashqi savdo siyosati tashqi savdo almashuvining cheklovlari susaytirilgani, uning yoʻlidagi toʻsiqlarni bartaraf etishga intilish, ya'ni savdoni liberallashtirish bilan ajralib turadi (savdoning erkinlashtirilishi Ikkinchi jahon urushi tugaganidan soʻng barcha mamlakatlarda kuzatilgan nihoyatda keskin iqtisodiy oʻsishning asosiy sabablaridan biridir).

Dunyo mamlakatlarining JSTga qoʻshilish shartlari — uning hududida tovar va xizmatlar uchun erkin raqobat rejimini yaratish, ya'ni boj tariflarini kamaytirish, mahsulot ishlab chiqarish va eksport qilishda demping narxlar boʻyicha subsidiya berishdan voz kechish. Ushbu shartlar dunyo mamlakatlarining aksariyati uchun bajarilishi qiyin vazifadir. Shu sababli JST dunyo mamlakatlariga ishlab chiqarishni, ayniqsa, qishloq xoʻjalik mahsulotlari ishlab chiqarishni subsidiyalashtirishni tartibga keltirish, statistik hisobotning aksildemping choralarini qoʻllashni tavsiya etadi.

Umumiqtisodiy vazifalarga hamda JSTning talablariga muvofiq, dunyo mamlakatlarida tashqi iqtisodiy faoliyat tartibga solinmoqda, ya'ni:

tashqi savdo operatsiyalarining litsenziya bilan tartibga solinishi, boj-tarif tartibga solinishi va tashqi savdo shartnomalarining tender (tanlov) asosida tuzilishi.

Dunyo mamlakatlarining ayrimlari kabi Oʻzbekistonda ham eksportni ragʻbatlantirishning JST talablariga va eksportni davlat tomonidan qoʻllab-quvvatlash tartibiga mos tizimi amal qilmoqda. Milliy eksportyorlarni bunday qoʻllab-quvvatlash quyidagi moliyaviy imtiyozlar tizimini oʻz ichiga oladi:

- 1) Oʻzbekiston tijorat banklari eksportga yoʻnaltirilgan tashkilotlarni aylanma mablagʻ bilan ta'minlashi uchun kredit resurslari xususida kafolat majburiyatlarini berishi;
- 2) eksport kreditlarining uzoq muddatli tijorat tavakkallaridan kafolatlangan sugʻurtalanishi;
- 3) eksporterlarga eksport mukofotlari, milliy va xorijiy tashuvchilarning yuklarini tashish xizmatlarining qiymatidagi farqni toʻlab berish tarzidagi toʻgʻridan-toʻgʻri dotatsiyalar;
 - 4) eksport kreditlarini imtiyozli shartlar bilan berish va hokazo.

Davlat kadrlar tayyorlash, dunyo bozori konyunkturasini oʻrganish, milliy eksporterlar va xorijdagi importerlar manfaatlarini himoya qilish xarajatlarining asosiy qismini oʻz zimmasiga olmoqda, shuningdek ularning tashqi bozordagi faoliyati uchun zarur siyosiy sharoitlarni ta'minlamoqda.

O'zbekistonning eksportni rivojlantirish borasidagi tashqi savdo siyosati, respublikaning xalqaro mehnat taqsimotidagi ishtirokining samarali modelini shakllantirish borasida sezilarli ishlar amalga oshirildi. Uning asosiy yoʻnalishlari nafaqat eksportni kengaytirishni, balki raqobatdagi ustunliklar va jahon konyunkturasidan maqbul tarzda yuqori uning foydalanish asosida bargaror hajmlarini qoʻllabquvvatlashni nazarda tutadi. O'zbekiston eksportini, jumladan tashqi tayyor mahsulotni, yutuqlari avvalo fan texnologiyalarga asoslangan mahsulotlarni keng miqyosda olib chiqish borasida diversifikatsiya qilish yoʻlidan bormoqda. Shu bois davlatimiz rahbari Islom Karimov: «Bugungi kunda koʻplab rivojlangan va jahon iqtisodiyotida yetakchi oʻrin tutadigan mamlakatlar tajribasi shuni soʻzsiz isbotlab bermoqdaki, raqobatbardoshlikka erishish va dunyo bozorlariga chiqish, birinchi navbatda, iqtisodiyotni izchil isloh etish, tarkibiy jihatdan oʻzgartirish va diversifikatsiya qilishni chuqurlashtirish, yuqori asoslangan yangi korxona va ishlab texnologiyalarga tarmoqlarining jadal rivojlantirishni ta'minlash, faoliyat ko'rsatayotgan quvvatlarni modernizatsiya qilish va texnik yangilash jarayonlarini tezlashtirish hisobida amalga oshirilishi mumkin», – deb ta'kidlagani bejiz emas.

Tashqi savdo faoliyati davlat tomonidan tartibga solinib turiladi. Ayrim mamlakatlarda istisnoli hollarda joriy etishi mumkin boʻlgan eksport boʻyicha cheklov choralari belgilangan. Mavjud cheklovlar quyidagi toifalarga boʻlinadi:

- 1) ushbu tovarning olib chiqilishiga ruxsat etilgan eksporterlar doirasining cheklanishi;
- 2) xorijga olib chiqilayotgan tovarlarga kvotalar belgilanishi; eksport natijasida milliy manfaatlarga zarar yetishini istisno qiluvchi shartlarga rioya etish.

Eksportning miqdor boʻyicha cheklanishi ichki bozor boʻshab qolishining oldini olish va ushbu tovarning jahon bozorlarida haddan tashqari koʻpayib ketishiga yoʻl qoʻymaslik maqsadida joriy etiladi.

Mamlakatlar oʻrtasida tovarlarning xavfsizligini tasdiqlovchi sertifikatlarni oʻzaro tan olish haqidagi bitimlar ham amal qiladi.

Iqtisodiy oʻsishning yuqori sur'atlari va makroiqtisodiy barqarorlik ta'minlanishida tashqi iqtisodiy aloqalarni yanada rivojlantirish, xususan, mamlakatimiz eksport hajmini yanada oshirish va tarkibini yaxshilash muhim omil boʻldi. Respublikamizning tashqi savdo aylanmasi 1990–2011-yillar davomida 31,7 marta, jumladan, eksport 33,9 marta, import qariyb 29 marta oshdi. Natijada tashqi savdoning ijobiy saldosi 56,6 marta ortdi. Birgina «2011-yilda eksport mahsulotlari hajmi 2010-yilga nisbatan qariyb 15,4 foizga koʻpaydi va 15 milliard dollardan koʻproqni tashkil etdi. Bu 2000-yilga nisbatan 4,6 barobar ziyoddir. Tashqi savdo aylanmasining ijobiy saldosi 4 milliard 500 million dollardan oshdi»¹.

2. Jahon valuta bozori va uning asosiy xususiyatlari

Jahon xoʻjaligida valuta munosabatlari muhim rol oʻynaydi. Chunki jahon miqyosida yagona toʻlov vositasi boʻlmasa, xoʻjalik aloqalarini yuritib boʻlmaydi. Bu vazifani jahon pullari bajaradi (AQSh dollari, Angliya funt strelingi, Yapon iyenasi). Shu bois davlatlararo hisob-kitob yagona valutada yuritilishi uchun aniq belgilangan valuta kursi talab etiladi. Valuta kursi barqarorligi taqozo etiladi.

 $^{^{1}}$ Qarang: *Каримов И. А.* 2012 йил Ватанимиз тараққиётини янги босқичга кўтарадиган йил бўлади. – Т.: «Ўзбекистон», 2012. – Б. 6.

Ochiq iqtisodiyot valutalarning ayirboshlanishini yuzaga keltiradi, chunki buni tovarlar va resurslarning xalqaro harakati talab qiladi. Har bir mamlakatning milliy valutasi u uchun yagona toʻlov vositasi boʻladi, ya'ni tovarlar faqat shu valutaga sotiladi. Shu sababli savdo-sotiq, kapital chiqarish yoki kiritish, ish kuchi migratsiyasini uyushtirish uchun oʻzga mamlakatlar valutasini ma'lum narxda sotib olish kerak boʻladi. Shu bois jahon valuta-moliya tizimi amal qiladi.

Tashqi savdo balansida muttasil ijobiy saldoga erishish mamlakatimiz oltin-valuta zaxiralarining ortishiga va milliy valutamiz barqarorligi ta'minlanishiga olib keldi, xorijiy valuta talab etadigan yirik investitsiya dasturlarini moliyalashtirish imkoniyalarini kengaytirdi. Xususan, investitsiya dasturlarini moliyalashtirishda ahamiyati oʻsib borayotgan Oʻzbekiston Respublikasi Tiklanish va taraqqiyot jamgʻarmasi kapitalining 2012-yil boshiga kelib 9 milliard dollardan oshib ketishida tashqi savdoda ijobiy saldoga erishilayotgani asosiy rol oʻynadi.

Jahon valuta-moliya tizimi — mustaqil amal qiluvchi yoki tovar va ishlab chiqarish omillarining xalqaro harakatiga xizmat koʻrsatuvchi valuta-moliya munosabatlarining xalqaro bitimlar bilan mustahkamlangan shakli. Ushbu tizimning valuta elementlarini milliy valyutalar, ularning almashish va muomalada boʻlish shartlari, valuta pariteti, valuta kursi, uni tartibga solishning milliy va xalqaro mexanizmlari tashkil etadi.

Tizimning moliyaviy elementlari – xalqaro moliya bozorlari hamda moliyaviy vositalar – valuta, qimmatbaho qogʻozlar, derivativlar, kreditlar, majburiyatlar bilan savdo qilish mexanizmlaridir.

Derivativlar – bu chet el valutasi bilan bogʻliq boʻlgan hosilaviy moliyaviy vositalar (valuta derivativlari) chet el valutasi oldi-sotdisi boʻyicha shartnomalar boʻlib, ularda belgilangan majburiyatlar muayyan muddat oʻtgach yoki uning kursi oʻzgarishiga bogʻliq ravishda bajarilishi mumkin.

Jahon valuta-moliya tizimining alohida elementini xalqaro hisob-kitoblar tashkil etadi.

Jahon valuta bozori – xorijiy valuta va turli valuta qimmatliklarini olish-sotish boʻyicha operatsiyalar natijasida yuzaga keladigan barqaror iqtisodiy va tashkiliy munosabatlar tizimidir.

Valuta qimmatliklariga qonuniy toʻlov vositasi boʻlgan pul belgilari, xazina chiptalari (kaznacheyskiye bileti), tangalar, banknotlar, shuningdek qimmatbaho qogʻozlar, majburiyatlar, qimmatbaho toshlar va metallar kiradi.

Valuta – xorijiy davlatlarning pul belgilari, shuningdek ularda ifodalangan toʻlov va kredit vositalaridir.

Qattiq valuta – iqtisodiy jihatdan qudratli davlatlarning pul birligidir.

Erkin almashadigan valuta – barcha egalari almashishlari mumkin boʻlgan pul belgilari. Erkin almashadigan valuta amalda jahon puli vazifasini bajaradi.

Milliy valutaning almasha olishi ichki (milliy) va jahon bozorlarining aloqasini savdo, kapital va mehnat harakati iloji boricha erkin boʻlganida, milliy pul birligining moslashuvchan kursi orqali ifodalanadi.

Barcha rivojlangan mamlakatlar valutaning *ichki konvertatsiyasi* (almashuvi)ga egadirlar, ya'ni xorijiy valuta sotuvchi va xaridorning kelishuvi asosida to'lov sifatida qabul qilinadi. Tashqi konvertatsiya – rezidentlar xorijiy valutani norezidentlar bilan operatsiyada ishlata olishlari.

Tovar konvertatsiyasi – iqtisodiyotning tovarlar va xizmatlar uchun milliy va xorijiy valutada pul toʻlovchi rezidentlar va norezidentlarning talablarini qondirish qobiliyati.

Xorijiy valutaning milliy valuta bilan birga muomalada boʻlishi (pul massasining 20 foizdan ortigʻi) koʻpchilik davlatlarda mavjud.

AQSh valutasidan muomalada toʻlov va jamgʻarma vositasi sifatida foydalaniladi. Dollarlashtirish sharoitida hukumat koʻpincha inflatsiyani nazorat qilish imkonidan mahrum boʻladi, chunki aholidagi dollarning hajmi aniq ma'lum boʻlmaydi.

Valuta pariteti – qonun tartibida belgilangan va valuta kursining asosi hisoblangan ikki milliy valuta oʻrtasidagi nisbat.

Valuta kursi (nominal) – turli mamlakatlarning ikki pul birligi oʻrtasidagi nisbat boʻlib, u ushbu valutalarning xarid qobiliyati bilan belgilanadi (bir mamlakat pul birligining boshqa mamlakat pul birligida ifodalangan narxi).

Kross-kurs – ikki valuta kursi asosida hisoblangan uchinchi valutaning kursi. Ayni bir valutaning turli milliy bozorlardagi kross-kurslari kotirovkasidagi farq foyda olishga imkon beradi.

Valuta kotirovkasi (bevosita) – milliy valuta birligi valuta kursining xorijiy valuta birliklarining muayyan miqdori orqali ifodalanishi. Bilvosita kotirovka bevosita kotirovkaning teskarisidir.

Valuta kurslarini hisob-kitob qilishni osonlashtirish maqsadida milliy valutalar bir-biriga nisbatan emas, balki AQSh dollariga nisbatan va u orqali jahondagi boshqa valutalarga nisbatan kotirovka qilinadi, ya'ni kross-kursdan foydalaniladi (bunday operatsiyalar valuta orbitraji deb ataladi).

Tezkor (muddatli) shartnomalar uchun spot-kurs (ikki kun mobaynida amal qiladi) va forvard kursi (kelajakdagi muayyan sanaga qarab bir yilgacha boʻlgan muddatga) belgilanadi. Valuta kursi deganda, spot-kurs tushuniladi.

Real valuta kursi – oʻz mamlakatidagi va valutasiga milliy valuta kotirovka qilinayotgan mamlakatdagi narx oʻzgarishlarini inobatga olgan holda qayta hisoblangan nominal valuta kursi.

Qayd etilgan valuta kursi – valutalar oʻrtasida rasman belgilangan nisbat boʻlib, undan koʻpi bilan 2,25 foiz ogʻishga yoʻl qoʻyiladi.

Nisbatan moslashuvchan valuta kursi – milliy valutalar oʻrtasidagi rasman belgilangan nisbat boʻlib, belgilangan qoidalarga muvofiq valuta kursining ozroq oʻzgarib turishiga yoʻl qoʻyadi.

Suzib yuruvchi valuta kursi – talab va taklif ta'sirida erkin o'zgaruvchi valuta kursi. Uning turlari: tuzatish kiritiladigan, suzib yuruvchi, boshqariladigan (MB uning tez-tez o'zgarishiga qarab belgilaydi); mustaqil suzib yuruvchi (davlatning aralashmasligi).

Xarid qobiliyatining pariteti deganda, har bir mamlakatda narx darajasi oʻzgarmagan taqdirda, turli valutalarning xarid qobiliyati tengligi tushuniladi.

Boshqariluvchi suzish valuta kursi harakatini tezlashtirish yoki sekinlashtirish maqsadida valuta intervensiyalarini (xorijiy valuta sotib olish yoki sotishni) qamrab oladi.

Milliy valuta kursining tushib ketishi (devalvatsiya) tovarlar eksporti va kapital (xorijiy investitsiyalar)ning koʻpayishiga olib keladi. Kursning oʻsishi (revalvatsiya) esa teskari oqibatlarga — tovarlar importi va kapital eksportining ortishiga olib keladi.

Sudralib yuruvchi fiksatsiya — valuta kursining markaziy paritet atrofidagi oʻzgarishlari foizi sifatida belgilanishi boʻlib, u ushbu kursning *muayyan kattalikka muntazam ravishda* kamayib borishini nazarda tutadi.

Valuta kursini belgilovchi omillar quyidagilar:

- 1) toʻlov balansining taqchilligi (taqchillik kamayadi kurs oshadi);
- 2) ichki narxlarning umumiy darajasi (narxlar tushadi kurs koʻtariladi);

- 3) mamlakat ichidagi real foizli stavka (stavka kamayadi kurs pasayadi);
- 4) inflyatsion moʻljallar (inflatsiya sur'atlari pasayadi kurs koʻtariladi);
- 5) import bojlari va kvotalari (ularning ortishi kursning oʻsishiga olib keladi);
- 6) eksport bojlari va kvotalari (ularning kamayishi kursning oʻsishiga olib keladi);
- 7) eksportga boʻlgan talab (talabning ortishi kursning oʻsishiga olib keladi);
- 8) importga boʻlgan talab (talabning kamayishi kursning ortishiga olib keladi);
- 9) ishlab chiqarish, ichki talab, mehnat unumdorligi (ularning oʻsishi kursning koʻtarilishiga olib keladi);
- 10) pul massasi, pul taklifi (ularning kamayishi kursning oshishiga olib keladi);
- 11) milliy va jahon bozorlarida valutaga boʻlgan ishonch darajasi (iqtisodiyotning holati, siyosiy vaziyat va yuqorida sanab oʻtilgan omillar bilan belgilanadi).

Jahon valuta bozorining asosiy xususiyatlari quyidagilardan iborat:

- 1) kapitalning erkin koʻchishi;
- 2) valutalar oldi-sotdisiga nisbatan qat'iy kvotalarning, kursni tartibga solish bo'yicha ma'muriy choralarning yo'qligi;
- 3) bozorning transparentligi (shaffofligi) uning barcha ishtirokchilariga valutalar kurslari haqida doimiy axborot berilishi.

Kapitalning harakatini quyidagi elementlar sekinlashtiradi:

- valuta cheklovlari;
- ishtirokchilari uchun valuta bozoridan foydalanishda tenglikning yoʻqligi (milliy kompaniyalarga qaraganda yirik va millatlararo kompaniyalarda, tijorat banklariga qaraganda markaziy banklarda imkoniyatlarning koʻpligi);
- real miqyosdagi vaqtda markaziy banklarda intervensiyalarning hajmi toʻgʻrisidagi axborotning yoʻqligi.

Jahon valuta bozoriga muayyan xususiyatlar xosdir:

- 1) aniq jugʻrofiy chegaralar va muayyan joylashgan oʻrnining yoʻqligi;
 - 2) kecha-yu kunduz (surunkali) faoliyat koʻrsatishi;
 - 3) cheklanmagan sonli ishtirokchilarning faoliyat koʻrsatishi;
 - 4) tovar likvidligining yuqori darajasi.

Valuta bozorining konyunkturasi, avvalo, shu paytga kelib qaror topgan xorijiy valutaga talab va taklif bilan belgilanadi.

Valuta talabi tovar va xizmatlar uchun valuta tushumi boʻlgan, uni sotishga harakat qilayotgan eksportyorlardan, yuklar fraxti, sugʻurtasi, brokerlik va bank komissiyalari uchun toʻlov sifatida valutani olgan savdo kompaniyalari, sugʻurta jamiyatlari va banklardan kelib chiqadi.

Bozor iqtisodiyotini tartibga solish tizimida valuta siyosati – xalqaro valuta va boshqa iqtisodiy munosabatlar sohasida joriy va strategik maqsadlarga muvofiq amalga oshiriladigan tadbirlar majmui muhim oʻrin tutadi.

Rasmiy dogma darajasiga koʻtarilgan muayyan nazariya valuta siyosatining asosi boʻlib xizmat qiladi. Yuridik jihatdan valuta siyosati valuta qonun hujjatlari, ya'ni mamlakatda va undan tashqarida valuta qimmatliklari, shuningdek valuta muammolariga oid davlatlar oʻrtasidagi (ikki tomonlama va koʻp tomonlama) valuta bitimlari bilan operatsiyalarning amalga oshirilishi tartibini belgilovchi huquqiy normalar majmui yordamida rasmiylashtiriladi.

Oltin-valuta zaxiralarining mamlakat iqtisodiyotidagi oʻrni. Mamla-katlarning hukumatlari va markaziy banklari ixtiyorida turuvchi yuqori likvidli moliyaviy aktivlar zaxira aktivlar (oltin-valuta zaxiralari) deb ataladi. Oltin-valuta zaxiralari milliy valuta kursini qoʻllab-quvvatlash, moliyaviy barqarorlik va mamlakat toʻlov qobiliyatini ta'minlash maqsadida zarurdir. Oltin-valuta zaxiralari tarkibiga monetar oltin, XVFdagi rezerv pozitsiya, SDR va valuta zaxiralari kiradi. Hozirda dunyoning aksariyat mamlakatlari oltin-valuta zaxiralari tarkibida valuta zaxiralari ustuvorlik qiladi va uning ulushi oʻrtacha 95 foizni tashkil etadi. Zaxira valutalarga Markaziy bankda korrespondent schotlarga va xorijiy banklarda depozitlarga joylashtirilgan xorijiy valutalardagi mablagʻlar hamda xorijiy emitentlarning qimmatbaho qogʻozlariga investitsiyalangan mablagʻlar kiradi.

Davlat oltin-valuta zaxiralari xalqaro moliya tashkilotlari zaxira aktivlari bilan birga jahon oltin-valuta zaxiralarini tashkil etadi. Davlatning oltin-valuta zaxiralari quyidagi ikki vazifani bajarish uchun xizmat qiladi:

- mamlakatning tashqi toʻlov qobiliyatini ta'minlash;
- milliy valuta kursining barqarorligini ta'minlash.

Jahon xoʻjaligining barcha hududlaridagi iqtisodiy munosabatlarni qamrab olayotgan moliya bozorlarining globallashuvi sharoitida xalqaro kapital harakati bilan bogʻliq operatsiyalarning jadal sur'atlarda oʻsishi kuzatilmoqda. Natijada dunyo mamlakatlarida nodavlat sektorning tashqi qarzini toʻlash uchun zarur boʻladigan xorijiy valutaga boʻlgan talabni qondirish Markaziy banklar valuta zaxiralarining muhim vazifasiga aylanib boryapti. Bu holat, avvalo, rezidentlari xorijiy valutada kredit va qarzlar olayotgan mamlakatlarga taalluqlidir.

Jahon iqtisodiyotida zaxira valutalarni emissiya qiluvchi mamlakatlar – zaxira markazlari alohida oʻringa ega. Ushbu mamlakatlarning milliy valutalari xalqaro pul, jumladan, xalqaro kredit va zaxira markazi vazifasini bajaradi, ularning markaziy banklari esa valuta bozorlaridagi operatsiyalarga tez-tez aralashib turishadi. Shuning uchun yetakchi rivojlangan mamlakatlarning markaziy banklari va hukumatlari oʻz valutalari kursini barqaror ushlab turish uchun yirik valuta zaxiralariga ehtiyoj sezmaydi.

Tahlillar koʻrsatishicha, xalqaro valuta operatsiyalarining tarkibida AQSh dollari yuqori salmoqni egallaydi. Bu AQShning dunyoda eng yirik iqtisodiyotga ega boʻlganligi bilan izohlanadi. Ikkinchi oʻrinda *yevro* turadi va bu holat Yevropa Ittifoqining katta iqtisodiy salohiyatga ega ekanligi bilan belgilanadi. *Funt sterling* va *iyenaning* xalqaro zaxiralar tarkibida kichik salmoqqa ega ekanligi ushbu valutalarning xalqaro hisob-kitoblarda keng qoʻllanilmayotgani bilan izohlanadi. Misol uchun, 2010-yilda xalqaro valuta zaxiralarining 95,5 foizi AQSh dollari, yevro, yapon iyeni va funt sterlingda shakllantirilgan. Shuningdek, AQSh dollarining xalqaro valuta zaxiralari tarkibidagi salmogʻi 2010-yilda 2000-yilga nisbatan 9,5 foizga pasaygan. Ayni paytda yevro va funt sterlingning salmogʻi mazkur davrda mos ravishda 7,9 va 1,3 foizga oshgani holda, yapon iyenasining salmogʻi 1,2 foizga pasaygan¹.

Markaziy banklar tomonidan oltin-valuta zaxiralarni jamgʻarish jahon moliya bozorlarining rivojlanishida muhim yoʻnalishlardan biri hisoblanadi. Ushbu aktivlarni jamgʻarish bir tekisda sodir boʻlmayapti va Osiyo mamlakatlarida moliyaviy resurslarning konsentratsiyalashuvi darajasining oʻsishi bilan amalga oshmoqda. Osiyo mintaqasining 10 mamlakati hissasiga (Xitoy, Yaponiya, Tayvan, Hindiston, Koreya

 $^{^1}$ Qarang: *Кондратов Д*. Перспективы евро для России: плюсы и минусы. //Экономист. — 2011. — № 2. — С. 61.

Respublikasi, Gonkong, Singapur, Tailand, Malayziya, Indoneziya) jahon oltin-valuta zaxiralarining uchdan ikki qismi toʻgʻri keladi¹.

Tahlillar koʻrsatishicha, Osiyo mintaqasi mamlakatlari oltin-valuta zaxiralarni faol jamgʻarishni 1997–1998-yillardagi moliyaviy inqirozdan keyin boshlashgan. Bu inqirozdan keyin tashqi iqtisodiy barqarorlik va inqiroz holatlarida mamlakatning toʻlov qobiliyatini ta'minlashga yoʻnaltirilgan strategik moliyaviy rezervlarni shakllantirish siyosati olib borildi.

Osiyo mamlakatlarida oltin-valuta zaxiralar hajmining o'sib borishi bilan bogʻliq fundamental sabablarni tushuntirib berishda bu mamlakatlarning iqtisodiy salohiyati qanchalik yuqori boʻlishiga qaramasdan, xorijiy kapital uchun yopiqligini e'tiborga olish muhim. XX asrning 90yillaridan boshlab savdo operatsiyalari va moliyaviy aktivlar bilan operatsiyalar bo'yicha cheklovlar bosqichma-bosqich bartaraf etildi. Ushbu chora-tadbirlar, bir tomondan, tovarlar va xizmatlar eksportining oʻsishiga, ikkinchi tomondan esa, rivojlangan mamlakatlardan toʻgʻridanto'g'ri va portfel investitsiyalarning faol kirib kelishini ta'minladi. Natijada oxirgi o'n yillikda Osiyoning aksariyat mamlakatlarida to'lov balansining barqaror profitsiti kuzatildi va ichki bozorlarda xorijiy valuta, dollarining Milliy AOSh taklifi oshdi. igtisodiyotning raqobatbardoshligini ta'minlash maqsadida ushbu mamlakatlarning markaziy banklari valuta intervensiyasini amalga oshirishga majbur bo'lishdi. Bu esa mamlakat valuta zaxiralarining jadal sur'atlarda oʻsishiga olib keldi.

Mamlakat oltin-valuta zaxiralari hajmining ortishida asosiy omil valuta zaxiralari hajmining oʻsishi bilan bogʻliq boʻlib, XXI asrning birinchi oʻn yilligi mobaynida Xitoyning valuta zaxiralari hajmi 15 baravarga oshgan. Mamlakatlarning oltin-valuta zaxiralari bajaradigan vazifaga oʻxshash tarzda jahon oltin-valuta zaxiralari jahon iqtisodiyoti, xalqaro iqtisodiy munosabatlar va jahon valuta tizimining barqarorligini ta'minlash uchun xizmat qiladi. Jahon valuta zaxiralari xalqaro savdo va iqtisodiy munosabatlarning boshqa shakllariga xizmat koʻrsatish uchun yetarli miqdorda boʻlishi zarur. Bu zaxiralar xalqaro valuta likvidligining muhim omili hisoblanadi.

¹ Qarang: *Мальшев П*. Особенности управления резервными активами в странах Азии //Мировая экономика и международные отношения. − 2011. - № 3. - C. 29.

Xalqaro valuta likvidligi deganda, mamlakatning oʻz tashqi majburiyatlarini valuta cheklovlariga murojaat etmasdan, kreditorlar uchun maqbul toʻlov vositalarida toʻlay olish qobiliyati tushuniladi. Xalqaro valuta likvidligining holati quyidagi omillarga bogʻliq boʻladi:

- jahon valuta zaxiralari hajmi;
- tashqi toʻlov majburiyatlari hajmi.

Jahon oltin-valuta zaxiralari hajmining yillik import qiymatiga nisbati xalqaro valuta likvidligi koʻrsatkichi hisoblanadi. Xalqaro valuta likvidlik koʻrsatkichi XVF tomonidan barcha mamlakatlar joriy operatsiyalar boʻyicha valuta cheklovlarini qoʻllayotgan va kamsonli mamlakatlar (AQSh va Shveysariya) milliy valutaning erkin konvertatsiyasiga ega vaqtda qabul qilingan. Mamlakatlarning xalqaro likvidlik koʻrsatkichi esa mos ravishda milliy oltin-valuta zaxiralari hajmining mamlakat yillik importi qiymati nisbatiga tengdir. Misol uchun, Rossiyada xalqaro likvidlik koʻrsatkichining minimal darajasi uch oylik import qiymatiga teng, deb qabul qilingan. Tahlillar rivojlanayotgan mamlakatlar guruhida Osiyoning rivojlanayotgan mamlakatlari (131,2 foiz), Yaqin Sharq va Shimoliy Afrika mamlakatlarida (118,9 foiz) xalqaro valuta likvidligi koʻrsatkichi yuqori ekanligini koʻrsatmoqda.

Hozirgi jahon valuta-moliya tizimi 1978-yilda XVF ustavida belgilangan quyidagi prinsiplarga asoslanadi:

- mamlakatlar oʻzlari tanlagan istalgan valuta kursidan foydalanishlari mumkin;
- XVF valuta kurslarining rivojlanishi va ularning belgilanishi haqidagi kelishuvlar ustidan qattiq nazoratni amalga oshiradi;
- oltinning rasmiy bahosi bekor qilinadi, u endi XVF va uning a'zolari o'rtasida to'lov vositasi hisoblanmaydi;
- jahon valuta moliya tizimida qoʻshimcha zaxira aktiv sifatida maxsus qarz huquqlaridan (SDR hisob-kitob birligi) foydalaniladi.

XVF ishtirokchilari boʻlgan mamlakatlarning valuta kurslarini tartibga solish borasidagi harakatlari valuta kurslarining boshqariladigan tizimi yaratilishiga olib keldi. Valuta bozori hosil boʻldi, jahon pullarining etalonini SDR tashkil qiladigan boʻldi.

SDR quyidagi nisbatda olingan milliy valutalardan tashkil topadigan «valuta savati» asosida baholanadi: AQSh dollari – 42 foiz, Yevropa valutalari – 45 foiz, Yaponiya iyenasi – 13 foiz.

Oltinning pul oʻrniga oʻtmay qolishi (demonetizatsiyasi) uning narxi bozorda belgilanadigan tovarlardan biriga (oʻta likvid aktivga) aylandi.

AQSh dollari, yevro va iyena dunyoning uchta asosiy valutasi hisoblanadi. Jahon bozorlarida Buyuk Britaniya rolining va funt sterlingning almashuv kursi pasayganligiga qaramay, mamlakat butun jahon boʻyicha tarqalgan bank muassasalarining rivojlangan tarmogʻi mavjudligi bois, uning zaxira valuta roli saqlanib qolmoqda.

Dollar boshqa valutalar kotirovkasi chogʻida umume'tirof etilgan bazaviy valuta hisoblanib kelmoqda. Bugun jahon kapitali yuqori foyda keltirayotgan rivojlanayotgan mamlakatlardan yuqori darajada ishonchli boʻlgan rivojlangan mamlakatlarga qayta yoʻnalmoqda, bu esa AQSh uchun yangi imkoniyatlar yaratmoqda. AQSh investitsiyalarga yangi texnologiyalar yaratish, yangi texnologik prinsiplar ishlab chiqishda koʻmaklashib, butun dunyo kapitalini oʻziga jalb etmoqda. Texnologik ishlanmalar tovar funksiyasiga ega boʻlib, boshqa mamlakatlar iqtisodiyotini Amerika iqtisodiyotiga bogʻlamoqda, ularni moliyaviy va texnologik darajada tobe qilmoqda.

AQSh davlat boshqaruvining ustuvor vazifasi — boshqa mamla-katlardagiga qaraganda investitsiyalar uchun yaxshiroq sharoitni ta'minlash. AQSh oʻz manfaatlarini koʻp yillar mobaynida oʻzi yetakchilik qilayotgan bir qator xalqaro tashkilotlar yordamida amalga oshirmoqda. AQShning XVF va jahon bankini nazorat qilishi nafaqat ushbu tashkilotlarning ustav jamgʻarmalarida badallarining koʻpligi bilan, balki ularning oliy rahbarlari tarkibi bilan ham ta'minlanmoqda.

3. Xalqaro kreditning mohiyati va funksiyalari. Tashqi qarz masalalari

Hozirgi zamon dunyo iqtisodiyoti jahon kredit bozorisiz rivojlana olmaydi.

Jahon kredit bozori – mamlakatlar oʻrtasida qarz (qarz) kapitali qaytarilishi, foiz toʻlash, muddatlilik, ta'minlanganlik, shuningdek qimmatbaho qogʻozlar emissiyasi va oldi-sotdisi (shartlari) asosida harakatlanadigan, talab va taklif shakllanadigan bozor munosabatlari sohasidir.

Xalqaro kredit deganda, davlatlar, bir mamlakat banklari, firmalari, boshqa yuridik va jismoniy shaxslari (kreditorlari)ning boshqa mamlakatlarning hukumatlari, banklari, firmalari (qarz oluvchilari)ga beradigan ssuda kapitali tushuniladi.

Xalqaro iqtisodiy munosabatlar sohasidagi xalqaro kredit quyidagi funksiyalarni bajaradi:

- 1. Qayta taqsimlash. Kredit turli tarmoqlar yoki mintaqalardagi foyda darajasiga moʻljal olib, iqtisodiyotning stixiyali makroregulatori vazifasini bajaradi va jadal rivojlanayotgan obyektlarning ehtiyojlari qondirilishini ta'minlaydi. Kredit tizimini davlat tomonidan tartibga solishning eng muhim vazifalaridan biri iqtisodiy ustun yoʻnalishlarni oqilona aniqlash, jadal rivojlanishi milliy manfaatlar nuqtai nazaridan obyektiv ravishda zarur boʻlgan tarmoqlar yoki mintaqalarga kredit resurslarining kirib kelishini ragʻbatlantirish.
- **2. Jahon puli** sifatida oltinni veksellar, cheklar, bank oʻtkazmalari, depozit sertifikatlar, elektron pullar va mustahkam milliy valutalar bilan almashtirish orqali xalqaro iqtisodiy munosabatlar sohasidagi muomala xarajatlarini qisqartirish.
- **3. Kapitalning jamlanishi va markazlashuvini tezlashtirish:** xorijiy kapitalning jalb etilishi, transmilliy korporatsiyalar va transmilliy banklarning tashkil qilinishi, katta korxonalarga imtiyozli xalqaro kreditlar berilishi sababli qoʻshimcha foyda olinishi.
- **4. Tovar aylanishiga xizmat koʻrsatish.** Kredit nafaqat tovar, balki pul muomalasining tezlashishiga ham faol ta'sir koʻrsatadi, uning pul muomalasi sohasiga veksellar, cheklar, kredit kartochkalarini kiritib, undan naqd pullarni siqib chiqaradi, bu esa ichki va xalqaro bozorlarda iqtisodiy munosabatlarni soddalashtiradi.
- **5. Mamlakat iqtisodiyotini tartibga solish** xorijiy investitsiyalarni, birinchi navbatda xalqaro valuta-kredit va mintaqaviy tashkilotlarning kapitallarini jalb etish. Bu yalpi milliy mahsulotning koʻpayishi va taqsimlanishiga imkon yaratadi.
- **6. Fan-texnika taraqqiyotining tezlashuvi.** Ilmiy markazlarning normal faoliyati (budjetdan moliyalashtiriladigani bundan mustasno), innovatsion jarayonlarni kreditlardan foydalanishsiz tasavvur qilib boʻlmaydi.

Xalqaro kredit munosabatlari ssuda kapitallari bozoridagi operatsiyalarni tashkil qilishda qat'iy rioya etiladigan quyidagi prinsiplarga asoslanadi:

1. Kreditning qaytarilishi – kreditordan olingan moliyaviy resurslarni qarzdor foydalanishni tugatgan zahoti oʻz vaqtida qaytarishi zarurligi, muayyan ssudani kredit tashkilotining hisobvaragʻiga tegishli pul mablagʻlari summasini oʻtkazish orqali qaytarish. Bu bankning ustav faoliyatini davom ettirishning zaruriy sharti sifatida uning kredit resurslari yangilanishini ta'minlaydi.

- 2. Kreditning muddatliligi uni qarz oluvchi uchun qulay boʻlgan har qanday vaqtda emas, balki kredit shartnomasida qayd etilgan aniq belgilangan muddatda qaytarishning zarurligi. Mazkur shartning buzilishi kreditor uchun qarzdorga nisbatan olinadigan foizni oshirish, muddati yana oshirilgan taqdirda, sud tartibida moliyaviy talablar qoʻyish shaklida namoyon boʻladigan iqtisodiy jazolarni qoʻllash uchun yetarli asos hisoblanadi.
- 3. Kreditning pulli ekanligi (ssuda foizi) qarzdorning bankdan olingan kredit resurslarini nafaqat qaytarishi, balki ulardan foydalanish huquqi uchun haq toʻlash ham zarurligi. Bunday toʻlovning iqtisodiy mohiyati kreditdan foydalanganlik evaziga olingan qoʻshimcha foydaning amalda qarzdor va kreditor oʻrtasida taqsimlanishida namoyon boʻladi. Kreditning pulli ekanligi qarzdorni undan eng samarali foydalanishga ragʻbatlantiradi. Ushbu prinsip uchta asosiy funksiyani bajaradigan bank foizi kattaligini belgilash jarayonida amaliy ifodasini topadi:
- 1) yuridik shaxslar sof foydasining va jismoniy shaxslar daromadining bir qismini qayta taqsimlash;
- 2) ssuda kapitallarini tarmoq, tarmoqlararo va xalqaro darajalarda taqsimlash orqali ishlab chiqarish va muomalani tartibga solish;
- 3) iqtisodiyot rivojlanishining inqirozli bosqichlarida bank mijozlarining pul jamgʻarmalarini inflatsiyadan himoya qilish.

Ssuda kapitali yordamida olingan yillik daromad summasining berilgan kredit summasiga nisbati sifatida ta'riflanadigan ssuda foizining stavkasi (normasi) kredit resurslarining narxi boʻlib xizmat qiladi.

- **4. Kreditning ta'minlanganligi** qarzdor oʻz zimmasiga olgan majburiyatlarini buzgan taqdirda, kreditorning mulkiy manfaatlarini himoya qilish zarurligi. Ushbu prinsip kreditlash: garov evaziga ssuda olish yoki moliyaviy kafolat shakllarida namoyon boʻladi. Umumiy iqtisodiy beqarorlik davrida bu prinsip ayniqsa dolzarb hisoblanadi.
- 5. Kreditning maqsadli xususiyati kreditordan olingan mablagʻlardan maqsadli foydalanish zarurligi. Ushbu prinsip berilayotgan ssudaning aniq maqsadini belgilovchi kredit shartnomasining tegishli boʻlimida hamda ushbu shartga qarzdorning rioya etishini bank tomonidan nazorat qilishda amaliy ifodasini topadi. Ushbu majburiyatning buzilishi kreditning muddatidan oldin chaqirib olish yoki jarima (oshirilgan) ssuda foizi joriy etilishi uchun asos boʻlishi mumkin.
- **6. Kreditning tabaqalashgan (differensial) xususiyati**. Ushbu prinsip kredit tashkilotlarining ehtimoli tutilgan turli toifalardagi

qarzdorlarga tabaqalashgan yondashuvini belgilab beradi. Uning amalga oshirilishi muayyan bankning individual manfaatlariga ham, davlat yuritayotgan alohida tarmoqlar yoki faoliyat sohalari (masalan, kichik biznes)ni qoʻllab-quvvatlash boʻyicha markazlashgan siyosatga ham bogʻliq boʻlishi mumkin.

Kreditning quyidagi shakllari farqlanadi:

1. Manbalari boʻyicha: ichki va tashqi.

2. Maqsadi boʻyicha:

- 1) tijorat kreditlari, ular tashqi savdo va xizmatlar bilan bevosita bogʻliq;
- 2) moliyaviy kreditlar, ya'ni to'g'ridan-to'g'ri kapital kiritish obyektlar qurish, investitsiya loyihalari, qimmatbaho qog'ozlarni xarid qilish, tashqi qarzni qaytarish, valuta intervensiyasi;
- 3) oraliq kapital, tovarlar, xizmatlarni olib chiqish yoki pudrat ishlarini bajarishning aralash shakllariga xizmat koʻrsatadigan kreditlar.

3. Turlari boʻyicha:

- 1) tovar kreditlari (toʻlov muddatini kechiktirgan holda tovarlarni eksport qilishda);
 - 2) valuta kreditlari (pul shaklida).

4. Qarz valutasi boʻyicha:

- 1) qarzdor mamlakat valutasida yoki kreditor mamlakat valutasida;
- 2) uchinchi mamlakat valutasida;
- 3) xalqaro hisob-kitob pul birligida.

5. Muddatlari boʻyicha:

- o'ta qisqa muddatli (bir sutka, bir hafta, uch oygacha);
- qisqa muddatli bir yilgacha;
- oʻrta muddatli bir yildan besh yilgacha;
- uzoq muddatli besh yildan ortiq.

Agar qisqa muddatli yoki oʻrta muddatli kreditlar prolongatsiya qilinsa (uzaytirilsa), ular uzoq muddatli kreditga aylanadi, buning ustiga koʻpincha davlat kafolati beriladi.

6. Ta'minlanishi bo'yicha:

- 1) ta'minlangan (tovarlar, tijorat va moliyaviy hujjatlar, veksellar, qimmatbaho qog'ozlar, ko'chmas mulk, boshqa qimmatliklar, ba'zan oltin bilan);
- 2) blankli, ya'ni qarzdorning majburiyatlari (veksel) hisobidan (uni muayyan muddatda qaytarish sharti bilan).

7. Kreditni berish texnikasi nuqtai nazaridan:

- 1) qarzdor hisobiga yoziladigan moliyaviy naqd kreditlar;
- 2) aksept kreditlar bankning qarz oluvchining vekseliga aksepti (roziligi) shaklida;
 - 3) depozit sertifikatlar;
 - 4) obligatsiya zayomlari;
 - 5) konsorbsion kreditlar.
- 8. Kreditorning toifasiga koʻra: firma (xususiy); bank; brokerlik; hukumat; xususiy korxonalar (jumladan banklar) va davlat ishtirokidagi aralash kreditlar; xalqaro moliyaviy institutlarning davlatlararo kreditlari. Banklarning xalqaro kreditlarini banklar eksportyorlar va importyorlarga odatda tovar va moddiy boyliklarni garovga olib beradilar. Kamdan-kam hollarda banklar yaqin aloqada boʻlgan yirik firmalarga ham ta'minlanmagan kredit beradi.

Brokerlik krediti firma va bank kreditlari oʻrtasida oraliq mavqega ega (brokerlar mablagʻlarni banklardan qarzga oladilar).

Davlatlararo kreditlar hukumatlararo bitimlar asosida beriladi.

Qisqa muddatli kreditlar berish turlaridan biri tashqi savdoni kreditlashdir. Tashqi savdoda bank tomonidan beriladigan qisqa muddatli kreditlarning quyidagi shakllari ajratiladi:

1. Eksportda:

- 1) firma (tijorat) krediti u yoki bu mamlakatning importyori xorijiy tovar ishlab chiqaruvchi yoki eksportyorga xarid uchun beradigan boʻnak (avans);
 - 2) bank krediti:
- eksportyor mamlakat tovarlari uchun beriladigan boʻnaklar (kredit eksportyorga eksport uchun moʻljallangan tovarlarni tayyorlash va jamlash boʻyicha operatsiyalarni ilgari tayyorlangan tovarlar sotilishini kutmasdan davom ettirish imkonini beradi);
- yoʻlda kelayotgan tovarlar evaziga ssuda berish (transport hujjatlari – konosament, temir yoʻl yuk xati kabilar bilan ta'minlanish evaziga);
- eksportyor mamlakatidagi tovarlar yoki tovar hujjatlari boʻyicha boʻnak;
- yirik eksportyor firmalar ish boʻyicha uzoq muddatli ish aloqalarida boʻlgan yoki kapitalida ishtirok etayotgan banklardan oladigan hamda tovarlar bilan ta'minlanmagan boʻnak.

2. Importda:

1) firma (tijorat) krediti:

- ochiq hisobvaraq boʻyicha kredit (eksportyor importyorning hisobvaragʻiga uning qarzi sifatida sotilgan va ortib-tushirilgan tovarlar qiymatini yozib qoʻyadigan, importyor esa kreditni belgilangan muddatda qaytarish majburiyatini oladigan bitim asosida beriladi). Tovarlar muntazam yetkazib berilganida va qarzlar vaqti-vaqti bilan (oyning oʻrtasi yoki oxirida) qaytarilgan taqdirda qoʻllaniladi. Ushbu holda banklar savdo kontragentlarining hisob-kitoblarida texnik vositachi vazifasini bajaradilar;
- *veksel krediti*. Eksportyor tovarni ortib joʻnatganidan soʻng importyorga tratta (oʻtkazma veksel) taqdim etadi. Importyor tovar hujjatlarini olgach, trattani akseptlashtiradi, ya'ni veksel uchun belgilangan muddatda haq toʻlash majburiyatini oladi.

3.1. Tashqi qarz masalalari

Tashqi qarz – bu davlatning xalqaro moliya tashkilotlaridan, xorijdagi yirik banklardan va chet davlatlar hukumatidan olgan qarzi boʻladi. Bu qarz ma'lum muhlatga olinib, daromadga qoʻshiladi, toʻlash vaqti kelganda, u davlatga xarajat keltiradi.

Ma'lumki, o'zining salbiy ta'siri bilan insoniyatga jiddiy tashvishlar tugʻdirayotgan, jahon iqtisodiyotining barqaror rivojlanishini izdan chiqarayotgan moliyaviy-iqtisodiy inqiroz o'tgan asrning so'nggi choragidan e'tiboran rivojlangan mamlakatlar iqtisodiyotidagi mutanosibliklar, xususan, real va moliyaviy sektor oʻrtasidagi nisbatning buzilishi oqibatida vujudga kela boshladi. Bu mamlakatlardagi yirik moliyaviy muassasalar tomonidan oʻzining korporativ manfaatlarini amalga oshirish maqsadida bank-moliya sohasidagi me'yor va tartiblarning qo'pol tarzda buzilishi, jahondagi koʻplab davlatlarning real aktivlaridan spekulyativ tarzda foydalanish orgali katta daromad olishga intilish va shu tariqa global moliyaviy qurilishda jiddiy nuqsonlarga yoʻl qoʻyilishi, milliy iqtisodiyotdagi yalpi talabni qoʻllab-quvvatlash, tobora oʻsib borayotgan tashqi qarzlarni cheklash uchun «arzon pullar» siyosatining qoʻllanishi kabi xatti-harakatlar yuzaga kelayotgan nomutanosibliklarning yanada kuchayishi va borgan sari keskin, muqarrar ravishda inqiroz holatini keltirib chiqaradigan darajada tus olishiga sabab bo'ldi. Ayniqsa, spekulyativ maqsadlarda mablag'lardan foydalanishda jahonning koʻplab mamlakatlaridagi moliyaviy muassasalar bilan bir qatorda, aholining ham ipotekali kreditlash tizimi orqali keng jalb

qilinishi mazkur jarayonlarning jadallashuviga va oxir-oqibatda jahon moliyaviy-iqtisodiy inqirozining boshlanishiga sabab boʻldi. Prezidentimiz Islom Karimov oʻzining «Jahon moliyaviy-iqtisodiy inqirozi, Oʻzbekiston sharoitida uni bartaraf etishning yoʻllari va choralari» nomli asarida birinchilardan boʻlib bu jarayonning yuzaga kelishi sabablarini quyidagi tarzda asoslab berdi: «Bu inqiroz Amerika Qoʻshma Shtatlarida ipotekali kreditlash tizimida roʻy bergan tanglik holatidan boshlandi. Soʻngra bu jarayonning miqyosi kengayib, yirik banklar va moliyaviy tuzilmalarning likvidligi, ya'ni toʻlov qobiliyati zaiflashib, moliyaviy inqirozga aylanib ketdi. Dunyoning yetakchi fond bozorlarida eng yirik kompaniyalar indekslari va aksiyalarining bozor qiymati halokatli darajada tushib ketishiga olib keldi. Bularning barchasi, oʻz navbatida, koʻplab mamlakatlarda ishlab chiqarish va iqtisodiy oʻsish sur'atlarining keskin pasayib ketishi bilan bogʻliq ishsizlik va boshqa salbiy oqibatlarni keltirib chiqardi».

Prezidentimiz jahon moliyaviy inqirozi roʻy bergan dastlabki palladayoq uning ta'sir darajasi, koʻlami va keltirib chiqarishi mumkin boʻlgan salbiy oqibatlariga yetarli baho berib: «jahon moliyaviy inqirozidan imkon qadar tez chiqish, uning oqibatlarini yengillashtirish koʻp jihatdan har qaysi davlat doirasida va, umuman, dunyo hamjamiyati miqyosida qabul qilinayotgan chora-tadbirlarning qanchalik samaradorligiga, ularning bir-biri bilan uygʻunligiga bogʻliq», — degan xulosani chiqargan edi. Bunday haqqoniy xulosalar asosida Oʻzbekistonda 2008-yilning oʻzida Inqirozga qarshi choralar dasturi ishlab chiqilib, unda belgilangan tadbirlarni izchil ravishda amalga oshirishga kirishildi.

Jahonning rivojlangan yetakchi mamlakatlari ham inqirozning oldini olish, uning ta'sir darajasini pasaytirish borasida turli koʻrinish va koʻlamlardagi harakatlarni boshlab yubordi. Ushbu chora-tadbirlarning oʻzaro muvofiqligini ta'minlash maqsadida jahondagi rivojlangan mamlakatlarning «*Katta sakkizlik*» va «*Katta yigirmalik*» guruhlari doirasida bir necha bor sammitlar oʻtkazildi. Ushbu guruhlar haqida qisqacha ma'lumot keltirishni joiz deb topdik.

«Katta yigirmalik» guruhi (G-20) rasman 1999-yilda global iqtisodiyotdagi asosiy muammolarni muhokama qilish maqsadida tashkil etilgan. Ushbu guruh tarkibiga yalpi ichki mahsulot hajmi jahon yalpi ichki mahsulotning 90 foizini tashkil etadigan quyidagi 20 ta rivojlangan va rivojlanayotgan yirik davlatlar kiradi: Argentina, Avstraliya, Braziliya, Buyuk Britaniya, Germaniya, Hindiston, Indoneziya, Italiya, Kanada,

Meksika, Xitoy, Rossiya, Saudiya Arabistoni, AQSh, Turkiya, Fransiya, JAR, Janubiy Koreya, Yaponiya, Yevropa Ittifoqi.

«Katta yigirmalik» guruhi faoliyati jahon moliyaviy-iqtisodiy inqirozi roʻy berishi munosabati bilan yanada faollashdi. Xususan, guruh tomonidan inqirozga qarshi kurashish boʻyicha samarali chora-tadbirlarni ishlab chiqish va bu boradagi muammolarni birgalikda hal etish maqsadida bir necha sammit oʻtkazildi:

- AQSh (Vashington, 2008-yil noyabr; Pittsburg, 2009-yil sentabr);
- Buyuk Britaniya (London, 2009-yil aprel);
- Kanada (Toronto, 2010-yil iyun);
- Janubiy Koreya (Seul, 2010-yil noyabr);
- Fransiya (Kan, 2011-yil noyabr);
- Meksika (2012-yil iyun).

«Katta yigirmalik» guruhining navbatdagi sammitlari 2013-yili Rossiyada, 2014-yili Avstraliyada, 2015-yilda esa Turkiyada o'tkazilishi rejalashtirilmoqda. Guruhlar tomonidan oʻtkazilgan chora-tadbirlar 2009– 2010-yillarda dastlab ma'lum natija bergandek bo'ldi. Xususan, jahon sur'atlarining pasayishi igtisodiyotida o'sish to'xtatildi, mamlakatlarda ishlab chiqarish o'sdi, investitsion faollik jonlandi. Biroq, ushbu chora-tadbirlardagi o'zaro mutanosiblik darajasining pastligi, inqirozga qarshi kurashish yoʻllari va vositalarini qoʻllashda izchillikning yoʻqligi ularning samarasini keskin pasaytirib yubordi, aksariyat hollarda koʻzlangan natijalarga erishish imkonini bermadi. Bu borada Prezidentimiz jonkuyarlik bilan «Katta yigirmalik» guruhining oʻzaro birgalikda qabul qilgan chora-tadbirlarining amaldagi samarasi sezilmayotgani, koʻp belgilangan majburiyatlarni qoidalarga amal qilmaslik, hollarda bajarmaslik oqibatida kutilgan natijalarga erishilmayotgani haqida qaytaqayta to'xtalib, jahon iqtisodiyotida barqaror o'sish sur'atlariga erishish yoʻlida hozircha biron-bir jiddiy siljish koʻzga tashlanmayotganini ilgari ham ta'kidlagan edi.

«2012-yil Vatanimiz taraqqiyotini yangi bosqichga koʻtaradigan yil boʻladi» nomli ma'ruzasida ham davlatimiz rahbari Islom Karimov «Sakkizlik» va «Yigirmalik» deb atalgan mamlakatlar guruhlari doirasida qabul qilinayotgan qarorlarga qaramasdan, eng avvalo, jahon moliyavaluta tizimida inqiroz keltirib chiqarayotgan muammolarni hal etish va kerakli nazorat oʻrnatish boʻyicha yagona iqtisodiy model hanuzgacha ishlab chiqilmaganini, bu esa jahon iqtisodiyotida hal qiluvchi oʻrin

tutadigan yirik davlatlarni oʻz manfaatlarini oʻylab, oʻz bilganicha harakat qilishga majbur etayotganini qattiq tanqid qilib oʻtdi.

Oʻtgan davr mobaynida ahvolni yaxshilash maqsadida koʻrilayotgan barcha chora-tadbirlarga qaramasdan, aksariyat davlatlarda oʻsish sur'atlari va ishlab chiqarishning amalda pasayishi kuzatilayotgani va bunday jarayon davom etadigan boʻlsa, u global miqyosda retsessiya holatiga, ya'ni iqtisodiyotning oʻsish oʻrniga davomli ravishda pasayib borishiga olib kelishi mumkinligi bashorat qilinayotgani ushbu ma'ruzada alohida qayd etildi.

Haqiqatan ham, 2011-yil inqirozning ikkinchi toʻlqini boshlanishi ehtimoli bilan bogʻliq bozor vahimalarining qaytadan kuchayish davri boʻldi. Ayniqsa, yevrohududdagi qarzdorlik inqirozi chuqurlashib, uning bank tizimi va iqtisodiyotning real sektoriga tarqalishi kuzatildi. Yevropa siyosatchilari yakdil bir qarorga kelishda sustkashlik va layoqatsizlik koʻrsatdilar. Investorlar qarzdorlik muammolarini tartibga solish mumkinligiga, banklarning barqarorligiga va Yevropa iqtisodiyotining istiqbollariga nisbatan ishonchni yoʻqota boshladi. Likvid mablagʻlar bozoridagi tanglik oʻsib borgan sari yangi mamlakatlar «muammoli»lar qatoriga qoʻshila boshladi. Va nihoyat, Yevropadagi umumiy iqtisodiy oʻsishda pasayish real tahdidga aylana boshladi.

Oʻtgan yil, shuningdek, yuqori darajadagi qarzdorlik yukining mavjudligi va budjet taqchilligi aksariyat rivojlangan mamlakatlar iqtisodiyotining umumiy belgisi ekanini koʻrsatdi. Masalan, AQShning qarzdorlik hajmi YAIMga nisbatan 100 foiz darajasiga yaqinlashib, bu uzoq muddatli istiqbolda jahon iqtisodiyoti uchun keskin xavf-xatarlarni keltirib chiqarishi mumkin. AQSh oʻzining yuqori kredit reytingidan mahrum boʻlgani 2011-yilda jahon bozorlarining yangi bosqichga oʻtganidan darak beradi.

AQSh iqtisodiyotining bir tekis boʻlmagan oʻsish dinamikasi, ishchi kuchi bozoridagi jiddiy muammolarning saqlanib qolishi, mamlakat korxonalari sarflayotgan kapital hajmining pasayib borayotgani ham jahon iqtisodiyoti va moliyaviy bozorlarining istiqboliga nisbatan oʻta shubha bilan qarashni kuchaytirdi.

Tashqi qarzning me'yoridan oshib ketishi milliy iqtisodiyot rivojiga salbiy ta'sir ko'rsatadi. Agar tashqi qarz bo'yicha to'lovlar mamlakatning tovar va xizmatlar eksportidan keladigan tushumning sezilarli qismi, masalan, 20–25 foizidan oshib ketsa, bu holat davlatning kredit bo'yicha

reytingini pasaytirib yuboradi. Natijada chetdan yangi qarz mablagʻlarini jalb etish mushkullashadi. Shunga koʻra, davlatlar muntazam ravishda tashqi qarzni tartibga solish chora-tadbirlarini amalga oshirib boradi.

Bunday chora-tadbirlar qatoriga quyidagilarni kiritish mumkin: mamlakatning oltin-valuta zaxirasi hisobidan qarzlarni toʻlab borish, kreditorlarning qarz toʻlov muddatlarini oʻzgartirishlari, ayrim hollarda ularning ma'lum qismidan voz kechishlariga erishish, qarzlarni mamlakatdagi koʻchmas mulk, qimmatli qogʻozlar, kapitalda ishtirok etish va boshqa huquqlarni sotish hisobidan toʻlash, xalqaro banklar va boshqa moliyaviy tashkilotlardan yordam olish va h.k.

Hozirgi vaqtda jahon moliyaviy-iqtisodiy inqirozi ta'sirida, aksariyat mamlakatlarning tashqi qarzi haddan tashqari oshib ketayotganligini kuzatish mumkin (3- jadval).

3-jadval Rivojlangan mamlakatlarda tashqi qarz darajasi (2011-yil 30-iyundagi holati)

Mamlakat	Tashqi qarz,	Aholi jon boshiga	YAIMga nisbatan
	million AQSh	tashqi qarz	tashqi qarz, foiz
	doll.	miqdori,	
		AQSh doll.	
Yevropa Ittifoqi	16080000	32092	108
AQSh	15033607	50000	100
Buyuk Britaniya	9836000	147060	416
Germaniya	5624000	63493	159
Fransiya	5633000	74410	188
Yaponiya	2719000	19300	57
Ispaniya	2570000	52588	165
Italiya	2684000	39234	101
Irlandiya	2357000	482340	1307,6

Izoh: AQSh boʻyicha ma'lumot 2011-yil 18-noyabrdagi holatiga koʻra berilgan.

Jadvaldan koʻrinadiki, tashqi qarz darajasining Irlandiyada 1307,6 foiz, Buyuk Britaniyada 416 foiz, Fransiyada 188 foiz va boshqa koʻplab mamlakatlarda yillik YAIM hajmidan sezilarli darajada yuqori boʻlishi mazkur mamlakatlarning moliya sohasida jiddiy muammolar mavjudligini anglatadi.

Respublikamizda chuqur tarkibiy islohotlar, ishlab chiqarishni modernizatsiya qilish va yangilash, innovatsion texnologiyalarni keng joriy

etish bilan bogʻliq keng koʻlamli islohotlar, oqilona tashqi qarz siyosati olib borilishi natijasida 2012-yil boshiga kelib Oʻzbekistonning tashqi qarzlari yalpi ichki mahsulotga nisbatan hajmi 17,5 foizdan ortmaydi.

Prezidentimiz ma'ruzasida jahon zaxira valutalarining beqarorligi, qobiliyatining moliya-bank kredit keskin tizimi investitsiyaviy faollikning susayishi bilan bogʻliq murakkab muammolar koʻplab davlatlar iqtisodiyotining tiklanish va oʻsish sur'atlariga salbiy oʻtildi. ta'kidlab ko'rsatayotgani So'nggi yillarda jahon iqtisodiyotida yuzaga kelayotgan muammolarni asosan qo'shimcha pul bosib chiqarish va moliya bozorini shunday pullar bilan toʻldirish hisobidan hal etilishi koʻzga tashlanayotgani, bu esa, oʻz navbatida, kelgusida jilovlab boʻlmaydigan inflatsiyaga, ya'ni qimmatchilikka, zaxira va milliy valutalarning qadrsizlanishiga va shu bilan bogʻliq ogʻir oqibatlarga olib kelishi mumkinligi qayd etildi.

4. Xalqaro iqtisodiy tashkilotlar

Maqsadlari va vazifalari barcha mamlakatlar xalqlarining manfaatlariga mos keladigan davlatlararo universal tashkilotlar. Bunday tashkilotlar – Birlashgan Millatlar Tashkiloti tizimining asosiy organlari (Bosh Assambleya, Xavfsizlik Kengashi, Iqtisodiy va ijtimoiy kengash, Vasiylik boʻyicha kengash, Xalqaro sud) hamda mustaqil xalqaro iqtisodiy tashkilotlar hisoblanuvchi ixtisoslashgan muassasalar – Xalqaro valuta fondi (XVF), Xalqaro Tiklanish va taraqqiyot banki (XTTB), uning shoʻba tashkiloti boʻlgan Xalqaro moliyaviy korporatsiya (XMK), Xalqaro taraqqiyot uyushmasi (XTU), Xalqaro savdo tashkiloti (XST), BMTning Savdo va taraqqiyot boʻyicha konferensiyasi (YUNKTAD) kabilardir.

Asosan moliyaviy-iqtisodiy masalalarni hal etish uchun tashkil qilingan mintaqaviy va xalqaro xususiyatga ega davlatlararo tashkilotlar — Yevropa Tiklanish va taraqqiyot banki (YETTB), jahondagi turli mintaqalarning sanoati rivojlangan mamlakatlarini birlashtiruvchi Iqtisodiy taraqqiyot va hamkorlik tashkiloti (ITHT)dir.

Jahon bozorining ayrim segmentlarida faoliyat koʻrsatuvchi **xalqaro iqtisodiy tashkilotlar** — Neft eksport qiluvchi mamlakatlar tashkiloti (OPEK), har xil xalqaro bitimlar (kofe, toʻqimachilik tovarlari kabilar boʻyicha).

«Katta sakkizlik» (Kanada, GFR, Fransiya, Yaponiya, Buyuk Britaniya, Italiya, AQSh, Rossiya kabi) jahon iqtisodiyotiga ta'sir koʻrsatuvchi **yarim rasmiy birlashmalar orqali namoyon boʻladigan** xalqaro iqtisodiy tashkilotlar. Ushbu mamlakatlar global xususiyatga ega boʻlgan dolzarb muammoli masalalarni koʻrib chiqadilar va umumiy harakat yoʻnalishini ishlab chiqadilar. Ularning qarorlari koʻpincha XVF, XTTB va boshqa xalqaro iqtisodiy tashkilotlar siyosatini belgilab beradi (masalan, Rossiya 1998-yildan boshlab sammitlarda «Katta sakkizlik» a'zosi sifatida ishtirok etmoqda.

Yarim rasmiy tashkilotlarga banklararo darajada faoliyat koʻrsatuvchi kreditor mamlakatlarning Parij va London klublari kiradi.

Turli xil savdo-iqtisodiy, valuta-moliya, kredit, tarmoq va ixtisoslashgan tashkilotlar. Asosiy davlatlararo universal tashkilotni Birlashgan Millatlar Tashkiloti tizimi tashkil qiladi. U oʻz asosiy va yordamchi organlari bilan birga, 18 ta ixtisoslashgan muassasani, Xalqaro atom energiyasi boʻyicha agentlikni (MAGATE), bir qator dasturlar, kengash va komissiyalarini qamrab oladi.

Jahon savdo oqimlarini shakllantirishda asosiy rolni **Jahon savdo tashkiloti (JST) oʻynaydi**. JSTning huquqiy asoslarini Tariflar va savdo boʻyicha bosh bitim (1994-yilgi tahrirda), Xizmatlar bilan savdo qilish haqidagi bosh bitim (GATS), Intellektual mulk huquqlarining savdo jihatlari toʻgʻrisidagi bitim (TRIPS) tashkil etadi.

JST 1947-yilgi Tariflar va savdo boʻyicha bosh bitim vorisi sifatida 1995-yilning yanvaridan boshlab faoliyat koʻrsatmoqda va 140 tadan ortiq davlatni oʻz ichiga olgan. JSTning bosh vazifalari: xalqaro savdoni erkinlashtirish, iqtisodiy oʻsishga koʻmaklashish hamda odamlarning iqtisodiy farovonligini oshirishdan iborat.

BMTning Savdo va taraqqiyot boʻyicha konferensiyasi (YUNKTAD) Bosh Assambleyaning organi sifatida 200 ga yaqin davlatlarni birlashtiradi. YUNKTADning asosiy vazifalari — rivojlangan va rivojlanayotgan mamlakatlar oʻrtasida savdoni kengaytirish, tavsiyalar ishlab chiqish, jahon savdosi boʻyicha BMT muassasalarining faoliyatini muvofiqlashtirish.

Xalqaro bojxona tashkiloti – XBT (Bryussel, 1953-y.) 140 dan ortiq davlatlarni birlashtiradi. Uning asosiy vazifasi – jahon tovar aylanmasini (oborotini) tezlashtirish uchun yagona bojxona qoidalarini ishlab chiqish va yoyish, bojxona organlarining nazorat va fiskal funksiyalarini ta'minlash. XBTning oliy rahbarlik organi – Kengash, doimiy faoliyat koʻrsatuvchi organi esa, kotibiyat.

XBT Tovarlarni tavsiflash va kodlashtirish boʻyicha uygʻunlashgan tizimni, ya'ni bojxona tariflari va tashqi savdo statistikasini tuzish uchun

tovarlarning universal klassifikatorini ishlab chiqqan va joriy etgan (1983 -y.).

Xalqaro savdo palatasi – XSP (Parij, 1919-y.)ning maqsadi – savdo, investitsiyalar va ochiq bozorlarni, kapitallarning harakatini erkin ragʻbatlantirish orqali jahonda tadbirkorlikning rivojlanishiga koʻmaklashish, erkin xalqaro savdoni rivojlantirish maqsadida iqtisodiyot va huquqqa oid samarali choralar koʻradi, xususiy tadbirkorlik tizimini himoya qiladi.

Xalqaro valuta fondi (XVF) 1947-yilda tashkil qilingan. Uning oliy rahbarlik organi — Kengash, ijroiya organi esa (24 nafar ijro etuvchi direktordan iborat) Direktoratdir. XVF shartlanganlik prinsipiga asoslanadi. Ushbu prinsipga koʻra, mamlakatlar muayyan iqtisodiy siyosatni yuritgan taqdirda, kredit olishlari mumkin. XVF kreditini olish shartlari: budjet taqchilligining kamaytirilishi, pul massasining oʻsish sur'atlarini pasaytirish, kreditlar boʻyicha olinadigan foiz stavkalarini inflatsiya darajasiga nisbatan koʻtarishdan iborat.

XVF xalqaro valuta tizimining institutsional asosi boʻlib xizmat qiladi.

Jahon banki guruhi oʻzaro chambarchas bogʻliq boʻlgan va rivojlanayotgan mamlakatlarga moliyaviy yordam koʻrsatish maqsadiga ega beshta institutdan tashkil topgan. Guruhga quyidagilar kiradi:

- 1. Xalqaro Tiklanish va taraqqiyot banki yoki Jahon banki (XTTB) (Vashington, 1945-y.). XTTBning ustav kapitali 142 mlrd. dollar.
- 2. *Xalqaro taraqqiyot assotsiatsiyasi XTA* (Vashington, 1960 -y.). XTTB (Jahon banki)dan kredit olishga qurbi yetmaydigan eng kambagʻal davlatlarga oʻta imtiyozli kreditlar beradi.
- 3. Xalqaro moliya korporatsiyasi XMK (Vashington, 1956-y.). Xususiy sektorni qoʻllab-quvvatlash (texnik yordam koʻrsatish, maslahatlar berish) orqali rivojlanayotgan mamlakatlarning iqtisodiy oʻsishiga koʻmaklashadi. Ustav kapitali 1,4 mlrd. dollar.
- 4. Investitsiyalarni kafolatlash boʻyicha koʻp tomonlama agentlik MAGI (Vashington, 1988 -y.). Investorlarga notijorat tavakkallardan zarar koʻrmaslikni kafolatlab, rivojlanayotgan davlatlarga xorijiy investitsiyalarning kiritilishini ragʻbatlantiradi. Ustav kapitali 1 mlrd. dollardan ortiq.
- 5. Investitsiya nizolarini tartibga solish boʻyicha xalqaro markaz INTSBXM (Vashington, 1966-y.). Arbitrajda koʻrib chiqish orqali

hukumatlar va xorijiy investorlar oʻrtasida nizolarning tartibga solinishiga koʻmaklashadi, investorlarga yuridik maslahat beradi.

Jahon banki ishtirokchilarining barcha loyihalari moliyaviy yordamdan eng samarali foydalanish maqsadida siyosiy-iqtisodiy ekspertizadan oʻtkaziladi.

Xalqaro hisob-kitoblar banki — *XHB* (Bazel, 1930-y.). Milliy banklar, asosan Yevropa davlatlari milliy banklarining harakatlarini muvofiqlashtiradi.

Yevropa Tiklanish va taraqqiyot banki — *YETTB* (London, 1991-y.). Markaziy, Sharqiy Yevropa hamda sobiq Ittifoq mamlakatlariga bozor islohotlarini oʻtkazish bosqichida yordam koʻrsatadi. Bankning aksionerlik kapitali — 15 mlrd. yevro. YETTB XTTB hamda kreditorlarning Parij va London klublari bilan hamkorlik qiladi.

Osiyo Taraqqiyot banki — Osiyo va Uzoq Sharq mintaqasiga bevosita qarzlar berish hamda texnik jihatdan koʻmaklashish orqali mazkur mamlakatlar iqtisodiyoti oʻsishini ragʻbatlantirish maqsadida 1966-yilda tashkil etilgan bank.

Ixtisoslashgan xalqaro iqtisodiy tashkilotlar:

Sanoat rivojlanishi boʻyicha birlashgan millatlar tashkiloti – YUNIDO (Vena, 1967-y.). Sanoat rivojlanishi va hamkorligiga, rivojlanayotgan mamlakatlarning industrlashishiga, oʻtish davri iqtisodiyotidagi mamlakatlar sanoatining sogʻlomlashishiga koʻmaklashadi.

BMTning Oziq-ovqat va qishloq xoʻjalik tashkiloti – FAO (Rim, 1945-y.) quyidagi maqsadlarga xizmat qiladi: ocharchilikni tugatish, ovqatlanish va turmush sifatini yaxshilash, qishloq xoʻjaligi, oʻrmonchilik va baliqchilikni takomillashtirish, qishloq hududlarini rivojlantirishga koʻmaklashish.

Intellektual mulk xalqaro tashkiloti – VOIS (Jeneva, 1977-y.). Boshqa xalqaro iqtisodiy tashkilotlar bilan hamkorlik qilish yordamida intellektual mulkning qoʻriqlanishiga koʻmaklashadi.

Atom energiyasi boʻyicha xalqaro agentlik – *MAGATE* (Vena, 1956 -y.). Atom energiyasidan harbiy maqsadlarda foydalanmaslik kafolatlarini oʻrnatadi va ta'minlaydi.

Xalqaro Mehnat Tashkiloti – XMT (Jeneva, 1919-y.). Quyidagi maqsadlar uchun faoliyat koʻrsatadi: toʻliq bandlikni ta'minlash, inson huquqlariga rioya etish, mehnatkashlarning hayoti va sogʻligʻini saqlash,

tadbirkorlar va mehnatkashlar oʻrtasidagi hamkorlikni ragʻbatlantirish. XMTning doimiy kotibiyati Xalqaro Mehnat byurosidir.

Professional ixtisoslashgan tashkilotlar – Xalqaro buxgalterlar jamiyati (Chikago), Standartlashtirish boʻyicha xalqaro qoʻmita, Marketing boʻyicha xalqaro federatsiya (Parij) va boshqalar.

Tarmoq tashkilotlari — Xalqaro reklama uyushmasi (Nyu-York), Ishbilarmonlik aloqalari boʻyicha xalqaro uyushma (Akron, AQSh), Fuqaro aviatsiyasi boʻyicha xalqaro tashkilot (Monreal) va boshqalar.

Tayanch tushunchalar:

Xalqaro savdo, jahon bozori, valuta bozori, valuta operatsiyalari, valuta ayirboshlash, valuta kursi, valuta konvertatsiyasi, xalqaro kredit, proteksionizm, repatriatsiya, toʻlov balansi, tashqi qarzi.

Savol va topshiriqlar:

- 1. Jahon bozori nima?
- 2. Valuta bozori nima?
- 3. Valuta qimmatliklariga nimalar kiradi?
- 4. Jahon valuta bozorga xos xususiyatlarni sanab bering.
- 5. Valutani tartibga solish deganda nimani tushunasiz?
- 6. Valuta operatsiyalari tartibini qanday qonun belgilab berishini tushuntiring.
- 7. Xalqaro kredit xalqaro iqtisodiy munosabatlar sohasida qanday funksiyalarni bajarishini tushuntirib bering.
- 8. Qaysi xalqaro valuta-kredit va moliya tashkilotlari yordam tariqasida qarzlar beradi?
 - 9. Oʻzbekiston tashqi qarzining YAIM va eksportdagi ulushi qancha?

Mavzuni chuqur oʻrganish instrumentariysi

Jahon bozori – bu xalqaro mehnat taqsimoti va ixtisoslashuv asosida shakllangan va iqtisodiy munosabatlar orqali oʻzaro bogʻlangan, alohida mamlakatlar milliy bozorlari majmuidan iborat.

Xalqaro savdo – dunyodagi barcha mamlakatlar tashqi savdosining majmuidan iborat xalqaro tovar-pul munosabatlari sohasi boʻlib, tashqi savdo aylanmasi, eksport va import kabi koʻrsatkichlar bilan tavsiflanadi.

Tashqi savdo aylanmasi — ma'lum bir davrda (odatda bir-yilda) amalga oshirilgan eksport va import operatsiyalari umumiy summasi.

Savdo siyosati – bu davlatning tashqi savdo hajmini tartibga solishga qaratilgan iqtisodiy siyosatining alohida yoʻnalishi.

Tashqi savdo siyosati — ichki bozorni himoyalashga, tashqi savdo hajmining oʻsishini ragʻbatlantirishga, uning tuzilishini va tovar oqimlarining yoʻnalishlarini maqbullashtirishga qaratilgan tadbirlar tizimi.

Proteksionizm siyosati – erkin savdoni cheklashga, ya'ni tashqi savdo hajmini ta'rifli va ta'rifsiz to'siqlar orqali tartibga solish.

Valuta – bu alohida mamlakatlar pul birligidir.

Valuta kursi – bir mamlakat yoki mamlakatlar guruhi pul birligining boshqa mamlakatlar pul birligida ifodalanadigan narx.

Valuta konvertatsiyasi – har bir milliy valutani boshqa valutaga almasha olish xususiyatidir.

Mavzu yuzasidan asosiy xulosalar:

- 1. Xalqaro savdo iqtisodiy resurslarining harakatchanligiga har bir mamlakatning turli valutalardan foydalanishi xos. Keyingi yillarda xalqaro savdoda keskin oʻzgarishlar roʻy berdi. Jahon eksportida yangi industrial mamlakatlar (Singapur, Xitoy, Janubiy Koreya va h.k.) hissasi ortib bormoqda. Jahon bozori savdo aylanmasi tarkibida yengil sanoat mahsulotlarining ulushi ortmoqda. Shuningdek, jahon eksportida xizmatlar ulushining oʻsishi kuzatilmoqda.
- 2. Xalqaro savdo-sotiq kapital va ish kuchi harakati, mamlakatlararo pul oqimini hosil etmoqda. XXI asrda kapitalning chiqarilishi oʻsmoqda. Bu iqtisodiy oʻsishga xizmat qiladi, chunki bu bilan investitsiya uchun pul topish muammosi yechildi, kapital ketidan ilgʻor texnologiya va boshqaruv tajribasi kirib keladi, kapital qabul qilgan mamlakatda ishlab chiqarishning tarkibi yangilanadi, ya'ni modernizatsiya yuz beradi. Bu mamlakatni jahon bozoriga olib chiqadi, bandlik oshadi, aholining daromadi koʻpayadi.
- 3. Xalqaro savdo-sotiq valuta ayirboshlashni taqozo etadi. Bu shakllangan valuta kursiga binoan boʻladi. Valuta kursi (narxi oʻzaro almashiladigan milliy valutalarning xarid qobiliyatiga va valuta bozoridagi talab va taklif nisbatiga bogʻliq boʻladi. Valutalarning almashinishi ularning konvertatsiyasi boʻladi.
- 4. Очик иктисодиётга «таккосий афзаллик конуни» хосдир. Таккосий афзалликни халкаро мехнат таксимоти юзага келтиради. Бу конунга кура нимани ишлаб чикариш кулай булса, шу экспорт килиниши

ва аксинча, нимани ишлаб чиқариш қулай бўлмаса, у импорт қилиниши керак.

5. Ochiq iqtisodiyot xalqaro mehnat taqsimotini chuqurlashtiradi. Bu milliy iqtisodiyotning jahon iqtisodiyotining bir qismiga aylanib qolishini bildiradi. Erkin savdo hududlarida iqtisodiy va valuta sohasidagi birlashuv yuz beradi (masalan, Yevropa ittifoqi).

22-MAVZU. OʻZBEKISTONNING JAHON XOʻJALIGIGA INTEGRATSIYALASHUVI

1. Xalqaro integratsiyaning mohiyati, shart-sharoitlari va darajalari

Oʻzbekiston davlat mustaqilligiga erishgandan keyin davlat va xalq manfaatlariga muvofiq keladigan mustaqil ijtimoiy-iqtisodiy siyosatni oʻtkazish imkoniyati tugʻildi. Respublikaning tashqi dunyodan bir asrdan ortiq vaqt mobaynida ajralib qolganligiga barham berildi. U xalqaro huquqning teng huquqli subyekti boʻldi. Bu esa jahon mehnat taqsimotida munosib oʻrinni egallashga sharoit yaratdi¹.

Mustaqillik yillarida yuqoridagi integratsiyalashuv qonun-qoidalariga rioya etganligi bois, Oʻzbekistonning jahon hamjamiyatida tutgan oʻrni va ahamiyati muntazam ravishda ortib bormoqda. Buning asosi haqida toʻxtalib, Prezident Islom Karimov: «Izchil yuqori oʻsish sur'atlari, yurtimizda barpo etilgan bank-moliya tizimining barqaror va ishonchli faoliyat yuritishi, iqtisodiyotda amalga oshirilayotgan yangilanish va oʻzgarishlar, umuman, mamlakatimizni modernizatsiya qilish yoʻlidagi dadil qadamlarimiz dunyo jamoatchiligi, shuningdek, Xalqaro valuta jamgʻarmasi, Jahon banki, Osiyo taraqqiyot banki singari nufuzli xalqaro moliya tashkilotlari tomonidan e'tirof etilmoqda»², – deb alohida koʻrsatib oʻtgan.

 $^{^1}$ Qarang: *Каримов И. А.* Ўзбекистон бозор муносабатларига ўтишнинг ўзига хос йўли // Ўзбекистон: миллий истиклол, иктисод, сиёсат, мафкура. Т. 1. – Т., 1996. – Б. 157.

² *Каримов И. А.* Мамлакатимизда демократик ислохотларни янада чукурлаштириш ва фукаролик жамиятини ривожлантириш концепцияси. – Т.: «Ўзбекистон», 2010. – Б. 4.

Yuqoridagi qoidalarga rioya qilishning ahamiyati yana shundaki, 2008-yilda boshlangan va hozirgacha jahondagi aksariyat mamlakatlar milliy xoʻjaliklariga jiddiy salbiy ta'sir koʻrsatib kelayotgan jahon moliyaviy-iqtisodiy inqirozi Oʻzbekistonda yengil kechdi.

Oʻzbekiston BMT doirasida jahon hamjamiyatidagi integratsiyalashuvni BMTning ixtisoslashgan muassasalari — YUNESKO, Jahon sogʻliqni saqlash tashkiloti, Xalqaro mehnat tashkiloti, YUNKTAD, YUNISEF va boshqalar bilan keng hamkorlik tufayli amalga oshirmoqda.

Iqtisodiy islohotlarni amalga oshirishga, Oʻzbekistonning jahon hamjamiyatidagi integratsiyalashuvini ta'minlashga xalqaro moliyaviy, iqtisodiy tashkilotlar – Xalqaro valuta fondi, Jahon banki, Xalqaro moliya korporatsiyasi, Yevropa Tiklanish va Taraqqiyot banki, Osiyo Taraqqiyot banki va boshqalar ham katta yordam koʻrsatmoqda. Mamlakatimizning har yili Davos shahrida oʻtadigan Jahon iqtisodiy anjumanida qatnashishi katta ahamiyatga ega. Anjumanda qatnashish Oʻzbekistonni va uning imkoniyatlarini tanishtirish, chet el investitsiyalarini jalb etish uchun muhim ahamiyatga molik.

Jahon hamjamiyatiga integratsiyalashuvning tarkibiy qismi davlatlarning turli mintaqaviy birlashmalari bilan aloqalarni rivojlantirishdan iborat. Oʻzbekiston mintaqaviy xalqaro tashkilotlar, chunonchi, Yevropa Ittifoqi, YEXHT, NATO, EKO, OIK, Qoʻshilmaslik harakati va boshqalar bilan ham samarali hamkorlik qilmoqda. Bugungi kunda Oʻzbekiston tashqi siyosatining Osiyo yoʻnalishi ancha kengayganligini ta'kidlash joiz. Oʻzbekiston oʻzining tashqi aloqalarini koʻp tomonlama va ikki tomonlama asosda tashkil etib kelmoqda.

Xalqaro mehnat taqsimotining chuqurlashuvi turli mamlakatlar iqtisodiyotini bir-biriga bogʻliq qilib qoʻyadi. Ayniqsa, globallashuv sharoitida iqtisodiy faoliyat baynalminal tus oladi, muayyan mahsulotni ishlab chiqarishda bir necha mamlakatlar firmalari ishtirok etadi. Bir mamlakatda yetishmay qolgan resurslarning oʻrni boshqa yerdan kelgan resurslar bilan toʻldiriladi, yirik ilmiy texnikaviy loyihalar birgalikda amalga oshiriladi. Shu bois, turli mamlakatlar milliy iqtisodiyotining oʻzaro qoʻshilib yagona mamlakatlararo xoʻjalik tizimini hosil etishi iqtisodiy integratsiya deb yuritiladi.

1.1. Xalqaro iqtisodiy integratsiya konsepsiyalari

Xalqaro iqtisodiy integratsiya (XII) — mamlakatlarning ishlab chiqarishni baynalminallashtirish, ya'ni xalqaro ishlab chiqarish

kooperatsiyasi va xalqaro mehnat taqsimoti asosida iqtisodiy hamkorlik qilishidan iborat jarayon.

XX asr oxirida xalqaro iqtisodiy integratsiya ayrim mintaqalar iqtisodiyotining jadal rivojlanishi va integratsiya birlashmalari a'zolari boʻlgan mamlakatlar raqobatbardoshligining ortishi uchun muhim omilga aylandi.

Iqtisodiy integratsiya quyidagi shart-sharoitlar (omillar) bilan belgilanadi:

- 1) ishlab chiqarishning baynalminallashuvi va transmilliy korporatsiyalarning yaratilishi;
 - 2) turli mamlakatlar korxonalari oʻrtasidagi hamkorlik;
- 3) texnologiyalarning xalqaro miqyosda ayirboshlanishi va yangi texnologik bazisning shakllanishi;
- 4) ayrim mamlakatlar iqtisodiyotlarining ochiqligi, xalqaro ayirboshlashning liberallashuvi.

Xalqaro iqtisodiy integratsiyaning shart-sharoitlarini quyidagilar tashkil etadi:

- mamlakatlar iqtisodiy rivojlanishining taxminan teng darajasi;
- jugʻrofiy qoʻshnichilik, koʻp hollarda umumiy chegara hamda tarixan shakllangan iqtisodiy aloqalarning mavjudligi;
- rivojlanish, moliyalashtirish, iqtisodiyotni tartibga solish hamda siyosiy hamkorlikning iqtisodiy va boshqa muammolari umumiyligi;
- tashabbus koʻrsatuvchi, boshqa mamlakatlarni birlashtiruvchi markazning mavjudligi va davlatlar ustida turuvchi institutlarning tashkil qilinishi.

Xalqaro iqtisodiy integratsiya nazariyasining asosida mamlakat uchun xalqaro mehnat taqsimoti negizida ishlab chiqarish turi boʻyicha ixtisoslashuv hamda tovarlar ayirboshlashning foydaliligi prinsipi yotadi.

Tashqi iqtisodiy integratsiya nazariyasida integratsiya mexanizmining turlicha baholanishi bilan bogʻliq har xil konsepsiyalar mavjud.

Neoliberalizm tarafdorlari (V. Repeyek, M. Allen) XIIni tabiiy bozor kuchlari amal qiladigan bir qancha mamlakatlar miqyosidagi yagona (umumiy) bozor makoni deb hisoblaydilar.

Korporatsionalizm tarafdorlari (S. Rolf, U. Rostou) xalqaro iqtisodiyotning integratsiyasini bozor mexanizmi va davlat boshqaruvi emas, balki jahon xoʻjalik aloqalarining oqilona va muvozanatlashgan

tarzda rivojlanishiga imkon yaratuvchi xalqaro korporatsiyalar amalga oshiradi, deb ta'kidlaydilar.

Rossiyalik iqtisodchi olimlar N. P. Shmelyov, M. M. Maksimova va Yu. V. Shishkovning ta'kidlashlaricha, XII XMTning rivojlanganidan, ishlab chiqarishning baynalminallashganidan, bozor mexanizmlarining milliy xo'jaliklarning o'zaro bir-biriga moslashuviga ta'sir etayotganidan dalolat beradi.

Xalqaro iqtisodiy integratsiyaning maqsadlari quyidagilardan iborat:

- 1) ishlab chiqarish miqyosining kengayishi evaziga tejamkorlikka erishish (xarajatlarning kamayishi, bevosita xorijiy investitsiyalarning kirib kelishi);
- 2) qulay tashqi siyosiy muhit yaratish (siyosiy, harbiy, madaniy va boshqa sohalarda yakdillik va hamkorlikning oʻsishi);
- 3) savdo siyosati vazifalarining bajarilishi (mintaqaviy integratsion birlashmalar oʻzaro savdo uchun barqaror muhit yaratadilar);
- 4) iqtisodiyotning tarkibiy qayta qurilishiga koʻmaklashish (bozor islohotlarining tezlashuvi va katta hajmli bozorning yaratilishi);
- 5) milliy sanoatdagi yangi tarmoqlarni, mahalliy ishlab chiqarish korxonalarini keng mintaqaviy bozorda qoʻllab-quvvatlash.

1.2. Xalqaro iqtisodiy integratsiya darajalari

Xalqaro iqtisodiy integratsiya (XII)ning birinchi darajasi — mamlakatlar oʻrtasida integratsiyaning tayyorgarlik bosqichi sifatida baholanadigan preferensial savdo bitimlari tuzilishi bildiradi.

XIIning ikkinchi darajasida mamlakatlar erkin savdo zonasi tashkil qiladilar. Bunda uchinchi mamlakatlar bilan savdo qilinganida saqlanib qoladigan boj tariflari oʻzaro savdoda batamom bekor qilinishi nazarda tutiladi.

XIIning uchinchi darajasi Bojxona ittifoqi tashkil etilishi bilan bogʻliq. Bojxona ittifoqi integratsiya qilingan (birlashgan) mamlakatlar ichida tovarlar, xizmatlar bilan bojsiz savdo qilinishi hamda ushbu tovarlarning ichki bozorda batamom erkin koʻchib yurishini nazarda tutadi. Bojxona ittifoqining boshqaruv organi — vazirlar darajasidagi davlatlararo kengash hamda doimiy faoliyat koʻrsatuvchi davlatlararo kotibiyat.

XIIning toʻrtinchi darajasida mamlakatlar nafaqat tovar va xizmatlar, balki ishlab chiqarish omillari boʻlgan mehnat va ish kuchining erkin

harakatlanishi haqida kelishib oladilar, umumiy bozor yuzaga keladi.

Iqtisodiy siyosatning davlatlararo muvofiqlashuvi davlatlar va hukumatlar boshliqlarining vaqti-vaqti bilan boʻladigan majlislarida, siyosiy idoralar rahbarlarining uchrashuvlarida amalga oshiriladi hamda doimiy faoliyat koʻrsatuvchi kotibiyat ishi bilan qoʻllab-quvvatlanadi.

XIIning beshinchi darajasi iqtisodiy ittifoqqa xosdir. Unda umumiy boj tariflari, tovarlar va ishlab chiqarish omillarining erkin harakati bilan bir qatorda, makroiqtisodiy siyosatning muvofiqlashtirilishi, valuta, budjet va pul bilan bogʻliq sohalarda qonunlarning birxillashtirilishi nazarda tutilgan. Yevropa Ittifoqi boshqaruvining Yevropa Ittifoqiga a'zo mamlakatlar hukumatlari bilan kelishuvlarsiz qarorlar qabul qilish huquqiga ega boʻlgan yangi organlari yuzaga keladi.

XIIning oltinchi darajasi – milliy hukumatlardan tashqari boʻlgan umumdavlat organlari (Yevroparlament, Yevropa Ministrlar soveti) uchinchi (rivojlanayotgan) mamlakatlar bilan munosabatlardagi ayrim vazifalarini davlatlarning umummamlakat organlariga oʻtkazishlarini nazarda tutuvchi siyosiy ittifoq ham boʻlishi mumkin.

Jahon iqtisodiyotidagi integratsion birlashmalar. Jahon savdo tashkiloti (JST)ning ma'lumotlariga koʻra, XX asrning 90-yillari oxirida dunyoda har xil turdagi 30 dan ortiq integratsion birlashmalar mavjud edi. Qiyoslash uchun, deylik, 70-yillarda 5–6 ta va 80-yillarda 18–20 ta boʻlgan.

XIIning harakatlantiruvchi kuchini oʻz faoliyatida eng maqbul miqyoslarga erishishdan manfaatdor korxonalar tashkil etadi. Ular integratsiyaning quyidagi afzalliklaridan foydalanadilar:

- 1) bozorlar hajmining kengayishi;
- 2) tovar va xizmatlar ishlab chiqarishning qayta tashkil etilishi;
- 3) hamkorlik va kooperatsiya, bojxona cheklovlarisiz tovar va xizmatlarni ayirboshlash;
- 4) har bir mamlakatda savdo vakolatxonalarini saqlab turish zaruratining yoʻqligi;
- 5) keng miqyosga chiqish evaziga tor ixtisoslashgan eksportning oʻsishi;
- 6) uchinchi mamlakatlar bozorlarini oʻzlashtirishga imkon beradigan daromadlarning koʻpayishi;
- 7) ishlab chiqarish hamda tovar va xizmatlarni sotish xarajatlarini kamaytirish evaziga mintaqa ichidagi savdoning samaradorligi;
- 8) integratsiya birlashmalarining huquqiy bazasi iqtisodiy jihatdan ojizroq mamlakatlarni himoya qilishga qaratilganligi.

Davlatlar integratsiyalashuvi chogʻida ular suverenitetining chekla-

nishi ilgari tovarlar importidan proteksionistik usullar bilan himoyalangan mamlakatlarning ishlab chiqarish tarmoqlariga zarar yetkazishi mumkin. Shu sababli ayrim mamlakatlar mustaqil milliy siyosat yuritib, hamjamiyatning yagona birxillashtirilgan talablarini qabul qilishdan bosh tortadilar (masalan, Buyuk Britaniya, Gretsiya, Daniya, Shveysariya yevro pul birligiga oʻtishdan bosh tortganligini misol sifatida keltirish mumkin).

Integratsion birlashmalar a'zolari bo'lgan davlatlar JSTning uchinchi mamlakatlarga eng ko'p qulaylik rejimi berish haqidagi talablari (qoidalari)ni qabul qilmasliklari mumkin. XII bo'yicha sheriklarga boshqa mamlakatlarga qaraganda ko'proq imtiyozlar beriladi.

Aksariyat mamlakatlar umumjahon (JST doirasidagi) iqtisodiy integratsiyasiga erishish yoʻlida yaqin istiqbolda tor mintaqaviylikni afzal koʻradilar.

Koʻpchilik integratsion birlashmalar qoʻyilgan maqsadlardan ancha uzoqdadirlar (51 ta Afrika mamlakatini oʻz ichiga olgan iqtisodiy ittifoqni tashkil qilish maqsadini e'lon qilgan Afrika iqtisodiy hamjamiyati 1994-yildan boshlab 34 yil davom etgan oʻtish davri mobaynida tashkil qilindi).

E'lon qilgan maqsadlari va nomlari qandayligidan qat'i nazar, aksariyat guruhlar yo savdo bitimlari preferensial darajasida, yo amalga oshirilishi eng oson bo'lgan erkin savdo zonasi darajasidadirlar. Eng rivojlangan integratsion birlashma Yevropa Ittifoqi (YEI)dir.

1988-yilning boshida AQSh bilan Kanada oʻrtasida erkin savdo zonasi yaratish haqida bitim tuzilgan, 1992-yilda esa Shimoliy Amerika erkin savdo uyushmasi — NAFTA tashkil etildi (AQSh, Kanada, Meksika). NAFTA umumiy mintaqaviy bozor tashkil etilishiga, tovar va xizmatlar, kapital va mehnatning erkin koʻchib yurishiga yoʻl ochdi.

NAFTA doirasida eksportning kengayishi, ish oʻrinlarining koʻpayishi kuzatilmoqda. Kanada tashqi savdo aylanmasida AQShning ulushi 70 foizni, AQSh tashqi savdosida Kanadaning ulushi esa 20 foizni tashkil etadi (qiyoslash uchun: YEIda Germaniyaning Fransiya tashqi savdo aylanmasidagi ulushi taxminan 20 foiz, Fransiyaning Germaniya tashqi savdosidagi ulushi esa — taxminan 10 foiz). Meksikada xorijiy investitsiyalar hajmi ancha koʻpaydi. NAFTA mamlakatlarida ijtimoiyiqtisodiy koʻrsatkichlar oʻrtachalashib, mamlakatlar oʻrtasidagi savdo hajmi ortib bormoqda.

Jahon yalpi ichki mahsulotining 60 foizini ishlab chiqaruvchi Osiyo va Tinch okeani mintaqasida «Osiyo toʻrtburchagi» shakllandi: Yaponiya – Xitoy – yangi industrial mamlakatlar (Janubiy Koreya, Tayvan,

Gonkong, Singapur) – ASEAN (Janubi-sharqiy Osiyo davlatlari uyushmasi: Indoneziya, Malayziya, Tailand, Filippin, Singapur, Bruney, Vyetnam).

Ushbu mamlakatlarning integratsiyasi ASEAN negizida amalga oshmoqda va uch yoʻnalishni qamrab oladi:

- 1) bozor yoʻnalishi (erkin savdo zonalari);
- 2) bozor institutsional yoʻnalish (bozorning maqsadga qaratilgan boshqaruv bilan uygʻunlashuvi);
- 3) mintaqa doirasida loyihalarning amalga oshirilishi (TMKning rivojlanishi, sanoat vositachiligi).

2007-yilda 1989-yilda ta'sis etilgan va 21 ta davlatni qamrab oladigan Osiyo va Tinch okeani iqtisodiy hamjamiyatiga o'xshash erkin savdo zonasini tashkil qilish mo'ljallangan edi.

Janubiy Amerikada xalqaro iqtisodiy integratsiyani faollashtirishda MERKOSUR, ya'ni 1991-yilda Argentina, Braziliya, Paragvay va Urugvay tomonidan tashkil qilingan Janubiy Konus mamlakatlarining umumiy bozori borgan sari koʻproq ahamiyatga ega boʻlmoqda. Bu Lotin Amerikasining eng katta bozoridir (aholining 45 foizi 200 mln.dan ortiq; jami YAIMning 50 foizi taxminan 1 trln. dollar; bevosita xorijiy investitsiyalarning 40 foizi jalb etilgan).

Janubiy Amerika xalqaro iqtisodiy integratsiyasining boshqa birlashmalari orasida quyidagilar ajralib turadi:

- And kanti (Boliviya, Venesuela, Kolumbiya, Peru, Ekvador);
- Markaziy Amerika umumiy bozori (Gvatemala, Gonduras, Kosta-Rika, Nikaragua, Ekvador);
- KARIKOM (Karib hamjamiyati) ingliz tilida soʻzlashuvchi 14 ta
 Karib havzasi mamlakatlari.

Mazkur birlashmalar erkin savdo zonasi darajasidadirlar.

Afrikada XII 60-yillar oxirida boshlangan. Afrikadagi eng faol integratsion guruhlar quyidagilar:

- 1975-yilda tashkil etilgan va 16 ta davlatni oʻz ichiga olgan Gʻarbiy
 Afrika davlatlarining iqtisodiy hamjamiyati (EKOVAS);
- 1993-yilda tashkil qilingan va 21 ta mamlakatni qamrab olgan Sharqiy va Janubiy Afrika umumiy bozori;
- 1992-yilda tashkil etilgan Afrika janubini rivojlantirish hamjamiyati;
- 1967-yilda tashkil qilingan va 6 ta mamlakatni oʻz ichiga olgan
 Markaziy Afrika bojxona va iqtisodiy ittifoqi.

Afrikada XIIni rivojlantirish borasidagi muammolarga: mamlakatlar iqtisodiy rivojlanishi darajasining har xilligi, iqtisodiyotning bir xilligi va diversifikatsiyalashmaganligi, infratuzilmaning rivojlanmaganligi, siyosiy beqarorlik kabilarni kiritish lozim.

MDH (Mustaqil Davlatlar Hamdoʻstligi) — suveren davlatlar (Ozarbayjon, Armaniston, Belarus, Gruziya, Qozogʻiston, Qirgʻiziston, Moldova, Rossiya, Tojikiston, Turkmaniston, Oʻzbekiston, Ukraina)ning birlashmasi boʻlib, 1991-yilda ular oʻrtasida imzolangan shartnomaga muvofiq tashkil qilingan.

MDHning tuzilishi uchun asos sifatida yangi xoʻjalik aloqalarini shakllantirish prinsipi (ma'muriyatning oʻzboshimchaligini iloji boricha kamaytirish, koʻp tomonlama va ikki tomonlama muvofiqlashtirish) xizmat qiladi. MDH hududida joylashgan korxonalarning xoʻjalik faoliyati uchun iqtisodiy jihatdan bir xil maydonni (erkin savdo zonasini, umumiy axborot makonini) yaratish dolzarb vazifadir. 1994-yilda MDHning davlatlar ustida turadigan boshqaruv organi — Davlatlararo iqtisodiy qoʻmita tashkil qilingan.

Keyinchalik ijtimoiy-iqtisodiy, texnologik va tashqi savdo manfaatlarining umumiyligi asosida 1995-yilda Bojxona ittifoqi tashkil qilindi. Uning negizida Belarus Respublikasi, Rossiya, Tojikiston, Qozogʻiston, Qirgʻizistonni oʻz ichiga olgan YevrOsiyo hamjamiyati rivojlanmoqda.

Umumiy iqtisodiy makon shakllanishi davomida birinchi bosqichda erkin savdo zonasi, bojxona ittifoqi, toʻlov ittifoqi, umumiy mehnat bozori, umumiy agrar bozor, umumiy investitsiya va ilmiy-texnikaviy makon yaratish hamda rivojlantirish vazifalari qoʻyilgan.

MDHdagi integratsiya natijalari ziddiyatlidir: erishilgan shartla-shuvlarning aksariyati bajarilmagan, ammo Hamjamiyat tarqab ketmadi va oʻz mavjudligi maqsadga muvofiqligini isbotladi.

Hozirda Yevropa Ittifoqi 27 ta mamlakatni: Belgiya, Bolgariya, Italiya, Lyuksemburg, Niderlandiya, Germaniya, Fransiya, Daniya, Irlandiya, Buyuk Britaniya, Gretsiya, Ispaniya, Portugaliya, Avstriya, Finlyandiya, Shvetsiya, Polsha, Chexiya, Vengriya, Slovakiya, Litva, Latviya, Ruminiya, Estoniyani oʻz ichiga olgan. Yevropa Ittifoqi (YEI) 1991-yilda tashkil qilingan. 2012-yilda Yevropa Ittifoqiga Xorvatiyaning kirishi rejalashtirilgan edi. Turkiyaning qoʻshilishi haqida muzokaralar olib borilmoqda.

YEI quyidagi maqsadlarni qonun tariqasida belgilab qoʻygan:

- Yevropa fuqaroligining joriy etilishi;
- erkinlik, xavfsizlik va qonuniylikning ta'minlanishi;
- iqtisodiy va ijtimoiy taraqqiyotga koʻmaklashish;
- Yevropaning jahondagi rolini kuchaytirish.

YEI davlatlarining iqtisodiy va valuta ittifoqi YEI valutasi boʻlmish yevro amal qiladigan umumiy iqtisodiy makonni shakllantiradi. YEIning moliyaviy vositalari turli fondlar (mintaqaviy rivojlanish, ijtimoiy, jipslashuv fondi va boshqalar)dir. Yevropa investitsiya banki uzoq muddatli investitsiya loyihalarining amalga oshirilishiga koʻmaklashadi.

YEIning asosiy boshqaruv organlari — Yevropa Kengashi, Yevrokomissiya, Yevroparlament. Yordamchi va maslahat organlari — Iqtisodiy va Ijtimoiy qoʻmita, Mintaqalar qoʻmitasi, Hisob palatasi (Auditorlar palatasi).

Oʻzbekiston Respublikasi Prezidenti Islom Karimov 2012-yil 1-may kuni Oqsaroyda Yevropa Ittifoqining mamlakatimizdagi Vakolatxonasi (Delegatsiyasi) rahbari — elchisi etib tayinlangan Norber Justendan ishonch yorligʻini qabul qildi. Norber Justen Yevropa Ittifoqining Oʻzbekistondagi Vakolatxonasining ilk rahbari sifatida oʻzaro manfaatli hamkorlikni yanada mustahkamlash uchun bor kuch va imkoniyatlarini ishga solishini ta'kidlagan.

1996-yilning iyunida Florensiyada davlat va hukumat rahbarlari darajasida Oʻzbekiston bilan Yevropa Ittifoqi oʻrtasidagi munosabatlarni har tomonlama mustahkamlashga asos boʻlgan Sheriklik va Hamkorlik toʻgʻrisidagi bitim imzolangan edi.

2011-yilning yanvar oyida Bryusselda boʻlib oʻtgan oliy darajadagi ikki tomonlama muzokara va uning yakunlari yuzasidan imzolangan hujjatlar Oʻzbekiston bilan Yevropa Ittifoqi oʻrtasidagi keng koʻlamli muloqotlarga yangi imkoniyatlar yaratdi. Ikki tomon ham savdo-iqtisodiy va sarmoyaviy hamkorlikni rivojlantirishdan manfaatdor. Mamlakatimizda 2012-yil ma'lumotlariga koʻra, Yevropa investorlari ishtirokida tuzilgan 840 dan ziyod korxona oʻzaro manfaatdorlik asosida faoliyat koʻrsatmoqda, YEIga a'zo mamlakatlarning qariyb 270 yetakchi kompaniyasi vakolatxonalari roʻyxatdan oʻtkazilgan.

2011-yilda Oʻzbekistonning YEI mamlakatlari bilan olib borgan umumiy savdosi hajmi 2010-yildagiga nisbatan qariyb 20 foiz oʻsdi va 2,3 milliard AQSh dollaridan oshdi. Oʻzbekiston Yevropa Ittifoqining Markaziy Osiyo boʻyicha strategiyasi doirasidagi loyiha va dasturlarni amalga oshirishni qoʻllab-quvvatlab kelmoqda.

Savdo-iqtisodiy va madaniy-gumanitar yoʻnalishlarda, xavfsizlik,

atrof-muhitni muhofaza qilish va suv resurslarini boshqarish sohalarida, demokratlashtirish, qonun ustuvorligini ta'minlash, fuqarolik jamiyatini shakllantirish hamda inson huquqlari va erkinliklarini ta'minlash borasida oʻzaro hamkorlikda tadbirlar tashkil etilmoqda.

1.3. Xalqaro iqtisodiy integratsiyaning mezonlari va rivojlanish tamoyillari

U yoki bu integratsion guruhning tashkil qilinishi umuman xalqaro iqtisodiyot manfaatlariga qanchalik mos kelishini baholash uchun XX asrning 90-yillarida Butun jahon banki quyidagi prinsiplar (mezonlar)ni ifodalab berdi:

- 1) mintaqaviy savdo bitimlari iqtisodiyotning istisnosiz barcha tarmoqlarini qoplab olishi kerak;
- 2) oʻtish davri oʻn yildan ortmasligi hamda savdoni liberallashtirishning aniq jadvalini oʻz ichiga olishi kerak;
- 3) savdo integratsiyaviy birlashma tashkil etilishidan avval liberallashtirilishi kerak;
- 4) umumiy bojxona tarifi eng qulay sharoit yaratish rejimining eng pastki tarifidan ortiq boʻlmasligi kerak;
 - 5) yangi a'zolarni qabul qilish qoidalari erkin (liberal) bo'lishi lozim;
- 6) integratsiyaning eng rivojlangan darajalari (shakllari)ga tez oʻtish zarur;
- 7) integratsiya birlashmasida dempingga qarshi qoʻdalar qoʻllanilmasligi kerak.

Aksariyat hollarda integratsiyaning ijobiy natijalari salbiy oqibatlaridan ortiq boʻladi. Buning umumiy qonuniyatlari quyidagilardan iborat:

- integratsiya birlashmasida mamlakatlar qanchalik koʻp va katta boʻlsa, savdo hajmi shunchalik koʻlamli boʻladi;
- integratsiya birlashmasi mamlakatlari oʻrtasidagi savdo hajmi ushbu birlashma tuzilishidan avval qanchalik katta boʻlgan boʻlsa, savdo shunchalik samarador boʻladi;
- raqobatning oʻsishi tovarlar sifatining ortishiga olib keladi, yangi texnologiyalar yaratilishini ragʻbatlantiradi;
 - narx koʻtarilishi kamayadi.

Oxirgi oʻn yillar mobaynida jahon iqtisodiyotida Amerika Qoʻshma Shtatlari yetakchi boʻlib kelmoqda. Hozirgi bosqichda AQShning yetakchiligi asosan bozorining miqyosi va boyligi, bozor tuzilmalarining rivojlanganlik darajasi, fan-texnika salohiyati, savdo, investitsiyalar va

bank kapitali yoʻnalishida qudratli va keng tarmoqlangan jahon xoʻjalik aloqalari tizimi tufayli boʻlib, bu uning boshqa mamlakatlardan ustunlik qilishini ta'minlamoqda.

AQShning hozirgi sanoati jahonda qazib olinayotgan butun xomashyoning taxminan 1/3 qismini qayta ishlamoqda. Mamlakat mashina va uskunalarning eng katta bozoriga ega. Rivojlangan mamlakatlarda sotiladigan mashinasozlik mahsulotining 40 foiz dan ortigʻi AQSh hissasiga toʻgʻri keladi.

AQSh korporatsiyalari fan-texnika taraqqiyotining samolyotlar va kosmik apparatlar, oʻta qudratli kompyuterlar va ularning dasturiy ta'minoti, yarim oʻtkazgichlar va eng yangi qudratli integral sxemalar, lazer texnikasi, aloqa vositalari kabi yoʻnalishlarida jahon birinchiligini mustahkam saqlab kelmoqdalar. Rivojlangan mamlakatlarda yaratilayotgan asosiy yangiliklarning 50 foizi AQShda joriy etiladi.

AQSh toʻplangan bilim massivlariga ishlov berish, axborot xizmatlari koʻrsatish sohalarida ham mustahkam mavqega ega. Ushbu omil juda katta ahamiyatga ega, chunki axborot bilan tez va sifatli ta'minlash butun ishlab chiqarish apparatining ish samaradorligini borgan sari koʻproq belgilab bermoqda.

Hozirgi vaqtda rivojlangan mamlakatlarda mavjud boʻlgan ma'lumotlar banklarining 75 foizi AQShda jamlangan. Yaponiyada xuddi Gʻarbiy Yevropadagi singari, bunga teng keladigan ma'lumotlar banklari tizimi mavjud boʻlmagani bois, ushbu mamlakatlar olimlari, muhandislari va tadbirkorlari hali uzoq vaqt davomida asosan Amerika manbalaridan bilim olishni davom ettiradilar. Bu esa ularning AQShga tobeligini kuchaytiradi, axborot iste'molchilarining tijorat va ishlab chiqarish strategiyasiga ta'sir etadi.

Gʻarbiy Yevropa jahon xoʻjaligida alohida oʻrin tutadi. Dunyo yalpi ichki mahsulotining 23 foizi va aholisining 7 foizi unga toʻgʻri keladi.

Mintaqaning asosiy iqtisodiy qudratini sanoati yuksak darajada rivojlangan toʻrtta katta mamlakat — GFR, Fransiya, Italiya va Buyuk Britaniya tashkil qiladi, ularda Gʻarbiy Yevropa aholisining 50 foizi va yalpi ichki mahsulotining 70 foizi jamlangan.

Jahon qishloq xoʻjaligi mahsulotlarining deyarli 20 foizi Gʻarbiy Yevropada ishlab chiqariladi. Qishloq xoʻjaligi tovarlarining yetakchi ishlab chiqaruvchilari – Fransiya (14,5 foiz), GFR (13 foiz), Italiya (10 foiz) va Buyuk Britaniya (8 foiz) hisoblanadi.

Atom energiyasi 10 ta mamlakatda ishlab chiqariladi va iste'mol qilinadi. Umuman Finlyandiya, Belgiya, Shveysariyaga uning 15–20

foizi, Shvetsiya va Fransiyaga – 75 foizidan ortig'i to'g'ri keladi.

Jahon iqtisodiyotining barcha kichik tizimlarida, binobarin, rivojlanayotgan mamlakatlarda yuz berayotgan differensiatsiya jarayonlari *«yangi industrial mamlakatlar»* nomini olgan mamlakat va hududlarning alohida guruhi ajralib chiqishiga olib keldi.

Ushbu davlatlar hozirgi vaqtda sanoati rivojlangan mamlakatlarga qaraganda iqtisodiy oʻsishining yuqoriligi hamda rivojlanayotgan mamlakatlarning asosiy guruhlariga nisbatan xoʻjalik rivojlanishining ancha yuqori darajasi bilan ajralib turadilar.

Yangi industrial mamlakatlarga quyidagi mamlakat va hududlar kiradi: Janubiy Koreya, Tayvan, Gonkong (Syangan), Singapur, Malayziya, Tailand, Argentina, Braziliya, Meksika.

Sharqiy va Janubi-sharqiy Osiyodagi quyidagi mamlakatlar eng jadal rivojlanmoqda: Yaponiya, Janubiy Koreya, Singapur, Tayvan, Malayziya, Tailand va Filippin, shuningdek Indoneziya. Aynan shu submintaqada ulkan Osiyo «texnologik makoni» shakllanmoqda.

Osiyo yangi industrial mamlakatlari iqtisodiy rivojlanishining strategiyalari avvalo eksportga yoʻnaltirilgan tayyor mahsulot ishlab chiqarishga asoslangan. Shu bois, bu mamlakatlar poyafzal, kiyimkechak, toʻqimachilik mahsulotlari, maishiy elektron apparatura, shaxsiy kompyuterlar, yengil avtomobillar hamda yuksak texnologiyalarga asoslangan boshqa turdagi mahsulotlarni jahon bozoriga yetkazib beruvchilarga aylandilar.

Lotin Amerikasida (Chili va Meksika bundan mustasno) ishlab chiqarishni modernizatsiya qilish jarayonlari sekin kechmoqda (Argentina, Braziliyada) yoki umuman modernizatsiya qilinmayapti. Bu esa eksportga chiqarilayotgan tovarlarning yetarlicha raqobatbardosh boʻlmasligiga olib kelmoqda. Iqtisodiyotdagi islohotlar koʻpincha ijtimoiy sohadan ajralgan holda, islohotlarga tizimli yondashmagan holda amalga oshirilmoqda.

Afrika geosiyosiy, iqtisodiy va sivilizatsiyaviy jihatdan oʻzaro ancha farq qiluvchi ikki submintaqadan iborat. Bular: Sahroi Kabirdan janubda joylashgan hudud hamda tipologik jihatdan Yaqin Sharqqa oʻxshash boʻlgan Shimoliy Afrika. Mintaqada sayyoramizning aksariyat eng kambagʻal davlatlari joylashgan (mintaqaning 52 ta mamlakatidan 32 tasi «dunyoning eng kam rivojlangan mamlakatlari» guruhiga kiradi), ularning ahvoli nihoyatda ogʻirligicha qolmoqda. Afrika oxirgi oʻn yillar ichida boyimayotgan, balki kambagʻallashayotgan qit'aga aylandi.

Afrika mamlakatlari iqtisodiy oʻsishining xarakteri va sur'atlari bir qator tiyib turuvchi omillar ta'sirida qolmoqda. Ular orasida davlat sektoridagi ortiqcha xarajatlarning salbiy ta'siri hamda rivojlanmagan iqtisodiy infratuzilma bilan bir qatorda, ichki siyosiy beqarorlik, davlatlararo nizolar, tashqaridan keladigan moliyaviy resurslar oqimining kamayishi, savdo sharoitlarining yomonlashuvi, xalqaro bozorlardan foydalanishning qiyinlashuvi kabilarni sanab oʻtish mumkin.

Afrika mamlakatlari hali iqtisodiy rivojlanishning turli modellarini sinab koʻrish bosqichidadir. Ushbu modellar mulkni davlat tasarrufidan chiqarish, xoʻjalik faoliyatini liberallashtirish va moliyaviy sohani barqarorlashtirishga asoslangan. Bunda ular sezilarliroq natijalarga faqat xususiylashtirishning miqdor koʻrsatkichlarida erishdilar. Bu, aslida, faqat mulkchilik shakli oʻzgarganligini anglatadi va iqtisodiyotda sifat oʻzgarishlariga olib kelishi aniq emas.

Afrika mamlakatlari Gʻarb tajribasi bilan cheklanib qolmasdan, Osiyoning yangi industrial mamlakatlari tajribasiga ham murojaat etmoqdalar. Mazkur yangi industrial mamlakatlarda hukumat tuzilmalari hamda fan-texnika taraqqiyotining toʻgʻri tanlangan mezonlari iqtisodiy rivojlantirishni tezlashtirishda hal qiluvchi rol oʻynadi.

Afrika mamlakatlari xorijga olib chiqayotgan xomashyo narxlarining keskin oʻzgarib turishi noaniqlik va jahon xomashyo iste'molchilariga borgan sari koʻproq bogʻliqlik vaziyatini yuzaga keltirmoqda. Bu esa, oʻz navbatida, iqtisodiyotni beqarorlashtirmoqda.

«Osiyo yoʻlbarslari» deb nomlanuvchi davlatlar xomashyoni qayta ishlovchi sanoatning rivojlanishi bugungi jadal sur'atlar bilan kechsa, tez orada ular oʻz tabiiy resurslarini tugatishi mumkin degan fikrni bildirmoqdalar. Ularning Afrika boyliklariga qiziqishlari mintaqaga investitsiyalarning koʻplab kiritilishiga hamda eksportning keskin koʻpaytirilishiga olib kelishi mumkin. Buning natijasida Osiyo kapitallari Afrika qit'asining iqtisodiy rivojlanishida yangi davr ochishga da'vo qiladi.

2. Integratsiyaning barqarorlik va xavfsizlik kafolati ekanligi

Tashqi siyosiy va tashqi iqtisodiy aloqalarni shakllantirishda Oʻzbekiston oʻz mustaqilligining dastlabki yillaridayoq ishlab chiqilgan quyidagi asosiy tamoyillarga amal qilmoqda:

birinchidan, oʻzaro manfaatlarni har tomonlama hisobga olgan holda davlat milliy manfaatlarining ustunligi;

ikkinchidan, teng huquqlilik va oʻzaro manfaatdorlik, boshqa davlatlarning ichki ishlariga aralashmaslik;

uchinchidan, mafkuraviy qarashlardan qat'i nazar, hamkorlik uchun ochiqlik, umuminsoniy qadriyatlarga, tinchlik va xavfsizlikni saqlashga sodiqlik;

to 'rtinchidan, xalqaro huquq normalarining davlat ichki normalaridan ustuvorligi;

beshinchidan, tashqi aloqalarni ikki tomonlama, ham koʻp tomonlama kelishuvlar asosida rivojlantirish.

Biz tashqi aloqalarni xalqaro munosabatlarning turli yoʻnalishlari bo'yicha muvaffaqiyatli rivojlantirishni xavfsizlik va barqarorlikning kafolati deb bilamiz. Oʻzbekiston dunyo uchun ochiq. Biz ham dunyoning Oʻzbekistonga juda katta qiziqish bilan qarayotganligini his etmoqdamiz. Bu esa O'zbekistonning barqaror rivojlanishi uchun eng yaxshi kafolatdir. Buni biz O'zbekiston kapital sarflash nuqtai nazaridan ham, dunyo miqyosidagi keng qamrovli xavfsizlikning tarkibiy qismi sifatida mintagada bargarorlikni ta'minlash nugtai nazaridan ham borgan sari sazovor bo'lib borayotganligining dalili deb bilamiz¹. Shuningdek, davlatimiz rahbarining integratsiyaning beqiyos ahamiyati to'g'risidagi quyidagi fikrlarini keltirishni o'rinli deb bildik: «XXI asr, shubhasiz, xalqaro munosabatlarda butun dunyo qamrab olinadigan asr bo'ladi. Bunday sharoitda integratsiya jarayonini, xalqaro institutlar va tashkilotlarda suveren davlatlarning ishtirok etishini kengaytirish jarayonini faqat tarix taqozosi deb emas, balki ayrim mintaqalar koʻlamida ham, shuningdek, umuman – butun sayyoramiz koʻlamida ham sobitqadamlik, barqarorlikning qudratli omili deb hisoblamoq zarur.

Integratsiya haqida gapirar ekanmiz, manfaatlar birikuvining xilma-xil mexanizmlari va shakllari hamda integratsiya turlari mavjudligiga asoslanamiz. Bunga sherikchilik va hamkorlik qilishga intilayotgan mamlakatlarning boshlangʻich shart-sharoitlari turlichaligi sababdir. Oʻzbekiston bir vaqtning oʻzida turli darajalarda — dunyo miqyosida va mintaqa koʻlamida — integratsiya jarayonlarida qatnashsa-da, ammo bir muhim qoidaga: bir davlat bilan yaqinlashish hisobiga boshqasidan

¹ Qarang: *Каримов И. А.* Ўзбекистон XXI аср бўсағасида: хавфсизликка тахдид, барқарорлик шартлари ва тараққиёт кафолатлари. – Т.: «Ўзбекистон», 1997. – Б. 296–297.

uzoqlashmaslikka amal qiladi. Biz bir subyekt bilan sherikchilikning mustahkamlanishi boshqalar bilan sherikchilik munosabatlarining zaiflashuviga olib kelishiga qarshimiz. Shu sababli Oʻzbekistonning jahon hamjamiyatidagi integratsiyalashuvi serqirra jarayondir»¹.

3. Oʻzbekiston milliy iqtisodiyoti – jahon xoʻjaligining tarkibiy qismi ekanligi. Eksport va import

Ma'lumki, xalqaro savdo-sotiq eksport va import shaklda amalga oshiriladi.

Eksport – tovarning xorijga chiqarilishini nazarda tutuvchi sotish.

Import – tovarning xorijdan olib kirilishini nazarda tutuvchi xarid.

Savdo aylanmasi – eksport va import hajmining qiymatda ifodalanadigan hajmlar summasi.

Eksport o'lchami tovarga bo'lgan ortiqcha taklif bilan, import hajmi esa tovarlarga bo'lgan ortiqcha talab miqdori bilan belgilanadi.

Eksport va importning nisbati tashqi savdo balansi hisoblanadi, u aktiv va passiv holda boʻladi.

Eksport importdan koʻp boʻlganda, tashqi savdo balansi aktiv, import eksportdan koʻp boʻlganda, u passiv boʻladi. Aktiv balans tashqariga tovarlar koʻp sotilishini, passiv balans esa ular tashqaridan koʻproq xarid etilishini anglatadi.

Iqtisodiyotning eksport salohiyati ikki omilga bogʻliq boʻladi:

- 1) ishlab chiqarishning rivojlanganlik darajasi;
- 2) ishlab chiqarishning xalqaro mehnat taqsimotidagi ishtiroki va ixtisoslashuv darajasi.

Eksport va import narxining nisbatiga bir qator omillar ta'sir etadi:

- 1) muayyan tovarlarga tashqi bozordagi talab va shu tovarlarning taklif etilishi;
- 2) tovarlarga mamlakat ichkarisidagi va tashqarisidagi narxlarning past yoki balandligi;
 - 3) tovarlarning tashqi bozorlarga yetkazish xarajatlari;
 - 4) milliy valuta kursidagi oʻzgarishlari;
 - 5) davlatning tashqi savdoga oid siyosatining qandayligi.

Ochiq iqtisodiyot rivojlanishi bilan xalqaro savdo-sotiqdagi tovarlar tarkibi oʻzgarib turadi. Agar XIX asrning ikkinchi yarmidagi xalqaro savdo-sotiqda xomashyo, oziq-ovqat va yengil sanoat mahsulotlari

¹ O'sha manba. – B. 298–299.

ayirboshlangan boʻlsa, XXI asrning boshiga kelib ilmiy texnikaviy yangiliklar, texnologik murakkab mahsulotlar, shuningdek axborot texnologiyalari va axborotning oʻzi sotila boshlandi.

Oʻzbekistonning jahon bozorida oʻziga xos nufuzini ta'minlashda xalqaro mehnat taqsimoti va ixtisoslashuvi imkoniyatlaridan samarali foydalanishi, eksportga yoʻnaltirilgan ishlab chiqarishni barpo etish va chuqur qayta ishlangan sanoat mahsulotlari eksportini mustahkamlash muhim ahamiyat kasb etadi. Shu bois, Prezident Islom Karimov: «Mamlakatning jahon xoʻjaligi aloqalarida, xalqaro mehnat taqsimotida keng miqyosda ishtirok etishi ochiq turdagi iqtisodiyotni barpo etishning asosidir. Biz iqtisodiy islohotlarni chuqurlashtirish, ijtimoiy yoʻnaltirilgan bozor iqtisodiyotini shakllantirish tadbirlarini izchillik bilan amalga oshirmoqdamiz. Bunda bozor iqtisodiyoti — erkin iqtisodiyot ekanligi, u ochiq tusda boʻlib, yakkalanish va biqiqlik unga yot ekanligidan iborat haqiqatga asoslanib ish tutmoqdamiz. Shu bois iqtisodiyotimizning kelajagi uning jahon xoʻjaligiga qoʻshilishiga bogʻliqdir»¹, — deb tashqi bozorning ahamiyatini ta'kidlab oʻtgan.

Oʻzbekistonda barqaror iqtisodiy oʻsish sur'atlarini ta'minlashga uning jahon xoʻjaligi bilan aloqalarining rivojlanib borayotganligi, eksport salohiyati kengayayotganligi va shu maqsadlar koʻzda tutilib belgilanayotgan aniq chora-tadbirlar asos boʻlmoqda.

Respublikamizda iqtisodiy islohotlarni chuqurlashtirish va tashqi iqtisodiy aloqalarni erkinlashtirish mamlakatning XXI asrda rivojlanish strategiyasining ustuvor yoʻnalishlaridan biri hisoblanadi. Chunki milliy iqtisodiyot ochiqlik darajasining kengayishi ishlab chiqarish samaradorligining ortishiga va erkin raqobatning kuchayishiga, ichki imkoniyatlar hisobiga eksport salohiyatini oshirishga imkoniyat yaratadi.

Eksport salohiyatini oshirish barqaror valuta tushumlarini ta'minlashga va jahon bozorida munosib o'rin egallashga olib keladi. Shuning uchun respublika eksport salohiyatini oshirishda ichki ijtimoiy-iqtisodiy imkoniyatlardan va nisbiy afzallikka ega bo'lgan sohalar mahsulotlaridan unumli foydalanilmoqda.

Ayni paytda aholi daromadlarining ahamiyatli darajada ortib borishi milliy iqtisodiyotning barqaror sur'atlarda rivojlanishi bilan birga tashqi savdo va eksport faoliyatining samaradorligini ham talab etadi.

¹ Каримов И. А. Ўзбекистон буюк келажак сари. – Т.: «Ўзбекистон», 1999. – Б. 267.

Mamlakatimiz iqtisodiyotini tubdan tarkibiy oʻzgartirish va eksport tuzilishini diversifikatsiya qilish orqali tashqi bozorlarga chiqarilayotgan tovarlar va xizmatlar nomenklaturasini kengaytirish samaradorlikni oshirishga olib keladi. Chunki xorijiy mamlakatlarga sotilayotgan mahsulotlar tarkibida alohida tovarlar yoki xizmatlar turlarining, xususan, tabiiy resurs va xomashyolar salmogʻining ortib ketishi, agar jahon bozorida bu mahsulotlarning narxi pasayib ketsa yoki ularga tashqi talab kamayadigan boʻlsa, mazkur vaziyatlarda eksportchi mamlakatlar ogʻir va tang holatlarga duch kelishi mumkin. Milliy eksport hajmining qisqarishi va savdo shartlarining yomonlashuvi valuta tushumlarining kamayishiga, tashqi savdo balansining beqarorlashuviga va eksportchi korxonalar moliyaviy ahvolining tanglashishiga olib keladi.

Shuningdek, mamlakatning umumiy eksporti yoki importida kam sonli davlatlar ulushining kattaligi, u mamlakat tashqi savdosining ana shu sanoqli mamlakatlar iqtisodiyotidagi oʻzgarishlarga bogʻliq boʻlib qoladi. Shu bois tashqi savdo tarkibini diversifikatsiya qilishdan tashqari, uning mamlakatlar geografiyasini ham kengaytirish va xilma-xillashtirish zarur. Bu esa koʻzda tutilgan natijalarni qoʻlga kiritishga, milliy xoʻjalikning tashqi bozordagi salbiy oʻzgarishlariga ta'sirchanligini pasaytiradi.

Oʻzbekistonda tashqi savdo tarkibini diversifikatsiya qilish va mamlakatlar geografiyasini takomillashtirish maqsadida olib borilgan chora-tadbirlar oʻzining samarali natijasini bermoqda. Respublikamizning tashqi savdosi va eksporti hajmi barqaror sur'atlarda oʻsib, tarkibi izchil takomillashib bormoqda.

Bunday yutuqlarga erishishda asos boʻlgan omillar haqida Prezident Islom Karimov: «Bizning keyingi yillarda eksport sohasida qoʻlga kiritgan yutuqlarimiz, avvalo, mamlakatimiz iqtisodiyotini tubdan tarkibiy oʻzgartirish va diversifikatsiya qilish, qisqa muddatda biz uchun mutlaqo yangi, lokomotiv rolini bajaradigan tarmoqlarni barpo etish, ishlab chiqarishni modernizatsiya qilish, texnik va texnologik yangilash dasturlarini amalga oshirish, zamonaviy bozor infratuzilmasini shakllantirish borasida oʻz vaqtida boshlangan, chuqur oʻylangan va uzoq istiqbolga moʻljallangan ishlarimizning natijasidir»¹, – deb ta'kidlagan.

Mamlakatlarning texnologik jihatdan chuqur qayta ishlangan va tayyor raqobatdosh tovarlar eksportini jadallashtirish va bu mahsulotlar

¹ *Каримов И. А.* Жахон молиявий-иктисодий инкирози, Ўзбекистон шароитида уни бартараф этишнинг йўллари ва чоралари. – Т.: «Ўзбекистон», 2009. – Б. 54–55.

yetkazib berilayotgan mamlakatlar geografiyasini izchil ravishda kengaytirib borish uning tashqi savdo va eksport hajmini barqaror rivojlantirishga, jahon bozoridagi salbiy oʻzgarishlar ta'siri va xavf-xatarlardan himoyalashga sharoit yaratadi. Qolaversa, tashqi bozorlarga taklif qilinayotgan tovarlar tarkibini diversifikatsiyalash, ularni xarid qiluvchi davlatlar geografiyasini kengaytirish, bu mamlakatlardan biri yoki bir nechtasining iqtisodiyotida sodir boʻlgan muammolar tufayli eksport hajmi keskin kamayib ketishining oldini olish imkoniyatini ta'minlaydi.

Mamlakatimizda uzoq yillardan beri tashqi savdoni, xususan, eksportni rivojlantirish va eksport qiluvchi korxonalarni izchil qoʻllab-quvvatlash borasida amalga oshirilgan chora-tadbirlar milliy iqtisodiyotimizning eksport salohiyatini yuksaltirishga, tashqi savdo tarkibini chuqurlashtirishga va uning hajmini barqaror sur'atlarda oʻstirishga asos boʻlmoqda.

Mamlakatimiz iqtisodiyotini barqaror va mutanosib rivojlantirish, samarali ishlab chiqarish tarkibiy tuzilmasini shakllantirish va izchil iqtisodiy oʻsish sur'atlariga erishish aholi farovonligini oshirishning va taraqqiyotni ta'minlashning muhim asosi hisoblanadi.

Prezident Islom Karimov Oʻzbekiston iqtisodiyotining jahon iqtisodiyotiga integratsiyalashuvi borasida quyidagi vazifalarni belgiladi: «Jahon iqtisodiyotida vujudga kelayotgan tendensiyalardan, shuningdek, mamlakatimizni kelajakda iqtisodiy va ijtimoiy rivojlantirish strategiyasidan kelib chiqqan holda, 2012-yilda va undan keyingi yillarda quyidagi ustuvor vazifalarning amalga oshirilishi muhim ahamiyat kasb etadi.

Birinchi darajali e'tibor mamlakatimiz iqtisodiyotining raqobatdoshligini oshirish bo'yicha dastur tayyorlash va uni amalga oshirishga qaratilishi zarur.

Bu maqsadning dolzarbligi va ahamiyati avvalo shu bilan belgilanadiki, biz oʻrta muddatli istiqbolda iqtisodiyotimizni rivojlangan demokratik davlatlar darajasiga olib chiqishni hozirgi bosqichdagi bosh strategik vazifa sifatida oʻz oldimizga qoʻyganmiz.

Oʻz-oʻzidan ayonki, raqobatdosh iqtisodiyotni shakllantirmasdan, pirovard natijada esa raqobatdosh mamlakatni barpo etmasdan turib, biz qabul qilgan «Mamlakatimizda demokratik islohotlarni chuqurlashtirish va fuqarolik jamiyatini rivojlantirish konsepsiyasi»da koʻzda tutilgan maqsadli vazifalarni amalga oshirmasdan turib, bu haqda jiddiy soʻz yuritish mumkin emas.

Bu vazifaning oʻrtaga qoʻyilishi, shuningdek, inqiroz jarayonlarining chuqurlashuvi, dunyo miqyosida xarid talabining pasayishi va shunga muvofiq tarzda jahon bozorida xomashyo, materiallar, ayniqsa, tayyor mahsulotlar boʻyicha raqobatning yildan-yilga kuchayib borayotgani bilan ham bogʻliq, albatta. Bugungi kunda koʻplab rivojlangan va jahon iqtisodiyotida yetakchi oʻrin tutadigan mamlakatlar tajribasi shuni soʻzsiz isbotlab bermoqdaki, raqobatdoshlikka erishish va dunyo bozorlariga chiqish, birinchi navbatda iqtisodiyotni izchil isloh etish, tarkibiy jihatdan oʻzgartirish va diversifikatsiya qilishni chuqurlashtirish, yuqori texnologiyalarga asoslangan yangi korxona va ishlab chiqarish tarmoqlarining jadal rivojlanishini ta'minlash, faoliyat koʻrsatayotgan quvvatlarni modernizatsiya qilish va texnik yangilash jarayonlarini tezlashtirish hisobidan amalga oshirilishi mumkin.

Ishlab chiqarish hajmini kengaytirish va raqobatdosh mahsulotlarning yangi turlarini oʻzlashtirish boʻyicha qabul qilingan birinchi navbatdagi choratadbirlar dasturiga muvofiq, 2012–2016-yillarda hisob-kitoblar boʻyicha qiymati 6 milliard 200 million dollar boʻlgan 270 dan ziyod investitsiya loyihasini, shuningdek, ishlab chiqarishni modernizatsiya qilish, texnik va texnologik qayta jihozlash boʻyicha tarmoq dasturlarini amalga oshirish koʻzda tutilmoqda»¹. Oʻzbekistonning tashqi savdo aylanmasi mustaqillik yillarida takomillashdi. Uni quyidagi jadvallarda koʻrish mumkin.

1-jadval

Oʻzbekiston tashqi savdo aylanmasining rivojlanish dinamikasi (mln. AQSh doll.) *

Yillar	Jami tashqi savdo	Shu jumladan				
	aylanmasi	Eksport hajmi	Import hajmi			
2000	6212,1	3264,7	2947,4			
2003	6689,2	3725,0	2964,2			
2004	8669,0	4853,0	3816,0			
2005	9500,1	5408,8	4091,3			
2006	10785,7	6389,8	4395,9			
2007	15719,6	8991,5	6728,1			
2008	21197,3	11493,3	9704,0			

 $^{^1}$ *Каримов И. А.* 2012 йил Ватанимиз тараққиётини янги босқичга кўтарадиган йил бўлади. – Т.: «Ўзбекистон», 2012. – Б. 19–21.

2009	21209,6	11771,3	9438,3
2010	21844,2	13044,5	8799,7
2011	25537,1	15027,2	10509,9

* Oʻzbekiston Respublikasi Davlat statistika qoʻmitasining tegishli yillar boʻyicha statistik toʻplamlari asosida tuzilgan.

Milliy iqtisodiyotning raqobatdoshlik salohiyati uning tabiiy resurs imkoniyatiga, ishchi kuchining miqdori va sifatiga, ishlab chiqarishning zamonaviy asosda texnologik jihatdan modernizatsiya qilinishiga, iqtisodiyot tarkibiy tuzilishining takomillashuv darajasiga, davlatning iqtisodiy rivojlanish va islohotlar strategiyasiga tayanadi.

Mamlakatimizda ishlab chiqaruvchilarni ichki va tashqi bozorlarda raqobatdoshligini oshirish, eksportni diversifikatsiya qilish va uning tarkibiy tuzilishini takomillashtirish borasidagi XIX asrning birinchi oʻn yilligida amalga oshirilgan chora-tadbirlar tufayli eksportimizning tovar tarkibida muttasil ijobiy siljish jarayoni roʻy bermoqda. Xususan, eksport hajmida qayta ishlangan va ilmtalab tovarlarning salmogʻi jadal sur'atlarda ortib borayotgan bir davrda, paxta tolasining eksportdagi ulushi izchillik bilan qisqarish tendensiyasiga ega. Jumladan, umumiy eksportda paxta tolasining salmogʻi 2000-yilda 27,5 foizni tashkil etgan boʻlsa, 2009-yilda esa atigi 8,6 foizga tengligi yoki 3,2 barobarga pasayganligi kuzatilmoqda.

2-jadval

Oʻzbekiston eksporti tarkibining takomillashuv tendensiyasi (foizda)

Yillar	Paxta tolasi	Oziq-ovqat mahsulotlari	Kimyo mahsulotla- ri va plastmassa buyumlar	Energetika va yoqilgʻi mahsulotlari	Rangli va qora metallar	Mashina va uskunalar	Xizmatlar	Boshqa tovarlar
1995	48,4	4,7	2,5	11,7	4,7	2,0	7,7	18,3
2000	27,5	5,4	2,9	10,3	6,6	3,4	13,7	30,2

2001	22	3,9	2,7	10,2	7,0	3,9	14,9	35,7
2002	22,4	3,5	3,0	8D	6,4	3,9	15,9	36,8
2003	19,8	2,7	3,1	9,8	6,4	5,4	14,4	37,9
2004	18,1	3,8	4,7	12,4	8,6	7,9	11,8	33,2
2005	19,1	3,8	5,3	11,5	9,2	8,4	12,2	30,5
2006	17,2	7,9	5,6	13,4	12,9	10,1	12,1	21,1
2007	12,5	8,5	6,8	20,2	11,5	10,4	10,7	19,4
2008	9,2	4,4	5,6	25,2	7,0	7,5	10,4	30,7
2009	8,6	6,0	5,0	34,2	5,0	2,9	8,8	29,5
2010	11,3	9,7	5,1	24,8	6,8	5,5	9,1	27,7
2011								

Oʻzbekiston Respublikasi Davlat statistika qoʻmitasining tegishli yillar boʻyicha statistik toʻplamlari asosida tuzilgan.

Mamlakatimiz iqtisodiyotini barqaror va mutanosib rivojlantirish, samarali ishlab chiqarish tarkibiy tuzilmasini shakllantirish va izchil iqtisodiy oʻsish sur'atlariga erishish aholi farovonligini oshirishning va taraqqiyotni ta'minlashning muhim asosi hisoblanadi.

Bu maqsadga erishish uchun esa barqaror importni ta'minlash va uni milliy iqtisodiyotimizning shart-sharoitlaridan kelib chiqib muvofiqlashtirish talab etiladi. Respublikamizda olib borilgan iqtisodiy islohotlar natijasida import tarkibi mustaqillik yillarida chuqur takomillashib bordi.

Mamlakatni modernizatsiya qilish, texnik va texnologik jihatdan qayta qurollantirish chora-tadbirlarining keng koʻlamda amalga oshirilishi natijasida umumiy import hajmida mashina va uskunalar salmogʻining jadal sur'atlar bilan oʻsishiga asos boʻldi.

Bugungi kunda respublikamizning tashqi savdosi va mintaqa bozorlariga kirib borishi barqaror rivojlanish bilan birga geografik jihatdan ham jadal kengayib bormoqda va unda shiddat bilan rivojlanib borayotgan Osiyo qit'asi mamlakatlari bozorlarining ulushi sezilarli darajadagi salmoqqa ega boʻlayotir. Shuning uchun davlatimiz rahbari: «Ta'kidlash kerakki, tashqi savdo munosabatlarimiz geografiyasi, avvalo, rivojlanib borayotgan Osiyo qit'asi

bozorlari bilan savdo aylanmasining oʻsishi hisobiga sifat jihatidan oʻzgarmoqda»¹, – deb ta'kidlagan.

Bu mamlakatimiz tashqi savdo aloqalarining jahon iqtisodiyoti va savdosidagi rivojlanishi bilan mutanosib ravishda faollashib borayotganidan dalolat beradi. Hozirgi kunda Osiyo qit'asidagi davlatlarning jahon ishlab chiqarishi va tashqi savdosidagi oʻrni sezilarli darajada rivojlanib borayotganligi amalda koʻrinyapti. Respublikamiz tashqi savdo aloqalarining geografik tarkibi an'anaviy tasnifga asosan MDH va uzoq xorij mamlakatlaridan iborat.

Oʻzbekistonning MDH davlatlari bilan tashqi savdo aylanmasi 2009-yilda 2000-yilga nisbatan 3,7 martaga, shu davr ichida eksport hajmi 3,4 baravarga va import hajmi 4,0 baravarga ortgan. Oʻzbekistonning MDH mamlakatlari bilan tashqi savdo aloqalari barqaror rivojlanib bormoqda va bu yerda eksportda ham, importda ham asosiy ulush Rossiya, Ukraina va Qozogʻiston davlatlari hissasiga toʻgʻri kelmoqda. Keltirilgan jadvalda Oʻzbekiston eksportida MDH va uzoq xorij mamlakatlarining salmogʻi aks etgan.

3-jadval
Oʻzbekiston importi tarkibining takomillashuv
tendensiyasi (foizda)

Yillar	Oziq-ovqat mahsulotlari	Kimyo mahsulot- lari va plastmassa buyumlar	Energetika va yoqilgʻi mahsulotlari	Rangli va qora metallar	Mashina va uskunalar	Xizmatlar	Boshqa tovarlar
1995	18,2	9,3	1,9	5,7	47,9	5,0	12,0
2000	12,3	13,6	3,8	8,6	35,4	8,5	17,8
2001	10,8	12,7	1,9	10,9	41,2	10,3	12,2
2002	12,5	15,1	1,3	8	41,4	10,6	11,1

 $^{^{1}}$ *Каримов И. А.* Жахон молиявий-иқтисодий инқирози, Ўзбекистон шароитида уни бартараф этишнинг йўллари ва чоралари. — Т.: «Ўзбекистон», 2009. — Б. 17.

698

_

2003	9,9	12,8	2,7	7,9	44,4	10,2	12,1
2004	6,8	12,5	2,1	10,3	46,0	11,1	11,2
2005	7,0	13,6	2,5	10,3	43,3	10,4	12,9
2006	8,1	15,0	4,3	10,4	40,3	9,1	12,8
2007	7,2	13,1	3,5	7,5	49,6	5,8	13,3
2008	8,1	13	2,1	6,8	53,3	5,7	11
2009	9	11,1	3,5	6,3	56,5	4,4	9,2
2010	10,9	14,3	6,0	8,4	44,1	4,7	11,6

Mamlakatimiz eksportida uzoq xorij davlatlarining ulushi ham barqaror sur'atlarda o'sib, mamlakatlar geografiyasi tobora kengaymoqda. Eksportimizda uzoq xorij davlatlaridan Xitoy, Shveysariya, Turkiya, Eron, Germaniya, AQSh kabi jahondagi yetakchi mamlakatlar salmoqli ulushga ega bo'lib, bu mamlakatlar bilan eksportimizning diversifikatsiyalashuv darajasi ham yuqori saviyada shakllanib boryapti.

Respublikamizda eksport va importning tovar hamda geografik tarkibini takomillashtirish asosida mahsulotlarimizning raqobatdoshligini oshirish va kuchaytirish maqsadida qator vazifalarning amalga oshirilishi koʻzda tutilayotir.

xomashyolarning salmog'i qisqartirilib, zamonaviy Eksportda texnologiya asosida qayta ishlanib qo'shilgan qiymat darajasi yuqori bo'lgan tayyor mahsulotlar nisbatini oshirish, tashqi savdoga xizmat faoliyatini ko'rsatuvchi infratuzilmalar takomillashtirish, iqtisodiyotning tarmoq tuzilishini tarkibiy jihatdan takomillashtirish, tashqi bozorlarga taklif qilinayotgan mahsulotlar tannarxini pasaytirish orqali ularning raqobatdoshligini kuchaytirish, ishlab chiqarishni yangi texnika va texnologiyalar asosida qayta qurollantirish yoʻli bilan mehnat unumdorligini oshirish va tayyorlanayotgan mahsulotlar sifatini jahon talablariga moslashtirish, yangi turdagi tovar va xizmatlarni xalqaro bozorlarga olib chiqishni ta'minlash ustuvor va muhim yo'nalish hisoblanadi.

4-jadval

O'zbekiston eksportining mintaqalararo taqsimlanishi

Yillar	Jami eksport	Mintaqalarning salmogʻi,
	mln. AQSh	foizda

	dollari	Mustaqil Davlatlar Hamdoʻstligi	Uzoq xorij mamlakatlari
2000	3264,7	36,0	64,0
2001	3170,4	35,0	65,0
2002	2988,4	28,0	72,0
2003	3725,0	26,0	74,0
2004	4853,0	31,0	69,0
2005	5408,8	32,0	68,0
2006	6389,8	42,0	58,0
2007	8991,5	47,5	52,5
2008	11493,3	35,0	65,0
2009	11771,3	34,0	66,0
2010	13044,5	45,0	55,0
2011			

Mamlakatimizda ishlab chiqarilayotgan mahsulotlarga nisbatan jahon bozorlaridagi talablarni aniqlashtirish, shundan soʻng bunday bozorlarga kengroq kirib borish va raqobatlashish strategiyasini ishlab chiqish eksportga chiqarilayotgan tovarlar turini va tashqi bozorlar geografiyasini kengaytirishga samarali ta'sir ko'rsatadi. Xorijiy davlatlar bozorlarida milliy kompaniyalarimiz mahsulotlarining raqobatdoshligiga erishish uchun eksportga tovar taklif qilayotgan korxonalarga mahsulotlar ishlab chiqarish va realizatsiya qilish xarajatlarini kamaytirishga, ularga jahon bozori konyunkturasidagi oʻzgarishlar va istiqbolli bozorlar, shuningdek, raqobatchilar haqida qilingan tadqiqotlar asosida axborotlar berish, tashqi savdo jarayonida ishtirok etayotgan transport-kommunikatsiya tizimlarini takomillashtirish va yangi transport yoʻlaklarini ochish orqali transport sarf-xarajatlarini kamaytirishga koʻmaklashish maqsadga bo'ladi. Bu borada amalga oshirilayotgan chora-tadbirlarda tayyor mahsulotlarni yangi tashqi bozorlarga chiqarish, eksport hajmini keskin eksportga chiqarilayotgan vuklarni tashish oshirish, tizimini takomillashtirish, infratuzilmasini tashqi bozorlarga taklif tovar qilayotgan milliy kompaniyalarning marketing tadqiqotlari, moliyaviy va tashkiliy-huquqiy jihatdan izchil qo'llab-quvvatlash muhim ahamiyat kasb etadi. Qisqa qilib aytganda, mamlakatimizning eksport salohiyatini oshirish va tarkibiy tuzilishini takomillashtirish, umuman milliy tashqi savdo aylanmasining diversifikatsiya qilinishi iqtisodiyotimiz tarkibida sifat o'zgarishlarining qo'lga kiritilishi, ishlab chiqaruvchilarning jahon bozorida raqobatbardoshligining mustahkamlanishi asosida iqtisodiy yuksalish va aholi turmush farovonligini yanada oshirish maqsadlariga xizmat qiladi.

Respublikamizning tashqi savdo aylanmasi va uning tarkibiy tuzilishi bozor munosabatlari rivojlanishi bilan chuqurlashib borayotir. Ayniqsa, soʻnggi yillarda eksport tarkibida bir tomondan raqobatbardosh va chuqur qayta ishlangan tayyor mahsulot salmogʻi barqaror oʻsib borayotgan boʻlsa, ikkinchi tomondan esa xomashyo hisoblangan mahsulotlarning ulushi izchil ravishda kamayish tendensiyasiga egaligi yaqqol koʻzga tashlanmoqda. Mustaqillikning dastlabki yillarida eksportda paxta tolasining salmogʻi qariyb 50 foizni tashkil etgan boʻlsa, hozirgi kunda 6 baravarga kamayib, 8 foizni tashkil etmoqda. Bunday natijalarga milliy tashqi savdomiz geografik yoʻnalishining kengayishi va birinchi galda barqaror rivojlanib borayotgan Osiyo qit'asi mamlakatlari bozorlari bilan savdo aloqalarimizning izchil oʻsishi asos boʻlmoqda.

Mazkur tendensiya milliy eksport tarkibida yuqori qoʻshimcha qiymatga ega boʻlgan va chuqur qayta ishlangan raqobatdosh tayyor mahsulot hajmining barqaror oshayotganligini, iqtisodiyotimizning izchil rivojlanib borayotgan salohiyati va imkoniyatlarini isbotlaydi. Jahonda oʻta murakkab boʻlgan moliyaviy-iqtisodiy inqiroz sharoitida bunday yutuq va oʻzgarishlar alohida ahamiyatga ega.

Mamlakatimiz eksport salohiyatini mustahkamlash borasida amalga oshirilgan tadbirlar mahsulot eksport qiladigan korxonalarni qo'llabquvvatlash va ragʻbatlantirish jarayonlari ham muhim ahamiyat kasb etadi. Eksportga mahsulot chiqaradigan korxonalarga aylanma mablag'larini to'ldirish uchun Markaziy bank qayta moliyalash stavkasining 70 foizidan ortiq bo'lmagan stavkalarda 12 oygacha bo'lgan muddatga imtiyozli kreditlar berib, mahsulot ishlab tayyor chiqarishga xorijiy investitsiya ishtirokida ixtisoslashgan va tashkil korxonalarni qoʻshimcha qiymat soligʻidan tashqari barcha turdagi soliq va to'lovlardan ozod qilish muddatini 2012-yilgacha uzaytirgan edi. Shuningdek, banklar kreditlari boʻyicha toʻlov muddati oʻtgan va joriy miqdorini qayta koʻrib chiqish, budjetga to'lanadigan qarzlar to'lovlarning penyasidan kechishdek muhim imtiyozlar va preferensiyalar kabilar yaratilgan shart-sharoitlardan darak beradi.

Bundan tashqari, eksport qiluvchi korxonalarni qoʻllab-quvvatlash va barqaror faoliyatini ta'minlash maqsadida tijorat banklari tomonidan aylanma mablagʻlarini toʻldirishi uchun katta miqdorda imtiyozli kreditlar ajratildi. Yetkazib berilgan elektr energiyasi, tabiiy gaz va kommunal xizmatlarning qarzlarini budjetga toʻlashni muayyan muddatga kechiktirilganini ta'kidlash oʻrinli. Bu qulayliklar va imtiyozlar jahon moliyaviy-iqtisodiy inqirozi sharoitida mahsulotni eksport qilish borasida roʻy bergan muvaqqat qiyinchiliklarga qaramasdan, eksport qiluvchi korxonalarda ishlab chiqarish pasayishining oldini olishga va eksportning barqaror oʻsib borishiga imkoniyat yaratdi.

Mahsulot eksport qiladigan korxonalarni qoʻllab-quvvatlash tashqi savdo balansining muttasil ijobiy saldo bilan yakunlanishiga, toʻlov balansining ishonchliligi va iqtisodiyotimiz barqarorligini mustahkamlashga olib keldi.

Ta'kidlash joizki, milliy iqtisodiyotni modernizatsiya qilish bilan birga, tashqi savdo tarkibini takomillashtirish va diversifikatsiya qilish jarayoni umuman ikki yo'nalishda amalga oshiriladi, ulardan birinchisi, eksportga chiqarilayotgan tovarlar va xizmatlar tarkibini zamonaviy mahsulotlar bilan toʻldirish va kengaytirish hisobiga, ikkinchisi esa, tashqi savdo jarayonida ishtirok etayotgan mamlakatlar tizimini va kengaytirish tarkibiy tuzilishini geografik asosida ta'minlanadi. Oʻzbekiston Respublikasi Prezidenti Islom Karimov 2011-yilning asosiy yakunlari va 2012-yilda Oʻzbekistonni ijtimoiy-iqtisodiy rivojlantirishning ustuvor yoʻnalishlariga bagʻishlangan Vazirlar Mahkamasining ma'ruzasida: «Jahondagi moliyaviy-iqtisodiy majlisidagi chuqurlashib bormoqda. Takror aytaman, Oʻzbekiston bunday salbiy voqealardan uzoq bo'la olmaydi. Nega deganda, mamlakatimiz iqtisodiyoti jahon iqtisodiyotining uzviy bir qismiga aylanib bormoqda. Bugun biz xalqaro hamjamiyatning teng huquqli a'zosi sifatida dunyo bozoriga chiqib, turli davlatlar bilan samarali hamkorlik qilayotgan ekanmiz, oʻzoʻzidan ayonki, jahondagi iqtisodiy-moliyaviy oʻzgarishlardan chetda gololmaymiz. Bu haqiqatni hech qachon esimizdan chiqarmasligimizni istardim», – deb ta'kidlaydi.

Tayanch tushunchalar:

Integratsiya, xalqaro iqtisodiy integratsiya, iqtisodiy integratsiya darajalari, tashqi savdo aylanmasi, eksport, import, tashqi iqtisodiy faoliyatni liberallashtirish, tashqi iqtisodiy siyosat tamoyillari.

Savol va topshiriqlar:

- 1. Xalqaro iqtisodiy integratsiya (XII)ning iqtisodiy asosini nima tashkil etishini tushuntirib bering.
 - 2. XIIga qanday omillar xos?
- 3. XIIning shart-sharoitlari va maqsadlari nimalardan iboratligini gapirib bering.
 - 4. XII darajalari qanday farqlanadi?
- 5. Yevrosiyo Iqtisodiy Hamjamiyati (YevrAzES) qaysi jihatlari bilan ajralib turadi, uning rivojlanishidan koʻzlangan asosiy maqsadlari qanday?
- 6. Xalqaro iqtisodiy tashkilotlarning integrasiyalashuvdagi oʻrnini tushuntiring.
 - 7. Oʻzbekistonning eksport salohiyati nimalardan iborat?
 - 8. Xalqaro iqtisodiy aloqalarning oliy shakli nima?
- 9. Integratsiya nega barqarorlik va xavfsizlikni ta'minlash kafolati hisoblanishini izohlang.
- 10. Oʻzbekiston tashqi iqtisodiy aloqalarining asosiy tamoyillarini sanab oʻting va izohlang.
- 11. Nima uchun Oʻzbekistonning xalqaro tashkilotlar faoliyatidagi ishtiroki integratsiyalashuv sharti hisoblanadi?
- 12. Iqtisodiy integratsiya nima uchun tashqi faoliyatni erkinlashtirishning omili hisoblanadi?
- 13. Mamlakatimizda mahsulot eksport qiluvchi korxonalarni qoʻllabquvvatlash va ragʻbatlantirish borasida qanday amaliy choralar belgilanganini bilasiz?
 - 14. Mamlakatimizning eksport salohiyatiga baho bering.
- 15. Mamlakatimiz toʻlov balansining ishonchliligi va iqtisodiyotimiz barqarorligini yanada mustahkamlashda eksportning roli qanday?
- 16. Respublikamizda soliq yukini engillashtirish borasida qanday ishlar amalga oshirilmoqda?

Mavzuni chuqur o'rganish instrumentariysi

Xalqaro iqtisodiy integratsiya (XII) — mamlakatlarning ishlab chiqarishni baynalminallashtirish, ya'ni xalqaro ishlab chiqarish kooperatsiyasi va xalqaro mehnat taqsimoti asosida iqtisodiy hamkorlik qilishidan iborat jarayon.

Tashqi savdo siyosati – ichki bozorni himoyalashga, tashqi savdo hajmining oʻsishini ragʻbatlantirishga, uning tuzilishini va tovar oqimlarining yoʻnalishlarini maqbullashtirishga qaratilgan tadbirlar tizimi.

Tashqi savdo siyosati erkin, bojsiz savdo darajasi hamda proteksionizm (tanish-bilishlik), ya'ni o'z bozorini importdan himoya qilish darajasi bilan ajralib turadi.

Hozirgi tashqi savdo siyosati tashqi savdo almashuvining cheklovlari susaytirilgani, uning yoʻlidagi toʻsiqlarni bartaraf etishga intilish, ya'ni savdoni liberallashtirish bilan ajralib turadi (savdoning erkinlashtirilishi Ikkinchi jahon urushi tugaganidan soʻng barcha mamlakatlarda kuzatilgan nihoyatda keskin iqtisodiy oʻsishning asosiy sabablaridan biridir).

Mamlakat iqtisodiyotining raqobatbardoshligi deganda, tovar ishlab chiqarishining bozorning sotiladigan tovar va xizmatlar yaratish talabiga javob berish imkoniyati tushuniladi.

Tovarning raqobatbardoshligi deganda, uning iste'mol va narx ko'rsatkichlarining xorijiy analoglar bilan qiyoslanishi va iste'mol talabini qondirish qobiliyati tushuniladi.

Jahon savdo tashkiloti – xalqaro savdo tizimining qonunchilik va institutsional asosi, tovar va xizmatlar bilan savdo qilish sohasidagi koʻp tomonlama kelishuv va boshqaruv, savdo nizolarini hal qilish hamda tashqi savdoning standart hujjatlarini ishlab chiqish mexanizmidir.

Jahon iqtisodiyoti asosiy sohasini, ya'ni tovar va xizmatlar savdosini Jahon savdo tashkiloti boshqaradi. U 1995-yilda Tariflar va savdo boʻyicha bosh kelishuv asosida tashkil qilingan. Mazkur kelishuv esa 1947-yilda imzolangan edi.

Jahon iqtisodiyotidagi boshqaruv mamlakatlarning u yoki bu muammoni hal qilish boʻyicha muayyan xalqaro mexanizmni yaratish, shartnomalarni buzuvchilarga nisbatan qoʻllaniladigan jazolar haqidagi qarorlarni ixtiyoriy qabul qilishlariga asoslangan JST doirasida savdo prinsiplari belgilangan boʻlib, ularga 130 dan ortiq mamlakat rozi boʻlgan.

Jahon savdo tizimining eng muhim prinsiplari quyidagilar:

- 1) kamsitishlarsiz savdo;
- 2) xalqaro savdoni erkinlashtirish, ya'ni savdodagi toʻsiqlarni bartaraf etish (tariflarni pasaytirish va hokazo);
 - 3) importni cheklash choralarini faqat JST qoidalari asosida qoʻllash;
 - 4) savdo siyosatini oldindan aytish mumkinligi;
 - 5) raqobatga koʻmaklashish;
 - 6) savdo standartlari, qoidalarini joriy etish va hujjatlarni birxillashtirish.

Xizmatlar bilan savdo qilish boʻyicha bosh kelishuv 1994-yildan boshlab xalqaro xizmatlar savdosini tartibga soluvchi asosiy xalqaro hujjat hisoblanadi. Kelishuvda belgilanishicha, xizmatlar koʻrsatish orqali amalga oshiriladigan xalqaro savdo, tovarlar savdosi kabi JST prinsiplariga mos keluvchi eng koʻp qulayliklar yaratish tartibi prinsiplariga asoslanishi kerak.

Savdo erkinligi davlatning tashqi savdoga eng kam darajada aralashishini bildiradi.

Proteksionizm – bu savdo siyosatining tarifli va tarifsiz vositalaridan foydalanish orqali ichki bozorni xorijiy raqobatdan himoya qilishga qaratilgan davlat siyosati.

Tashqi savdoni tartibga solishning *tarifli usullari* – bu tarif kvotalari va bojlarning belgilanishi (asosan import tartibga solinadi). Boshqa barcha usullar – *tarifsiz*.

Boj tarifi – tovarlarning roʻyxati va ulardan boj olishga asos boʻladigan stavkalar tizimi.

Boj – bojxona organlari tovarni import qilish yoki eksport qilish chogʻida undiradigan hamda import yoki eksportning sharti hisoblanadigan majburiy badal.

Bojlar uchta asosiy funksiyani bajaradi:

- 1) fiskal;
- 2) proteksionistik;
- 3) muvozanatlash (koʻngilsiz tovarlar eksportining oldini olish uchun).

Bojlarning quyidagi turlari farqlanadi:

1. Olish (undirish) usuli boʻyicha:

- 1) advalor bunda boj undiriladigan tovarlar bojxona qiymatiga nisbatan foizlarda hisoblanadi:
- 2) oʻziga xos bojlar boj undiriladigan tovar birligi uchun belgilangan miqdorda hisoblanadi;
- 3) aralash bojlarning advalor va oʻziga xos turlarining uygʻunlashuvi (masalan, boj qiymatining 20 foiz, ammo tonnasiga 10 dollardan ortiq emas).

Advalor bojlarning qoʻllanishi tovarning boj qiymatini subyektiv baholash bilan bogʻliq boʻlib, bu hol suiiste'molliklarga imkon qoldiradi. Oʻziga xos bojlar standartlashtirilgan tovarlardan olinadi va ustunlikka ega, chunki muammoli boshqarish uchun oddiydir. Bojlar darajasi tovarlar narxiga juda bogʻliqdir.

2. Boj olish obyekti boʻyicha:

- 1) import bojlar;
- 2) eksport bojlar;
- 3) tranzit bojlar («savdo urushi»ning vositasi sifatida foydalaniladi).

3. Xarakteriga koʻra:

- 1) mavsumiy amal qilish muddati bir oydan bir yilgacha (bunda ushbu tovarga belgilangan oddiy tariflarning amal qilishi muddati toʻxtatiladi);
- 2) aksildemping bojlar tovarlar ularni eksport qilayotgan mamlakatdagi me'yordagi bahodan ancha past narxda olib kirilayotganida, agar u bunday tovarlar ishlab chiqaruvchi mahalliy korxonalarga iqtisodiy zarar yetkazsa yoki bunday tovarlarni mamlakatda ishlab chiqarishni kengaytirishga toʻsqinlik qilinganda qoʻllaniladi;

3) kompensatsion bojlar – ishlab chiqarishda bevosita yoki bilvosita ravishda subsidiyalardan foydalanilgan tovarlarni import qilishda ularga yoʻl qoʻyiladi.

Kvota – tovar eksporti yoki importini muayyan sifat yoki muayyan vaqt oraligʻidagi summa bilan cheklashning miqdoriy chorasi.

Litsenziyalashtirish – bu davlat organlari tomonidan tashqi iqtisodiy faoliyatni amalga oshirish maqsadida tovarni muayyan muddat ichida belgilangan miqdorda eksport yoki import qilish uchun beriladigan ruxsatnoma.

Eksportni ixtiyoriy cheklash – importyorning siyosiy bosimi ostida eksport hajmini oshirmaslik yoki cheklash majburiyatiga asoslangan miqdoriy cheklov.

Mavzu yuzasidan asosiy xulosalar:

- 1. Xalqaro mehnat taqsimotining chuqurlashuvi XXI asrda turli mamlakatlar iqtisodiyotini bir-biriga bogʻliq qilib qoʻymoqda. Bir mamlakatda yetishmay qolgan resurslarning oʻrni boshqa mamlakatlardan olib kelingan resurslar bilan toʻldirilmoqda. Yirik ilmiy texnika va loyihalar birgalikda amalga oshirilmoqda.
- 2. Globallashuv sharoitida mamlakatlaro muntazam iqtisodiy aloqalar integratsion jarayonlarni faollashtirmoqda. Bugun integratsiya iqtisodiy yaqinlashuvdan boshlanib, iqtisodiy birlashuv bilan yakunlanmoqda. Buning natijasida dunyoda turli iqtisodiy ittifoqlar paydo boʻlmoqda.
- 3. Integratsiya mamlakatlar iqtisodiy chegaralarining bir-biri uchun ochilib, yagona iqtisodiy makon hosil boʻlishiga shart-sharoit yaratmoqda. Ushbu makonda iqtisodiy resurslarning cheklovlarsiz erkin harakati yuz bermoqda. Yagona umumiy bozor vujudga kelmoqda. Bojxona toʻlovlari bekor qilinmoqda yoki eng kam darajaga tushirilmoqda. Eksport va import cheklanishlarga ham olib kelmoqda. Turli davlatlarning ichki va tashqi siyosatini muvofiqlashtirmoqda. Turli milliy pullar oʻrniga yagona pul birligi kiritilmoqda.
- 4. Erkin savdo hududlari, erkin iqtisodiy hududlar, umumiy bozor, iqtisodiyot va valuta ittifoqidagi kabi iqtisodiy integratsiyaning quyi shaklidan oliy shakli tomon rivojlanishi yuz bermoqda. Bu mamlakatlar milliy iqtisodiyotini jahon iqtisodiyotining ajralmas qismiga aylantirmoqda.
- **6.**Bugungi globallashuv ish kuchi, kapital, xomashyo, energiya omillari, yangi texnologiyalar oqimini dunyo uzra yoymoqda. Innovatsiyalar umumbashariy miqyosda yuz bermoqda. Bu, *bir tomondan*, iqtisodiy oʻsishni jadallashtirsa, *ikkinchi tomondan*, oʻsishning notekis borishini bildiradi. Ayrim hollarda integratsiya oqibatlari ziddiy hisoblanadi. Uning ijobiyligi

taraqqiyotni tezlatsa, salbiyligi uning gʻoyat notekis borishiga ta'sir qiladi. Dunyo miqyosida turmush darajasi oʻsib borgani holda, qoloq mamlakatlarda aholining katta qismi kambagʻallikda yashamoqda. Iqtisodi zaif mamlakatlarda ishsizlik darajasi kuchli boʻlib, kishilar ish axtarib, oʻz ona yurti va oilalarini tashlab oʻzga yurtlarga ketadilar. Sayoq ishchilarning soni koʻpayadi, ular amalda huquqsiz boʻlib, yashirin mehnat faoliyatini olib boradilar. Shu bois globalizatsiya muqarrar boʻlganida, uning talablari bilan hisoblashib, ularga moslashib yashash talab qilinadi.

MUNDARIJA

SO'ZB	OSHI						7

1-BO'LIM. JAMIYAT IQTISODIY TARAQQIYOTINING UMUMIY ASOSLARI

1-MAVZU. IQTISODIYOT NAZARIYASI FANINING PREDMETI VA VAZIFALARI

1. Iqtisodiyot nazariyasi fanining predmeti va metodi8
2. Iqtisodiyot nazariyasi fanining metodologiyasi10
3. Iqtisodiyot nazariyasidagi asosiy oqimlar17
4. Iqtisodiy kategoriyalar va qonunlar24
5. Iqtisodiyot nazariyasi va davlatning iqtisodiy siyosati
2-MAVZU. IJTIMOIY-IQTISODIY TIZIMLAR VA ULARNING
XUSUSIYATLARI
1. Ijtimoiy-iqtisodiy tizimning mohiyati va belgilari41
2. Iqtisodiy tizimda insonning oʻrni44
3. Ijtimoiy-iqtisodiy tizimda ishlab chiqarishni insonparvarlashtirish48
3- MAVZU. ISHLAB CHIQARISH MUNOSABATLARI VA ULARGA
TA'SIR ETUVCHI OMILLAR
1. Ishlab chiqarish munosabatlarining asosiy sharti58
2. Mehnat unumdorligi va unga ta'sir etuvchi omillar66
3. Takror ishlab chiqarishning mamlakat milliy rivojlanishida oʻrni
va ahamiyati
4-MAVZU. MULKCHILIK MUNOSABATLARI
1. Mulkchilikning iqtisodiy va huquqiy mazmuni78
2. Mulkchilik turli shakllarining vujudga kelishi82
3. Mulkni davlat tasarrufidan chiqarish va xususiylashtirishning
maqsadi va usullari97
4. Oʻzbekistonda mulkdorlar sinfining shakllanishi va uning ahamiyati103
5. Mamlakatning iqtisodiy salohiyati va milliy boyligi107
5-MAVZU. BOZOR IQTISODIYOTI VA UNING
QONUN-QOIDALARI
1. Bozor iqtisodiyoti va uning tub belgilari121
2. Bozorning funksiyalari va tarkibiy tuzilishi
2. Bozor infratuzilmasi
J. DOZOI IIII atuziiii asi

6- MAVZU. OʻZBEKISTONDA BOZOR IQTISODIYOTINI SHAKLLANTIRISH NAZARIYASI

1. Oʻzbekistonning bozor iqtisodiyotiga borishdagi oʻz taraqqiyot yoʻli
2-BO'LIM. MIKROIQTISODIYOT
7-MAVZU. TADBIRKORLIK FAOLIYATI VA UNING TASHKILIY-HUQUQIY SHAKLLARI
1. Tadbirkorlikning mohiyati, belgilari va prinsiplari
8-MAVZU. KORXONA (FIRMA) FAOLIYATI VA UNING IQTISODIY KOʻRSATKICHLARI
 «Korxona (firma)» tushunchasi, belgilari, vazifalari va funksiyalari. Korxona (firma)ni tashkil qilish tamoyillari. Milliy iqtisodiyot rivojlanishida korxona (firma)ning oʻrni va roli. Korxona (firma) xavfsizligini ta'minlashning maqsadi, vazifalari va tamoyillari. Korxona (firma)ning xavfsizlik xizmati, uning tuzilishi va vazifalari. Korxona (firma)ning tijorat sirlari va himoya qilish tartibi.
9-MAVZU. TALAB VA TAKLIF NAZARIYASI
1. Talabning iqtisodiy mohiyati. Talabning oʻzgarib turishiga ta'sir etuvchi omillar
1. Raqobat va uning iqtisodiy mazmuni
1. Menejment faoliyatining iqtisodiy mazmuni, vazifalari270
2. Oʻrta Osiyoda menejmentning nazariy asoslari va tamoyillari

III BOʻLIM. MAKROIQTISODIYOT

12-MAVZU. MAKROIQTISODIY BARQARORLIK, IQTISODIY OʻSISH VA INVESTITSIYA SIYOSATI

1. «Makroiqtisodiyot» tushunchasi, uning asosiy makroiqtisodiy	
koʻrsatkichlari	293
2. Makroiqtisodiy muvozanat. Makroiqtisodiy barqarorlikni ta'minlashda	20
iqtisodiy oʻsish, investitsiyaning ahamiyati	J8
3. Iqtisodiy oʻsishning mazmuni, turlari va koʻrsatkichlari.	22
Iqtisodiy oʻsishni ta'minlashda investitsiyaning ahamiyati	
4. Wakroiqusodiy beqaroriik va iqusodiyotiinig sikingi. Iqusodiy inqiroziar5	41
13-MAVZU. TOVAR-PUL MUNOSABATLARI VA	
NARX SIYOSATI	
1. Pul va uning vazifalari	56
2. Inflatsiya, uning mohiyati va turlari	
3. Pulning qadrini mustahkamlashga qaratilgan chora-tadbirlar36	
5. I tilling quariti mustankamlasnga qaratngan enora tadomar	JŦ
14-MAVZU. MOLIYA-KREDIT MUNOSABATLARI	
1. Moliyaning mohiyati va vazifalari3	74
2. Moliyaviy inqiroz, uning kelib chiqish sabablari, oqibatlari va	
undan chiqish yoʻllari3	79
3. Moliyaviy xavfsizlik va uning ahamiyati39	
4. Kreditning mohiyati. Kreditning mamlakat taraqqiyotidagi oʻrni39	
5. Davlat budjeti, uning shakllanishi va sarflanishi4	05
15-MAVZU. DAVLATNING SOLIQ SIYOSATI	
1. Soliqlarning iqtisodiy va huquqiy mazmuni hamda ularning zarurligi,	
vazifalari4	
2. Soliq tizimi va amal qilishining huquqiy asoslari	
3. Soliqlarning budjet shakllanishida ahamiyati va davlatning fiskal siyosati44	
4. Soliq qonunchiligi buzilishining ijtimoiy-iqtisodiy oqibatlari45	5
5. Huquqni muhofaza qilish organlari xodimlarining davlatning soliq	~ 0
siyosatini qoʻllab-quvvatlash va himoya qilishda roli	58
16-MAVZU. AGRAR SOHADAGI IQTISODIY MUNOSABATLAR	
1. Qishloq xoʻjaligining respublika iqtisodiyotidagi oʻrni va ahamiyati43	72
2. Qishloq xoʻjaligida takror ishlab chiqarishning xususiyatlari48	
3. Qishloq xoʻjaligining mamlakat oziq-ovqat xavfsizligini	
ta'minlashdagi oʻrni4	190
4. Oʻzbekiston agrosanoat kompleksining mohiyati. Uning mamlakat iqtisodiy	
xavfsizligini ta'minlashdagi oʻrni4	96

17-MAVZU. AHOLI DAROMADLARI VA DAVLATNING IJTIMOIY SIYOSATI 1. Daromadlarning iqtisodiy mazmuni......505 3. Bozor va nobozor daromadlar......510 4. Aholi daromadlarining tabaqalanishi va ijtimoiy chegarasi......512 5. Turmush darajasi va uni belgilovchi omillar......532 6. Davlatning ijtimoiy siyosati. Oʻzbekistonda ijtimoiy siyosatning asosiy yoʻnalishlari......542 18-MAVZU. IQTISODIYOTNI TARTIBGA SOLISHDA DAVLATNING ROLI 1. Davlatning bozor iqtisodiyoti sharoitidagi funksiyalari.......553 2. Davlat iqtisodiy siyosatining asosiy yoʻnalishlari......561 19-MAVZU. XUFIYONA IQTISODIYOT: MOHIYATI VA KELIB CHIQISH SABABLARI VA BARTARAF ETISH YOʻLLARI 2. Xufiyona iqtisodiyotning turlari......574 3. Xufiyona iqtisodiyot oqibatlarining statistikasi......581 4. Korrupsiya – xufiyona iqtisodiyotning asosiy koʻrinishi.......589 5. Xufiyona iqtisodiyotga qarshi kurashda davlatning chora-tadbirlari......605 4-BO'LIM. JAHON IQTISODIYOTI 20-MAVZU. JAHON XOʻJALIGI VA GLOBALLASHUV MUAMMOLARI 1. Hozirgi jahon xoʻjaligi va iqtisodiyotining mohiyati. Jahon xoʻjaligining shakllanishi va xususiyatlari......613 2. Globallashuvning mohiyati va oqibatlari......621 3. Globallashuv va ochiq iqtisodiyot......629 4. Oʻzbekistonning global muammolarni hal qilishdagi ishtiroki..................632 5. Xalqaro va milliy iqtisodiy xavfsizlik, uning vazifalari va funksiyalari........633 21- MAVZU. XALQARO SAVDO. XALQARO VALUTA VA KREDIT MUNOSABATLARI 2. Jahon valuta bozori va uning asosiy xususiyatlari......651 3. Xalqaro kreditning mohiyati va funksiyalari. Tashqi qarz masalalari...............660

4. Xalqaro iqtisodiy tashkilotlar670
22-MAVZU. OʻZBEKISTONNING JAHON XOʻJALIGIGA INTEGRATSIYALASHUVI
1. Xalqaro integratsiyaning mohiyati, shart-sharoitlari va darajalari675
2. Integratsiyaning barqarorlik va xavfsizlik kafolati ekanligi
3. Oʻzbekiston milliy iqtisodiyoti – jahon xoʻjaligining
tarkibiy qismi ekanligi. Eksport va import

QOBILOV Sharif Rahimovich, iqtisod fanlari nomzodi, dotsent

IQTISODIYOT NAZARIYASI

Darslik

Muharrir M. S. Rahmonova
Texnik muharrir D. X. Xamidullayev

Bosishga ruxsat etildi 26.03.2013. Nashriyot-hisob tabagʻi 45,0 Adadi 200 nusxa. Buyurtma № . Kelishilgan narxda

Oʻzbekiston Respublikasi IIV Akademiyasi, 1000197, Toshkent sh., Intizor koʻchasi, 68.